


Nuevo Testamento en  
mixteco



New Testament in Mixtec, Atatláhuca (MX:mib:Mixtec,  
Atatláhuca)

**Nuevo Testamento en mixteco**  
**New Testament in Mixtec, Atláhuca (MX:mib:Mixtec, Atláhuca)**

copyright © 1973 Wycliffe Bible Translators, Inc.

Language: Mixtec, Atláhuca

Translation by: Wycliffe Bible Translators, Inc.

Mixteco, Atláhuca [mib], Mexico

**Copyright Information**

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Atláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

## Contents

SAN MATEO . . . . .	1
SAN MARCOS . . . . .	54
SAN LUCAS . . . . .	87
SAN JUAN . . . . .	142
HECHOS . . . . .	183
ROMANOS . . . . .	236
1 CORINTIOS . . . . .	258
2 CORINTIOS . . . . .	279
GÁLATAS . . . . .	293
EFESIOS . . . . .	301
FILIPENSES . . . . .	309
COLOSENSES . . . . .	314
1 TESALONICENSES . . . . .	319
2 TESALONICENSES . . . . .	324
1 TIMOTEO . . . . .	327
2 TIMOTEO . . . . .	333
TITO . . . . .	337
FILEMÓN . . . . .	340
HEBREOS . . . . .	342
SANTIAGO . . . . .	358
1 PEDRO . . . . .	364
2 PEDRO . . . . .	370
1 JUAN . . . . .	374
2 JUAN . . . . .	380
3 JUAN . . . . .	381
JUDAS . . . . .	382
APOCALIPSIS . . . . .	384

## JNUHUN VAHA NI TEE SAN MATEO

*Lista ñayuu yucūn jeē ní quiji Jesucristo*

*(Lc. 3.23-38)*

<sup>1</sup> Yāha cúu lista ñayuu yucūn jeē ní quiji Jesucristo. Te máá yá ni quiji nuū yucūn rey David, te David ni quiji nuū yucūn Abraham.

<sup>2</sup> Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i.

<sup>3</sup> Te Judá ni cuu de tátá Fares jíin Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram.

<sup>4</sup> Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón.

<sup>5</sup> Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí.

<sup>6</sup> Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xīhna gā ni cuu ña ñasihí Urías.

<sup>7</sup> Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa.

<sup>8</sup> Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías.

<sup>9</sup> Te Uzías ni cuu de tátá Jotam, te Jotam ni cuu de tátá Acáz, te Acáz ni cuu de tátá Ezequías.

<sup>10</sup> Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías.

<sup>11</sup> Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

<sup>12</sup> Te náa cáyucú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel.

<sup>13</sup> Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor.

<sup>14</sup> Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud.

<sup>15</sup> Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob.

<sup>16</sup> Te Jacob ni cuu de tátá José, tēe ni cuu yíi María. Te María ni cuu ña náná Jesús, Yaā naní Cristo.

<sup>17</sup> Te nde Abraham te nde David ni iyo uxī cuūn yucūn. Te nde David te nde náa cuángoo ñayuu Israel preso ñuu Babilonia ni iyo inga uxī cuūn yucūn. Te nde ná ni jengoo i preso te nde ni cacu Cristo, suni ni iyo inga uxī cuūn yucūn.

*Jeē ní cacu Jesucristo*

*(Lc. 2.1-7)*

<sup>18</sup> Te jeē ní cacu Jesucristo, súcuan ni cuu: Náná yā María, je ni cundaā jeē quijnáhan ña jíin José. Te nde ná tu quijnáhan ña jíin de, te ni jecūhun séhe ña ni sáha Espíritu Santo.

<sup>19</sup> Te José, tēe quijnáhan ña jíin, chi tēe ndaā cúu de. Te tu ní cúní de cuāha de jnūhun canu ña, chi sa cúní de jeē na jécuiñī sáhi jeē ma quijnáhan de jíin ña.

<sup>20</sup> Te níní súcuan nácani ni de, te jíin jéni ni quee-ni ñn ndajéhé maá Jítoho yō Yaā Dios nuū de, te ni cahān yā jíin de:

José, sēhe yucūn David, ma yūhu ró cueca ró ñasihí ró María, chi sēhe jeē scácu ña, vēji i nde nuū maá Espíritu Santo.

<sup>21</sup> Te scácu ña ñn sēhe yíi. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

<sup>22</sup> Súcuan ni cuu tācá jniñu yáha, návāha squícu jnūhun Jítoho yō Yaā Dios jeē ni cahān tēe ni nacani jnūhun ya nde jenahán. Te suhva ni cahān de:

<sup>23</sup> Coó ñn sūchi síhí, te nihīn séhe i, te scácu i ñn sēhe yíi,

te conaní sūchí un Emanuel.

Achí tutu. Te síhví yáha cúní cahān: Yaā Dios ndeé yá jíin yó.

<sup>24</sup> Te ni natahū ni José, te ni sáha de nájñūhun ni cahān ndajéhé Jítoho yō jíin de. Te ni jeca de María ni cuu ña ñasihí de.

<sup>25</sup> Te tu ní quíxí de jíin ña, chi nde ni scácu ña sēhe yí nūú ña. Te ni snaní de i Jesús.

*Jeē ní quijicoo tēe mago nuū yā*

## 2

<sup>1</sup> Te ná ni cacu Jesús ini ñuu Belén ndañúu Judea, te tiempo un ndácu rey Herodes jniñu. Yūcuán na te jecu tēe ndíchí jēe cascuáha siquī quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén.

<sup>2</sup> Te ni cacajnūhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi nūú cáne niāndii ni cajito ná ñn quími cáhnu jeē cúu seña jeē ní cacu i. Te vējicoo ná chiñúhún ná i, áchí de.

<sup>3</sup> Te rey Herodes, ná ni jini de jnūhun yáha, te ni cunéé ni de, nde jíin táca ñáyuu ñuu Jerusalén.

<sup>4</sup> Te ni nastútú de táca sūtū cácujuhnu jíin tēe cástéén tutu ley Yaā Dios nuū ñáyuu. Te ni cajnūhún de tēe un ndé nuū cacu Cristo achí tutu.

<sup>5</sup> Te ni cacachi nuū de:

Ini ñuu Belén ndañúu Judea. Chi suhva cáhán nuū tútu ni tee tēe ni nacani jnūhun ya nde jenahán:

<sup>6</sup> Te róhó ñáyuu ñuu Belén ndañúu Judá,

cújéhnu ga ñuu rō vēsú táca gá jeē cújéhnu ini Judá.

Chi suu ini ñuu rō quenda ñn Yaā ndacu jniñu,

te coto ya ñayuu maá rí Israel, achí Yaā Dios.

Achí tutu.

<sup>7</sup> Yūcuán na te Herodes ni cana sáhi de táca tēe ndíchí un jēe naní mago. Te ni cajnūhun yúcún de ndé quívi ní cane quími ún.

<sup>8</sup> Te ni tají de tēe un quíngoo de ñuu Belén. Te ni cahán de:

Cuangoo ní te cajnūhun yúcún ní ndé nuū íne sūchí lúlí un. Te nūú ni naniñn ní i, te quijicoo ní castūhun ní nuū ná, návāha suni máá ná quichiñúhún ná i, áchí rey.

<sup>9</sup> Te jeē ní cajini de jnūhun ni cahán rey, te cuangoo de. Te máá quími cáhnu jeē ní cajito de ichi nūú cáne niāndii, yósnúu nūú de cuahán nde ni

jinū nuū íne sūchí lúlí un, te yūcuan ní jecuiñi.

<sup>10</sup> Te ná ni cajito de jeē ní jecuiñi quími ún, te yōhyo ni cacusiñi de.

<sup>11</sup> Te ni jinūcoo de ni quívicoo de ini vehe, te ni cajito de nuū sūchí lúlí un jíin náná i María. Te ni cajecuiñi yití de nuū i, te ni cachiñúhún de i. Te ni canune de yejnū de, te ni casocō de oro jíin súje cútú jíin súje uvuā nuū i.

<sup>12</sup> Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

*Jeē ní jinu José cuangoo de nación Egipto*

<sup>13</sup> Te náa cuánuhun táca tēe mago, te ni scóto jēni José jeē ñn ndajéhé maá Jítoho yō Yaā Dios ni cahán yā jíin de:

Ndocuiñi te cunu ró quíngoo ró jíin sūchí lúlí jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchí lúlí jíin jeē cáhni de i. Achí yá.

<sup>14</sup> Te ni natahū ni José. Te cuangoo de jíin sūchí lúlí jíin náná i, te ñuú ní cajica de cuangoo de nación Egipto.

<sup>15</sup> Te ni coyūcú de yūcuan ndé ni jihí Herodes. Te súcuan ni cuu návāha squícu jnūhun Jítoho yō Yaā Dios jeē ní cahán tēe ni nacani jnūhun ya nde jenahán: Nde nación Egipto ni cana ri Sēhe ri vēji i, áchí Yaā Dios, achí tutu.

*Jeē ní ndacu Herodes jniñu jeē na cúu táca sūchí yí lúlí*

<sup>16</sup> Yūcuán na te Herodes ni jini de jeē súcuan ni castáhú tēe mago un de, te yōhyo ni quití ni de. Te ni tají de soldado cuangoo, te ni cajehni táca sūchí yí lúlí jēe uú cuiyā jíin jēe yiquín gá jeē cáyūcú ini ñuu Belén jíin táca ñuu yajni. Chi je ni cajnūhun yúcún de táca tēe mago un nasaa tiempo ni cuu jeē ní cacu Jesús.

<sup>17</sup> Te súcuan ni squícu jnūhun ni cahán Jeremías, tēe ni nacani jnūhun Yaā Dios nde jenahán, chi ni cahán de:

<sup>18</sup> Ini región Ramá ni jini sōho ri jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña,

te tu cácu ni ña ndusñi ni ña, chi ni cajihí i.

Achí tutu.

<sup>19</sup> Yūcuán na te ni jihí Herodes. Te ni scóto jēni José jeē ñn ndajéhé Jitoho yō Yaā Dios ni cahān yā jín de nuū ndeé de nación Egipto.

<sup>20</sup> Te ni cahān yā jín de:

Ndocuññi te nuhun rō ñuu rō Israel jín súchi lúli jín náná i. Chi je ni cajihí tēe cánducú cahni sūchi lúli jínā nuú. Achí ndajéhé.

<sup>21</sup> Yūcuán na te ni ndocuññi de, te cuanuhun de nación Israel jín súchi lúli jín náná i.

<sup>22</sup> Te ni nihñ de jñuhun jeē Arquelao ni nucuññi de nuū tatá de Herodes, te máa de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhñ de región Galilea, te cuango de.

<sup>23</sup> Te ni jinū de yūcuán, te ni coyūcú de ñuu naní Nazaret. Súcuan ni cuu návaha squícu jñuhun ni cacahān tēe ni canacani jñuhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

*Jñuhun Juan tēe scuándute*  
(Mr. 1.1-8; Lc. 3.1-9, 15-17;  
Jn. 1.19-28)

### 3

<sup>1</sup> Te ni yāha tiempo, te ni jinū Juan tēe scuándute nde nuū ñuhun téhé ndañū Judea, nacani de jñuhun suhva:

<sup>2</sup> Nacani ni rō jijnáhan ró jéé stóo ró cuéchi ró, chi je ni cuyajni Yaā ndeé andiví jéé ndacu ya jniñu nuū rō. Achí de.

<sup>3</sup> Te Isaías, tēe ni nacani jñuhun Yaā Dios nde jenahán, suhva ni tee de jñuhun Juan nuū tútu:

Coo ñn tēe cana jee nde nuū ñuhun téhé:

Sátuhva ró máa ró jijnáhan ró, chi quee maá Jitoho yō.

Te sáha ró jniñu ndaā, chi vēji ya, achi de.

Achí Isaías.

<sup>4</sup> Te sahna ñuhun Juan cúu ixi quiti nání camello, te núhñi ñn cinturón

ññi chíji de. Te jeē técu de cúu tíca ndicuéhyí jín ndúxi yocō.

<sup>5</sup> Te ñayuu ñuu Jerusalén jín táca ñayuu región Judea jín ñayuu yúcu yajni yuyúte Jordán, ni quijicoo i nuū de.

<sup>6</sup> Te ni canacani ndaā i cuéchi i nuū Yaā Dios, te ni scuándute de i ini yúte Jordán.

<sup>7</sup> Te ná ni jito de jeē véjicoo cuehē tēe grupo fariseo jín tēe grupo saduceo nuū scuándute de, te ni cahān de jín:

Va sēhe coō cácu ró, chi xeēn rō nájnūhun coō. ¿A cájeni ni rō jeē cuu cunu ró cácu ró núu castigo xeēn jeē quíji?

<sup>8</sup> Núu súcuan te sáha ró jniñu váha, te súcuan stéén rō jeē ní canacani ndije ni rō jeē stóo ró cuéchi ró.

<sup>9</sup> Te ma cáni ni rō cahān rō jeē cuu cácu ró síquí jeē cácu ró yúcūn Abraham. Chi cáhán rī jín ró jeē cuu sáha Yaā Dios jeē táca yúu yáha nduu sēhe Abraham jeē candíje váha, te núu cúní yā.

<sup>10</sup> Te cácu ró nájnūhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájnūhun je íyó túhva ñn cāa jeē cahnde nde yoho yujnu. Núu súcuan te sáha ya jín ró nájnūhun jín táca yujnu jeē tu cúun ndehē váha, jeē tahndé te cayū nuū ñuhún.

<sup>11</sup> Te ruhū chi jín ndute scuándute ri rohó, te yūcuan cúu jeē steén rō jeē ní canacani ni rō jeē stóo ró cuéchi ró. Te Yaā jeē quíji, chi nájnūhun scuándute ya rohó cúu jeē cuáha ya Espiritu Santo condee ini anuá rō, te poder yā cúu nájnūhun ñuhún. Te Yaā quiji chi cújéhu ndasí yá. Chi tú na vé jéhu cuiti cúu ri nuū yā, ni jeē cuajniñu ri nuū yā vēsú ñn jniñu lúli gá nájnūhun jeē quénehen ri ndijēn yā.

<sup>12</sup> Te sáha ya nájnūhun sáha tēe scánda trigo, chi sásñn ya ñayuu váha jín ñayuu cunéé, nájnūhun cúndoo trigo jeē quénda sñn paja. Te nastútú yá trigo yā ndiví ini yacā yā. Te paja chi jnaa yā nuū ñuhún jeē ma ndahvá cuiti. Achí Juan.

*Jeē ní jendute Jesús*  
(Mr. 1.9-11; Lc. 3.21-22)

<sup>13</sup> Yūcuán na te ni quenda Jesús región Galilea, te ni quee yā yūte Jordán nuū íne Juan, návaha scuándute de ya.

<sup>14</sup> Te tu ní cúní Juan scuándute de ya, chi ni cahān de jíin yá:

Sa suhva cánuú jeē scuándute máá ní sãñá, ¿te ndese cúu jeē sa nuū ná vēji ní? áchí de.

<sup>15</sup> Te ni cahān Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya.

<sup>16</sup> Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cún Espíritu Yaā Dios vēji, te cáa nájnūhun ñ paloma, te ni quee xinī yā.

<sup>17</sup> Te ichi andiví ni cahān ñ jnūhun:

Yáha cúu Sēhe ri jeē maní ndasí rí jíin, te yōhyo cúsiñ ní rí jíin, áchí.

*Jeē ní jito ndee jexeén Jesús*  
(Mr. 1.12-13; Lc. 4.1-13)

#### 4

<sup>1</sup> Yūcuán na te ni jinū Jesús nde nuū ñūhun téhé ní sáha Espíritu Santo. Te yūcuán coto ndee jexeén yā, chi cúní jeē sáha ya cuēchi.

<sup>2</sup> Te ni ñyo ndite ni yā uū xico nduú uū xico ñuú, sáa te jíi yā sōco.

<sup>3</sup> Te ni quee máá jéxeén jeē coto ndee un yá, te ni cahān jíin yá:

Núu máá ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

<sup>4</sup> Te ni cahān yā jíin:

Tuú chi yósó núu tútu ñ: Nasūu máni máá jíin stáa cátecu ñayuu, chi suni jíin táca jnūhun cáhán Yaā Dios, achí yá.

<sup>5</sup> Yūcuán na te cuahān jexeén un jíin yá nde ñuu ñ Jerusalén. Te ni jeni ya xinī torre templo.

<sup>6</sup> Te ni cahān jíin yá:

Te núu Sēhe Yaā Dios cúu ró, te sǐngava ró máá ró nde nuū ñūhun, chi jnama ya rohó. Chi yósó núu tútu:

Tejniñu ya ndajéhé yā quiijicoo coto rohó.

Te cunundee yā rohó jíināhan ya, návaha ma cáchihi ró jéhē rō nuū yuú. Achí tutu. Achí jexeén.

<sup>7</sup> Te ni cahān Jesús:

Tuú chi suni yósó núu tútu jeē ma coto ndee ñayuu Jitoho i Yaā Dios, núu jnama ya i chí tuú, áchí yá.

<sup>8</sup> Te jexeén un ní jeca tucu ya cuahān jíin yá nde xinī ñ yucu súcún ndasí. Te ni steén táca nación ñí cáhnu ñayiví núu yā, te yōhyo luu cáa ndíhi.

<sup>9</sup> Te ni cahān jíin yá:

Táca ñuu yáha cuáha ri nuū rō, te núu cuiñi yítí ró chinúhún ró ruhū, achí.

<sup>10</sup> Yūcuán na te ni cahān Jesús nuū jexeén:

Satanás, cujiyo quihīn rō, chi yósó núu tútu jeē chinúhún ñayuu máá Jitoho i Yaā Dios, te nuū máa-ni ya cuajniñu i. Achí yá.

<sup>11</sup> Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejniñu nuū yā.

*Jeē ní quejéé Jesús nácani ya jnūhun región Galilea*

(Mr. 1.14-15; Lc. 4.14-15)

<sup>12</sup> Te ná ni nihīn Jesús jnūhun jeē íne Juan vecāa, te cuanuhun yā región Galilea.

<sup>13</sup> Te tu ní cóndee yā ñuu Nazaret, chi ni jehēn yā ni condee yā ñuu Capernaum. Te ñuu un íne yumar, máá región Zabulón jíin Neftalí.

<sup>14</sup> Te súcuan ni squícu jnūhun ni tee Isaías, tēe ni nacani jnūhun Yaā Dios nde jenahán:

<sup>15</sup> Región Zabulón jíin Neftalí, ichi jeē yíhi yumar, lado yūte Jordán nuū cáne niāndii,

jíin región Galilea nuū cáyucú ñayuu táca nación tu jíin jnūhun ya.

<sup>16</sup> Ñayuu ún chi nájnūhun cáyucú i nuū néē,

te coto i nájnūhun ñ luz cáhnu. Te ñayuu je yajni naa, nihīn i jnūhun váha ndasí,

suu jnūhun jeē jnama ya anuá i. Achí Isaías.

17 Te nde quiví yúcuán ní quejéé Jesús nacani ya jnūhun, te ni cahān yā suhva:

Nacani ni rō jijnáhan ró jéé stóo ró cuéchi ró, chí je ni cuyajni Yaā ndeé andiví jéé ndacu ya jniñu nuū rō, achí yá.

*Jeē ní cana ya cuūn tēe jnī chācá*  
(Mr. 1.16-20; Lc. 5.1-11)

18 Te jica Jesús yumar Galilea cuahān yā. Te ni jito ya nuū uú jnáhan ñani. Te ñn de cúu Simón jeē suni nání Pedro, te inga de cúu Andrés. Te tēe cájni chācá cácuu de, te cásinga de ñunu de ini mar.

19 Te ni cahān yā jíin de:

Condiquīn ruhū na quihín yō, te nasáha rī rohó tēe nihīn cuehē ñayuu candíje ruhū, nájnūhun cánihīn rō chācá, achí yá.

20 Yūcuán na te ni castóo-ni de ñunu de, te ni candiquīn de ya.

21 Te ni jica ya jecu gā, te ni jito ya nuū inga uú jnáhan ñani. Te cácuu de Jacobo jíin Juan, sēhe Zebedeo. Te cáyūcú de ini barco jíin tátá de Zebedeo, cánachijnī de ñunu de. Te suni ni cana ya de jeē cóndiquīn de ya.

22 Te ni castóo-ni de tátá de jíin barco, te ni candiquīn de ya cuango de.

*Jeē ní stéén yā nuū cuehē ñayuu*  
(Lc. 6.17-19)

23 Te ni jica cuu Jesús ní región Galilea, ni steén yā jnūhun ini tācá vehe iī jeē cúu sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácuu tācá-ni cuehyī.

24 Te ni jitē núu jnūhun ya cuahān ní región Siria. Te nuū yā ni caquindeca i tāca ñayuu cácuu, ñayuu cándoho tijni nuū cuehyí, jíin jéé jetú, jíin jéé ñūhun tachī ini, jíin jéé jihí yihí, jíin jéé ni íjin. Te ni nasávāha ya i jíin náhan i.

25 Te cuehē ñayuu región Galilea jíin Decápolis, jíin ñayuu ñuu Jerusalén jíin región Judea, jíin tāca ñuu ichi núu cāne niāndii yūte Jordán, ni candiquīn i ya.

*Jeē ní nacani ya jnūhun nde nuū yúcu*

## 5

1 Te ni jito Jesús nuū ñayuu cuehē. Te ni caa ya yucu cuahān yā, te ni cucōo ya. Te tēe cáscuáha jíin yá, ni jinūcoo de nuū yā yūcuán.

2 Te ni quejéé yá ni steén yā tāca jnūhun yáha nuū de:

*Jnūhun yōhyo ndetū*  
(Lc. 6.20-23)

3 Yōhyo ndetū ñayuu jeē cánacuni i jeē tu íyó váha ánuá i síquī cuéchi i, chí je ni quivícoo i ndaha Yaā andiví jéé ndácu ya jniñu nuū i.

4 Yōhyo ndetū ñayuu cácuuhyá ni, chí ndusiñi i sáha Yaā Dios.

5 Yōhyo ndetū ñayuu cáhīyo vītá suchí ini, chí ni jejnūhun ya jeē cu-tahū i ñayiví.

6 Yōhyo ndetū ñayuu jeē nájnūhun jeē cáji i sōco cájichī i, súcuán jnāá i sáha i jniñu ndaā, chí máá yá chindéé ñáhán yá i jeē cuu sáha i.

7 Yōhyo ndetū ñayuu cákundáhú ni jnáhan, chí suni cundáhú ni Yaā Dios i.

8 Yōhyo ndetū ñayuu cáhīyo ndoo ini anuá, chí coto i nuū Yaā Dios.

9 Yōhyo ndetū ñayuu cánasámanī jnáhan, chí cahān Yaā Dios jeē sēhe ya cácuu i.

10 Yōhyo ndetū ñayuu jeē cájito xeēn inga ñayuu i síquī jeē casáha i jniñu ndaā, chí je ni quivícoo i ndaha Yaā andiví jéé ndácu ya jniñu nuū i.

11 Yōhyo ndetū maá ró jijnáhan ró núu cácahān neé i nuū rō jeē síquī ruhū, te coto xeēn i rohó, te stáú yáhu i rohó, vēsú tú cuéchi ró.

12 Na cúsiñi ni rō jijnáhan ró núu súcuán, te sa víhyá gā cusīñi ni rō, chí cáhnu ndasí coo tahū rō nde andiví. Chí suni súcuán ni cajito xeēn i tāca tēe ni canacani jnūhun Yaā Dios jeē ní quijicoo xīhna gā vēsú rohó.

*Jnūhun yátá síquī ñī jíin síquī luz*  
(Mr. 9.50; Lc. 14.34-35)

13 Máá ró jijnáhan ró cájejniñu ró ini ñayiví nájnūhun jéjniñu ñī nuū cúñu návāha tú tehyū. Te núu ñī ún na



nāa jeē uhvuá, ¿te ndese nduu uhvuá tucu? Tuá cuajniñu cuiṭi gā, chi sa cate ñayuu te cueñū i siquī.

14 'Máa ró cácuu nájñūhun luz jeē steén ini anuá ñayuu ñayiví. Te cácuu ró nájñūhun ññ nuu íne xinī yúcu, jeē ma cúu quisāhí.

15 Te ni tu nástññ ñayuu ññ lámpara te chune i chíji cajón, chí sa suhva jéni i nuū sucún, návāha cundijin nuū tāca jéē cáyūcú ini vehe.

16 Te suni súcuan na steén rō luz maá ró nuū tāca ñayuu, te suu cúu jeē cúni i jniñu váha cásáha ró, te cahān i jeē yóhoyo váha Yaā cúu Tátá rō jeē ndeé yá andiví.

### *Jeē ni steén yā siquī ley Yaā Dios*

17 'Ma cáni ni rō jijnáhan ró jéē véji ri snáa rī ley jeē ni jéhe Yaā Dios nuū Moisés, jín jéē snáa rī tāca jñūhun ni cacahān tēe ni canacani jñūhun ya jenahán. Tú véji ri jeē snáa rī, chí sa suhva jeē steén cají rí jñūhun ndíso.

18 Chi jendaá cahán rī jín ró jeē núu níní iyó andiví jín ñáyiví, te ma náa cuiṭi ni ññ punto ni ññ letra nuū tútu ley yā, chí nde na squícu tācá ndihí jñūhun jeē cahán.

19 Núu súcuan te núu ññ ñayuu tu squícu i ññ jñūhun yáha jéē ndácu ley yā, vésú ññ jñūhun lulí gá cúu, te núu steén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ññ ñayuu squícu i te steén i jeē squícu ñayuu, yūcuán na te cujéhnu i ichi andiví nuū ndácu Yaā Dios jniñu.

20 Chi cáhán rī jín ró jeē núu tú coo ndaā gā jniñu cásáha ró vésú jniñu cásáha tēe cásteén tutu ley yā jín tēe grupo fariseo, te ma quívicoo cuiṭi rō ndaha Yaā andiví jéē ndacu ya jniñu nuū rō.

### *Jeē ni steén yā jeē ma quiṭi ni yō (Lc. 12.57-59)*

21 'Je ni cajini ró jñūhun ni cacahān jín ñáyuu jenahán, jeē ma cáhni i ndīyí, te na-ni ñayuu núu cahni i ndīyí, te cundaā cuéchi i nuū tāca tóhō, achí.

22 Te ruhū chí cáhán rī jín ró, vésú núu máa jéē quiṭi ni ññ ñayuu jito i jnáhan i, suni cundaā siquī cuéchi i ún. Te núu ññ ñayuu cahān neé i nuū jnáhan i, núu súcuan te cundaā cuéchi i un núu justicia cujéhnu ga. Te núu ññ ñayuu cahān i nuū jnáhan i: Róhó jéē canéé íi, achi i, núu súcuan te quiṭi i nuū ññuhún infierno te núu ma nácani ni i.

23 'Jeē yúcuan te núu ni jín rō nuū altar jín jéē socó rō nuū Yaā Dios, te núu ni nucūhun ni rō jeē ni sáha ró cuéchi siquī jnáhan ró,

24 núu súcuan te squéndōo ró jéē socó rō ún xiin altar, te xīhna gā quihīn rō ndumanī rō jín jnáhan ró. Yūcuán na te nandicó ró socó rō.

25 'Te núu ññ ñayuu quihīn i jín ró nuū tohó jeē cacān i cuéchi siquī rō, núu súcuan te níní cuáhān rō jín i ichi te sándaā maá ró jín i, návāha ma squíví i róhó núu juez. Chí juez siáha de róhó núu policía, te chune de róhó vecāa.

26 Te jendaá cahán rī jín ró jeē ma quénda cuiṭi rō yūcuán, chí nde chunaa rō ndihí cuiṭi xūhun jéē cájicān de.

### *Jeē ni steén yā jeē ma cósiquí ndeē jnáhan*

27 'Ni cajini ró jñūhun ni cacahān jenahán jeē ma cósiquí ndeē jnáhan ñayuu.

28 Te ruhū chí cáhán rī jín ró jeē núu ññ tēe ndéhe de nuū ññ ñahan jeē ndíyo ni de ññ, yūcuán na te je ni casíquí ndeē de ññahan ún ini anuá de.

29 'Núu súcuan te núu tinūu lado váha ró sáha jeē quiṭi ró cuéchi, váha ga quenehen ró te scáne ró, návāha tuá sáha ró cuéchi. Chí váha gā jeē náa ññ tinūu ró vésú jeē cóo ndihí yiquí cúñu rō te quihīn rō infierno.

30 Te núu ndaha váha ró sáha jeē quiṭi ró cuéchi, váha ga cahnde rō te scáne ró, návāha tuá sáha ró cuéchi. Chí váha ga jeē náa ññ ndaha ró vésú jeē cóo ndihí yiquí cúñu rō te quihīn rō infierno.

### *Jeē ni steén yā jeē ma ndusññ jnáhan (Mt. 19.9; Mr. 10.11-12; Lc. 16.18)*

31 'Te suni ni cacahān nde jenahān: Núu ndé ìn cúní stóo ñasihí, te na cuāha acta nuū ña jeē ndusìn jíin ña.

32 Te ruhū chi sa cāhān rī jíin ró jeē núu ìn tēe stóo de ñasihí de, te núu nasūu jéē tíjñi ni ña, núu súcuan te sáha de jeē casíquí ndéē ña de, chi condee ña jíin inga tēe. Te núu ìn tēe condeca de ñahan ní ndusìn, suni casíquí ndéē de ña.

*Jeē ni stéén yā sīquī jnúhun jéjñuhun téyí*

33 'Te suni ni cajini ró jnúhun jeē ni cāhān jíin ñayuu nde jenahān: Núu ni jejnūhun téyí ró jeē squícu ró, jíto jínúū Yaā Dios, núu súcuan te cánuú squícu ró jéē ni cāhān teyí ró un, áchí.

34 Te ruhū chi cāhān rī jíin ró jínáhan ró jeē ní ìn sīquī jñíñu ma cāhān teyí ró nde jíin síhví Yaā Dios, ni ma cāhān teyí ró jeē jíto jínúū yā. Te núu jéjñuhun téyí ró te tú vāha jeē ndácunehen ró andíví ni ñayíví. Chi andíví cúu nuū ìn mesa nuū ndácu Yaā Dios jñíñu.

35 Te ñayíví cúu nájnūhun teyū nuū ìn jehē yā. Te ni ma ndácunehen ró ñuu Jerusalén, chi suu cúu ñuu maá Yáa cúu Rey cujéhnu.

36 Ni ma cāhān rō jeē na cóndee cuēchi sīquī rō núu tu squícu ró. Ma cāhān rō súcuan, chi ma cúu cuítí sáha ró jéē ni ìn ixí xíní rō nducuíjín chí ndujnúú.

37 Chi suhva-ni cāhān rō: Cúu, achi rō. Tuú, achi rō. Chi núu chisóó gá rō jnúhun cāhān rō, te nuū jexeén vēji.

*Jeē ni stéén yā jeē ma cuāha yó jéē ndútahū ñayuu*  
(Lc. 6.29-30)

38 'Ni cajini ró jnúhun jeē ni cāhān jíin ñayuu jenahān: Núu ìn tēe ndahva de tinūu jnāhan de, suni súcuan na ndáhva tinūú de. Te núu ìn tēe stáva de jnúhun jnāhan de, suni súcuan na stáva jnúhun de, áchí.

39 Te ruhū chi sa cāhān rī jíin ró: Ma nácuāha ró jéē ndútahū tēe sáha ndevāha jíin ró. Chi sa núu ndé tēe cani de yíquí núú lado váha ró, te vāha

ga suni cuāha ró inga lado cani de, vēsú jeē nácuāha ró jéē ndútahū de.

40 Te núu ndé tēe stáú yáhu de rōhó te quénde de camisa rō, suni cuāha ró jnúhun jeē na quíhín de jíin ndé ticāchi ró.

41 Te núu ndé tēe scāca de rōhó jéē condiso ró ndajníñu de ìn kilómetro, te caca ró úu kilómetro jíin de.

42 Te na-ni ñayuu núu jícán i ndajníñu ró, te cuāha ró núu i. Te ñayuu jícán núu ndajníñu nuū rō, ma sasáhān ró cuāha ró núu i.

*Jnúhun jeē cundáhú ni yō ñayuu cájito uhū yohó*  
(Lc. 6.27-28, 32-36)

43 'Te suni ni cajini ró jnúhun jeē ni cāhān nde jenahān: Cundáhú ni rō ñayuu cāhīyo manī jíin ró, te coto uhū rō ñayuu cájito uhū rohó, áchí.

44 Te ruhū chi sa cāhān rī jíin ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha sīquī rō. Te sáha vāha ró jíin ñayuu cáquíñi ni nuū rō. Te cacān tahú rō jehē ñayuu cácahān neé núu rō te cájito xeēn i rōhó.

45 Te súcuan stéén rō jeē cácuu ró séhe máá Tátá rō, Yaā ndeé andíví, chi máá yá jéhe niāndii cúndijin nuū ñayuu cunéé jíin ñayuu váha. Te jéhe ya saū nuū ñayuu casáha jñíñu ndaā jíin núu ñayuu casáha jñíñu néé.

46 Chi núu íyó mání rō jíin máá-ni ñayuu jeē maní jíin ró, te tú na tahū nihīn rō nuū yā. Chi nde tēe cástútú xúhun renta jeē castáhú, suni súcuan casáha de.

47 Te núu máni jnāhan ró cāhān yíñuhún ró jíin, ¿te na vé jeē váha ga sáha ró núu súcuan? Chi nde ñayuu tu cácaandíje Yaā Dios, suni súcuan casáha i.

48 Núu súcuan te ndaā na cóo ndíhi jeē sáha ró, nájnūhun íyó ndaā ndíhi jeē sáha Tátá rō, Yaā ndeé andíví.

*Jeē ni stéén yā ndese sáha yó jñíñu váha*

## 6

1 'Te jeē sáha ró táca jñíñu váha nuū Yaā Dios, coto ró jéē ma sáha ró máá

síquī jeē cúni ñayuu te cuajnúhún i róhó. Chi núu súcuan sáha ró, te tú na tahū rō cuāha máá Tátá rō, Yaā ndeé andiví.

<sup>2</sup> Jeē yúcuan te jeē sáha ró caridad, te ma sáha ró jéē cúni tāca ñáyuu, nájnūhun cásáha tēe stáhú-ni, cáhīn de nuū cúchitú ñayuu ini tācá vehe īi sinagoga jíin núu yáhu. Chi súcuan cásáha de návāha cuajnúhún ñayuu de jeē váha cásáha de. Jendaá cahán rī jíin ró jeē tahū de cúu jeē jejnúhún ñayuu de.

<sup>3</sup> Te róhó jíjnáhan ró, núu cásáha ró caridad, te sáha yuhu rō, návāha nde amigo vāha ró tú cuni jeē sáha ró.

<sup>4</sup> Súcuan na sáha yuhu rō caridad. Te máá Tátá rō jeē jíto ya jeē sáha yuhu rō, ñin quiví te cuāha ya tahū cuu ró.

*Jeē ni stéén yā ndese cacān tahú yō  
(Lc. 11.2-4)*

<sup>5</sup> Te jeē cájicān tahú rō, te ma sáha ró nájnūhun cásáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini tācá vehe īi sinagoga jíin tāca yíqui yáhu, návāha cuni ñayuu te cuajnúhún i de. Jendaá cahán rī jíin ró jeē máá yúcuan-ni cúu tahū jeē nihín de, suu jeē jejnúhún ñayuu de.

<sup>6</sup> Te róhó jíjnáhan ró, núu cájicān tahú rō, te ndiví ró ini vehe ró te casí rō yehyí. Te cacān tahú rō nuū máá Tátá rō, Yaā ndeé yuhu jíin ró. Yūcuán na te máá Tátá rō jeē jíto ya jeē súcuan sáha yuhu rō, sáha ya jeē jíicán rō.

<sup>7</sup> Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájnūhun cásáha ñayuu tu cájini jnūhun Yaā Dios. Chi cájeni ni i jeē núu cuehē jnūhun súcuan cahán i, te saá te cuni sōho ya, te tuú.

<sup>8</sup> Núu súcuan te ma sáha ró nájnūhun cásáha máá i. Chi máá Tátá rō, je jíin yā na vé cájini ñúhún ró nde ná tu cacān rō nuū yā.

<sup>9</sup> Núu súcuan te suhva cacān tahú rō; Tátá máá ná jíjnáhan ná jéē ndeé ní andiví, níni na cóo yíñúhún ná nuū ní, chi Yaā īi cúu ní.

<sup>10</sup> Te ñúhun ni na jéē yachī quiji quiví ndacu ní jniñu ní ñáyiví yáha.

Te na cóo tācá jniñu nújnahan ni ní, nájnūhun iyó ini andiví, súcuan na cóo ini ñáyiví.

<sup>11</sup> Staā jeē cátecu na tāca quiví, cuāha ní núu ná vijna.

<sup>12</sup> Te cone cahnu ni ni núu tāca cuéchi cásáha ná nuū ní, nájnūhun cáhine cáhnu ni na núu ñáyuu casáha cuéchi nuū ná.

<sup>13</sup> Te ma cuáha ni jnúhun jeē coto ndee jexeén sāñá, chi sa suhva jnama ní sáña núu tāca jéē neé.

Chi máá ní cúu Yaā ndacu jniñu, te jnī ní poder,

te yōhyo luu cújéhnú ní ní cáni. Súcuan na cóo. Amén.

Achi rō jíjnáhan ró.

<sup>14</sup> Chi núu cone cáhnu ni rō nuū ñáyuu casáha cuéchi nuū rō, te suni súcuan cone cáhnu ni máá Tátá rō andiví nuū cuéchi ró.

<sup>15</sup> Te núu ma cóne cáhnu ni rō nuū ñáyuu casáha cuéchi nuū rō, te suni súcuan ma cóne cáhnu ni máá Tátá rō nuū cuéchi ró jíjnáhan ró.

*Jeē ni stéén yā síquī jnúhun condite ni*

<sup>16</sup> Te núu condite ni rō jeē chiñúhún ró Yaā Dios, te ma sáha ró nájnūhun cásáha tēe stáhú-ni. Chi cásáha de jeē coto xii de, te súcuan stéén de nuū ñayuu jeē iyó ndite ni de, návāha cuajnúhún i de. Jendaá cahán rī jíin ró jeē máá yúcuan-ni cúu tahū jeē nihín de, suu jeē jejnúhún ñayuu de.

<sup>17</sup> Te máá ró jíjnáhan ró, núu iyó ndite ni rō, te sa chuhun vāha ró xini rō te nandahá núu rō,

<sup>18</sup> návāha ma cúni ñayuu jeē iyó ndite ni rō. Chi máá-ni Tátá rō jeē ndeé yuhu yā jíin ró, cuni yā, te ñin quiví te cuāha ya tahū cuu ró.

*Ndese coo cúcá yó nde andiví  
(Lc. 12.33-34)*

<sup>19</sup> Ma cóndihvī ni rō caya rō nda-jniñu cúcá ini ñáyiví yáha, chi quiví tiquixin, te cáne xehyu, te tiví. Te suni quívicoo ñacuñhá te sácuiñhá.

20 Chi sa suhva sáha ró táca jniñu váha návāha cayā tahū rō nde andiví. Chi yūcuan má quívi tiquíxin ni ma cáne xehyu jeē tívi. Ni ma cúu quívi ñacuíhna sácuíhna.

21 Chi nde nuū nihín rō tahū váha ró, yūcuan cúu nuū cóndihvī ni rō siquī.

*Tinūu cúu lámpara yiqui cúñu*  
(Lc. 11.34-36)

22 'Tinūu ró cúu nájnūhun lámpara nuū yiqui cúñu rō. Núu sūcuan te núu tinūu ró íyó ndijin, te náf-ni yiqui cúñu rō cúndijin.

23 Te núu tinūu ró tu íyó ndijin, te náf-ni yiqui cúñu rō iyó nee. Te suni sūcuan cúu ánuá rō, chi núu máni jeē jéni néé ni rō, te nacā jeē nee gā iyó ini anuá rō núu sūcuan.

*Jeē ma cóndihvī ni yō siquī xúhun*  
(Lc. 16.13)

24 'Ni ñn mozo ma cúu cuajníñu de nuū uū patrón. Chi quitī ni de nuū ñn te coo manī de jíin inga, chí squícu váha de nuū ñn te sájéé ni de nuū inga. Te suni sūcuan ma cúu cuajníñu ró núu Yaā Dios te núu máni siquī xúhun ndíhví ni rō.

*Yaā Dios ndíto ya yohó*  
(Lc. 12.22-31)

25 'Núu sūcuan te cáhán rī jíin ró jijnáhan ró: Ma nácani ndasí ni rō siquī jeē cótecu rō, núu ndese caji rō coho ró, ni siquī sahma, núu ndese cuhun ró. Chi Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē caji rō jíin jéé cuhun ró.

26 Condēhe ró ndese cátecu saa, chi tu cátaji tí, ni tu cánastútú tí jeē chívāha tí, ni tú yacā tí. Te vēsú sūcuan te máá Tátá rō andiví scáji yā tí. Te cánuú ndasí gá rō jijnáhan ró vēsú táca saa ún.

27 ¿Te ndé ñn ró, á cuu scuéhnu ró máá ró sava metro gā, vēsú na nácani ndasí ni rō?

28 ¿Te najehē cánacani ndasí ni rō jeē ma nihín rō sahma? Condēhe jíjnáhan ró ndese jéé ita táca yúcū. Chi tu sájniñu, ni tu táú.

29 Te cáhán rī jíin ró jeē ni rey Salomón, quívi ní ñúhun de sahma váha ndasí, tu ní ñúhun de sahma lúu sūcuan nájnūhun ita ún.

30 Te núu sūcuan jéhe Yaā Dios sahma lúu ita un jéé jéé vijna te sajnē cayū nuū ñuhún, te nagā ni cuu róhó jíjnáhan ró jéé ma sáha ya jeē nihín rō sahma. ¿Te naun tu cá candíje ñihin ró jéé ndíto ya rohó?

31 Núu sūcuan te ma nácani ndasí ni rō siquī jeē caji rō, jeē coho ró, jeé cuhun ró.

32 Chi táca ñáyuu ñayívi jéé tu cá candíje cúu jeé máni siquī jeé yáha cándihvī ni i. Te máá ró jíjnáhan ró, chí íyó Tátá rō andiví, te jíin yā jeé cájini ñuhún ró táca jéé yáha.

33 Te sa suhva cánuú gá jeé cóndihvī ni rō siquī jniñu jeé ndácu Yaā Dios nuū rō, jíin siquī jeé sáha ró jniñu ndaā jeé núnahan ni yā. Yūcuán na te sáha ya jeé nihín rō táca jéé yáha.

34 Núu sūcuan te ma nácani ni rō siquī jeé cóo sajnē, chí vijna cúu vijna te sajnē cúu sajnē. Chi cani ni rō siquī jnúndóho jeé iyó ná ñn ná ñn-ni quívi.

*Jeē ma cahán yō siquī cuéchi jnáhan yó*  
(Lc. 6.37-38, 41-42)

## 7

1 'Ma cahán rō siquī ñayuu ndese sáha i, návāha suni ma cahán Yaā Dios cuéchi siquī máá ró jeé casáha ró sūcuan.

2 Chi nájnūhun cácahān rō siquī cuéchi ñayuu, suni sūcuan cahán yā siquī cuéchi ró. Te cūhva jeé cándihvī ni rō siquī i, suni cūhva yūcuan sáha ya jíin ró.

3 Chi cuéchi jnáhan ró cúu nájnūhun jeé íne ñn yāca lúli tinūú i. ¿Te naun casáha ró cuenta jeé sūcuan, te tu casáha ró cuenta cuéchi máá ró jeé cúu nájnūhun jeé íne ñn nduhu tinūu máá ró?

4 ¿Te naun cácahān rō jíin jnáhan ró: Na táva rī yāca íne tinūu ró, te tu cánacani ni rō jeé íne ñn nduhu tinūu máá ró?

5 Tēe stáhú-ni cácuu ró núu sūcuan. Xíhna gā tinūu máá ró tava rō nduhu,

te yūcuán na te cuu condēhe váha ró jéē táva rō yāca tñūu jnáhan ró.

<sup>6</sup> 'Ma sáha fuerza rō ñayuu cunéé quívicoo i nuū jnúhun i yā núu tu cúní i. Chi ndonda i siquī rō nájñūhun ina jeē cáyihí tí rohó. Te ma nácani ró jnúhun ya nuū ñáyuu jeē tu cúní cuiti cuajnúhún. Chi cándāa i nájñūhun quinī jeē jeñú tī siquī perla jeē ndeé yahu ga.

*Cacān yō nuū yā te nihīn yō  
(Lc. 11.9-13; 6.31)*

<sup>7</sup> 'Cacān rō nuū Yaā Dios, te cuāha ya nuū rō. Te nducú ró tāca jéē váha íyó núu yā, te nihīn rō sáha ya. Te cacān tahú rō nde nihīn rō, nájñūhun sáha ñayuu cahán yehyí ndé nune quívi i.

<sup>8</sup> Chi tāca ñáyuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cúní i.

<sup>9</sup> ¿Te ndé ñin rōhó núu sēhe ró jicán i staā nuū rō, te á cuāha ró ñin yuū nuū i?

<sup>10</sup> ¿Te núu jicán i ñin chācá, te á cuāha ró ñin coō nuū i? Tú cuiti súcuan.

<sup>11</sup> Núu súcuan te máá ró jijnáhan ró, vēsú ñayuu iyó cuéchi cácuu ró, te cájini rō cuāha ró jéē váha nuū séhe ró. Te nagā ni cuu máá Tátá rō andiví jéē ma cuāha ya jeē váha nuū ñáyuu jicán nuū yā.

<sup>12</sup> 'Te nájñūhun cúní rō jeē sáha vāha ñayuu jíin ró, suni súcuan na sáha vāha ró jíin i. Chi tutu ley Moisés súcuan ndácu jniñu, jíin táca tutu tēe ni canacani jñūhun Yaā Dios.

*Siquī jeē quívi yó yéhyí túū  
(Lc. 13.24)*

<sup>13</sup> 'Condihvī ni rō quívicoo ró ndaha Yaā Dios. Chi cúu nájñūhun ñin yéhyí túū. Chi yéhyí jíin ichi jeē cuahán nuū jnahnú ndetū ñayuu, jité te cáhnu, te cuehē i quívicoo yūcuán.

<sup>14</sup> Te yéhyí jíin ichi jeē cuahán nuū nihín tahú i cotecu i, chi tuū yehyí te cuñi ichi, te jecu-ni i cánihīn i.

*Jíin jniñu cásáha ñayuu te nácuni yō  
ndese ñayuu cácuu i  
(Lc. 6.43-44)*

<sup>15</sup> 'Te ma cándije cuiti rō tēe stáhú jéē cácahān de jeē jnúhun Yaā Dios cánacani de. Chi nájñūhun lanchi, quití tú xeēn, súcuan cásáha de vējicoo de nuū rō. Te ini anuá de chi cácuu de nájñūhun yihī, quití xeēn.

<sup>16</sup> Jíin jniñu cásáha de te nacuni rō de ndese tēe cácuu de. Chi cúu nájñūhun jeē tu scóyo ró ndehē uva xinī iñu, ni tu scóyo ró higo xinī iñu yóquin.

<sup>17</sup> Te tācá yujnu váha chi jéhe ndehē váha, te yujnu néé chi cúun ndehē neé.

<sup>18</sup> ñin yujnu váha ma cúun ndehē neé, te ni ñin yujnu néé ma cuāha ndehē váha.

<sup>19</sup> Te tācá yujnu jeē tu jéhe ndehē váha, chi tahndē te cayū nuū ñuhún.

<sup>20</sup> Te suni súcuan cácuu tēe ún, chi jíin jniñu cásáha de te nácuni rō ndese tēe cácuu de.

*Nasūú ndihí ñayuu quívicoo andiví  
(Lc. 13.25-27)*

<sup>21</sup> 'Nasūú ndihí ñayuu jeē cahán i Jitoho i ruhū cúu jeē quívicoo nuū ndácu Tátá rī jniñu nde andiví. Chi quívicoo máá nene ñayuu jeē squícu jniñu cúní Tátá rī andiví.

<sup>22</sup> Te quívi jeē sándaā rī jniñu ñayuu, te cuehē i cahán jíin rī: Jitoho na jijnáhan ná, ni canacani ná jnúhun jíin síhví ní, te ni caquenehen ná táchī jíin síhví ní, te ni casáha ná cuéhē jniñu jéhnu jíin síhví ní jeē náā ni ñayuu sáha. Achi i.

<sup>23</sup> Yūcuán na te cahán rī jíin ñáyuu ún: Tu jíiní cuiti rī rohó. Cujioy quin-goo ró, chi ñayuu casáha jniñu néé cácuu ró, achi rī.

*Siquī uú vehe  
(Lc. 6.47-49; Mr. 1.22)*

<sup>24</sup> 'Núu súcuan te tāca ñáyuu jeē cájini sōho jñūhun cáhán rī te squícu i, cácuu i nájñūhun ñin tēe ni nacani vāha ni, te ni jeni de vehe de siquī cáva.

<sup>25</sup> Te ni cuun saū, te ni ndaa yūte, te ni quee tachī xeēn, te ni cachundahá vehe ún. Te tu ní cótúú, chi siquī cáva ndeé.

<sup>26</sup> Te tāca ñáyuu jeē cájini sōho jñūhun cáhán rī te tu squícu i, cácuu i

nájnūhun ñn tēe cánéé jeē ní jeni de vehe de nuū ñíti.

<sup>27</sup> Te ni cuun saū, te ni quiji ndute ñúhún cuéhē, te ni quee tachī xeén, te ni cachundahá vehe ún. Te ni cotúú-ni, te ni naa iī-ni. Achí yá jíin i jíjnáhan i.

<sup>28</sup> Te ná ni jíinu ni cahān Jesús tāca jnúhun yáha, te ñayuu cuehē un ní canaa ni i ni cajini i jnúhun ni steén yā.

<sup>29</sup> Chi ni steén vāha ya nuū i, chi máá yá cúu jeē ndíso jníñu siquī ndíhi. Te tēe cástéén tutu ley Yaā Dios, tu súcuan cástéén de.

*Jeē ní nasávāha ya ñn tēe ndóho cuehyī stehyú  
(Mr. 1.40-45; Lc. 5.12-16)*

## 8

<sup>1</sup> Te ni nanuu Jesús yucu ún, te cuehē ñayuu cándiquīn i ya.

<sup>2</sup> Te ñn tēe ndóho cuehyī stehyú, ni quee de nuū yā. Te ni jecuiñī yití de nuū yā, te ni cahān de jíin yá:

Jíni na jēe cuu sáha ní jēe nduvāha ná, te núu cúní ni, áchí de.

<sup>3</sup> Te Jesús ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un.

<sup>4</sup> Yūcuán na te ni cahān Jesús jíin de:

Ma cáchi cuiñi rō nuū ní ñn. Chi quisteén rō maá ró nuū sutú, te condahá ró jeē socó rō nuū Yaā Dios, nájnūhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

*Jeē ní nasávāha ya mozo capitán  
(Lc. 7.1-10)*

<sup>5</sup> Te ni quívi Jesús ñuu Capernaum. Te ñn tēe nación Roma jeē cúu capitán, ni quee de nuū yā, te ni cahān ndahú de jíin yá:

<sup>6</sup> Mozo na catú i vehe ná, chi ni íjin i te ndóho xeén i, áchí de.

<sup>7</sup> Te ni cahān Jesús:

Quihīn rī nasávāha ri i núu súcuan, áchí yá.

<sup>8</sup> Te ni cahān capitán jíin yá:

Tu cújéhnú ná jēe quihín ni quívi ní vehe ná. Chi máá jēe cahān-ni ní, te na ndúvāha-ni mozo na.

<sup>9</sup> Chi máá ná suni ndíso jníñu ná ní casáha tēe cácujehnú ga. Te cújéhnú ná núu tācá soldado na. Te núu cáhán na jíin ñn de jeē na quihín de, te cuahān de. Te núu cáhán na jíin inga de jeē na quíji de, te quíji de. Te núu ndácu ná ñn jniñu nuū mozo na, te sáha i. Achí de.

<sup>10</sup> Te jeē ní jini Jesús jnúhun yáha, te ni naa ni yā. Te ni cahān yā jíin ñayuu cándiquīn yā ún:

Jendaá cahān rī jíin ró jeē ni nación yō Israel tu ní níhín rī ni ñn ñayuu candíje níhin súcuan, nájnūhun cándíje tēe yáha, vésú tēe nación tu jíin jnúhun Yaā Dios cúu de.

<sup>11</sup> Te cáhán rī jíin ró jeē quíjicoo cuehē ñayuu ichi núu cáne niāndii jíin ichi núu quée niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andiví.

<sup>12</sup> Te sava ñayuu nación Israel jeē maá i quívicoo núu, te sa quenehen ya i quihín i nuū néē, chí tu ní cácuandíje i. Te yūcuan ndáhyū i te nacayíhí yuhu i jeē ndoho xeén i. Achí yá.

<sup>13</sup> Yūcuán na te ni cahān yā jíin tée cúu capitán:

Cuánuhun vehe ró, chí sáha ri nájnūhun cándíje ró jēe sáha ri.

Te mozo de un ní nduvāha-ni i máá hora un.

*Jeē ní nasávāha ya naná chíso Pedro  
(Mr. 1.29-31; Lc. 4.38-39)*

<sup>14</sup> Te ni jehēn Jesús vehe Pedro. Te ni jito ya naná chíso de jeē catú ña yíhi quíji ña.

<sup>15</sup> Te ni jniñi ya ndaha ña, te ni quenda-ni quíji ún ña. Te ni ndocuiñī ña, te ni sáha ña jeē ní cayeji de jíin yá.

*Jeē ní nasávāha ya cuehē ñayuu  
(Mr. 1.32-34; Lc. 4.40-41)*

<sup>16</sup> Te jeē ní cuaa ni quecoo ñayuu jíin cuehē ñayuu jeē ñúhun tachī ini i. Te ni quenehen ya tachī un cuángoo jíin jnúhun cáhán-ni ya. Te suni ni nasávāha ya tāca ñayuu cácuñu.

17 Te súcuan ni cuu návāha cundaā jnūhun ni cahān Isaías, tēe ni nacani jnūhun Yaā Dios jenahán: Máá yá ni tejiyo ndinuū cuehyī cándoho yó, áchí Isaías.

*Siquīñayuu jeē cáncuni i condiquīniya*  
(Lc. 9.57-62)

18 Te ni jito Jesús jeē ní ndicó ndúu cuehē ñayuu yā. Te ni cahān yā jín tēe cáscuáha jín yá jeē na yáha de jín yá inga lado mar.

19 Te ñin tēe stéén tutu ley Yaā Dios, ni quee de nuū yā, te ni cahān de:

Maestro, condiquīn na níhín quíhín yō ndé-ni cúu-ni nuū quíhín ní, áchí de.

20 Te ni cahān Jesús jín de:

Tāca ñúcuui, iyó yāu cava cáñuhun tí. Te suni saa, iyó táca tí. Te ruhū, Yaā ní nduu tēe, tuú nuū cusú rī, achí yá.

21 Te inga tēe ni cahān de jín yá, te tēe scuáha jín yá cúu de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, áchí de.

22 Te ni cahān Jesús jín de:

Condiquīn ruhū na quíhín yō. Te stóo tāca ndíyí na chindūji jnāhan ndíyí, chí ndíyí cácuu ñayuu tu cácandíje. Achí yá.

*Jeē ní jecuiñi tachī níhin jín mar ni sáha ya*

(Mr. 4.35-41; Lc. 8.22-25)

23 Yūcuán na te ni quívi Jesús ini barco, te tēe cáscuáha jín yá ni quívicoo de cuahān de jín yá.

24 Te nuū mar ni jequíhi ñin tachī níhin, te ni stóna ndute mar, ni quívi ini barco un. Te Jesús chí quíxí yā.

25 Te tēe cáscuáha jín yá ni castóna de ya, te ni cacahān de:

Jnama ní yóhó, chí je quée yó chíji ndute, áchí de.

26 Te ni cahān yā jín de:

¿Naun cáyūhú ndasí ró? Te tu cácandíje níhin ró jēe cácu ró sáha rī, achí yá.

Yūcuán na te ni ndocuiñi yā, te ni cahān yā nuū tachí níhin un jín núu mar. Te ni cuu nayúú í-ni.

27 Te ni canaa ni de jínāhan de, te ni cacahān de:

¿Ndé ñin ga cúu tēe yáha, jēe ndé tachī níhin jín mar cájetáhu jēe cahān de? áchí de.

*Tēe Gadara jeē cándoho tachī*  
(Mr. 5.1-20; Lc. 8.26-39)

28 Te ni jinū yā inga lado mar, máa región ñayuu Gadara. Te uū tēe ni quendacoo de nde nuū yíndūji ndíyí, ni quiñahan de ya. Te cáñuhun tachī ini de, te siquī jeē yóhyo xeēn tachī ún, te ni ñin ñayuu tu cúu yāha i ichi yúcuan.

29 Te ni cacana cóhó de ni casáha tachī:

¿Naun véji ní núu ná, Jesús Sēhe Yaā Dios? ¿A véji ní yáha jeē stóho ní sáña ndé ná tu quee maá quívi? áchí.

30 Te nde jicá jecu cáhīn cuehē quíni cájitu tí.

31 Te tachī jeē cáñuhun ini tēe un ní cacahān ndahú jín yá:

Núu quenehen ní sáña, te cuāha ni jnūhun na quívicoo ná ini quíni cáhīn yūcuán, áchí.

32 Te ni cahān yā jín:

Cuángoo núu súcuan.

Te ni quendacoo tachī ún ini tēe ún, te ni quívicoo ini quíni. Te quíni un ní cajinu tí ni caningava tí ñin yucáva, te ni ndaquíhi tí ndute mar, ni cajihí tí.

33 Te tēe cándito tí ni cajinu de cuangoo de jeē ní cayūhú de. Te ni najinūcoo de ñuu. Te ni cacastūhún de táca jniñu yúcuan, jín ndese ni cuu jeē ní quendacoo tachī ini ndíndúú tēe ún.

34 Yūcuán na te ndívi ñayuu ñuu un, ní quendacoo i cuacondéhé i Jesús. Te ná ni jinūcoo i nuū íne ya, te ni cacahān ndahú i jín yá jeē na quenda ya región yúcuan quíhín yā.

*Jeē ní nasávāha ya ñin tēe ndóho cuehyī ni íjin*

(Mr. 2.1-12; Lc. 5.17-26)

## 9

1 Yūcuán na te ni ndívi Jesús ini barco. Te ni nayāha ya cuahān yā inga lado mar, te ni najinū yā ñuu maá yá.

2 Te ni caquindecá ñayuu ñin tēe ndóho cuehyī ní íjin, cátú de nuū ñin

camilla. Te ni jini Jesús jeē cá candíje i jeē cúu nasávāha ya tēe ní jín ún. Te ni cahān yā jín de:

Na ndúndeyí ni rō séhē, chi je íne cáhnu ni rī nuū tāca cuéchi ró, áchí yá.

<sup>3</sup> Yūcuán na te jecu tēe cástéén tutu ley Yaā Dios, ni cajeni ni de síquī yā: Jeē cahán tēe yáha súcuan, chi cáhán de jnūhun ndevāha jeē quití ni Yaā Dios.

<sup>4</sup> Te ni jini Jesús jeē súcuan cájени ni de, te ni cahān yā jín de:

¿Naun cájени ni rō jeē cahán ndevāha rī?

<sup>5</sup> Jeē uú jnūhun yáha, ¿ndé ñin yí gá cáa? ¿A jéē cahán rī jín tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuñī te caca ró, chí je ni nduvāha ró, achi rī?

<sup>6</sup> Te vijna te na stéén rī jeē maá rí, Yaā ní nduu tēe, ndíso jnīñu rī ini ñayīvi yáha jéē cóne cáhnu ni rī nuū cuéchi.

Yūcuán na te ni cahān yā jín tēe ni jín ún:

Ndocuñī te naquihin ró camilla rō te quinhun rō vehe ró, áchí yá jín de.

<sup>7</sup> Yūcuán na te ni ndocuñī-ni tēe ún, te cuanhun de vehe de.

<sup>8</sup> Te ná ni cajito ñayuu un jéē súcuan ni sáha ya, te ni cayūhú i. Te ni cacahān i jeē yóhoyo vāha Yaā cúu Yaā Dios jeē súcuan ni jēhe ya poder nuū ñin tēe jeē cúu nasávāha de ñayuu, achí i cájito i Jesús.

### *Jeē ní cana ya Mateo*

*(Mr. 2.13-17; Lc. 5.27-32)*

<sup>9</sup> Te ni quenda Jesús yūcuan cuáhān yā. Te ni jito ya nuū ñin tēe nání Mateo, néne de nuū cutútú xúhun renta. Te ni cahān yā jín de:

Condiquñ ruhū na quíhín yō.

Te ni ndocuñī de, te cuahān de jín yá.

<sup>10</sup> Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jín inga tēe cása ha cuéchi, suni cáyūcú de cáyeji de staā jín Jesús jín tēe cáscuáha jín yá.

<sup>11</sup> Te tēe grupo fariseo, ni cajito de, te ni cacahān de jín tēe cáscuáha jín yá:

¿Naun yéji maestro rō jín tēe cástútú xúhun renta jín inga tēe cása ha cuéchi? áchí de.

<sup>12</sup> Te ni jini Jesús, te ni cahān yatá yá jín de:

Ñayuu cáhīyo vāha, tu jini ñúhún i tēe tájñá, chí ñayuu cácu hū cúu jeē jini ñúhún.

<sup>13</sup> Cuáhán jínáhan ró núu súcuan, te nacani ni rō na vé cúu jeē cahán jnūhun yáha jéē yosó núu tútu i: Cúni rī jeē na cundáhú ni rō jnáhan ró, nasūu jéē socó rō quití nuū rī, achí Yaā Dios nde jenahán. Te ruhū nasūu jéē véji rī cana rī ñayuu tú cuéchi, jeē cúu i nájñuhun ñayuu cáhīyo vāha, chí sa suhva véji rī cana rī ñayuu iyó cuéchi, jeē na nácani ni i te stóo i cuéchi i. Achí yá.

### *Jeē ní cacajñuhún de ya síquī jeē condite ni*

*(Mr. 2.18-22; Lc. 5.33-39)*

<sup>14</sup> Yūcuán na te tēe cáscuáha jín Juan tēe scuándute, ni quecoo de nuū Jesús. Te ni cacahān de jín yá:

Saña jín tēe grupo fariseo, tijni jínu cáhīyo ndite ni na núu Yaā Dios. Te tēe cáscuáha jín máá ní, ¿naun tu cása ha de súcuan?

<sup>15</sup> Te ni cahān Jesús jín de:

¿A cuu condite ni de níní jéē iyó rí jín de? ¿A cuu cucuíhyá ni ñayuu cáhīn vico nándāha, te núu níní néne tēe nándāha? Te quee quivī jeē cújiyo tēe nándāha, te quivī ún chí condite ni i.

<sup>16</sup> Te ni cahān yā uū jnūhun yatá síquī jeē tu quíjnáhan jnūhun jeē jéē stéén yā jín táca jnūhun jenahán. Achí yá:

Ni ñin tu náchuhun ñin pedazo sahma jéé núu ñin sahma túhú. Chí núu súcuan te ndiyi pedazo jeé un, te tahndē gā jeē tuhú un, te nducáhnu ga nuū catáhdé un.

<sup>17</sup> Te suni tu cáchuhun vino jeé ini ñi túhú. Chí núu súcuan te ndatā ñi ún, te naa vino jín ñi. Chí cánuu jéé chūhun i vino jeé ini ñi jéé, te súcuan te quéndōo vāha ndíndúú. Achí yá.



*Jnūhun sēhe s̄hí Jairo jín ñahan ní quehé yusáhma ya*

*(Mr. 5.21-43; Lc. 8.40-56)*

<sup>18</sup> Te níni cáhán Jesús tāca jnūhun yáha, te iin tēe cújéhnū nuū ñáyuu hebreo, ni quee de nuū yā. Te ni jecuiñī yití de nuū yā, te ni cahān de:

Sēhe s̄hí ná sá ní jihī i. Te núu na quihín yō soó ní ndaha ní síquī i, te natecu i. Achí de.

<sup>19</sup> Te ni ndocuiñī Jesús, te cuahān yā jín de, te suni cuango tēe cáscuáha jín yá.

<sup>20</sup> Te mēhñu ñáyuu cuango jín yá ni quee iin ñahan, te je ni cuu uxī uū cuiyā ndóho ña cuehyī niñī. Te ni quee ña ichi yátá yā, te ni quehé ña yusáhma ya.

<sup>21</sup> Chi ni jeni ni ña: Vēsú maá sahma ya na níhín rī quehé rí, te nduvāha ri, jéni ni ña.

<sup>22</sup> Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje rō jēe cuu nasávāha ri rohó, te jeē yúcuan ní nduvāha rō, áchí yá.

Te ni nduvāha ña máa hora un.

<sup>23</sup> Te ná ni jinū Jesús vehe tēe cújéhnū ún, te ni jito ya nuū tēe cácuu músico jeē quíchindūji de i, jín núu ñáyuu cuehē, cásaáa i.

<sup>24</sup> Te ni cahān yā jín i:

Cujiyo jínáhan rō, chi sūchi s̄hí yáha, tu ní jíhí i chí quíxí-ni i, áchí yá.

Te ni cajecū catá i jeē ni cáhān yā.

<sup>25</sup> Te ni quenehen ya ñayuu cuehē ún, te ni quívi ya ini vehe. Te ni jniñi ya ndaha sūchi s̄hí ní jihī ún, te ni ndocuiñī-ni i.

<sup>26</sup> Te ní región yúcuan ní jitē núu jnūhun jniñu jéhnū ní sáha ya ún.

*Jeē ní nasávāha ya uū tēe cuáá*

<sup>27</sup> Te ni quenda Jesús yúcuan cuahān yā. Te uū tēe cuáá cuángoo de yatā yā, cácana jee de:

Máa ní jeē cúu ní Sēhe yucūn David, cundáhú ni ni sáña víi, achí de.

<sup>28</sup> Te ná ni jinū yā vehe, te ni jinūcoo tēe cuáá un núu yā. Te ni cahān yā jín de:

¿A cácandíje rō jēe cúu nanune ri tinūu rō? achí yá.

Te ni cacahān de:

Cácandíje ná, áchí de.

<sup>29</sup> Yūcuán na te ni tee ya ndaha ya tinūu de, te ni cahān yā:

Na sáha ri nájnūhun cácandíje rō, áchí yá.

<sup>30</sup> Te ni cananune-ni tinūu de. Te Jesús ni cahān níhín ya jín de:

Ma cáchi cuiti rō nuū ni iin, áchí yá.

<sup>31</sup> Te máa de chi ni quendacoo de, te ni cajete-ni de jnūhun ní región yúcuan jēe súcuan ní sáha ya jín de.

*Jeē ní nasávāha ya iin tēe ñihín*

<sup>32</sup> Te nuū ní quendacoo tēe un cuángoo de, te ni quecoo ñayuu jín iin tēe ñihín, jeē ñuhun tachī ini de.

<sup>33</sup> Te ni quenehen ya tachī un cuahān. Te tēe ñihín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiti yō ni iin jniñu súcuan ini ñuu Israel, achí i.

<sup>34</sup> Te tēe grupo fariseo chi ni cacahān de:

Tēe yáha chí quenehen de tachī jín fuerza maá jexeén jeē cújéhnū nuū tachī, achí de.

*Jeē cundáhú ni yā ñayuu cuehē*

<sup>35</sup> Te ni jica cuu Jesús tācá ñuu jín rancho, te ni steén yā jnūhun ini tācá vehe i sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácuñu na-ni cuehyī cándoho i.

<sup>36</sup> Te cundáhú ni yā jíto ya nuū ñáyuu cuehē ún. Chí cándoho i te cácuñuhya ni i, chí cácuu i nájnūhun lanchi jeē tú jito ho tī, chí tu ndíquín i Yaā cúu Jito ho i.

<sup>37</sup> Yūcuán na te ni cahān yā jín tēe cáscuáha jín yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu.

<sup>38</sup> Núu súcuan te cacān tahú rō nuū maá Jíto ho rō Yaā Dios jeē na tájí yá cuehē tēe na quíngoo de cahnde de trigo, cúu jeē nácani de jnūhun ya nuū ñáyuu. Achí yá.

*Jeē ní nacāji ya uxī uū tēe apóstol*  
*(Mr 3.13-19; Lc. 6.12-16)*

## 10

<sup>1</sup> Yūcuán na te ni cana ya uxī uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jéē nasávāha de ñayuu cácuu hū tācá ndīnuū cuehyī.

<sup>2</sup> Te yāha cúu síhvī ndihúxí uū tēe apóstol un: Tēe ñn cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan.

<sup>3</sup> Yūcuán na te Felipe, Bartolomé, Tomás, Mateo tēe ni stútú xúhun renta, Jacobo sēhe Alfeo, jíin Lebeo jeē suni nání Tadeo,

<sup>4</sup> jíin Simón tēe grupo cananista, jíin Judas Iscariote, tēe jeē ní nastúu de ya.

*Jeē ní tají yá ndihúxí uū de quinacani de jnūhun*

*(Mr. 6.7-13; Lc. 9.1-6)*

<sup>5</sup> Te ni tají Jesús ndihúxí uū tēe yāha jeē quíngoo de. Te ni ndacu ya jniñu nuū de ndese sáha de:

Ma quíngoo ró núu ñáyuu jeē násūu ñáyuu hebreo cácuu i, ni ma quívicoo ró táca ñuu ñayuu Samaria.

<sup>6</sup> Chi nuū maá-ni ñayuu nación yō Israel quíngoo ró, chi cácuu i nájnūhun lanchi jeē ní sana.

<sup>7</sup> Te jeē quíngoo ró te suhva nacani ró jnúhun: Je ni cuyajni Yaā ndeé andíví jeē ndacu ya jniñu nuū rō, achi rō.

<sup>8</sup> Te nasávāha ró ñáyuu cándoho cuehyī stehyú jíin ñáyuu cándoho tāca gá cuehyī, te nastécu rō ndiyí te quenehen ró táchī ini ñayuu. Te súcuan-ni ni jēhe ri poder nuū rō jeē sáha ró, te suni súcuan-ni sáha ró jíin i.

<sup>9</sup> Te ma cóndiso ró xúhun oro, ni xūhun plata, ni centavo cuechí.

<sup>10</sup> Ni ma cóndiso ró ñunu stáa caji rō ichi, ni inga camisa, ni ndijēn, ni vara. Chi síquī jniñu jeē nácani ró jnúhun nuū ñáyuu, te cánuú coto i rōhó.

<sup>11</sup> Te na-ni ñuu chí rancho núu ni jinūcoo ró, te yūcuán nducú ró ñn ñayuu vāha, te coyūcu ró vehe i nde quíngoo tucu ró.

<sup>12</sup> Te jeē quíví ró vehe ñayuu ún, te cahān rō jeē na quíji jnūhun ndeyí jnūhun sí ni nuū i.

<sup>13</sup> Te núu ñayuu vāha cácuu i, te jnūhun ndeyí ní cahān rō quendōo síquī i. Te núu násūu ñáyuu vāha cácuu i, te jnūhun ndeyí ní cahān rō ma quéndōo síquī i.

<sup>14</sup> Te núu íyó ñáyuu jeē tu cájetáhú i rōhó, ni tu cúní i cuni nahín i jnūhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuan stéén rō jeē íyó cuéchi i jeē tu ní cájetáhú i.

<sup>15</sup> Jendaá cahán rī jíin ró jeē quíví juicio te xeēn gā coo castigo síquī ñuu casáha súcuan vēsú síquī ñuu Sodoma jíin ñuu Gomorra nuū ní casáha ndasí ñáyuu cuéchi.

*Jeē coto xeēn ñayuu de jýnáhan de*

<sup>16</sup> Cuni sōho ró, chí tájí rí rohó quíngoo ró nájnūhun lanchi mēhñu yíhī. Núu súcuan te coo listo rō nájnūhun coō, te coo vítá ni rō nájnūhun paloma.

<sup>17</sup> Te condito ró máa ró nuū ñáyuu, chí quee quíví jeē quíndeca i rōhó núu tohó, te caní i rōhó ini tācá vehe ñi sinagoga.

<sup>18</sup> Te suni nde nuū tācá gobernador jíin rey quíndeca i rōhó jéē síquí ruhū. Te súcuan te nune ichi jeē nacani ndaā rō jnūhun ri nuū de jíin núu ñáyuu tācá nación jeē tu jíin jnūhun Yaā Dios.

<sup>19</sup> Te núu ni jendeca i rōhó núu tāca tēe ún, ma nácani ndasí ni rō ndese cahān rō. Chí máa hora un te máa yá steén nuū rō ndese cahān rō.

<sup>20</sup> Chí násūu máa ró cúu jeē cahán, chí Espíritu maá Tátá rō cúu jeē cahán jíin yuhu ró.

<sup>21</sup> Te sava ñayuu tu cá candíje, nastúu i ñani i jeē na cúu. Te tátá nastúu sēhe. Te sēhe ndonda síquī tatá jíin náná jeē na cúu.

<sup>22</sup> Te ndihí ñayuu quítí ni i nuū rō jeē síquí ruhū. Te ñayuu jeē cuiñi ñihin nde jeē jínu jnūndóho, ñayuu ún chí cácu ánuá i.

<sup>23</sup> Te núu cájito xeēn i rōhó ñn ñuu, te cunu ró quíhīn rō inga ñuu. Chí jendaá cahán rī jíin ró jeē ma ndécava

ró caca cuu ró ndihí nación yō Israel te ndiji-ni máá rí, Yaā ní nduu tēe.

<sup>24</sup> 'In tēe scuáha, tu cújéhu de nuū maestro de. Ni tēe cúu mozo, tu cújéhu de nuū patrón de.

<sup>25</sup> Tēe scuáha chí nájnūhun ndóho maestro de suni súcuan ndoho nahín máá de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

*Jeē ní cachi yā ndé in cúu jeē yūhu yó*

*(Lc. 12.2-9)*

<sup>26</sup> Núu súcuan te ma yūhu ró coto ró ñáyuu. Chí tāca jnūhun cácahān sāhí i ma quéndōo sāhí cuiti, chí ndihí natūu ndijin, te cuni ñayuu.

<sup>27</sup> Jnūhun ní cahān rī jín ró jeē tu ní jíní ñayuu, na nácastūhun cájí ró nuū i. Te jnūhun ní nacani sāhi rí nuū rō, na nacani jee ró yātā tāca vehe.

<sup>28</sup> Te ma yūhu ró coto ró ñáyuu cahni yiquí cúñu rō, chí ma cúu cahni i ánuá rō. Chí sa suhva yūhu ró jēe ma stíví ró núu Yaā Dios, chí cuu snáhnú ndetū yā rohó jēe quíví ánuá rō jín yiquí cúñu rō infierno.

<sup>29</sup> 'Te tācá saa chí tú yahu ndéé tī, chí nde uū tī jeē in centavo lulí. Te ni in ti tu nínga nuū ñūhun te núu tu jéhe Tátá rō jnūhun, chí ndíto ya tī.

<sup>30</sup> Te nagā ni cuu róhó jijnáhan ró, chí nde ndihí ixi xíní rō je ni cahu ya.

<sup>31</sup> Núu súcuan te ma yūhu ró jijnáhan ró, chí cánuú ndasí gá rō nuū yā vēsú cuéhē tācá saa.

*Ñayuu jejnúhún Jesucristo nuū inga ñayuu*

*(Lc. 12.8-9)*

<sup>32</sup> 'Te tāca ñáyuu jeē cuajnúhún rúhū nuū inga ñayuu, suni súcuan cuajnúhún rí i nuū Tatá rī, Yaā ndeé andíví.

<sup>33</sup> Te tāca ñáyuu jeē ma cuajnúhún rúhū nuū inga ñayuu, suni súcuan ma cuajnúhún rí i nuū Tatá rī, Yaā ndeé andíví.

*Jeē siquí Jesús te cusín ini ñayuu*  
*(Lc. 12.51-53; 14.26-27)*

<sup>34</sup> 'Ma cáni ni rō jijnáhan ró jēe véji ri jeē cóyūcu mání ñayuu ñayíví. Tú véji ri jeē cóyūcu mání ñayuu, chí sa suhva cuajnáhan i jeē siquí ruhū.

<sup>35</sup> Chí jeē siquí ruhū te cusín ini sēhe yí jín tátá, te sēhe síhí jín náná, te sēhe jēnu jín náná chíso.

<sup>36</sup> Chí tāca ñáyuu candíje ruhū, chí jnáhan vehe i cúu jeē quití ni nuū i.

<sup>37</sup> 'Te núu ndé in ñayuu maní gā i jín tátá i chí jín náná i vēsú jín rúhū, nasūu ñáyuu vāha cúu i jeē cóndiquín i ruhū. Te núu ndé in ñayuu maní gā i jín sēhe yí i chí jín sēhe síhí i vēsú jín rúhū, te suni nasūu ñáyuu vāha cúu i jeē cóndiquín i ruhū.

<sup>38</sup> Te na-ni ñayuu núu tu jéhe i jnūhun ndoho i jnūndóho vēsú nde cuu i jeē siquí jeē cóndiquín i ruhū, nasūu ñáyuu vāha cúu i jeē cóndiquín i ruhū.

<sup>39</sup> Te núu ndé ñáyuu cúní i cācu i nuū jnūndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé in ñayuu vēsú na cúu i jeē siquí ruhū, te cotecu i ní cáni.

*Jeē iyó táhū yō nuū Yaā Dios*

*(Mr. 9.41)*

<sup>40</sup> 'Te ñayuu cuatáhú róhó jijnáhan ró, núu súcuan te ruhū cájetáhú i. Te ñayuu cájetáhú rúhū, cájetáhú i Yaā ní tají rúhū véji ri.

<sup>41</sup> Núu na-ni ñayuu cuatáhú i in tēe nacani jnūhun Yaā Dios, siquí jeē jíca de jniñu Yaā Dios, núu súcuan te inuú-ni coo tahū de nuū Yaā Dios jín tēe nacani jnūhun Yaā Dios. Te núu na-ni ñayuu cuatáhú i in tēe ndaā, siquí jeē tēe ndaā cúu de, núu súcuan te inuú-ni coo tahū de nuū Yaā Dios jín tēe ndaā.

<sup>42</sup> Te núu ndé ñáyuu cuāha i vēsú in ñajin ndute míjin coho in sūchi yáha, siquí jeē cúu i sūchi cándíje ruhū, ndaā ndije cúu jeē nihín i tahū i. Achí yá.

*Jeē ní tají Juan uū tēe nuū yā*

*(Lc. 7.18-35)*

## 11

<sup>1</sup> Te ná ni jīnu ni ndacu Jesús jniñu nuū ndihúxí uū tēe cáscuáha jín yá,

te ni quenda ya yūcuan cuáhān yā jeē steén yā te nacani ya jnūhun tācá ñuu región yūcuán.

<sup>2</sup> Te íne Juan vecāa. Te ni nihīn de jnūhun tācá jniñu sāha Cristo. Te ni tají de uū tēe cáscuáha jíin de,

<sup>3</sup> cuacajñuhún de ya:

¿A máá ní cúu Cristo jeē achí tutu jeē quiji, chí condetu yó inga tēe quiji? áchí de.

<sup>4</sup> Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jnūhun cájini ró.

<sup>5</sup> Te cachi rō nuū de jeē ñayuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sāha ri. Te suni nácani ri jnūhun nuū ñayuu ndahú jēe jnama Yaā Dios i.

<sup>6</sup> Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

<sup>7</sup> Te náa cuanuhun ndindúú tēe ún, te ni quejéé Jesús cahán yā jnūhun Juan jíin ñayuu:

¿Na vé ni jécondēhe ró jijnáhan ró nde nuū ñúhun téhé? ¿A ñin tēe jéni ñin jéni uū ni, nájñuhun ite jeē cánda sāha tachī?

<sup>8</sup> Te núu tuú, ¿te na vé ni jécondēhe ró núu súcuan? ¿A ñin tēe cúní cujéhu jeē ñúhun sahma lúu? Tuú chí cájini rō jeē tēe cáñuhun sahma lúu, máni ini vehe rey cáyūcú de.

<sup>9</sup> ¿Te na vé ni jécondēhe ró núu súcuan? ¿A ñin tēe nácani jnūhun Yaā Dios? Cahán rī jíin ró jeē suu ni jécondēhe ró, te cújéhu ga Juan yáha vēsú tāca gá tēe ni canacani jnūhun Yaā Dios.

<sup>10</sup> Chí jnūhun Juan cúu jeē ni cahān Yaā Dios jeē yosó núu tútu ñi:

Tají rí tēe nacani jnūhun ri cosnūú de ichi núu Cristo,

návāha coo tūhva ñayuu jeē jinú yā.

Achí Yaā Dios, achí tutu.

<sup>11</sup> Te jendaá cahán rī jíin ró jeē ini ñayīvi yáha cújéhu ga Juan tēe scuándute vēsú tāca gá tēe jeē ni íyo ini ñayīví. Te vēsú súcuan te tāca tēe núu

ga ini ñuu nuū ndácu Yaā andiví jniñu, cújéhu ga de vēsú Juan.

<sup>12</sup> Te nde quiivī ní quee Juan tēe scuándute, te nde vijna, chí cánducú ndéyí ñayuu quiivícoo i ndaha Yaā andiví jēe ndácu ya jniñu nuū i. Te nde ñayuu xeēn cánducú ndéyí i siquī.

<sup>13</sup> Chí nde ná tu quiji Juan, te ni íyo máá ley Moisés, te suni ni íyo tāca tēe ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu.

<sup>14</sup> Te ni cacahān de jeē ndíji Elías. Te núu cācuni rō cuatáhú ró jnūhun, te jíin rō jeē maá Juan cúu tēe jeē ní cachi tutu jeē quiji, chí cúu de nájñuhun Elías.

<sup>15</sup> Tāca róhó jēe jíin sōho, na chúsóhó ró.

<sup>16</sup> Yáhá cachi rī ñin jnūhun yátá návāha na cúní rō ndese cúu ñayuu tiempo vijna. Cúu i nájñuhun sūchi lúlí cáhīn nuū yáhu cácasiquí i. Te cācana ndee i xinī jnáhan i:

<sup>17</sup> Ni cativí rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájñuhun cándāa sūchi lúlí un jēe tu ní núnjahan ni i ni ñin, súcuan cándāa ró.

<sup>18</sup> Chí ni quiji Juan te cuehē jínu ni íyo ndite ni de, te ní yéji de ni tu ní jíin de. Te tu ní cánujnahan ni rō, chí ni cacahān rō jeē ñúhun tachī ini de.

<sup>19</sup> Yūcuán na te ni quee maá rí, Yaā ní nduu tēe, te yéji rī jíin ri, te tu cánujnahan ni rō, te chísóo jnūhun ró cacahān rō jeē máni máá jēe yéji rī jíin ri vino. Te quijnáhan ri jíin tēe cástútú xúhun renta jíin táca gá tēe cásáha cuēchi, áchí ró. Te núu cúndichí ñin tēe jíin jnūhun Yaā Dios, te jíin jniñu sāha de te nátūu jeē tēe ndíchí cúu de. Achí yá.

*Jeē ní cuxeēn yā nuū sava ñuu nñhi ni*

*(Lc. 10.13-15)*

<sup>20</sup> Yūcuán na te ni quejéé yá cúxeēn yā nuū tācá ñuu nuū ni sāha ya cuehē jniñu jéhu, chí tu ní canacani ni i jeē stóo i cuēchi i. Te ni cahān yā:

21 Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jíin ñuu Sidón ni sáha ri jniñu jéhu jeē ni sáha ri ini ñuu maá ró, te yachī nacani ni ñáyuu ñuu un jéē stóo i cuēchi i núú. Te sáha i seña jeē steén jeē nacani ni i síquī cuēchi i, chi chuhun i sahma jnúú te chuhun i yaā xinī i núú.

22 Núu súcuan te cáhán rī jíin ró jeē quivī coo juicio te xeēn gā coo castigo síquī ró jijnáhan ró vésú jeē ni íyo síquī ñuu Tiro jíin ñuu Sidón.

23 Te róhó ñáyuu ñuu Capernaum, ¿á cájeni ni rō jeē cujéhu ró nájñuhun ñn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndiyi. Chi núu ini ñuu Sodoma ni sáha ri jniñu jéhu jeē ni sáha ri nuū maá ró, te coo ñuu yúcuan ndé vijna núú.

24 Núu súcuan te cáhán rī jíin ró jeē quivī coo juicio te xeēn gā coo castigo síquī ró vésú jeē ni íyo síquī ñáyuu ñuu Sodoma. Achí yá.

*Nehen nuū rī ndetātu ró, achí yá  
(Lc. 10.21-22)*

25 Te suni quivī un ní cahān Jesús: Na cútahū na núu ni Tátā, Jitoho ándiví jíin ñáyiví. Chi ni jesi ní táca jnúhun ndíchí ní, jeē ma cúni ñáyuu ndíchí jíin ñáyuu tūhva cuenta ñáyiví yáha. Te ni steén ni núu ñáyuu cácuu nájñuhun sūchi lúlí.

26 Chi súcuan ni nujnahan ni ni Tátā, achí yá.

27 Te ni cahān gā yā:

Ndivii ni jéhe Tátá rī nuū rī. Te tu cájini ñáyuu ndé ñn cúu ruhū, Séhe Yaā Dios, chí máá-ni Tátá rī cúu jeē jiní yā ruhū. Ni tu cájini ñáyuu ndese Yaā cúu máá Tátá, chí máá-ni Séhe cúu jeē jiní. Te íyo ñáyuu jeē cuní máá Séhe stéén yā nuū i ndese Yaā cúu Tátá yā, te máá i suni cuni i.

28 Táca ró jéē ni cuíta ró jíin táca jniñu jíin ley jeē yí sáha jíin ró, nehen quivī coo ró ndaha ri, te ndetātu ró sáha ri.

29 Quivī ró núu jniñu ndácu máá rí, te scuáha ró coo ró nájñuhun íyo máá rí. Chi vītá ni rī te suchí ni rī. Te

súcuan te ndetātu ró jíin ánuá rō sáha ri.

30 Chi tú yí jéē cuandetū rō nuū rī, ni tú yí jéē squícu ró jniñu ndácu ri. Achí yá.

*Jeē ní cataxín de yoco trigo quivī ndetátú  
(Mr. 2.23-28; Lc. 6.1-5)*

## 12

1 Te ñn quivī ndetātu ní yáha Jesús cuahān yā nuū cáa trigo. Te tē cáscuáha jíin yá, cájii de sōco. Te ni quejéé de cátaxín de yoco trigo cáyeji de.

2 Te ni cajito tē grupo fariseo, te ni cacahān de jíin yá:

Condēhé, chí tē cáscuáha jíin ró casáha de jniñu jeē tu íyo váha sáha yó quivī ndetátú, áchí ley Moisés.

3 Te ni cahān maá yá jíin de:

¿A tu ní cácahu ró tutu ndese ni sáha David, ñn quivī jeē ni jíi de sōco jíin tē cáhīn jíin de?

4 Te ni quivī de ini vehe Yaā Dios. Te ni yeji de pan ii jeē yosó ndijin nuū Yaā Dios. Te tú na ley jeē cáji de, ni tē cáhīn jíin de, chí máá-ni sutū cuu caji. Te vésú súcuan te tú na cuēchi ní íyo síquī de.

5 ¿Te á tu ní cácahu ró tutu ley Moisés, ndese casájniñu sutū ini templo, vésú quivī ndetātu cúu? Te tú na cuēchi íyo síquī de, vésú quivī ndetātu casájniñu de jniñu jeē cácuu de sutū.

6 Te cáhán rī jíin ró jeē maá rí jeē iyó yáha, cújéhu ga rī vésú templo.

7 Te tu cájecūhun ni rō jijnáhan ró jñuhun yáha jeē yosó núu tútu ii jeē ni cahān Yaā Dios: Jeē cuní gā rī cúu jeē cundáhú ni rō jnáhan ró, vésú jeē socó rō quiti nuū rī, achí yá. Te núu jeē ní cajecūhun ni rō jñuhun yáha, te ma cahān rō súcuan síquī tē jeē tú na cuēchi núú.

8 Chi ruhū, Yaā ní nduu tē, máá rí cúu jeē ndácu jniñu síquī ndese sáha ñáyuu quivī ndetátú, áchí yá.

*Jeē ní nduvāha tē ni ichī ndaha  
(Mr. 3.1-6; Lc. 6.6-11)*

9 Yūcuán na te cuahān Jesús, te ni quivī ya ini vehe ii sinagoga.

10 Te yūcuan íne ñn tēe ni ichī ñn ndaha de. Te cáncuni tēe grupo fariseo jeē nihīn de cuēchi siquī yā, te ni cacajñūhún de ya:

¿A iyó ley jeē cuu nasávāha yó ñayuu cuhú quivī ndétātú? áchí de.

11 Te ni cahān yā jíin de:

¿Ndé ñn rōhó, núu névāha ró ñn lanchi, te núu nínga tí ini ñn yaū quivī ndétātú, te á tu jéhén rō natava rō tī, chí naún?

12 ¿Te á tu cánuú ndasí gá ñn tēe vésú ñn lanchi? Núu súcuan te vetū-ni sáha yó jniñu váha quivī ndétātú, áchí yá.

13 Yūcuán na te ni cahān yā jíin tēe ni ichī ndaha ún:

Scáá ndaha ró.

Te ni scaá de, te ni nduvāha-ni nájnūhun iyó inga.

14 Yūcuán na te ni quendacoo tēe grupo fariseo, te ni candajñūhún de siquī Jesús, ndese cahni de ya.

### *Jñūhun Jesús jeē ni cáhān Isaías nde jenahán*

15 Te ni jini Jesús jeē súcuan cájeni ni de, te ni quenda ya yūcuan cuáhān yā. Te cuehē ñayuu cándiquīn i ya. Te ni nasávāha ya ndihī ñayuu cuhú.

16 Te ni ndacu ya jniñu nuū i jeē ma stéén i ya.

17 Te súcuan ni cuu návāha squícu jñūhun ni cahān Yaā Dios siquī Jesús, te ni nacani Isaías jñūhun ya un ndé jenahán:

18 Yāha cúu mozo rī jeē ní nacāji rī, te manī rī jíin yá, te cúsi ni rī jíin yá. Te cuāha rī Espíritu rī coo jíin yá.

Te máá yá sándaā jniñu ñayuu tēcá nación.

19 Ma tejnāhan ya, ni ma cána jee ya, te ni ma cahán jee ya ichi jeē cúni ñayuu.

20 Ma sáha xeēn yā jíin ñayuu ni cunīhin jñūndóho siquī, ni ma snáā yā ñayuu jeē maá lulí-ni cácandíje.

Chí cujéhnū ya siquī ndihī, te ndaā ndacu ya jniñu.

21 Te ñayuu tēcá nación cocuhun ni i jeē jnáma ya i.

Achí Yaā Dios, achí Isaías nde jenahán.

### *Jeē ní cacahān de jeē jejniñu ya fuerza Satanás*

(Mr. 3.19-30; Lc. 11.14-23; 12.10)

22 Yūcuán na te ni caquindeca i nuū yā ñn tēe cuáá ññhín, chí ñūhun tachī ini de. Te ni nasávāha ya de. Te ni ndundijin tinūú de te ni nacahān de.

23 Te ndihī ñayuu cuehē un ní canaa ni i cájito i, te ni cacahān i:

¿A tēe yāha cúu jeē ni cáhān Yaā Dios jeē cacu nuū yucūn David? áchí i.

24 Te tēe grupo fariseo, ni cajini de jeē súcuan cacahān i. Te ni cacahān de:

Tēe yāha ma cúu quenehen de tachī núu jeē tu sáha de jíin fuerza Satanás jeē cujéhnū nuū tachí, áchí de.

25 Te Jesús ni jini yā jeē súcuan cájeni ni de, te ni cahān yā jíin de:

Tācá nación jeē casásñn máá te cájejnāhan máá, núu súcuan te snáā jeē iyó váha máá. Te núu ñn ñuu chí ñn vehe casásñn máá te cájejnāhan máá, te ma cúu ga coyūcu cáhnu.

26 Te suni súcuan Satanás núu quenehen jnāhan tachī, núu súcuan te sásñn máá. ¿Te ndese cuiñi ñihin Satanás jeē ndácu jniñu núu súcuan?

27 Chí cacahān rō jeē jíin fuerza Satanás quenehen rī tachī. Te núu súcuan cúu núú, te ñayuu cascuáha jíin máá ró jijnāhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jijnāhan i cachi jeē ní castívi ndasí suhva ró ni cacahān rō jeē cáquenehen rī tachī jíin fuerza Satanás.

28 Te tuú chí sa jíin Espíritu Yaā Dios cúu jeē quenehen rī tachī. Núu súcuan te je ndéé Yaā Dios mēhñu ró jeē ndácu ya jniñu.

29 ¿Chí ndese cuu quivī ñn tēe ini vehe tēe ndacuī jeē quenehen de ndajniñu de? Chí cánuú jeē xihna gā cuhni de tēe ndacuī ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quenehen rī tachī.

30 Te ñayuu tu iyó manī jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

31 'Jeē yúcuan cáhán rī jín ró: Iyó modo coo jñuhun cáhnu ni nuū tāca cuēchi cásáha ñayuu, jín núū tāca jñuhun néé cácahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i.

32 Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayivī yáha, ni ní tiempo quíji.

*Jñuhun yujnu váha jín yujnu néé  
(Lc. 6.43-45)*

33 'Núu yujnu váha, te vāha ndehē, te núu yujnu néé, te cánéé ndehē. Chi jín ndehē te jíní yō ndese yujnu cúu. Te suni súcuan ñayuu.

34 Va sēhe coō cácuu ró, chi xeēn rō nájnūhun coō. ¿Ndese cuu cahān rō jñuhun váha, chi ñayuu cásáha néé cácuu ró? Chi jniñu jeē jéni ni anuá ñayuu, máni yūcuan cáhán i.

35 Tēe vāha cáhán de jñuhun vāha, chi iyó ndāā anuá de. Te tēe sáha néé cáhán de jñuhun néé, chi cánéé ánuá de.

36 Te cáhán rī jín ró jeē tācá na-ni jñuhun cácahān ñayuu, nacuāha i cuenta jñuhun un quívī coo juicio.

37 Chi jín jñuhun ni cahān rō sándaā yā siquī rō, núu jeē quéndōo ndāā rō chí jéé cóndee cuēchi siquī rō. Achí yá.

*Jeē ní cajicān ñayuu tu cácañdije in  
jniñu jéhnu  
(Mr. 8.12; Lc. 11.29-32)*

38 Yūcuán na te jecu tēe grupo fariseo jín tēe cástéén tutu ley Yaā Dios, ni cacahān de jín yá:

Maestro, cácuñi na jéé sáha ní in jniñu jéhnu jeē steén núu máá ní cúu Yaā ní tají Yaā Dios, achí de.

39 Te ni cahān yā jín de:

Ñayuu yáha jeē casáha jniñu néé, tu cájetáhu cuiti i Yaā Dios. Te cájicān i in jniñu jéhnu jeē steén núu Yaā ní tají Yaā Dios cúu ri. Te tuá na inga jniñu jéhnu stéén rī nuū i, chí máá-ni jniñu jéhnu nájnūhun ni cuu jín Jonás, tēe ni nacani jñuhun Yaā Dios.

40 Chi nájnūhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone ri chíji ñuhun unī nduú unī ñuú, te sáá te natecu rī.

41 Te tāca ñayuu ñuu Nínive nuū ní nacani Jonás jñuhun, natecu i jín ñayuu tiempo yáha, quívī juicio jeē sándaā yā cuēchi, te cahān i cuēchi siquī ñayuu yáha. Chi máá i ni canacani ni i ni castóo i cuēchi i quívī ní nacani Jonás jñuhun nuū i. Te vijna chí cújéhnu ga ruhū Yaā ine yāhá vēsú Jonás, te tu cácañdije ró rúhū.

42 Te reina jeē ní cújéhnu nación ichi sur, natecu ña jín ñayuu tiempo yáha, quívī juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ni jini nahín ña jñuhun ndíchí ní cahān rey Salomón. Te vijna chí cújéhnu ga ruhū, Yaā ine yāhá vēsú Salomón, te tu cácañdije ró rúhū.

*Tachī jeē nastútú jnáhan ndivi ini  
ñayuu  
(Lc. 11.24-26)*

43 'Núu ni quenda in tachī ini in tēe tu cándije, te jica cuu nuū ñuhun téhé, ndúcú núu ndétátú, te tu níhín, yūcuán na te jéni ni maá:

44 Na quínuhun rī vehe nuū ní quenda ri. Te núu ni ndee tucu, te jito jeē tēe tu cándije ún, cúu de nájnūhun in vehe iyú te ni ndundoo.

45 Yūcuán na te jéquiñin uxā gā tachī neé gá vēsú maá. Te quívicoo ini tēe un jéé cóyūcu yúcuan. Núu súcuan te xeēn gā ndoho tēe un jéé sándihí vēsú jeē xihna ñuhún. Te suni súcuan ndoho ñayuu tiempo yáha jeē casáha néé. Achí yá.

*Naná yā jín ñani yā  
(Mr. 3.31-35; Lc. 8.19-21)*

46 Te níni súcuan cáhán yā jín ñayuu ún, te ni quee naná yā jín táca ñani yā, ín ña nuū quéhe, te cúní ña cahān ña jín yá.

47 Te ni cachi in tēe nuū yā:

Naná ni jín táca ñani ni cáhín nuū quéhe, te cácuñi cahān jín ní, achí de.

48 Te ni cahān yā jín tēe ni cahān súcuan jín yá:

¿Ndé ñn cúu náná rī, te ndé ñn cácuu ñani rī? Achí yá.

<sup>49</sup> Te ni steén ndaha yá nde nuū cáyūcu tée cáscuáha jíin yá. Te ni cahān yā:

Suni náná rī jíin ñani rī cácuu tāca jéē yáha.

<sup>50</sup> Chi tāca ñáyuu casquícu jniñu cúní maá Tátá rī, Yaā ndeé andiví, suu cácuu ñani rī, cuāha rī, náná rī. Achí yá.

*Jnūhun yátá síquī tēe jéte trigo*  
(Mr. 4.1-9; Lc. 8.4-8)

### 13

<sup>1</sup> Te quivī un ní quenda Jesús vehe cuahān yā, te ni jinū yā ni cucōo ya yumar.

<sup>2</sup> Te ni cutútú cuéhē ndasí ñayuu nuū yā. Te ni quiví ya ini ñn barco, ni cucōo ya. Te tāca ñáyuu un cáyūcú i yumar.

<sup>3</sup> Te jíin jnūhun yátá ni cahān yā cuehē jnūhun nuū i, te súcuan ni cahān yā:

Ñn tēe cate trigo, ni quenda de jeē cate de.

<sup>4</sup> Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayeji tī.

<sup>5</sup> Te jecu gā trigo ni jitē nuū ñūhun yuū, nuū tú cuehē ñuhun. Te yachī-ni ni cane, chi tu cóquin ñuhun.

<sup>6</sup> Te nuū ní cane niāndii, te ni ichī-ni, te ni casun, chi tu ní níhín nuū quihín yoho.

<sup>7</sup> Te jecu gā trigo ni jitē nuū náne iñu. Te ni jehnu iñu ún, te ni jesi nuū.

<sup>8</sup> Te jecu ni jitē nuū ñūhun váha, te ni jēhe cuehē nunī. Sava ni jēhe ciento jeē ñn ñn, te sava ni jēhe unī xico, te sava ga ni jēhe ocō uxī.

<sup>9</sup> Tāca rōhó jéē jíini sōho, na chúsóhó ró. Achí yá.

*Najehē cahān yā máni jnūhun yátá*  
(Mr. 4.10-12; Lc. 8.9-10)

<sup>10</sup> Yūcuán na te tēe cáscuáha jíin yá un ní quecoo de nde nuū yā, te ni cacajnūhún de ya:

¿Najehē cúu jeē máni jnūhun yátá cahān ni jíin ñáyuu? achí de.

<sup>11</sup> Te ni cahān yā jíin de:

Róhó jíināhan ró chi sáha ya jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā andiví jeē ndacu ya jniñu nuū i. Te ñayuu yáha jéē tu cá candíje, chi ma jécūhun ni i.

<sup>12</sup> Chi ñayuu je jécūhun ni, chi stéén gā yā nuū i, te víhyá gā cuni i. Te ñayuu tu cándíje, sa suhva naa jecu jeē je jíini i ún.

<sup>13</sup> Jeē yúcuan cáhán rī jnūhun yátá jíin i. Chi vésú cájito i, te quendōo i nájñūhun jeē tú na vé ni cájito i. Te vésú cájini sōho i, te ma jécūhun ni i, te quendōo i nájñūhun jeē tú na vé ni cájini i.

<sup>14</sup> Ñayuu yāhá chi squícu síquī i jnūhun ni cahān Yaā Dios jeē ní nacani Isaías, tēe ni nacani jnūhun nde jenahán:

Vésú cuni nahín ró, te ma jécūhun ni rō,

te vésú coto ró, te ma nácuni rō.

<sup>15</sup> Chi ñayuu yáha yōhyo ni ndunīhni ni i,

te yōhyo uhū chusóhó i,

te nájñūhun cájesi i tinūú i,

návāha coo nájñūhun jeē tu cájito i,

ni tu cájini nahín i,

te ni ma jécūhun ni i,

ni ma násāma ini i quívicoo i nuū rī

jeē nasávāha rī anuá i nuū cuéchi i.

Achí Yaā Dios, achí tutu.

<sup>16</sup> Te máá ró jíināhan ró, yōhyo ndetū rō, chi cájito ró jíin tñūu ró, te cájini nahín ró jíin sóho ró.

<sup>17</sup> Chi jendaá cahān rī jíin ró jeē cuehē tēe ni canacani jnūhun Yaā Dios jíin cuéhē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

*Jeē ní castūhun cájī yá jnūhun yátá tēe jéte trigo*

(Mr. 4.13-20; Lc. 8.11-15)

<sup>18</sup> Núu súcuan te cuni nahín jíināhan ró na vé cuni cahān jnūhun yátá tēe jéte trigo: Trigo un cúu jnūhun Yaā Dios.

<sup>19</sup> Te ñayuu cájini sōho jnūhun ndese ndácu Yaā andiví jniñu, núu tu



cájecūhun ni i te cácuu i nájnūhun trigo jeē ni jítē yuhíchi. Yūcuán na te quíji jexeén te quénde-ni jnūhun ini anuá i.

<sup>20</sup> Te trigo jeē ni jítē nuū ñūhun yuū cúu nájnūhun ñayuu cájini sōho jnūhun, te yachī-ni cájetáhú i te cácusī ni i jín.

<sup>21</sup> Te tu cúcutú jnúhun ún ini anuá i, te jecu-ni quivī cájetáhú i. Te núu ni quejéé jnúndóho, chí jító xeēn ñayuu i síquī jnúhun ún, te quejéé nácani yátá ni i.

<sup>22</sup> Te jeē ni jítē nuū náne iñu cúu ñayuu cájini nahín jnúhun, te cándihvī ni i síquī jeē iyó ini ñayivī yáha, te cúní i cucúca i, te stáhú un i cujnéñu i jín. Te ndíhi jeē yáha jési nuū jnúhun ya, te tu íje i jín jnúhun ya.

<sup>23</sup> Te trigo jeē ni jítē nuū ñūhun váha cúu nájnūhun ñayuu cájini nahín jnúhun, te cájecūhun ni i, te cáhije i jín jnúhun ya. Te sava i cúu nájnūhun nunī jeē jéhe ciento jeē ñn ñn, te sava ga i jéhe unī xico, te sava ga i jéhe ocó uxī. Achí yá.

### *Jnūhun yátá síquī ite lasú*

<sup>24</sup> Te ni cahān yā inga jnūhun yátá jín de:

Jeē ndácu Yaā andiví jniñu cúu nájnūhun ñn tēe jeē ní jete de trigo váha nuū ñūhun de.

<sup>25</sup> Te iyó ñn tēe jító uhū de tēe chí trigo. Te náa cáquixī tēe chí trigo jín táca jnáhan de, te ni jehēn ni jete ndiquin lású nuū trigo de, te cuahān.

<sup>26</sup> Te nuū ní cane trigo ún, te ni cane yoco i, te suni súcuan ni jehnu ite lasú un.

<sup>27</sup> Yūcuán na te ni jengoo mozo ni cacahān i jín patrón i: ¿A násūu trigo váha ní jéte ní núu ñūhun ní? ¿Te ndese cúu jeē ní canecoo ite lasú nuū?

<sup>28</sup> Te ni cahān de jín i: ñn tēe jító uhū ruhū ni sáha jeē yáha. Te ni cacahān mozo un jín de: ¿Núu súcuan te á cúní ni jéē na quíngoo ná te jnuhun ná? achí i.

<sup>29</sup> Te ni cahān de: Tuú, chí núu jnuhun ró lású un te sanaa te jnuhun ró ndé jín trigo.

<sup>30</sup> Váha ga na cuéhnu máá ndé quivī tahndé. Te quivī un cáhān rī jín tēe cahnde jeē xihna gā ite lasú cahnde

de, te chucú tútú de návāha cahmu yó. Yūcuán na te trigo chi cahnde de ndiví ini yacā rī, achí de. Achí yá.

### *Jnūhun yátá síquī ndiquin mostaza (Mr. 4.30-32; Lc. 13.18-19)*

<sup>31</sup> Te suni ni cahān yā inga jnūhun yátá jéē steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájnūhun jéhnu ñn ndiquin mostaza jeē ní jequin ñn tēe nuū ñūhun de.

<sup>32</sup> Te jendaá jeē ñn ndiquin lúli gá cúu vésú táca gá ndiquin. Te núu ni jehnu, te cúu cáhnu ga vésú táca gá yucū, chí ndúu nájnūhun ñn yujnu. Te quíjicoo saa, te cásáha ti tacā tī chīji ndaha ún. Achí yá.

### *Jnūhun yátá síquī levadura (Lc. 13.20-21)*

<sup>33</sup> Te inga jnūhun yátá ní cahān yā jín de:

Jeē ndácu Yaā andiví jniñu nuū ñayuu cúu nájnūhun levadura jeē ní quihin ñn ñahan. Te ni saca ña jín únī kilo harina, nde ni ndaa ndíhi ñujen ni sáha. Achí yá.

### *Jeē máni jnūhun yátá cáhān yā jín i (Mr. 4.33-34)*

<sup>34</sup> Táca jnúhun yáha ní cahān Jesús jín ñayuu cuehē ún. Te táca jéē ni steén yā, máni jnūhun yátá ní cahān yā jín i.

<sup>35</sup> Súcuan ni sáha ya návāha squícu jnūhun ni cahān tēe ni nacani jnūhun Yaā Dios nde jenahán:

Cahān rī táca jnúhun yátá jín ñayuu, te cachi rī táca jnúhun yísahí ndé quivī ní jecōo ñayiví.

Achí tutu, achí yá.

### *Jeē ní castūhun cájí yá jnūhun ite lasú*

<sup>36</sup> Yūcuán na te ni nacuatáhú Jesús nuū ñayuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jín yá:

Nacani cájí ní jnūhun yátá ite lasú nuū ná, achí de.

<sup>37</sup> Te ni cahān yā jín de:

Jeē jéte trigo váha un cúu máá rí, Yaā ní nduu tēe.

38 Te ñuhun un cúu ñayiví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén.

39 Te tēe jíto uhū jeē ní jete lasú un cúu máa jexeén. Te quiví tahndé cúu quiví jínu ñayiví. Te tēe cahnde un cácuu ndajéhé Yaā Dios.

40 Te nájnūhun tahndē ite lasú te cayū nuū ñuhún, súcuan coo quiví jínu ñayiví.

41 Chi máa rí, Yaā ní nduu tēe, tají rí ndajéhé rí quingoo. Te nastútú yá tāca ñáyuu casquíví jnáhan nuū cuéchi, jíin ñáyuu casáha jniñu néé, quenehen ya i mēhñu ñáyuu ndácu ri jniñu nuū.

42 Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i.

43 Yūcuán na te ñayuu squícu nuū yā chi ndindēe i nájnūhun niāndii, te coyūcú i nuū ndácu máa Tátá i jniñu. Tāca rōhó jēe jíni sōho, na chúsóhó ró.

*Jnūhun yátá síquī yejnū xūhún jeē yísāhí*

44 Te jeē ndácu Yaā andiví jniñu nuū ñáyuu, suni cúu nájnūhun in yejnū xūhún jeē yísāhi chíji in ñuhun. Te ni nanihín in tēe, te ni nacasi tucu de síquī. Te jeē cúsi ni de jíin, te ni jehēn de ni xícó ndihí de jeē névāha de, te ni jeen de ñuhun ún.

*Jnūhun yátá síquī perla jeē ndeé yahu*

45 Te jeē ndácu Yaā andiví jniñu nuū ñáyuu, suni cúu nájnūhun in tēe jēen xícó, te ndúcú de perla váha.

46 Te ni jini de in perla jeē yáhu ndasí, te ni jehēn de ni xícó ndihí de jeē névāha de, te ni jeen de perla un.

*Jnūhun yátá síquī ñunu jnā chācá*

47 Te jeē ndácu Yaā andiví jniñu nuū ñáyuu, suni cúu nájnūhun in ñunu jeē cásingava de ini mar, te quivícoo ndinuū chācá.

48 Te núu ni chitú ñunu ún, te cánatava de yundúte. Te cácucoo de cánacāji de chācá. Te chācá váha cájnaa de ini jīca, te chācá tú váha cáscáne de.

49 Te suni súcuan coo quiví jínu ñayiví. Chi quijicoo ndajéhé yā, te sásín ya ñayuu casáha jniñu néé mēhñu ñáyuu casáha jniñu váha.

50 Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

*Jnūhun yátá síquī ndajniñu ndeé yahu*

51 Te ni cajnūhun yá de jíjnáhan de:

¿A ní cajecūhun ni rō tāca jnūhun yáha, chí tuú? áchí yá.

Te ni cacahān de jíin yá:

Ni cajecūhun ni ná, áchí de.

52 Te ni cahān yā jíin de:

Iyó váha núu súcuan. Te in tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jnūhun síquī ún. Chi cúu de nájnūhun in tēe chíí vehe. Te ini yejnū de táva de ndajniñu ndeé yahu, sava jeē jeé jíin sava jeē je ni cunahán iyó. Achí yá.

*Jeē cuánuhun yā ñuu Nazaret (Mr. 6.1-6; Lc. 4.16-30)*

53 Te ná ni ndihí ni cahān Jesús tāca jnūhun yátá yáha, te ni quenda ya yūcuan cuáhān yā.

54 Te ni najinū yā ñuu yā Nazaret. Te ni steén yā jnūhun ini vehe i sinagoga yūcuán. Te ni canaa ni ñayuu cájini nahín i, te ni cacahān i:

¿Ndeé nuū ní cutūhva tēe yáha tāca jnūhun ndíchí? ¿Te ndese cúu sáha de tāca jniñu jéhnu yáhá?

55 Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas.

56 Te suni cáyūcu cuáha de jíin yó yáhá. ¿Te ndese jíin de tāca jnūhun yáha núu súcuan? Achí ñayuu.

57 Te súcuan ni cacujēe ni i nuū Jesús. Te ni cahān yā jíin i:

Tāca tēe nácani jnūhun Yaā Dios, iyó yíñuhún ñayuu jíin de, te máni ñayuu ñuu maá de jíin ñáyuu vehe máa de cúu jeē tu iyó yíñuhún jíin de. Achí yá.

58 Te tu ní sáha ya cuehē jniñu jéhnu yūcuán, chi tu cácadíje i ya.

*Jeē ni jíhī Juan tēe scuándute  
(Mr. 6.14-29; Lc. 9.7-9)*

## 14

<sup>1</sup> Te tiempo yúcuan te Herodes, tēe ndácu jniñu región Galilea, ni jini jnūhun de jnūhun Jesús.

<sup>2</sup> Te ni cahān de jíin ñáyuu cáhīin jíin de:

Tēe yúcuan cúu Juan tēe ni scuándute, te ni natecu de. Jeē yúcuan íyó poder de sáha de jniñu jéhnū. Achí de.

<sup>3</sup> Chi Herodes, je ni ndacu de jniñu jeē na quívī Juan vecāa, jíin jēē na cónuhnī de jíin cadena. Súcuān ni sáha de jeē siquí Herodías, ñasihí ñani de Felipe.

<sup>4</sup> Chi Juan ni cahān de nuū Herodes: Tu íyó ley condeca ró ña, achí de.

<sup>5</sup> Te jeē yúcuan ní cuni Herodes cahni de Juan. Te yúhú de jeē quitī ni ñayuu, chí ndihī i jéni ndije ni i jeē ñn tēe nácani jnūhun Yaā Dios cúu Juan.

<sup>6</sup> Te ñn quívī ni sáha Herodes ñn vico quívī ní cacu de. Te sēhe síhī Herodías ni quívī i ni jita jéhé i nuū ñáyuu ní cana de ún. Te ni cusī ni Herodes ni sáha i.

<sup>7</sup> Te ni jejnūhun téyí de jeē cuáha de núu na vé cacān i nuū de.

<sup>8</sup> Te ni jehēn i ni cajnūhún i naná i na vé cacān i. Te ni ndívī i nuū Herodes, te ni cahān i:

Cuāha ní xínī Juan tēe scuándute, cone nuū ñn cohō, achí i.

<sup>9</sup> Yūcuán na te rey Herodes ni cucuíhyá ni de. Te siquī jeē ni jéjnūhun téyí de, jíin jēē ní cajini sōho tēe cáyeji staā jíin de, jeē yúcuan ní ndacu de jniñu jeē na cuáha nuū i.

<sup>10</sup> Te ni tají de soldado jeē na quícahnde xínī Juan ini vecāa.

<sup>11</sup> Te ni quee soldado un jíin xínī Juan, íne nuū ñn cohō, te ni jēhe nuū súchi síhī un. Te máa i ni jendeca i nuū naná i.

<sup>12</sup> Yūcuán na te ni jengoo tēe cáscuáha jíin Juan, te ni candonehen de yiquí cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

*Jeē ni scáji yā uhūn mil tēe  
(Mr. 6.30-44; Lc. 9.10-17; Jn. 6.1-14)*

<sup>13</sup> Te ná ni jini Jesús jnūhun, te ni cujiyo ya yúcuan cuáhān yā jíin barco, jeē cóne sñn ya ñn lugar nuū tú ñayuu. Te ni cajini ñayuu jeē cuahán yā. Te tācá ñuu ni quendacoo i cájica jéhé i, cuajnahan i ya.

<sup>14</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñáyuu cácuñu jeē véjicoo i jíin.

<sup>15</sup> Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chí tú na ñayuu yúcu. Núu súcuān te tají ní ñayuu na quíngoo i tācá ñuu, te cuaan i jeē cáji i.

<sup>16</sup> Te ni cahān Jesús jíin de:

Tu jíni ñúhún quíngoo i, chí cuāha máa ró jeē cáji i, achí yá.

<sup>17</sup> Te ni cacahān de jíin yá:

Tú na vé cánevāha ná yāha, chí uhūn-ni staā jíin úu-ni chācá, achí de.

<sup>18</sup> Te ni cahān yā jíin de:

Cuāha na quíji, achí yá.

<sup>19</sup> Te ni cahān yā jíin ñáyuu un jéē na cúcōo i nuū íte. Te ni quihin ya ndihúhún staā jíin úu chācá un. Te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá. Te máa de ni casaja de nuū ñáyuu cuehē ún.

<sup>20</sup> Te ndívī i ni cayeji, te ni candutú chíji i. Te ni canastútú de pedazo jeē ní quendōo, te ni chitú úxī uū jīca.

<sup>21</sup> Te tēe ni cayeji un cúu nájnūhun uhūn mil, te sñn ga cúu ñahan jíin súchi lúlí.

*Jeē ní jica jéhé yá nuū mar  
(Mr. 6.45-52; Jn. 6.16-21)*

<sup>22</sup> Yūcuán na te ni cahān-ni Jesús jíin tēe cáscuáha jíin yá jeē na quívīcoo de barco, te cosnūú de quingoo de nde inga lado mar, níni jēē nátají yá ñayuu un quínungoo i.

<sup>23</sup> Te nuū ní cuu ni nacuatáhú yá nuū i, te máñúhún-ni ya ni caa ya yucu, cuacacān tahú yā. Te ni cuaa, te íne máñúhún yá yūcuán.

24 Te barco un, je ni cuu sava nuū mar cuahān. Te ndute mar un nátundahá nihin barco, chi vēji tachī ichi núú de.

25 Te jeē yínee gā ni quee Jesús nuū de, jica jéhé yá nuū mar.

26 Te tēe cáscuáha ún, ni cajito de ya jeē jica ya nuū mar. Te ni candondava de, te ni cacana cóhó de jeē cáyūhú de.

Jíhná cúu, áchí de.

27 Te ni cahān-ni Jesús jíin de:

Ndeyí coo ni rō, te ma yūhu ró, chi máá rí cúu, áchí yá.

28 Yūcuán na te ni cahān Pedro jíin yá:

Núu máá ní cúu, te cahān ni jíin ná jēe na cáca jéhé ná nuū mar te jeē na núu ní, áchí de.

29 Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndúte cuahān de nuū Jesús.

30 Te nuū ní jini de jeē nihin yíhi tachī, te ni yūhú de. Te ni quejé de quee de chíji ndute. Te ni cana cóhó de:

Jnama ní sáña, áchí de.

31 Te Jesús ni jni-ni ya ndaha de. Te ni cahān yā jíin de:

Tēe tu cándíje nihin cúu ró. ¿Naun ni nayūhu ró? Achí yá.

32 Te ni quívi ya ini barco un jíin de, te ni jecuíñi-ni tachī.

33 Yūcuán na te tēe cáhiin ini barco un, ni cajecuíñi yítí de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

*Jeē ní nasávāha ya ñayuu cácuñi región Genesaret*

*(Mr. 6.53-56)*

34 Te ni quenda jíyo ya jíin de nuū mar un, ní jinū yā región Genesaret.

35 Te ñayuu yūcuan ní canacuni i ya. Te ni cascáca i jñūhun tǎcá ndañúū yūcuan jēe ni jinū yā. Te ñayuu ni caquindeca i ñayuu cácuñi nuū yā.

36 Te ni cacahān ndahú i jíin yá jeē na quéhé i vēsú yusáhma ya. Te tǎca ñayuu jeē ní caquehé sahma ya, ni canduvāha i.

*Siquí ndese cújnehén ñáyuu*  
*(Mr. 7.1-23)*

## 15

1 Yūcuán na te jecu tēe grupo fariseo jíin tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jíin yá:

2 Tēe cáscuáha jíin ró, ¿naun cástívi de costumbre jeē ní cajequin ñayuu jenahán? Chi tu ní cáscuícu de costumbre jeē nándahá de nuū yā te caji de staa. Achí de.

3 Te Jesús ni cajñūhun yá de:

Te máá ró jijnáhan ró, ¿suni naun cástívi ró jniñu ní ndacu Yaā Dios nuū rō? Chi sa costumbre máá ró cúu jeē casquícu ró.

4 Chi ni cahān Yaā Dios: Coo yíñūhún ró jíin tátá rō jíin náná rō. Te núu ndé in cahān siquí tátá chí síquí naná, na cúu nahín, áchí Yaā Dios.

5 Te máá ró chí cacahān rō jeē cuu cahān in tēe jíin tátá de jíin náná de: Ma cúu chindéé ñáhán ná níhín cuáha na jēe caji ni jēe cúhun ní, chí ndíhi jeē névāha ná, je ni socō na núu Yaā Dios.

6 Te tēe cahān súcuan, tuá cánuú chindéé ñáhán de tátá de náná de, áchí ró jijnáhan ró. Te súcuan cástívi ró jniñu ní ndacu Yaā Dios, jeē siquí costumbre ni cajequin máá ró.

7 Tēe stáhú-ni cácuu ró. Ndaā ni nacani Isaías jñūhun siquí rō nde jenahán, yósó núu tútu i jeē ni cahān Yaā Dios:

8 Ñayuu yáha chí máá yuhu-ni i cájetáhú i ruhū,  
te nasūu ndé jíin ini jíin ánuá i.

9 Te cáchiñūhún sáa-ni i ruhū,  
chí jñūhun cástéén i cúu jniñu ní candacu tēe,

te nasūu jēe ní ndacu máá rí cúu.  
Achí Yaā Dios. Achí yá.

10 Te ni cana ya ñayuu cuehē ún, te ni cahān yā jíin i:

Cuni sōho vāha jijnáhan ró, te chuhun ni rō:

11 Nasūu jēe quívi ini yuhu ñayuu cújnehén i sáha. Chí jñūhun jeē quenda yuhu i, yūcuan cúu jeē cújnehén i sáha, áchí yá.

12 Yūcuán na te tēe cáscuáha jíin yá, ni quecoo de nuū yā, te ni cacahān de: ¿A jíiní ni jēe ní caquiti ni tēe fariseo jeē ní cajini sōho de jnūhun ni cahān ní? áchí de.

13 Te ni cahān maá yá:

Cácuu de nájnūhun yujnu jeē tu ní náchuhun Tátá rī, Yaā ndeé andiví, te in quiví te jnuhun ya quihīn.

14 Na quíngoo máá de. Chi cácuu de nájnūhun tēe cuáá cástéén ichi nuū inga tēe cuáá. Chi núu in tēe cuáá stéén de ichi nuū inga tēe cuáá, te ndindúú de nīnga de xehvā. Achí yá.

15 Te ni cahān Pedro jíin yá:

Castūhun cájí ní jnúhun yátá yáha nuū na jíjnāhan ná, áchí de.

16 Te ni cahān Jesús:

¿Te á suni máá ró ná tu jecūhun ni rō chí naún?

17 ¿A tu cájecūhun ni rō jeē tāca jēe yéji ñayuu, chi quiví chíji i, te quēnda-ni cuahān?

18 Te jnūhun jeē quēnda yuhu ñayuu, chi nde ini anuá i vēji, te yūcuan cúu jeē cujnéhén i sáha.

19 Chi nde ini anuá ñayuu quēnda jeē jéni néé ni, jeē jéhni ndīyi, jeē casiquí ndeé jnāhan, jeē jíca jnéni, jeē sacuíhná, jeē cahán jnūhun stáhú, jeē cahán yāa síquī jnāhan.

20 Tāca jēe yáha cúu jeē cujnéhén ñayuu sáha. Te núu tu squícu i costumbre jeē nándahá i te caji i staā, tu cúnéhén i sáha. Achí yá.

*Ñahan inga nación jeē ní candíje nīhin*

*(Mr. 7.24-30)*

21 Te ni quenda Jesús yūcuan cuahān yā región Tiro jíin Sidón.

22 Te in ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ní sáña víi. Chi sēhe sáhí ná, ñūhun tachī ini i, te yōhyo xeēn ndóho i, áchí ña jíin yá.

23 Te tu ní cáhán cuiti yā jeē ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quíhín ña, chi cána jee ña vēji ña yatā yō, achí de.

24 Te ni cahān yā jíin ña:

Nuū maá-ni ñayuu nación Israel ni tají Yaā Dios sáña véji ná, chí cácuu i nájnūhun lanchi, quiti ní sana.

25 Te ñahan ún chí ni quee ña, te ni jecuiñi yiti ña nuū yā, te ni cahān ña:

Tátā, chindéé ñáhán ní sáña víi, achí ña.

26 Te ni cahān yatá yá jíin ña:

Tu iyó váha jeē quēnde yō staā sēhe, te cuāha yó núu ina, achí yá.

27 Te ni cahān ña:

Jendaá cahán ni Tátā, te chindéé ñáhán ní sáña vésú cúu ná nájnūhun ina. Chi suni máá tí cánihīn nahín tí pedazo staā cuechí jēe cóyo chíji mesa jitohe tí cáyeji tí, achí ña jíin yá.

28 Yūcuán na te ni cahān Jesús:

Yōhyo vāha jeē cándíje nīhin ní súcuan, nánā. Te na sáha ná jēe cuní ni, áchí yá.

Te máá hora un ní nduvāha-ni sēhe síhí ña.

*Jeē ní nasávāha ya cuehē ñayuu cácuhū*

29 Te ni quenda Jesús cuahān yā yūcuán, te ni yāha ya yumar Galilea. Te ni caa ya in yucu, te yūcuan ní cucōo ya.

30 Te cuehē ñayuu ni quecoo i nuū yā, te cándeca i tāca jēe cájica chácua, jeē cuaá, jeē ñihín, jeē cacúhndú, jíin cuéhē gā ñayuu cácuhū. Te ni cajequin i nuū jehé Jesús. Te ni nasávāha ya i jíjnāhan i.

31 Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, náccaca vāha ñayuu chacua, nánune tinū ñayuu cuaá. Te ni cacahān i jeē yōhyo vāha Yaā cúu Yaā Dios ñuu i Israel.

*Jeē ní scáji yā cuūn mil tēe*

*(Mr. 8.1-10)*

32 Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ni rī ñayuu cuehē yāhá, chí je ni cuu unī quiví cáyūcú i jíin rí, te tuá na vé caji i. Te tu cuní rī natajé rí i nuhun ndite i, chí núu súcuan te sava ichi te cuíta lí i. Achí yá.

33 Te ni cacahān tēe cáscuáha jíin yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yúcu, achí de.

<sup>34</sup> Te ni cajñūhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúli, áchí de.

<sup>35</sup> Yūcuán na te ni cahān yā jíin ñáyuu cuehē un jéē na cúcōo i.

<sup>36</sup> Te ni quihin ya ndihúxá staā jíin cháca ún, te ni nacuatáhú yá nuū Yaā Dios. Te ni tahu cuéchi yá, te ni jēhe ya nuū téē cáscuáha jíin yá, te máá de ni casaja nuū ñáyuu.

<sup>37</sup> Te ndihi i ni cayeji, te ni candutú chíi i. Yūcuán na te ni canastútú de pedazo jeē ní quendōo, te ni chitú uxā jīca.

<sup>38</sup> Te téē ni cayeji ún, nde cuūn mil de cúu, te sīn ga cúu ñahan jíin súchi lúli.

<sup>39</sup> Yūcuán na te ni nacuatáhú yá nuū ñáyuu ún, te cuanungoo i. Te ni ndiví ya ini barco, te cuahān yā región Magdala.

*Jeē cájicān de ñn jniñu jéhu nuū yā  
(Mr. 8.11-13; Lc. 12.54-56)*

## 16

<sup>1</sup> Te ni quecoo téē grupo fariseo jíin téē grupo saduceo nuū yā. Chi cáconi de coto ndee de ya, te ni cajicān de jeē na sáha ya ñn jniñu jéhu jeē coo ñn seña ichi ándiví.

<sup>2</sup> Te máá yá ni cahān yā jíin de:

Núu ni ini, te cácahān rō: Nandii, chi ni nasácuéhé i andiví, áchí ró.

<sup>3</sup> Te jenéhen chi cácahān rō: Vija te cuun saū, chi ni nasácuéhé i andiví, áchí ró. Téē stáhú-ni cácuu ró. Chi cájecūhun ni rō ndese stéén seña andiví, te tu cájecūhun ni rō ndese stéén tãcá jniñu jéhu sáha ri tiempo yáha.

<sup>4</sup> Ñayuu yáha jeē casáha jniñu néé, tu cájetáhú cuiti i Yaā Dios. Te cájicān i jeē sáha ri ñn jniñu jéhu jeē coo ñn seña andiví. Te tuá na inga jniñu jéhu stéén rī nuū i, chi máá-ni jniñu jéhu nájnūhun ni cuu jíin Jonás, téē ni nacani jnūhun Yaā Dios nde jenahán. Achí yá.

Te ni stóo ya de jíināhan de, te cuahān yā.

*Jñūhun levadura téē fariseo  
(Mr. 8.14-21)*

<sup>5</sup> Te téē cáscuáha jíin yá ni canaa ni de condiso de staā náa cuangoo de jíin barco inga lado mar.

<sup>6</sup> Te ni cahān Jesús jíin de:

Coto má candíje ró levadura téē grupo fariseo jíin téē grupo saduceo, achí yá.

<sup>7</sup> Te téē cáscuáha un ní cacahān maá de:

Va síquī jeē tú na staā ndíso yó, jeē yúcuán cáhán yā súcuán, áchí de.

<sup>8</sup> Te ni jini Jesús, te ni cahān yā:

¿Najehē cácahān rō jeē ni cáhān rī súcuán síquī jeē tú na staā cándiso ró? Téē tu cándíje ñihin cácuu ró.

<sup>9</sup> ¿A ná tu jecūhun ni rō jeē tu ní cáhán rī súcuán síquī jeē tu ndíso ró stáá? ¿A tu cánucūhun ni rō jeē ní tahu cuéchi rī uhūn staā ni cayeji uhūn mil téē, te nasaa jīca ni canastútú ró jeē ni quéndōo?

<sup>10</sup> ¿Te á tu cánucūhun ni rō jeē ní tahu cuéchi rī uxā staā ni cayeji cuūn mil téē, te nasaa jīca ni canastútú tucu ró?

<sup>11</sup> ¿Te najehē tu cájecūhun ni rō jeē násūu síquī staā ni cahān rī jíin ró jeē ni cáhān rī jeē coto má candíje ró levadura téē fariseo jíin téē saduceo? Achí yá jíin de.

<sup>12</sup> Yūcuán na te ni cajecūhun ni de jeē tu ní cáhán yā jeē coto de jeē ma cáji de pan jeē yíhi levadura, chi sa suhva ni cahān yatá yá jeē ma cándíje de jñūhun stáhú cástéén téē fariseo jíin téē saduceo.

*Jeē ni cáhān Pedro jeē Jesús cúu Cristo  
(Mr. 8.27-30; Lc. 9.18-21)*

<sup>13</sup> Te nuū ni jínū Jesús región Cesarea Filipo jíin téē cáscuáha jíin yá, te ni cajñūhun yá de:

Ruhū, Yaā ní nduu téē, ¿ndé ñn cúu ri cácahān ñayuu?

<sup>14</sup> Te ni cacahān de:

Sava i cácahān jeē cúu ní Juan téē ni scuándute. Te sava ga i cácahān jeē cúu ní Elías, téē ni nacani jnūhun Yaā Dios

nde jenahán. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

<sup>15</sup> Te ni cahān yā jíin de:

Te máá ró, ¿ndé ñn cúu ri cácahān rō? achí yá.

<sup>16</sup> Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu níí cáni, achí de.

<sup>17</sup> Te ni cahān Jesús:

Yōhō ndetū rō, Simón sēhe Jonás, chí nasūú ñn ñayuu ni steén jnūhun yáha nuū rō, chí sa suhva máá Tátá rī, Yaā ndeé andiví, ní steén yā nuū rō.

<sup>18</sup> Te ruhū suni cáhān rī jíin ró jeē máá ró cúu Pedro, jeē cuní cahān: yuū. Te jnūhun ndaā jeē ni cáhān rō jeē máá rí cúu Cristo, suu cúu nájnūhun ñn yuū cáhnu. Te siquī yuū cáhnu yáha sáha ri jeē quítuu vehe, te vehe un cúu ñayuu cácañíje ruhū. Te tu ndé vé cundeyí cuítu siquī i, ni jnūhun xeēn jeē cájihī i, tuá na vé cúu sáha jíin ánuá i.

<sup>19</sup> Te máá ró condiso jniñu ró sáha ró jéé quívicoo ñayuu ndaha Yaā andiví jeē ndacu ya jniñu nuū i. Te tāca jéé cási rō jeē ma sáha ñayuu ini ñayiví yáha, suni casi jeē cáyūcú nde andiví. Te tāca jéé cuáha ró jnūhun sáha i ini ñayiví yáha, suni jeē cáyūcú nde andiví cuáha jnūhun. Achí yá.

<sup>20</sup> Yūcuán na te ni ndacu ya jniñu nuū tée cáscuáha jíin yá, jeē ma cáchi de nuū ní ñn ñayuu jeē cúu ya Cristo.

*Jeē ní castūhún Jesús jeē cúu yā*  
(Mr. 8.31-9.1; Lc. 9.22-27)

<sup>21</sup> Te nde saá ní quejéé Jesús cástūhun cájí yá nuū tée cáscuáha jíin yá jeē jíni ñúhún quihīn yā ñuu Jerusalén. Te tāca tée jéhnu jíin sūtū cácujeñnu jíin tée cástéén tutu ley, stóho ndasí de ya. Te cahni de ya, te nuū uní quiví te natecu yā, achí yá.

<sup>22</sup> Yūcuán na te Pedro, ni cana máñúhún de ya, te ni quejéé de cáhān de nuū yā:

¿Naun cáhān ni súcuan? Chí tu cuní Yaā Dios jeē cuu súcuan. Tu jíni ñúhún cuítu ndoho ní jnúndóho yáha, achí de.

<sup>23</sup> Te ni ndió cóto ya nuū Pedro, te ni cahān yā jíin de:

Cujiyo quihīn rō, chí cáhān rō ná cáhān Satanás. Chí tēe ndúcú stíví ruhū cúu ró. Te tu jéni ni rō nájnūhun jéni ni Yaā Dios, chí sa suhva jéni ni rō nájnūhun cájeni ni ñayuu. Achí yá.

<sup>24</sup> Yūcuán na te ni cahān yā jíin tée cáscuáha jíin yá:

Na-ni ñayuu núu cuní i condiquīn i ruhū, na cási i jeē cuní máá i, te na cóndiquīn i ruhū te cuāha i jnūhun ndoho i jnúndóho jeē siquí rī, vésú na cúu i.

<sup>25</sup> Chí núu ndé ñayuu cuní i cácu i nuū jnúndóho quiji nuū i jeē siquí ruhū, núu súcuan te jnahnū ndetū i níí cáni. Te núu ndé ñayuu, vésú na cúu i jeē siquí ruhū, te cotecu i níí cáni.

<sup>26</sup> ¿Chí ndé cuajniñu vésú na cundeyí ñayuu nihīn i níí ñáyiví, te núu quiví i nuū jnahnú ndetū i? Chí tú na jíin cuítu chunaa ñayuu jeē cácu ánuá i.

<sup>27</sup> Chí ruhū, Yaā ní nduu tēe, ndiji ri jíin táca ndajéhé rī, te yōhō luu cujéñnu ri nájnūhun cújéñnu Tátá rī. Yūcuán na te cuāha ri tahū nuū ñn ñn ñayuu núu ndese jniñu ni casáha i.

<sup>28</sup> Te jendaá cahān rī jíin ró jeē sava tēe cáhīn yáhá, ma cúu de chí nde cuni de jeē máá rí, Yaā ní nduu tēe, ndacu ri jniñu jíin poder rī.

*Jeē tucu ni nduu ya*  
(Mr. 9.2-13; Lc. 9.28-36)

## 17

<sup>1</sup> Yūcuán na te nuū iñú quiví te Jesús ni jeca ya Pedro jíin Jacobo jíin Juan ñani Jacobo, cuahān sñn ya jíin de ñn yucu súcún.

<sup>2</sup> Te yūcuán, tucu ni nduu ya nuū de. Chí ni ndindēe núu yā nájnūhun niāndii. Te sahma ya ni nducujín quiyí ndasí, nájnūhun nduva luz.

<sup>3</sup> Te ni cajito-ni de jeē Moisés jíin Elías, tēe ni cahīyo jenahán, cándajnūhún de jíin yá.

<sup>4</sup> Te ni cahān Pedro jíin yá:

Nacā jeē váha jeē cáhīn ná yáha. Te núu cuní ni te na sáha ná únī vehe ramada, ñn cuu máá ní, inga cuu Moisés, te inga cuu Elías, achí de.

5 Te níní cáhán gā de, te ni quiji vicó nūhun jéē yaa ndasí, ni jesi-ni nuū de. Te nuū vicó un ní cahān ñn jnūhun:

Yāha cúu Sēhe ri jeē maní ndasí rí jín, te cúsiñ ni rí jín. Na cúni nahín ró jnūhun cáhán yā. Achí.

6 Te jeē súcuan ni cajini sōho tēe cáscuáha ún, te ni cajecava ndeyí de, chi yōhyo ni cayūhú de.

7 Yūcuán na te ni quee Jesús, te ni soó yá ndaha ya siquí de. Te ni cahān yā:

Ndocuññi, te ma yūhu ró jijnáhan ró, achí yá.

8 Te ni candacoto de, te tuá tēe un ní cájito de, chi máá ñn na Jesús.

9 Te ni cananuu de jín yá yucu ún. Te ni ndacu ya jniñu nuū de:

Ma cáchi rō nuū ní ñn jeē súcuan ni cajito ró, chi nde na nátecu maá rí, Yāa ní nduu tēe, achí yá.

10 Yūcuán na te tēe cáscuáha jín yá, ni cacajnūhún de ya:

Núu súcuan te tēe cástéén tutu ley Yāa Dios, ¿najehē cácahān de jeē cánuú ndiji Elías xīhna gā, te sáa te quiji Yāa cúu Cristo? achí de.

11 Te ni cahān Jesús jín de:

Jendaá cúu jeē xīhna gā quiji ñn tēe cuu nájnūhun Elías, te sátūhva de ndihí, achí tutu.

12 Te cáhán rí jín ró jeē jé ni quiji tēe ni cuu nájnūhun Elías, te tu ní jíní ñayuu jeē suu de cúu. Te ni casáha ndevāha ñayuu jín de ndihí jeē ní cacuu ni maá i. Te suni súcuan stóho i ruhū, Yāa ní nduu tēe. Achí yá.

13 Yūcuán na te tēe cáscuáha un, ní cajecūhun ni de jeē cahān yā jeē Juan tēe scuándute, ni cuu de nájnūhun Elías.

*Jeē ní nasávāha ya ñn sūchi jíhí yíhí*  
(Mr. 9.14-29; Lc. 9.37-43)

14 Te ni najinū yā jín de nuū ñayuu cuehē ún. Te ni quee ñn tēe, ni jecuññi yítí de nuū yā, te ni cahān de:

15 Cundáhú ni ni séhe yí ná, chi yōhyo xeē ndóho i cuehyí jíhí yíhí. Te je ni cuu cuehē jínu cótúú i nuū ñuhún jín núu ndúte.

16 Te ni quindecá ná i nuū tēe cáscuáha jín ní, te tu ní cúu sávāha de i, achí de.

17 Te ni cahān Jesús:

Ñayuu yōhyo ñhni ni cácuu ró chi tu cácandíje ró jéē cuu nduvāha i. ¿Nasaa ga quiví condee rí jín ró? ¿Te nasaa ga quiví cuandeyí ni rí jín ró? Cuáquihin sūchí un na quíji i, achí yá.

18 Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

19 Yūcuán na te tēe cáscuáha un, ní cacajnūhun sín de ya:

¿Najehē tu ní cúu quenehen ná tachí un jijnáhan ná? achí de.

20 Te ni cahān yā:

Siquí jeē tu cácandíje ñhin ró jéē cuu sáha ró. Chi jendaá cahān rí jín ró, jeē núu candíje ró vésú ñn tíhli-ni, cūhva nájnūhun ñn ndiquin mostaza, te cuu sáha ró táca-ni jniñu yí. Chi cuu cahān rō jeē na cújiyo yucu yáha quihín inga lado, te cujiyo-ni. Te táca-ni jniñu chi cuu sáha ró, te núu candíje ñhin ró jéē cúu.

21 Te ñn tachí súcuan chi ma quenda cuítí quihín, te núu tu cacān tahú rō te coo ndite ni rō. Achí yá.

*Jeē ní cahān tucu ya jeē cúu yā*  
(Mr. 9.30-32; Lc. 9.43-45)

22 Te jíca cuu Jesús jín de jijnáhan de región Galilea, te ni cahān yā jín de:

Máá rí, Yāa ní nduu tēe, nastúu i ruhū nuū táca tēe xeēn.

23 Te cahni de ruhū, te nuū uní quiví te natecu rí, achí yá.

Te ni canducuíhyá ndasí ni de jeē ní cahān yā jnūhun yáha.

*Siquí xúhun cuajníñu ini templo*

24 Te ni jinū yā ñuu Capernaum jín tēe cáscuáha jín yá. Te tēe cástútú xúhun templo ni quecoo de, te ni cacajnūhún de Pedro:

Te maestro maá ró jijnáhan ró, ¿á tú cuáha de xúhún cuajníñu ini templo, chí naún? achí de.

25 Te ni cahān Pedro:

Cuu, achí de.

Te ná ni quiví de ini vehe, te xīhna gā Jesús ni cahān yā jín de:



¿Ndese jéni ni rō, Simón? Tāca tée cácuu rey ini ñayivi yáha, ¿ndé núu cájicān de xūhun renta jín xūhun cua-jniñu ñuu? ¿A núu séhe de chí núu ñáyuu sín vehe? áchí yá.

<sup>26</sup> Te ni cahān Pedro:

Nuū ñáyuu sín vehe, áchí de.

Te ni cahān Jesús:

Núu súcuan te tú na inga cujéhnú nuū séhe rey jeē cacán xūhún un núu i.

Súcuan ni cahān yā jeē cujéhnú ya cúu ya Sēhe Yaā Dios. Te ni cahān yā:

<sup>27</sup> Te na chúnaa yō, návāha tu squítí ni yō de. Núu súcuan te cuáhán ndé yumar, te scáne ró gancho jeē jnái chācá, te tava rō chācá jéē jnái xīhna gā. Te ndica rō yuhu ti, te yūcuan níhīn rō ñn xūhun jéē cánda chunaa rō jeē cájicān de. Te quindēca ró núu de jeē cúu ruhū jín rōhó. Achí yá.

*Ndé ñáyuu cúu jeē cujéhnú ga  
(Mr. 9.33-37; Lc. 9.46-48)*

## 18

<sup>1</sup> Te suni quívi un ní quecoo tēe cáscuáha un núu yā, te ni cacajnūhún de ya:

¿Ndé ñn cújéhnú ga nuū ñáyuu jeē ndácu Yaā andiví jniñu nuū? achí de.

<sup>2</sup> Te ni cana ya ñn sūchi lúlí, te ni jeni ya i mēhñú de.

<sup>3</sup> Te ni cahān yā:

Jendaá cahán rī jín ró, núu tú nandió cóo ni rō te caní ni rō nájnūhun ñn sūchi lúlí, ma quívi cuítí rō ndaha Yaā andiví jéē ndacu ya jniñu nuū rō.

<sup>4</sup> Núu súcuan te ñáyuu jeē jéni ni i jeē tu cújéhnú i, nájnūhun jéni ni sūchi lúlí yáha, suu i cújéhnú ga nuū ñáyuu jeē ndácu Yaā andiví jniñu nuū.

<sup>5</sup> Te na-ni ñáyuu núu jeē siquí ruhū jetáhú i ñn sūchi lúlí nájnūhun sūchi yáha, te ruhū jetáhú i. Achí yá.

*Xeēn coo siquí ñáyuu quívi nuū  
cuéchi*

*(Mr. 9.42-48; Lc. 17.1-2)*

<sup>6</sup> Te núu ñn sūchi lúlí yáha cándije i ruhū, te núu quívi i cuéchi sáha na-ni ñáyuu, te vāha ga núu ni conuhnī ñn

yōso cáhnu sucūn ñáyuu ún, te quēe i chíji ndute mar nuū.

<sup>7</sup> Nacā xeēn cúu jín ñáyuu ñayivi, chí máni íyó jéē nducú squívi ñáyuu nuū cuéchi. Te máni súcuan coo ini ñayivi. Te nacā xeēn ndoho ñáyuu jeē squívi jnáhan nuū cuéchi.

<sup>8</sup> Núu súcuan te núu ndaha ró chí jéhē rō sáha jeē quívi ró cuéchi, vāha ga cahnde rō te scáne ró na quíhín, návāha tuá sáha ró cuéchi. Chí vāha ga jeē coo chácúá ró chí coo tícúhndu ró te quívi ró núu cotecu rō ní cáni, vésú jeē cóndee ndíndúú ndaha ró jéhē rō te quívi ró núu ñuhún jeē cayú ní cáni.

<sup>9</sup> Te núu tinūu ró sáha jeē quívi ró cuéchi, vāha ga tava rō te scáne ró na quíhín, návāha tuá sáha ró cuéchi. Chí vāha ga jeē coo ñn-ni tinūu ró te quívi ró núu cotecu rō ní cáni, vésú jeē cóndee ndíndúú tinūu ró te quívi ró núu ñuhún infierno.

*Jnūhun yátá síquí lanchi jeē ní sana  
(Lc. 15.3-7)*

<sup>10</sup> Coto ma sájéē ni rō nuū ní ñn sūchi lúlí yáha. Chí cahán rī jín ró jeē tēcá ndajéhé andiví jéē ndító ya i, níni cáhīn ya nuū maá Tátá rī andiví.

<sup>11</sup> Chí ruhū, Yaā ní nduu tēe, vēji rī jeē jnáma rī ñáyuu jeē ní sana i nuū Yaā Dios.

<sup>12</sup> ¿Te ndese cájeni ni rō? Núu ñn tēe ndéca de ñn ciento lanchi, te núu sana ñn ti, ¿á tu stóo de cuūn xico xahūn cuūn gā tī yucu, te ndicó de quinanducú de quítí ní sana ún?

<sup>13</sup> Te núu ni nanihīn de ti, te ndaā jeē yóhyo ga cúsi ni de jín quítí ún vésú jín cúūn xico xahūn cuūn gā quítí jeē tu ní sána.

<sup>14</sup> Te suni súcuan máá Tátá rō, Yaā ndeé andiví, tu cúní yā jeē jnahnú ndetū ni ñn sūchi lúlí yáha.

*Siquí jeē cóne cáhnu ni yō nuū jnáhan  
yó*  
*(Lc. 17.3)*

<sup>15</sup> Te núu jnáhan ró ní sáha de cuéchi siquí rō, núu súcuan te castūhun ró nuū mañúhún-ni de jeē ní sáha de cuéchi siquí rō. Te núu ni jetáhú de jnūhun ní cahān rō jín de, núu súcuan te je ni ndumanī de jín ró ní sáha ró.

16 Te núu tu ní jétáhú de jnūhun cáhán rō, te quicāna ró ñn chí úū gā ñayuu quihīn rō jíin núū de, cuu i testigo jíin ró, te cundaā cuēchi de te ndumanī de jíin ró.

17 Te núu tu ní jétáhú tucu de jnūhun cácahān tēe ún, yūcuán na te castūhun ró nuū ñáyuu cácañdíje. Te núu tu ní jétáhú tucu de jnūhun cahān ñayuu cácañdíje ún, te siáá rō de na cóo de nájnūhun ñn tēe tu cácañdíje nuū Yaā Dios chí tēe stútú xūhun renta.

18 'Jendaá cahán rī jíin ró jēe tāca jēe cāsī rō jeē ma sáha ñayuu ini ñayīví yáha, suni cāsī jeē cáyūcú nde andīví. Te tāca jēe cuáha ró jnúhun sáha i ini ñayīví yáha, suni jeē cáyūcú nde andīví cuáha jnūhun.

19 'Te suni cáhán rī jíin ró, núu uū jnáhan ró ini ñayīví yáha, inuú canī ni rō siquī ñn jeē cacán tahu rō, núu súcuan te máá Tátá rī andīví cuáha ya jeē cájicān rō.

20 Chi núu ndé mí ndútútú úū chí únī ñayuu jeē cáchiñúhún i ruhū, te yūcuan íne rī jíin i, áchí yá.

21 Yūcuán na te ni quee Pedro nuū yā, te ni cajnūhún de ya:

¿Nasaa jínu cone cáhnu ni na núu jnáhan ná jēe sáha de cuēchi siquī ná? ¿A ndé uxā jínu chí naún? áchí de.

22 Te ni cahān Jesús:

Tu cáhán rī jíin ró jeē maá uxā jínu, chí nde uxā jínu jeē uní xico uxī.

*Jnūhun yátá síquī mozo jeē tu ní íne cáhnu ní*

23 'Núu súcuan te Yaā ndeé andīví, suhva cúu jeē íne cáhnu ni yā nuū ñáyuu ndácu ya jniñu nuū: Cúu nájnūhun ñn rey jeē cuní de sándaā de jíin mozo de jeē cátaū nuū de.

24 Te ni quejéé de sándaā de jíin i. Te ni caquindeca i ñn mozo jeē taú tijni millón peso nuū de.

25 Te tú na vé névāha mozo un chunaa nuū de. Te ni ndacu de jniñu jeē na cúyāhu mozo un jíin ñasihí jíin séhe jíin táca ndajniñu, te nucūnaa xūhun táú.

26 Yūcuán na te ni jecuiñī yití mozo un, te ni cahān ndahú de jíin patrón

de ún: Condetu ní, te na chúnaa ndihī ná xūhun ní, áchí de.

27 Te máá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā.

28 Te ni quenda mozo un cuáhān de, te ni najnáhan-ni de jíin ñn jnáhan mozo de jeē taú jecu peso nuū de. Te ni jñi de tēe ún, te ni quitu de sucūn, te ni cahān de: Chunaa jeē taú rō nuū rī, achí de.

29 Te jnáhan mozo de un ní jecuiñī yití núu de, te ni cahān ndahú jíin de: Condetu te na chúnaa ndihī rī xūhun ró, achí.

30 Te máá de tu ní cúní de, chí ni chune de tēe un vecāa nde quivī nachunaa jeē taú nuū de.

31 Te tāca jnáhan mozo de ni cajito jeē súcuan ní sáha de, te ni cajnahuhū ndasí ni de. Te cuango de nuū patrón de, te ni cacachi de ndihī ndese ní cuu.

32 Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chi ni ine cáhnu ni rī ndihī jeē taú rō nuū rī, chí ni cahān ndahú ró jíin rī.

33 Te nájnūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuū, áchí de.

34 Te ni quití ndasí ni patrón, te ni ndacu de jniñu jeē na quivī vecāa nde nachunaa ndihī jeē taú nuū de.

35 Te ni jínu ni cahān yā, te áchí yá:

Nájñūhun ni sáha rey un jíin mozo de, suni súcuan sáha máá Tátá rī andīví jíin táca rōhó núu tu cone cáhnu ni rō nuū jnáhan ró nde jíin ini jíin ánuá rō, núu na-ni cuēchi sáha i nuū rō. Achí yá jíin de jíin de.

*Siquī jeē ma stóo jnáhan tēe jíin ñahan (Mr. 10.1-12; Lc. 16.18)*

## 19

1 Te nuū ní ndihī ni cahān Jesús tāca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii.

2 Te cuehē ñayuu ni candiquīn i ya, te yūcuan ní nasávāha ya ñayuu cácuḥū.

3 Yūcuán na te ni quecoo jecu tē grupo fariseo nuū yā, chi cáconi de coto ndee de ya núu ndese cahān yā. Te ni cacajnūhún de ya:

¿A íyó ley jeē cuu ndusín in tē jíin ñasihí de núu na-ni siquī cúu, chí naún? áchí de.

4 Te ni cahān yā:

¿A tu ní cácahu ró tutu īi ndese ni sáha Yaā Dios ñayuu nde xīhna ñúhún? Chi tē jíin ñahan ni sáha ya, achí.

5 Te suni ni cahān Yaā Dios: Jeē yūcuan cúu jeē stóo tē tátá de náná de, te quijnáhan de jíin ñasihí de, te in na cuu ndíndúu de, áchí Yaā Dios, achí tutu.

6 Núu sūcuan te tuá cúu uū jnáhan de, chí in na cúu. Jeē yūcuan tu íyó váha jeē stóo jnáhan, chí jeē ni squíjnáhan Yaā Dios cúu, áchí yá.

7 Te ni cacajnūhún de ya:

Núu sūcuan ¿te naun ni ndacu Moisés jniñu jenahán jeē núu stóo in tē ñasihí de, te na cúvāha acta jeē ndusín de jíin ña? áchí de.

8 Te ni cahān yā jíin de:

Siquī jeē níhni ní rō jijnáhan ró, jeē yūcuan ní jēhe Moisés jnūhun jeē stóo ró ñasihí ró. Te nde xīhna ñúhún chí nasūu sūcuan ní cuu.

9 Te ruhū chí cáhán rī jíin ró, núu in tē stóo de ñasihí de, te núu nasūu jéé tíjni ní ña, te quijnáhan de jíin inga ñahan, núu sūcuan te cásiquí ndéē de ña. Te núu in tē condeca de ñahan ní ndusín, suni cásiquí ndéē de ña, áchí yá.

10 Yūcuán na te ni cacahān tē cáscuáha jíin yá:

Te núu ma cúu stóo tē ñasihí de, núu sūcuan te vāha ga ma cóndeca de ñahan, áchí de.

11 Te ni cahān yā jíin de:

Jnūhun ni cahān rō yāhá, tu níhín jniñu nuū ndihí tē, chí máá nene tē jeē ni sáha Yaā Dios jeē nihín jniñu nuū.

12 Chi íyó tíjni siquī jeē jési jeē ma cóndeca tē ñahan. Chi sava tē ni cacacu de jeē ma cúu condeca de ñahan.

Te sava ga tē ni sáha ñayuu jeē ma cúu condeca de ñahan. Te sava ga tē ni cajeni ni maá de jeē ma cóndeca de ñahan siquī jeē ndihví ni de jíin jniñu jeē ndácu Yaā andiví nuū de. Tē jeē cúu cuatáhú jnūhun jeē ma cóndeca de ñahan, na cuatáhú de núu sūcuan. Achí yá.

*Jeē ni jícān tahu Jesús jehē sūchi lúlí (Mr. 10.13-16; Lc. 18.15-17)*

13 Yūcuán na te ni quecoo ñayuu jíin sūchi lúlí, jéē na sóo yá ndaha ya xinī i te cacān tahu yā jehē i. Te tē cáscuáha jíin yá, ni cacahān de nuū ñayuu vējicoo jíin i.

14 Te ni cahān Jesús:

Cuāha jnūhun na quíjicoo sūchi lúlí jíin nuū rī, te ma cásí rō jeē quíjicoo i. Chi ñayuu jeē ndió cóo ni i caní ni i nájnūhun sūchi yáha, suu i quíví ndaha Yaā andiví jéē ndacu ya jniñu nuū i, áchí yá.

15 Te ni sóo yá ndaha ya xinī i jíjnáhan i. Te ni quenda ya yūcuan cuahān yā.

*Jnūhun tē cúcá (Mr. 10.17-31; Lc. 18.18-30)*

16 Te in tē suchí ní quee de nuū Jesús, te ni cajnūhún de ya:

Tē vāha cúu ní Maestro. Te cachi ní, ¿na jniñu váha sáha ná te nihín tahu na cotecu na ní caní andiví? áchí de.

17 Te ni cahān yā jíin de:

¿Naun cáhán rō jeē tē vāha cúu rí? Tú ni in tē vāha íyó, chí máá in-ni Yaā Dios. Te núu cúní rō cotecu rō ní caní, te squícu ró jniñu ní ndacu ya. Achí yá.

18 Te ni cahān de:

¿Ndé-ni jniñu cúu núu sūcuan?

Te ni cahān yā:

Ma cáhni rō ndīyi. Ma cosíquí ndéē jnáhan ró. Ma sacuíhná ró. Ma sajnūhún ró.

19 Cuatáhú ró nuū tátá rō nuū naná rō. Te cundáhú ní rō jnáhan ró nájnūhun cundáhú ní rō maá ró, achí yá.

20 Te ni cahān tē suchí un:

Tācá jniñu yáha je ni squícu ná ndé ná lúlí ná. ¿Te na vé cúmanī gā sáha ná núu sūcuan?

21 Te ni cahān Jesús:

Núu cúní rō squícu ndihí ró, cuáhán te xīco ró ndihí jeē névāha ró, te cuāha ró núu ñáyuu ndahú. Te nde andiví cuáha ya jeē ndetū ndasí coo ró. Yūcuán na te quiji ró condiquīn rō ruhū quihīn yō, achí yá.

22 Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chí cucá ndasí de.

23 Yūcuán na te ni cahān Jesús jíin tēe cáscuáha jíin yá:

Jendaá cahán rī jíin ró, tēe cucá chí yōhyo yí quívicoo de ndaha Yaā andiví jeē ndacu ya jniñu nuū de.

24 Te cáhán tucu ri jíin ró jeē yachī gā yāha ñin camello yaū yutícuí, vēsú jeē quíví ñin ñayuu cucá ndaha Yaā Dios jeē ndacu ya jniñu nuū i, achí yá.

25 Te tēe cáscuáha jíin yá, yōhyo ni canaa ni de jeē ní cajini de jnūhun yáha, te ni cacajnūhun jnáhan de:

¿Ndé ñáyuu cúu jeē cácu núu súcuan?

26 Te ni ndacoto Jesús nuū de, te ni cahān yā:

Ñayuu chí ma cúu squíví i máa i ndaha Yaā Dios, te máa yá chí ndihí-ni cuu sáha ya, achí yá.

27 Yūcuán na te ni cahān Pedro:

Sāña jíin náhán ná ní castóo ná ndihí jeē cánevāha ná, te cándiquīn na níhín. ¿Te na vé nihín na núu súcuan? achí de.

28 Te ni cahān Jesús jíin de:

Ruhū, Yaā ní nduu tēe, jendaá cahán rī jíin ró jíin náhán ró jéē ñin quíví conene rī mesa ndacu ri jniñu, te yōhyo luu kujénu ri ini ñayíví jéé. Te quíví ún te máa ró jeē ní cacondiquīn rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí uū yucūn ñayuu Israel.

29 Te tāca ñáyuu jeē ni stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquī jeē cóndiquīn i ruhū, te nanihīn i ñin ciento gā jeē súcuan. Te suni nihīn tahú i cotecu i ní cáni.

30 Te cuehē ñayuu jeē vijna cácuu i nuū, nduu i sandihí. Te ñayuu jeē vijna cácuu i sandihí, nduu i nuū. Achí yá.

*Jnūhun yátá síquī tēe cáscájniñu*

## 20

1 Te suhva cúu jeē ndácu Yaā andiví jniñu nuū ñáyuu: Cúu nájnūhun ñin tēe chíí ñuhun. Te ñin nehen ni quenda de, ndúcú de tijni mozo jeē taxín ndéhē uva de.

2 Te ni sándaā de jíin mozo un jéē chúnaa de ñin denario jeē quíví. Te ni tají de tēe un cuángoo jeē taxín uva de.

3 Yūcuán na te ni quenda tucu de nájnūhun cahān. Te ni jito de nuū sava ga tēe cáyūcu sáa-ni de nuū yáhu.

4 Te ni cahān de jíin: Róhó jíin náhán ró, cuángoo taxín ró uva rī, te chunaa vāha ri yāhu ró, achí de. Te tēe un cuángoo de.

5 Te ni quenda tucu de jeē cuácuu cahuxí uū jíin jéē cuácuu cahuní, te suni súcuan ni nihīn tucu de mozo.

6 Te jeē cuácuu cahuhūn ni quenda tucu de. Te ni nihīn tucu de jecu gā tēe cáyūcu sáa-ni nuū yáhu. Te ni cahān de jíin: ¿Najehē cáhīn sáa-ni ró yáha ní ndiáca? achí de.

7 Te ni cacahān tēe ún: Síquī jeē tú ni ñin ní cána sāña jéē sájniñu ná. Te ni cahān de jíin tēe ún: Núu súcuan te suni máa ró quingoo ró taxín ró ndehē uva rī, chí chunaa vāha ri yāhu ró, achí de.

8 Te nuū ní ini, te tēe chíí ñuhun ni cahān de jíin tēe cújénu nuū mozo de: Cana xiní tēe cáscájniñu te chunaa rō yāhu de, te xīhna gā tēe ni quívicoo sandihí, te sáa te tēe ni quívicoo xīhna ñuhún, achí de.

9 Te ni quecoo tēe jeē ni quívicoo cahuhūn. Te ñin denario ni caquihīn ñin ñin de.

10 Yūcuán na te ni quecoo tēe jeē ni quívicoo xīhna ñuhún. Te cájeni ni de jeē cuehē gā quiyāhu de. Te ñin-ni denario ni caquihīn ñin ñin de.

11 Te nuū ní caquihīn de, te ni caquejéé de cácahān sōo de síquī tēe chíí ñuhun, achí de:

12 Máa ná jíin náhán ná, ndiáca ni casájniñu ná, te ni candoho ná jéē jihní. Te tēe yáha jéē ni quívicoo sandihí, chí máa ñin hora-ni ni

casájniñu de. Te inuú-ni ni chiyāhu ní sáña jíin de, áchí de.

<sup>13</sup> Te tēe chíi ñuhun ni cahān jíin in de: Amigo, nasūu jēe tú vāha sáha ri jíin ró. ¿A tu ní sándaā yō jeē in denario quiyāhu ró, chí naún?

<sup>14</sup> Núu súcuan te quihin yāhu ró te quinhun rō. Chi cúní rī jeē tēe ni quivicoo sandihí yāha, inuú quiyāhu de jíin máá ró.

<sup>15</sup> ¿Te á tu cuu sáha ri ndese cúní rī jíin xúhun máá rí? ¿Te chí cúcuésún ni rō jeē ní chiyāhu vāha ri de jíināhan de siquī jeē vāha ni rī? áchí de.

<sup>16</sup> Te nájnūhun ni sáha tēe chíi ñuhun, suní súcuan sáha Yaā Dios. Chi ñayuu cácuu sandihí, nduu i nuū. Te ñayuu cácuu nuū, nduu i sandihí. Chi cuehē ñayuu cána ya jeē candíje i ya. Te jecu-ni i cándíje, te nácāji ya maá i jeē ndúu i sēhe ya. Achí yá.

*Jeē ni cáhān tucu Jesús jeē cúu yā  
(Mr. 10.32-34; Lc. 18.31-34)*

<sup>17</sup> Yūcuán na te ná ni quihin Jesús ichi cuahān yā ñuu Jerusalén, te ni cana sīn ya ndihúxí uū tēe cáscuáha jíin yá. Te ni cahān yā jíin de:

<sup>18</sup> Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujeñhu jíin núu tēe cástéén tutu ley. Te ndonda de siquī rī jeē cúu rī.

<sup>19</sup> Te squiví de ruhū nuū tēe nación Roma jeē cáyūcú Jerusalén cándacu jniñu. Te tāca tēe un sácatā de nuū rī. Te cani de ruhū, te sáa te cahni de ruhū jicā cruz. Te nuū uní quiví te natecu rī. Achí yá.

*Jeē ni jíicān naná Jacobo jíin Juan in favor nuū yā*

*(Mr. 10.35-45)*

<sup>20</sup> Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuiñí yití ña nuū yā, jíicān ña in favor nuū yā.

<sup>21</sup> Te ni cajnūhun yá ña:

¿Na vé cuní rō?

Te ni cahān ña:

Cuāha ní jnūhun jeē quiví ndácu ní jniñu te conēne ndindúú séhe ná yāha

xiin ní, in i lado vāha ní, te inga i lado jecó ní, achí ña.

<sup>22</sup> Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho ri? Achí yá.

Te ni cacahān de:

Cuu sáha ná.

<sup>23</sup> Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho ri. Te jeē conēne ró lado vāha ri jíin lado jecó rí, nasūu rúhū cúu jeē cuāha jnūhun. Chi je íyó túhva cuu tāca tēe jeē ní nacāji Tátá rī, te tēe un níhīn. Achí yá.

<sup>24</sup> Te uxī gā tēe cáscuáha jíin yá ní cajini de jnūhun yāha. Te ni caquití ni de nuū uú ñani ún.

<sup>25</sup> Te Jesús ni cana ya de, te ni cahān yā jíin de:

Cájini rō ndese cásaħa tēe cácujeñhu nuū ñayuu tācá nación. Chi cándacu níhin de jniñu nuū i, te máá de cáchí ndese coo.

<sup>26</sup> Te máá ró jijnāhan ró, chi ma sáha ró súcuan. Chi núu ndé in ró cúní cujeñhu, sa suhva cuajniñu ró núu jnāhan ró.

<sup>27</sup> Te núu ndé in ró cúní cuu nuū, sa suhva sáha ró máá ró mozo nuū jnāhan ró.

<sup>28</sup> Chi suni súcuan sáha ruhū, Yaā ní nduu tēe, chi nasūu jēe véji ri jeē cuajniñu ñayuu nuū rī, chi sa suhva véji ri jeē cuajniñu ri nuū ñayuu. Te cuāha ri maá rí cuu rī návāha jnama ri cuehē ñayuu, achí yá.

*Jeē ní nasávāha ya uū tēe cuáa*

*(Mr. 10.46-52; Lc. 18.35-43)*

<sup>29</sup> Yūcuán na te ni quenda ya jíin de ñuu Jericó. Te cuehē ndasí ñayuu ni candiquín i ya.

<sup>30</sup> Te yuhíchi un cáyūcu úu tēe cuáa. Te ni cajini de jnūhun jeē yāha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ni sáña, áchí de.

31 Te ñayuu un ní cacahān i nuū de jeē na cāsī de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña víi, achí de.

32 Te ni jecuiñi Jesús, te ni cana ya ndindúú té cuáá un, te ni cajñuhun yá de:

¿Na vé sáha ri jíin ró cǎcuni rō?

33 Te ni cacahān de jíin yá:

Jeē na ndúndijin tinūu ná cǎcuni ná, achí de.

34 Te ni cundáhú ni yā de. Te ni tee ya ndaha ya tinūú de. Te ni candundijin-ni tinūú de. Te ni candiquin de ya cuango de jíin yá.

*Jeē ni quivi Jesús ñuu Jerusalén  
(Mr. 11.1-11; Lc. 19.28-40; Jn. 12.12-19)*

## 21

1 Te nuū cuácuyajni ya ñuu Jerusalén, te ni jinū yā jíin té cáscuáha jíin yá ñuu Betfagé, jeē íne jehē yucu Olivos. Te ni tají yá uū tē cáscuáha jíin yá jeē quíngoo de.

2 Te achí yá jíin de:

Cuáhán ñuu lulí íne ichi núú. Te yūcuan níñin rō ñin burra, núhni tī jíin ñin burro lulí. Te ndají ró tī, quijicoo ró jíin tī nuū rī.

3 Te núu ndé ñin cahān jíin ró, te cachi rō nuū: Máá Jítoho yō jíni ñúhún yá tī, achí rō. Yūcuán na te siáá-ni i tī, quiji ró jíin tī, achí yá.

4 Te súcuan ni cuu tācá jniñu yáha návaha squícu jñuhun ni cahān tē ni nacani jñuhun Yaā Dios nde jenahán, yósó núu tútu:

5 Cachi rō nuū ñayuu ñuu Jerusalén jeē naní ñuu Sión:

Yáhá condēhe ró jeē véji Rey rō.

Tu sájehnu ya maá yá, chi máá burra-ni yósó yá,

jíin burrito, sēhe quitī ndíso.

Achí tutu.

6 Yūcuán na te tē cáscuáha un cuángoo de, te ni casáha de nájnūhun ni ndacu Jesús jniñu nuū de.

7 Te ndéca de burra jíin séhe tī, ni ndecoo de nuū yā. Te ni casoó de sahma de siquī tī, te ni jecosō yā tī.

8 Te cǎhīin cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi.

9 Te ñayuu cuango ichi núu jíin ñayuu cuango ichi yátá, cǎcana jee i:

Yōhyo cújehnu Yaā cúu Séhe yucūn rey David. Yōhyo vāha Yaā cúu Yaā jeē véji jíin jniñu máá Jítoho yō Yaā Dios. Te yōhyo cújehnu máá Yaā Dios. Achí i.

10 Te nuū ni quivi ya ñuu Jerusalén, te ndihi ñayuu ñuu un ní cacuvaā i, te cuehē i cǎjnūhun jñahan:

¿Ndé téé cúu tē yáha? achí i.

11 Te ni cacahān ñayuu vējicoo jíin yá:

Yáha cúu Jesús jeē nǎcani jñuhun Yaā Dios, jeē véji nde ñuu Nazaret ndañúu Galilea. Achí i.

*Jeē ní quenehen ya ñayuu ini templo  
(Mr. 11.15-19; Lc. 19.45-48; Jn. 2.13-22)*

12 Yūcuán na te ni quivi Jesús ini templo cǎhnu Yaā Dios. Te ni quenehen ya tāca ñayuu cǎjeen quitī te cǎnaxīco núu ñayuu jeē socō i. Te ni scotúú ndeyi ya tāca mesa tē cǎstáyī xūhún, jíin silla tē cǎxīcō paloma.

13 Te achí yá jíin i:

Yósó núu tútu ñi jeē cahān Yaā Dios: Vehe ri chi vehe nuū cǎjicān tahu cúu, achí Yaā Dios. Te máá ró jijnáhan ró, chi nájnūhun yaū cava ñacuīhná ni canasáha ró. Achí yá.

14 Yūcuán na te sava ñayuu cuaá jíin ñayuu chacuá ni quecoo i nuū yā ini templo un. Te ni nasávaha ya i.

15 Te sutū cǎcujehnu jíin téé cǎstéén tutu ley Yaā Dios, ni cajito de tācá jniñu jehnu sáha ya, te ni cajini de jeē cǎcana jee sūchi lulí ini templo: Yōhyo cújehnu Yaā cúu Séhe yucūn rey David, achí i. Te ni caquitī ni de.

16 Te ni cacahān de jíin yá:

¿A tu jíni ró jēé súcuan cǎcahān sūchi yáha? achí de.

Te ni cahān Jesús jíin de:

Jíni ri. ¿Te á ná tu cahu ró jēé yosó núu tútu ñi jeē suhva cǎhán ñin tē jíin Yaā Dios?

Sáha ní jēé tāca sūchi lulí jíin sūchi cǎjexin,

vāha ndasí cáhán i jeē Yaā cujéhnu cúu Cristo.

Achí.

<sup>17</sup> Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuáá ún.

*Jeē ni cáhān yā nuū yújnu higo  
(Mr. 11.12-14, 20-26)*

<sup>18</sup> Te jenéhen inga quivī cuanuhun yā ñuu Jerusalén, te jíí yā sōco.

<sup>19</sup> Te ni jito ya ñn nundēhe higo, ín yuhíchi. Te ni jehēn yā jehē. Te tú na ndehē ni nihín yā, chí máá ndaha-ni ín. Te ni cahān yā jíín:

Vijna te ma cúun cuiti gā ndehē xinī rō, achí yá.

Te ni ichī-ni yujnu higo ún.

<sup>20</sup> Te tēe cáscuáha jíín yá, ni canaa ni de cájito de. Te ni cacajnūhún de ya:

¿Ndese ni sáha ní jéē yachí-ni ni ichī yujnu higo? achí de.

<sup>21</sup> Te ni cahān yā jíín de:

Jendaá cahán rī jíín ró, núu candíje ró te tú cani síquī ní rō, te cuu sáha ró jniñu jéhnu nájñūhun ni sáha ri jíín yujnu higo. Te nde jniñu jéhnu ga cuu sáha ró, chí nde cuu cahān rō jeē cújiyo yucu yáha, quihín nuū mar, te sáha nájñūhun cahān rō.

<sup>22</sup> Te tāca jéē cacán tahu rō jijnáhan ró, te núu candíje ró jéē nihín rō, te nihín rō. Achí yá.

*Síquī jeē ndíso jniñu Jesús  
(Mr. 11.27-33; Lc. 20.1-8)*

<sup>23</sup> Te ni quivī tucu ya ini templo cáhnu. Te ní ní stéén yā jñūhun, te sutū cácujeñnu jíín táca téé jéhnu jeē cándacu jniñu nuū ñáyuu hebreo, ni quecoo de nuū yā. Te ni cacajnūhún de ya:

¿Ndé ní nihín jniñu ró jéē sáha ró jniñu yáha? ¿Te ndé ñn ni tee jniñu síquī rō jeē sáha ró súcuan? Achí de.

<sup>24</sup> Te ni cahān Jesús:

Suni ruhū, cajñūhun rí rohó ñn jñūhun jijnáhan ró, te núu cuu stío cuíñí rō, yūcuán na te cachi rī nuū rō ndé ní nihín jniñu ri jeē sáha ri jniñu yáha.

<sup>25</sup> ¿Ndé ñn ni tee jniñu síquī Juan jeē ni scuándute de? ¿A Yaā Díos chí táca téé? achí yá jíín de.

Yūcuán na te ni candajnūhun máá de:

Núu cahān yō jeē Yaā Díos ni tee ya jniñu un síquī Juan, te cahān de jíín yó: Núu súcuan ¿te najehē tu ní cácandíje ró de?

<sup>26</sup> Te núu cahān yō jeē ñáyuu ni catee jniñu un síquī de, te cáyūhu yó ñáyuu, chí ndivii i cácandíje i jeē téé ni nacani jñūhun Yaā Díos ni cuu ndije Juan. Achí de cácahān máá de.

<sup>27</sup> Te ni cacahān de jíín Jesús:

Tu cájini rī, achí de.

Yūcuán na te ni cahān yā jíín de:

Ni ruhū, suni ma cáchi rī nuū rō ndé ñn ni tee jniñu síquī rī sáha ri jniñu yáha, achí yá.

*Jñūhun yátá síquī uú sēhe yí*

<sup>28</sup> Te ni cahān gā yā jíín de:

Cuni nahín ró jñūhun yátá yáha: ñn téé ni iyo uú sēhe yí de. Te ni cahān de jíín ñn i: Séhē, quihín rō taxín ró ndehē uva rī vijna, achí de.

<sup>29</sup> Te ni cahān i: Ma quihín na, achí i. Te ni cunúu, te ni nacani ni i, te cuahān i nuū jniñu ún.

<sup>30</sup> Te tēe un ní jehēn de nuū inga sēhe de, te suni súcuan ni cahān de jíín i. Te ni cahān i: Cuu núu súcuan, te quihín na, achí i. Te tu ní jéhén i.

<sup>31</sup> ¿Te ndese cájeni ni rō? Jeē ndíndúú i, ¿ndé ñn i ni squícu jniñu cúní tatá i? achí yá.

Te ni cacahān de:

Sūchi jéē ní cáhān de jíín xíhna gā, achí de.

Te ni cahān Jesús jíín de:

Súcuan cúu, te jendaá cahán rī jíín ró jeē téé cástútú xúhun renta jíín ñahan cájica jnéni, yachí cánacani ni i jeē stóo i cuēchi i te quívicoo i ndaha Yaā Díos jeē ndacu ya jniñu nuū i, te máá ró jijnáhan ró chí ma quíví ró.

<sup>32</sup> Chi ni quiji Juan, ni steén de ndese condiquín rō jñūhun ndaā, te tu ní cácandíje ró jñūhun ni cahān de. Te sa suhva téé cástútú xúhun renta jíín ñahan cájica jnéni, ni cacandíje i jñūhun ni cahān de. Te máá ró, vésú

ni cajito ró jēē ní cacandíje i, te tu ní cánacani cuiti ni rō jeē candíje ró. Achí yá.

*Jnūhun yátá síquī tēe néē cásájniñu nuū uva*

*(Mr. 12.1-12; Lc. 20.9-19)*

<sup>33</sup> 'Cuni sōho inga jnūhun yátá jijnáhan ró: Ni iyo ññ tēe chíí ññhun. Te ni nachuhun de cuehē ndehē uva. Te ni jesi de corral, te ni sáha de ññ nuū cūhun ndehē un táxñ. Te ni jeni de ññ vehe súcún návāha cuu coto de ññ cáhnu.

"Te ni stóo de nuū sava tēe sájniñu nuū, te cuu sava de ndehē jíñ. Te ni tee de ichi cuahān jicá de.

<sup>34</sup> Te máá tiempo ndutútú uva, te ni tají de jecu mozo cuanuquīhin sava uva nuū tēe cásájniñu ún.

<sup>35</sup> Te tēe un ní cajññ de mozo un. Te ññ i ni cacani de, te inga i ni cajehni de, te inga i ni cajēhe de yuū xinī.

<sup>36</sup> Te tēe chíí uva ni tají tucu de jecu gā mozo cuango, cuehē gā vēsú jeē xihna ññhún. Te suni súcuan ni casáha tēe un jíñ ndihñ mozo un.

<sup>37</sup> "Te jeē sándññ na te ni tají de sēhe de cuahān. Te jēni ni de: Tēe ún chi cuatáhú de jijnáhan de nuū séhe ri.

<sup>38</sup> Te tēe cásájniñu ún, núu ní cajito de nuū séhe tēe chíí uva, te ni cacahān maá: Tēe chíí táhū cúu jeē yáha. Na cáhni yō de, te ndōo tahū de cuu yó, áchí.

<sup>39</sup> Te ni cajññ de i, te ni caquenehen de i inga lado, te ni cajehni de i. Achí yá.

<sup>40</sup> Yūcuán na te ni cajññhun yá de:

Núu súcuan te núu na quíji tēe chíí uva un, ¿te ndese sáha de jíñ tēe cásájniñu ún? áchí yá.

<sup>41</sup> Te ni cacahān de jíñ yá:

Ma cundáhú cuiti ni de tāca tēe cásáha jniñu néē un, chí cahni de. Te cuāha de ññhun cáá uva un núu inga sava tēe sájniñu nuū, cuu sava de ndehē jíñ. Te quivñ ndutútú ndehē, te tēe ún nacuāha de sava ndehē nuū tēe chíí uva. Achí de.

<sup>42</sup> Te ni cahān Jesús jíñ de:

¿Te á ná tu cahu ró jnūhun yáha jeē yosó núu tútu ññ, jeē ruhū cúu nájññhun ññ yuū? Chí áchí tutu:

Yuū jeē ní casquéhichñ tēe cájeni vehe, yuū yáha nduu jeē quítuu vehe.

Máá Jítóho yō Yaā Dios ni sáha ya súcuan,

te cánaa ni yō jíto yó jniñu yáha.

Achí tutu.

<sup>43</sup> Núu súcuan te cáhán rñ jíñ ró jeē cujiyo-ni jeē ndácu Yaā Dios jniñu nuū ró jijnáhan ró, te nacuāha ya jniñu un núu inga ññayuu jeē síquícu váha i jniñu ndácu ya nájññhun cúní yá.

<sup>44</sup> Te ññayuu tu cácandíje, ndoho i nájññhun ndóho ññayuu jeē cotúú síquí yuū te jnánñú i. Te quivñ sándaā Yaā Dios cuēchi, te ññayuu tu cácandíje, ndoho i nájññhun ndóho ññayuu jeē nínga yuū síquí i te cundihñ i sáha. Achí yá.

<sup>45</sup> Te sutū cácujeñnu jíñ tēe grupo fariseo ni cajini sōho de tāca jnūhun yátá ní cahān yá. Te ni cajecūhun ni de jeē síquí maá de cúu jnūhun yátá ní cahān yá síquí tēe cásájniñu nuū uva jíñ tēe cájeni vehe.

<sup>46</sup> Te ni canducú de modo jññ de ya. Te cáyūhú de jeē quítñ ni ññayuu, chí cájeni ni i jeē tēe nácani jnūhun Yaā Dios cúu ya.

*Jnūhun yátá síquí vico nándāha*

## 22

<sup>1</sup> Yūcuán na te ni cahān tucu Jesús inga jnūhun yátá jíñ de jijnáhan de:

<sup>2</sup> Súcuan cúu jeē ndácu Yaā andivñ jniñu nuū ññayuu: Cúu nájññhun ññ rey jeē sáha de ññ vico jeē nándāha sēhe yí de.

<sup>3</sup> Te ni tají de tāca mozo de cuacana ññayuu jeē ní cahān de jíñ jēē quíjicoo. Te ññayuu ún tu ní cáculni i quíjicoo i.

<sup>4</sup> Te ni tají tucu de jecu gā mozo quingoo, te áchí de jíñ: Cahān jíñ ññayuu ní cana ri un jēē iyó túhva ndeyu. Chí je ni jehni rñ stiquí rñ jíñ táca gá quítñ ní nduu, te ndihñ je iyó túhva. Nehen jijnáhan ró vico nándāha. Achí rō jíñ i. Achí de.

<sup>5</sup> Te ññayuu ní cana de ún tu ní cásáha i cuenta. Chí ññ i cuahān nuū ítu i, te inga i cuahān nuū jniñu sáha i.



<sup>6</sup> Te sava ga i ni cajni i tāca mozo rey, te ni casácatā i nuū, te ni cajehni i.

<sup>7</sup> Yūcuán na te yōhyo ni quitī ni rey. Te ni tají de soldado de ni jengoo, ni cajehni de ñayuu ní cajehni ndīyi ún, te ni cajehmu de ñuu i.

<sup>8</sup> Yūcuán na te ni cahān de jíin sava ga mozo de: Ndihi je íyó túhva jeē cóo vico nándāha. Te ñayuu ní cana ri ún, tu íyó váha jeē quíjicoo i chi nasū ñáyuu váha cácuu i.

<sup>9</sup> Núu súcuan te cuáhán jijnáhan ró táca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de.

<sup>10</sup> Te ni quendacoo mozo un cuángoo tācá ichi. Te ni castútú de ndihi ñayuu ní canihīn de, cúu ñayuu cunéé, cúu ñayuu váha. Te súcuan te ni chitú ñáyuu ini vehe nuū iyó vico nándāha.

<sup>11</sup> Te ni quiví rey ini vehe jeē cahán de jíin ñáyuu ni cutútú. Te ni jito de nuū ñn tēe jeē tu ñúhun sahma jeē ni jéhe de cuhun ñayuu quíjicoo vico nándāha.

<sup>12</sup> Te ni cahān de jíin tēe ún: Amigo, ¿ndese ni quiví ró yáha jéé tu ñúhun ró sahma vico nándāha? áchí de. Te máá tēe ún tu ní cáhán cuiti de.

<sup>13</sup> Yūcuán na te ni cahān rey jíin tēe cájeni cohō: Jni de te cuhni rō ndaha de jehē de, te quenehen ró de na quihín de nuū quéhe nuū néē. Te yūcuan ndáhyū de te nacayihí yuhu de jeē ndóho xeēn de. Achí rey.

<sup>14</sup> Chi cána Yaā Dios cuehē ñayuu jeē na cándije i. Te jecu-ni i candije, te máá i nácāji ya jeē ndúu i sēhe ya. Achí Jesús.

### *Siquí xúhun renta*

*(Mr. 12.13-17; Lc. 20.20-26)*

<sup>15</sup> Yūcuán na te cuangoo tēe grupo fariseo. Te ni candajnūhún de núu ndese sáha de návāha cahān yā ñn jnūhun jeē nihín de cuēchi siquí yā.

<sup>16</sup> Te ni catajé de jecu tēe cáscuáha jíin máá de jíin tēe grupo Herodes cuangoo de. Te ni cacahān de jíin yá:

Maestro, cájini na jéé tēe cáhán ndaā cúu ní, te stéén ndaā ní ndese

squícu ñayuu nuū Yaā Dios. Te tu yúhú ní jeē cahán ni ñn ñayuu siquí ní, chi tu sáha ní cuenta ndese cúu ñn ñn i, chi inuú-ni sáha ní jíin i.

<sup>17</sup> Núu súcuan te cahān ní ndese jéni ni ní: ¿A íyó váha jeē chúnaa yō renta nuū rey nación Roma jeē jni nación yō, chí tuú? áchí de.

<sup>18</sup> Te ni jini Jesús jeē cájito ndee de ya. Te ni cahān yā jíin de:

Tēe stáhú-ni cácuu ró. ¿Najehē cájito ndee rō ruhū?

<sup>19</sup> Stéén xūhun jéé jéconaā renta na cóto ri, achí yá.

Te ni castéén de ñn denario nuū yā.

<sup>20</sup> Te ni jito ya, te ni cajnūhun yá de: ¿Ndé ñn nuū cúu jeē ndeé nuū xūhun yáha, te ndé síhví cúu jeē ndeé yāhá?

<sup>21</sup> Te ni cacahān de jíin yá:

Nuū jíin síhví rey un cúu, áchí de.

Yūcuán na te ni cahān yā jíin de:

Núu súcuan te nacuāha ró núu rey un jéé yhi cuenta nuū de, te nacuāha ró núu Yaā Dios táca jéé yhi cuenta nuū maá yá, achí yá.

<sup>22</sup> Te nuū ní cajini de jeē ndichí ní cahān yā jnūhun yáha, te ni canaa ni de, te ni castóo de ya, te cuangoo de.

### *Jeē ní cacajnūhún de siquí jeē nátecu ndīyi*

*(Mr. 12.18-27; Lc. 20.27-40)*

<sup>23</sup> Te suni quiví un ní quecoo jecu tēe grupo saduceo nuū yā. Te tēe un cacahān jeē tu nátecu cuiti ndīyi. Te ni cacahān de jíin yá siquí ñn jnūhun, áchí de:

<sup>24</sup> Maestro, Moisés ni cahān de jeē núu ñn tēe cuu de, te ndōo ñasihí de, te núu tú sēhe de ní íyo jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuiñi nuū ndīyi ñani de. Achí Moisés.

<sup>25</sup> Te ñuu na ní íyo uxā ñani. Te tēe núu ní quijnáhan de jíin ñahan. Te ni jihí de. Te jeē tú sēhe de ní íyo, te ni ndōo ñasihí de nuū ñani de.

<sup>26</sup> Te tēe ún suni ni jihí de, te tú na sēhe de ní íyo tucu. Te suni súcuan tēe unī, nde jíin ndihúxá de.

<sup>27</sup> Te nuū ní ndihi de ni cajihí, te suni ni jihí ñahan ún.

28 Núu súcuan te quivī nátecu ndīyi, ¿ndé ñn de cuu ña ñasíhí de? Chi ndihúxá de ni condeca de ña. Achí de jíin yá.

29 Yūcuán na te ni cahān yā jíin de:

Yōhyo cástívi ró jnūhun síquī jeē tu cájecūhun ni rō jeē cahán tutu ñi, ni tu cájini rō jeē iyó poder Yaā Dios jeē nastécu yā ndīyi.

30 Chi quivī nátecu ndīyi, te tuá na jnūhun quijnáhan tēe jíin ñahan coo. Chi coo i nájnūhun ndajéhé Yaā Dios andívi.

31 Te síquī jeē nátecu ndīyi, ¿á tu ní cácahu ró tutu jnūhun jeē cahán Yaā Dios jíin ró?

32 Máá rí cúu Yaā Dios Abraham jíin Isaac jíin Jacob, achí Yaā Dios. Chi vésú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de.

33 Te ñayuu un ní canaa ni i cájini nahín i jnūhun stéén yā.

*Jniñu cánuú ndasí gá jeē ní ndacu Yaā Dios*  
(Mr. 12.28-34)

34 Yūcuán na te tēe grupo fariseo ni cajini de jeē ní cajesí tēe saduceo yuhu de ni sáha ya. Te ni candutútú de nuū yā.

35 Te ñn de jeē cúu tēe stéén tutu ley Yaā Dios, ni cajnūhún de ya, chi coto ndee de ya cuní de:

36 Maestro, ¿ndé ñn cúu jnūhun ndácu jniñu cánuú ndasí gá nuū tútu ley? achí de.

37 Te ni cahān Jesús jíin de:

Coo manī ndasí ró jíin máá Jítóho rō Yaā Dios, nde jnáā ndasí ró sáha ró ndihí jeē cúsi ni yā, nde jíin ini jíin ánuá rō, jíin ní jéé níjnūní rō, achí tutu.

38 Yāha cúu jniñu ndácu ya jeē cujéhnú ga te cánuú ndasí gá.

39 Te jniñu uū jeē ní ndacu ya, suni súcuan cáhán: Cundáhú ni rō jnáhan ró nájnūhun cundáhú ni rō maá ró.

40 Te chíji ndíndúú jnúhun yáha ní quenda ndihí ley jeē ní tee Moisés, jíin ndihí jeē ní castéén tēe ni canacani jnūhun Yaā Dios, achí yá.

*Síquī jeē cúu Cristo sēhe yucūn David*

(Mr. 12.35-37; Lc. 20.41-44)

41 Te níni cáyūcu tútú gá tēe fariseo un, te Jesús ni cajnūhun yá de:

42 ¿Ndese cájeni ni rō síquī Cristo? ¿Sēhe ndé yucūn cúu ya?

Te ni cacahān de:

Sēhe yucūn David, achí de.

43 Te ni cahān yā jíin de:

Núu súcuan ¿te ndese cúu jeē David ni cahān de Jítóho de ya, ni sáha Espíritu Santo nde jenahán? Chi ni cahān de:

44 Máá Jítóho yō Yaā Dios ni cahān yā jíin Jítóho rī, Yaā quiiji:

Cucōo ró lado váha ri nuū cujéhnú ró, te na sáha ri jeē quende rō poder táca jéé cájito uhū rohó.

Achí Yaā Dios. Achí David.

45 Te núu sēhe yucūn David cúu Cristo, ¿te ndese cúu jeē ni cáhán de jeē Jítóho de cúu ya? áchí yá.

46 Te ni ñn de tu ní cúu stió cuñí cuiti de jnūhun nuū yā. Te nde quivī ún tuá ni ñn de ní chúndeyí ni de cajnūhún de ya.

*Jeē ni cáhán yā jeē iyó cuéchi de jíjnáhan de*

(Mr. 12.38-40; Lc. 11.37-54; 20.45-47)

## 23

1 Yūcuán na te ni cahān Jesús jíin ñayuu jíin tēe cáscuáha jíin yá:

2 Tēe cástéén tutu ley Yaā Dios jíin tēe grupo fariseo, cájeni ni de jeē ndíso jniñu de jeē steén de ley jeē ni jéhe ya nuū Moisés.

3 Núu súcuan te cuatáhú ró te squícu ró táca jéé cándacu de nuū rō. Te ma sáha ró nájnūhun casáha máá de. Chi cácahān-ni de, te tu cásquícu de.

4 Chi suni cástéén de táca ley ni catava maá de jeē yí sáha, te cátee de síquī ñayuu, te tu cácuñdeyí i squícu i. Te máá de jíjnáhan de, chí ni ñn xiní ndáha de tu cáscánda de jeē squícu de.

5 Te máni síquī jeē na cuájnuhún ñayuu de cúu ndihí jeē casáha de. Chí cánujnahan ni de cuhni de cuehē jnūhun tutu ñi jneē de jíin ndaha de. Te suni cáscáni ga de yuhvā yusáhma de

jeē steén jeē cácujéhnu ga de vésú inga ñayuu.

<sup>6</sup> Te cánujnahan ni de cucōo de nuū silla yíñúhún gá nuū cáyeji ñayuu vico, jíin silla yíñúhún gá ini vehe iī sinagoga.

<sup>7</sup> Te suni cánujnahan ni de jeē cahán yíñúhún ñayuu jíin de nuū calle, jíin jéē cahán i maestro jíin de.

<sup>8</sup> Te máá ró jijnáhan ró, ma cuáha ró jnúhun jeē cahán ñayuu maestro jíin ró. Chi inuú cácuu ndíhi ró jéē cácuu ró hermano, te íyó ñn-ni Maestro ró jeē cúu ruhū, Cristo.

<sup>9</sup> Te ma chíñúhún ró ni ñn tēe ñayívi yáha jeē cahán ró padre jíin de. Chi íyó ñn-ni Tátá ró jijnáhan ró, Yaā ndeé andívi.

<sup>10</sup> Te suni ma cuáha ró jnúhun jeē cahán i jitohe jíin ró. Chi íyó ñn-ni Jitohe ró, te suu cúu ruhū, Cristo.

<sup>11</sup> Te tēe mēhñu ró jijnáhan ró jeē jejníñu nuū jnáhan, suu de cúu jeē cujéhnu ga.

<sup>12</sup> Chi tēe jeē sajéhnu de máá de, sa ndululí de. Te tēe jeē sálulí de máá de, sa ndujéhnu de.

<sup>13</sup> 'Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cáyesi ró jeē quívi ñayuu ndaha Yaā andívi jéē ndacu ya jniñu nuū i. Chi tu quívicoo máá ró, ni tu cájehe ro jnúhun quívicoo ñayuu nducú quívi.

<sup>14</sup> 'Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cáquende ró vehe ñahan ní caquendōo ndáhú. Yūcuán na te cájicān tahu nahán ró návaha cani ni ñayuu jeē tú na cuēchi ró. Jeē yúcuan xeēn gā ndoho ró castigo.

<sup>15</sup> 'Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi ní ñuhun íchi jíin ní mar cájica cuu ró cánducú ró ñn ñayuu scandíje ró sáhān maá ró. Te núu ni candíje i, te cása ha ró jéē vihyá gā cúu cuēchi i jeē quihín i infierno vésú maá ró.

<sup>16</sup> 'Nacā xeēn ndoho ró, chi cácuu ró nájnūhun tēe cuáá jéē steén ichi nuū ñayuu. Chi cácahān rō: Núu ndé tēe

jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíi oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō.

<sup>17</sup> Tēe cánée tēe cuáá cácuu ró jéē castívi ró jnúhun cácahān rō. ¿Ndeé ñn cúu jeē cujéhnu ga, á oro un chíi Yaā Dios jeē ndeé ini templo jeē sáhií oro un?

<sup>18</sup> Te suni cácahān rō: Núu ndé tēe jéjnūhun téyí de, te núu cahān de jeē Yaā Dios jeē chíi altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíi ndajníñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō.

<sup>19</sup> Tēe cánée tēe cuáá cácuu ró jéē castívi ró jnúhun cácahān rō. ¿Ndeé ñn cúu jeē cujéhnu ga, á ndajníñu yúcu nuū altar, chíi Yaā Dios jeē sáhií yā ndajníñu ún?

<sup>20</sup> Núu súcuan te tēe jéjnūhun téyí, te núu ndácunehen de Yaā Dios jeē chíi altar, núu súcuan te nde jíin ndajníñu yúcu nuū altar ndácunehen de.

<sup>21</sup> Te tēe jeē jéjnūhun téyí, te núu ndácunehen de templo, núu súcuan te nde jíin Yaā Dios jeē ndeé ini templo ndácunehen de.

<sup>22</sup> Te tēe jéjnūhun téyí, te núu ndácunehen de andívi, núu súcuan te suni ndácunehen de mesa Yaā Dios te nde jíin máá Yaā Dios jeē ndeé nuū mesa un.

<sup>23</sup> 'Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cása ha ró úxī uxī nuhnī tamínú jíin yucū anís jíin yucū comino, te cásocō ró ñn ñn siquī tāca úxī un núu Yaā Dios. Te cástóo ró jnúhun cánuú ndasí gá nuū ley, suu jeē cáca ndaā rō, jíin jéē cundáhú ni ró jnáhan ró, jíin jéē candíje ró. Tāca jéē yáha cánuú sáha ró núu, te suni ma stóo ró jéē socó ró tāca yúcū ún.

<sup>24</sup> Cácuu ró nájnūhun tēe cuáá jéē

steén ichi nuū ñayuu. Chi cásquicu ró ñn jeē lulí gá un, te cástoo ró jéē cánuu gá. Te suu cúu nájnūhun jeē cátava ró chūcún ndíhī jeē ñúhun nuū ndúxi, te cácocó ró ñn quiti cáhnu jeē naní camello.

<sup>25</sup> 'Nacā xeēn ndoho róhó téé cástéén tutu ley jíin róhó téé fariseo, chi téé stáhú-ni cácuu ró. Chi nájnūhun jeē cánacate ró yátá vaso jíin yátá cohó. Te ichi íni ró chi ñúhun máni máá jnúhun cuíhná jíin jnúhun ndíyo ni.

<sup>26</sup> Téé cuáá cácuu ró, fariseo. Xihna gā sáha ró jéē coo ndoo ini anuá rō, te yūcuán na te suni coo ndoo tāca jéé casáha ró jéé cájito ñayuu nuū.

<sup>27</sup> 'Nacā xeēn ndoho róhó téé cástéén tutu ley jíin róhó téé fariseo, chi téé stáhú-ni cácuu ró. Chi cándāa ró nájnūhun vehe ndíyi nuū panteón jeē cáyaa. Chi ichi yátá jíto luu, te ichi íni ñúhun chitú yiqui ndíyi jíin táca jéé tehyú.

<sup>28</sup> Te súcuán cácuu máá ró, chi ichi yátá rō casáha ró jeé téé ndaā cácuu ró núu ñayuu. Te ichi íni ró ñúhun chitú jnúhun stáhú-ni jíin jnúhun néé.

<sup>29</sup> 'Nacā xeēn ndoho róhó téé cástéén tutu ley jíin róhó téé fariseo, chi téé stáhú-ni cácuu ró. Chi cásáha ró vehe siquī nuū yíndūji ndíyi jíi rō, téé ni canacani jnúhun Yaā Dios nde jenhán. Te cásáha luu ró vehe siquī nuū yíndūji tāca téé ni íyo ndaā.

<sup>30</sup> Te cácahān rō: Núu jeé suni yúcu yó tiempo jeé ní cotecu ndíyi jíi yō, te ma squívi nduu yō jíin de jeé cáhni yō téé ni canacani jnúhun Yaā Dios, achí ró.

<sup>31</sup> Te súcuán cácahān ndaā rō jeé máá ró cácuu yucūn ñayuu ni cajehni téé ni canacani jnúhun ya.

<sup>32</sup> Núu súcuán te tāca cuéchi jeé ní casquéjéé ndíyi jíi rō, máni un cásáha ga máá ró.

<sup>33</sup> 'Va sēhe coō cácuu ró, chi xeēn rō nájnūhun coō. ¿Ndesé cācu ró jéé ma jnahnú ndetū ró quingoo ró infierno?

<sup>34</sup> Núu súcuán te tají rí tāca téé nacani jnúhun Yaā Dios nuū rō, jíin táca téé ndíchí jéé castéén jnúhun ya. Te sava de cahni rō, te sava de cata

caa ró jicā cruz. Te sava ga de cani ró de ini tācá vehe íi sinagoga, te scúnu ró de quingoo de tācá ñuu.

<sup>35</sup> Te súcuán te condee cuéchi siquī maá ró jeé ní cajehni jíi rō tāca téé ndaā, xihna gā nde Abel téé ndaā, te nde Zacarías sēhe Berequías, téé ni cajehni de ini templo sava mēhñu cuarto íi jíin altar.

<sup>36</sup> Jendaá cahán rī jíin ró jeé tāca cuéchi yáha condee siquī ñayuu iyó vijna.

*Jeé cucuíhyá ni yā jíto ya ñuu Jerusalén*

*(Lc. 13.34-35)*

<sup>37</sup> 'Róhó ñuu Jerusalén, jéhni rō téé cánacani jnúhun Yaā Dios, te jéhe ro yúu xinī téé tají Yaā Dios vējicoo nuū rō. Te cuehē jínu ni cuni rī nastútú rí sēhe ró, nájnūhun ndují jéé nastútú tí sēhe tí chíji ndijēn tí, te tu ní cúní rō.

<sup>38</sup> Núu súcuán te vijna te stóo uun na ri rohó jíin séhe ró.

<sup>39</sup> Chi cahán rī jíin ró jéé ndé vijna te ma cóto cuíti gā rō nuū rī, chi nde quiji quiví jeé cahán sēhe ró: Yōhyo vāha Yaā cúu Yaā véndiji jíin jniñu máá jítoho yō Yaā Dios, achí i. Achí yá.

*Jeé ní cachi yā jeé náā templo*  
*(Mr. 13.1-2; Lc. 21.5-6)*

## 24

<sup>1</sup> Te ni quenda Jesús ini templo cáhnu cuahān yā. Te ni quecoo téé cáscuáha jíin yá, te ni cacahān de jíin yá siquī tācá vehe jeé ndejnáhan jeé cúu máá templo un.

<sup>2</sup> Te ni cahān yā jíin de:

Tāca jéé cájito ró yáha, jendaá cahán rī jíin ró jeé quiji quiví jeé ma cóso jnáhan ga ni ñn yuū, chi ndíhi jnanū. Achí yá.

*Na seña coo nuū cuácuyajni ndíhi ñayívi*

*(Mr. 13.3-23; Lc. 21.7-24; 17.22-24)*

<sup>3</sup> Te ni jehēn yā jíin téé cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajnúhun sín de ya:

Castūhun ní ndé quiví coo tāca jéé ní cachi ní jéé coo. ¿Te na seña coo

núu ni cuyajni quiv̄i ndíji ní jín jéé jínu ñayiv̄í? áchí de.

<sup>4</sup> Te ni cahān Jesús:

Coto ró jéé ma stahú ni ñn de róhó.

<sup>5</sup> Chi quijicoo cuehē tēe jeē stahú jíin síhv̄í rí. Máá rí cúu Cristo, achi de. Te súcuan stahú de cuehē ñayuu.

<sup>6</sup> Te nihīn rō jnūhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quiv̄i ndíhi ñayiv̄í.

<sup>7</sup> Chi ndonda nación síquī inga nación, te ndonda ñuu síquī inga ñuu jeē cuajnáhan. Te coo jnamā jíin cuéhyi xeēn. Te cháha chúcuan jnāa.

<sup>8</sup> Te tāca jéé yáha cácuu jnūndóho quejéé xihna ñúhún gá.

<sup>9</sup> Yūcuán na te nastúu i róhó jíjnáhan ró jéé stóho i róhó te cahni i róhó. Te ndíhi ñayuu quit̄i ni i nuū rō jeē síquī ruhū.

<sup>10</sup> Te quiv̄i ún chi cuehē ñayuu candíje caca yátá i, te quit̄i ni i nuū jnáhan i, te nastúu jnáhan i.

<sup>11</sup> Te canecoo cuehē tēe stahú, te cahān de jeē jnūhun Yaā Dios cáncani de, te stahú de cuehē ñayuu.

<sup>12</sup> Te nducuehē jniñu néé, te jeé yúcuu cuehē i ma cóo manī gā i.

<sup>13</sup> Te ñayuu cuiñi nīhin jíin jnūhun ri nde quiv̄i jínu, ñayuu ún chí cācu.

<sup>14</sup> Te jnūhun yáha síquī ndese ndácu Yaā Dios jniñu, cuiñi núu ní cáhnu ñayiv̄í, návāha cuni ñayuu tācá nación. Yūcuán na te jínu ñayiv̄í.

<sup>15</sup> Te Daniel, tēe ni nacani jnūhun Yaā Dios, ni tee de jnūhun ñn tēe néé jéé quíji. Te róhó jéé cácahu tutu ún, na jécūhun ni rō. Chi ñn quiv̄i te cuni rō jeé sáha ndevāha de jeé stiv̄i de tācá ndajniñu i ini templo, te cuiñi de ini lugar i.

<sup>16</sup> Te núu cuni rō jeé súcuan cúu, te ñayuu cáyūcú región Judea, na cúnu i caa i yucu quingoo i.

<sup>17</sup> Te ñayuu cáyūcu núu quéhe, ma ndiv̄i i ini vehe jeé quénehen i ndajniñu i, chí cánuú cunu yachī i návāha cācu i.

<sup>18</sup> Te ñayuu cáhīn nuū ítu, ma ndíji i vehe jeé quíhin i sahma i.

<sup>19</sup> Te quiv̄i ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachī ña.

<sup>20</sup> Te cacān tahú rō jeē ma quíji jnūndóho un jéé cunu ró máá tiempo cúun yuhvā ni quiv̄i ndétátú.

<sup>21</sup> Chi jeē quejéé un te coo cuehē jnūndóho xeēn, jeē ná tu coo súcuan nde quiv̄i ní jecōo ñayiv̄i te nde vijna. Te jeē ndíhi jnūndóho ún te ni ma cóo ga jeé súcuan.

<sup>22</sup> Te núu tú nastiyi Yaā Dios tiempo jnūndóho ún, te ni ñn ñayuu ma cácu cuiñi i. Te jeé síquī ñáyuu cácdíje jeé ní nacāji ya, jeé yúcuu nastiyi ya tiempo un.

<sup>23</sup> Núu súcuan te núu ñn ñayuu cahān jíin ró: Yáhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahán i.

<sup>24</sup> Chi canecoo tēe cástahú jéé achi de jeé Cristo cúu de, chí achi de jeé tēe nácani jnūhun Yaā Dios cúu de. Te sáha de jniñu jéhnu jeé naa ni ñayuu coto i, návāha stahú de nde máá ñáyuu ní nacāji ya, te núu na cúu.

<sup>25</sup> Je ni castūhun rí nuū rō vijna nde ná tu coo.

<sup>26</sup> Núu súcuan te núu cahān ñayuu jíin ró: Cuácondēhe ró, chí nde nuū ñúhun téhé íne ya, achi i, te ma quíhin rō condēhe ró. Chí núu cahān i: Nehen condēhe ró, chí ini vehe yáha íne ya, achi i, te ma candíje ró jíjnáhan ró.

<sup>27</sup> Chi nájnūhun jeē ndíndēe sáha taja te cúndijin nde ichi núu cáne niāndii jíin ndé ichi núu quée niāndii, suni súcuan coo quiv̄i ndíji ruhū, Yaā ní nduu tēe, chí ndíhi ñayuu coto.

<sup>28</sup> Te nájnūhun jeé cutútú téji ndé-ni cúu nuū catú quit̄i ní jíhī, suni súcuan coo tāca jéé ni cáhān rī ndé-ni cúu-ni nuū cáhīyo ñayuu.

*Ndese coo quiv̄i ndíji Yaā ní nduu tēe*

(Mr. 13.24-37; Lc. 21.25-33; 17.26-30, 34-36)

<sup>29</sup> Yūcuán na te núu ni ndíhi tāca jnūndóho quiv̄i ún, te cojnúu níāndii, te yoō ma ndíi gā. Te ñingoo quími

andiví. Te tāca jēē in andiví chi quisí i.

<sup>30</sup> Yūcuán na te coto ñayuu nuū maá rí, Yaā ní nduu tēe, ndiji ri ichi ándiví. Te ndahyū ñayuu tācá nación ní cáhnu ñayiví. Te coto i nuū ruhū, Yaā ní nduu tēe, ndiji ri jíin vícō andiví, te condiso ri cuehē poder, te yōhyo luu cuyéhnu ri.

<sup>31</sup> Te tají rí ndajéhé rī quingoo, te tiví nīhin ya trompeta. Te quinastútú yá ñayuu ní nacāji ri ndicúún lado ñayiví, nde in lado ñayiví jíin ndé inga lado.

<sup>32</sup> 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní.

<sup>33</sup> Te suni súcuan núu ni cajini rō jeē ní quejéé cúu tācá jniñu jeē ní cáhān rī, yūcuán na te na jécūhun ni rō jeē ní cuyajni quiví ndiji ri, te yachī coo.

<sup>34</sup> Jendaá cahán rī jíin ró jeē ma cúu ndihí ñayuu jeē cóto jnūndóho ún, chi nde squícu ndihí jniñu ún.

<sup>35</sup> Andiví jíin ñáyiví chi naa, te tāca jnúhun cáhān rī chi ma náā, chi ndihí squícu.

<sup>36</sup> Te quiví jíin hora jeē ndíji ri, tú ni in ñayuu jiní, ni máá ndajéhé cáhiyo andiví, ni máá rí, Sēhe Yaā Dios. Chi máá in ni Tátá rī Yaā Dios cúu jeē jiní.

<sup>37</sup> 'Chi nájnūhun ni cuu quiví ni íyo Noé, suni súcuan coo quiví ndiji ruhū, Yaā ní nduu tēe.

<sup>38</sup> Chi quiví ún, nde ná tu cuun saū xeén, te cáyeji i cájini i, cánandāha i, te cájēhe i sēhe síhí i jeē nándāha, nde ni jinū quiví jeē ni quiví Noé ini barco cáhnu jeē naní arca.

<sup>39</sup> Te tu ní cácadíje ñayuu jeē cuun saū xeén, te ni cuun, te ni ndaa ndute ni cajihí ndihí i. Te suni súcuan coo núu na ndíji ruhū, Yaā ní nduu tēe.

<sup>40</sup> Te quiví ún cone uū tēe sájniñu nuū ítu. Te in de naquihin ri, te inga de ndōo.

<sup>41</sup> Te coo uū ñahan jeē ndíco cáhnu, te in ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chi tu ní cácadíje i.

<sup>42</sup> 'Núu súcuan te ndito na cóo ni rō, chi tu cájini rō na quiví ndiji Jitoho rō.

<sup>43</sup> Te na chūhun ni rō jeē cahán jnūhun yátá yáha: Tēe chíi vehe, núu jeē jiní de na hora quiiji ñacuíná, te condito de, te ma cuáha de jnūhun sácúhná ndajniñu vehe de núu.

<sup>44</sup> Te rōhó jíinahan ró, suni súcuan coo tūhva ró, chi máá hora jeē tú na vé cájeni ni rō, te ndiji ruhū, Yaā ní nduu tēe.

### *Jnūhun yátá síquī mozo (Lc. 12.41-48)*

<sup>45</sup> 'Núu súcuan te coo ró nájnūhun in mozo jeē ndíto xiní te squícu vāha. Te máá patrón ni jeni de mozo un jéé cóto i ñayuu vehe de, návāha scáji i máá hora.

<sup>46</sup> Te yōhyo ndetū mozo un jéé núu ni ndee patrón, te cuni de jeē súcuan squícu vāha i.

<sup>47</sup> Jendaá cahán rī jíin ró jeē cani de mozo un jéé cóto i ndihí ndajniñu de.

<sup>48</sup> Te núu mozo sáha néé cúu i, te jeni ni i jeē ma ndíji yachí patrón i,

<sup>49</sup> te quejéé i cani i jnahan mozo i, te caji i coho i jíin tēe cánajini,

<sup>50</sup> núu súcuan te ndee-ni patrón quiví jeē tu ndétu i jíin hora jeē tú na vé jeni ni i.

<sup>51</sup> Te stóho xeén de i, te squiví de i nuū cáhān tēe stáhú-ni. Te yūcuan ndahyū i te nacayihí yuhu i jeē ndoho xeén i. Achí yá.

### *Jnūhun yátá síquī uxī sūchi síhí*

## 25

<sup>1</sup> Te suhva cúu jeē ndácu Yaā andiví jniñu nuū ñayuu: Cúu nájnūhun in vico nándāha. Te ni íyo uxī sūchi síhí jeē ní caquihin i linterna cándaha i, te ni quendacoo i cuajnahan i in tēe nandāha.

<sup>2</sup> Te uhūn i chí tú ndito xiní i, te uhūn i chí ndito xiní i.

<sup>3</sup> Te sūchi tú ndito xiní, cándaha i linterna i, te tu cándaha i petróleo jeē náchuhun i.

<sup>4</sup> Te sūchí ndito xiní, chí cándaha i botella petróleo jíin linterna i.

5 Te níní cúcuéé quiji tēe nandāha ún, te ni quee māhná, te ni caquixī ndihi i.

6 Te nuū ní cuu sava ñuú, te ni cajini i jeē cácana jee: Je vēji tēe nandāha. Cuángoo quijnahan rō de jíjnáhan rō, áchí.

7 Yūcuán na te tāca súchi síhí un ní candonda i, te ni casátūhva i linterna i.

8 Te sūchi tú ndito xinī, ni cacahān i jíin súchi ndito xinī: Cuāha jecu petróleo nuū rī jíjnáhan rō, chi cuandahvā linterna rī, achí i.

9 Te ni cacahān sūchí ndito xinī: Ma cúu, chi ma cánda jeē cúu máá rī jíin máá rō. Vāha ga quingoo rō núu cūyāhu, te cuaan rō jeē cúu máá rō. Achí i.

10 Te níní cuángoo i cuaan i, te ni quee-ni tēe nandāha. Te sūchi cáhīyo tūhva un, ní quívicoo i jíin de vico nándāha de. Te ni ndihyū yehyí.

11 Te ni cunúu, te ni quecoo uhūn gā sūchi síhí un. Te ni cacahān i jíin tēe nándāha: Nune ní yéhyí na quívicoo ná, achí i.

12 Te ni cahān maá de: ¿Ndé nuū véjicoo rō? Chi tu jíin rī rohó, achí de. Achí yá.

13 Yūcuán na te ni cahān yā:

Núu sūcuan te ndito coo ni rō, chi tu cájini rō na quívi na hora ndiji ruhū, Yāá ní nduu tēe. Achí yá.

*Jnūhun yátá síquī tēe ní jēhe núu xūhun núu tāca mozo*

14 "Te suhva cúu jeē ndácu Yāá andívi jniñu nuū ñáyuu: Cúu nájnūhun ñn tēe jeē quihīn jicá de ñga ñuu. Te nde ná tu quihīn de te ni cana de mozo de jíjnáhan, te ni jēhe núu de xūhún de nuū i, jeē na sájniñu i jíin návāha nducuehē.

15 "Te nuū ñn i ni jēhe de uhūn mil xūhun cáa. Te nuū ñga i ni jēhe de uū mil. Te nuū ñga i ni jēhe de ñn mil. Súcuan ni jēhe de, chi jíin de nasaa canda ñn ñn i sájniñu i jíin. Yūcuán na te ni quihīn de ichi cuahān jicá de.

16 Te mozo jeē ní quihīn uhūn mil xūhún, ni sájniñu de jíin. Te ni nihīn de uhūn gā mil síquī.

17 Te mozo jeē ní quihīn uū mil xūhún, suni ni nihīn de uū gā mil síquī.

18 Te mozo jeē ní quihīn ñn mil xūhún, ni jehēn de ni jete de yaū, te ni chisāhí de xūhún patrón de.

19 "Te ni yāha cuehē tiempo, te ni ndee patrón mozo un jíjnáhan. Te ni nandacān de cuenta nuū i.

20 Te ni quee mozo jeē ní quihīn uhūn mil xūhún un, te ni nacuāha de xūhún un núu patrón de jíin uhūn gā mil jeē ni nihīn de síquī. Te ni cahān de: Ni jēhe ní uhūn mil nuū ná, te yāha íyó uhūn gā mil jeē ni nihīn na síquī. Achí de.

21 Te ni cahān patrón jíin de: Iyó váha núu sūcuan. Yōhō yāha mozo cúu rō jēe squícu vāha rō. Chi vāha ni squícu rō ñn jniñu lúli-ni, te vijna te cuāha ri jniñu jéhu ndacu rō. Te quívi rō núu cusī ni rō jíin rí. Achí de.

22 Yūcuán na te ni quee mozo jeē ní quihīn uū mil xūhún un. Te ni cahān de: Ni jēhe ní uū mil nuū ná, te yāha íyó uū gā mil jeē ni nihīn na síquī. Achí de.

23 Te ni cahān patrón jíin de: Iyó váha núu sūcuan. Yōhō yāha mozo cúu rō jēe squícu vāha rō. Chi vāha ni squícu rō ñn jniñu lúli-ni, te vijna te cuāha ri jniñu jéhu ndacu rō. Te quívi rō núu cusī ni rō jíin rí. Achí de.

24 Te ni quee mozo jeē ní quihīn ñn mil xūhún un, te ni cahān de jíin patrón: Je jíin na nihīn jēe tēe xeēn cúu ní. Chi cuehē gā cuní ni vēsú jeē cúu sáha mozo ni, te cuehē gā nándacān ní vēsú jeē ni jēhe ní.

25 Te jeē yúcuán ní yūhu ná, te ni jehēn na ní chisāhi ná xūhun ní chíji ñuhun. Te yāhá na nácuāha na xūhun ní. Achí de.

26 Te ni cahān patrón jíin de: Mozo cuxí cúu rō te máni jniñu née sáha rō. Chi jéni ni rō jeē cuehē gā cuní rī vēsú jeē cuu sáha mozo rī, te cuehē gā nándacān rī vēsú jeē ni jēhe rí.

27 Núu jeē ni chūne rō xūhun rí nuū banco nuú, te jeē ní ndee rī te naquihīn ri xūhun rí nde jíin séhe xūhun núu. Achí de jíin i.

28 Te ni cahān de jíin táca gá mozo de: Núu súcuan te quende rō mil xūhun jíinā nuū i, te cuāha ro núu mozo névāha uxī mil.

29 Chi ñayuu jeē névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i.

30 Te mozo yáha jeē tu sájniñu vāha, quenehen ró i na quihín i nuū quehe nuū néē. Te yūcuan ndáhyū i te nacayihí yuhu i jeē ndoho xeēn i. Achí patrón un.

### *Siqui jeē cóo juicio tācá nación*

31 Te ni cahān gā yā:

Īn quiivī te ndiji máa Yaā ní nduu tēe, te cuu ya Rey nuū ñayuu. Te tācá ndajéhé yā cuiñi ní xiin ya. Te cucōo ya mesa nuū ndácu ya jniñu, te yōhyo luu cujéhu ya.

32 Te ndutútú ñayuu tācá nación nuū yā. Te sásin ya i jíināhan i, nájnūhun cúsín lanchi jíin ndixúhú sáha tēe ndíto ti.

33 Te ñayuu váha jeē cúu nájnūhun lanchi, chucú yá i lado váha ya. Te ñayuu neé jeē cúu nájnūhun ndixúhú, chucú yá i lado jecó yá.

34 Yūcuán na te cahān Rey jíin ñayuu cáhīn lado váha ya: Nacā ndetū rō jeē ní sáha Tátá rī jíin ró. Nehen quiivīcoo ró núu ndácu ró jniñu. Chi nde quiivī ní jecōo ñayiví te je ni sátūhva ya nuū ndacu ró jniñu.

35 Chi ni jíin rī sōco, te ni cajēhe ro jéē ní yeji rī. Ni jichī rī ndute, te ni cajēhe ró jéē ní jihí rī. Ni quiji ri nde ñuu jicá, te ni cajēhe núu ró vehe ni ndōo rī.

36 Ni cumanī sahma rī, te ni cajēhe ró. Ni cocuhū rī, te ni jecondēhe ró ruhū. Ni ine rī vecāa, te suni ni jecondēhe ró ruhū. Súcuan cahān yā jíin ñayuu cáhīn lado váha ya.

37 Yūcuán na te cahān ñayuu váha un jíin yá: ¿Na quiivī ní cajito ná níhín jéē jíi ní sóco, te ni cajēhe na jéē ní yeji ní, chí jéē jichí ni ndute, te ni cajēhe ná ní jihí ní?

38 ¿Te na quiivī ní cajito ná jéē ní quiji ní ndé ñuu jicá, te ni cajēhe núu

na vehe ni ndōo ní, chí jéē cúmanī sahma ní, te ni cajēhe ná?

39 ¿Te na quiivī ní cajito ná jéē cuhú ni, chí jéē íne ní vecāa, te ni jecondēhe ná níhín? achi i.

40 Yūcuán na te cahān Rey jíin i: Jendaá cahán rī jíin ró jéē ná ni casáha ró súcuan jíin ĩn tācá hermano rī jeē cá candíje, vēsú ñayuu núu ga cúu i, te nuū maá rí ni casáha ró.

41 Yūcuán na te suni cahān Rey jíin ñayuu cáhīn lado jecó yá: Ñayuu jnahnū ndetū cácuu ró. Cujiyo quingoo ró núu ñuhún jeē cayú ní cáni, nuū iyó túhva cone jexeén jíin táca táchī jeē cájejniñu nuū.

42 Chi ni jíi rī sōco, te tu ní cajēhe ro jéē cáji rī. Ni jichī rī ndute, te tu ní cajēhe ro jéē coho rī.

43 Ni quiji ri nde ñuu jicá, te tu ní cajēhe núu ró vehe ndōo rī. Ni cumanī sahma rī, te tu ní cajēhe ró. Ni cocuhū rī, ni ine rī vecāa, te tu ní jecondēhe ró ruhū. Súcuan cahān yā jíin ñayuu cáhīn lado jecó yá.

44 Yūcuán na te cahān ñayuu un jíin yá: ¿Na quiivī ní cajito na níhín jéē jíi ní sóco, chí jéē jichí ni ndute, chí jéē ní quiji ní ndé ñuu jicá, chí jéē cúmanī sahma ní, chí jéē cuhú ni, chí jéē íne ní vecāa, te tu ní cajēhe na jéē cúmanī nuū ní? Achi i.

45 Yūcuán na te cahān yā jíin i: Jendaá cahán rī jíin ró, jeē tu ní casáha ró súcuan jíin ní ĩn tācá hermano rī jeē cá candíje, vēsú ñayuu núu ga cúu i. Núu súcuan te suni nuū maá rí cúu jeē tu ní casáha ró, achi yā.

46 Yūcuán na te quingoo ñayuu un núu ndóho i ní cáni. Te ñayuu váha un quiivīcoo i nuū cótecu i ní cáni. Achí Jesús.

*Jeē ní casquijnáhan de jnūhun jeē jni de Jesús*

*(Mr. 14.1-2; Lc. 22.1-2; Jn. 11.45-53)*

## 26

1 Te nuū ní ndihí ni cahān Jesús tāca jnūhun yáha, te ni cahān yā jíin tēe cáscuáha jíin yá:

2 Je cájini rō jeē uū na quiivī te coo vico pascua. Te ruhū, Yaā ní nduu tēe,



nastúu i ruhū jeē cúu rī jicā cruz, achí yá.

<sup>3</sup> Yūcuán na te sutū cácujeéhu, jíin tée cástéén tutu ley, jíin táca tée jéhu jeē cándacu jniñu nuū ñáyuu hebreo, ni candutútú de ini patio vehe palacio maá sūtū cujéhu ga jeē naní Caifás.

<sup>4</sup> Te ni candajnūhún de ndese jñi de Jesús jíin jnúhun stáhú, te cahni de ya.

<sup>5</sup> Te ni cacahān de:

Ma jñí yó de máá quivī vico, chi ndonda ñayuu siquī yō, achí de.

*Jnúhun ñahan jeē ní chuhun perfume xinī yā*

(Mr. 14.3-9; Jn. 12.1-8)

<sup>6</sup> Te íne Jesús ñuu Betania vehe Simón, tée ni ndoho cuehyī stehyú.

<sup>7</sup> Te ni quee ñn ñahan nuū yā, ndáhá ña ñn frasco yuū luu jeē ñúhun aceite perfume jeē yóhyo yahu ndéé. Te ni chuhun ña xinī yā ní ní jéé yéji yā staā.

<sup>8</sup> Te ni cajito tée cáscuáha jíin yá, te ni caquitī ni de, te ni cacahān de:

¿Najehē cúu jeē náā saá-ni perfume jiñā?

<sup>9</sup> Chi cuu xīcó yahu yó núú, te cuāha yo xúhun núú ñáyuu ndahú. Achí de.

<sup>10</sup> Te ni jini Jesús jnúhun cácahān de. Te ni cahān yā jíin de:

¿Naun cásaáha ró jéé nácani uhū ni ñahan yáha? Chi ñn jniñu váha cúu jeē ni sáha ña jíin rí.

<sup>11</sup> Chi ní ní coyūcu ñáyuu ndahú jíin ró, te ruhū chi tuá condee rī jíin ró.

<sup>12</sup> Chi jeē ní chuhun ña perfume yáha ruhū, suu cúu jeē ni sátūhva ña ruhū nde quivī quíndūji rí.

<sup>13</sup> Jendaá cahán rī jíin ró jeē ní cáhnu ñayivī ndé-ni cúu nuū cuité jnúhun yáha jéé jnáma rí ñayuu, suni nacani i jnúhun jeē ni sáha ñahan yáha, návaha cocuhun ni ñayuu ña, achí yá.

*Jeē ní nastúu Judas yā*

(Mr. 14.10-11; Lc. 22.3-6)

<sup>14</sup> Yūcuán na te ñn jeē ndihúxí uū tée cáscuáha ún, naní de Judas Iscariote, ni jehēn de nuū sutú cácujeéhu.

<sup>15</sup> Te ni cahān de jíin:

¿Nasaa cuāha ní núú ná, te na nastúu ná de nuū ní? achí de.

Te ni cajēhe ocō uxī xūhun plata nuū de.

<sup>16</sup> Yūcuán na te nde quivī un ní quejéé de ndúcú de modo ndese nastúu de ya nuū sutú jijnáhan.

*Jeē ní jequin yā Cena yā*

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Te máá quivī jeē quejéé vico jeē cáyeji ñayuu pan jeē tú na levadura yñi, te ni quijicoo tée cáscuáha un núú Jesús. Te ni cacahān de jíin yá:

¿Ndé nuū cuní ni jéé quísatūhva ná cuxíni ní vico pascua? achí de.

<sup>18</sup> Te ni cahān yā:

Cuángoo nde ñuu, vehe tée jeē jé ni cacahān yō, te cahān rō jíin de: Achí máá Maestro jeē ní cuyajni quivī cuu yā. Te vijna te caji yā vico pascua ini vehe ní jíin tée cáscuáha jíin yá, achí rō. Achí yá.

<sup>19</sup> Te tée cáscuáha jíin yá, ni casáha de nájnūhun ni ndacu Jesús jniñu nuū de, te ni casátūhva de jeē cuxíni ya vico pascua.

<sup>20</sup> Te jeē cuácuaa, te ni quee yā, te ni cucōo ya mesa jíin ndihúxí uū tée cáscuáha jíin yá.

<sup>21</sup> Te ní ní yéji yā jíin de te ni cahān yā:

Jendaá cahán rī jíin ró jeē ñn róhó nastúu ruhū vijna, achí yá.

<sup>22</sup> Te ni cacucuíhyá ndasí ni de. Te ná ñn ná ñn de ni cacajnūhún de ya:

¿A sáña cúu? achí de.

<sup>23</sup> Te ni cahān yā:

Ñn róhó jéé cáyeji cáhnu jíin rí ñn cohō, suu ró nastúu ruhū.

<sup>24</sup> Te ruhū, Yaā ní nduu tée, jendaá cúu jeē quihín rī cuu rī, nájnūhun yósó jnúhun rí nuū tútu iñ. Te nacā xeēn ndoho tée nastúu ruhū. Váha ga núu tu ní cácu tée un núú, achí yá.

<sup>25</sup> Yūcuán na te ni cahān Judas, tée nastúu ya:

¿A sáña cúu, Maestro? achí de.

Te ni cahān yā jíin de:

Suu ró cúu, achí yá.

<sup>26</sup> Te ní ní jéé cáyeji de jíin yá, te ni quihin ya pan, te ni nacuatáhú yá, te

ni tahu cuéchi yá, te ni jēhe ya nuū tée cáscuáha jíin yá. Te ni cahān yā:

Caji rō jijnáhan rō, chi yāha cúu yiqui cúñu rī, achí yá.

<sup>27</sup> Yūcuán na te ni quihin ya ñin copa ndūxi uva, te ni nacuatáhu yá, te ni jēhe ya nuū de. Te ni cahān yā:

Coho jíjnáhan rō.

<sup>28</sup> Chi yāha cúu ñiñī rī jeē cuáha ri jeē cúu contrato jeé, te cati jeē ndundoo cuēchi cuehē ñayuu, te coo jnūhun cáhnu ni nuū cuéchi i.

<sup>29</sup> Te cáhán rī jíin rō jeē ndé vijna te ma cóho ga rī ndūxi ndehē uva yāhá, chi nde quiji quiñī ndacu Tátá rī jniñu ñí ñayiví, te sáa te coho tucu ri jíin rō jijnáhan rō. Achí yá.

*Jeē ní cachi yā jeē yūhu Pedro cahān de jeē jini de ya*

(Mr. 14.26-31; Lc. 22.31-34; Jn. 13.36-38)

<sup>30</sup> Te ni jita ya ñin yaa ií jíin de jíjnáhan de. Te ni quenda ya cuahān yā jíin de nde yucu Olivos.

<sup>31</sup> Yūcuán na te ni cahān yā:

Ndivii rō nayūhu rō jeē siquí ruhū jecuáa vijna. Chi suhva je yósó jnúhun ri nuū tútu ií, ni cahān Yaā Dios: Cuāha ri jnūhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí.

<sup>32</sup> Te jeē nátecu rī, te xīhna ruhū cosnūu rí quihīn rī región Galilea, te sáa te najinūcoo rō, achí yá.

<sup>33</sup> Yūcuán na te ni cahān Pedro:

Vēsú ndiñi de na náyūhú de, te máa ná chi ma náyūhú cuítē ná, achí de jíin yá.

<sup>34</sup> Te ni cahān yā jíin de:

Jendaá cahān rī jíin rō jeē jecuáa vijna, nde ná tu cana líhli, te yūhu rō jeē jñi ñayuu rohó, te unī jínu cahān rō jeē tu jini rō ruhū, achí yá.

<sup>35</sup> Te ni cahān Pedro jíin yá:

Vēsú núu cuu na jíin ní, te ma cahān cuítē na jēe tu jini na níhín, achí de.

Te suni súcuan ni cacahān ndiñi tēe cáscuáha jíin yá.

*Jeē ní jicān tahu yā nuū huerto Getsemani*

(Mr. 14.32-42; Lc. 22.39-46)

<sup>36</sup> Yūcuán na te ni jinū Jesús jíin tée cáscuáha jíin yá ñin lugar nuū naní Getsemaní. Te ni cahān yā jíin de:

Yāhá-ni cucōo rō, te na quihín rī yūcuan cácan tahu rī, achí yá.

<sup>37</sup> Te ni jeca ya Pedro jíin ndindúu séhe Zebedeo cuahān yā jíin de. Te ni quejéé yá cucuíhyá ndasí ni yā te cúxií ni yā jeē quiñi jnūndóho siquí yā.

<sup>38</sup> Yūcuán na te ni cahān yā jíin de:

Yōhyo cúcuíhyá ni rī, te ndúcú sáha jeē cúu rī. Yāhá condetu rō te condito rō jíin rí.

<sup>39</sup> Te ni jica ya jecu gā, te ni jecuñī yití yá ni jequin ya nuū yā nuū ñúhun, te ni jicān tahu yā suhva nuū Yaā Dios:

Tátá maá ná, núu cuu te tejiyo ní jnūndóho yáha jēe ma quiñi siquí ná. Te nasūu jēe cuní maá ná, chi jeē cuní maá ní na cóo, achí yá.

<sup>40</sup> Yūcuán na te ni ndee yā nuū ndinúni tée cáscuáha jíin yá, te ni jito ya jeē cáquixi de. Te ni cahān yā jíin Pedro:

¿A tu ní cánda rō condito rō jíin rí vēsú ñin hora?

<sup>41</sup> Coo ndito ni rō te cacān tahu rō jeē chindéé ñáhán yá rohó jēe ma sáha rō cuéchi jeē coto ndee jeneé rohó. Chi cuní ndije ánuá rō squícu vāha rō, te yiqui cúñu rō chi tu fuerza, achí yá.

<sup>42</sup> Te ni jehēn tucu ya vuelta uū, te suhva ni jicān tahu yā:

Tátá maá ná, te núu ma cúu cujiyo jnūndóho yáha jeē ma ndóho ná, te na cóo jeē cuní maá ní núu súcuan, achí yá.

<sup>43</sup> Te ni ndee tucu ya nuū de, te ni jito ya jeē cáquixi tucu de, chi yōhyo cájil de máhná.

<sup>44</sup> Te ni stóo ya de, te cuahān tucu ya cuacacān tahu yā vuelta unī. Te suni jnūhun yūcuan ní cahān yā.

<sup>45</sup> Yūcuán na te ni ndee tucu ya nuū de jíjnáhan de, te ni cahān yā jíin de:

Vijna te cusū rō te ndetātu rō. Te je ni quee hora, te ruhū, Yaā ní nduu tēe, natūu ri te jñi tēe cáhīyo cuéchi ruhū.

<sup>46</sup> Ndocuñī jijnáhan rō, chi je vēji tēe nastúu ruhū, te quihīn yō jíin de, achí yá.

*Jeē ní cajñi de Jesús**(Mr. 14.43-50; Lc. 22.47-53; Jn. 18.2-11)*

<sup>47</sup> Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujeñnu jíin táca tēe jéñnu cándacu jniñu nuū ñáyuu hebreo, ni catají tēe ún.

<sup>48</sup> Te Judas, tēe nástúu ya ún, je ni jēhe de ñn seña nuū tēe un jíjnáhan, chi ni achi de:

Tēe jeē téchūhu rí un cúu. Te jñi ró jíjnáhan ró, áchí de.

<sup>49</sup> Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya.

<sup>50</sup> Te ni cahān Jesús jíin de:

Amigo, ¿na jniñu vēji ró? áchí yá.

Yūcuán na te ni jinūcoo tāca gá tēe ún, te ni cajñi de Jesús.

<sup>51</sup> Te ñn tēe jeē cáhīn jíin Jesús, ni tava de espada de, te ni jehnde de sōho ñn mozo maá sūtū cujeñnu ga.

<sup>52</sup> Yūcuán na te ni cahān Jesús jíin de:

Nachuvāha espada rō, chi tāca jēe cájejnáhan jíin espada, suni jíin espada cuu.

<sup>53</sup> ¿Te á tu cájini rō jeē cuu cacān tahu rī nuū Tatá rī, te vijna ñúhún tají yá víhyá gā uxí uū mil ndajéhé andiví jeē jnama ruhū?

<sup>54</sup> Te núu súcuan, ¿te ndese cuu squícu jñūhun cáhán tutu ñi jeē cánuú ndoho rí súcuan? áchí yá.

<sup>55</sup> Yūcuán na te ni cahān yā jíin ñáyuu cuehē ún:

¿Te va tēe cuíhná cúu rí jeē vējicoo ró jíin espada jíin yujnu jeē jñi ró rúhū jeē súcuan. Tāca quívi ni cucōo rí jíin ró jijnáhan ró ini templo cáhnu, ni steén rī jñūhun, te tu ní cájñi ró rúhū.

<sup>56</sup> Te súcuan cása ha ró návāha na squícu jeē cahān tutu ñi jeē ní catee tēe ni canacani jñūhun Yaā Dios, achí yá.

Yūcuán na te ndihi tēe cáscuáha jíin yá, ni castóo de ya, ni cajinu de cuango de.

*Jeē ní indichi Jesús nuū junta tēe**ácucujéñnu ga**(Mr. 14.53-65; Lc. 22.54-55, 63-71; Jn. 18.12-14, 19-24)*

<sup>57</sup> Te tēe ni cajñi Jesús, cuango de jíin yá nuū Caifás, tēe cúu sutū cujeñnu ga. Te yūcuan cáhīn tútú tēe cástēen tutu ley jíin táca tēe jéñnu cándacu jniñu.

<sup>58</sup> Te Pedro chi jíca-ni ndíquín de ya, te ni jinū de patio sutū cujeñnu ga. Te ni quívi de ini patio, te ni cucōo de jíin táca policía, návāha coto de ndese coo squí yā.

<sup>59</sup> Te sutū cácujeñnu jíin táca tēe jéñnu jíin ndihi tēe cása ha junta cujeñnu ga, ni canducú de tēe cahān jñūhun yáá síquí Jesús, chi cahni de ya cácuni de.

<sup>60</sup> Te vēsú ni quecoo cuehē ñáyuu cácahān yaá, te tu ní cánihīn de cuēchi síquí yā jeē cáhni de ya. Te jeē sándihí te ni quecoo uū testigo jeē cahān yaá síquí yā.

<sup>61</sup> Te áchí:

Tēe yáha ní cahān de jeē cuu canu de templo Yaā Dios, te nuū uní-ni quívi te nucondichi sáha de, áchí.

<sup>62</sup> Yūcuán na te ni ndocuiñi maá sūtū cujeñnu ga, te ni cahān de jíin yá: ¿Naun tu cáhán cuíti rō? ¿A íyó ndāā jeē cácahān tēe yáha síquí rō? Achí de.

<sup>63</sup> Te Jesús tu ní cáhán cuíti yā. Te ni cahān maá sūtū cujeñnu ga:

Nđacu rí jniñu nuū rō jeē cahān ndāā rō cuni nahín maá Yaā Dios, Yaā técu. Cachi cají te núu máá ró cúu Cristo, Sēhe Yaā Dios, achí de jíin yá.

<sup>64</sup> Te ni cahān yā:

Suu rí cúu, nájnūhun cáhán rō. Te na cástūhun rí nuū rō jijnáhan ró jēe tāca quívi jeē quíji te coto ró rúhū, Yaā ní nduu tēe, condee rí lado váha Yaā iyó poder. Te coto ró jēe ndíji rí ichi ándiví jíin vícō. Achí yá.

<sup>65</sup> Yūcuán na te sutū cujeñnu ga ni jehnde de sahna de jeē quítí ndasí ni de, te ni cahān de:

Tēe yáha chi cáhán de jñūhun ndevāha jeē quítí ni Yaā Dios, chi sáha de máá de Sēhe Yaā Dios. ¿Nde jíni ñúhún gá yō testigo núu súcuan? Chi

je ni cajini ró jnúhun ndevāha cáhán de.

<sup>66</sup> ¿Te ndese cájeni ni rō? achí de.

Te ni cacahān tēe cuehē ún;  
Cuēchi cúu jeē cahán de súcuan, te jíní ñúhún cuu de, áchí.

<sup>67</sup> Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā.

<sup>68</sup> Te ni cacahān de;

Te núu Cristo cúu ró, te cachi rō ndé ñn cúu jeē ní cani rōhó, áchí de.

*Jeē ní cachi Pedro jeē tu jíní de ya*

(Mr. 14.66-72; Lc. 22.56-62; Jn. 18.15-18, 25-27)

<sup>69</sup> Te níní jéē súcuan cúu, te Pedro néne de nuū quéhe ini patio. Te ni quee ñn ñahan jéjníñu vehe ún, te ni cahān ña jíní de:

Róhó chi suni ni jica ró jíní Jesús tēe Galilea, achí ña.

<sup>70</sup> Te máá de tu ní cáchi de, chi ni cahān de ni cajini ndihi ñayuu:

Tu jíní rī na jnúhun cáhán rō, achí de.

<sup>71</sup> Te ni quenda de yéhyí núu quéhe, te ni jito inga ñahan nuū de. Te ni cahān ña jíní ñáyuu cáhīn yūcuán:

Tēe yáha chi suni ni jica de jíní Jesús, tēe ñuu Nazaret, achí ña.

<sup>72</sup> Te inga jínu tu ní cáchi tucu de, chi sa ni cahān teyí de:

Tu jíní rī tēe ún, áchí de.

<sup>73</sup> Te ni cunúu jecu gā, te ñayuu cáhīn yūcuan ní quecoo i nuū Pedro, te ni cacahān i:

Jendaá ndije jeē suni jnáhan tēe un cúu ró, chi ndijin cahán rō jeē tēe Galilea cúu ró, áchí i.

<sup>74</sup> Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíní cuiti rī tēe ún, áchí de.

Te ni cana-ni líhli.

<sup>75</sup> Te ni nucūhun ni de jnúhun ni cahān Jesús jíní de: Nde ná tu cana líhli, te yūhu ró te cahān rō unī jínu jeē tu jíní rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

*Jeē cuángoo de jíní yá nuū Pilato*

(Mr. 15.1; Lc. 23.1-2; Jn. 18.28-32)

## 27

<sup>1</sup> Yūcuán na te ni cundijin. Te tāca sūtū cácujeñhu jíní táca tēe jéñhu jeē cándacu jniñu nuū ñáyuu hebreo, ni casquíjñahan de jnúhun ndese sáha de jeē cuu Jesús.

<sup>2</sup> Te ni cajihni de ya, te cuango de jíní yá nuū Poncio Pilato, tēe cúu gobernador.

*Jeē ni jíhí Judas*

<sup>3</sup> Yūcuán na te Judas, tēe ni nastúu ya un, ní jito de jeē ní cunihin siquī yā jeē cúu yā. Te ni jnahuhū ni de, te ni ñacuāha de ocō uxī xūhun plata jeē ní níhīn de nuū sutú cácujeñhu jíní núu táca tēe jéñhu.

<sup>4</sup> Te ni cahān de jíní:

Cuēchi ni sáha ná jéē ní nastúu ná ñn tēe cuu de, te tú na cuēchi de.

Te máá sūtū un ní cacahān de:

¿Vé jítú ni ruhū? Cuēchi máá ró cúu. Achí de.

<sup>5</sup> Te ni scáne Judas xūhún un ini templo. Te ni quenda de cuahān de, te ni scuéhne de máá de.

<sup>6</sup> Te sūtū cácujeñhu ni canastútú de xūhún un, te ni cacahān de:

Ma cúu chuhun yó xūhun yáha ini yejnū nuū cásocō ñayuu, chi xūhun jéē ní jéconaā jeē cúu ñn tēe cúu, áchí de.

<sup>7</sup> Yūcuán na te ni casándaā de jeē xūhun yūcuan cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá.

<sup>8</sup> Jeē yūcuan cúu jeē ndé vijna naní ñuhun ún Lugar Ñuhun Niñí.

<sup>9</sup> Te súcuan ni squícu jnúhun ni cahān Jeremías, tēe ni nacani jnúhun Yaā Dios nde jenahán: Ni caquihin de ndihóco uxī xūhun plata, te súcuan-ni cúu ñn yāhu jeē ní casáha ñayuu Israel cuenta jeē ndeé yā nuū i.

<sup>10</sup> Te jíní xūhun un ní cajeen de ñuhun quíxin, nájnūhun ni ndacu máá Jítóho yō Yaā Dios jniñu nuū rī. Achí Jeremías.

*Jeē ní indichi Jesús nuū Pilato*

(Mr. 15.2-5; Lc. 23.3-5; Jn. 18.33-38)

<sup>11</sup> Te nuū ní jinūcoo de jíní Jesús nuū gobernador, tēe cúu Pilato, te ni cajnúhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájñūhun cáhán rō.

<sup>12</sup> Te sutū cácujuhnu jíin téé jéhnū cándacu jñiñū, ni cacahān de cuēchi síquī yā. Te tú na vé ni cáhán cuítī yā.

<sup>13</sup> Yūcuán na te ni cahān Pilato jíin yá:

¿A tu jíni ró jéē cácahān de cuehē cuēchi síquī rō? achí de.

<sup>14</sup> Te tu ní cáhán cuítī yā ni ññ jñūhun jíin de. Te nahán ní naa ni gobernador jeē tú na vé ni cáhán yā jíin de.

*Jeē ní cundaā jeē cúu yā*

*(Mr. 15.6-20; Lc. 23.13-25; Jn. 18.38-19.16)*

<sup>15</sup> Te íyó costumbre gobernador jeē quíivī víco un siaá de ññ téé íne vecāa, núu na-ni téé cácuñi ñayuu.

<sup>16</sup> Te suu quíivī un íyó ññ téé íne vecāa, nání de Barrabás, te je ni jíitē núu jñūhun jeē ni sáha de cuēchi xeēn.

<sup>17</sup> Te nuū ní candutútú ñayuu, te ni cahān Pilato jíin i:

¿Ndé téé cácuñi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

<sup>18</sup> Súcuñi ni cahān de chí cúni de siaá de Jesús. Chí je ni jecūhun ni de jeē ní cacucuésún ni táca sūtū un cájito de ya, te jeē yúcuñi ní quijicoo jíin yá nuū de.

<sup>19</sup> Te níni jéē néne Pilato silla nuū sándaā de jñiñū, te ññasíhí de ní tají ññ jñūhun nuū de: Ma quíivī nduu rō jíin ññayuu síquī téé ndaā jíñā, chí yōhyo ni síūhu jéní ruhū cuni jeē síquí de, achí ññ.

<sup>20</sup> Te sutū cácujuhnu jíin táca téé jéhnū, ni cascáhán de ññayuu jeē na cácan i jeē siaá de Barrabás, te na cúu Jesús.

<sup>21</sup> Yūcuán na te ni cajñūhún tucu gobernador:

Jeē uú de, ¿ndé ññ de cácuñi rō jeē siaá rī? achí de.

Te ni cacahān i:

Siaá ni Barrabás, achí i.

<sup>22</sup> Te ni cajñūhún Pilato:

Núu súcuñi te ¿ndese cácuñi rō jeē sáha ri jíin Jesús, téé cúu Cristo? achí de.

Te ni cacahān ndíhi i:

Cata caa ní de jíicā cruz, na cúu de, achí i.

<sup>23</sup> Yūcuán na te ni cahān Pilato:

¿Na cuēchi ni sáha de núu súcuñi? achí de.

Te ññayuu un ní cacana jee ndasí i:

Cata caa ní de jíicā cruz, na cúu de, achí i.

<sup>24</sup> Te ni jíni Pilato jeē tu cúndeyí de jíin ññayuu, chí sa víhyá gā cácuvaā i. Te ni ndacu de jñiñū jeē na quíji ndute, te ni nandahá de nuū ññayuu cuehē ún. Te ni cahān de:

Jeē nandahá rí yāha cúu seña jeē tú na cuēchi condee síquī rī jeē cúu téé váha yāhá. Chí síquī maá ró jíināhan rō na cóndee. Achí de.

<sup>25</sup> Te ni cacahān ndíhi ññayuu:

Suu síquī maá ná jíin síquī séhe ná na cóndee cuēchi jeē cúu de, achí i.

<sup>26</sup> Yūcuán na te ni siaá de Barrabás. Te ni ndacu de jñiñū jeē na cáni táca soldado un Jesús, jíin jéē cáta caa de ya jíicā cruz.

<sup>27</sup> Yūcuán na te soldado un cuangoo de jíin Jesús ini palacio. Te ni cacana de ndíhi jñāhan de ni candutútú núu yā.

<sup>28</sup> Te ni caquenehen de sahma ya, te ni cachuhun de ya ññ sahma cuehé jeē cúu sahma rey.

<sup>29</sup> Te ni casáha de ññ corona íñū, ni cachuhun de xini yā. Te ni cachíhi de ndaha váha ya ññ yujnu jeē nájñūhun bastón. Te ni casácatā de nuū yā, chí ní cajecuiñí yití de, casáha de jeē chíñúhún de ya.

Nacā jeē váha rey cúu Rey ññayuu hebreo, achí de.

<sup>30</sup> Te ni catesíhí de nuū yā. Te ni caquihin de yujnu jeē ní cachíhi de ndaha ya, te ni cacani de xini yā.

<sup>31</sup> Te nuū ní cuu ní casácatā de nuū yā, te ní catava de sahma cuehé un, te ní canachuhun de ya sahma máá yá. Te cuangoo de jíin yá jeē cata caa de ya jíicā cruz.

*Jeē ní cacata caa de ya jíicā cruz*

*(Mr. 15.21-32; Lc. 23.26-43; Jn. 19.17-27)*

32 Te nuū ní quendacoo soldado un jíin yá, te ni canajnáhan de jíin ñn tēe ñuu Cirene, naní de Simón. Te ni catejníñu de tēe un jéē cóndiso de cruz yā.

33 Te ni jinūcoo de ñn lugar nuū naní Gólgota, jeē cuní cahān Lugar Yiqui Xíni.

34 Te ni cajēhe de vino jeē ni sácā núu jíin ñn jeē uvuá jeē cóho ya. Te nuū ní jito ndee ya, te tu ní cúní yā coho ya.

35 Te nuū ní cuu ni cacata caa de ya jicā cruz, te ni casáha de sorteo jeē siquí ndese nihīn ñn ñn de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquí ndese nihīn ñn ñn de sahma ri, achí yā, achí tutu.

36 Yūcuán na te ni cacucōo de yūcuan jeē cóto de nde cuu yā.

37 Te ni catee de ñn jnūhun xinī cruz yā jeē cahán na siquí ni jíhī yā: Yāha cúu Jesús, Rey ñayuu hebreo, achí.

38 Te suni ni cacata caa de uū tēe cuíhná núu uū gā cruz, ñn de lado váha ya, te inga de lado jecó yá.

39 Te ñayuu cáyāha yūcuan cáscuicó i xinī i, te cacahān neé i:

40 Róhó chi cahán rō jeē cánu rō templo cáhnu, te nuū uní quivī te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jicā cruz viī, achí i.

41 Te sutū cácujuhnu, jíin tēe cástéén tutu ley, jíin tēe grupo fariseo, jíin tēe jéhnu jíin náhan de, suni súcuan ni cacahān catá de, te achí de cacahān maá de:

42 Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de.

43 Ni candíje de Yaā Dios, te na jnáma ya de vijna te núu cundáhú ni yā de, chi ni cahān de jeē cúu de Sēhe ya. Achí de jíin náhan de.

44 Te tēe cuíhná jeē cándita caa xiin ya, suni súcuan ni cacahān neé de.

*Jeē ni jíhī Jesús*

*(Mr. 15.33-41; Lc. 23.44-49; Jn. 19.28-30)*

45 Te nuū ní cuu cahuxī uū, te ni cunee ní cáhnu nde cahunī.

46 Te nájnūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

47 Te sava ñayuu cáhīn yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, achí i.

48 Te ni jinu-ni ñn tēe, ni jequihin de ñn cachī, te ni chundaji de nuū vina-gre iyá. Te ni tee de xinī ñn yujnu, te ni tee de yuhu ya jeē coho ya.

49 Te sava ga de ni cacahān:

Condetu ró, na cóndēhe yó núu quiiji Elías jnama de chí tuú, achí de.

50 Te Jesús ni cana jee ya inga jínu, te ni jihī-ni ya.

51 Te sahma ndíta caa jeē ndihyú cuarto iñi ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catahū sáva toto.

52 Te ni cananune yaū nuū yíndūji ndíyi. Te cuehē ndíyi jeē ní cacandíje i Yaā Dios, ni canatecu i.

53 Te nuū ní natecu Jesús, te ni quendacoo i nuū yíndūji i. Te ni ndívicoo i ini ñuu iñi Jerusalén, te cuehē ñayuu ni cajito nuū i.

54 Te ná ni jihī Jesús, te tēe cúu capitán jíin tēe cáhīn jíin de jeē cándito de nde cuu yā, ni cajini de jeē ni jnáa, jíin táca gá jniñu ní cuu. Te yōhoyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yáha, achí de.

55 Te yūcuan cáhīn cuehē ñahan, cándēhe jíca ña. Te suu ñahan un ní candiquin ña Jesús nde Galilea, vējicoo ña cájejniñu ña nuū yā.

56 Te unī ñahan un cácuu María ñuu Magdala, jíin María naná Jacobo jíin José, jíin naná ndindúú séhe Zebedeo.

*Jeē ní quindūji Jesús*

*(Mr. 15.42-47; Lc. 23.50-56; Jn. 19.38-42)*

57 Te nuū ní ini quivī ún, te ni quee tēe cúca, naní de José, te tēe ñuu

Arimatea cúu de. Te suni tēe ni scuáha jíin Jesús cúu de.

<sup>58</sup> Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de.

<sup>59</sup> Te José ni quihin de yiqui cúñu yā, te ni chusúcun de ñn sahma cuitá íyó ndoo.

<sup>60</sup> Te névaha de ñn yaū jeē ní caan jeé jícā ñn cava, nuū ná tu quindūji ndīyí. Te yūcuan ní chindūji de ya. Te ni jesi de ñn yuū cáhnu yuhu yáú un, te cuahān de.

<sup>61</sup> Te María ñuu Magdala, jíin inga María, cáyūcú ña ichi núú nuū yindūji ya.

### *Jeē ní cacondito soldado nuū yindūji ya*

<sup>62</sup> Te ni cuu tēcá jniñu yáha máá quiví jeē casátūhva ñayuu jeē quiji quiví ndétátú. Yūcuán na te ni cundijin máá quiví ndétátú. Te sutū cácujuhnu jíin tēe grupo fariseo ni jengoo de nuū Pilato.

<sup>63</sup> Te ni cacahān de:

Cánucūhun ni na jēe nde na técu tēe stáhú née un te ni cahān de jeē nátecu de nuū uní quiví.

<sup>64</sup> Núu súcuan te ndacu ní jniñu na cóto vāha tēcá soldado yuhu yáú un nde núu ni yāha uní quiví. Chi núu tuú te sanaa te quijicoo tēe ni cascuáha jíin de, te tava cuíhná de ndīyí ún jecuáā, quingoo de jíin. Yūcuán na te cachi de nuū ñayuu jeē ní natecu tēe ún. Te cáhú gá cuu jnūhun stáhú yūcuan vēsú jeē xihna ñúhún. Achí de.

<sup>65</sup> Te ni cahān Pilato:

Yāha cáhīyo soldado. Cuángoo jíin de, te sácutú vāha ró yuhu yáú un, te coto vāha ró, núu ndese vāha ga cuu sáha ró. Achí de.

<sup>66</sup> Te cuangoo de, te ni casácutú de yuū jeē ndihyú yuhu yáú nuū yindūji ya, te ni castñn ñihin de. Te ni castóo de tēcá soldado un cándito.

*Jeē ní natecu Jesús*  
(Mr. 16.1-8; Lc. 24.1-12; Jn. 20.1-10)

## 28

<sup>1</sup> Te ni yāha quiví ndétátú un, te ni cundijin quiví domingo. Te María ñuu Magdala jíin inga María un, ní jecondēhé ña nuū ní yindūji Jesús.

<sup>2</sup> Yūcuán na te ñn sanaa-ni te ni jnāa ñihin ndasí. Chi ñn ndajéhé maá Jítoho yō Yaā Dios ni cuun ya ichi ándiví, ni quee ya nuū ní yindūji Jesús. Te ni stáa ya yuū ndihyú yuhu yáú un, te ni cucōo ya siquí.

<sup>3</sup> Te ndíndēe núu yā nájnūhun taja, te sahma ñúhun ya yaa quiyí nájnūhun yuhvā volcán.

<sup>4</sup> Te soldado cándito yūcuan ní quisi i de jeē cáyūhú de cájito de ya. Te ni cacuu ndīyí de.

<sup>5</sup> Te ni cahān ndajéhé jíin ndíndúú ñahan ún:

Ma yūhu ró, chi jíní rī jeē vécondēhe ró Jesús, Yaā ni jíhī jicā cruz.

<sup>6</sup> Tuá yā yāhá, chi je ni natecu yā, nájnūhun ni cahān yā. Nehen condēhe ró nuū ní cachindūji de ya.

<sup>7</sup> Te yachí quingoo ró, te cachi rō nuū tēe cáscuáha jíin yá jeē ní natecu yā. Te xihna gā maá yá jinū Galilea, te sáa te najinūcoo de. Te yūcuán coto de nuū yā. Achi rō na cúni de. Je ni castūhun rí nuū rō, achí ndajéhé.

<sup>8</sup> Te ni quendacoo ña nuū ní yindūji ya, te yachí cuangoo ña. Te cáyūhú ña, te suni yōhyo cácusñ ni ña. Te ni cajinu ña cuacastūhún ña nuū tēe cáscuáha jíin yá.

<sup>9</sup> Te níní cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya.

<sup>10</sup> Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tēcá hermano rī, tēe ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

### *Jnūhun ní cacahān soldado*

<sup>11</sup> Te níní cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tēcá jniñu jeē ní cuu.

12 Te sutū cácujuhnu ni candutútú de nuū táca téé jéhnú cándacu jniñu, te ni casquijnáhan de jnūhun. Yūcuán na te ni cajēhe de cuehē xūhun núū soldado jijnáhan.

13 Te ni cacahān de jíin:

Cahān rō jijnáhan ró jēé téé cáscuáha jíin de ni quijicoo jecuáā, te ni catava cuīhna ndíyí un ní ní cáquixī rō, achi rō.

14 Te núu na cúni gobernador jnūhun yáha, te máá rí quiscahán rí de, návāha tú nihīn rō castigo jijnáhan ró. Achí de.

15 Te soldado un ní caquihin de xūhún un, te ni cacachi de nájnūhun ni cacahān jíin de. Te nde vijna chi súcuan cácahān ñayuu hebreo nájnūhun ni cacahān soldado un.

*Jeē ní tejníñu ya de nacani de jnūhun  
(Mr. 16.14-18; Lc. 24.36-49; Jn. 20.19-23)*

16 Te ndihúxí in tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de.

17 Te nuū ní cajito de nuū yā, te ni cachiñúhún de ya. Te sava de tu cácaandíje vāha de jeē maá yá cúu.

18 Te ni quee ya nde nuū de, ni cahān yā jíin de:

Je ni jēhe Tátá rī ndihí poder nuū rī jeē ndácu rí jniñu andiví jíin ñáyiví.

19 Núu súcuan te cuángoo nuū ñayuu tācá nación, te stéén rō jnūhun rí nuū i návāha na cándíje i. Te scuándute ró i jeē ní cacandíje i máá Tátá jíin Séhe jíin Espíritu Santo.

20 Te stéén rō nuū i jeē na cuátáhú i tācá jniñu ní ndacu rí nuū rō. Te cocuhun ni rō jeē maá rí íne rí jíin ró ní cáni nde quiví jíinu ñáyiví. Achí yá. Te ni cuu. Amén.



## JNUHUN VAHA NI TEE SAN MARCOS

*Jnūhun Juan tēe scuándute*  
(Mt. 3.1-12; Lc. 3.1-9, 15-17;  
Jn. 1.19-28)

<sup>1</sup> Yāha quéjéé jnúhun vāha máá Jesu-  
cristo Sēhe Yaā Dios, jeē ní quiji ya jeē  
jnama ya yohó.

<sup>2</sup> Isaías, tēe ni nacani jnúhun Yaā  
Dios nde jenahán, súcuan ni tee de  
jnūhun Juan nuū tútu:

Tají rí tēe nacani jnúhun ri cosnúu de  
ichi núú rō,  
návāha coo tūhva ñayuu jeē jinú rō,  
achí Yaā Dios jíin Cristo.

<sup>3</sup> Te tēe ún cana jee de nde nuū ñúhun  
téhé:  
Sátūhva ró máá ró jijnáhan ró, chi  
quee maá Jítóho yō.

Te sáha ró jniñu ndaā, chi vēji ya, achi  
de.

Achí Isaías.

<sup>4</sup> Te Juan ni jinū de nde nuū ñúhun  
téhé, scuándute de ñayuu. Te cáhan de  
jíin i jeē na nácani ni i jeē stóo i cuēchi  
i te cuandute i, návāha cone cáhnu ni  
Yaā Dios nuū cuéchi i.

<sup>5</sup> Te tāca ñáyuu región Judea jíin ñáyuu  
ñuu Jerusalén, ni quijicoo i nuū de.  
Te ni canacani ndaā i cuēchi i nuū  
Yaā Dios, te ni scuándute de i ini yūte  
Jordán.

<sup>6</sup> Te sahna ñúhun Juan cúu ixi  
camello, te núhni ñin cinturón ñi chiji  
de. Te jeē técu de cúu tíca ndicuéhyi  
jíin ndúxi yocō.

<sup>7</sup> Te suhva ni nacani de jnúhun:

Quiji máá Yaā cujéhnu ndasí. Chi tú  
na vé jéhnu cuiñi cúu ri nuū yā, ni jeē  
cuajniñu ri nuū yā vēsú ñin jniñu lúli  
gá nájñuhun jeē cuíta ndeyi ri ndají rí  
correa ndijēn yā.

<sup>8</sup> Te ruhū chi jíin ndute scuándute  
ri rohó jijnáhan ró, te Yaā ún chi  
nájñuhun jeē scuándute ya rohó cúu  
jeē cuáha ya Espíritu Santo condee ini  
anuá rō, achí Juan.

*Jeē ní jendute Jesús*  
(Mt. 3.13-17; Lc. 3.21-22)

<sup>9</sup> Te ni cuu jecu quiví, te Jesús  
ni quenda ya ñuu Nazaret ndañúu  
Galilea, te Juan ni scuándute de ya ini  
yūte Jordán.

<sup>10</sup> Te ná ni quenda ya nuū ndúte, te  
ni jito ya jeē ní nune-ni andiví, te ni  
cuun Espíritu Santo ni quee xiní yā, te  
cáa nájñuhun ñin paloma.

<sup>11</sup> Te ichi ándiví ní cahān ñin jnúhun:  
Máá ró cúu Sēhe ri jeē maní ndasí rí  
jíin, te yōhoyo cúsiñi ni rí jíin ró, achí.

*Jeē ní jito ndee jexeén Jesús*  
(Mt. 4.1-11; Lc. 4.1-13)

<sup>12</sup> Yūcuán na te ni jinū Jesús nde  
nuū ñúhun téhé ní sáha Espíritu Santo.

<sup>13</sup> Te uū xico quiví ní condee yā  
nuū ñúhun téhé un núu íin quiñi yúcu.  
Te ni jito ndee Satanás yā, chí cúní  
jeē sáha ya cuēchi. Te nuū ní cujiyo  
Satanás cuahān, te ni quecoo ndajéhe  
Yaā Dios, ni cajejniñu nuū yā.

*Jeē ní quejéé Jesús nácani ya jnúhun*  
(Mt. 4.12-17; Lc. 4.14-15)

<sup>14</sup> Yūcuán na te ná ni cachune de  
Juan vecāa, te ni jinū Jesús región  
Galilea, nácani ya jnúhun vāha ndese  
ndácu Yaā Dios jniñu.

<sup>15</sup> Te ni cahān yā:

Je ni jinū quiví, te je ni cuyajni jeē  
ndácu Yaā Dios jniñu nuū rō. Nacani  
ni rō jeē stóo ró cuéchi ró jijnáhan ró,  
te candíje ró jnúhun jeē jnáma ya rohó.  
Achí yá.

*Jeē ní cana ya cuūn tēe jñi chācá*  
(Mt. 4.18-22; Lc. 5.1-11)

<sup>16</sup> Te jica Jesús yumar Galilea  
cuahān yā. Te ni jito ya nuū Simón  
jíin ñani de Andrés. Te tēe cájniñi chācá  
cácuu de, te cásiñga de ñunu de ini  
mar.

<sup>17</sup> Te ni cahān yā jíin de:

Condiquin ruhū na quiñin yō, te  
nasáha ri rohó tēe nihin cuehē ñayuu  
candíje ruhū, nájñuhun cánihin rō  
chācá, achí yá.

<sup>18</sup> Yūcuán na te ni castóo-ni de ñunu  
de, te ni candiquin de ya.

<sup>19</sup> Te ni jica ya jecu gā, te ni jito  
ya nuū Jacobo jíin ñani de Juan, sēhe  
Zebedeo, suni cáyucú de ini barco de,  
cánachijnñi de ñunu de.

20 Te suni ni cana ya de jeē cóndiquīn de ya. Te ni castóo-ni de tátá de Zebedeo ini barco un jíin mozo de, te ni candiquīn de ya cuangoo de.

*Jeē ní quenehen ya tachī ini #n tēe*  
(Lc. 4.31-37)

21 Te ni jinū yā jíin de ñuu Capernaum. Te quivī ndétātu ní quīvi ya ini vehe iī sinagoga, te ni steén yā jnūhun.

22 Te ni canaa ni ñayuu ni cajini i jnūhun steén yā. Chi ní steén vāha ya nuū i, chi máá yá cúu jeē ndíso jniñu siquī ndihi. Te tēe cástéén tutu ley Yaā Dios, tu súcuan cástéén de.

23 Te ini vehe iī sinagoga ñuu un íne #n tēe jeē ñūhun tachī ini. Te ni cana cóhó de:

24 ¿Naun vēji ní núū na jíjnáhan ná, Jesús ñuu Nazaret? ¿A véji ní jéē snáā ni sáña, chí naún? Je jíin na ndé #n cúu ní, chí Sēhe iī Yaā Dios cúu ní. Achí de.

25 Te Jesús ni cahān xeēn yā jíin táchī ún:

Casi yuhu ró te quenda ró ini de, áchí yá.

26 Te tachī ún xeēn ni jehni yīhí tēe ún. Te ni cana cóhó, te ni quenda ini de cuahān.

27 Te ndihi ñayuu ni cayūhú i, te cácajnūhun jnāhan i:

¿Na vé cúu jeē yáha? ¿A #n jnūhun jéé cúu jeē yáha? Chi tēe yáha cújéhnu de jeē ndácu de jniñu nde nuū tachī te quéndacoo, áchí i.

28 Te yachī ni jitē núu jnūhun Jesús cuahān ní cáhnu región Galilea.

*Jeē ní nasávāha ya naná chīsó Simón Pedro*

(Mt. 8.14-15; Lc. 4.38-39)

29 Te ni quenda ya jíin de jíjnáhan de ini vehe iī sinagoga. Te Jesús ni jehēn yā jíin Jacobo jíin Juan nde vehe Simón jíin Andrés.

30 Te naná chīsó Simón, cátú ña yīhi quīji ña. Te ni cacastūhún de nuū yā jeē cuhú ña.

31 Yūcuán na te ni quindehe ya nuū catú ña, te ni jni ya ndaha ña, te ni ndonehen ya ña. Te ni quenda-ni quīji ún ña, te ni sáha ña jeē ní cayeyi de jíin yá.

*Jeē ní nasávāha ya cuehē ñayuu*  
(Mt. 8.16-17; Lc. 4.40-41)

32 Te ni quēe niāndii te ni cuaa. Te ni quecoo ñayuu jíin táca ñayuu cácu hū jíin jéē ñūhun tachī ini.

33 Te táca ñayuu ñuu un ní cacutútú i yéhyí un.

34 Te ni nasávāha ya cuehē ñayuu cácu hū tijni nuū cuehyí, te ni quenehen ya cuehē tachī un cuángoo. Te tachī chi je cájini un yá, te tu ní jéhe ya jnūhun jeē cástūhun ndé #n cúu ya.

*Jeē ní nacani ya jnūhun región Galilea*

(Lc. 4.42-44)

35 Te nehen ndasí ní ndonda ya, nde yínee gā. Te ni quenda ya cuahān sún ya yatā ñūū nuū tú ñayuu, te yūcuan ní jicān tahú yā.

36 Te Simón jíin tēe cáhīn jíin de, ni jenanducú de ya.

37 Te ni cananihīn de ya, te ni cacahān de jíin yá:

Tāca ñayuu cánanducú i níhín, áchí de.

38 Te máá yá ni cahān yā:

Sa suhva na quíhín yō tāca gā ñuu íne yajni, návāha suni nacani ri jnūhun nuū i, chí jeē yūcuan ní quee rī. Achí yá.

39 Te súcuan te ni jica cuu ya ní región Galilea, ni nacani ya jnūhun ini vehe iī sinagoga táca ñuu, te ni quenehen ya tachī ini ñayuu.

*Jeē ní nasávāha ya #n tēe ndóho cuehyī stehyú*

(Mt. 8.1-4; Lc. 5.12-16)

40 Te #n tēe ndóho cuehyī stehyú, ni quee de ni jecuiñī yití de nuū yā, te ni cahān de jíin yá:

Jíin na jeē cuu sáha ní jéē nduvāha ná, te núu cúní ní, áchí de.

41 Te Jesús ni cundáhú ni yā de, te ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

42 Te ná ni cahān yā súcuan, te ni nduvāha-ni tēe ndóho cuehyī stehyú un.

43 Yūcuán na te nátají yá de quinhun de, te ni cahān níhin ya jíin de:

<sup>44</sup> Ma cáchi cuiti rō nuū ní ñn. Chi quisteén rō maá rō nuū sutú, te condahá rō jeē socó rō nuū Yaā Dios siquī jeē ndúndoo rō núū yā, nájñuhun ni ndacu Moisés jniñu jenahán. Te súcuan te cuni ñayuu jeē ní nduvāha rō. Achí yá.

<sup>45</sup> Te ni quenda de cuahān de, te ni quejéé de nácani de jñuhun nuū ndihi ñayuu ndese ni nduvāha de. Te siquī yúcuan tuá ni cúu quīvi Jesús taca ñuu, chi cúchitú ndasí ñayuu nuū yā. Te ni jica ya yatā taca ñuu nuū tu cúchitú ñayuu. Te taca lado ni quijicoo ñayuu nuū yā.

*Jeē ní nasávāha ya ñn tēe ndóho cuehyi ni jín*  
(Mt. 9.1-8; Lc. 5.17-26)

## 2

<sup>1</sup> Te ni cuu jecu quīvi, te ni quīvi tucu Jesús ñuu Capernaum. Te ni cajini ñayuu jeē néne ya vehe.

<sup>2</sup> Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jñuhun Yaā Dios nuū i.

<sup>3</sup> Yūcuán na te ni quecoo cuūn tēe nuū yā, cándiso de ñn tēe ndóho cuehyi ni jín.

<sup>4</sup> Te tu ní cúu quīvicoo de nuū yā siquī jeē chitú ñayuu. Te ni cacao de siquī véhe, te ni canune de ndaā nuū ín ya, te yaū un ní cascúun de tēe cúhú, cáttú de nuū ñn camilla.

<sup>5</sup> Te ni jini Jesús jeē cácandíje de jeē cúu nasávāha ya tēe cúhú un. Te ni cahān yā jín tēe cúhú un:

Séhē, je íne cáhnu ni rī nuū taca cuéchi rō, achí yá.

<sup>6</sup> Te yūcuan cáyúcú jecu tēe cástéén tutu ley Yaā Dios, te tēe un ní cajeni ni de siquī yā:

<sup>7</sup> ¿Naun cáhán tēe yáha súcuan? Cáhán de jñuhun ndevāha jeē quití ni Yaā Dios, chi nasūu Yáā Dios cúu de jeē cóne cáhnu ni de nuū cuéchi.

<sup>8</sup> Te ni jini Jesús jeē súcuan cájeni ni de, te ni cahān yā jín de:

¿Naun cájeni ni rō jeē cahán ndevāha ri?

<sup>9</sup> Jeē uú jñuhun yáha, ¿ndé ñn yí gá cáa? ¿A jéé cahán rī jín tēe cúhú: Je íne

cáhnu ni rī nuū taca cuéchi rō? ¿Chí yí gá jeē cahán rī: Ndocuñi te naquihin rō camilla rō, te caca rō, achi rī?

<sup>10</sup> Te vijna te na stéén rī jeē maá rí, Yaā ní nduu tēe, ndíso jniñu ri ini ñayivi yáha jéé cóne cáhnu ni rī nuū cuéchi.

Yūcuán na te ni cahān yā jín tēe ni jín ún:

<sup>11</sup> Cáhán rī jín rō, ndocuñi te naquihin rō camilla rō, te quinhun rō vehe rō, achí yá jín de.

<sup>12</sup> Yūcuán na te ni ndocuñi-ni tēe ún, te ni naquihin de camilla de, te ni quenda de cuahān de, jito jínúu ndihi ñayuu. Te ndivii i ni canaa ni i cájito i, te ni cacahān i jeē yóhyo vāha Yaā cúu Yaā Dios. Te achí i:

Ná tu coto cuiti yō ni ñn jniñu súcuan, achí i.

*Jeē ní cana ya Leví*

(Mt. 9.9-13; Lc. 5.27-32)

<sup>13</sup> Te ni quenda tucu ya cuahān yā nde yumar. Te taca ñayuu ni jinūcoo i nuū yā, te ni steén yā jñuhun nuū i.

<sup>14</sup> Yūcuán na te ni yāha ya cuahān yā, te ni jito ya nuū Leví séhe Alfeo, néne de nuū cutútú xuhun renta. Te ni cahān yā jín de:

Condiquin ruhū na quíhín yō.

Te ni ndocuñi de, te cuahān de jín yá.

<sup>15</sup> Yūcuán na te ni jehēn yā ni yeji yā staā vehe de. Te cuehē tēe cástútú xuhun renta jín inga tēe cása ha cuéchi, suni cáyúcú de cáyeji de staā jín Jesús jín tēe cáscuáha jín yá, chi íyó cuéhē de jeē cándiquin de ya.

<sup>16</sup> Te tēe cástéén tutu ley Yaā Dios jín tēe grupo fariseo, ni cajito de jeē yéji yā staā jín ndihi taca tēe ún. Te ni cacahān de jín tēe cáscuáha jín yá:

¿Naun yéji maestro rō jín tēe cástútú xuhun renta jín inga tēe cása ha cuéchi? achí de.

<sup>17</sup> Te ni jini Jesús, te ni cahān yā jín de:

Ñayuu cáhīyo vāha, tu jini ñuhún i tēe tájñá, chi ñayuu cácu hū cúu jeē jini ñuhún. Te ruhū nasūu jéé véji ri cana ri ñayuu tú cuéchi, jeē cúu i nájñuhun ñayuu cáhīyo vāha. Chi sa suhva véji

ri cana ri ñayuu cáhīyo cuéchi, jeē na nácani ni i te stóo i cuēchi i. Áchí yá.

*Jeē ní cacajñūhún de ya siquī jeē cóndite ni*

(Mt. 9.14-17; Lc. 5.33-39)

18 Te ni cuu ñin quivī jeē cáhīyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáha jíin Juan jíin jéē cascuáha jíin grupo fariseo, tijni jínu cáhīyo ndite ni de. Te tēe cáscuáha jíin máá ní, ¿naun tu casáha de súcuan?

19 Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu condite ni ñayuu cáhīn vico nándāha, te núu níni néne tēe nándāha? Chi núu néne tēe nándāha, te ma cúu condite ni i.

20 Te quee quivī jeē cújiyo tēe nándāha, te quivī ún chi condite ni i.

21 Te ni cahān yā uū jñūhun yátá siquī jeē tu quíjnāhan jñūhun jeé jéē steén yā jíin táca jñūhun jenahán. Áchí yá:

Ni ñin tu náchuhun ñin pedazo sahma jéé núu ñin sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáhnu ga nuū catáhdé un.

22 Te suni tu cáchuhun vino jeé ini ñi túhú. Chi núu súcuan te vino jeé un ndatá ñi ún, te naa vino jíin ñi. Jeé yúcuan cánuú jéé chúhun i vino jeé ini ñi jéé.

*Jeē ní cataxín de yoco trigo quivī ndétátú*

(Mt. 12.1-8; Lc. 6.1-5)

23 Te ñin quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá, cájica de cuahān de, te ni quejéé de cátaxín de yoco trigo cáyeji de.

24 Yūcuán na te tēe grupo fariseo ni cacahān de jíin yá:

Condéhé. ¿Najehē casáha tēe cáscuáha jíin ró súcuan? Chi áchí ley Moisés jeē ma cúu sáha yó ni ñin jñiñu quivī ndétátú. Áchí de.

25 Te ni cahān máá yá jíin de:

¿A tu ní cácahu cuiti rō tutu ndese ni sáha David, ñin quivī ní cumanī jeē cáji de, te ni jíi de sōco jíin tēe cáhīn jíin de?

26 Te ni quivī de ini vehe Yaā Dios. Te Abiatar ni cuu sutū cujéhnu ga. Te ni yeji de pan i jeē yosó ndijin nuū Yaā Dios. Te tú na ley jeē cáji ni ñin tēe, chi máá-ni sutū cuu caji. Te suni ni jēhe de ni cayejí tēe cáhīn jíin de. Te tú na cuēchi ní íyo siquī de. Áchí yá.

27 Te suni ni cahān yā jíin de jíjnāhan de:

Tu ní jéconā ñayuu jeē ndóho i nuū quivī ndétátú, chi ni jeconā quivī un jéē ndétátú i.

28 Núu súcuan te ruhū, Yaā ní nduu tēe, máá rí cúu jeē ndácu jñiñu siquī ndese sáha ñayuu quivī ndétátú, áchí yá.

*Jeē ní nduvāha tēe ni ichī ndaha*  
(Mt. 12.9-14; Lc. 6.6-11)

### 3

1 Te ni quivī tucu Jesús ini vehe i sinagoga. Te yūcuan íne ñin tēe ni ichī ñin ndaha de.

2 Te tēe grupo fariseo cájito yuhu de ya núu nasávāha ya tēe un quivī ndétátú, návāha nihīn de cuēchi siquī yá.

3 Yūcuán na te ni cahān yā jíin tēe ni ichī ndaha ún:

Ndocuñi te condichi rō mēhñu yáha, áchí yá.

4 Te ni cajñūhun yá de jíjnāhan de:

¿Ndese cáhān ley siquī quivī ndétátú? ¿A jéē sáha vāha yó, chí sáha néé yó? ¿A jéē nasávāha yó ñayuu je yajni cuu, chí sáha yó jéé cúu i? áchí yá.

Te máá de tú na vé ni cacahān de.

5 Te ni quivī ni yā ni jito ya nuū de jíjnāhan de, te ni cucuíhyá ni yā jeé níhni ni de. Te ni cahān yā jíin tēe ni ichī ndaha:

Scáá ndaha ró.

Te ni scaá de, te ni nduvāha-ni ndaha de.

6 Yūcuán na te ni quendacoo tēe grupo fariseo, te ni casquíjnāhan de jñūhun jíin tēe grupo Herodes siquī yā, ndese cahni de ya.

*Jeē ní quecoo cuehē ñayuu nuū yā yumar*

<sup>7</sup> Te Jesús cuahān yā nde yumar jíin tée cáscuáha jíin yá. Te cuehē ñayuu región Galilea ni candiquin i ya.

<sup>8</sup> Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi nuū cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jnūhun i jniñu jéhnū ni sáha ya, te ni quecoo i nuū yā.

<sup>9</sup> Te ni cahān yā jíin tée cáscuáha jíin yá jeē na cóo tūhva ñin barco quiví ya, návāha ma chitú níhin ñayuu cuehē ún xiin ya.

<sup>10</sup> Chi cuehē ñayuu je ni nasávāha ya, te jeē yúcuān vējicoo cuehē gā ñayuu cándoho tāca nuū cuehyī, te chitú níhin i xiin ya jeē quehé i ya cáconi i.

<sup>11</sup> Te ñayuu cáñuhun tachī ini, núu ni cajito nuū yā, te cájecuñi yití nuū yā, te cácana cóhó:

Máa ní cóo Sēhe Yaā Dios, achí.

<sup>12</sup> Te ni ndacu níhin ya nuū tachí un jēe ma cáhān gā jeē cóo ya Sēhe Yaā Dios.

*Jeē ní nacāji ya uxī uū tēe apóstol  
(Mt. 10.1-4; Lc. 6.12-16)*

<sup>13</sup> Yūcuān na te ni caa ya cuahān yā ñin yucu. Te ni cana ya tāca tée jeē cuní máa yá caca jíin yá, te ni quecoo de nuū yā.

<sup>14</sup> Te ni jeni ya uxī uū de jeē cuñi de jíin yá, te tají yá de quingoo de nacani de jnūhun.

<sup>15</sup> Te ni sáha ya jeē cóndiso jniñu de nasávāha de ñayuu huhú te quenehen de tachī ini ñayuu.

<sup>16</sup> Te yāha cóo ndihúxí uū tēe jeē ní nacāji ya: Simón jeē ní nasnání yá de Pedro.

<sup>17</sup> Te Jacobo jíin ñani de Juan, sēhe Zebedeo. Te ni nasnání yá ndindúu de Boanerges, jeē cuní cahān: Tēe yíhi fuerza nacani jnūhun, nájnūhun yíhi fuerza taja.

<sup>18</sup> Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista,

<sup>19</sup> jíin Judas Iscariote, tēe jeē ní nastúu de ya.

*Jeē ní cacahān ñayuu jeē jejniñu ya fuerza Satanás*

*(Mt. 12.22-32; Lc. 11.14-23; 12.10)*

Yūcuān na te ni quiví ya ñin vehe jíin tée cáscuáha jíin yá un.

<sup>20</sup> Te ni ndutútú tucu cuehē ñayuu, te ni tuá ni cóo caji yā staā jíin de.

<sup>21</sup> Te tāca jnāhan vehe ya ni cajini jnūhun jeē súcuān cóo. Te ni quecoo de venūquihin de ya. Chi cácahān de jeē ní sana xiní yā.

<sup>22</sup> Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yāha ñūhun Satanás ini de, jeē cujéhnū nuū tachí. Te jíin fuerza un quénehen de tachí, achí de.

<sup>23</sup> Te ni cana ya de jíjnāhan de, te ni cahān yā ñin jnūhun yátá jíin de:

¿Ndese cuu quenehen Satanás máa?

<sup>24</sup> Chi núu ñin nación sásin máa te cuajnáhan máa, nación un má cóo ga coyūcu cáhnu.

<sup>25</sup> Te núu ñayuu ñin vehe sásin máa te cuajnáhan máa, ñayuu un má cóo ga coyūcu cáhnu.

<sup>26</sup> Te suni súcuān Satanás jíin jnāhan tachí, chi núu sásin máa te cuajnáhan máa, núu súcuān te ma cóo ga, chi sa suhva naa.

<sup>27</sup> Te ni ñin tēe ma cóo quiví de ini vehe tēe ndacuī jeē quenehen de ndajniñu de. Chi cánuú jeē xíhna gā cuhni de tēe ndacuī ún. Te suni súcuān cóo jeē jíhni rī Satanás te quénehen rī tachí.

<sup>28</sup> Te jendaá cahān rī jíin ró jeē iyó modo coo jnūhun cáhnu ni nuū tāca cuéchi cása ha ñayuu, te suni nuū tāca jnūhun néé cácahān i.

<sup>29</sup> Te núu cahān ndevāha i siquī Espiritu Santo, te ma cóne cáhnu ni Yaā Dios nuū i, chi sa suhva condee cuéchi siquī i ní cáni, achí yá.

<sup>30</sup> Súcuān ni cahān yā, chi ni cacahān i jeē quénehen ya tachí jíin fuerza Satanás.

*Náná yā jíin ñani yā*

*(Mt. 12.46-50; Lc. 8.19-21)*

<sup>31</sup> Yūcuán na te ni quee naná yā jíin táca ñani yā. Te íin ña nuū quéhe, te ni tají ña jnūhun cuahān nuū yā jeē cána ña ya.

<sup>32</sup> Te ñayuu cáyūcu ní xiin ya, ni cacahān i jíin yá:

Náná ni jíin táca ñani ni cáhīin nuū quéhe, te cácuni cahān jíin ní, áchí i.

<sup>33</sup> Te ni cahān maá yá:

¿Ndé ñin cúu náná rī jíin ñani rī? achí yá.

<sup>34</sup> Yūcuán na te ni ndacoto ya nuū ñáyuu cáyūcú xiin ya ún, te ni cahān yā:

Suni náná rī jíin ñani rī cácuu táca ñáyuu yáha.

<sup>35</sup> Chi táca ñáyuu casquícu jniñu cúní Yaā Dios, suu cácuu ñani rī, cuāha ri, náná rī, achí yá.

*Jnūhun yátá síquī tēe jéte trigo*  
(Mt. 13.1-9; Lc. 8.4-8)

#### 4

<sup>1</sup> Te yumar ni quejéé tucu Jesús steén yā jnūhun. Te ni cutútú cuehē ndasí ñáyuu nuū yā, te jeē yūcuán ní quívi ya ni cucōo ya ini ñin barco nuū mar. Te táca ñáyuu un cáyūcú i yumar.

<sup>2</sup> Te jíin jnúhun yátá ni steén yā cuehē jnūhun nuū i, te súcuan ni cahān yā:

<sup>3</sup> Cuni nahín jíjnáhan ró: ñin tēe cate trigo, ni quenda de jeē cáte de.

<sup>4</sup> Te ná ni quejéé de jéte de, te jecu trigo ni jítē yuhíchi. Te ni quecoo saa, ni cayejí tī.

<sup>5</sup> Te jecu gā trigo ni jítē nuū ñúhun yuū, nuū tú cuehē ñuhun. Te yachī-ni ni cane, chí tu cóquin ñuhun.

<sup>6</sup> Te nuū ní cane niāndii, te ni ichī-ni, te ni casun, chí tu ní níhín nuū quihín yoho.

<sup>7</sup> Te jecu gā trigo ni jítē nuū náne iñu. Te ni jehnu iñu ún, te ni jesi nuū, te tu ní jéhe nunī.

<sup>8</sup> Te jecu ni jítē nuū ñúhun váha. Te ni cane, te ni jehnu, te ni jéhe cuehē nunī. Sava ni jéhe ocō uxī jeē ñin ñin nunī, te sava ga ni jéhe unī xico, te sava ga ni jéhe ciento. Achí yá.

<sup>9</sup> Yūcuán na te ni cahān yā jíin de:

Tāca róhó jéē jíini sōho, na chúsóhó ró. Achí yá.

*Najehē cahán yā máni jnūhun yátá*  
(Mt. 13.10-17; Lc. 8.9-10)

<sup>10</sup> Yūcuán na te ni quendōo máa na yā, jíin ndihúxí uū tēe cáscuáha jíin yá, jíin jecu gā ñayuu cáhīin jíin de. Te ni cacajnúhún de ya na vé cuní cahān jnūhun yátá un.

<sup>11</sup> Te ni cahān yā jíin de:

Róhó, chí sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhīin sún síquī, chí máni jíin jnúhun yátá cáhán rī táca jnúhun jíin i.

<sup>12</sup> Súcuan cáhán rī návāha vēsú cájito i, te quendōo i nájnūhun jeē tú na vé ni cájito i. Te vēsú cájini sōho i, te ma jécūhun ni i, te ma násama ini i quívicoo i nuū rī, te ma cóo jnūhun cáhnu ni nuū cuéchi i, áchí yá.

*Jeē ní castūhun cájí yá jnūhun yátá tēe jéte trigo*

(Mt. 13.18-23; Lc. 8.11-15)

<sup>13</sup> Te ni cahān gā yā jíin de jíjnáhan de:

Núu tu cájecūhun ni rō jnūhun yátá yáha, ¿te ndese jecūhun ni rō táca gā jnūhun yátá núu súcuan?

<sup>14</sup> Tēe jéte trigo cúu tēe scuité núu jnūhun Yaā Dios.

<sup>15</sup> Te trigo jeē ni jítē yuhíchi cúu nájnūhun ánuá sava ñayuu. Chí cájini nahín i jnūhun ya, te ná ni cajini i, te quíji-ni Satanás te quénde-ni jnūhun ini anuá i.

<sup>16</sup> Te trigo jeē ni jítē nuū ñúhun yuū, chí cúu nájnūhun ánuá sava ñayuu cájini nahín jnúhun, te yachī-ni cájetáhú i te cácusī ni i jíin.

<sup>17</sup> Te tu cúcutú jnúhun ún ini anuá i, te jecu-ni quívi cájetáhú i. Te núu ni quejéé jnúndóho, chí jító xeēn ñayuu i síquī jnúhun ún, te quejéé nácani yátá ni i.

<sup>18</sup> Te jeē ni jítē nuū náne iñu cúu nájnūhun jecu gā ñayuu. Chí vēsú ni cajini sōho i,

<sup>19</sup> te cándihvī ni i síquī jeē iyó ini ñayívi yáha. Te cácuni i cucúcá i, te

stáhú un i jeē cutóó ni i siquī tāca ndajniñu. Te ndihī jeē yáha cácuñeñu i jíin, te jési nuū jnúhun ya, te tu íje i jíin jnúhun ya.

<sup>20</sup> Te trigo jeē ni jítē nuū ñúhun váha cúu nájnūhun ñayuu cájini nahín jnúhun, te cájetáhú i, te cáhije i jíin jnúhun ya. Te sava i cúu nájnūhun nunī jeē jéhe ocō uxī jeē ñn ñn, te sava i jéhe unī xico, te sava ga i jéhe ciento. Achí yá.

*Jnúhun yátá síquī lámpara  
(Lc. 8.16-18)*

<sup>21</sup> Suni ni cahān yā jíin de:

Núu nástín ñayuu ñn lámpara, ¿a chúne i chíji ñn cajón chí chíji jito? Tuú, chí jéni i nuū sucún návāha cundijin.

<sup>22</sup> Te suni súcuan, tu íyó ni ñn jnúhun sāhi jéē ma cúni ñayuu, chí ndihī tāca jnúhun natūu ndijin te cuni ñayuu.

<sup>23</sup> Tāca róhó jéē jíni sōho, na chúsóhó ró, áchí yá.

<sup>24</sup> Te suni ni cahān yā jíin i:

Cuni sōho váha ró. Chí cūhva jeē chusóhó ró jnúhun Yaā Dios, suni cūhva un cuáha ya nuū rō, te víhyá gā cuáha ya nuū maá ró jeē chusóhó váha ró.

<sup>25</sup> Chí ñayuu je jécūhun ni, stéén gā yā nuū i. Te ñayuu tu cándíje, máá jecu jeē jíni i ún, sa suhva naa. Achí yá.

*Jnúhun yátá síquī trigo jeē jénu*

<sup>26</sup> Te ni cahān gā yā:

Súcuan cúu jeē ndácu Yaā Dios jniñu nuū ñayuu: Cúu nájnūhun trigo jeē ní jete ñn tēe.

<sup>27</sup> Yūcuán na te quíxí de te ndónnda de, te súcuan jíca quívī cuahān. Te trigo un cáne te jénu. Te máá de tu jíni de ndese cúu jeē jénu.

<sup>28</sup> Chí máá ñuhun sāha jeē jénu trigo, xīhna gā yucū, sáá te cáne yoco, yūcuán na te íje máá núnī.

<sup>29</sup> Te núu ni cuaan trigo un, te quéjéē ñayuu cájehnde i, chí je ni jinū quívī tahndé. Achí yá.

*Jnúhun yátá síquī ndiquin mostaza  
(Mt. 13.31-32; Lc. 13.18-19)*

<sup>30</sup> Te suni ni cahān yā:

Na cáhán rī ñn jnúhun yátá návāha cuni rō ndese ndúcuehē ñayuu jeē ndácu Yaā Dios jniñu nuū.

<sup>31</sup> Ndúcuehē i nájnūhun jénu ñn ndiquin mostaza jeē jéquin i nuū ñúhun. Te yūcuán cúu ñn ndiquin lúlí gá vēsú tāca ndiquin jeē iyó.

<sup>32</sup> Te ná ni jequin i, te cáne te jénu ga vēsú tāca gá yucū, te cúnáhnū ndaha. Te tāca saa chí sāha tī tacā tī nuū cuándahū xinī ún. Achí yá.

*Jeē máni jnúhun yátá cáhán yā jíin i  
(Mt. 13.34-35)*

<sup>33</sup> Te cuehē jnúhun yátá súcuan ni cahān yā jíin ñayuu, núu nasaa cánda i jecūhun ni i.

<sup>34</sup> Te tāca jéē ni stéén yā, máni máá jnúhun yátá ní cahān yā jíin i. Te nuū tēe cáscuáha jíin yá chí ni nacastūhun cájí yá jnúhun ún.

*Jeē ní jecuññ tachī níhin jíin mar ni  
sáha ya  
(Mt. 8.23-27; Lc. 8.22-25)*

<sup>35</sup> Te jeē cuácuaa quívī ún, te ni cahān yā jíin tēe cáscuáha jíin yá:

Na yáha yó quíhñ yō inga lado mar, achí yá.

<sup>36</sup> Te ni casquéndōo de ñayuu cuehē ún, te ni quívīcoo de ini barco nuū je íne Jesús, cuango de jíin yá. Te suni cuango jecu gā barco jíin de jíjnáhan de.

<sup>37</sup> Te ni jequññ ñn tachī níhin, te ni stónnda ndute mar, te ni quívī ini barco. Te je yajni chítú ndute ini barco.

<sup>38</sup> Te Jesús catú yá yatā de ini barco, quíxí yā te yíhi ñn sahma cástíhi xinī yā. Te ni castónnda de ya, te ni cacahān de:

Maestro, ¿á tu sāha ní cuenta jeē quēe yó chíji ndute te cuu yō? achí de.

<sup>39</sup> Te ni ndocuññ yā, te ni cahān yā nuū tachí níhin un jíin núu mar:

Jecuññ te nayúú-ni coo ró, áchí yá.

Te ni jecuññ tachī, te ni cuu nayúú í-ni.

<sup>40</sup> Te ni cahān yā jíin de jíjnáhan de:

¿Naun cáyūhú ndasí ró? ¿Naun tu cácandíje ró jéē cácu ró sāha rí?

41 Te yōhyo ni cayūhú de, te ni cacahān de jíin jnāhan de:

¿Ndé ñin ga cúu tēe yáha jéē nde tachī níhin jíin mar cájetáhú jéē cahán de? áchí de.

*Tēe Gadara jeē ndóho tachī  
(Mt. 8.28-34; Lc. 8.26-39)*

## 5

1 Te ni jinū Jesús jíin de jíināhan de inga lado mar, región Gadara.

2 Te ná ni quenda ya ini barco un, te ñin tēe ñúhun tachī ini, ni quenda de nde nuū yíndūji ndīyí, te ni quee de nuū yā.

3 Tēe un ndéé de nuū yíndūji ndīyí. Te tu jéjníñu jeē jíhni ñayuu de, ni jíin cadena.

4 Chi cuehē jínu ni conuhnī jehē de ndaha de jíin cadena. Te tāca jínu jéhnde de, te sácuéché de. Te tú ni ñin cúndeyí jíin de.

5 Te nduú ñuú jíca de yucu jíin núu yíndūji ndīyí, te cána cóhó de, te stújí de máa de jíin yúu.

6 Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā.

7 Te ni cana cóhó de:  
¿Naun vēji ní núu ná, Jesús Sēhe Yaā Dios, Yaā cujéhnu téyí? Cáhán ndahú ná jíin ní, jíni nahín Yaā Dios, ma stóho ní sáña, áchí de.

8 Súcuán ni cahán de, chi je ni cahán Jesús:

Táchī, quenda ini tēe yáha quíhñ rō.

9 Te ni cajnúhun yá de:

¿Na vé naní ró?

Te ni cahán de:

Legión naní ná, chi cuehē tachī ñúhun ini ná, áchí de.

10 Te ni cahán ndahú ndasí de jíin yá jeē ma tájí yá tachī quendacoo región ún.

11 Te yajni yucu yúcuán cáhñin cuehē quíñi cájitu ti.

12 Te tachī jeē ñúhun ini tēe un ní cacahán ndahú jíin yá:

Núu tají ní sáñá, te cuāha ní jnúhun quíñi ná ini quíñi yūcuán, áchí.

13 Te Jesús ni jēhe ya jnúhun. Te ni quendacoo tachī ún ini tēe ún, te

ni quíñi ini quíñi, te íyó nájnūhun uū mil tí. Te quíñi un ní cajinu ti ni ñingoo ti ñin yucáva, ni quíñi nuū mar. Te ni ndaquíñi ti ndute, ni cajihí tí.

14 Te tēe cándito ti, ni cajinu de cuangoo de jeē ní cayūhú de. Te ni jinūcoo de ni cacastūhún de nuū ñáyuu ñuu un jíin ñáyuu tāca rancho. Te cuangoo ñáyuu un cuácondēhé i na vé ni cuu.

15 Te ni jinūcoo i nuū íne Jesús, te ni cajito i nuū tēe ni ñuhun cuehē tachī ini. Te néne de, te ñúhun de sahna, te je ni nducájí xíní de. Te ni cayūhú ñáyuu ún.

16 Te tēe ní cajito, ni canacani de jnúhun nuū ñáyuu, ndese ni nduvāha tēe ni ñuhun tachī ini, jíin ndese ni candoho quíñi ún.

17 Yūcuán na te ni caquejéé i cácahán ndahú i jíin yá jeē na cújiyo ya región yūcuán quíhñ yā.

18 Te ni ndīvi ya ini barco. Te tēe ni ñuhun tachī ini un ní cahán ndahú de jíin yá jeē na cuāha ya jnúhun quíhñ de jíin yá.

19 Te Jesús tu ní jēhe ya jnúhun, chi ni cahán yā jíin de:

Cuánhun vehe ró núu jnāhan ró, te nacani ró jnúhun nuū i ndese yōhyo jéhnu jniñu ni sáha máa Jítoho rō jíin ró, te ndese ni cundáhú ni yā rohó, áchí yá.

20 Te ni quenda de cuahán de, te ni quejéé de nácani de jnúhun tācá ñuu Decápolis ndese yōhyo jéhnu jniñu ni sáha Jesús jíin de. Te ndivii ñayuu un ní canaa ni i cájini nahín i.

*Jnúhun sēhe sáñi Jairo jíin ñahan ní quehé yusáhna ya*

*(Mt. 9.18-26; Lc. 8.40-56)*

21 Te ni nayāha tucu Jesús cuanuhun yā inga lado mar jíin barco. Te ni quecoo cuehē ñayuu nuū yā, nuū íne ya yumar.

22 Te ni quee ñin tēe cújéhnu ini vehe ñi sinagoga, naní de Jairo. Te ná ni jito de nuū yā, te ni jecuiñī yití de nuū jehé yā.

23 Te ni cahán ndahú ndasí de jíin yá:



Sēhe s̄hí ná je yajni cuu i. Na quíhín yō vehe ná te soó ní ndaha ní síquī i návāha na ndúvāha i te cotecu i, áchí de.

<sup>24</sup> Yūcuán na te cuahān yā jíin de. Te cuehē ñayuu cándiquīn i ya, te ni chitú níhin i xiin ya cuango i.

<sup>25</sup> Te mēhñu ñáyuu un cuáhān ññahan cúhú, jeē ní cuu uxī uū cuiyā ndóho ña cuehyī niñī.

<sup>26</sup> Te yōhyo ni ndoho ña, chi ni jexin ña tāca jéē névāha ña jíin cuéhē tēe tájná, te tu ní jéjñíñu jeē ndúvāha ña, chi sa suhva víhyá gā sáha.

<sup>27</sup> Te ñahan yáha ná ni nihīn ña jñūhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya.

<sup>28</sup> Chi ni jeni ni ña: Vēsú maá sahma ya na níhín rī quehé rí, te nduvāha ri, jéni ni ña.

<sup>29</sup> Te ni jecuiñī-ni niñī ña, te ni jini ña jeē ní nduvāha ña cuehyī ún.

<sup>30</sup> Te Jesús ni jini yā jeē ní nduvāha ññayuu jíin fuerza yā. Te ni ndió cóto ya nuū ñáyuu cuehē, te ni cahān yā:

¿Ndé ññ ni quehé sahma ri? Achí yá.

<sup>31</sup> Te tēe cáscuáha jíin yá, ni cacahān de:

Jíto ní jéē ñáyuu cuehē yāha ní chitú níhin i xiin ní te cáquīhi i níhín ní cáni ichi, te cájnūhun ní ndé ññ ni quehé sahma ní.

<sup>32</sup> Te máá yá jíto ya cháha chúcuan, cúni yā jeē na cáchi ñayuu ni sáha.

<sup>33</sup> Te ñahan un yúhú ña te quísi i ña, te je jíni ña jeē ní nduvāha ña. Te ni quee ña, te ni jecuiñī yití ña nuū yā, te ni cachi ña ndihi ndese ni cuu jíin ña.

<sup>34</sup> Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuán ní nduvāha ró. Cuáhán te na ndúsī ni rō, chi je ni nduvāha ró cuehyī ní ndoho ró, áchí yá.

<sup>35</sup> Te níni cáhán gā yā súcuan, te ni quecoo ñayuu cáyūcú vehe tēe cújéhnu ini vehe ññ sinagoga, te ni cacahān i jíin de:

Je ni jihī sēhe s̄hí ní. Te ma sajnēñu ga ní Maestro, achí i.

<sup>36</sup> Te Jesús tu ní sáha ya cuenta jeē súcuan cácahān i, te ni cahān yā jíin tēe cújéhnu ini vehe ññ sinagoga:

Ma yūhu ró, chi candíje ró jéē nastécu rī i, áchí yá.

<sup>37</sup> Te tu ní jéhe ga yā jñūhun condiquīn ñayuu yā, chi máá-ni Pedro jíin Jacobo, jíin Juan ñani Jacobo.

<sup>38</sup> Te ni jinū yā vehe tēe cújéhnu ini vehe ññ sinagoga, te ni jito ya ñayuu, cácuvaā i, te cándahyū i, te cácana cóhó i.

<sup>39</sup> Te ni quívi ya, te ni cahān yā:

¿Najehē yōhyo cásvaā rō te cándahyū rō? Sūchi s̄hí yáha, tu ní jíhí i, chi quíxí-ni i, áchí yá.

<sup>40</sup> Te ni cajecū catá i jeē ni cáhān yā. Te ni quenehen ndihi ya i cuahān i nuū quehé. Te ni cana ya máá-ni tátá jíin náná sūchi s̄hí un, jíin tēe cáhīin jíin yá, te ni quívi ya jíin de nuū catú súchi s̄hí ní jihī ún.

<sup>41</sup> Te ni jññ ya ndaha i, te ni cahān yā jíin i:

Talita cumi, achí yá. Te jñūhun un cúni cahān: S̄hī, cáhán rī jíin ró, ndocuiñī, achí yá.

<sup>42</sup> Te ni ndocuiñī-ni sūchi s̄hí un, te ni nacaca i, chi je íyó i uxī uū cuiyā. Te yōhyo ni canaa ni ñayuu cájito i.

<sup>43</sup> Te ni ndacu níhin ya jññ nuū i jíjnáhan i jeē ma cáchi cuítī i nuū ni ññ. Te ni cahān yā jeē na cuáha ña jeē cáji sūchi s̄hí.

*Jeē cuánuhun yā ññ Nazaret  
(Mt. 13.53-58; Lc. 4.16-30)*

## 6

<sup>1</sup> Te ni quenda Jesús yūcuán, te cuanuhun yā ññ yā. Te tēe cáscuáha jíin yá cuango de jíin yá.

<sup>2</sup> Te máá quívi ndétātu ní steén yā jñūhun ini vehe ññ sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tēe yáha tāca jñūhun yáha? ¿Te ndese cúu jeē cahán de jñūhun ndíhí yáha jíin jéē sáha de jññ jéhnu yáha?

<sup>3</sup> Chi tēe yáha cúu carpintero, te sēhe María cúu de, te ñani Jacobo jíin José

jiín Judas jiín Simón cúu de. Te suni cáyūcu cuáha de jiín yó yāhá. Achí i.

Te súcuan ni cacujéē ni i nuū Jesús.

<sup>4</sup> Te ni cahān yā jiín i:

Tāca tēe nācani jnūhun Yaā Dios, íyó yíñúhún ñayuu jiín de, chi máni ñayuu ñuu maá de, jiín jnāhan de, jiín ñáyuu vehe de cúu jeē tu íyó yíñúhún jiín de. Achí yá.

<sup>5</sup> Te tu ní cúu sáha ya cuehē jniñu jéhnū yūcuán. Chi jecu-ni ñayuu cácuhū ni soó yá ndaha ya siquī i, te ni nasávāha ya i.

<sup>6</sup> Te náā ni yā jito ya jeē tu cácuandíje ñayuu jijnāhan i. Yūcuán na te ni jica cuu ya tācá ñuu yajni, ni steén yā jnūhun.

*Jeē ní tají yá ndihúxí uū de cuanacani de jnūhun*

*(Mt. 10.5-15; Lc. 9.1-6)*

<sup>7</sup> Te ni cana ya ndihúxí uū tēe cáscuáha jiín yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachī ini ñayuu.

<sup>8</sup> Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xūhún. Chi máá vara-ni condahá de.

<sup>9</sup> Te quihí de ndijēn, te ma quihín de jiín úu sahma, achí yá.

<sup>10</sup> Te suni ni cahān yā jiín de:

Na-ni vehe núu ni quivícoo ró, te yūcuán coyūcu ró ndé quenda tucu ró quihín rō inga ñuu.

<sup>11</sup> Te núu ñn ñuu tu cájetáhú i róhó, ni tu cúní i cuni nahín i jnūhun cahān rō, na quéndacoo ró yūcuán, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. Jendaá cahán rī jiín ró jeē quiví coo juicio te xeēn gā coo castigo siquī ñuu cásaáha súcuan vésú siquī ñuu Sodoma jiín ñuu Gomorra nuū ní casáha ndasí ñáyuu cuéchi.

<sup>12</sup> Te ni quendacoo de cuahān de, te ni canacani de jnūhun jeē na nācani ni ñayuu jeē stóo i cuéchi i.

<sup>13</sup> Te suni ni caquenehen de cuehē tachī ini ñayuu. Te ni cachihí de aceite

cuehē ñayuu cácuhū, te ni canduvāha i.

*Jeē ni jhī Juan tēe scuándute*  
*(Mt. 14.1-12; Lc. 9.7-9)*

<sup>14</sup> Te rey Herodes ni jini jnūhun de jnūhun Jesús, chi ni jitē núu jnūhun ya ñí cáhnu. Te ni cahān de:

Tēe yūcuán cúu Juan tēe ni scuándute, te ni natecu de. Jeē yūcuán íyó poder de sáha de jniñu jéhnū. Achí de.

<sup>15</sup> Te sava ga ñayuu ni cacahān i:

Tēe un cúu Elías jeē ní nacani jnūhun jenahán.

Te sava ga i ni cacahān:

Tuú chi ñn tēe nācani jnūhun Yaā Dios cúu de, nājnūhun tēe ni canacani jnūhun ya nde jenahán, achí i.

<sup>16</sup> Te ná ni jini Herodes, te ni cahān de:

Tuú chi yūcuán cúu Juan jeē ní ndacu ri jniñu ni tahndē xiní, te ni natecu de núu súcuan, achí de.

<sup>17</sup> Chi máá Herodes ni ndacu de jniñu jeē na quiví Juan vecāa, jiín jé na cónuhni de jiín cadena. Súcuan ni sáha de jeē siquí Herodías, ñasihí ñani de Felipe. Chi Herodes ni quihin de ña jeē cúu tucu ña ñasihí de.

<sup>18</sup> Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

<sup>19</sup> Te jeē yūcuán Herodías ni jito uhū ña Juan, te cúní ña jeē na cúu de, te tu ní níhín ña modo.

<sup>20</sup> Chi Herodes yúhú de cahni de Juan, chi jíní de jeē tēe ndaā tēe ndoo cúu Juan. Te jeē yūcuán ní jesi de jeē nducú ña jeē cúu Juan. Te nújnahan ni de jini nahín de jnūhun cáhán Juan, vésú tu jécūhun vāha ni de.

<sup>21</sup> Te ni quee ñn quiví jeē ní cundeyí Herodías. Chi ni sáha Herodes ñn vico quiví ní cacu de, te ni jēhe de jeē ní cacuxíni tēe cándiso jniñu nuū de, jiín tēe cácuu capitán, jiín tēe cacujéhnū región Galilea.

<sup>22</sup> Te ni quiví sēhe síhí máá Herodías, ni jita jéhé i nuū chitú un. Te ni cacusí ni rey Herodes jiín tēe cacuxíni jiín de. Te ni cahān de jiín súchi síhí un:

Cacān na vé cuní rō, te cuāha ri nuū rō, achí de.

<sup>23</sup> Te ni cahān teyí de jeē cuáha de núu na vé cuní i cacān i, vēsú nde sava región jeē yíhi ndaha de.

<sup>24</sup> Te ni quenda i, ni jecajñuhún i naná i:

¿Na vé cacān na núu de? áchí i.

Te ni cahān ña:

Xinī Juan tēe scuándute cacān rō nuū de, achí ña.

<sup>25</sup> Yūcuán na te ni ndīvi-ni i nuū rey, te ni cahān i:

Cúní na jēe vijna ñuhún-ni cuāha ní xinī Juan tēe scuándute, cone nuū ñn cohō, achí i jíin de.

<sup>26</sup> Yūcuán na te ni cucuíhyá ndasí ni rey un jeē ní cundeyí Herodías jeē cúu Juan. Te siquī jeē ni jéjnūhun téyí de, jíin jēe ní cajini sōho tēe cáyeji staā jíin de, jeē yúcuán tu ní cúní de sásáhán de jeē ni jícān i.

<sup>27</sup> Te ni tají-ni de ñn soldado jeē quíquihin de xinī Juan.

<sup>28</sup> Te ni jehēn soldado un vecāa, te ni jehnde de xinī Juan. Te ni quee de jíin xinī Juan, íne nuū ñn cohō. Te ni jēhe de nuū sūchi síhí un, te máá i ni jēhe i nuū naná i.

<sup>29</sup> Te tēe cáscuáha jíin Juan ni canihín de jnūhun, te ni jengoo de, ni candonehen de yiquí cúñu Juan, te ni cachindūji de.

*Jeē ni scáji yā uhūn mil tēe*

*(Mt. 14.13-21; Lc. 9.10-17; Jn. 6.1-14)*

<sup>30</sup> Yūcuán na te tēe cácuu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā tācá jniñu ni casáha de, jíin jnūhun ni castéén de.

<sup>31</sup> Te ni cahān yā jíin de:

Na quíngoo yó ñn lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jíin de.

<sup>32</sup> Yūcuán na te ni quīvi ya ñn barco jíin táca tēe apóstol un, te cuangoo sñn ya jíin de ñn lugar nuū tú ñayuu.

<sup>33</sup> Te cuehē ñayuu ni cajito i jeē cuahán yā jíin de, te ni canacuni i jeē máá yá cúu. Te nde tācá ñuu ni

quendacoo i, te yachī cuangoo i, te xīhna gā i ni jinūcoo vēsú maá yá.

<sup>34</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájñūhun lanchi jeē tú jito ho tē. Te ni steén yā cuehē jnūhun nuū i.

<sup>35</sup> Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu.

<sup>36</sup> Núu súcuán te tají ní ñayuu na quíngoo i tāca rancho jíin ñuu yajni, te cuaan i staā caji i, chi tú na vé cándiso i caji i, achí de.

<sup>37</sup> Te ni cahān Jesús jíin de:

Cuāha máá ró jeē cáji i, achí yá.

Te ni cacahān de:

¿Te ndese cuu? Chi ni ma cúu vēsú núu quicuaan ná ndé uū ciento denario staā caji ñayuu, achí de.

<sup>38</sup> Te ni cahān yā jíin de:

¿Nasaa staā cánevāha ró? Cuacondēhe, achí yá.

Te nuū ní cajini de, te ni cacahān de:

Uhūn-ni staā jíin úu chācá íyó, achí de.

<sup>39</sup> Yūcuán na te ni cahān yā jíin ñayuu jeē na cúcōo sñn i cuenta grupo nuū íte.

<sup>40</sup> Te ni cacucōo sñn ciento ciento i, jíin cincuenta cincuenta i.

<sup>41</sup> Te ni quihin ya ndihúhún staā jíin úu chācá un, te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá, te máá de ni casaja de nuū ñayuu cuehē ún. Te suni ni jēhe ya ndīndúú chācá, ni casaja de nuū i.

<sup>42</sup> Te ndīvii i ni cayeji, te ni candutú chíji i.

<sup>43</sup> Yūcuán na te ni canastútú de pedazo staā jíin chāca jēe ní quendōo, te ni chitú úxī uū jīca.

<sup>44</sup> Te tēe ni cayeji, chi uhūn mil de cúu.

*Jeē ní jica jéhé yá nuū mar*

*(Mt. 14.22-27; Jn. 6.16-21)*

<sup>45</sup> Yūcuán na te ni cahān-ni Jesús jíin tēe cáscuáha jíin yá jeē na quívicoo

de barco, te cosnūú de yāha de inga lado mar ñuu Betsaida. Te máá yá chi natajǎ yá ñayuu quinhun i, te sáá te suni quihīn yā.

<sup>46</sup> Te nuū ní cuu ni natajǎ yá i, te ni caa ya yucu cuacacān tahu yā.

<sup>47</sup> Te jeē ní cuaa, te barco un je ni cuu sava nuū mar cuahān, te máñuhún-ni ya ni quendōo nuū ñuhun íchi.

<sup>48</sup> Te ni jito ya jeē yóhyo jnūndóho cáscáca de barco, chi nīhin vēji tachī ichi núú de. Te jeē yínee gā ni quee ya nuū de, jíca jéhé yá nuū mar. Te yāha ya nuū de quihīn yā nuú.

<sup>49</sup> Te ni cajito de jeē jíca ya nuū mar, te ni cajeni ni de jeē jihná cúu, te ni cacana cóhó de.

<sup>50</sup> Chi ndihī de ni cajito nuū yā, te ni cayūhú ndasí de. Te ni cahān-ni ya jíin de:

Ndeyǎ coo ni rō, te ma yūhu ró, chi máá rí cúu, áchí yá.

<sup>51</sup> Te ni quǎvi ya ini barco un, te ni jecuiñī-ni tachī. Te yóhyo ni canaa ni de cájito de.

<sup>52</sup> Chi cándāa néé gá jeē níjnūní de, chi ni jíin jniñu jéhu jeē ní nducuehē staā, tu ní cájecūhun ni de jeē maá yá cúu Yaā ní tajǎ Yaā Dios.

*Jeē ní nasávāha ya ñayuu cácuñū región Genesaret*

*(Mt. 14.34-36)*

<sup>53</sup> Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco.

<sup>54</sup> Te nuū ní quenda ya jíin de ini barco, te ñayuu yúcuan ni canacuni-ni i ya.

<sup>55</sup> Te yachī ni jengoo i tācá ndañūū yūcuán, te ni caquindeca i ñayuu cácuñū, cáyosó i nuū camilla, vējicoo ñayuu nuū ní jito i íne ya.

<sup>56</sup> Te ndé-ni cúu-ni núu ni quǎvi ya, núu ñuu lulí, chí ñuu cáhnu, chí rancho, te cájequin i ñayuu cácuñū yuhíchi, te cácahān ndahú i jíin yá jeē na quéhé i vēsú yusáhma ya. Te tāca ñáyuu jeē ní caquehé sahma ya, ni canduvāha-ni i.

*Siquǎ ndese cújnehén ñayuu*  
*(Mt. 15.1-20)*

## 7

<sup>1</sup> Yūcuán na te tē grupo fariseo jíin jecu tē cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús.

<sup>2</sup> Te tē un ní cajito de jeē sava tē cáscuáha jíin Jesús, ni cayejǎ jnehén de staā, chi tu ní cáscuáca de costumbre jeē nándahá de nuū Yaā Dios. Te ni cacahān siquǎ de.

<sup>3</sup> Chi tē fariseo jíin ndihī ñayuu hebreo, névāha i costumbre jenahán jéé ma cáji i staā núu tu nandahá váha i xīhna gā.

<sup>4</sup> Te núu ni ndecoo i jeē ni jéngoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquícú i, nájnūhun jeē ndúndoo taza, tīndohō, cohō cáa, jíin jíto.

<sup>5</sup> Te tē fariseo jíin tē cástéén tutu ley Yaā Dios, ni cacajñuhún de ya:

Tē cáscuáha jíin ró, ¿naun tu cáscuícú de costumbre ñayuu jenahán? Chi sa cáyeji jnehén de staā, achí de.

<sup>6</sup> Te ni cahān yā jíin de:

Ndaā ni nacani Isaías jnūhun siquǎ rō jíin náhan ró jéé tē stáhú-ni cácuu ró. Chi súcuan ni tee de jnūhun ni cahān Yaā Dios nde jenahán:

Ñayuu yáha chi máá yuhu-ni i cájetáhú i ruhū,

te nasūu ndé jíin ini jíin ánuá i.

<sup>7</sup> Te cáchiñuhún sáa-ni i ruhū, chi jnūhun cástéén i cúu jniñu ní candacu tē,

te nasūu jéé ní ndacu máá rí cúu.

Achí Yaā Dios. Achí Isaías.

<sup>8</sup> Súcuan cácuu ró, chi ni casiáá rō jniñu ní ndacu Yaā Dios nuū rō, te cáscuícú ró costumbre jeē ní cajequin ñayuu, jeē ndúndoo tīndohō jíin taza. Te cuehē gā costumbre súcuan cáscuícú ró, áchí yá.

<sup>9</sup> Te suni ni cahān yā:

Casiáá rō jniñu ní ndacu Yaā Dios, návāha squícú ró costumbre ni cajequin máá ró.

<sup>10</sup> Chi Moisés ni cahān de: Cooyíñuhún ró jíin tátá rō jíin náná rō. Te

núu ndé ñn cahān siquī tatá chí síquī naná, na cúu nahín. Achí Moisés.

<sup>11</sup> Te máá ró chí cácahān rō jeē cuu cahān ñn tēe jíin tátá de náná de: Ma cúu chindéé ñáhán ná níhín cuáha na jeē cáji ní jeē cúhun ní, chí ndihí jeē névāha ná, chí Corbán cúu, áchí ró. (Te jnūhun Corbán cuní cahān jeē ní sócō nuū Yaā Dios.)

<sup>12</sup> Te cácahān rō jeē núu súcuan cahān ñn tēe, te tuá cánuú chindéé ñáhán de tátá de náná de.

<sup>13</sup> Te súcuan cástívi ró jniñu ní ndacu Yaā Dios, jeē síquí costumbre ní cajequin ñayuu jenahán vēji. Te cuehē gā jniñu súcuan cásáha ró, áchí yá.

<sup>14</sup> Te ní cana tucu ya ñayuu cuehē ún, te ní cahān yā jíin í:

Cuni sōho vāha ró jíināhan ró, te chuhun ní rō:

<sup>15</sup> Tāca jéé iyó, te núu ní quívi yuhu ñayuu te tu cújnehén í sáha. Chí jeē quénda ini anuá ñayuu, yūcuan cúu jeē cujnehén í sáha.

<sup>16</sup> Tāca rōhó jéé jíini sōho, na chúsóhó ró, áchí yá.

<sup>17</sup> Te ní stóo ya ñayuu cuehē ún, te ní quívi ya ini vehe. Te tēe cáscuáha ún, ní cacajñuhún de ya síquí jnūhun yátá yáha jéé ní cáhān yā.

<sup>18</sup> Te ní cahān yā jíin de:

¿A máá ró suni ná tu jecūhun ní rō, chí naún? ¿A tu cájini rō jeē tāca jéé quívi ini ñayuu, ma cúu cujnehén í sáha?

<sup>19</sup> Chí tu quívi ini anuá í, chí chíjii chí quívi, te quénda-ni cuahān, áchí yá.

Súcuan ní steén yā jeē tāca jéé yéji ñayuu, tu cújnehén ánuá í sáha.

<sup>20</sup> Te ní cahān gā yā:

Jeē quénda ini anuá ñayuu, yūcuan cúu jeē cujnehén í sáha.

<sup>21</sup> Chí nde ini anuá ñayuu quénda jeē jéni néé ní, jeē casíquí ndéé jnāhan, jeē jíca jnéni, jeē jéhni ndíyí,

<sup>22</sup> jeē sacuíhná, jeē ndíyo ní ndajniñu jnāhan, jeē sáha néé, jeē stahú jnāhan, jeē máni cuēchi sáha, jeē cucuésún ní, jeē cahán yā síquí jnāhan, jeē sandúxí máá, jeē canéé xíní.

<sup>23</sup> Tāca jniñu néé yáha, máni ini anuá ñayuu quénda, te cújnehén í sáha, áchí yá.

*Ñahan ñga nación jeē ní candíje nñhin*

(Mt. 15.21-28)

<sup>24</sup> Te ní quenda ya yūcuan cuáhān yā región Tiro jíin Sidón. Te ní quívi ya ñn vehe, te cúni yā jeē tú ní ñn ñayuu cuni jeē íne ya yūcuán. Te vēsú súcuan, te tu ní cúu cone sáhi yá.

<sup>25</sup> Te ñn ñahan íyó séhe síhí ña jeē ñúhun tachí ini í, ní nihín-ni ña jnūhun jeē íne ya. Te ní quee ña, te ní jecuíñí yítí ña nuū jehé yā.

<sup>26</sup> Te ñahan ñuu jíca cúu ña, chí nde Sirofenicia cúu nación ña. Te ní cahān ndahú ña jíin yá jeē na quēnehen ya tachí ini séhe síhí ña.

<sup>27</sup> Te ní cahān Jesús jíin ña:

Nasūu núu maá ní vēji ná, chí máni nuū ñáyuu cácuu séhe Israel. Chí tu íyó váha jeē quénde yō staā séhe te cuáha yó núu ína, áchí yá.

<sup>28</sup> Te ní cahān ña:

Jendaá cahán ní Tātā, te chindéé ñáhán ní sáña vēsú cúu ná nájnūhun ina. Chí suni máá tí cáhīn tí chíjii mesa, cánihín tí staā cuechí jéé cóyo yuhu sūchi lúlí cáyeji tí, áchí ña.

<sup>29</sup> Yūcuán na te ní cahān yā jíin ña:

Vāha ní cahān ní. Cuáhán ní núu súcuan, chí je ní quenda tachí ún ini séhe síhí ní, áchí yá.

<sup>30</sup> Te ní najinū ña vehe ña, te ní jito ña jeē catú séhe síhí ña nuū jíto, te je ní quenda tachí ún ini í.

*Jeē ní nasávāha ya ñn tēe sóhó cástété*

<sup>31</sup> Te ní quenda tucu ya región Tiro, ní yāha ya Sidón jíin táca ñuu Decápolis, te ní jinū yā mar Galilea.

<sup>32</sup> Te ní caquindeca í ñn tēe sóhó cástété nuū yā, te ní cacahān ndahú í jíin yá jeē na sóo yá ndaha ya síquí de.

<sup>33</sup> Te ní quenehen sñn ya de nuū ñáyuu cuehē ún, te ní chune ya xiní ndáha ya sōho de, te ní tesíhi yá, te ní quehé yá yaá de.

<sup>34</sup> Te ní ndacoto ya ichi ándívi, te ní jítu ní yā, te ní cahān yā:

Efata, achí yá, jeē cuní cahān: Nanune.

<sup>35</sup> Te ni nanune-ni sōho de, te ni nduvāha yáa de, te ni nacahān vāha de.

<sup>36</sup> Te ni ndacu ya jniñu nuū ñáyuu un jēē ma cáchi i nuū ní ñn. Te vēsú ni cahān nīhin ya jíin i, te víhyá gā ni cajete i jnūhun.

<sup>37</sup> Te yōhyo ni canaa ni i cájito i, te ni cacahān i:

Vāha sāha ya tācá jniñu, chi nde tēe cásóhó, cánacuni sōho de, te tēe cándāa ñhín, cánacahān vāha de sāha ya, achí i.

*Jeē ni scáji yā cuūn mil ñáyuu  
(Mt. 15.32-39)*

## 8

<sup>1</sup> Te tiempo un ní candutútú cuéhē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yā:

<sup>2</sup> Cúndáhú ni rī ñáyuu yāhá, chi je ni cuu unī quivī cáyūcú i jíin rí, te tuá na vé caji i.

<sup>3</sup> Te núu natajī rí i quinhun ndite i vehe i, te cuīta lí i sava ichi, chi íyó sava i jeē jicá véjicoo i, áchí yá.

<sup>4</sup> Te tēe cáscuáha un ní cacahān de:  
¿Te ndé nuū nihín yō staā caji i jíināhan i? Chi yāhá tú na ñáyuu yúcu, áchí de.

<sup>5</sup> Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, áchí de.

<sup>6</sup> Yūcuán na te ni cahān yā jíin ñáyuu cuehē un jēē na cúcōo i. Te ni quihín ya ndihúxá staā ún, te ni nacuatáhú yá nuū Yaā Dios. Te ni tahu cuéché yá, te ni jēhe ya nuū tēe cáscuáha jíin yá. Te máa de ni casaja de nuū ñáyuu cuehē ún.

<sup>7</sup> Te suni cándiso de jecu chācá lúli. Te ni nacuatáhú yá siquī, te ni cahān yā jeē suni saja de jíināhan de.

<sup>8</sup> Te ndihí i ni cayejí, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jíca.

<sup>9</sup> Te tēe ni cayejí un, íyó nájñūhun cuūn mil de. Te ni nacuatáhú yá nuū ñáyuu ún, te cuanungoo i.

<sup>10</sup> Yūcuán na te ni ndiví-ni ya ini barco jíin tēe cáscuáha jíin yá, te cuahān yā región Dalmanuta.

*Jeē ní cajicān de ñn jniñu jéhu nuū yā*

*(Mt. 16.1-4; Lc. 12.54-56)*

<sup>11</sup> Yūcuán na te ni quecoo tēe grupo fariseo, te ni caquejéé de stíchí de Jesús. Te cáculi de coto ndee de ya, te ni cajicān de jeē sāha ya ñn jniñu jéhu jeē coo ñn seña ichi ándiví.

<sup>12</sup> Te ni jitū ni yā siquī jeē tu cáculíje de jíināhan de, te ni cahān yā:  
¿Naun cájicān ñáyuu yāha ñn jniñu jéhu nuū rī? Jendaá cahán rī jeē ma stéén rī ni ñn jniñu jéhu nuū ñáyuu yāhá.

<sup>13</sup> Te ni squéndōo ya de jíināhan de, te ni ndiví tucu ya ini barco, te cuahān yā inga lado mar.

*Jnūhun levadura tēe fariseo  
(Mt. 16.5-12)*

<sup>14</sup> Te tēe cáscuáha jíin yá ni canaa ni de condiso de jeē caji de, chi ñn-ni pan cánevāha de ini barco.

<sup>15</sup> Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

<sup>16</sup> Te ni cacahān tēe cáscuáha un jíin táca jnāhan de:

Va siquī jeē tú na staā ndíso yó, jeē yúcuán cáhán yā súcuán, áchí de.

<sup>17</sup> Te ni jini Jesús, te ni cahān yā:

¿Najehē cándajnūhun ró jeē ni cáhán rī súcuán siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhán rī súcuán siquī jeē tu cándiso ró stāā? ¿A yóhyo uun ni rō candíje ró?

<sup>18</sup> Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni rō?

<sup>19</sup> Chi ná ni tahu cuéché rí uhūn staā ni cayejí uhūn mil tēe, ¿te nasaa jíca ni chitú pedazo staā jeē ní canastútú ró? Achí yá.

Te ni cacahān de:

Uxī uū jīca, áchí de.

<sup>20</sup> Te suni súcuan ná ni tahú cuéché rí uxā staā ni cayeji cuūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxā jīca, áchí de.

<sup>21</sup> Te ni cahān yā jíin de:

Te nde vijna ¿á ná tu jecūhun ni rō jíjnāhan ró?

Súcuan ni cahān yatá yá jeē ma cándije de jnūhun stáhú cástéén tēe ún.

*Jeē ní nasávāha ya tēe cuáá ñuu Betsaida*

<sup>22</sup> Yūcuán na te ni jinū yā jíin de ñuu Betsaida. Te ni caquindeca ñayuu ñin tēe cuáá núu yā, te ni cacahān ndahú i jíin yá jeē na tēe ya ndaha ya nuū de.

<sup>23</sup> Yūcuán na te ni jñi ya ndaha tēe cuáá un, te ni quenehen ya de yatā ñūú ún. Te ni tee ya tesihí yá tinūú de, te ni tee ya ndaha ya siquī. Te ni cajnūhun yá de núu cuu coto de jecu.

<sup>24</sup> Te ni ndacoto de, te ni cahān de:

Jító ná ñayuu jeē cájica i, te tu jító cáj ná, chi ná cáa yujnu cáa i, áchí de.

<sup>25</sup> Yūcuán na te ni tee tucu ya ndaha ya siquī tinūú de. Te ni ndacoto vāha de, te ni nduvāha-ni tinūú de, te ni jito cáj de ndihí-ni.

<sup>26</sup> Te ni nataj yá de quinhun de vehe de, te áchí yá:

Ma quiví ró ñuu, ni ma cáchi cuiti rō nuū ní ñin, áchí yá.

*Jeē ní cahān Pedro jeē Jesús cúu Cristo*

(Mt. 16.13-20; Lc. 9.18-21)

<sup>27</sup> Yūcuán na te Jesús jíin tēe cáscuáha jíin yá, cuahān yā tācá ndañūú Cesarea Filipo. Te ichi un ní cajnūhun yá de:

Ruhū, ¿ndé ñin cúu ri cácahān ñayuu?

<sup>28</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun Yaā Dios cúu ní.

<sup>29</sup> Yūcuán na te ni cajnūhun yá de:

Te máá ró, ¿ndé ñin cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

<sup>30</sup> Te ni ndacu ya jniñu nuū de jíjnāhan de jeē ma cáchi de jnūhun yáha nuū ní ñin ñayuu.

*Jeē ní castūhún Jesús jeē cúu yā*

(Mt. 16.21-28; Lc. 9.22-27)

<sup>31</sup> Te ni quejé yá steén yā nuū de:

Máá rí, Yaā ní nduu tēe, cánuú ndoho xeēn rī. Te tāca tēe jénu jíin sūtū cácujuhnu jíin tēe cástéén tutu ley, squéhichí de ruhū, te cahni de ruhū. Te nuū uní quiví te natecu rī, achí yá.

<sup>32</sup> Te cáj ní cahān yā jnūhun yáha. Yūcuán na te Pedro, ni cana máñuhún de ya, te ni quejé de cáhán de nuū yā jeē ma cuáha ya jnūhun coo súcuan.

<sup>33</sup> Te máá yá ni ndió cóto ya ni jito ya nuū tēe cáscuáha jíin yá. Te ni cahān yā nuū Pedro:

Cujiyo quihīn rō, chi cáhán rō ná cáhán Satanás. Chi tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu, achí yá.

<sup>34</sup> Te ni cana ya tēe cáscuáha jíin yá jíin ñayuu cuehē ún, te ni cahān yā:

Na-ni ñayuu núu cúní i condiquīn i ruhū, na cási i jeē cúní maá i, te na cóndiquīn i ruhū te cuāha i jnūhun ndoho i jnūndóho jeē siquí rī, vésú na cúu i.

<sup>35</sup> Chi núu ndé ñayuu cúní i cácu i nuū jnūndóho quiji nuū i jeē siquí ruhū, núu súcuan te jnahnū ndetū i ñí cáni. Te núu ndé ñayuu, vésú na cúu i jeē siquí ruhū jíin siquí jeē scáca i jnūhun jeē jnáma ri ñayuu, núu súcuan te cotecu i ñí cáni.

<sup>36</sup> ¿Chi ndé cuajniñu vésú na cúndeyí ñayuu nihīn i ñí ñáyiví, te núu quiví i nuū jnahnú ndetū i?

<sup>37</sup> Chi tú na jíin cuiti chunaa ñayuu jeē cácu ánuá i.

<sup>38</sup> Te ñayuu yáha tu cácañde cuiti i, te máni máá cuéchi cásaaha i. Te núu na-ni ñayuu cúcanu i nuū ñayuu yáha jeē siquí ruhū, Yaā ní nduu tēe, jíin siquí jnūhun cáhán rī, suni súcuan cucanu rī jeē siquí máá i, quiví ndíji ri jíin táca ndajéhé ndoo rī. Te quiví

ún chi yōhyo luu cujéhnū ri nájnūhun cújéhnū Tátá rī. Achí yá.

## 9

<sup>1</sup> Te suni ni cahān yā jíin de jíjnáhan de:

Jendaá cahán rī jíin ró jeē sava tēe cáhīn yāhá, ma cúu de chi nde cuni de jeē ndácu Yaā Dios jniñu jíin poder yā, achí yá.

*Jeē tucu ni nduu ya*

*(Mt. 17.1-13; Lc. 9.28-36)*

<sup>2</sup> Yūcuán na te nuū iñú quivī te Jesús ni jeca ya Pedro jíin Jacobo jíin Juan, cuahān sīn ya jíin de iñ yucu súcūn. Te yūcuán, tucu ni nduu ya nuū de.

<sup>3</sup> Te sahma ya ni ndindēé, te ni nducuíjín quiyi, nájnūhun yuhvā volcán. Te tú ni iñ ñayuu ñayīvi yáha cuu nacate jeē ndúquiyi ndasí súcuan.

<sup>4</sup> Te ni cajito de jeē Elías jíin Moisés cándajnáhnūn de jíin yá.

<sup>5</sup> Yūcuán na te ni cahān Pedro jíin Jesús:

Maestro, nacā jeē váha jeē cáhīn na yáha. Te na sáha ná únī vehe ramada, iñ cuu máá ní, inga cuu Moisés, te inga cuu Elías, achí de.

<sup>6</sup> Chi yōhyo ni cayūhu tēe cáscuáha ún, te Pedro tu ní sáha de cuenta na vé cúu jeē cahán de.

<sup>7</sup> Te ni quiji vicō nūhun ní jesi-ni nuū de. Te nuū vicó un ní cahān iñ jnūhun:

Yáha cúu Sēhe ri jeē maní ndasí rí jíin. Te na cúni nahín ró jnūhun cahán yā. Achí.

<sup>8</sup> Te ni candacoto-ni de, te tuá tēe un ní cájito de, chi máá iñ na Jesús.

<sup>9</sup> Te ni cananuu de jíin yá yucu ún. Te ni ndacu nīhin ya jniñu nuū de jeē ma cáchi de nuū ní iñ jeē súcuan ni cajito de, chi nde na nátecu maá yá, Yaā ní nduu tēe, achí yá.

<sup>10</sup> Jeē yúcuan ní cachuvāha de tāca jēé ní cuu ún, te cácajnūhun jnáhan de na jnūhun cúu jeē nátecu yā.

<sup>11</sup> Te ni cacajnūhún de ya:

Te tēe cástéén tutu ley Yaā Dios, ¿na-jehē cácahān de jeē cánuú ndiji Elías xīhna gā, te sáá te quiji Yaā cúu Cristo? achí de.

<sup>12</sup> Te ni cahān yā:

Jendaá cúu jeē xīhna gā quiji iñ tēe cúu nájnūhun Elías, te sátūhva de ndīhi, achí tutu. ¿Te ndese cáhán tucu tutu iñ siquī ruhū, Yaā ní nduu tēe? Cáhán jeē ndoho xeēn rī, te sájéé ni i nuū rī.

<sup>13</sup> Te cáhán rī jíin ró jeē jé ni quiji tēe ni cuu nájnūhun Elías, te ni casáha ndevāha ñayuu jíin de tāca jēé ní cacuu ni maá i, nájnūhun cáhán jnūhun de nuū tútu, achí yá.

*Jeē ní nasávāha ya iñ sūchi ñūhun tachī ini*

*(Mt. 17.14-21; Lc. 9.37-43)*

<sup>14</sup> Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndúu i de. Te suni cáhīn tēe cástéén tutu ley Yaā Dios, cátejnáhan jíin de.

<sup>15</sup> Te nuū ní cajito tāca ñayuu un jēé véji ya, te ni canaa ni i. Te cájino i cuangoo i nuū yā jeē cahān i jíin yá.

<sup>16</sup> Te ni cajnáhnūn yá i:

¿Na siquī cátejnáhan ró jíin de jíjnáhan de? achí yá.

<sup>17</sup> Te ni cahān iñ tēe íne yūcuán:

Maestro, vendeca ná séhe ná núu ní, chi ñūhun iñ tachī ini i, te ni cuñhín i ní sáha.

<sup>18</sup> Te ndé-ni cúu nuū íne i, te tachī un scótúu i, te jéhni yīhí-ni i. Te jéé tiñū yuhu i, te squñhñi jnūhun i. Te cuacuxií ndasí i sáha. Te ni cahān ndahú ná jíin tēe cáscuáha jíin ní jeē na quénehen de tachī ún, te tu ní cúu sáha de, achí de.

<sup>19</sup> Te ni cahān yā jíin de jíjnáhan de:

Ñayuu tu cándije cuiti cácuu ró. ¿Nasaa ga quivī condee rī jíin ró? ¿Te nasaa ga quivī cuandeyí ni rī jíin ró? Cuáquihin sūchí un, na quíji i, achí yá.

<sup>20</sup> Te ni caquindeca de i nuū yā. Te nuū ní jito tachī un núu yā, te ni jehni yīhí-ni i. Te ni cotúu i, te cónehén cócáni i, te jéé tiñū yuhu i.

<sup>21</sup> Te Jesús ni cajnáhnūn yá tatá i:

¿Nasaa cuiyā ni cuu jeē sáha súcuan jíin i?

Te ni cahān de:

Nde lulí i.



22 Te ni cuu cuehē jínu scótúú táchī ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhán ní sãña jéē ndúvãha sēhe ná, áchí de.

23 Te ni cahān Jesús jín de:

Núu cuu candíje ró jéē sáha ri, chi ñayuu candíje te cuu tãca jéē cuní i, áchí yá.

24 Te máá tátá sūchí un ní cahān jee de:

Cándíje ná, te chindéé ñáhán ní sãña jéē candíje nihin ga ná, áchí de.

25 Te ni jito Jesús jeē ní cutútú cuéhē ñayuu nuū yã. Te ni cahān yã nuū tachí:

Tachí jeē sañhín sásóhó, ruhū ndácu ri jniñu jeē na quenda ró ini sūchi yáha, te ma ndívi ga rō ini i, áchí yá.

26 Yūcuán na te ni cana cóhó táchī ún, te ni jehni yíhí tucu i, te ni quenda cuahān. Te sūchí un ní cuu i nájñuhun ndívi. Te ni cacahān cuehē ñayuu jeē jé ni jihí i.

27 Te Jesús ni jniñi ya ndaha i, te ni ndonehen ya i, te ni nucuiñi-ni i.

28 Yūcuán na te ni quívi ya ini ñn vehe, te tēe cáscuáha jín yá, ni cacañuhun sñn de ya:

¿Najehē tu ní cúu quenehen ná tachí un jínáhan ná? áchí de.

29 Te ni cahān yã:

Ñn tachí súcuan chi ma quenda cuiti te núu tú cacān tahu rō te coo ndite ni rō, áchí yá.

*Jeē ni cahān tucu ya jeē cúu yã*  
(Mt. 17.22-23; Lc. 9.43-45)

30 Te ni quenda ya yūcuan jín de jínáhan de, te ni yáha ya ndañúu Galilea cuahān yã. Te tu ní cúní yã jeē cúní ni ñn ñayuu.

31 Chi stéen yã nuū tēe cáscuáha jín yá, te áchí yá:

Máá rí, Yã ní nduu tēe, nastúu i ruhū nuū tãca tēe xeēn. Te cahni de ruhū, te núu ni jihí rí, te nuū uní quívi te natecu rí, áchí yá.

32 Te tu ní cájecūhun ni de jñuhun yáha, te cáyūhú de cajñuhún de ya siquí jñuhun ni cahān yã.

*Ndé ñáyuu cúu jeē cujéhu ga*  
(Mt. 18.1-5; Lc. 9.46-48)

33 Te ni jinū yã jín de ñuu Capernaum, te nuū ni quívi ya ini vehe, te ni cajñuhun yá de:

¿Na jñuhun ni candajñuhun ró ichi véji yó? áchí yá.

34 Te tu ní cacahān cuiti de, chi ichi un ní cacahān de siquí núu ndé ñn de cújéhu ga.

35 Yūcuán na te ni cucōo ya, te ni cana ya ndihúxí uū de, te ni cahān yã:

Núu ndé ñn ró cúní cujéhu ga, na cúu ró tēe núu ga nuū tãca jñáhan ró, te cuajniñu ró núu jñáhan ró.

36 Yūcuán na te ni jniñi ya ndaha ñn sūchi lúli, te ni jeni ya i mēhñú de jínáhan de. Te ni nundee yã i, te ni cahān yã jín de:

37 Na-ni ñayuu núu jeē siquí ruhū jetáhú i ñn sūchi lúli nájñuhun sūchi yáha, te ruhū jetáhú i. Te ñayuu jetáhú ruhū, nasūu máá ñn-ni ruhū, chi suni Yã ní tají ruhū jetáhú i, áchí yá.

*Ñayuu tu cáhán siquí yã, ñn i jín yá*  
(Mt. 10.42; Lc. 9.49-50)

38 Yūcuán na te ni cahān Juan jín yá:

Maestro, ni cajito ná ñn tēe jeē jín síhví ní quenehen de tachí ini ñayuu. Te ni cajesi ná jéē sáha de, chi tu jíca de jín yó, áchí de.

39 Te ni cahān Jesús jín de:

Ma cási rō jeē sáha de. Chi ni ñn tēe jeē jín síhví rí sáha de jniñu jéhu, ma cúu nacahān de siquí rí.

40 Chi tēe tu cáhán siquí yō, ñn de jín yó.

41 Te na-ni ñayuu núu jeē siquí ruhū cuáha i vēsú ñn ñajin ndute coho ró, siquí jeē cáscandíje ró ruhū, ndaā ndije cúu jeē nihín i tahu i. Achí yá.

*Xeēn coo siquí ñáyuu quívi nuū cuéchi*

(Mt. 18.6-9; Lc. 17.1-2)

42 Te núu ñn sūchi lúli yáha cándíje i ruhū, te núu quívi i cuéchi sáha na-ni ñayuu, te vãha ga núu ni conuhñi ñn yōso cáhnu sucūn ñayuu ún, te quēe i chíji ndute mar nuú.

43 Te núu ndaha ró sáha jeē quívi ró cuéchi, vãha ga cahnde rō na quíhín,

návāha tuá sáha ró cuéchi. Chi vāha ga jeē cóndee ñn-ni ndaha ró te quívi ró núu cotecu ró ñí cáni, vēsú jeē cóndee ndíndúú ndaha ró te quívi ró infierno, nuū cayú ñuhūn jeē ma ndahvá cuíti.

<sup>44</sup> Te yūcuán chi tu cájihī tindacú, te tu ndáhvá cuíti ñuhūn.

<sup>45</sup> Te núu jehē ró sáha jeē quívi ró cuéchi, suni vāha ga cahnde ró na quíhín, návāha tuá sáha ró cuéchi. Chi vāha ga jeē cóo cúhndu ró te quívi ró núu cotecu ró ñí cáni, vēsú jeē cóndee ndíndúú jehē ró te quívi ró infierno, nuū cayú ñuhūn jeē ma ndahvá cuíti.

<sup>46</sup> Te yūcuán chi tu cájihī tindacú, te tu ndáhvá cuíti ñuhūn.

<sup>47</sup> Te núu tinūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quívi ró ñuu nuū ndácu Yaā Dios jniñu jíin ñn na tinūu ró, vēsú jeē cóndee ndíndúú tinūu ró te quívi ró infierno.

<sup>48</sup> Te yūcuán chi tu cájihī tindacú, te tu ndáhvá cuíti ñuhūn.

<sup>49</sup> 'Chi nájnūhun quénda vāha oro sáha ñuhūn, súcuan quénda vāha ñayuu sáha jnūndóho. Te tāca cúñu jeē socó ñayuu nuū yā, cúhuhvuā sáha ñí.

<sup>50</sup> Vāha íyó ñí, te núu ñí ún na náā jeē uhvuá, ¿te ndese nduu uhvuā tucu sáha ró? Núu súcuan te cuu ró ñáyuu vāha, nájnūhun íyó vāha ñí. Te na cóyūcu vāha ró jíin jnāhan ró. Achí yá jíin de.

*Siquí jeē ma stóo jnāhan tēe jíin ñahan (Mt. 19.1-12; Lc. 16.18)*

## 10

<sup>1</sup> Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jnūhun nuū i, nájnūhun sáha ya.

<sup>2</sup> Yūcuán na te jecu tēe grupo fariseo ni quecoo de nuū yā, chí cácuni de coto ndee de ya núu ndese cahān yā. Te ni cacajnūhún de ya núu íyó ley jeē cuu ndusín ñn tēe jíin ñasihí de.

<sup>3</sup> Te ni cahān yā jíin de:

¿Na jniñu ni ndacu Moisés nuū rō nde jenahán?

<sup>4</sup> Te ni cacahān de:

Moisés ni jēhe de jnūhun jeē cúvāha ñn acta jeē ndusín de jíin ña, te ndōo ña, achí de.

<sup>5</sup> Te ni cahān Jesús jíin de:

Siquí jeē níhni ni rō jijnāhan ró, jeē yūcuan ní ndacu de jniñu yāha núu rō.

<sup>6</sup> Te nde xihna ñuhún, ná ni sáha Yaā Dios ndihí, chí tēe jíin ñahan ni sáha ya.

<sup>7</sup> Jeē yūcuan cúu jeē stóo tēe tátá de náná de, te quijnāhan de jíin ñasihí de.

<sup>8</sup> Te ñn na cuu ndíndúú de, achí Yaā Dios. Núu súcuan te tuá cúu uū jnāhan de, chí ñn na cúu.

<sup>9</sup> Jeē yūcuan tu íyó vāha jeē stóo jnāhan, chí jeē ni squíjnāhan Yaā Dios cúu, achí yá.

<sup>10</sup> Te tēe cáscuáha ún nuū ni quívicoo de vehe, te ni cacajnūhún tucu de ya siquí jnūhun ún.

<sup>11</sup> Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuan te cásiquí ndé de ñasihí de.

<sup>12</sup> Te núu ñn ñahan stóo ña yí ña te condeca ña inga tēe, suni cásiquí ndé ña de. Achí yá.

*Jeē ni jicān tahu Jesús jehē sūchi lúli (Mt. 19.13-15; Lc. 18.15-17)*

<sup>13</sup> Yūcuán na te ni quecoo ñayuu jíin sūchi lúli, jēe na sóo yá ndaha ya xinī i. Te tēe cáscuáha jíin yá, ni cacahān de nuū ñáyuu vējicoo jíin i.

<sup>14</sup> Te ni jito Jesús, te ni quití ni yā, te ni cahān yā jíin de:

Cuāha jnūhun na quíjicoo sūchi lúli jíñā nuū rī, te ma cási ró jeē quíjicoo i. Chi ñayuu jeē ndió cóo ni i caní ni i nájnūhun sūchi yāha, suu i quívi ndaha Yaā andiví jeē ndacu ya jniñu nuū i.

<sup>15</sup> Te jendaá cahān rī jíin ró, núu ñn ñayuu tú cuatáhú i jeē ndácu Yaā Dios jniñu nuū i, nájnūhun jétáhú ñn sūchi lúli, ma quívi cuíti i ndaha ya, achí yá.

<sup>16</sup> Te ni nundee ya i, te ni sóo yá ndaha ya xinī i, te ni jicān tahu yā jehē i jijnāhan i.

*Jnūhun tēe cúca (Mt. 19.16-30; Lc. 18.18-30)*

17 Yūcuán na te ni quihin tucu ya ichi cuahān yā. Te jínu ñin tēe ni quee de, te ni jecuiñi yití de nuū yā, ni cajnūhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihin tahu na cotecu na ní cáni andiví? áchí de.

18 Te ni cahān yā jíin de:

¿Naun cáhán rō jeē tēe vāha cúu ri? Tú ni ñin tēe vāha íyó, chi máá ñin-ni Yaā Dios.

19 Je jíni rō tācá jniñu ní ndacu Yaā Dios: Ma cosiquí ndēē jnāhan ró. Ma cáhni rō ndīyi. Ma sacuíhná ró. Ma sajnūhún ró. Ma stahú ró jnāhan ró. Cuatáhú ró nuū tatá rō nuū naná rō. Achí yá.

20 Te ni cahān tēe un jíin yá:

Tācá jniñu yāha je ni squícu ná ndé ná lulí ná, Maestro, achí de.

21 Yūcuán na te ndáhú jíto ya nuū de jeē cúsiñi ni yā jíin de. Te ni cahān yā:

Ñin na jniñu cúmaní sáha ró núu súcuan. Cuáhán te xīco ró ndihí jeē névāha ró, te cuāha ró núu ñáyuu ndahú. Te nde andiví cuāha ya jeē vāha ndasí núu rō. Yūcuán na te quiji ró condiquin rō ruhū, te cuāha ró jnūhun ndoho ró jnundóho jeē siquí rī, achí yá.

22 Te ná ni jini sōho de jnūhun yāha, te ni jnahuhū ni de, te cúcuíhyá ni de cuahān de, chi cúcá ndasí de.

23 Yūcuán na te Jesús ni ndacoto ya ní xiin ya, te ni cahān yā jíin tēe cáscuáha jíin yá:

Tēe cúcá chi yōhyo yí quívicoo de ndaha Yaā Dios jeē ndacu ya jniñu nuū de, achí yá.

24 Te tēe cáscuáha jíin yá, yōhyo ni canaa ni de jeē ní cajini de jnūhun ni cahān yā. Te ni cahān tucu ya jíin de:

Séhē, ñayuu tēnuū xūhún, yōhyo yí quívicoo i ndaha Yaā Dios jeē ndacu ya jniñu nuū i.

25 Yachí gā yāha ñin camello yaū yutícuí, vēsú jeē quíví ñin ñayuu cucá ndaha Yaā Dios jeē ndacu ya jniñu nuū i, achí yá.

26 Te víhyá gā ni canaa ni de cájini de, te ni cacajnūhun jnāhan de:

¿Ndé ñáyuu cúu jeē cácu núu súcuan?

27 Te ni ndacoto ya nuū de, te ni cahān yā:

Ñayuu chi ma cúu squíví i máá i ndaha Yaā Dios, te máá yá chi cuu sáha ya, chi ndihí-ni jniñu cuu sáha ya, achí yá.

28 Yūcuán na te ni cahān Pedro jíin yá:

Sāña jíjnāhan ná, ní castóo ná ndihí jeē cánevāha ná, te cándiquin na níhín, achí de.

29 Te ni cahān Jesús:

Jendaá cahān rī jíin ró jijnāhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeē siquí ruhū jíin siquí jeē scáca i jnūhun jeē jnáma rī ñayuu,

30 núu súcuan te nanihin i ñin ciento gā jeē súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jíin jéé cóto xeēn ñayuu i. Te nde inga vida quiji te cotecu i ní cáni.

31 Te cuehē ñayuu jeē vijna cácujuhnu, nduu i ñayuu núu ga. Te ñayuu jeē núu ga vijna, chi ndujehnu i, achí yá.

*Jeē ni cahān tucu ya jeē cúu yā  
(Mt. 20.17-19; Lc. 18.31-34)*

32 Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tēe cáscuáha ún. Te cánaa ni de ni cajini sōho de jnūhun ni cahān yā. Te cáyūhú de cuángoo de jíin yá. Yūcuán na te ni cana sín tucu ya ndihúxí uū tēe cáscuáha, te ni quejéé yá cástūhún tucu ya nuū de tāca jéé quíji siquí yā.

33 Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhnu jíin núu tēe cástéén tutu ley. Te ndonda de siquí rī jeē cúu rī, te squíví de ruhū nuū tēe nación Roma jeē cáyūcú Jerusalén cándacu jniñu.

34 Te tāca tēe un sácata de nuū rī, te cani de ruhū, te tesihí de nuū rī, te sáa te cahni de ruhū. Te nuū uní quíví te natecu rī, achí yá.

*Jeē ni jícān Jacobo jíin Juan ñn favor nuū yā*

*(Mt. 20.20-28)*

<sup>35</sup> Yūcuán na te Jacobo jíin Juan, ndindúú séhe Zebedeo, ni quecoo de nuū Jesús, te ni cacahān de:

Maestro, cáconi na jēē sāha ní ñn jeē cacān na nuū ní, áchí de.

<sup>36</sup> Te ni cahān yā jíin de:

¿Ndese cáconi rō jeē sāha ri jíin ró? achí yá.

<sup>37</sup> Te ni cacahān de:

Cuāha ní jnūhun jeē cónēne ná xiin ní quívi ndujéhnu ní, ñn ná lado váha ní, te inga ná lado jecó ní, áchí de.

<sup>38</sup> Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájñūhun jeē quíji siquī rī? ¿Te á canda ró ndoho xeēn rō nájñūhun ndoho ri? achí yá.

<sup>39</sup> Te ni cacahān de:

Cuu sāha ná.

Te ni cahān yā jíin de:

Jendaá jeē ndoho ró jnúndóho nájñūhun jeē quíji siquī rī, te ndoho xeēn rō nájñūhun ndoho ri.

<sup>40</sup> Te jeē cónēne ró lado váha ri jíin lado jecó rí, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rī, te tēe un níhīn, achí yá.

<sup>41</sup> Te uxī gā tēe cáscuáha un, ní cajini de jnūhun yáha, te ni caquīñī ni de nuū Jacobo jíin Juan.

<sup>42</sup> Te Jesús ni cana ya de, te ni cahān yā jíin de:

Cájini rō ndese cásáha tēe cácujuhnu nuū ñáyuu tācá nación. Chi cándacu níhin de jniñu nuū i, te máá de cáchí ndese coo.

<sup>43</sup> Te máá ró jijnáhan ró, chi ma sāha ró súcuan. Chi núu ndé ñn ró cúní cujéhnu, sa suhva cuajniñu ró núu jnáhan ró.

<sup>44</sup> Te núu ndé ñn ró cúní cuu nuū, sa suhva sāha ró máá ró mozo nuū tāca jnáhan ró.

<sup>45</sup> Chi suni súcuan sāha ruhū, Yaā ní nduu tēe, chi nasūu jēē véji ri jeē cuajniñu ñáyuu nuū rī, chi sa suhva véji ri jeē cuajniñu ri nuū ñáyuu. Te

cuāha ri maá rí cuu rī návāha jnama ri cuehē ñáyuu, achí yá.

*Jeē ní nasávāha ya Bartimeo tēe cuáá*

*(Mt. 20.29-34; Lc. 18.35-43)*

<sup>46</sup> Yūcuán na te ni jinū yā ñuu Jericó jíin tēe cáscuáha jíin yá. Te sáá te ni quenda ya yūcuan jíin de jíin ñáyuu cuehē ndasí. Te Bartimeo tēe cuáá, séhe Timeo, néne de yuhíchi, jícán de caridad.

<sup>47</sup> Te ni jini de jnūhun jeē Jesús ñuu Nazaret vēji ya. Te ni quejéé de cána jee de:

Jesús Séhe yucūn David, cundáhú ni ní sáña, achí de.

<sup>48</sup> Te cuehē ñáyuu ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ní sáña víi, achí de.

<sup>49</sup> Yūcuán na te ni jecuiñī Jesús, te ni cahān yā:

Cana de na quíji de.

Te ni cacana i tēe cuáá un:

Ndeyí coo ni rō. Ndocuiñī, na quíhín yō, chi cána ya rohó, áchí i jíin de.

<sup>50</sup> Yūcuán na te ni scáne de ticāchí de, te yachī ni ndocuiñī de, te ni jinū de nuū Jesús.

<sup>51</sup> Te ni cahān yā jíin de:

¿Na vé cuní rō jeē sāha ri jíin ró?

Te máá de ni cahān de:

Maestro, jeē na ndúndijin tinūu ná cuní na, achí de.

<sup>52</sup> Te ni cahān Jesús jíin de:

Cuáhán núu súcuan. Ni candíje ró jeē cuu nasávāha ri rohó, te jeē yūcuan ní nduvāha ró, achí yá.

Te ni ndundijin-ni tinūú de, te ni ndiquīn de Jesús cuahān de jíin yá ichi ún.

*Jeē ni quívi Jesús ñuu Jerusalén*  
*(Mt. 21.1-11; Lc. 19.28-40; Jn. 12.12-19)*

## 11

<sup>1</sup> Te ni cuyajni ya ñuu Jerusalén, vēji ya ñuu Betfagé jíin ñuu Betania, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de.

<sup>2</sup> Te achí yá jíin de:

Cuángoo ñuu lulí íne ichi núú. Te núú ni quiv̄i-ni ró yúcuan, te nih̄in rō ñn burro núhní t̄i, jeē ní ñn tēe ná tu coso de t̄i. Te ndají ró t̄i, quijicoo ró jíin t̄i.

<sup>3</sup> Te núú ndé ñn cajnūhún naun cándají ró t̄i, te cachi rō: Máá Jítóho yō jíni ñūhún yá t̄i, te yachī natají yá t̄i ndiji t̄i, achi rō. Achí yá jíin de.

<sup>4</sup> Te cuango de, te ni canih̄in de burro un núhní t̄i yehȳi núú quéhe nuū náquijnáhan ichi. Te ni candají de t̄i.

<sup>5</sup> Te sava ñayuu cáh̄in yūcuan ní cacahān jíin de:

¿Na vé cúu jeē casáha ró jeē cándají ró burro jíinā? achí i.

<sup>6</sup> Yūcuán na te ni cacahān de nájnūhun ni cachi Jesús. Te ni casiáá i t̄i vējicoo de jíin t̄i.

<sup>7</sup> Te ni ndecoo de jíin t̄i nuū Jesús, te ni casoó de sahma de siqūi t̄i, te ni jecosō yā t̄i.

<sup>8</sup> Te cuehē ñayuu ni cascáá i sahma i ini ichi. Te sava ga i ni cajehnde i ndaha ñúú, te ni cachucun i ini ichi ún.

<sup>9</sup> Te ñayuu cuango ichi núú jíin ñáyuu cuango ichi yátá, cácana jee i:

Yōhyo cújéhnu ya. Yōhyo vāha Yaā cúu Yaā jeē véji jíin jniñu máá Jítóho yō Yaā Dios.

<sup>10</sup> Te yōhyo luu coo, chi je yajni ndacu ya jniñu nájnūhun ni ndacu jíi yō rey David. Te yōhyo cújéhnu máá Yaā Dios. Achí i.

<sup>11</sup> Te ni quiv̄i Jesús ñuu Jerusalén, jíin ini templo cáhnu. Te ni jito ya nuū t̄acá ndajniñu yūcu ní yúcuan. Te ni quenda ya cuahān yā ñuu Betania jíin ndihúxí uū de, chi je ni ini.

*Jeē ni cáhān yā nuū yújnu higo*  
(Mt. 21.18-19)

<sup>12</sup> Te inga quiv̄i ún, nuū ní quenda ya ñuu Betania cuahān yā jíin de, te jíi yā sōco.

<sup>13</sup> Te nde jicá ni jito ya ñn nundēhe higo jeē íin ndaha. Te ni jecondēhe yá núu sanaa te nih̄in yā ndehē caji yā. Te tú na vé ni níh̄in yā, chi máá ndaha-ni íin. Chi nasūu tiempo ndehē cúu.

<sup>14</sup> Yūcuán na te ni cahān yā nuū yujnu ún:

Tuá na ndehē cuun cuiti xinī rō jeē cáji ñayuu, achí yá.

Te tēe cáscuáha jíin yá ni cajini de jeē súcuan ni cahān yā.

*Jeē ní quenehen ya ñayuu ini templo*  
(Mt. 21.12-17; Lc. 19.45-48; Jn. 2.13-22)

<sup>15</sup> Te ni najinū yā jíin de ñuu Jerusalén. Te ni quiv̄i ya ini templo cáhnu, te ni quenehen ya ñayuu cájeen quiti te cánax̄ico núú ñáyuu jeē socō i. Te ni scotúú ndeyi ya t̄aca mesa tēe cástáȳi xūhún, jíin silla tēe cáx̄ico paloma.

<sup>16</sup> Te tu ní jéhe ya jnūhun jeē yáha ñayuu ini templo jíin ndajniñu ndiso i.

<sup>17</sup> Te ni steén yā jnūhun nuū i, achí yá:

Yósó núú tútu ii jeē cahán Yaā Dios: Vehe ri chi vehe nuū cájicān tahú ñayuu t̄acá nación cúu, achí yá. Te máá ró jijnáhan ró chi nájnūhun yaū cava ñacuñna ní canasáha ró, achí yá.

<sup>18</sup> Te tēe cástéén tutu ley Yaā Dios jíin sūtū cácujuhnu, ni cajini de jnūhun yáha, te ni quejéé de cánducú de modo ndese cahni de ya. Chi cáyūhú de jeē ndujéhnu ga maá yá vēsú maá de, chi t̄aca ñáyuu yōhyo cácus̄i ni i cajini i jnūhun steén yā.

<sup>19</sup> Te jeē cuácuaa, te ni quenda ya ñuu Jerusalén cuahān yā.

*Jeē ni ích̄i nundēhe higo*  
(Mt. 21.20-22)

<sup>20</sup> Te jenéhen inga quiv̄i ni nayāha ya jíin de cuahān yā. Te ni cajito de jeē nundēhe higo un je ni ich̄i nde yoho.

<sup>21</sup> Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núú, te vijna je ni ich̄i caján, achí de.

<sup>22</sup> Te ni cahān Jesús jíin de:

Candíje ró jéé sáha Yaā Dios jeē jicán rō.

<sup>23</sup> Chi jendaá cahán r̄i jíin ró, núu ndé ñáyuu cahān i jeē cújiyo yucu yáha quih̄in nde nuū mar, te núu tú nacani siquí ni i, chi sa suhva candíje i jeē

cóo nájñuhun ni cahān i, yūcuán na te cundaā jeē ni jícān i.

<sup>24</sup> Jeē yūcuan cáhān rī jín ró, tāca jéē cacán tahú rō, te núu candíje ró jéē nihín rō, te nihín rō.

<sup>25</sup> Te jeē cájicān tahú rō, te cone cáhnu ni rō nuū ñáyuu casáha cuēchi síquī rō, návāha máá Tátá rō jeē ndeé yá andiví, suni cone cáhnu ni yā nuū cuéchi ró.

<sup>26</sup> Chi núu tú cone cáhnu ni rō nuū jnáhan ró, te suni máá Tátá rō jeē ndeé yá andiví, ma cóne cáhnu ni yā nuū cuéchi ró, áchí yá.

*Síquī jeē ndíso jníñu Jesús*  
(Mt. 21.23-27; Lc. 20.1-8)

<sup>27</sup> Yūcuán na te ni najinū tucu ya ñuu Jerusalén. Te jíca cuu ya ini templo cáhnu. Te sutū cácujeñnu jín téē cástéén tutu ley Yaā Dios jín téē jéñnu cándacu jniñu, ni quecoo de nuū yá.

<sup>28</sup> Te ni cacajnūhún de ya:

¿Ndé ní nihín jniñu ró jéē sáha ró jniñu yáha? ¿Te ndé ñn ni tee jniñu síquī rō jeē sáha ró súcuan? áchí de.

<sup>29</sup> Te ni cahān Jesús:

Suni ruhū, cajñuhun rí rohó ñn jñuhun jínáhan ró. Te núu cuu stío cuíñí rō, yūcuán na te cachi rī nuū rō ndé ní nihín jniñu ri jeē sáha ri jniñu yáha.

<sup>30</sup> ¿Ndé ñn ni tee jniñu síquī Juan jeē ni scuándute de? ¿A Yaā Dios chí táca téē? Cachi nuū rī, achí yá.

<sup>31</sup> Yūcuán na te ni candajnūhun máá de:

Núu cahān yō jeē Yaā Dios ni tee ya jniñu un síquī Juan, te cahān de jín yó: Núu súcuan ¿te najehē tu ní cáccandíje ró de?

<sup>32</sup> Te núu cahān yō jeē ñáyuu ni catee jniñu un síquī de, te quitī ni ñáyuu nuū yō, achí de cácahān maá de.

Chi cáyūhú de jeē quitī ni ñáyuu, chi ndivii i cáccandíje i jeē téē ni nacani jñuhun Yaā Dios ni cuu ndije Juan.

<sup>33</sup> Jeē yūcuan ní cacahān de jín yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu síquī rī sáha ri jniñu yáha, achí yá.

*Jñuhun yátá síquī tēe néē cáccajñiñu nuū uva*  
(Mt. 21.33-46; Lc. 20.9-19)

## 12

<sup>1</sup> Te ni quejéé yá cahān yā jñuhun yátá jín de jínáhan de:

ñn tēe ni nachuhun de cuehē uva, te ni jesi de corral, te ni sáha de ñn nuū cúhun ndehē un táxīn. Te ni sáha de ñn vehe súcún návāha cuu coto de ñí cáhnu.

Te ni stóo de nuū sava tēe sájñiñu nuū, te cuu sava de ndehē jín. Te ni tee de ichi cuahān jicá de.

<sup>2</sup> Te máá tiempo ndutútú uva, te ni tají de ñn mozo de cuanuquīhin sava uva nuū téē cáccajñiñu ún.

<sup>3</sup> Te tēe un ní cajñi de mozo un, te ni cacani de i, te ni canatajé de i cuanuhun i súcuan-ni.

<sup>4</sup> Yūcuán na te tēe chíí uva un ní tají tucu de ñnga mozo cuahān. Te tēe cáccajñiñu un ní cajehē de yuū xiní mozo un, te ni castújí de, te ni cacahān ndevāha de nuū.

<sup>5</sup> Te tēe chíí uva ni tají tucu de ñnga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

<sup>6</sup> Te tēe chíí uva, íyó ñn sēhe de jeē maní ndasí de jín. Te jeē sándñí na ni tají de sēhe de un cuahān nuū téē cáccajñiñu. Te jéni ni de: Tēe ún chí cuatáhú de jínáhan de nuū séhe ri.

<sup>7</sup> Te tēe cáccajñiñu un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu máá yó, achí.

<sup>8</sup> Te ni cajñi de i, ni cajehni de i, te ni cascāne de i ñnga lado. Achí yá.

<sup>9</sup> Yūcuán na te ni cajñuhun yá de:

Núu súcuan ¿te ndese sáha tēe chíí uva un? Ndiji de te cahni de tēe cáccajñiñu ún, te cuāha de ñuhun cáá uva un núu ñnga sava tēe sájñiñu nuū.

<sup>10</sup> ¿Te á ná tu cahu ró jñuhun yáha jeē yosó núu tútu ñ, jeē ruhū cúu nájñuhun ñn yuū? Chi áchí tutu:

Yuū jeē ní casquéhichí tēe cájéni vehe, yuū yáha nduu jeē quituu vehe.

11 Máá Jítóho yō Yaā Dios ni sáha ya súcuan, te cánaa ni yō jító yó jniñu yáha. Achí tutu, achí yá.

12 Yūcuán na te ni canducú de modo jniñi de ya. Chi ni cajecūhun ni de jeē siquī maá de cúu jnūhun yátá ní cahān yā siquī tēe cásajniñu nuū uva jíin tēe cájeni vehe. Te siquī jeē cáyūhú de jeē quiñi ni ñayuu, te ni castóo de ya te cuango de.

*Siquī xūhun renta*

(Mt. 22.15-22; Lc. 20.20-26)

13 Yūcuán na te ni catajé de sava tēe grupo fariseo jíin tēe grupo Herodes cuango de nuū yā, ndúcú de ndese sáha de návāha cahān yā ñin jnūhun jeē nihín de cuēchi siquī yā.

14 Te ni quecoo de, te ni cacahān de jíin yá:

Maestro, cájini na jēe tēe cáhān ndaā cúu ní, te tu yúhú ní jeē cáhān ni ñin ñayuu siquī ní. Chi tu sáha ní cuenta ndese cúu ñin ñin i, chi ñnuú-ni sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jniñi nación yō, chí tuú? ¿A chúnaa yō, chí má chúnaa yō? Achí de jíin yá.

15 Te máá yá jiní yā jeē stahú-ni de, te ni cahān yā jíin de:

¿Najehē cájito ndee rō ruhū? Cuāha ñin xūhún na cóto ri, achí yá.

16 Te ni cajēhe de xūhún. Te ni jito ya, te ni cajnūhun yá de:

¿Ndé ñin nuū cúu jeē ndeé nuū xūhun yáha, te ndé síhví cúu jeē ndeé yāhá?

Te ni cacahān de jíin yá:

Nuū jíin síhví rey un cúu, achí de.

17 Yūcuán na te ni cahān yā jíin de:

Núu súcuan te nacuāha ró núu rey un jēe yíhi cuenta nuū de, te nacuāha ró núu Yaā Dios tāca jēe yíhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

*Jeē ní cajnūhún de siquī jeē nátecu ndīyi*

(Mt. 22.23-33; Lc. 20.27-40)

18 Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiñi ndīyi. Te ni cacahān de jíin yá siquī ñin jnūhun, achí de:

19 Maestro, Moisés ni tee de nuū tútu jeē cánevāha yó: Núu ñin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi i nuū ndīyi ñani de, achí tutu.

20 Núu súcuan te ni íyo uxā ñani. Te tēe núu ní quiñáhan de jíin ñahan. Te ni jihí de, te tú sēhe de ní íyo.

21 Te tēe uū ni naquihin de ña, te suni ni jihí de, te tú sēhe de ní íyo. Te suni súcuan tēe uní.

22 Te ndihúxá de ni condeca de ña, te ni ñin de tú sēhe de ní íyo. Te jeē sándihí te suni ni jihí ñahan ún.

23 Núu súcuan te núu na nátecu de jíináhan de quiñi nátecu ndīyi, ¿te ndé ñin de cuu ña ñasihí de? Chi ndihúxá de ni condeca de ña. Achí de jíin yá.

24 Yūcuán na te ni cahān yā jíin de:

Yōhyo cástivi ró jnūhun siquī jeē tu cájecūhun ni rō jeē cáhān tutu ñi, ni tu cájini rō jeē iyó poder Yaā Dios jeē nastécu yā ndīyi.

25 Chi quiñi nátecu ndīyi, te tuá na jnūhun quiñáhan tēe jíin ñahan coo. Chi coo í nájnūhun ndajéhé Yaā Dios andiví.

26 Te siquī jeē nátecu ndīyi, ¿á tu ní cácahu ró tutu ní tee Moisés, ndese ni cahān Yaā Dios jíin de mēhñu yúcū jeē cayú yáñuhún? Máá rí cúu Yaā Dios Abraham jíin Isaac jíin Jacob, achí yá jíin Moisés.

27 Chi vēsú je ni cajihí de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Yōhyo cástivi ró jnūhun núu súcuan. Achí yá jíin de.

*Jniñu cánuú ndasí gá jeē ní ndacu Yaā Dios*

(Mt. 22.34-40)

28 Te ni quee ñin tēe stéén tutu ley Yaā Dios, te ni jini de jeē castichí jnāhan tēe un jíin Jesús. Te ni jini de jeē váha ni nastió cuiñi yā jnūhun. Te ni cajnūhún de ya:

¿Ndé ñn cúu jñūhun ndácu jniñu cánuú ndasí gá nuū tāca gá jniñu ni ndacu ya jenahán? áchí de.

<sup>29</sup> Te ni cahān Jesús jíin de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítóho yō Yaā Dios, maá ñn-ni ya iyó.

<sup>30</sup> Núu súcuan te coo manī ndasí ró jíin máá Jítóho ró Yaā Dios, nde jnáā ndasí ró sáha ró ndihí jeē cúsiñ ní yā, nde jíin ini jíin ánuá ró, jíin ní jeē níjnūní ró, jíin ní fuerza ró. Yāha cúu jniñu ndácu ya jeē cánuú ndasí gá.

<sup>31</sup> Te jniñu uū jeē ní ndacu ya, suni súcuan cáhān: Cundáhú ni ró jnáhan ró nájnūhun cundáhú ni ró maá ró. Tuá inga jñūhun ndácu jniñu cánuú gá iyó, chí suu máá jéē yāha-ni. Achí yá jíin de.

<sup>32</sup> Yūcuán na te ni cahān tēe stéén tutu ley jíin yá:

Vāha ni cahān ní, Maestro. Chí ndaā chí iyó ñn-ni Yaā Dios, te tuá na inga yā iyó.

<sup>33</sup> Te cánuú jéē coo manī ndasí yó jíin yá nde jíin ini jíin ánuá yō, jíin ní jeē níjnūní yō, jíin ní fuerza yō, te cundáhú ni yō jnáhan yó nájnūhun cundáhú ni yō maá yó. Te cánuú ndasí gá jeē yāha vēsú jeē cáhmu yó quiñi jíin táca gá jeē socó yō nuū yā. Achí de jíin yá.

<sup>34</sup> Yūcuán na te ni jini Jesús jeē váha ni stió cuñí de, te ni cahān yā jíin de:

Je yajni cuu quiñi ró ndaha Yaā Dios jeē ndacu ya jniñu nuū ró, achí yá.

Yūcuán na te ni ñn ga de, tuá ni chūndeyí ni de cajnūhún de ya.

*Siquí jeē cúu Cristo sēhe yucūn David*

(Mt. 22.41-46; Lc. 20.41-44)

<sup>35</sup> Te stéén Jesús jñūhun ini templo, te ni cahān yā:

¿Ndese cúu jeē cácahān tēe cástéén tutu ley Yaā Dios jeē Cristo cúu sēhe yucūn David?

<sup>36</sup> Chí máá David suhva ni cahān de jñūhun ya ni sáha Espíritu Santo nde jenahán:

Máá Jítóho yō Yaā Dios ni cahān yā jíin Jítóho rī, Yaā quiñi:

Cucōo ró lado váha ri nuū cujéhnú ró, te na sáha ri jeē quende ró poder tāca jeē cájito uhū rohó.

Achí Yaā Dios. Achí David.

<sup>37</sup> Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Te ñayuu cuehē, cánujnahān ni i cájini nahín i tāca jñūhun cáhān yā.

*Jeē ni cáhān yā jeē iyó cuéchi de jijnáhan de*

(Mt. 23.1-36; Lc. 11.37-54; 20.45-47)

<sup>38</sup> Te stéén yā jñūhun, te ni cahān yā jíin i:

Coto má candíje ró táca tēe cástéén tutu ley. Chí cácusí ni de cáñuhun de sahma cáni jeē steén jeē cujéhnú de, cájica cuu de jíin. Te cánujnahān ni de jeē cahān yñūhún ñáyuu jíin de ini calle.

<sup>39</sup> Te cánujnahān ni de cucōo de nuū silla yñūhún gá ini vehe i sinagoga, jíin silla yñūhún gá nuū víco cáyeji ñayuu.

<sup>40</sup> Te cáquende de vehe ñahan ní caquendōo ndáhú. Te nahān cájicān tahú de návāha cani ni ñayuu jeē tú na cuéchi de. Tēe yāha jijnáhan de chí xeēn gā ndoho de castigo. Achí yá.

*Jeē ni sócō ñahan viuda xūhún*

(Lc. 21.1-4)

<sup>41</sup> Te ñn quiñi néne Jesús ini templo ichi núu tāca yéjñú nuū cásocō i xūhún. Te jító ya ndese cáchuhun ñayuu xūhún ini yejnū ún. Te cuehē ñayuu cucá ní cachuhun i cuehē xūhún.

<sup>42</sup> Te ni quee ñn ñahan viuda jeē ndóho ndáhú. Te ni chuhun ña uū centavo lulí ini yejnū ún.

<sup>43</sup> Yūcuán na te ni cana ya tēe cáscuáha jíin yá, te ni cahān yā jíin de:

Jendaá cahān rī jíin ró jeē cuehē gā cúu jeē ni sócō ñahan viuda ndahú yāha, vēsú jeē ní casocō tāca ñáyuu cucá.

<sup>44</sup> Chí táca i ni casocō i jeē ni ndóo siquí xūhún cuéhē i. Te ñahan yāha, vēsú ndahú ndóho ña, te ni chuhun ndihí ña jeē cótecu ña. Achí yá jíin de.



*Jeē ní cachi yā jeē náā templo  
(Mt. 24.1-2; Lc. 21.5-6)*

### 13

<sup>1</sup> Te ni quenda Jesús ini templo cáhnu, te ñn tēe scuáha jíin yá ni cahān de:

Maestro, condēhe ní ná luu jíto tācá vehe yáha jéē cúu templo, jíin tāca yúu jeē ní cuvāha, áchí de.

<sup>2</sup> Te ni cahān yā jíin de:

Tācá vehe náhnu yāha jéē cájito ró, chi ma cóso jnáhan ga ni ñn yuū, chi ndíhi jnanū. Achí yá.

*Na seña coo nuū cuácuyajni ndíhi ñayíví*

*(Mt. 24.3-28; Lc. 21.7-24; 17.22-24)*

<sup>3</sup> Te ni jehēn yā jíin de yucu Olivos jeē íne ichi núu templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni cacajñuhun sáin de ya:

<sup>4</sup> Castūhun ní nuū ná, ¿ndé quiví coo tāca jéē ní cachi ní jéē coo? ¿Te na seña coo núu cuacuyajni squícu tāca jéē ní cahān ní? áchí de.

<sup>5</sup> Te ni cahān yā jíin de:

Coto ró jéē ma stahú ni ñn de rōhó.

<sup>6</sup> Chi quiijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stahú de cuehē ñayuu.

<sup>7</sup> Te nihīn rō jñuhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ní ná tu jinū quiví ndíhi ñayíví.

<sup>8</sup> Chi ndonda nación siquī inga nación, te ndonda ñuu siquī inga ñuu jeē cuajnáhan. Te cháha chúcuan jñāa, te coo jnamā, te ndonda ñayuu siquī jnáhan í. Te tāca jéē yáha cácuu jñūdóho quejéé xíhna ñúhún gá.

<sup>9</sup> Te condito ró máá ró, chi nastúu í rōhó núu tāca tóhō, te ini tācá vehe íi sinagoga caní í rōhó. Te quindecá í sava ró núu tācá gobernador jíin núu tāca rey, te cahān í cuēchi siquī rō siquī jeē cácandíje ró rúhū. Te súcuan te cuu nacani ró jñuhun rí nuū de.

<sup>10</sup> Te jíni ñúhún jéē xíhna gā cuitē núu jñuhun nuū tācá nación ndese jnáma rí í, te sáá te ndíhi quiví.

<sup>11</sup> Te núu ní cajñi de rōhó cuángoo de jíin ró nuū tāca tóhō, te ma nácani ní rō xíhna gā ndese stío cuiñí rō nuū de te cācu ró. Chi máá hora un te máá Yaā Dios cuāha ya jñuhun nuū rō ndese cahān rō, te jñuhun ún cahān rō. Chi nasūu máá ró cúu jeē cahān, chí Espíritu Santo cúu jeē cahān.

<sup>12</sup> Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tátá jíin náná jeē cahni.

<sup>13</sup> Te tāca ñáyuu quiví ní í nuū rō jeē siquí ruhū. Te ñayuu cuiñi níhin jíin jñuhun rí nde quiví jínu, chí cācu í.

<sup>14</sup> Te Daniel, tēe ní nacani jñuhun Yaā Dios, ní tee de jñuhun ñn tēe néé jéé quijí. Te rōhó jéé cácahu tutu ún, na jécūhun ní rō. Chi ñn quiví te cuní rō jeē sáha ndevāha de jeē stívi de tācá ndajñíñu íi ini templo, te cuiñi de nuū tú na ley cuiñi de. Te núu cuní rō jeē súcuan cúu, te ñayuu cáyūcú región Judea, na cúnu í caa í yucu quingoo í.

<sup>15</sup> Te ñayuu cáyūcu núu quéhe, ma ndívi í ini vehe jeē quénehen í ndajñíñu í, chí cánuú cunu yachí í návāha cācu í.

<sup>16</sup> Te ñayuu cáhīn nuū ítu, ma ndíji í vehe jeē quihin í sahma í.

<sup>17</sup> Te quiví ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachí ña.

<sup>18</sup> Te cacān tahú rō jeē ma quijí jñūdóho un jéé cunu ró máá tiempo cúun yuhvā.

<sup>19</sup> Chi jeē quejéé un te coo cuehē jñūdóho xeēn, jeē ná tu coo súcuan nde quiví ní sáha Yaā Dios ñayíví te nde vijna. Te jeē ndíhi jñūdóho ún te ní ma cóo ga jeē súcuan.

<sup>20</sup> Te núu tú nastíyi máá Jítoho yō Yaā Dios tiempo jñūdóho ún, te ní ñn ñayuu ma cácu cuití í. Te jeē siquí ñáyuu cácandíje jeē ní nacāji ya, jeē yúcuu nastíyi ya tiempo un.

<sup>21</sup> Núu súcuan te núu ñn ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi í, te ma candíje ró jéē cahán í.

22 Chi canecoo tēe cástáhú te cahān de jeē Cristo cúu de, chí cáhān de jeē tēe nácani jnūhun Yaā Dios cúu de. Te sáha de jniñu jéhu jeē naa ni ñayuu coto i, návāha stáhú de nde maá ñáyuu ní nacāji ya, te núu na cúu.

23 Te ndito na cóo ni rō, chi je ni castūhun rí nuū rō vijna nde ná tu coo.

*Ndese coo quivī ndiji Yaā ní nduu tēe*

(Mt. 24.29-35, 42-44; Lc. 21.25-36)

24 Te quivī ún, núu je ni ndihi jnūndóho ún, te cujnúú níandii, te yoō ma ndí gā.

25 Te ningoo quimi íin andiví. Te tāca jēe íin andiví chí quisi i.

26 Yūcuán na te coto ñayuu nuū maá rí, Yaā ní nduu tēe, ndiji rí jíin vícō, te condiso rí cuehē poder, te yōhyo luu cujéhu rí.

27 Yūcuán na te taji rí ndajéhe rí quinastútú yá ñayuu ní nacāji rí ndicúún lado ñayiví, nde nuū ndihi ñayiví te nde nuū ndihi andiví.

28 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní.

29 Te suni súcuan núu ni cajini rō jeē ní quejéé cúu tācá jniñu jeē ní cáhān rí, yūcuán na te na jécūhun ní rō jeē ní cuyajni quivī ndíji rí, te yachí coo.

30 Jendaá cahán rí jíin ró jeē ma cúu ndihi ñayuu jeē cóto jnūndóho ún, chí nde squícu ndihi jniñu ún.

31 Andiví jíin ñáyiví chí naa, te tāca jnúhun cáhān rí chí ma náā, chí ndihi squícu.

32 Te quiví jíin hora jeē ndíji rí, tú ni ñn ñayuu jiní, ní máá ndajéhe cáhīyo andiví, ní máá rí, Sēhe Yaā Dios. Chí máá ñn ní Tátá rí cúu jeē jiní.

33 'Núu súcuan te na cócuhun ní rō tāca jnúhun yáha, te ndito na cóo ní rō, te cacān tahu rō, chí tu cájini rō na quiví ndiji rí.

34 Chí coo nájnūhun ñn tēe jeē quihín jicá de, te nde ná tu quenda de vehe de, te ní ndacu de jniñu nuū tāca mozo de ndese sáha ñn ñn de. Te ní ndacu

de jniñu nuū tēe ndíto yéhyí jēe na cóndito de.

35 Te suni súcuan róhó jíjnáhan ró, ndito na cóo ní rō. Chí cúu rí nájnūhun jitohe vehe ún, te tu cájini rō na hora ndiji rí, á jēe cuácuaa, chí ñuú, chí jēe cána líhli, chí jénéhen.

36 Chí ñn sanaa-ni te ndiji rí, te coto ró jēe ma nánihín rí rohó jēe tu ndíto ró.

37 Te jnūhun cáhān rí jíin ró jíjnáhan ró, suni cáhān rí jíin ndiví ñayuu: Ndito na cóo ní rō jíjnáhan ró. Achí yá.

*Jeē ní casquínáhan de jnūhun jeē jnñ de Jesús*

(Mt. 26.1-5; Lc. 22.1-2; Jn. 11.45-53)

## 14

1 Te cúmaní uū gā quiví te quejéé vico pascua jeē cáyeji ñayuu hebreo pan jeē tú na levadura yíhi. Te sutū cácujeñu jíin tēe cástéén tutu ley, ní canducú de modo ndese jnñ de Jesús jíin jnúhun stáhú, te cahni de ya.

2 Te ní cacahān de:

Ma jnñ yó de máá quiví vico, chí ndonda ñayuu siquí yō, achí de.

*Jnūhun ñahan jeē ní chuhun perfume xinī yā*

(Mt. 26.6-13; Jn. 12.1-8)

3 Te íne Jesús ñuu Betania vehe Simón, tēe ní ndoho cuehyí stehyú. Te níní yéji yā staā, te ní quee ñn ñahan nuū yā, ndáhá ña ñn frasco yuū luu jeē ñúhun aceite perfume, jeē máni ita nardo cúu, te yōhyo yahu ndéé. Te ní tahu ña frasco un, te ní chuhun ña xinī yā.

4 Te sava tēe cáhīin yūcuan ní caquítí ní de, te ní cacahān de:

¿Najehē cúu jeē náā saá-ni perfume jíñā?

5 Chí cuu xícó yahu yó víhyá gā uní ciento denario, te cuāha yo núu ñáyuu ndahú núu, áchí de.

Te ní cacahān sōó de jíin ña.

6 Te ní cahān Jesús:

Ma stáhān rō ña. ¿Naun cásáha ró jēe nácani uhū ní ña? Chí ñn jniñu váha cúu jeē ní sáha ña jíin rí.

<sup>7</sup> Chi níni coyūcu ñáyuu ndahú jíin ró, te núu cácuini ró te cuu sáha vāha ró jíin i. Te ruhū chi tuá condee rī jíin ró.

<sup>8</sup> Chi ni sáha ña ndihí jeē cuu sáha ña jeē maní ña jíin rí. Chi nde ná tu quindūji ri te je ni sátūhva ña ruhū jeē ní chuhun ña perfume ruhū.

<sup>9</sup> Jendaá cahán rī jíin ró jeē ní cáhnu ñayīvi ndé-ni cúu nuū cuité núu jnūhun jeē jnáma ri ñayuu, suni nacani i jnūhun jeē ni sáha ñahan yáha, návāha cocuhun ni ñayuu ña, áchí yá.

*Jeē ní nastúu Judas yā*  
(Mt. 26.14-16; Lc. 22.3-6)

<sup>10</sup> Yūcuán na te Judas Iscariote, ñin jeē ndihúxí uū tēe cáscuáha un, ní jehēn de nuū sutú cácujeñnu, ní sándaá de jíin jēē nastúu de Jesús nuū jijnáhan.

<sup>11</sup> Te nuū ní cajini sōho sutū un jēē cahán de, te ni cacusī ni, te ni caje-jnūhun jeē cuáha xūhun núu de. Te nde quivī un ní nducú de modo ndese nastúu de ya.

*Jeē ní jequín yā Cena yā*

(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Te ni quee máá quivī jeē quejéé vico pascua jeē cáyeji ñayuu pan jeē tú na levadura yāhi, te suni quivī un cájehni i londe nájnūhun ni ndacu Yaā Dios jniñu jeē sáha i vico pascua un. Te tēe cáscuáha un ní cacajnūhún de ya:

¿Ndé nuū cuní ni jēē quisátūhva ná cuxíni ní vico pascua? achí de.

<sup>13</sup> Te ni tají yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan ró jíin ñin tēe ndíso quīyī ndute. Te condiquīn rō de quihīn rō jíin de.

<sup>14</sup> Te vehe jeē ndívi de, yūcuan cahán rō jíin tēe chíí vehe: Achí máá Maestro: ¿Ndé ñin cúu cuarto vehe ní cuáha núu ní núu cuxíni ya vico pascua jíin tēe cáscuáha jíin yá? achi rō.

<sup>15</sup> Te máá de stéén de ñin cuarto cáhnu nde xiní véhe jeē je íyó túhva. Te yūcuan sátūhva ró jēē cuxíni yó, áchí yá jíin de.

<sup>16</sup> Te cuangoo tēe cáscuáha ún, te ni jinūcoo de ñuu, te ni canihīn de nájnūhun ni cahán yā jíin de. Te ni casátūhva de jeē cuxíni ya vico pascua.

<sup>17</sup> Te jeē cuácuaa, te ni quee ya jíin ndihúxí uū de.

<sup>18</sup> Te ni cacucōo de mesa cáyeji de staa, te ni cahán yā:

Jendaá cahán rī jíin ró jeē ñin rōhó jēē yéji jíin rí, nastúu ro rúhū, achí yá.

<sup>19</sup> Yūcuán na te ni cacucuíhyá ni de, te ná ñin ná ñin de ni cacajnūhún de ya:

¿A sáña cúu? achí ñin de.

Te suni súcuan inga de:

¿A sáña cúu? achí ñin ñin de.

<sup>20</sup> Te ni cahán yā jíin de:

Ñin jeē uxí uū rō jeē cáyeji cáhnu jíin rí ñin cohō, suu nastúu ruhū.

<sup>21</sup> Te ruhū, Yaā ní nduu tēe, jendaá cúu jeē quihín rī cuu rī, nájnūhun yósó jnūhun ri nuū tútu iī. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

<sup>22</sup> Te níni cáyeji de jíin yá, te ni quihín ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahán yā:

Caji rō jijnáhan ró, chi yāha cúu yiquí cúñu rī, achí yá.

<sup>23</sup> Yūcuán na te ni quihín ya ñin copa ndūxi uva, te ni nacuatáhú yá, te ni jēhe ya ni cajihí ndihí de.

<sup>24</sup> Te ni cahán yā jíin de:

Yāha cúu niñí rī jeē cuáha ri jeē cúu contrato jeé, te cati jeē ndundoo cuēchi cuehē ñayuu.

<sup>25</sup> Te jendaá cahán rī jíin ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Yaā Dios jniñu ní ñayīví, te sáá te coho tucu ri jíin ró jijnáhan ró. Achí yá.

*Jeē ní cachi yā jeē yūhu Pedro cahán de jeē jini de ya*

(Mt. 26.30-35; Lc. 22.31-34; Jn. 13.36-38)

<sup>26</sup> Te ni jita ya ñin yaa iī jíin de jijnáhan de. Te ni quenda ya cuahán yā jíin de nde yucu Olivos.

<sup>27</sup> Yūcuán na te ni cahán yā:

Ndivii rō nayūhu ró jeē siquí ruhū jecuáa vijna. Chi suhva je yósó jnūhun ri nuū tútu iī, ni cahán Yaā Dios:

Cuāha ri jñūhun jeē cáhni ñayuu tēe ndító lanchi, te lanchi un cuítē núu ti jeē yūhu tí, achí.

<sup>28</sup> Te jeē nátecu rī, te xīhna ruhū cosnūu rí quihīn rī región Galilea, te sáa te najinūcoo ró, achí yá.

<sup>29</sup> Yūcuán na te ni cahān Pedro: Vēsú ndīhi de na náyūhú de, te máa ná chi ma náyūhú cuítē ná, achí de jíin yá.

<sup>30</sup> Te ni cahān yā jíin de: Jendaá cahán rī jíin ró jeē jecuáa vijna, nde ná tu cana líhli uū jínu, te yūhu ró jeē jñi ñayuu rohó, te unī jínu cahān ró jeē tu jíin ró ruhū, achí yá.

<sup>31</sup> Te ni cahān teyí de jíin yá: Vēsú núu cuu na jíin ní, te ma cahán cuítē na jēe tu jíin na níhín, achí de.

Te suni súcuan ni cacahān ndīhi de.

*Jeē ni jicān tahú yā nuū huerto Getsemaní*

(Mt. 26.36-46; Lc. 22.39-46)

<sup>32</sup> Yūcuán na te ni jinū Jesús jíin tēe cáscuáha jíin yá ñn lugar nuū naní Getsemaní. Te ni cahān yā jíin de:

Yāhá-ni cucōo ró, te na quihīn rī cacān tahú rī, achí yá.

<sup>33</sup> Te ni jeca ya Pedro jíin Jacobo jíin Juan, cuahān yā jíin de. Te ni quejéé yá cucuíhyá ndasí ni yā te cúxií ni yā jeē quíji jñūndóho siquī yā.

<sup>34</sup> Te ni cahān yā jíin de: Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró, achí yá.

<sup>35</sup> Te ni jica ya jecu gā, te ni jecuiñi yití yá ni jequin ya nuū yā nuū ñūhun. Te ni jicān tahú yā nuū Yāa Dios jeē núu cuu te ma ndóho ya jñūndóho jeē quejéé quiji siquī yā.

<sup>36</sup> Te suhva ni cahān yā: Tátá maá ná, ndīhi-ni jñiñu cuu sáha maá ní. Te tejiyo ní jñūndóho yáha jēe ma quíji siquī ná. Te nasūu jēe cuní maá ná, chí jeē cuní maá ní na cóo, achí yá.

<sup>37</sup> Te ni ndee yā nuū ndinúní tēe cáscuáha jíin yá, te ni jito ya jeē cáquixi de. Te ni cahān yā jíin Pedro:

Simón, ¿á quíxí ró? ¿A tu ní cánda ró condito ró jíin rí vēsú ñn hora?

<sup>38</sup> Coó ndito ni ró te cacān tahú ró jeē chindéé ñáhán yá rohó jeē ma sáha ró cuéchi jeē coto ndee jeneé rohó. Chi cúní ndije ánuá ró squícu vāha ró, te yiqui cúñu ró chí tu fuerza, achí yá.

<sup>39</sup> Te ni jehēn tucu ya, ni jicān tahú yā, te suni jñūhun yúcuan ní cahān yā.

<sup>40</sup> Te ni ndee ya nuū de, te ni jito ya jeē cáquixi tucu de, chí yōhyo cáji de māhná. Te tuá ni cánihīn de jñūhun stío cuíñí de nuū yā.

<sup>41</sup> Te ni ndee yā jeē vuelta unī, te ni cahān yā jíin de:

Vijna te cusū ró te ndetātu ró. Te tuú chí je ni cuu, chí je ni quee hora, te ruhū, Yāa ní nduu tēe, natūu ri te jñi tēe cáhiyo cuéchi ruhū.

<sup>42</sup> Ndocuiñi jijnáhan ró, chí je vēji tēe nastúu ruhū, te quihīn yō jíin de. Achí yá.

*Jeē ní cajñi de Jesús*

(Mt. 26.47-56; Lc. 22.47-53; Jn. 18.2-11)

<sup>43</sup> Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chí sutū cácujuhnu jíin tēe cástéén tutu ley jíin tēe jénu cándacu jñiñu, ni cataj de tēe ún.

<sup>44</sup> Te Judas, tēe nastúu ya ún, je ni jēhe de ñn seña nuū tēe un jijnáhan, chí ni cachi de:

Tēe jeē téchūhu rí un cúu. Te jñi ró jijnáhan ró quihīn ró jíin, te ma siaá cuítē ró, achí de.

<sup>45</sup> Te ni quee de nde nuū Jesús, te ni cahān de jíin yá:

Maestro, Maestro, achí de.

Te ni techūhú de ya.

<sup>46</sup> Te tāca gá tēe un ní cajñi de ya, te cuango de jíin yá.

<sup>47</sup> Te ñn tēe íne jíin yá ni tava de espada de, te ni jehnde de sōho ñn mozo maá sūtū cujénu ga.

<sup>48</sup> Te ni cahān Jesús jíin ñayuu cuehē ún:

¿Te va tēe cuíhná cúu ri jeē véjicoo ró jíin espada jíin yujnu jñi ró rúhū jeē súcuan?

<sup>49</sup> Tāca quívī ni ine ri jíin ró jijnáhan ró ini templo cáhnu, ni steén rī jñūhun,

te tu ní cajñi rú rúhū. Te súcuan cásáha ró návāha na squícu jeē cahán tutu iī, achí yá.

<sup>50</sup> Yūcuán na te ndihi tēe cáscuáha jíin yá, ní castóo de ya, ní cajinu de cuango de.

### *Tēe suchí jeē ní jinu*

<sup>51</sup> Te ñn tēe suchí, ndíquín de ya cuahān de jíin yá. Te ndíi de máá ñn sahma cuitá. Te ni cajñi tēe ún de.

<sup>52</sup> Te máá sahma cuitá un ní canihñ. Te ni jinu máá ññi de cuahān de.

### *Jeē ní indichi Jesús nuū junta tēe cácujeñnu ga*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Yūcuán na te ni jinūcoo de jíin Jesús nuū sutū cujeñnu ga. Te tāca sūtū cácujeñnu jíin tēe jéñnu cándacu jniñu jíin tēe cástéén tutu ley, ni candutútú de.

<sup>54</sup> Te Pedro chi jíicá-ni ndíquín de ya, te ni jinū de nde ini patio sutū cujeñnu ga. Te ni cucōo de jíin táca policía, násaā de ññuhñ.

<sup>55</sup> Te sutū cácujeñnu jíin ndihi tēe cásáha junta cujeñnu ga, ní canducú de cuēchi síquī Jesús, chi cahni de ya cácuñi de. Te tu ní canihñ de.

<sup>56</sup> Chi cuehē de ni cacahān yaá síquī yā, te tu ní quíjnāhan jñuhun ni cacahān de.

<sup>57</sup> Yūcuán na te ni candocuiññi sava de, te ni catee de cuēchi síquī yā, achí de:

<sup>58</sup> Máá ná ni cajini ná cáhán de jeē canu de templo yáha jēe ní cuvāha ni casáha tēe, te nuū uní quivī te nacani de inga jeē násūu jíin ndaha tēe cuvāha, achí de. Achí jíjnāhan.

<sup>59</sup> Te ni jñuhun yáha tu ní quíjnāhan tucu jeē cácahān de síquī yā.

<sup>60</sup> Yūcuán na te sutū cujeñnu ga ni ndocuiññi de nuū ñáyuu cuehē ún, te ni cajñuhñ de Jesús:

¿Naun tu cáhán cuiti rō? ¿A íyó ndáā jeē cácahān tēe yáha síquī rō? achí de.

<sup>61</sup> Te máá yá tu ní cáhán cuiti yā, chi tú na vé ni stío cuíñi yā. Te sutū cujeñnu ga ni cajñuhñ tucu de ya:

¿A máá ró cúu Cristo, Sēhe Yaā vāha jeē cujeñnu? áchí de jíin yá.

<sup>62</sup> Te ni cahān yā:

Suu ri cúu. Te coto ró jēe ruhū, Yaā ní nduu tēe, condee rī lado váha Yaā iyó poder, te ndiji ri ichi ándiví jíin vícō, achí yá.

<sup>63</sup> Yūcuán na te sutū cujeñnu ga ni jehnde de sahma de jeē quití ndasí ni de, te ni cahān de:

¿Ndé jíni ññuhñ gá yō testigo núu súcuan?

<sup>64</sup> Chi je ni cajini ró jēe cahán de jñuhun ndevāha jeē quití ni Yaā Dios, chi sáha de máá de Sēhe Yaā Dios. ¿Te ndese cájeni ni rō? Achí de.

Te ndihi de ni cacahān jeē na cúu yā.

<sup>65</sup> Te sava de ni catesihí de nuū yā, te ni cajesi de sahma nuū yā, te ni cacani de ya. Te cácahān de jíin yá:

Cachi ndé ñn cúu jeē ní cani rōhó, achí de.

Te tāca tēe policía ni cacani de nuū yā.

### *Jeē ní cachi Pedro jeē tu jíini de ya*

(Mt. 26.69-75; Lc. 22.56-62; Jn. 18.15-18, 25-29)

<sup>66</sup> Te íne Pedro ini patio ichi chíji nuū cáhñ de jíin Jesús. Te ni quee ññ ññahan jéjññu vehe sutū cujeñnu ga ún.

<sup>67</sup> Te ni jito ña nuū de jeē néne de násaā de yuñuhñ. Te ni jito vāha ña nuū de, te ni cahān ña:

Róhó chi suni ni jica ró jíin Jesús, tēe ñuu Nazaret, achí ña.

<sup>68</sup> Te máá de tu ní cáchi de, chi ni cahān de:

Tu jíini rī de, ni tu jíini rī na jñuhun cáhán rō, achí de.

Te ni quenda de yéhyí núu quéhe. Te ni cana-ni líhli.

<sup>69</sup> Te ññahan jéjññu un ní jito tucu ña nuū de, te ni quejéé ña cáhán ña jíin ñáyuu cáhñ yūcuán:

Tēe yáha suni jñāhan tāca tēe un cúu, achí ña.

<sup>70</sup> Te máá de tu ní cáchi tucu de. Te ni cunúu jecu gā, te ñáyuu cáhñ yūcuan ní cacahān tucu i jíin Pedro:

Jendaá ndije jeē suni jñāhan de cúu ró, chi tēe Galilea cúu ró, te ñnuú-ni cáhán rō jíin de jíjnāhan de. Achí i.

71 Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíní rī tēe un jéē cácahān rō jnūhun de, áchí de.

72 Yūcuán na te ni cana-ni líhli vuelta uū. Te ni nucūhun ni de jnūhun ni cahān Jesús jíin de: Nde ná tu cana líhli uū jíinu, te yūhu ró te cahān rō unī jíinu jeē tu jíní rō ruhū. Te ni nacani ni de siquī jnūhun ún, te ni ndahyū de.

*Jeē ní indichi Jesús nuū Pilato*  
(Mt. 27.1-2, 11-14; Lc. 23.1-5;  
Jn. 18.28-38)

## 15

1 Te jeē ní cundijin, te sutū cácujuhnu ni candutútú de jíin tēe jéhnú cándacu jniñu, jíin tēe cástéén tutu ley, jíin ndihí tēe cása ha junta cujéhnú ga, te ni casquíjnáhan de jnūhun. Te ni cajihni de Jesús, te cuango de jíin yá nuū Pilato, tēe cúu gobernador.

2 Te Pilato ni cajnūhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájnūhun cáhán rō.

3 Te sutū cácujuhnu un ní cacahān de cuehē cuēchi siquī yā.

4 Te Pilato ni cajnūhún tucu de ya:

¿Naun tu cáhán cuítí rō? ¿A tu jíni ró jéē cuehē cuēchi cácahān de siquī rō? achí de.

5 Te tu ní cáhán cuítí yā ni ñn jnūhun jíin de. Te nahán ní naa ni Pilato ndéhé de nuū yā.

*Jeē ní cundaā jeē cúu yā*

(Mt. 27.15-31; Lc. 23.13-25; Jn. 18.38-19.16)

6 Te íyó costumbre Pilato jeē quiví víco un siaá de ñn tēe íne vecāa, núu na-ni tēe cácuñi ñayuu.

7 Te íyó ñn tēe nání Barrabás, íne de vecāa jíin táca jnáhan de siquī jeē ní candonda de siquī tohō te ni cajehni de ndíyi.

8 Te ni quecoo ñayuu cuehē, te ni cacahān i jíin Pilato jeē na sáha de nájnūhun íyó costumbre de.

9 Te ni cahān Pilato jíin i:

¿A tu cácuñi rō jeē siaá rī tēe cúu Rey rohó ñayuu hebreo? achí de.

10 Súcuñi ni cahān de, chí cúni de siaá de Jesús. Chí je ni jecūhun ni de jeē ní cacucuésún ni táca sūtū un cájito de ya, te jeē yúcuñi ní quijicoo jíin yá nuū de.

11 Te sutū cácujuhnu un ní cascáhán de ñayuu cuehē un jéē váha ga na cácuñi i jeē siaá Pilato Barrabás.

12 Yūcuán na te ni cajnūhún tucu Pilato:

Núu súcuñi ¿te ndese cácuñi rō jeē sáha ri jíin tēe jeē cácahān rō jeē cúu de Rey rohó ñayuu hebreo? achí de jíin i.

13 Te ni cacana jee i:

Cata caa ní de jicā cruz, na cúu de, achí i.

14 Te ni cahān Pilato:

¿Na cuēchi ní sáha de núu súcuñi?

Te ñayuu un ní cacana jee tucu i:

Cata caa ní de jicā cruz, na cúu de, achí i.

15 Te Pilato cúni de jeē na cúsi ní ñayuu jíin de, te ni siaá de Barrabás. Yūcuán na te ni ndacu de jniñu jeē na cáni táca soldado Jesús, jíin jéē cata caa de ya jicā cruz.

16 Yūcuán na te soldado un cuángoo de jíin yá ini patio palacio, jeē sácatā de nuū yā. Te ni canastútú de ndihí jnáhan de.

17 Te ni cachuhun de ya ñn sahma cuehé ndihí jéē cúu sahma rey. Te ni casáha de ñn corona iñu, ni cachuhun de xiní yā.

18 Yūcuán na te ni cacana de:

Nacā jeē váha rey cúu Rey ñayuu hebreo, achí de.

19 Te ni cacani de yujnu xiní yā, te ni casáhi de nuū yā, te ni cajecuiñi yití de nuū yā, casáha de jeē chiñúhún de ya.

20 Te nuū ní cuu ni casácatā de nuū yā, te ni catava de sahma cuehé ndihí un, te ni canachuhun de ya sahma máá yá. Te ni caquenehen de ya jeē cata caa de ya jicā cruz.

*Jeē ní cacata caa de ya jicā cruz*

(Mt. 27.32-44; Lc. 23.26-43; Jn. 19.17-27)

21 Te ñn tēe nání Simón ñuu Cirene, tēe cúu tátá Alejandro jíin Rufo,

vendiji de jeē ni jéhēn de rancho. Te ni yāha de yūcuán, te ni catejníñu soldado un de jeē cóndiso de cruz yā.

<sup>22</sup> Te cuangoo de jíin yá ñn lugar nuū naní Gólgota, jeē cuní cahān Lugar Yiqui Xíní.

<sup>23</sup> Te ni cajēhe de vino jeē ni sácā núu jíin súje uvuā jeē cóho ya, te tu ní jíhi ya.

<sup>24</sup> Te ni cacata caa de ya jicā cruz. Te ni casáha de sorteo jeē siquí ndese nihīn ñn ñn de sahma ya.

<sup>25</sup> Te cahīn ni cacata caa de ya.

<sup>26</sup> Te jñuhun ni catee de xinī cruz cahān na siquí ni jihī yā: Yāha cúu Rey ñayuu hebreo, achí.

<sup>27</sup> Te suni ni cacata caa de uū tēe cuíhná núu uū gā cruz, ñn de lado váha ya, te inga de lado jecó yá.

<sup>28</sup> Te ni squícu jñuhun cáhān tutu ñ: Ni casquínáhan de ya jíin tēe casáha neé, achí.

<sup>29</sup> Te ñayuu cáyāha yūcuán cáscuicó i xinī i, te cácahān neé i:

Jājaān. Róhó chi cáhān rō jeē cánu rō templo cáhnu, te nuū uní quivī te nucondichi sáha ró.

<sup>30</sup> Núu súcuan te jnama ró máá ró, te nuu ró jicā cruz viī, achí i.

<sup>31</sup> Te suni súcuan ni cacahān catá sutū cácujuhnu jíin tēe cástéén tutu ley, te achí de cácahān maá de:

Núu inga ñayuu ni jnama de, ¿te naun tu cúu jnama de máá de vijna?

<sup>32</sup> Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, achí de jíináhan de.

Te tēe cándita caa jíin yá, suni súcuan ni cacahān neé de.

### *Jeē ni jihī Jesús*

*(Mt. 27.45-56; Lc. 23.44-49; Jn. 19.28-30)*

<sup>33</sup> Te nuū ní cuu cahuxī uū, te ni cunee ní cáhnu nde cahunī.

<sup>34</sup> Te nuū ní cuu cahunī, te ni cana jee Jesús:

Eloi, Eloi, ¿lama sabactani? achí yá. Te jñuhun un cuní cahān: Yaā Dios maá ná, Yaā Dios maá ná, ¿naun ni stóo ní sáña?

<sup>35</sup> Te sava ñayuu cáhīn yūcuan, ní cajini i jñuhun ún, te ni cacahān i:

Cuni nahín, chi cána de xinī Elías, tēe ni nacani jñuhun Yaā Dios jehahán, achí i.

<sup>36</sup> Te ni jinu ñn tēe, ni jechundaji de cachī nuū vinagre iyá. Te ni tee de xinī ñn yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiiji Elías nasnúu de, achí de.

<sup>37</sup> Te máá Jesús ni cana jee ya, te ni jihī-ni ya.

<sup>38</sup> Yūcuán na te sahma ndíta caa jeē ndihyú cuarto ñ ini templo cáhnu, ni ndatā sava sava nde xinī te nde nuū jehé.

<sup>39</sup> Te tēe ñuu Roma jeē cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yaā Dios cúu tēe yáha, achí de.

<sup>40</sup> Te suni cáhīn sava ñahan, cándēhe jíca ña. Te uní ña cácuu María ñuu Magdala, jíin María naná José jíin Jacobo suchí, jíin ñahan naní Salomé.

<sup>41</sup> Te ñahan yáha ní candiquín ña ya, ni cajejníñu ña nuū yā nde náa jíca ya Galilea. Te suni cáhīn cuehē gā ñahan jeē ni jéngoo jíin yá ñuu Jerusalén.

### *Jeē ní quindūji Jesús*

*(Mt. 27.57-61; Lc. 23.50-56; Jn. 19.38-42)*

<sup>42</sup> Te ni ini quivī ún. Te quivī sátūhva cúu, chi sajnē cúu quivī ndétátú.

<sup>43</sup> Te ni quee José, tēe ñuu Arimatea. Te cúu de ñn tēe cújehnu nuū junta cujehnu ga. Te suni ñuhun ni de jeē quiiji quivī jeē ndacu Yaā Dios jniñu. Te tu yúhú de chi ni quivī de nuū Pilato, ni jicān de yiqui cúñu Jesús.

<sup>44</sup> Te Pilato chi nāa ni de jeē yachí ni jihī yā. Te ni cana de capitán, te ni cajñuhún de tēe un núu je ni jihī yā.

<sup>45</sup> Yūcuán na te ni cucáhnu ni de jeē ni cáhān capitán jíin de, te ni jēhe de jñuhun jeē quihin José yiqui cúñu yā.

<sup>46</sup> Te José ni jeen de ñn sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini ñn yaū jeē quindūji ndīyī, jeē ní caan jicā ñn cava. Te ni jesi de ñn yuū yuhu yáú un.

47 Te María ñuu Magdala, jíin María naná José, ni cajito ña nuū ní cachindūji de ya.

*Jeē ní natecu Jesús*

*(Mt. 28.1-10; Lc. 24.1-12; Jn. 20.1-10)*

## 16

1 Te ni ini quivī ndétātú, te María ñuu Magdala, jíin María naná Jacobo, jíin Salomé, ni cajeen ña tãcá perfume jeē quíchuhun ña yiqui cúñu yā.

2 Te jenéhen quivī domingo, jeē ní cane niāndii, te ni jinūcoo ña nuū ní yindūji ya.

3 Te cácahān ña:  
¿Ndé níhīn yō tēe tejiyo yuū ndihyú yuhu yáú? áchí ña.

4 Te ni candacoto ña, te ni cajito ña jeē jé ni cujiyo yuū cáhnu un cuáhān.

5 Te ni quivīcoo ña ini yaū ndīyi. Te ni cajito ña ñn ndajéhé Yaā Dios jeē cáa nájnūhun tēe suchí, néne ya ichi lado váha, ñūhun ya ñn sahma cuijín cáni. Te ni cayūhú ña.

6 Te ni cahān yā jíin ña:  
Ma yūhu ró jijnáhan ró. Chi vecondēhe ró Jesús ñuu Nazaret, Yaā ni jíihī jicā cruz. Tuá yā yāhá, chi je ni natecu yā. Yāhá condéhé ró nuū ní cachindūji de ya.

7 Cuánungoo te cachi rō nuū tēe cáscuáha jíin yá, jíin núū Pedro, jeē xíhna gā maá yá jinū Galilea, te sáa te najinūcoo de. Te yūcuán coto de nuū yā, nájnūhun ni cahān yā jíin de nde saá, áchí yá jíin ña.

8 Yūcuán na te ñahan un ní quendacoo ña nuū ní yindūji ya, te cájino ña cuangoo ña. Chi quísi i ña jeē cáyūhú ña. Te tu ní cácachi cuiti ña nuū ní ñn, chi cáyūhú ña.

*Jeē ní nane Jesús nuū María ñuu Magdala*

*(Jn. 20. 11-18)*

9 Te Jesús ni natecu yā jenéhen quivī domingo. Te xíhna gā ni nane ndijin yā nuū María ñuu Magdala, ñahan jeē ní quenehen ya uxā tachī ini.

10 Te cuahān ña cuacastūhún ña nuū tãca tēe ni cajica jíin yá jeē ní nane

ya nuū ña. Te cácuquíhyá ni de te cándahyū de.

11 Te nuū ní cajini de jnūhun jeē ní jito ña nuū yā jeē técu yā, te tu ní cácaandíje de jnūhun cáhān ña.

*Jeē ní nane ya nuū uū tēe cáscuáha jíin yá*

*(Lc. 24.13-35)*

12 Yūcuán na te ni quendacoo uū jnáhan tēe ún, cájica de cuahān de ichi rancho, te sñn modo ni nane ndijin yā nuū de.

13 Te ni canandicó de, ni cacastūhún de nuū tãca gá jnáhan de. Te ni tu ní cácaandíje tucu jnáhan de jeē cácahān ndīndúú de.

*Jeē ní tejniñu ya de nacani de jnūhun*

*(Mt. 28.16-20; Lc. 24.36-49; Jn. 20.19-23)*

14 Te cúcuéé gá te ni nane ndijin yā nuū ndihúxí ñn de jeē cáyūcú de mesa cáyeji de staā. Te ni cahān yā nuū de, chí níhni ni de jeē tu cácaandíje de jeē cácahān jnáhan de un, jéé ní natecu yā ni cajito de ya.

15 Te ni cahān yā jíin de:

Cuángoo jíin náhan ró ní ñayiví, te nacani ró jnúhun ri nuū tãca ñayuu ndese jnáma ri i.

16 Te ñayuu candíje te cuandute i, chí cácu i. Te ñayuu tú candíje, chí jnahnū ndetū i.

17 Te ñayuu candíje, sáha i tãcá jniñu jéhnu yáha jeē steén jeē iyó rí jíin i: Jíin síhví rí quenehen i tachī ini ñayuu. Te cahān i tijni yuhu jéé.

18 Te núu ni jññi sanaa i coō, chí núu ni jññi i veneno, te ma sáha daño jíin i. Te suni soó i ndaha i síquí ñayuu cácuñu, te nduvāha. Achí yá jíin de.

*Jeē ní ndaa ya cuanuhun yā andiví*

*(Lc. 24.50-53)*

19 Yūcuán na te nuū ní ndihī ni cahān maá Jítóho yō jíin de jíin náhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhnu ya.

20 Te máa de ni quendacoo de, ni canacani de jnūhun ya tãca lado ndese jnáma ya ñayuu. Te máa Jítóho yō ni chindéé ñáhán yá de. Te ni jēhe ya fuerza jeē sáha de tãcá jniñu jéhnu jeē



steén jeē iyó ndáā jnūhun cánacani de.  
Te ni cuu. Amén.

## JNUHUN VAHA NI TEE SAN LUCAS

<sup>1</sup> Cuehē tēe ni cajicu de ni catee yúcun de historia Jesús, tãcá jniñu jeē ni sáha ya ni cajito yó.

<sup>2</sup> Te ni catee de tãca jnúhun jeē ní cacastúhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya.

<sup>3</sup> Te máá ná, suni ni nanducú yúcun ná tãca jnúhun ya, nde nuū ní quejéé. Te ni jeni ni na jéé suni íyó váha jeē téé cájí ná tãca jnúhun yáha núú ní, amigo Teófilo.

<sup>4</sup> Te súcuan te cuni ni jéé iyó ndáā tãca jnúhun jeē ní cacastúhún i nuū ní.

*Jeē ní cachi ndajéhé jeē cacu Juan tēe scuándute*

<sup>5</sup> Tiempo jeē ní cuu Herodes rey región Judea, te ni íyo ñn sutū ñayuu hebreo, naní de Zacarías, te grupo Abías cúu de. Te ñasihí de naní ña Elisabet, te suni sēhe yucún maá sūtū Aarón cúu ña.

<sup>6</sup> Te ndindúú de cahīyo ndaā de nuū Yaā Dios, te ndaā vāha cásquicu de jniñu ndácu ley maá Jítóho yō Yaā Dios, cájito tãca ñáyuu.

<sup>7</sup> Te tú sēhe de íyó, chi ñahan númá cúu Elisabet, te je jéhnú ndindúú de.

<sup>8</sup> Te ñn quivī te jéjníñu Zacarías nuū jniñu jeē cúu de sutū nuū Yaā Dios, chi ni quee quivī jeē ndívī grupo de.

<sup>9</sup> Te ni casáha de sorteo, nájnūhun íyó costumbre sutū. Te ni sáha tocar Zacarías jeē quivī de ini cuarto ñi templo Jítóho yō Yaā Dios, te cahmu de sūje cūtú.

<sup>10</sup> Te hora jeē cayú sūje cūtú, te tãca ñáyuu cuehē cáhīn i fuera, cájicān tahú i.

<sup>11</sup> Te ni cane ñn ndajéhé maá Jítóho yō nuū de, ín ya lado váha altar nuū jéhnú de sūje cūtú.

<sup>12</sup> Te ni cunéé ni Zacarías ni jito de nuū yā, te yōhyo ni yūhú de.

<sup>13</sup> Te ni cahān ndajéhé un jíin de: Zacarías, ma yūhu ró, chi je ni chihi Yaā Dios cuenta jeē ní jíicān tahú rō.

Te ñasihí ró Elisabet, scácu ña ñn sēhe yí, te snání ró i Juan.

<sup>14</sup> Te yōhyo cusī ni rō. Te cuehē ñayuu cusī ni jeē cácu i.

<sup>15</sup> Chi kujéhnú sēhe ró sáha máá Yaā Dios. Te ma cóho i vino ni ndixi cuí. Te cunuú máá Espíritu Santo jíin i, nde ná tu cacu i.

<sup>16</sup> Te sáha i jeē cuehē ñayuu nación rō Israel ndívīcoo i nuū Jítóho i Yaā Dios.

<sup>17</sup> Te xīhna gā Juan quiji nacani jnúhun Jítóho yō Jesús, te sáá te quiji ya. Te sáha i nájnūhun ni sáha Elías, tēe ni nacani jnúhun Yaā Dios jenahán, te coneváha i poder jeē nácani i jnúhun, nájnūhun ni coneváha Elías. Te sáha i jeē tãca tátá ndumanī de jíin séhe de. Te suni sáha i jeē ñáyuu ñhni ni cuatáhú i nuū Yaā Dios, nduu i ñayuu ndaā. Súcuan sátūhva i ñayuu návāha candíje i máá Jítóho yō jeē quíji ya. Achí ndajéhé.

<sup>18</sup> Te Zacarías ni cajnúhún de ya:

¿Ndese cucáhnú ni na núu jendaá cúu? Chi tēe jéhnú cúu ná, te suni jéhnú ñasihí ná, áchí de.

<sup>19</sup> Te ni cahān ndajéhé un jíin de:

Máá rí cúu Gabriel, te íne ri nuū Yaā Dios, jejniñu ri nuū yā. Te ni tají yá ruhū vēji ri cahān rī jíin ró, te nácani ri jnúhun vāha yáha núú rō.

<sup>20</sup> Te jeē tu ní cándíje ró jnúhun ni cahān rī, te cuñíhín ró, te ma cúu cahān rō, chi nde na cácu sēhe ró. Te squícu nahín jnúhun cáhán rī yāhá, na quée quivī, achí ndajéhé.

<sup>21</sup> Te ñayuu cáhīn ichi fuera, cándetu i Zacarías, te cájeni ni i na vé ni cuu jeē cucuée de ini cuarto ñi templo.

<sup>22</sup> Te nuū ní quenda de, te tuá ni cúu cahān de jíin i. Te ni cajecūhun ni i jeē ini templo ni jito ndijin de ñn jeē ni stéén yā nuū de. Te máá seña na ni sáha de nuū i, chi ni cuñíhín de.

<sup>23</sup> Te nuū ni jínu quivī ni jejniñu de ini templo, te cuanuhun de vehe de.

<sup>24</sup> Te ni cuu jecu quivī, te ñasihí de Elisabet ni jecūhun sēhe ña. Te ni íyo ña vehe ña uhūn yoō jeē tuá nde ní jéhnú ña. Te jéni ni ña:

25 Súcuan ni sáha máá Jítóho yō jíin rí, te ni tejiyo ya jnūhun jeē cúcanu rī nuū ñáyuu jeē tú sēhe ri, jéni ni ña.

*Jeē ní cachi ndajéhé jeē cacu Jesús*

26 Te nuū iñú yoō, te ni tají Yaā Dios ndajéhé yā Gabriel, ni jehēn yā ñin ñuu naní Nazaret, ndañúū Galilea.

27 Te ni jehēn yā nuū ñin sūchi síhí nání María. Te je ni cundaā jeē qui-jnáhan ña jíin ñin tēe nání José, te sēhe yucūn rey David cúu de.

28 Te ni quiví ndajéhé un núū ndeé ña, te ni cahān yā:

Tandii, nacā ndetū cúu ró. Chi máá Jítóho yō Yaā Dios iyó yá jíin ró, te ni sáha ya jeē yóhyo ndetū gā cúu ró núū tāca gā ñahan, áchí yá.

29 Te nuū ni jíto ña nuū yā, te ni cunéé ni ña jeē súcuan cáhán yā, te jéni ni ña naun cáhán yā súcuan jíin ña.

30 Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē váha jíin ró.

31 Te jecūhun sēhe ró te scácu ró ñin sēhe yí, te snání ró i Jesús.

32 Te kujéhu i, te conaní i Sēhe Yaā kujéhu téyí. Te máá yá jeē cúu ya Jítóho yō Yaā Dios, sáha ya jeē cuu i rey, nájnūhun jíi i David ni cuu de rey.

33 Te ní cáni ndacu i jniñu nuū ñáyuu nación Israel. Te ma ndíhi cuiti jeē ndácu i jniñu. Achí ndajéhé.

34 Yūcuán na te ni cajnūhún María:

¿Ndese coo jeē ni cáhán ní? Chi ná tu coo yí ná, áchí ña.

35 Te ni cahān ndajéhé un:

Máá Espíritu Santo quiji síquī rō, te poder máá Yaā kujéhu téyí sáha ñin jniñu jéhu jíin ró. Te jeē yúcuan máá sūchi íi jeē cácu, quihi cuenta i nuū Yaā Dios, te cahān ñayuu jeē Séhe Yaā Dios cúu i.

36 Te suni cástūhun rí nuū rō jeē jnáhan ró Elisabet, suni scácu ña ñin sēhe vésú je jéhu ña. Te vijna iyó iñú yoō jeē tuá cácahān ñayuu jeē cúu ña ñahan númá.

37 Chi ndíhi-ni cuu sáha Yaā Dios, te tu iyó ni ñin jeē ma cúu sáha ya, achí ndajéhé un.

38 Yūcuán na te ni cahān María:

Cuu núu súcuan, chi sáha ná táca jniñu ndácu Jítóho yō Yaā Dios, te na cóo jíin ná nájnūhun ni cachi ní, áchí ña.

Te máá ndajéhé un cuáhān-ni ya.

*Jeē ni jécondēhé María Elisabet*

39 Te ni cuu jecu quiví, te yachí cuahān María, ni caa ña yucu cuahān ña ñin ñuu región Judea.

40 Te ni jinū ña vehe Zacarías, te ni cahān ña jíin Elisabet.

41 Te nuū ní jini Elisabet jeē cahán María jíin ña, te sūchi ñúhun chíji ña ni canda-ni i. Te ni cunuú Espíritu Santo ini anuá ña.

42 Te ni cahān jee ña:

Ni sáha Yaā Dios jeē yóhyo ndetū gā cúu ró núū tāca gā ñahan, jíin jéé yóhyo ndetū sēhe ró.

43 ¿Te ndese cúu jeē ní quee naná máá Jítóho rī nuū rī? Chi tu cújéhu cuiti rī.

44 Chi jeē ní jini-ni ri jnūhun ni cahān rō jíin rí, te sūchi ñúhun chíji ri ni canda i jeē cúsiñ ni i.

45 Te nacā ndetū rō jeē ní candíje ró, chi squícu nahín tāca jnūhun ni cahān máá Jítóho yō jíin ró. Achí Elisabet.

46 Yūcuán na te ni cahān María: Cáhán rī jeē kujéhu ndasí máá Jítóho yō Yaā Dios,

47 te cúsiñ ni rī jíin Yaā Dios, Yaā jnáma ruhū.

48 Chi ni sáha ya cuenta ruhū, vésú tu cújéhu ri.

Te na squícu ri jniñu ndácu ya.

Te nde vijna te tāca ñáyuu jeē nácacu, cahān i jeē yóhyo ndetū rī.

49 Chi Yaā jní ndíhi poder, ni sáha ya jniñu jéhu jíin rí.

Te Yaā íi ndoo cúu ya.

50 Te ní cáni cundáhú ni yā tāca ñáyuu ndíso íyo nuū yā.

51 Ni sáha ya jniñu jéhu jíin poder yā, chi ni scúnu ya ñayuu casándúxí máá,

52 te ñayuu cácujehu, ni quende ya jeē kujéhu i.

Te ñayuu ndahú chi ni sajehu ya i,

53 te ñayuu cájiī sōco ni jēhe ya jeē cáji vāha i.

Te ñayuu cucá ní natajé yá i súcuan-ni.

54 Te ni chindéé ñáhán yá yohó, ñáyuu nación Israel, jeē cácuu yó mozo yā,

te tu náa ni yā jeē cundáhú ni yā yohó.

55 Chi súcuan ni jejnūhun ya nuū tāca jíí yō,

nuū Abraham jíín tāca yúcūn de jeē cóo ní cáni.

Achí María.

56 Te ni condee ña jíín Elisabet nájnūhun unī yoō. Yūcuán na te cuanuhun ña vehe ña.

*Jeē ní cacu Juan tē scuándute*

57 Te ni jinū quiṽi jeē scácu Elisabet sēhe ña, te ni scácu ña ñn sēhe yíí.

58 Te tāca ñáyuu ndeé yajni jíín ña jíín tāca jnāhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jnūhun sñ ni jíín ña.

59 Yūcuán na te nuū uná quiṽi jeē ní cacu i, te ni jengoo ñáyuu ni sáha i circuncidar sūchi yíquín un. (Te yūcuán cúu ñn jnunī nuū yíqui cúñu tāca sūchi yíí hebreo jeē steén jeē cácuu i ñáyuu Yaā Dios.) Te snání i sūchí un síhví tátá i Zacarías nuū.

60 Te ni cahān naná i:

Ma cúu, chí Juan conaní i, áchí ña.

61 Te ni cacahān i jíín ña:

¿Te naun? Chi tú ni ñn jnāhan ró nání súcuan, áchí i.

62 Yūcuán na te jíín seña ni cacajnūhún i tátá sūchí un ndese cúní de jeē cónaní i.

63 Te máá de ni jicān ñn tutu, te ni tee de: Juan conaní i. Te tāca ñáyuu un ní canaa ni i cájito i.

64 Te ni nduvāha Zacarías jeē ní cuñíhín de, te ni quejéé de cáhán de jeē yóhoyo vāha Yaā cúu Yaā Dios.

65 Te tāca ñáyuu ndeé yajni jíín de, yóhoyo ni canaa ni i. Te ní yucu región Judea ni jité núu tāca jnúhun yáha jeē súcuan ni cuu.

66 Te tāca ñáyuu jeē ní cajini jnūhun, ni quejéé i cánacani ni i, te cácajnūhun jnāhan i:

¿Ndesee coo na cuéhnu sūchi yáha? áchí i.

Chi máá Jítóho yō yóhoyo ni sáha ya jeē váha jíín i.

*Jnūhun luu jeē ní nacani Zacarías*

67 Te tátá i Zacarías ni cunuú Espíritu Santo jíín de, te ni nacani de jnūhun ni steén Yaā Dios nuū de:

68 Yóhoyo vāha Yaā cúu máá Jítóho yō, Yaā Dios yohó ñáyuu Israel,

chi ni quiji ya nuū yō jeē cácuu yó ñáyuu yā, te ni jnama ya yohó.

69 Te ni jeni ya ñn Yaā iyó poder jeē jnáma ya yohó,

te Yaā ún cacu yucūn mozo yā rey David.

70 Chi súcuan ni jejnūhun ya, ni cacahān tāca tēe ndoo ánuá jeē ní canacani de jnūhun ya jennahán.

71 Chi ni cacahān de jeē jnáma ya yohó núu jeē cájito uhū yohó, jíín núu jeē cáquití ni nuū yō.

72 Chi ni cundáhú ni yā tāca jíí yō jijnāhan,

te tu ní náa ni yā contrato ñi yā.

73 Chi suu un ní jejnūhun téyí yá nuū jíí yō Abraham,

74 suu jeē jnáma ya yohó núu ñáyuu cájito uhū yohó,

návāha cuajníñu yó núu yā, te ma yūhu yó i.

75 Te coo ndaā coo ndoo ánuá yō, cuajníñu yó núu yā tāca quiṽi jeē cótecu yō.

76 Te róhó sūchi lúlí, cuu ró tēe nacani jnūhun Yaā cujéñu téyí.

Chi cosnūu ró ichi núu máá Jítóho yō, návāha sátūhva ró ñáyuu, te sáá te quiji ya.

77 Te castūhun ró nuū ñáyuu máá yá jeē jnáma ya i,

jíín jéé cóne cáhnu ni yā nuū tāca cuéchi i.

78 Chi Yaā Dios máá yó, vāha ni yā te cundáhú ni yā yohó.

Jeē yúcuan tají yá máá Yaā jeē sáha jeē cundijin ini anuá yō, quiji ya nde andíví,

79 návāha jecūhun ni yohó jéé cáyūcu nájnūhun nuū néé nuū jé yajni cuu yō.

Te chuhun ya yohó ichi nuū cóo ndeyí coo sñ ni yō.

Achí Zacarías.

80 Te sūchi lúlí un ní jehnu i te ni ije i jíín jnúhun ya. Te ni condee i nde

nuū ñúhun téhé ndé quiv̄í ní quenda ndijin i nuū ñáyuu Israel.

*Jeē ní cacu Jesús  
(Mt. 1.18-25)*

## 2

<sup>1</sup> Te ni cuu jecu quiv̄í, te Augusto, tēe cúu rey, ni ndacu de jniñu jeē coo censo jeē núcosō s̄ihv̄í ndiv̄ii ñayuu ní cáhnu nuū ndácu de jniñu.

<sup>2</sup> Yāha cúu censo x̄ihna ñúhún jéē ní casáha de ná ni cuu Cirenio gobernador nación Siria.

<sup>3</sup> Te ndiv̄ii ñayuu cuanungoo i ná ñuu ná ñuu maá i jeē nácuāha i s̄ihv̄í i.

<sup>4</sup> Te suni José ni quenda de ñuu Nazaret, ndañū Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de.

<sup>5</sup> Te ni jehēn de návāha nacuāha de s̄ihv̄í de jíin María, chi je yajni quijnáhan ña jíin de. Te ñúhun sēhe ña ni sáha Espíritu Santo.

<sup>6</sup> Te níni cáh̄iin de yūcuán te ni jinū quiv̄í jeē cácu sēhe ña.

<sup>7</sup> Te ni scácu ña sēhe ȳí núú ña, te ni chusúcun ña i sahma cuitá, te ni jequin ña i ini ñn nundōo núú yéji quiti, chi tuá núne mesón condee ña.

*Jeē ní canecoo ndajéhé yā nuū pastor*

<sup>8</sup> Te yajni ñuu Belén cáh̄iin tēe cácuu pastor, te cándito de lanchi de ní niñu jecuāā nde yucu ún.

<sup>9</sup> Te ñn sanaa-ni te ni cane ñn ndajéhé maá Jítóho yō nuū de, te nduva maá Jítóho yō ni ndindēe ní núú cáh̄iin de. Te yōhyo ni cayūhú de.

<sup>10</sup> Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jnūhun vāha nuū rō, te sáha jeē cúsi ndasí ni tāca ñáyuu:

<sup>11</sup> Chi vijna nde ini ñuu David ni cacu ñn Yaā jnama rōhó, te maá Jítóho yō Cristo cúu ya.

<sup>12</sup> Te súcuan nacuni rō sūchi yíquin un, chi ñúsúcun i sahma cuitá te cátu i ini ñn nundōo núú yéji quiti. Achí yá.

<sup>13</sup> Te ñn sanaa-ni te ni canecoo cuehē gā ndajéhé andiv̄í, cáh̄iin ya jíin

ndajéhé un, te cácahān yā jeē yōhyo vāha Yaā cúu Yaā Dios. Te áchí yá:

<sup>14</sup> Yōhyo luu cújéhnū Yaā Dios nde nuū sucún.

Te na ndúvāha ni tāca ñáyuu ñayiv̄i, sáha ya jeē cúsi ni yā jíin i.

Achí tāca ndajéhé.

<sup>15</sup> Yūcuán na te cuanungoo ndajéhé un andiv̄í. Te tēe cácuu pastor ni cacahān de jíjnáhan de:

Na quihín yō nde ñuu Belén, te cuni yō na vé ni cuu jeē ní castūhun máa Jítóho yō nuū yō, achí de.

<sup>16</sup> Te yachī cuangoo de, te ni nanih̄in de María jíin José jíin súchi yíquin un, cátu i ini nundōo núú yéji quiti.

<sup>17</sup> Te nuū ní cajini de nuū i, te ni canacani de jnūhun jeē ní cachi ndajéhé yā nuū de siqūi sūchi yíquin un.

<sup>18</sup> Te ni canaa ni tāca ñáyuu cájini nahín i jnūhun cácahān tēe cácuu pastor.

<sup>19</sup> Te María, ni quendōo tāca jnūhun yáha nuū jeē níjnūni ña, te nácani ni ña siqūi.

<sup>20</sup> Te tēe cácuu pastor cuanungoo de, te ni cacahān de jeē yōhyo vāha Yaā cúu Yaā Dios siqūi tāca jéē ní cajini sōho de jíin jéē ní cajito de, chi ni squicu nahín nájnūhun ni cahān ndajéhé yā jíin de.

*Jeē ní castéen de i nuū Yaā Dios ini templo*

<sup>21</sup> Te ni cuu unā quiv̄í jeē ní cacu ya, te ni casáha de circuncidar sūchi yíquin un. Te ni casnání de i Jesús, chi s̄ihv̄í yúcuan ní cachi ndajéhé yā nuū María nde ná tu jecūhun i.

<sup>22</sup> Te ni jīnu quiv̄í jeē casquicu ña costumbre jeē ndúndoo ña nuū Yaā Dios jijnáhan ña, nájnūhun cáhān ley jeē ní jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá Jítóho yō Yaā Dios.

<sup>23</sup> Súcuan ni casáha de, chi yósó núú tútu ley yā: Tāca súchi ȳí núú jéē cácacu, quihí cuenta i nuū Jítóho yō Yaā Dios, achí tutu.

24 Te suni cuasocō de nájñūhun cáhán ley maá Jítóho yō: Socō rō uū livi chí úū paloma, achí tutu.

25 Te ni iyo ñn tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún váha nuū Yaā Dios cúu de. Te ñúhun ni de jeē quée maá Yaā jnama ñayuu nación de Israel. Te maá Espíritu Santo íyó yá jíin de.

26 Te je ni castūhun yá nuū de jeē ma cúu cuiñi de chi nde coto de nuū Cristo jeē tají maá Jítóho yō Yaā Dios.

27 Te ni steén yā nuū de jeē quihín de templo quiví ún. Te suni tátá naná sūchi yíquín Jesús, ni quivícoo de ini templo jíin i, jeē nácuāha de i nuū Yaā Dios nájñūhun cáhán ley Moisés.

28 Te Simeón ni ñunundee de i, te ni cahān de jeē yóhyo váha Yaā cúu Yaā Dios, te achí de:

29 Tátá Yaā Dios, vijna te cuu cuāha ni jnúhun jeē cuu ná, chi je ni cusí ni ná.

Chi je ni squícu ní jnúhun ni jejnūhun ní nūū sãña jéé cúu ná mozo ni.

30 Chi ni jito jínúū na nūū Yaā jnama sãña jíjnáhan ná.

31 Chi ni jeni ní yá jeē jnama ya táca ñáyuu ñayiví.

32 Te maá yá sáha jeē cündijin ini anuá ñayuu táca nación,

návāha jecūhun ni i siquí ní.

Te sáha ya jeē kujéhnū ñayuu maá ní Israel.

Achí Simeón.

33 Te José jíin náná i cánaa ni de cájini nahín de jñūhun ni cahān Simeón siquí i.

34 Te ni jicān tahu Simeón jehē de jíjnáhan de, te ni cahān de jíin náná i María:

Sūchi yáha vēji i jeē candíje cuehē ñayuu nación yō Israel, te cācu i jíjnáhan i. Te sava i ma candíje i, te jnahnū ndetū i. Chí cúu i Yaā ní tají Yaā Dios, te sa squéhichí ni cuehē ñayuu i.

35 Te súcuan te quenda ndijin ndese cájini ni táca ñáyuu. Te maá ró chí jnahuhū ndasí ní rō coto ró jéé ndóho i. Achí Simeón.

36 Te suni íne ñn ñahan nácani jñūhun Yaā Dios, naní ña Ana. Te sēhe Fanuel, yucūn Aser cúu ña. Te je jéhnū ndasí ña. Te nde ná lulí ña te ni condee ña jíin yí ña uxā cuiyā.

37 Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe ií, chí jéjñíñū ña nuū Jítóho yō Yaā Dios nduú ñuú, te ndite ni ña te jícán tahu ña.

38 Te suni hora un ní quee ña, te ni nacuatáhú ña nuū Yaā Dios. Te ni cahān ña jñūhun sūchi yíquín un jíin táca ñáyuu Jerusalén jeē cáñuhun ni i jeē quée Yaā jnama i.

### *Jeē cuánungoo de ñuu Nazaret*

39 Te ni jíinu ni casquícu de táca jniñū ndácu ley maá Jítóho yō Yaā Dios, te cuanungoo de ñuu de Nazaret, ndañúū Galilea.

40 Te sūchi lulí un ní jehnu i, te ni ije i, te ni cundichí gá i. Te ni sáha Yaā Dios jeē váha ndasí jíin i.

### *Jeē íne sūchi lulí Jesús ini templo*

41 Te ndijnahan cuiyā jéngoo tátá i náná i ñuu Jerusalén, jeē cúu vico pascua.

42 Te nuū ní cuu uxí uū cuiyā i, te cuangoo tucu de Jerusalén, nájñūhun sáha sáha de quiví vico ún.

43 Te ni yāha vico, te cuanungoo de. Te sūchi lulí Jesús, ni quendōo i Jerusalén, te tu ní cájini José jíin náná i.

44 Te cájini ni de jeē cuahán i mēhñū ñáyuu cájica ichi ún. Te ni cajica de ñn quiví, te sáá te ni cananducú de i mēhñū táca jnáhan de jíin ñáyuu cájini jnáhan de jíin.

45 Te tu ní cánanihín de i. Te ni canandicó de cuangoo de Jerusalén, cuananducú de i.

46 Te nuū uní quiví te ni cananihín de i ini templo, néne i mēhñū tēe cástéén tutu ley Yaā Dios, te jíini nahín i jeē cácahān de te cájnūhún i de siquí jnúhun ún.

47 Te táca ñáyuu cájini jñūhun cáhán i, cánaa ni cájito jeē váha cáj i xíní i te váha nástió cuiñí i jñūhun.

48 Te nuū ní cajito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rī cánanducú rí rohó, achí ña.

49 Yūcuán na te ni cahān i:

¿Naun cánanducú ní sãña? ¿A tu cájini ni jéē cánuú cocu ná jíin jniñu Tátá na Yaā Dios? Achí i.

50 Te tu ní cájecūhun ni tátá i náná i jnūhun ni cahān i.

51 Yūcuán na te cuanuhun i jíin de jíinahan de ñuu Nazaret, te ni jendije i nuū de. Te náná i, ni quendōo tāca jnūhun yáha núu jeē níjnūní ña.

52 Te Jesús ni jehnu ga i, te ni cundichí gá i, te cúsi ni Yaā Dios jíin i, te suni súcuan tāca ñáyuu.

*Jnūhun Juan tēe scuándute  
(Mt. 3.1-12; Mr. 1.1-8; Jn. 1.19-28)*

### 3

1 Te ni cuu xahūn cuiyā jeē ndácu Tiberio jniñu ní nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisaniás cúu de gobernador Abilinia.

2 Te sutū cujēhnu ga cácuu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñūhun téhé.

3 Te ni jica nuu de tācá ñuu jeē iyó yajni yūte Jordán. Te cáhán de jíin ñáyuu jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuēchi i.

4 Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán: Coo ñn tēe cana jee nde nuū ñūhun téhé:

Sátūhva ró máá ró jíinahan ró, chi quee maá Jítoho yō.

Te sáha ró jniñu ndaā, chi vēji ya.

5 Te tāca xéhvā na ndúndaā, te tācá yucu jíin loma na ndúnduhvā, te na ndúyóhó ichi yácuá, te na ndúlií ichi ndáyí.

Te ndihí un cúu jeē ndúvāha ndundaā anuá ñayuu nuū yā.

6 Te ndihí i cuni i jeē jnáma Yaā Dios i. Súcuan cahān Juan, achí tutu.

7 Te ni quendacoo cuehē ñayuu, cuahān i nuū de jeē scuándute de í. Te ni cahān de nuū i:

Va sēhe coō cácuu ró, chi xeēn rō nájñūhun coō. ¿A cájeni ni rō jeē cuu cunu ró cācu ró núu castigo xeēn jeē quíji?

8 Núu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cācu ró síquī jeē cácuu ró yúcūn Abraham. Chi cáhán rī jíin ró jeē cuu sáha Yaā Dios jeē tāca yūu yáha nduu sēhe Abraham jeē candíje vāha, te núu cúní yā.

9 Te cácuu ró nájñūhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñūhun je íyó túhva ñn cāa jeē cahnde nde yoho yujnu. Núu súcuan te sáha ya jíin ró nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. Achí de.

10 Te ñayuu un ní cacajñūhún i de:

¿Te ndese sáha ná núu súcuan? Achí i.

11 Te ni cahān de:

Róhó jéē cánevāha uū sahma, na cuáha ró ñn nuū jeē tu névāha. Te róhó jéē cánevāha jeē yéji, suni súcuan na sáha ró, achí de jíin i.

12 Te suni jecu tēe cástútú xūhun renta, ni quecoo de jeē cuándute de. Te ni cacajñūhún de Juan:

Maestro, te máá ná, ¿ndese sáha ná jíinahan ná?

13 Te ni cahān Juan jíin de:

Ma scaá ró cácan rō xūhún, chi máá cúhva-ni jeē ní ndacu jniñu nuū rō, achí de.

14 Te suni ni cacajñūhún jecu soldado:

Te máá ná, ¿ndese sáha ná jíinahan ná? achí de.

Te ni cahān Juan jíin de:

Ma quénde rō ndajniñu ni ñn jíin jnūhun siúhú ni jíin jnūhun stáú yáhu, te cusí ni rō jíin yáhu ró, achí de.

15 Te tāca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan.

16 Te ni cahān Juan jíin i jíjnáhan i:

Ruhū chi jíin ndute scuándute ri rohó. Te vēji ñn Yaā jeē nájnūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájnūhun ñuhūn. Te cújéhnū ndasí yá, chi tú na vé jéhnū cuítí cúu ri nuū yā, ni jeē cuajníñu ri nuū yā vēsú ñn jniñu lúli gá nájnūhun jeē ndají rí vēsú correa ndijēn yā.

17 Te sáha ya nájnūhun sáha tēe scánda trigo, chi sásíin ya ñayuu vāha jíin ñáyuu cunéé, nájnūhun cúndoo trigo jeē quéndā sīn paja. Te nastútú yá trigo yā ndīvi ini yacā yā. Te paja chi jnaa yā nuū ñuhún jeē ma ndahvá cuítí. Achí Juan.

18 Te súcuan te jíin cuéhē gā jnūhun ni stīhví ni de ñayuu un, ní nacani de jnūhun vāha Yaā Dios nuū i.

19 Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu néé súcuan ni sáha Herodes.

20 Te sa víhyá gā ni sáha de jeē neé gá, chi ni chune de Juan vecāa.

### *Jeē ní jendute Jesús*

*(Mt. 3.13-17; Mr. 1.9-11)*

21 Te nde ná tu quívi Juan vecāa, ná ni ine de ni scuándute de tāca ñáyuu, te suni ni scuándute de Jesús. Te jícan tahú yā, te ni nune-ni andíví.

22 Te ni cuun Espíritu Santo ni quee xinī yā, te cáa nájnūhun ñn paloma. Te ichi ándíví ní cahān ñn jnūhun:

Máá ró cúu Sēhe ri jeē maní ndasí rí jíin, te yōhyo cúsiñ ni rí jíin ró, achí.

### *Lista ñayuu yucūn ní quiji Jesucristo*

*(Mt. 1.1-17)*

23 Te ná ni quejéé Jesús steén yā jnūhun, te íyó yá nájnūhun ocō uxī cuiyā. Te cájeni ni ñayuu jeē sēhe José cúu ya. Te José ni cuu sēhe Elí,

24 te Elí ni cuu sēhe Matat, te Matat ni cuu sēhe Leví, te Leví ni cuu sēhe Melqui, te Melqui ni cuu sēhe Jana, te Jana ni cuu sēhe José,

25 te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai,

26 te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá,

27 te Judá ni cuu sēhe Joana, te Joana ni cuu sēhe Resa, te Resa ni cuu sēhe Zorobabel, te Zorobabel ni cuu sēhe Salatiel, te Salatiel ni cuu sēhe Neri,

28 te Neri ni cuu sēhe Melqui, te Melqui ni cuu sēhe Adi, te Adi ni cuu sēhe Cosam, te Cosam ni cuu sēhe Elmodam, te Elmodam ni cuu sēhe Er,

29 te Er ni cuu sēhe Josué, te Josué ni cuu sēhe Eliezer, te Eliezer ni cuu sēhe Jorim, te Jorim ni cuu sēhe Matat,

30 te Matat ni cuu sēhe Leví, te Leví ni cuu sēhe Simeón, te Simeón ni cuu sēhe Judá, te Judá ni cuu sēhe José, te José ni cuu sēhe Jonán, te Jonán ni cuu sēhe Eliaquim,

31 te Eliaquim ni cuu sēhe Melea, te Melea ni cuu sēhe Mainán, te Mainán ni cuu sēhe Matata, te Matata ni cuu sēhe Natán,

32 te Natán ni cuu sēhe David, te David ni cuu sēhe Isaí, te Isaí ni cuu sēhe Obed, te Obed ni cuu sēhe Booz, te Booz ni cuu sēhe Salmón, te Salmón ni cuu sēhe Naasón,

33 te Naasón ni cuu sēhe Aminadab, te Aminadab ni cuu sēhe Aram, te Aram ni cuu sēhe Esrom, te Esrom ni cuu sēhe Fares, te Fares ni cuu sēhe Judá,

34 te Judá ni cuu sēhe Jacob, te Jacob ni cuu sēhe Isaac, te Isaac ni cuu sēhe Abraham, te Abraham ni cuu sēhe Taré, te Taré ni cuu sēhe Nacor,

35 te Nacor ni cuu sēhe Serug, te Serug ni cuu sēhe Ragau, te Ragau ni cuu sēhe Peleg, te Peleg ni cuu sēhe Heber, te Heber ni cuu sēhe Sala,

36 te Sala ni cuu sēhe Cainán, te Cainán ni cuu sēhe Arfaxad, te Arfaxad ni cuu sēhe Sem, te Sem ni cuu sēhe Noé, te Noé ni cuu sēhe Lamec,

37 te Lamec ni cuu sēhe Matusalén, te Matusalén ni cuu sēhe Enoc, te Enoc ni cuu sēhe Jared, te Jared ni cuu sēhe Mahalaleel, te Mahalaleel ni cuu



sēhe Cainán,

<sup>38</sup> te Cainán ni cuu sēhe Enós, te Enós ni cuu sēhe Set, te Set ni cuu sēhe Adán, te Adán ni cuu sēhe Yaā Dios, chi ni sáha ya de.

*Jeē ní jito ndee jexeén Jesús  
(Mt. 4.1-11; Mr. 1.12-13)*

#### 4

<sup>1</sup> Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū ñūhun téhé ní sáha Espíritu Santo.

<sup>2</sup> Te ni ine ya yūcuan úu xico quivī, te ni jito ndee jexeén yā, chi cúní jeē sáha ya cuēchi. Te tāca quivī ún tu ní yéji cuiti yā, te ná ni yāha quivī ún, te jíi yā sōco.

<sup>3</sup> Yūcuán na te ni cahān jexeén un jíin yá:

Núu máá ró cúu Sēhe Yaā Dios, te cahān rō jeē yuū yáha na ndúu staā caji rō, achí.

<sup>4</sup> Te ni cahān Jesús jíin:

Tuú chi yósó núu tútu iī: Nasūu máni máá jíin stāā cátecu ñayuu, chi suni jíin táca jnúhun cáhán Yaā Dios, achí yá.

<sup>5</sup> Yūcuán na te cuahān jexeén un jíin yá nde xinī ñn yucu súcún, te ñn núnúu-ni ni steén nuū yā tācá nación ñí cáhnu ñayiví.

<sup>6</sup> Te ni cahān jíin yá:

Nuū máá ró cuāha ri jeē kujéhnu ró núu ndivii nación yáha, chi yōhoyo luu cáa. Chi máá rí jñí ndihí, te cuu cuāha ri nuū ndé ñn cúní rī.

<sup>7</sup> Núu súcuan te núu cuiñí yítí ró chiñúhún ró ruhū, te cuāha ndihí ri nuū rō. Achí jexeén.

<sup>8</sup> Te ni cahān Jesús jíin:

Satanás, cujiyo quihín rō, chi yósó núu tútu jeē chiñúhún ñayuu máá Jítoho i Yaā Dios, te nuū máa-ni ya cuajníñu i. Achí yá.

<sup>9</sup> Yūcuán na te cuahān jexeén un jíin yá nde ñuu Jerusalén. Te ni jeni ya xinī torre templo. Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñūhun, chi jnama ya rohó.

<sup>10</sup> Chi yósó núu tútu:

Tejníñu ya ndajéhé yā quijicoo coto rohó.

<sup>11</sup> Te cunundee yā rohó jíin yá, návāha ma cáchihi ró jéhé rō nuū yuú. Achí tutu. Achí jexeén.

<sup>12</sup> Te ni cahān Jesús:

Tuú chi suni yósó núu tútu jeē ma cóto ndee ñayuu Jítoho i Yaā Dios, núu jnama ya i chí tuú, achí yá.

<sup>13</sup> Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

*Jeē ní quejéé Jesús nácani ya jnúhun región Galilea*

*(Mt. 4.12-17; Mr. 1.14-15)*

<sup>14</sup> Te ni cunuú fuerza Espíritu Santo ini Jesús, te cuanuhun yā Galilea. Te ñí región yajni yūcuan ní jítē núu jnúhun ya.

<sup>15</sup> Te ni steén yā jnúhun ini tācá vehe iī sinagoga, te ndihí ñayuu ni cajejnúhún i ya.

*Jeē cuánuhun yā ñuu Nazaret*

*(Mt. 13.53-58; Mr. 6.1-6)*

<sup>16</sup> Te ni najinū yā ñuu Nazaret nuū ní jehnu ya. Te quivī ndétátú ni quiví ya ini vehe iī sinagoga, nájnūhun sáha sáha ya. Te ni ndocuiñí yā jeē cahu ya tutu iī.

<sup>17</sup> Te ni cajēhe de tutu ni tee Isaías, tēe ni nacani jnúhun Yaā Dios nde jenahán. Te ni nune ya tutu ún, te ni nanihín yā nuū yosó jnúhun ni cahu ya:

<sup>18</sup> Espíritu máá Jítoho yō Yaā Dios iyó yá jíin rí,

chi ni tejníñu ya ruhū jeē nácani ri jnúhun vāha nuū ñayuu ndahú.

Te ni tají yá ruhū vēji ri jíin jnúhun jeē ndúvāha ni ñayuu cácuuihyá ni.

Te castūhun rí nuū ñayuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni,

te jnama ri ñayuu jeē cándoho i sáha jnáhan i.

<sup>19</sup> Te nacani ri jnúhun jeē ní quee tiempo jeē sáha Jítoho yō Yaā Dios jeē váha ñayuu.

Achí tutu ni cahu ya.

20 Te ni nacasi yā tutu ún, te ni nacuāha ya nuū tēe jéjníñu ini sinagoga, te ni nucōo ya jeē steén yā jnūhun nuū ñáyuu cáhīn ini sinagoga. Te tācá i cájito vāha i nuū yā.

21 Te ni quejéé yá cahán yā jíin i:

Vijna te ni squícu jnūhun cáhán tutu iī yāha ní cajini sōho ró, áchí yá.

22 Te ndivii i ni cacahān jeē váha tēe cúu ya, te cánaa ni i jeē ní cajini i tāca jnúhun luu ni cahān yā. Te ni cacajnúhun jnáhan i:

¿A násūu séhe José cúu tēe yáha?

23 Te ni cahān yā jíin i:

Jíní vāha ri jeē cájeni ni rō cahān rō jnūhun yátá yáha jíin rí: Tēe tájna, sátájna ró maá ró núu súcuan. Te jnūhun yáha cúni cahān jeē nájnūhun ni nasávāha ri cuehē ñayuu cácuñu ini ñuu Capernaum ni canihīn rō jnūhun, suni súcuan na sáha ri ñuu yō yāhá návāha candíje ró cájeni ni rō. Achí yá jíin i.

24 Te ni cahān gā yā:

Jendaá cahán rī jíin ró, ni ñn tēe nácani jnūhun Yaā Dios, tu cájetáhú ñayuu ñuu maá de nuū de.

25 Te suni jendaá cahán rī jíin ró jeē ni iyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jnūhun Yaā Dios. Te tiempo un tu ní cúun cuiti saū unī cuiyā yosáva, te ni iyo ñn jnamā xeēn ní cáhnu nación.

26 Te tu ní táji Yaā Dios Elías quihīn de nuū ni ñn ñahan viuda nación yō Israel, chi nuū maá ñn-ni ñahan viuda jeē ndeé ñuu Sarepta ndañúū Sidón, ni jehēn de ni jito de jeē ní yeji ña.

27 Te ini nación yō Israel suni ni iyo cuehē tēe ni candoho cuehyī stehyú, tiempo jeē ní cotecu Eliseo, tēe ni nacani jnūhun Yaā Dios. Te ni ñn de tu ní cándíje jeē ndúvāha de sáha Eliseo, chi sa suhva máñuhún-ni Naamán, tēe nación Siria ni nduvāha. Achí yá.

28 Yūcuán na te tāca ñáyuu cáhīn ini sinagoga, yōhyo ni caquiti ni i jnūhun ní cahān yā.

29 Te ni candocuiñī i, te ni caque-  
nehen i ya yatā ñúū ún, cuahān i jíin

yá xinī yúcu íne ñuu ún, chi cáculi i chundahá i ya ñinga ya cava ún.

30 Te tu ní cúu sáha i, chi ni yāha-ni ya mēhñú i cuahān yā.

*Jeē ní quenehen ya tachī ini ñn tēe*  
(Mt. 1.21-28)

31 Yūcuán na te cuahān Jesús ñuu Capernaum región Galilea. Te quivī ndétātu ní steén yā jnūhun nuū ñáyuu.

32 Te ni canaa ni i cajini i jnūhun steén yā. Chi ni steén vāha ya nuū i, chi jíin vāha maá yá.

33 Te ini vehe sinagoga un íne ñn tēe jeē ñūhun tachī xeén ini de. Te tēe un ní cana cóhó de:

34 Cujiyo ní. ¿Naun vēji ní núu na jíjnáhan ná, Jesús ñuu Nazaret? ¿A vēji ní jēe snáa ni sáña, chí naún? Je jíin na ndé ñn cúu ní, chi Sēhe iī Yaā Dios cúu ní. Achí de.

35 Te Jesús ni cahān xeēn yā nuū tachī ún:

Casi yuhu ró te quenda ró ini tēe yáha, áchí yá.

Te ni cotúu-ni tēe un núu tāca ñáyuu, ni sáha tachī ún. Te ni quenda ini de cuahān, te tú na vé ni sáha ga jíin de.

36 Te ndihī ñayuu un ní cayūhú i, te ni cacahān i jíin jnáhan i:

¿Na jnūhun cúu yāha jēe ní cuu súcuan? Chi cújéñu tēe yáha jēe ndácu ñhīn de jniñu nuū tachí, te quéndacoo-ni, áchí i.

37 Te jnūhun ya ni jité núu cuahān ní cáhnu región yūcuán.

*Jeē ní nasávāha ya naná chīsó Simón Pedro*  
(Mt. 8.14-15; Mr. 1.29-31)

38 Yūcuán na te ni quenda Jesús ini vehe iī sinagoga, te cuahān yā te ni jinū yā vehe Simón. Te naná chīsó Simón, yihī xeēn quiji ña, te ni cacahān ndahú de jíin yá jehē ña.

39 Te ni jīta ndeyi ya nuū ña, te ni cahān yā jeē na ndíco quiji ún. Te ni nduvāha-ni ña. Te ni ndocuiñī-ni ña, te ni sáha ña jeē ní yeji yā jíin de.

*Jeē ní nasávāha ya cuehē ñayuu*  
(Mt. 8.16-17; Mr. 1.32-34)

40 Te jeē ni quée niāndii, te tāca ñáyuu jeē iyó jnáhan i cácuñu ndinuū

cuehyī, ni caquindeca i jnáhan i un nuū yā. Te ni soó yá ndaha ya siquī ñi ñi i, te súcuan ni nasávāha ya i.

<sup>41</sup> Te suni cuehē ñayuu ni quenda-coo tachī ini i, te cácana cóhó táchī ún:

Máá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jnūhun jeē cahán gā súcuan, chi cájini jeē maá yá cúu Cristo, Yaā ní tají Yaā Dios.

*Jeē ní nacani ya jnūhun región Galilea*

*(Mr. 1.35-39)*

<sup>42</sup> Te nuū ní cundijin, te ni quenda ya cuahān sīn ya yatā ñūū nuū tú ñayuu. Te tāca ñayuu cánanducú i ya, te ni jinūcoo i nuū íne ya. Te cástétu i ya jeē tú cujiyo ya nuū i.

<sup>43</sup> Te ni cahān yā jíin i:

Suni cánuú jéē nacani ri jnūhun vāha nuū tāca gā ñuu siquī ndese ndácu Yaā Dios jniñu, chi jeē yúcuani ní tají yá ruhū vēji ri. Achí yá.

<sup>44</sup> Te ni jica cuu ya ní región Galilea, nacani ya jnūhun ini tācá vehe ñi sinagoga.

*Jeē ní canihīn de cuehē chācá ni sáha ya*

*(Mt. 4.18-22; Mr. 1.16-20)*

## 5

<sup>1</sup> Te ñi quiví te íne Jesús yumar Genesaret. Te ni quecoo cuehē ñayuu, te ni chitú níhin i nuū yā, chi cácuni i cuni nahín i jnūhun Yaā Dios.

<sup>2</sup> Te ni jito ya jeē yúcu uū barco yajni yumar. Te tēe cájni chācá, je ni quendacoo de ini barco, te cáncate de ñunu de.

<sup>3</sup> Te ni quiví ya ini ñi barco jeē cúu barco Simón. Te ni cahān yā jíin de jeē na scáca yátá de quihīn jecu gā nuū ndúte. Te ni cucōo ya, te nde ini barco un ní steén yā jnūhun nuū ñayuu cuehē jeē yúcu i yundúte un.

<sup>4</sup> Te nuū ní jínu ní steén yā, te ni cahān yā jíin Simón:

Scáca ró barco na quihín yō nde nuū iyó cúnú ndute, te sínga ró ñunu ró jni ró chāca, achí yá.

<sup>5</sup> Te ni cahān Simón:

Maestro, ní niñu ni casínga ná ñunu jeē jni ná tí, te tu ní níhin cuítí ná ni ñi ti. Te jeē cahán maá ní súcuan, te na sínga tucu ná ñunu, achí de.

<sup>6</sup> Te ni casínga de, te ni quivícoo cuehē ndasí chāca, nde nducú táhndē ñunu de.

<sup>7</sup> Te ni cacaja ndahá de nuū jnáhan de cáhīn ini inga barco, na quijícoo chindéé ñájnáhan jíin de. Te ni quecoo de, te ni cascútú nde de tí ndindúú barco, te nde je yajni quēe barco.

<sup>8</sup> Te ni jito Simón Pedro jeē súcuan ni cuu. Te ni jecuiñi yití de nuū Jesús, te ni cahān de:

Cujiyo ní núu ná, chi tēe íyó cuéchi cúu ná, achí de.

<sup>9</sup> Chi máá de jíin táca tēe cáhīn jíin de, ni cayūhú de jeē ní canihīn de cuehē chācá un ní sáha ya.

<sup>10</sup> Te suni ni cayūhú Jacobo jíin Juan, ndindúú séhe Zebedeo, chi tēe chindéé ñájnáhan jíin Simón cácuu de. Te ni cahān Jesús jíin Simón:

Ma yūhu ró, chí nde vijna te sáha ri jeē nihīn rō cuehē ñayuu candíje ruhū, nájnūhun ni nihīn rō cuehē chācá. Achí yá.

<sup>11</sup> Yūcuán na te nuū ní jinūcoo de jíin barco nuū ñūhun íchi, te ni castóo de ndiñi ndajniñu de, te ni candiquīn de ya cuangoo de.

*Jeē ní nasávāha ya ñi tēe ndóho cuehyī stehyú*

*(Mt. 8.1-4; Mr. 1.40-45)*

<sup>12</sup> Yūcuán na te íne Jesús ini ñi ñuu, te ni quee ñi tēe ndóho cuehyī stehyú. Te ni jito de nuū Jesús, te ni jecuiñi yití de ni jequīn de nuū de nde nuū ñūhun, te ni cahān ndahú de jíin yá:

Jíní na jéē cuu sáha ní jéē nduvāha ná, te núu cúní ní, achí de.

<sup>13</sup> Yūcuán na te ni soó yá ndaha ya siquī de, te ni cahān yā:

Cúní rī. Te na ndúvāha ró, achí yá.

Te ná ni cahān yā súcuan, te ni nduvāha-ni tēe ndóho cuehyī stehyú un.

<sup>14</sup> Te ni ndacu ya jniñu nuū de jeē ma cáchi cuítí de nuū ní ñi. Te achí yá:

Quisteén rō maá ró nuū sutú, te condahá ró jeē socó ró nuū Yaā Dios

siquī jeē ndúndoo ró núū yā, nájñūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

<sup>15</sup> Te víhyá gā ni jitē núū jñūhun ya cuahān. Te ni cataca cuehē ñayuu jeē cúni nahín i jñūhun stéén yā, jíin jéē nasávāha ya i nuū tāca cuéhyī cándoho i.

<sup>16</sup> Te máá yá cuahān sñn ya nuū tú ñayuu, te ni jicān tahu yā.

*Jeē ní nasávāha ya ñn tēe ndóho cuehyī ni íjin*

*(Mt. 9.1-8; Mr. 2.1-12)*

<sup>17</sup> Te ñn quivī te stéén yā jñūhun, te jecu tēe grupo fariseo jíin tēe cástéén tutu ley Yaā Dios, cáyūcú de yūcuán. Te tēe un ní quecoo de nuū yā jeē véjicoo de tācá ndañūū Galilea, jíin ndañūū Judea, jíin ñuu Jerusalén. Te poder máá Yaā Dios iyó jíin yá jeē nasávāha ya ñayuu cácuñū.

<sup>18</sup> Yūcuán na te ni quecoo jecu tēe, cándiso de ñn tēe ndóho cuehyī ni íjin, cátu de nuū ñn camilla. Te cánducú de squivī de tēe ún ini vehe, te caquin de nuū íne ya.

<sup>19</sup> Te tu ní cánihñ de modo quivīcoo de jíin tēe un, chi cáyūcú chitú ñayuu. Te ni cacao de siquī véhe, te ni canune de teja. Te ni cascúun de tēe cúhú un jíin camilla de nde nuū íne Jesús mēhñu ñayuu.

<sup>20</sup> Te ni jini Jesús jeē cácandíje de jeē cúu nasávāha ya tēe cúhú un. Te ni cahān yā jíin tēe cúhú un:

Róhó, je íne cáhnu ni rī nuū tāca cuéchi ró, achí yá.

<sup>21</sup> Yūcuán na te tēe cástéén tutu ley Yaā Dios jíin tēe grupo fariseo, ni quejé de cájeni ni de siquī yā: ¿Ndé ñn cúu tēe yáha jéē cahán de jñūhun ndevāha jeē quití ni Yaā Dios? Chi nasūu Yáa Dios cúu de jeē cóne cáhnu ni de nuū cuéchi.

<sup>22</sup> Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri?

<sup>23</sup> Jeē uú jñūhun yáha, ¿ndé ñn yí gá cáa? ¿A jéē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí

gá jeē cahān rī: Ndocuiñī te caca ró, chí je ni nduvāha ró, achi rī?

<sup>24</sup> Te vijna te na stéén rī jeē maá rí, Yaā ní nduu tēe, ndíso jniñu ri ini ñayivī yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Cáhán rī jíin ró, ndocuiñī te naquihin ró camilla rō, te quinhun rō vehe ró, achí yá jíin de.

<sup>25</sup> Te ni ndocuiñī-ni tēe ún, jíto jínúū ñayuu. Te ni naquihin de camilla nuū ni cátu de, te cuanhun de vehe de. Te nácuatáhú de nuū Yaā Dios.

<sup>26</sup> Te yōhoyo ni canaa ni tāca ñayuu cájito i, te ni cacahān i jeē yōhoyo vāha Yaā cúu Yaā Dios. Te suni yōhoyo cáyūhú i, te cacahān i:

Vijna te ni cajito yó jniñu jéhnu téyí, achí i.

*Jeē ní cana ya Leví*

*(Mt. 9.9-13; Mr. 2.13-17)*

<sup>27</sup> Yūcuán na te ni quenda ya cuahān yā, te ni jito ya nuū ñn tēe stútú xúhun renta, naní de Leví, néne de nuū cutútú xúhun renta. Te ni cahān yā jíin de:

Condiquñ ruhū na quíhín yō.

<sup>28</sup> Te ni ndocuiñī de, te ni stóo de ndíhi ndajniñu de, te cuahān de jíin yá.

<sup>29</sup> Yūcuán na te ni sáha Leví ñn vico cáhnu vehe de, jeē cúsiñi de jíin Jesús. Te cuehē tēe cástútú xúhun renta jíin sava ga tēe, cáyūcú de mesa cáyeji de staā jíin yá.

<sup>30</sup> Te tēe grupo fariseo jíin tēe cástéén tutu ley Yaā Dios, ni quejé de cacahān de siquī tēe cáscuáha jíin yá, te ni cacajñuhún de:

¿Najehē cáyeji rō cájhi ró jíin tēe cástútú xúhun renta jíin tēe cása cuéchi? achí de.

<sup>31</sup> Te ni cahān Jesús:

Ñayuu cáhīyo vāha, tu jini ñuhún i tēe tájna, chí ñayuu cácuñū cúu jeē jíni ñuhún.

<sup>32</sup> Te ruhū nasūu jéē véji ri cana ri ñayuu tú cuéchi, jeē cúu i nájñūhun ñayuu cáhīyo vāha. Chi sa suhva véji

ri cana ri ñayuu cáhīyo cuēchi, jeē na nácami ni i te stóo i cuēchi i. Achí yá.

*Jeē ní cacajñūhún de ya siquī jeē cóndite ni*

(Mt. 9.14-17; Mr. 2.18-22)

<sup>33</sup> Yūcuán na te ni cacahān de jíin yá: Tēe cáscuáha jíin Juan, jíin tēe cáscuáha jíin grupo fariseo, cuehē jínu cáhīyo ndite ni de te cájicān tahu de. Te tēe cáscuáha jíin máá ní, ¿naun tu cásaaha de súcuan? Chi cáyeji de cájihu de.

<sup>34</sup> Te ni cahān yā jíin de:

¿A cuu condite ni de níni jēe iyó rí jíin de? ¿A cuu sáha ró jēe condite ni ñayuu cáhīn vico nándāha, te núu níni néne tēe nándāha?

<sup>35</sup> Te quee quivī jeē cújiyo tēe ni nandāha, te quivī ún chi condite ni i. Achí yá.

<sup>36</sup> Te suni ni cahān yā uū jñūhun yátá siquī jeē tu quíjnāhan jñūhun jeē jēe steén yā jíin táca jñūhun jenahán. Achí yá:

Ni ñin ñayuu tu jéhnde i ñin pedazo sahma jéé i, te nachuhun i nuū ñin sahma túhú i. Chi núu súcuan te stívī i sahma jéé i, te suni tu quíjnāhan jeē jeé un jíin jéé tuhú.

<sup>37</sup> Te tú ni ñin chūhun vino jeé ini ñií túhú. Chi núu súcuan, te vino jeé un ndatá ñií, te naa vino jíin ñií.

<sup>38</sup> Chi cánuú jéé cūhun vino jeé ini ñií jéé, te súcuan te quéndōo vāha ndīndúú.

<sup>39</sup> Te ñayuu cájihu vino áva, tu cúní i coho i jeē jeé, chi jeē áva cúu jeē vāha ga, achí i. Achí yá.

*Jeē ní cataxín de yoco trigo quivī ndétātú*

(Mt. 12.1-8; Mr. 2.23-28)

## 6

<sup>1</sup> Te ñin quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá ni cataxín de yoco trigo, te ni caquīin de ini ndaha de, te ni cayeji de.

<sup>2</sup> Te sava tēe grupo fariseo ni cacajñūhún de:

¿Najehē casáha ró jniñu jeē tu íyo vāha sáha ró quivī ndétātú?

<sup>3</sup> Te ni cahān Jesús jíin de:

¿A tu ní cácahu cuiti rō tutu ndese ni sáha David, ñin quivī jeē ni jíi de sōco jíin tēe cáhīn jíin de?

<sup>4</sup> Te ni quivī de ini vehe Yaā Dios, te ni quihin de pan iī jeē yosó ndijin nuū Yaā Dios. Te ni yeji de, te suni ni jēhe de ni cayeji tēe cáhīn jíin de. Te tú na ley jeē cáji ni ñin tēe, chi máá-ni sutū cuu caji. Te vēsú súcuan te tú na cuēchi ní íyo siquī de. Achí yá.

<sup>5</sup> Te ni cahān gā yā jíin de:

Ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétātú, achí yá.

*Jeē ní nduvāha tēe ni ichī ndaha*

(Mt. 12.9-14; Mr. 3.1-6)

<sup>6</sup> Te inga quivī ndétātú, suni ni quivī ya ini vehe iī sinagoga, te ni steén yā jñūhun. Te yūcuan íne ñin tēe ni ichī ndaha vāha de.

<sup>7</sup> Te tēe cástéén tutu ley jíin tēe grupo fariseo, cájito yuhu de ya núu nasávāha ya tēe un quivī ndétātú, návāha nihīn de cuēchi siquī yā.

<sup>8</sup> Te máá yá je jíni yā ndese cájeni ni de. Te ni cahān yā jíin tēe ni ichī ndaha ún:

Ndocuīñī, te condichi rō mēhñu yāha, achí yá.

Te ni ndocuīñī de, te ni jecondichi de mēhñú.

<sup>9</sup> Yūcuán na te ni cahān yā jíin de jíjnāhan de:

Na cájnūhun rí rohó ñin jñūhun: ¿Ndesé cáhān ley siquī quivī ndétātú? ¿A jēe sáha vāha yó, chí sáha néé yó? ¿A jēe nasávāha yó ñayuu je yajni cuu, chí sáha yó jéé cúu i? Achí yá.

<sup>10</sup> Te ndéhé yá nuū de jeē cáyūcú de ní xiin ya. Te ni cahān yā jíin tēe cūhú un:

Scáá ndaha ró.

Te ni scaá de, te ni nduvāha-ni ndaha de.

<sup>11</sup> Te yōhyo ni caquitī ni táca tēe un, te ni quejéé de cándajñūhún de siquī Jesús, ndese cahni de ya.

*Jeē ní nacāji ya uxī uū tēe apóstol*

(Mt. 10.1-4; Mr. 3.13-19)

12 Te ni cuu jecu quivī, te ni quenda ya cuacacān tahu yā nde yucu. Te ní niñu ni jicān tahu yā nuū Yaā Dios.

13 Te nuū ní cundijin, te ni cana ya tāca tēe cáscuáha jíin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jnūhun ya.

14 Te yāha cúu sáhvī de jíjnáhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé,

15 Mateo, Tomás, Jacobo sēhe Alfeo, Simón tēe grupo cananista,

16 Judas ñani Jacobo, jíin Judas Iscariote, tēe jeē ní nastúu de ya.

*Jeē ni stéén yā nuū ñáyuu cuehē*  
(Mt. 4.23-25)

17 Te ni nanuu ya yucu jíin táca tēe un jēe cascuáha jíin yá, te ni jecuiñī yā ñn nduhvā jíin de. Te cuehē ñayuu ní región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeē cúni nahín i jnūhun stéén yā, jíin jēe ndúvāha i cuehyī cándoho i.

18 Te ñayuu jeē ñúhun tachī ini i, suni ni canduvāha i ni sáha ya.

19 Te ndivii ñayuu cácu ni i quehé i ya, chi súcuan ndúvāha i sáha ya jíin poder yā.

*Jnūhun ñayuu yōhyo ndetū jíin ñáyuu jeē xeēn ndoho*  
(Mt. 5.1-12)

20 Te ni ndacoto ya nuū tēe cáscuáha jíin yá un, te ni cahān yā:

Yōhyo ndetū rohó jēe cándoho ndáhú, chi quivī ró ñuu nuū ndácu Yaā Dios jniñu.

21 'Yōhyo ndetū rohó jēe cáji sōco vijna, chi quiiji quivī jeē ndutú chíji ró.

'Yōhyo ndetū rohó jēe cándahyū ró vijna, chi quiiji quivī jeē cuecú ró.

22 'Yōhyo ndetū ró te núu cáquitī ni ñayuu nuū ró jeē síquí ruhū, Yaā ní nduu tēe, te cásquéhichī i rohó, te cácahān neé i nuū ró, te cácahān i jeē ñáyuu casáha jniñu neé cácuu ró.

23 Te na cóo sí ni ró quivī sáha i súcuan, te víhyá gā na cúsi ni ró, chi cáhnu téyí coo tahū ró nde andiví. Chi

suni súcuan ni casáha uhū tāca jíi i jíin tēe ni canacani jnūhun Yaā Dios nde jenahán.

24 'Te nacā jeē xeēn ndoho rohó ñáyuu cucá, chi vijna-ni cúu jeē cáhīyo sí ni ró.

25 'Nacā jeē xeēn ndoho rohó ñáyuu jeē víjna cáhīyo vetū chíji ró, chi quiiji quivī jeē cuu ró sōco.

'Nacā jeē xeēn ndoho rohó ñáyuu jeē víjna cájecū ró, chi quiiji quivī jeē nducuíhyá ni ró te ndahyū ró.

26 'Nacā jeē xeēn ndoho tāca ró núu cájéjnuhún ñáyuu rohó, chi suni súcuan ni cajejnuhún jíi i tāca tēe ni canacani jnūhun stáhú ndé jenahán.

*Jnūhun jeē cundáhú ni yō ñayuu cájito uhū yohó*  
(Mt. 5.38-48; 7.12)

27 'Te cáhān rī jíin rohó jeē cájini sōho: Cundáhú ni ró ñayuu cájito uhū rohó. Te sáha vāha ró jíin ñáyuu cáquitī ni nuū ró.

28 Te cacān ró jeē váha coo ñayuu cácahān ndevāha síquí ró. Te cacān tahu ró jehē ñáyuu cácahān neé núu ró.

29 Te núu ndé tēe cani de ñn lado yiqui núu ró, te vāha ga suni cuāha ró inga lado cani de, vésú jeē nácuāha ró jēe ndútahū de. Te núu ndé tēe cúní de quende de ticāchi ró, suni cuāha ró jnūhun jeē na quíhín de jíin ndé camisa ró.

30 Te na-ni ñayuu jicān nuū ró, te cuāha ró núu i. Te ñayuu quíhin ndajniñu ró, ma nándacān ró.

31 Te nájnūhun cácu ni ró jeē sáha vāha ñayuu jíin ró, suni súcuan na sáha vāha ró jíin i.

32 'Chi núu íyó manī ró jíin máa-ni ñayuu jeē maní jíin ró, ¿te na vé jeē váha ga sáha ró núu súcuan? Chi nde tēe casáha cuēchi, suni manī de jíin tēe manī jíin máa de.

33 Te núu sáha vāha ró jíin máa-ni ñayuu jeē casáha vāha jíin ró, ¿te na vé jeē váha ga sáha ró núu súcuan? Chi nde tēe casáha cuēchi, suni súcuan casáha de.

34 Te núu cuāha núu ró núu maá-ni ñayuu jeē ñúhun ni ró nacuāha i nuū

rō, ¿te na vé jeē váha ga sáha ró núu súcuan? Chi nde tēe cásáha cuēchi, suni jéhe núu de nuū tāca gá tēe cásáha cuēchi, návāha nanihīn tucu de.

<sup>35</sup> Núu súcuan te cundáhú ni rō ñayuu cájito uhū rohó, te sáha vāha ró jíin i, te cuāha núu ró núu i. Te ma cuáha ró máá síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā kujéhnu téyí. Chi máá yá vāha ni yā jíin ñáyuu tu nácuatáhú núu yā jíin ñáyuu casáha néé.

<sup>36</sup> Núu súcuan te cundáhú ni rō ñayuu, nájnūhun máá Tátá rō cundáhú ni yā i.

*Ma cahán yō síquī cuéchi jnáhan yō*  
(Mt. 7.1-5)

<sup>37</sup> 'Ma cahán rō síquī cuéchi ñayuu ndese sáha i, návāha suni ma cahán Yaā Dios cuéchi síquī rō jeē casáha ró súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō.

<sup>38</sup> Cuāha ró núu ñáyuu, te suni súcuan cuāha Yaā Dios nuū rō. Chi vāha ndasí cuáha ya nuū rō, nájnūhun jeē chícuāha váha ya, quisi ya, sáníhin ya, te nde scáa ya cuāha ya nuū rō. Chi cūhva jeē cájēhe ró núu ñáyuu, suni cūhva un cuáha ya nuū rō. Achí yá.

<sup>39</sup> Te ni cahán yā ñin jnūhun yátá jíin i:

Tēe cástéén jnūhun tú ndaā, cácuu de nájnūhun tēe cuáá. Te ñin tēe cuáá, ¿á cuu stéén de ichi nuū inga tēe cuáá? ¿A tú ñingava ndindúú de ini xehvā?

<sup>40</sup> ñin tēe scuáha, tu cújéhnu de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

<sup>41</sup> 'Te cuéchi jnáhan ró cúu nájnūhun jeē íne ñin yāca lúlí tñūú i. ¿Te naun cásáha ró cuenta jeē súcuan, te tu cásáha ró cuenta cuéchi máá ró jeē cúu nájnūhun jeē íne ñin nduhu tñūu máá ró?

<sup>42</sup> ¿Te naun cácahān rō jíin jnáhan ró: Condetu, na táva rī yāca íne tñūu ró, te tu cánacani ni rō jeē íne ñin nduhu tñūu máá ró? Tēe stáhú-ni cácuu ró

núu súcuan. Xīhna gā tñūu máá ró tava rō nduhu, te yūcuán na te cuu condēhe váha ró jéē táva rō yāca tñūu jnáhan ró.

*Jíin jniñu cásáha ñayuu te nácuu yō ndese ñayuu cácuu i*

(Mt. 7.17-20; 12.34-35)

<sup>43</sup> 'Tu íyó yujnu váha jeē jéhe ndehē neé, te ni tu íyó yujnu neé jéē jéhe ndehē váha.

<sup>44</sup> Chi jíin ndehē jeē jéhe ñin ñin yujnu, te jíin yō núu yujnu váha cúu. Chi tu scóyo yó ndehē higo xinī íñu, ni tu scóyo yó ndehē uva xinī yucú zarza.

<sup>45</sup> Te suni súcuan tēe vāha, cáhán de jnūhun vāha, chi vāha ánuá de. Te tēe sáha neé cáhán de jnūhun neé, chi cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

*Síquī uú vehe*

(Mt. 7.24-27)

<sup>46</sup> ¿Najehē cácahān yíñúhún ró jíin rí: Jitoho ná, áchí ró, te tu cásquícu ró jniñu ndácu rí?

<sup>47</sup> Tāca ñáyuu vēji nuū rī te jíin sōho jnūhun cáhán rī te squícu, na stéén rī nuū rō ndese cúu i.

<sup>48</sup> Cúu i nájnūhun ñin tēe jeē ní jeni de vehe de, te ni jete cúnú de nde ni nihīn de toto, te ni jeni de síquī. Te nuū ní ndaa yūte, te ni chundahá vehe ún, te tu ní cánda cuítí sáha, chi síquī toto íin.

<sup>49</sup> Te tāca ñáyuu jíin sōho jnūhun cáhán rī, te tu squícu i, cúu i nájnūhun ñin tēe ni jeni de vehe de nuū ñūhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa íi-ni. Achí yá jíin i jíjnáhan i.

*Jeē ní nasávāha ya mozo capitán*

(Mt. 8.5-13)

## 7

<sup>1</sup> Te nuū ni jíinu ni cahán yā ni cajini nahín ñáyuu ún, te cuahán yā ñuu Capernaum.

<sup>2</sup> Te ñin tēe nación Roma jeē cúu capitán, íyó ñin mozo de jeē maní ndasí de jíin. Te mozo un cūhú i te je yajni cuu i.

<sup>3</sup> Te ni jini capitán jnūhun Jesús. Te ni tají de jecu tē jéhnū cándacu jniñu nuū ñáyuu hebreo, cuangoo de nuū yā jeē cahán ndahú de jíin yá jeē na quiji ya sávāha ya mozo de.

<sup>4</sup> Te ni jinūcoo tē un núū Jesús, te ni cacahān ndahú ndasí de jíin yá:

Chindéé ñáhán ní tē cúu capitán, chí tē vāha cúu de.

<sup>5</sup> Chí maní de jíin nación yō, te máá de ni ndacu jniñu ni cuvāha ñin vehe sinagoga cuu yó. Achí de.

<sup>6</sup> Yūcuán na te cuahān Jesús jíin de jíināhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúní de sájneñu de níhín, chí tu cújéhnū de jeē quihín ni quívi ní vehe de.

<sup>7</sup> Jeē yúcuan tu ní sájéhnū de máá de jeē quiji de nuū ní, achí de. Te máá jéē cahán-ni ní, te na ndúvāha-ni mozo de, achí de.

<sup>8</sup> Chí máá de suni ndíso jniñu de ni casáha tē cácujeñu ga. Te cújéhnū de nuū tācá soldado de, achí de. Te núu cáhán de jíin ñin tē jeē na quihín de, te cuahān de. Te núu cáhán de jíin inga tē jeē na quiji de, te quiji de. Te núu ndácu de ñin jniñu nuū mozo de, te sáha i, achí de. Achí táca tē un jíin yá.

<sup>9</sup> Te jeē ní jini Jesús jnūhun yáha, te ni naa ni yā. Te ni ndió cóto ya ni cahān yā jíin ñáyuu cuehē cándiquin yatā yā:

Jendaá cahán rī jíin ró jeē ni nación yō Israel tu ní níhín rī ni ñin ñáyuu candíje níhin súcuan, nájnūhun cándíje tē ún, vēsú tē nación tu jíin jnūhun Yaā Dios cúu de. Achí yá.

<sup>10</sup> Te tē ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

### *Jeē ní nastécu yā sēhe yí ñahan viuda*

<sup>11</sup> Yūcuán na te cuahān yā ñin ñuu naní Naín. Te tē cáscuáha jíin yá, jíin ñáyuu cuehē, suni cuangoo i jíin yá.

<sup>12</sup> Te ná ni cuyajni ya yuñúú ún, te yúcuan ní quendacoo ñáyuu jeē

quíchindūji i ñin tē suchí jéē ni jíihī. Te máñuhún-ni i nuū naná i, te ñahan viuda cúu ña. Te cuehē ñáyuu ñuu un véjicoo jíin ña.

<sup>13</sup> Te ná ni jito máá Jítoho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, achí yá.

<sup>14</sup> Yūcuán na te ni jinū yā nde nuū ndíyi ún, te ni jniñi ya yejnū, te ni cacajecuiñi tē cándiso ún. Te ni cahān yā jíin súchi ní jíihī:

Cáhán rī jíin ró, ndocuiñi, achí yá.

<sup>15</sup> Yūcuán na te ni nucōo sūchi ní jíihī ún, te ni quejéé i nácahān i. Te ni nacuāha ya i nuū naná i.

<sup>16</sup> Te ndíviñi ñáyuu ni cayūhú i jeē ní cajito i, te ni cacahān i jeē yóhyo vāha Yaā cúu Yaā Dios. Te cácahān i:

Mēñu yó ni quee ñin tē cújéhnū nácani jnūhun Yaā Dios.

Te suni cácahān i:

Máá Yaā Dios ni quejéé yá chindéé ñáhán yá ñáyuu yā. Achí i.

<sup>17</sup> Te ni jité núu jnūhun ya ñi cáhnu región Judea jíin táca región yajni yūcuán.

### *Jeē ní tají Juan uū tē nuū yā*

*(Mt. 11.2-19)*

<sup>18</sup> Te íne Juan vecāa, te tē cáscuáha jíin de ni cacastūhun núu de jeē súcuan ni cuu tācá jniñu yáha.

<sup>19</sup> Te ni cana Juan uū tē ún, te ni tají de cuangoo nuū Jesús, návāha cajnūhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga.

<sup>20</sup> Te ni jinūcoo tē un núu yā, te ni cacahān de:

Juan tē scuándute ni tají de saña véjicoo ná cajnūhun ná níhín núu máá ní cúu Cristo jeē achí tutu jeē quiji, chí condetu yó inga tē quiji. Achí de.

<sup>21</sup> Te máá hora un ní nasávāha ya cuehē ñáyuu cácuñu, jíin ñáyuu cándoho cuehyí xeēn, jíin ñáyuu ñūhun tachí ini. Te suni cuehē ñáyuu cuaá ní ndundijin tinūú i ni sáha ya.

<sup>22</sup> Te ni cahān yā jíin de:

Cuángoo te castūhun ró nuū Juan táca jniñu ni cajito ró jíin jnūhun



ni cajini ró. Te cachi rō nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jéē jnama Yaā Dios i.

<sup>23</sup> Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jiín de.

<sup>24</sup> Te ná cuanuhun ndindúú tēe ún, te ni quejéé Jesús cahán yā jnūhun Juan jiín ñáyuu:

¿Na vé ni jécondēhe ró jijnáhan ró ndé nuū ñúhun téhé? ¿A ñn tēe jéni ñn jéni uū ni, nájnūhun ite jeē cánda sáha tachī?

<sup>25</sup> Te núu tuú, ¿te na vé ni jécondēhe ró núu súcuan? ¿A ñn tēe cúní cujéhnu jeē ñúhun sahma lúu? Tuú chi cájini rō jeē tēe cáñuhun sahma lúu te cánducú tāca jéē cúsiñ ni, máni ini vehe rey cáyūcú de.

<sup>26</sup> ¿Te na vé ni jécondēhe ró núu súcuan? ¿A ñn tēe nácani jnūhun Yaā Dios? Cáhán rī jiín ró jeē suu ni jécondēhe ró. Te cújéhnu ga Juan yáha vēsú tāca gá tēe ni canacani jnūhun Yaā Dios.

<sup>27</sup> Chi jnūhun Juan cúu jeē ni cáhān Yaā Dios jeē yosó núu tútu ñi:

Tají rí tēe nacani jnūhun ri cosnūú de ichi núú Cristo,

návāha coo tūhva ñayuu jeē jinú yā.

Achí Yaā Dios, achí tutu.

<sup>28</sup> Te cáhán rī jiín ró jeē ini ñayīvī yáha cújéhnu ga Juan tēe scuándute vēsú tāca gá tēe jeē ni íyo ini ñayīvī. Te vēsú súcuan te tāca tēe núu ga ini ñuu nuū ndácu Yaā Dios jniñu, cújéhnu ga de vēsú Juan. Achí yá.

<sup>29</sup> Te tāca ñáyuu jiín táca tēe cástútú xúhun renta, ni cajini i jnūhun cáhān yā, te ni cajetáhú i jeē Yaā ndaā cúu Yaā Dios, chi je ni cajendute i nuū Juan.

<sup>30</sup> Te tēe grupo fariseo jiín tēe cástéén tutu ley, ni casquéhichī de jnūhun jeē cuní Yaā Dios sáha ya jeē váha de, chi tu ní cájendute de nuū Juan.

<sup>31</sup> Te ni cahān gā maá Jítóho yō:

Yáhá cachi rī ñn jnūhun yátá návāha na cúni rō ndese cúu ñayuu tiempo vijna.

<sup>32</sup> Cúu i nájnūhun sūchi lúli cáhīin nuū yáhu cácasíquí i. Te cácana ndee i xinī jnáhan i: Ni cativi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúli un jéē tu ní nújnahan ni i ni ñn, suni súcuan cándāa ró.

<sup>33</sup> Chi ni quiji Juan tēe scuándute, te cuehē jínu ni íyo ndite ni de, te ní yéji de staā ni tu ní jíhi de vino. Te tu ní cánujnahan ni rō, chi ni cacahān rō jeē ñúhun tachī ini de.

<sup>34</sup> Yūcuán na te ni quee maá rí, Yaā ní nduu tēe, te yéji rī jíhi ri, te tu cánujnahan ni rō, te chísóó jnúhun ró cácahān rō jeē máni maá jéē yéji rī jíhi ri vino. Te quíjnahan ri jiín tēe cástútú xúhun renta jiín táca gá tēe casáha cuēchi, achí ró.

<sup>35</sup> Te núu cundichí ñn tēe jíin jnúhun Yaā Dios, te jíin jniñu sáha de te cájini tāca gá tēe ndichí jeē ndichí de. Achí yá.

### *Jeē íne Jesús vehe Simón tēe fariseo*

<sup>36</sup> Te ñn tēe fariseo ni cana de Jesús jeē cáji yā staā jiín de. Te ni jinū yā vehe de, te ni cucōo ya mesa jeē cáji yā staā.

<sup>37</sup> Yūcuán na te ñn ñahan sáha cuēchi, ndéé ña ñuu yúcuan, te ni jini ña jeē ni jínū Jesús vehe tēe fariseo un, yéji yā staā. Te ni quee ña jíin ñn frasco yuū luu jeē ñúhun chitú aceite perfume.

<sup>38</sup> Te íin yítí ña nuū jehé yā, te ndáhyú ña. Te ni quejéé ña stáji ña jehē yā jiín ndute tinúú ña, te ni nasíchí ña jíin ixí xíní ña. Te ni techūhú ña jehē yā, te ni chuhun ña perfume un.

<sup>39</sup> Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jnūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chi ñahan sáha cuēchi cúu ña, jéni ni de.

40 Yūcuán na te ni cahān Jesús jíin de:

Simón, cúní rī cahān rī jíin ró ñn jnūhun.

Te ni cahān maá de:

Cahān ní, Maestro.

41 Te ni cahān Jesús:

Ñn tēe jéhe núu xūhún, ni iyo uū tēe táu nuū de. Ñn de ni cotaū uhūn ciento denario, te ñnga de ni cotaū uū xico uxī denario.

42 Te tú na vé cánevāha tēe un jéē nāchunaa de. Te tēe jéhe núu xūhun ní ñe cáhnu ni de nuū ndindúú tēe ún. Núu súcuan te cachi rō: Jeē ndindúú tēe ún, ¿ndé ñn de coo manī gā jíin de? Achí yá.

43 Te ni cahān Simón:

Jéni ni na jéē tēe ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

44 Te jíto ya nuū ñahan ún, te ni cahān gā yā jíin Simón:

¿A jíto ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehē rī nájñūhun íyó costumbre. Te ñahan yáha ní stáji ña jehē rī jíin ndute tñúú ña, te ni nasíchí ña jíin ixi xíní ña.

45 Te tu ní téchūhu ró ruhū nájñūhun íyó costumbre. Te ñahan yáha, nde jeē ní quívī rī vehe ró, tu jécuiñī ña jeē téchūhú ña jehē rī.

46 Te tu ní chūhun ró aceite xinī rī nájñūhun íyó costumbre. Te ñahan yáha ní chuhun ña aceite perfume jehē rī.

47 Núu súcuan te cáhán rī jíin ró jeē ní stéén ña jeē yóhoyo manī ña jíin rí síquī jeē ñe cáhnu ní rī nuū tāca cuéchi ña, vēsú cuehē cúu. Te núu cone cáhnu ní rī nuū ñn ñayuu íyó jecu-ni cuéchi, te jecu-ni stéén i jeē maní i jíin rí, achí yá.

48 Te ni cahān yā jíin ña:

Je ñe cáhnu ní rī nuū tāca cuéchi ró, achí yá.

49 Yūcuán na te ñayuu cáyeji staā jíin yá, ni quejéé i cácahān maá i:

¿Ndé ñn ga cúu tēe yáha jéē cahán jeē ñe cáhnu ní nuū cuéchi? achí i.

50 Te Jesús ni cahān gā yā jíin ñahan ún:

Ni candíje ró rúhū, te jeē yúcuan ní jnama rī rohó. Cuáhán te na ndúsī ní rō. Achí yá.

*Jñūhun ñahan ní cajejniñu nuū yā*

## 8

1 Yūcuán na te ni cuu jecu quívī, te ni jica cuu Jesús tācá ñuu náhnu jíin ñuu lulí. Te nácani ya jñūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jíin yá.

2 Te suni íyó jecu ñahan cájica jíin yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ñn ña cúu María ñuu Magdala, te ini ñahan un ní quenehen ya uxā tachī.

3 Te ñnga ña cúu Juana, ñasihí Chuza, tēe ndíso jniñu ini vehe Herodes. Te ñnga ña cúu Susana, jíin cuéhe gā ñahan jeē cáchindéé ñáhán ña, jéhe ña tāca jéé jíni ñúhún yá jíin de jíjnáhan de.

*Jñūhun yátá síquī tēe jéte trigo (Mt. 13.1-9; Mr. 4.1-9)*

4 Te cuehē ñayuu tācá ñuu yúcuan ní jinūcoo i nuū Jesús. Te ni cacutútú cuéhe ndasí ñáyuu, te ni cahān yā ñn jñūhun yátá jíin i:

5 Ñn tēe cate trigo, ni quenda de jeē cáte de. Te ná ni quejéé de jéte de, te jecu trigo ni jité yuhíchi. Te ni cajeñū ñayuu síquī, te ni cayeji saa.

6 Te jecu gā ni jité nuū ñúhun yuū. Te ni cane, te ni ichí-ni, chí tú cuehē cajín.

7 Te jecu gā ni jité nuū náne iñu. Te ñnuú-ni ni canecoo iñu jíin, te ni jesi nuū.

8 Te jecu ni jité nuū ñúhun váha. Te nuū ní jehnu, te ni jéhe cuehē nuní, chí jeē ñn ñn ni jéhe nde ciento. Achí yá.

Yūcuán na te ni cahān jee ya:

Tāca rōhó jéé jíni sōho, na chúsóhó ró, achí yá.

*Najehē cahán yā máni jñūhun yátá (Mt. 13.10-17; Mr. 10-12)*

9 Te tēe cáscuáha jíin yá ni caca-jnūhún de ya na vé cuní cahān jnūhun yátá yáha.

10 Te ni cahān yā:

Róhó jíjnāhan ró, chí sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te máni jíin jnūhun yátá cáhān rī jíin sava ga i, návāha vésú cájito i, te quéndōo i nájñūhun jeē tú na vé ni cájito i. Te vésú cájini sōho i, te ma jécūhun ni i.

*Jeē ní castūhun cáj yá jnūhun yátá téé jéte trigo*

(Mt. 13.18-23; Mr. 4.13-20)

11 'Jnūhun yátá yáha cuní cahān: Trigo un cúu jnūhun Yaā Dios.

12 Te trigo jeē ni jítē yuhíchi cúu nájñūhun ñayuu cájini sōho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma ri i.

13 Te trigo jeē ni jítē nuū ñūhun yuū cúu nájñūhun ñayuu cájini jnūhun, te cájetáhú i te cácusī ni i jíin. Te tu cúcutú jnūhun ún ini anuá i. Te jecu-ni quivī cácandíje i, te núu ni quejéé jnúndóho, te cájica yátá i.

14 Te trigo jeē ni jítē nuū náne iñu cúu nájñūhun ñayuu cájini jnūhun, te cuango i te cácuñéñu i jíin jniñu i jíin jéé cuní i cucúca i te coo sī ni i. Te tu íje i jíin jnūhun ya.

15 Te trigo jeē ni jítē nuū ñūhun váha cúu nájñūhun ñayuu cájini nahín jnūhun ya, te cájni vāha i, chí íyó váha íyó ndáa anuá i. Te cáhije i jíin jnūhun ya, chí cácandíje vāha i.

*Jnūhun yátá síquī lámpara*

(Mr. 4.21-25)

16 'Núu nástīin ñayuu ñin lámpara, te tu jési i ni ñin síquī, ni tu jéni i chíji jīto. Chí sa suhva jéni i nuū sucún, návāha cundijin nuū ñayuu quívicoo vehe.

17 Te suni súcuan tu íyó ni ñin jnūhun sāhi jéé ma cúni ñayuu, chí ndīhi táca jnūhun cácahān i nane ndijin te cuni ñayuu.

18 'Núu súcuan te na cúni sōho váha ró, chí ñayuu je jécūhun ni, stéén gā yā nuū i. Te ñayuu tu cándíje, máá jecu

jeē jéni ni i jeē jiní i, sa suhva naa. Achí yá.

*Náná yā jíin ñani yā*

(Mt. 12.46-50; Mr. 3.31-35)

19 Yūcuán na te ni quee naná yā jíin táca ñani yā nuū íne ya. Te tu ní cúu quívicoo ña nuū yā síquī jeē chitú ñayuu.

20 Te ñin ñayuu ni castūhun núu yā:

Náná ni jíin táca ñani ni cáhīn nuū quéhe, te cácuni cahān jíin ní, áchí i.

21 Te ni cahān maá yá:

Suni náná rī jíin ñani rī cácuu ñayuu cájini sōho jnūhun Yaā Dios te cáscuáca i, áchí yá jíin i.

*Jeē ní jecuñī tachī níhin jíin mar ni sáha ya*

(Mt. 8.23-27; Mr. 4.35-41)

22 Te ñin quivī ni quivī ya ñin barco jíin téé cáscuáha jíin yá, te ni cahān yā jíin de:

Na yáha yó quíhīn yō inga lado mar. Te ni cascáca de barco cuango de.

23 Te níni cáscáca de barco, te ni quixī yā. Te ni jecuñī ñin tachī níhin nuū mar, te je yajni chitú ndute ini barco, te ndúcú quée barco.

24 Te ni castóna de ya, te ni cacahān de:

Maestro, Maestro, vijna te quée yó chíji ndute te naa yō, achí de.

Te ni ndocuñī-ni ya, te ni cahān yā nuū tachī níhin jíin núu mar. Te ni cajecuñī-ni, te ni cuu nayúú í-ni.

25 Te ni cahān yā jíin téé cáscuáha jíin yá:

¿Naun tu cácandíje ró?

Te máá de yōhyo ni cayūhú de, te cánaa ni de, te cácahān de jíin jnáhan de:

¿Ndé ñin ga cúu tēe yáha jéé nde nuū tachí níhin jíin núu ndúte ndácu de jniñu te cájetáhú jéé cahān de? Achí de.

*Tēe Gadara jeē ndóho tachī*

(Mt. 8.28-34; Mr. 5.1-20)

26 Yūcuán na te ni cane ya jíin de región Galilea, te cuahān yā región Gadara jeé íne inga lado mar Galilea.

27 Te nuū ní nanuu ya nuū ñūhun íchi, te ñin tēe ñuu un ní quee de nuū

yā. Te je ni cuu cuehē cuiyā ñúhun cuehē tachī ini de. Te tu ñúhun cuiñi de sahma, ni tu ndéé de vehe, chi sa suhva nuū cáyindūji ndīyī ndeé de.

28 Te ná ni jito de nuū Jesús, te ni jecuiñī yití de nuū yā, te ni cana cóhó de:

¿Naun vēji ní núū ná, Jesús Sēhe Yaā cujéhnu téyí? Cáhán ndahú ná jíin ní jeē ma stóho ní sáña, áchí de.

29 Súcuán ni cahān de, chi je ni ndacu ya jniñu nuū tachí un jēē na quéndacoo ini de. Te ni cuu cuehē jíinu sáha xeēn tachī jíin de. Te cájihni ñayuu ndaha de jehē de jíin cadena, návāha tú na vé sáha de. Te ndihī-ni jéhnde de, te jíinu de jéhén de nde nuū ñúhun téhé sáha tachī ún.

30 Te Jesús ni cajñūhun yá de:

¿Na vé naní ró?

Te ni cahān de:

Legión naní ná.

Súcuán ni cahān de jeē naní de, chi ñúhun cuehē tachī ini de.

31 Te ni cacahān ndahú táchī un jíin yá jeē ma tají yá quihīn ini tūhnchi cúnú.

32 Te yucu yúcuán cáhīin cuehē quini cájitu ti. Te tachī jeē cáñuhun ini tēe un ní cacahān ndahú jíin yá jeē na cuáha ya jñūhun quivicoo ini quini ún. Te ni jēhe ya jñūhun.

33 Te ni quendacoo tachī ún ini tēe ún, te ni quivicoo ini quini. Te quini un ní cajinu ti ni ñingoo ti ñin yucáva, ni quivicoo ti nuū mar, te ni ndaquihī ti ndute, ni cajihī tī.

34 Te tēe cándito ti ni cajito de jeē súcuán ni cuu, te ni cayūhú de. Te ni cajinu de cuacastūhún de nuū ñayuu ñuu un jíin ñayuu tāca rancho.

35 Te cuangoo ñayuu un cuácondéhé i na vé ni cuu. Te ni jinūcoo i nuū íne Jesús. Te ni cajito i nuū tēe ní quendacoo tachī ini, néne de nuū jehé Jesús, te ñúhun de sahma, te je ni nducájí xīnī de. Te ni cayūhu ñayuu ún.

36 Te tēe ní cajito ni canacani de jñūhun nuū ñayuu, ndese ni nduvāha tēe ni ñuhun tachī ini.

37 Yūcuán na te tāca ñayuu ní región Gadara, ni caquejéé i cácahān ndahú i jíin yá jeē na cújiyo ya quihīn yā,

chi yōhyo cáyūhú i. Te ni ndīvi ya ini barco jeē quínuhun yā.

38 Te tēe jeē ní quendacoo tachī ini, ni cahān ndahú de jíin yá jeē na cuáha ya jñūhun quihīn de jíin yá. Te Jesús ni cahān yā jeē na quéndōo de, te áchí yá:

39 Cuánuhun vehe ró, te nacani ró jñūhun ndese yōhyo jéhnu jniñu ni sáha Yaā Dios jíin ró, achí yá jíin de.

Te cuahān de, te ni nacani de jñūhun ní ñuu ún, ndese yōhyo jéhnu jniñu ni sáha Jesús jíin de.

*Jñūhun sēhe sáhi Jairo jíin ñahan ní quehé yusáhma ya*

(Mt. 9.18-26; Mr. 5.21-43)

40 Te nuū ní najinū Jesús inga lado mar, te ñayuu un ní cacusī ni i jeē ní najinū yā, chi ndihī i cándetu i ya.

41 Te ni quee ñin tēe cujéhnu ini vehe ñi sinagoga, naní de Jairo. Te ni jecuiñī yití de nuū jehé yā, te ni cahān ndahú de jíin yá jeē na quihīn yá jíin de vehe de.

42 Chi íyó ñin sēhe sáhi de jeē mañūhún-ni i nuū de, te íyó i nájnūhun uxī uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquin i ya, te ni chitú níhin i xiin ya cuangoo i.

43 Te mēhñu ñayuu un cuáhān ñin ñahan cúhú jeē ní cuu uxī uū cuiyā ndóho ña cuehyī niñī. Te ni jexin ña tāca jēé névāha ña jíin tēe tájná, te tu ní ndúvāha ña sáha ni ñin de.

44 Te ni quee ña ichi yátá yā, te ni quehé ña yusáhma ya. Te ni jecuiñī-ni niñī ña.

45 Yūcuán na te ni cahān Jesús:

¿Ndé ñin ni quehé sahma ri? achí yá.

Te ndīvii i ni cacahān jeē tu ní quéhé i. Te Pedro jíin tēe cáhīn jíin de, ni cacahān de:

Maestro, jíto ní jēé ñayuu cuehē yāha ní chitú níhin i xiin ní, te cáquihī i níhīn, te cájnūhun ní ndé ñin ni quehé sahma ní.

46 Te ni cahān Jesús:

Tuú chi ñin ñayuu ni quehé sahma ri, chi ni jini rī jeē jíin fuerza rī ni nduvāha ñin ñayuu, achí yá.

47 Te ni jini ñahan un jēé tu ní cúcoo yuhu jeē ni sáha ña. Te quisi i ña ni

quee ña, te ni jecuiñi yití ña nuū jehé yā. Te jito jínū tāca ñayuu, te ni cachi cají ña najehē ni quehé ña yusáhma ya, jín jéé ní nduvāha-ni ña.

<sup>48</sup> Te ni cahān yā jín ña:

Séhē, ni candíje ró jéé cuu nasávāha ri rohó, te jeē yúcuan ní nduvāha ró. Cuáhán te na ndúsī ni rō, achí yá.

<sup>49</sup> Te níni cáhán gā yā súcuan, te ni quee ñn tēe vēji vehe Jairo, tēe cújehnu ini sinagoga, te ni cachi nuū de:

Je ni jihī sēhe síhí ní. Te ma sájnēñu ga ní Maestro, achí de.

<sup>50</sup> Te ni jini Jesús jnūhun yáha, te ni cahān yā jín Jairo:

Ma yūhu ró, chí candíje-ni ró, te nastécu rī sēhe ró, achí yá.

<sup>51</sup> Te ni jinū yā vehe, te tu ní jéhe ya jnūhun quīvi ñayuu jín yá, chí máá-ni Pedro jín Juan jín Jacobo jín tátá naná sūchi síhí un.

<sup>52</sup> Te cácuuíhyá ni ndihi ñayuu cáyūcú ini vehe, te cándahyū i jehé sūchí un. Te ni cahān yā:

Ma ndahyú rō jijnáhan ró. Tu ní jíhí i, chí quíxí-ni i, achí yá.

<sup>53</sup> Te ni cajecū catá i jeē ni cáhán yā, chí cajini i jeē ni jíhí sūchi síhí un.

<sup>54</sup> Yūcuán na te ni jni ya ndaha i, te ni cahān jee ya jín i:

Síhí, ndocuiñi, achí yá.

<sup>55</sup> Te ni natecu i, te ni ndocuiñi-ni i. Te ni ndacu ya jniñu jeē na cuáha ña jeē cáji i.

<sup>56</sup> Te tátá i náná i yōhyo ni canaa ni de cájito de. Te ni ndacu ñhin ya jniñu nuū de jeē ma cáchi de nuū ni ñn jeē súcuan ni cuu.

*Jeē ní tají yá ndihúxí uū de cuanacani de jnūhun*

*(Mt. 10.5-15; Mr. 6.7-13)*

## 9

<sup>1</sup> Te ni nastútú yá ndihúxí uū tēe cáscuáha jín yá, te ni sáha ya jeē cóndiso jniñu de te coo poder de jeē quénehen de tachí ini ñayuu, jín jéé nasávāha de ñayuu cácuñu.

<sup>2</sup> Te ni tají yá de quingoo de jeē nacani de jnūhun ndese ndácu Yaā Dios jniñu, jín jéé nasávāha de ñayuu cácuñu.

<sup>3</sup> Te ni cahān yā jín de:

Ma cóndiso ró jéé cuajniñu ró ichi, ni vara, ni ñunu, ni staa, ni xūhún. Te quihīn rō jín ñn-ni camisa, te ma cóndiso ró inga.

<sup>4</sup> Te na-ni vehe núu ni quīvicoo ró, te yūcuán coyūcu ró nde quenda tucu ró quihīn rō inga ñuu.

<sup>5</sup> Te núu ñn ñuu tu cájetáhú i rōhó, na quéndacoo ró yúcuan, te scóyo ró tícachā jehé rō, te súcuan stéén rō jeē iyó cuéchi i jeē tu ní cájetáhú i. Achí yá.

<sup>6</sup> Te ni quendacoo de cuahān de, ni cajica nuu de táca ñuu, ni canacani de jnūhun jnáma Yaā Dios ñayuu. Te táca lado ni canasávāha de ñayuu cácuñu.

*Jeē ni jihī Juan tēe scuándute*

*(Mt. 14.1-12; Mr. 6.14-29)*

<sup>7</sup> Te Herodes, tēe cúu gobernador, ni jini jnūhun de táca jniñu sáha Jesús. Te ni cunéé ni de, chí cajeni ni sava ñayuu cácahān i jeē Juan ni natecu de.

<sup>8</sup> Te sava ga i cácahān jeē ní nane Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya nde jenahán, ní natecu de.

<sup>9</sup> Te ni cahān Herodes:

Juan chí ni ndacu ri jniñu ni tahndē xinī. Núu súcuan ¿te ndé tēe cúu tēe yáha jeē jíni jnūhun ri jeē sáha de jniñu jehnu? Achí de.

Te ni nducú Herodes modo coto de nuū Jesús.

*Jeē ní scáji yā uhūn mil tēe*

*(Mt. 14.13-21; Mr. 6.30-44; Jn. 6.1-14)*

<sup>10</sup> Te ni ndecoo tēe cácuu apóstol jeē ní tají yá ni canacani jnūhun. Te ni cacachi de nuū yā táca jniñu ni casáha de. Te ni jeca ya de cuahān sīn ya jín de ñn lugar nuū tú ñayuu, yajni ñuu Betsaida.

<sup>11</sup> Te ni cajini ñayuu, te suni cuango i. Te ni jetáhú yá i, te ni nacani ya jnūhun ndese ndácu Yaā Dios jniñu, te ni nasávāha ya ñayuu cácuñu.

<sup>12</sup> Te nuū cuáhini, te ni queeco ndihúxí uū tēe cáscuáha jín yá, te ni cacahān de jín yá:

Tají ní ñayuu cuehē yāhá na quíngoo i tācá ñuu jíin táca rancho yajni yāhá, te nducú i nuū ndóo i te cuaan i jeē cáji i, chi tú na vé iyó yáha, áchí de.

<sup>13</sup> Te ni cahān yā jíin de:

Cuāha máá ró jeē cáji i, áchí yá.

Te ni cacahān de:

Tú na vé cánevāha ná, chi uhūn-ni staā jíin úū-ni chācá. Te vēsú núu quicuaan ná stāa caji ndihī ñayuu cuehē yáha, te ni ma cúu, áchí de.

<sup>14</sup> Chi iyó nájnūhun uhūn mil tēe. Te ni cahān yā jíin tēe cáscuáha ún:

Cahān jíin ñayuu na cúcōo s̄n cincuenta cincuenta i, áchí yá.

<sup>15</sup> Te súcuan ni casáha de, te ni cacucōo ndihī ñayuu.

<sup>16</sup> Te ni quihin ya ndihúhún staā jíin úū chācá un, te ni ndacoto ya ichi ándiví, te ni nacuatáhú yá. Te ni tahu cuéchí yá staā ún, te ni jēhe ya nuū tēe cáscuáha jíin yá, te ni casaja de nuū ñayuu cuehē.

<sup>17</sup> Te ndivii i ni cayejí, te ni candutú chíji i. Te ni canastútú de pedazo staā jeē ní quendōo, te ni chitú úxī uū jīca.

*Jeē ní cahān Pedro jeē Jesús cúu Cristo*

(Mt. 16.13-19; Mr. 8.27-29)

<sup>18</sup> Te ñn quiví ni cus̄n Jesús, jícán tahu yā, te máá-ni tēe cáscuáha un cáhīn de jíin yá. Te ni cajnūhun yá de:

Ruhū, ¿ndé ñn cúu ri cácahān ñayuu? achí yá.

<sup>19</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya ni natecu de.

<sup>20</sup> Yūcuán na te ni cajnūhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

*Jeē ní castūhún Jesús jeē cúu yā*

(Mt. 16.20-28; Mr. 8.30-9.1)

<sup>21</sup> Yūcuán na te ni ndacu ñihin ya jniñu nuū de jeē ma cáchi de jnūhun yáha núu ní ñn ñayuu.

<sup>22</sup> Te ni cahān yā:

Máá rí, Yaā ní nduu tēe, cánuú ndoho xeēn rī. Te tāca tēe jéhnū jíin sūtū cácujehnū jíin tēe cástéén tutu ley, squéhichī de ruhū. Te cahni de ruhū, te nuū uní quiví te natecu rī, achí yá.

<sup>23</sup> Yūcuán na te ni cahān yā jíin ndihī de:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū tāca quiví, te cuāha i jnūhun ndoho i jnūndóho jeē siquí rī, vēsú na cúu i.

<sup>24</sup> Chi núu ndé ñayuu cuní i cácu i nuū jnūndóho quiji nuū i jeē siquí ruhū, núu súcuan te jnahnū ndetū i ñí cáni. Te núu ndé ñayuu, vēsú na cúu i jeē siquí ruhū, te cotecu i ñí cáni.

<sup>25</sup> ¿Chi ndé cuajniñu vēsú na cūndeyí ñayuu nihīn i ñí ñáyiví, te núu squiví i máá i nuū jnahnū ndetū i ñí cáni?

<sup>26</sup> Chi núu na-ni ñayuu cúcanu i jeē siquí ruhū, Yaā ní nduu tēe, jíin siquí jnūhun cáhán rī, suni súcuan cucanu rī jeē siquí máá i, quiví ndíji ri. Te quiví ún chi yōhoyo luu cujéhnū rī, nájnūhun cújéhnū Tátá rī, te suni cácujehnū ndajéhé ndoo ya sáha ya.

<sup>27</sup> Te jendaá cahán rī jíin ró jeē sava tēe cáhīn yāhá, ma cúu de chi nde cuni de jeē ndácu Yaā Dios jniñu jíin poder yā. Achí yá.

*Jeē tucu ni nduu ya*

(Mt. 17.1-8; Mr. 9.2-8)

<sup>28</sup> Yūcuán na te nájnūhun nuū uná quiví jeē ní cahān yā jnūhun yáha, te ni caa ya ñn yucu, cuacacān tahu yā. Te Pedro jíin Jacobo jíin Juan cuango de jíin yá.

<sup>29</sup> Te níni jícán tahu yā, te tucu ni nduu nuū yā, te sahma ya ni nducuíjín quiyí, te ndíndéé.

<sup>30</sup> Yūcuán na te ni canecoo uū tēe, cándajnūhún de jíin yá. Te cúu de Moisés jíin Elías, tēe ni cahīyo jenahán.

<sup>31</sup> Te luu ndíndéé de cáhīn de, te ni cacahān de jíin yá siquí jeē ní cuyajni cuu yā ñuu Jerusalén.

<sup>32</sup> Te Pedro jíin tēe cáyūcu jíin de, yōhoyo cáji de māhná, te vēsú súcuan te tu ní cáquixī de. Te ni cajito de jeē lúu

ndíndēe yá jín ndíndúú tée cáhīn jín yá.

<sup>33</sup> Te nuū ní cacujiyo tēe un núū yā, te ni cahān Pedro jín yá:

Maestro, nacā jeē váha jeē cáhīn ná yáha. Te na sáha ná únī vehe ramada, ñn cuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cahán de.

<sup>34</sup> Te níni cáhán de súcuan, te ni quee vicō nūhun ní jesi nuū de jíjnáhan de. Te ni cayūhú de jeē cáhīn de chíji vicō ún.

<sup>35</sup> Te nuū vicó un ní cahān ñn jnūhun:

Yáha cúu Sēhe ri jeē maní ndasí rí jín. Te na cúni nahín ró jnūhun cáhán yā, achí.

<sup>36</sup> Te nuū ni jínu ni cahān jnūhun ún, te máá ñn na Jesús ín ya nuū de. Te máá de tu ní cácahān cuiti de, te táca quiví ún tu ní cácachi de nuū ni ñn jeē súcuan ni cajito de.

*Jeē ní nasávāha ya ñn sūchi ñūhun tachī ini*

*(Mt. 17.14-21; Mr. 9.14-29)*

<sup>37</sup> Te inga quiví un ní nanuu ya yucu jín de. Te cuehē ñayuu ni jejnahan i ya.

<sup>38</sup> Te mēhñu ñayuu cuehē un ní cana jee ñn tēe:

Maestro, jícán tahu na núū ni jēe condēhe ní sēhe yí ná, chí máñúhún i nuū ná.

<sup>39</sup> Te máni jeē sáha xeēn tachī jín i, te cána cóhó i sáha, te jéhni yíhí i, te jēe tiñū yuhu i. Te yōhyo stóho i, te yōhyo uhū siaá i.

<sup>40</sup> Te ni cahān ndahú ná jín tée cáscuáha jín ní jeē na quénehen te tachī ún, te tu ní cúu sáha de, achí de.

<sup>41</sup> Te ni cahān yā jín de jíjnáhan de:

Ñayuu yōhyo nīhni ni cácuu ró, chí tu cácandíje ró jēe cuu nduvāha i. ¿Nasaa ga quiví condee rí jín ró jeē cuándeyí ni rí jín ró? Cuáquihin sēhe ró na quíji i, achí yá.

<sup>42</sup> Te níni véji i nuū yā, te ni cotúú i ni sáha tachī, te ni jehni yíhí i. Te Jesús ni cahān xeēn yā nuū tachí un, te ni

nasávāha ya sūchí un, te ni nacuāha ya i nuū tatá i.

<sup>43</sup> Te ndiví ñayuu nahán ní canaa ni i cájito i jeē yóhyo jéhnū jniñu sáha Yāa Dios.

*Jeē ni cáhān tucu ya jeē cúu yā*

*(Mt. 17.22-23; Mr. 9.30-32)*

Te níni cánaa ni i cájito i táca jniñu ni sáha Jesús, te ni cahān yā jín tée cáscuáha jín yá:

<sup>44</sup> Chuhun váha ni rō jnūhun cáhán rí yáhá, te ma náa ni rō, chí ruhū, Yāa ní nduu tēe, nastúu i ruhū quiví ri ndaha táca tée xeēn, achí yá.

<sup>45</sup> Te tu ní cájecūhun ni de jnūhun cáhán yā, chí tu ní cúu cuiti jecūhun ni de. Te ni cayūhú de cajnūhún de ya siquí jnúhun ni cahān yā.

*Ndé ñáyuu cúu jeē cujéhnū ga*

*(Mt. 18.1-5; Mr. 9.33-37)*

<sup>46</sup> Yūcuán na te tēe cáscuáha jín yá ni caquejé de cácahān de siquí núu ndé ñn de cújéhnū ga.

<sup>47</sup> Te Jesús ni jini yā jeē súcuan cájeni ni de. Te ni jni ya ndaha ñn sūchi lúli, te ni jeni ya i xiin ya.

<sup>48</sup> Te ni cahān yā jín de:

Na-ni ñayuu núu jeē siquí ruhū jetáhú i sūchi lúli yáha, te ruhū jetáhú i. Te ñayuu jetáhú rúhū, suni jétáhú i Yāa ní tají rúhū vēji ri. Te ñayuu núu ga mēhñu ró, máá i cújéhnū ga, achí yá.

*Ñayuu tu cáhán siquí yā, ín i jín yá*

*(Mr. 9.38-40)*

<sup>49</sup> Yūcuán na te ni cahān Juan:

Maestro, ni cajito ná ñn tēe jeē jín síhví ní quénehen de tachī ini ñayuu. Te ni cajesí na jēe sáha de, chí tu jíca de jín yó, achí de.

<sup>50</sup> Te ni cahān Jesús jín de:

Ma cási rō jeē sáha de, chí tēe tu cáhán siquí yō, ín de jín yó, achí yá.

*Jeē ni cáhān yā nuū Jacobo jín Juan*

<sup>51</sup> Te ni cuyajni quiví jeē quínuhun yā andiví, te ni tee téyí ni yā jeē quihín yā ñuu Jerusalén.

<sup>52</sup> Te ni tají yá sava tēe yósnúu de jín jnúhun jeē jinú yā. Te cuangoo de ñn ñuu Samaria návāha nducú de nuū ndóo ya.

<sup>53</sup> Te ñayuu Samaria un tu ní cájēhe i vehe ndōo ya, chi ni cajini i jeē ndé Jerusalén quihīn yā.

<sup>54</sup> Te Jacobo jiín Juan, tēe cáscuáha jiín yá, ni cajini de jeē súcuan cúu, te ni cacahān de jiín yá:

¿A cúní ni jēē ndácu yó jniñu quiiji ñuhūn nde andiví, nájnūhun ni sáha Elías, návāha naa ñayuu yáha? Achí de.

<sup>55</sup> Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnūhun cácahān rō.

<sup>56</sup> Chi ruhū, Yaā ní nduu tēe, tú vēji ri jeē snāá rī ñayuu, chi sa suhva jeē jnáma ri ñayuu, achí yá.

Yūcuán na te cuahān yā jiín de inga ñuu.

*Siquī ñáyuu jeē cácuani i condiquīn i ya*

*(Mt. 8.19-22)*

<sup>57</sup> Te níní jíca ya ichi jiín de, te ni cahān ñn tēe jiín yá:

Condiquīn na níhín quihīn yō ndé-ni cúu-ni nuū quihín ni, achí de.

<sup>58</sup> Te ni cahān Jesús jiín de:

Tāca ñúcuui, íyó yāu cava cáñuhun tí. Te suni saa, iyó táca tí. Te ruhū, Yaā ní nduu tēe, tú nuū cusú rī, achí yá.

<sup>59</sup> Te ni cahān yā jiín inga de:

Condiquīn ruhū na quihín yō.

Te máá tēe un ní cahān de:

Condetu ní ndé na quíchindūji ná tátá na xihna gā. Yūcuán na te condiquīn na níhín, achí de.

<sup>60</sup> Te ni cahān Jesús jiín de:

Stóo tāca ndíyí na chindūji jnáhan ndīyí, chi ndīyí cácuu ñayuu tu cácahān. Te rōhó, cuahān te nacani rō jnúhun ndese ndácu Yaā Dios jniñu, achí yá.

<sup>61</sup> Yūcuán na te suni ni cahān inga de:

Cúní na condiquīn na níhín, te cuāha ní jnúhun jeē xihna gā quicahān na jiín ñáyuu cáyūcú vehe ná, achí de.

<sup>62</sup> Te ni cahān Jesús jiín de:

Núu na-ni tēe quéjé de condiquīn de ruhū, te núu máni jeē nacani cuíhyá ni de siquī tāca jēē ni stóo de, núu súcuan te cúu de nájnūhun ñn tēe jítu jiín yátá, te jícó cóto de ichi vehe de.

Te ma cuajniñu de condiquīn de ruhū siquī jniñu ndácu Yaā Dios, achí yá.

*Jeē ní tají yá unī xico uxī de*

## 10

<sup>1</sup> Te ná ni cuu tācá jniñu yáha, te máá Jítóho yō ni nacāji ya unī xico uxī gā de. Te ni tají yá ndihuū ndihuū de jeē cósnūú de nuū yā, quingoo de tācá ñuu jiín táca lugar nuū jé yajni quihīn maá yá.

<sup>2</sup> Te ni cahān yā jiín de:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. Núu súcuan te cacān tahu rō nuū maá Jítóho rō Yaā Dios jeē na tájí yá cuehē tēe na quingoo de cahnde de trigo, cúu jeē nacani de jnūhun ya nuū ñáyuu.

<sup>3</sup> Te cuángoo jíjnáhan ró, te na cástūhun rí nuū rō jeē tají rí rohó quingoo ró nájnūhun londe mēhñu yihí.

<sup>4</sup> Te ma cóndiso ró ñunu, ni yijni xuhún, ni ndijēn. Te ichi ma cucuéé ró ndajnūhun ró jiín ni ñn.

<sup>5</sup> Te na-ni vehe núu ni quiví ró, te xihna gā cahān rō: Na quíji jnūhun ndeyí jnūhun siñ ni nuū rohó, ñáyuu vehe yáha, achi rō.

<sup>6</sup> Te núu vehe yúcuu íyó ñáyuu vāha, te jnūhun ndeyí ní cahān rō jinū siquī i. Te núu tuú, te jnūhun ndeyí ní cahān rō ma jinú siquī i.

<sup>7</sup> Te suni vehe yúcuu coyūcu ró, te caji rō coho ró jēē cuáha ñayuu nuū rō. Chi siquī jniñu jeē nacani rō jnúhun nuū ñáyuu, te cánuú coto i rōhó. Ma quéndōo ró tijni vehe, chi ñn-ni vehe.

<sup>8</sup> Te na-ni ñuu núu ni quivícoo ró, te núu cuatáhú i rōhó, te caji rō tāca jēē cuáha i nuū rō.

<sup>9</sup> Te nasávāha ró ñáyuu cácuu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō.

<sup>10</sup> Te na-ni ñuu núu ni quivícoo ró, te núu tu ní cájetáhú i rōhó, te quendacoo ró ini calle yūcuán, te cahān rō:

<sup>11</sup> Nde ticachā ñuu rō yáha jēē ni jñí jehē rī, na náscóyo ri jeē cúu seña jeē íyó cuéchi ró jēē tu ní cájetáhú ró.



Te na cónahán ró jeē Yaā Dios je ni cuyajni ya jeē ndacu ya jniñu nuū rō nuú.

<sup>12</sup> Te cáhán rī jíin ró jeē quivī juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñayuu cuēchi.

*Jeē ní cuxeēn yā nuū sava ñuu nīhni ni*  
(Mt. 11.20-24)

<sup>13</sup> 'Nacā jeē xeēn ndoho ró, ñayuu ñuu Corazín. Te nacā jeē xeēn ndoho ró, ñayuu ñuu Betsaida. Chi núu ini ñuu Tiro jíin ñuu Sidón ni sáha ri jniñu jéhnu jeē ni sáha ri ini ñuu maá ró, te yachī nacani ni ñayuu ñuu un jéē stóo i cuēchi i núú. Te sáha i seña jeē steén jeē nácani ni i siquī cuéchi i, chi chun i sahma jnúú te chuhun i yaā xinī i núú.

<sup>14</sup> Núu súcuan te quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jíin ñuu Sidón.

<sup>15</sup> Te róhó ñayuu ñuu Capernaum, ¿á cájeni ni rō jeē cujéhnu ró nájnūhun ñn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndiyí. Achí yá.

<sup>16</sup> Te ni cahān gā yā jíin téē jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichī rohó, suni ruhū squéhichī i. Te ñayuu squéhichī ruhū, suni squéhichī i Yaā ní tají rúhū vēji ri. Achí yá.

*Jeē ní ndecoo téē ni tají yá*

<sup>17</sup> Te ni ndecoo unī xico uxī téē un, cácusī ni de te cácahān de jíin Jesús:

Nde tachī cájetáhú núu na jéē jíin síhví ní, chi quéndacoo ini ñayuu, achí de.

<sup>18</sup> Te ni cahān yā jíin de:

Súcuan cúu, chi ni jito ri jeē nájnūhun ñn taja ni ningava Satanás ichi ándiví, chi ni quende rī ndihi poder un.

<sup>19</sup> Te vijna te je ni jēhe ri fuerza nuū rō jeē cueñū rō nájnūhun siquī tāca cóo jíin tísuhma, te cundeyí ró siquī tāca

fuerza maá jéē jito uhū yohó, te tú na vé sáha ga jíin ró.

<sup>20</sup> Te ma cúsiñ ni rō maá-ni jeē cájetáhú táchī nuū rō, chi sa cusīñ gā ni rō jeē yosó síhví ró nde andiví. Achí yá.

*Jeē ní cusīñ ni Jesús*

(Mt. 11.25-27; 13.16-17)

<sup>21</sup> Te suni hora un ní cusīñ ni Jesús, ni sáha Espíritu Santo, te ni cahān yā:

Na cútahū na núu ni Tátā, Jitoho andiví jíin ñáyiví. Chi ni jesi ni táca jnúhun ndichí ní, jeē ma cúni ñayuu ndichí jíin ñayuu tūhva cuenta ñayiví yáha. Te ni steén ni núu ñayuu cácuu nájnūhun sūchi lúli. Chi súcuan ni nujnahan ni ni Tátā, achí yá.

<sup>22</sup> Te ni cahān gā yā:

Ndivii ni jēhe Tátā rī nuū rī. Te tu cájini ñayuu ndé ñn cúu ruhū, Sēhe Yaā Dios, chi máá-ni Tátā rī cúu jeē jiní yā ruhū. Ni tu cájini ñayuu ndese Yaā cúu máá Tátā, chi máá-ni Sēhe cúu jeē jiní. Te íyo ñayuu jeē cuní maá Sēhe stéén yā nuū i ndese Yaā cúu Tátā yā, te máá i suni cuni i. Achí yá.

<sup>23</sup> Yūcuán na te jito ya nuū téē cáscuáha ún, te ni cahān yā jíin máá-ni de:

Yōhyo ndetū ñayuu cájito jniñu jéhnu jeē cájito máá ró.

<sup>24</sup> Chi cáhán rī jíin ró jeē cuehē téē ni canacani jnúhun Yaā Dios, jíin táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

*Jnúhun ñn téē vāha ni nación Samaria*

<sup>25</sup> Yūcuán na te ñn téē stéén tutu ley Yaā Dios, ni ndocuiñ de ni jecahān de jíin Jesús, chi cúni de coto ndee de ya. Te ni cajnúhún de:

Maestro, ¿na vé sáha ná te nihīn tahú na cotecu na ññ cáni andiví? áchí de.

<sup>26</sup> Te ni cahān yā jíin de:

¿Ndesé yósó núu tútu ley? ¿Ndesé cáhán cáhu ró? Achí yá.

<sup>27</sup> Te máá téē un ní cahān de jeē cahān nuū tútu:

Coo manī ndasí ró jíin máá Jítoho rō Yaā Dios, nde jnāā ndasí ró sáha ró ndihí jeē cúsih ní yā, nde jíin ini jíin ánuá rō, jíin nái fuerza rō, jíin nái jéē níjnūnī rō. Te cundáhú ni rō jnáhan ró nájñuhun cundáhú ni rō maá ró, achí. Achí de.

<sup>28</sup> Te ni cahān yā jíin de:

Vāha ni cahān rō. Te núu cuu sáha ró súcuan te nihīn tahu rō cotecu rō ní cáni, achí yá.

<sup>29</sup> Te máá téē un cúni de jeē quéndōo ndaā de nuū yā jíin jñuhun ni canjñuhun de, te ni cahān de:

¿Te ndé ñáyuu cácuu jnáhan ná? achí de.

<sup>30</sup> Te ni cahān Jesús:

Ĥin tēē ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuīhna núu de, te ni caquende ndihí ndajñiñu de, te nde sahma ñuhun de. Te ni cacani ndevāha ún de jeē jé yajni cuu de núu. Te ni castóo ún de, te cuangoo.

<sup>31</sup> Te ni cuu jeē ichi un yāha Ĥin sutū quihīn de, te ní jito de nuū téē ún, te ní síyo-ni de cuahān de.

<sup>32</sup> Te suni súcuan Ĥin tēē grupo levita jeē cájeñiñu ini templo, vēji de ichi ún, te ní jito de nuū téē ún, te ní yāha jíicá-ni de cuahān de.

<sup>33</sup> Te Ĥin tēē nación Samaria, suni vēji de ichi ún, te nuū ní jito de, te ní cundáhú ni de tēē ún.

<sup>34</sup> Te ni quee de nde nuū catú téē ún, te ni chuhun de aceite jíin vino nuū ní túji tēē ún, te ní jihni de sahma nuū. Te ni soó de tēē un síquī quiti de, te cuahān de jíin téē un ndé Ĥin mesón, te ni condito de.

<sup>35</sup> Te inga quivī ún, hora jeē quihín de, te ní tava de uū xuhun cáa, ní jēhe de nuū tēē chíi mesón. Te ni cahān de: Coto ní téē yāha, te núu caxīn gā ní xuhun ní jíin de, te nuū nándicó ná te nachunaa ná núu ní, achí de.

<sup>36</sup> Núu súcuan ¿te ndese jéni ní rō? Jeē ndinúní téē ún, ¿ndé Ĥin de ní chihí cuenta jeē jnáhan de cúu tēē ní canecoo ñacuīhna núu? Achí yá jíin téē stéén tutu ley.

<sup>37</sup> Te ni cahān de:

Tēē jeē ní cundáhú ni tēē ni tují, vēsú tēē ñuu jíicá cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō táca ñáyuu, achí yá.

*Jeē ni íne ya vehe Marta jíin María*

<sup>38</sup> Yūcuán na te ni quihin tucu ya ichi cuahān yā, te ní jinū yā Ĥin ñuu lulí. Te Ĥin ñahan nání Marta, ní cana ña ya ní jehēn yā vehe ña.

<sup>39</sup> Te Marta, íyó Ĥin cuhū ña nání María. Te María ní cucōo ña nuū jehé Jesús, jíni nahín ña jñuhun cáhán yā.

<sup>40</sup> Te Marta chí cúnéé máá ña jíin cuéhē jñiñu sáha ña. Te ní quee ña nuū yā, te ní cahān ña:

¿A tu sáha ní cuenta jeē cuhū na ní stóo máñuhún ña saña núu jñiñu? Te cahān ní jíin ña na chíndéé ñáhán ña saña, achí ña.

<sup>41</sup> Te ni cahān Jesús jíin ña:

Marta, yōhyo ndíhví ní rō jíin cuéhē jñiñu, te yōhyo stóho ró máá ró jíin.

<sup>42</sup> Te íyó Ĥin-ni jñiñu cánuú. Te María chí ní nacāji ña jñiñu cánuú, suu jeē ndíhví ní ña síquī jñuhun Yaā Dios, te ma quénehen yó ña nuū ún. Achí yá.

*Jeē ni stéén yā ndese cacān tahu yō (Mt. 6.9-15; 7.7-11)*

## 11

<sup>1</sup> Te Ĥin quivī íne Jesús Ĥin lugar jíicán tahu yā. Te nuū ní ndihí ní jíicán tahu yā, te Ĥin tēē scuáha jíin yá, ní cahān de:

Stéén ní núu ná ndese cacān tahu na jíjnáhan ná, nájñuhun ní steén Juan nuū téē ní cascuáha jíin de, achí de.

<sup>2</sup> Te ni cahān yā jíin de:

Jeē cacán tahu rō, te suhva cahān rō:

Tátá maá ná jíjnáhan ná jéē ndeé ní andiví,

níní na cóo yáñuhún ná nuū ní, chí Yaā Ĥi cúu ní.

Te ñuhun ní na jéē yachī quiji quivī ndacu ní jñiñu ní ñáyiví yāha.

Te na cóo táca jñiñu nújnahan ní ní, nájñuhun íyó ini andiví, súcuan na cóo ini ñáyiví.

<sup>3</sup> Staā jeē cátecu na táca quiví, cuāha ní núu ná vijna.

4 Te cone cáhnu ni ni núū tāca cuéchi  
cásáha ná núū ní,

nájnūhun cáhine cáhnu ni na núū  
ñáyuu casáha cuéchi nuū ná.

Te ma cuáha ní jnúhun jeē coto ndee  
jexeén sãña,

chi sa suhva jnama ní sãña nuū tāca  
jéē neé.

Achi rō jijnáhan rō. Achi yá.

5 Te ni cahān gā yā:

Núu ndé ñn rōhó íyó ñn amigo rō,  
te núu quihīn rō vehe de sava ñuú te  
cahān rō jín de: Amigo, cuāha núu  
unī staā nuū rī.

6 Chi ñn amigo rī jeē jíca de viaje, ni  
quee de vehe rī, te tú na vé névāha rī  
jeē cuáha rī caji de. Achi rō.

7 Te núu cahān tēe íne ini vehe: Ma  
stáhān rō ruhū, chi ndíhyú yehyí rí,  
te je cáquixī sēhe rī jín rí, te ma cúu  
ndonda rī jeē cuáha rī nuū rō, achi de.

8 Te cáhān rī jín rō, vēsú ma ndóna  
de cuāha de nuū rō siquī jeē cúu de  
amigo rō, te jeē yóhyo stáhān rō de, jeē  
yúcuan ndonda de cuāha de ndihī jeē  
jíní ñúhún rō.

9 Núu súcuan te cáhān rī jín rō ji-  
jnáhan rō jeē suni súcuan cacān tahu  
rō nuū Yaā Dios, te cuāha ya nuū rō.  
Te nducú rō tāca jéē váha íyó núu yā, te  
nihīn rō sáha ya. Te cacān tahu rō nde  
nihīn rō, nájnūhun sáha ñayuu cahān  
yehyí ndé nune quivī i.

10 Chi tāca ñáyuu jicán, cuāha ya nuū  
i. Te ñayuu nducú, suni nihīn i. Te  
ñayuu cahān, nune ya ichi nihīn i jeē  
cuní i.

11 ¿Te ndé ñn rō cúu tátá, te núu sēhe  
rō jicán i staā nuū rō, te á cuáha rō ñn  
yuū nuū i? Te núu jicán i chācá, ¿te á  
cuáha rō ñn coō nuū i?

12 Chí núu jicán i ñn ndivī, ¿te á  
cuáha rō ñn tisuhma nuū i? Tú cuiñi  
súcuan.

13 Núu súcuan te máá rō jijnáhan  
rō, vēsú ñáyuu iyó cuéchi cácuu rō, te  
cájinī rō cuāha rō jéē váha nuū sēhe rō.  
Te nagā ni cuu máá Tátá rō andivī jéē  
ma cuáha ya Espíritu Santo nuū ñáyuu  
jicán nuū yā. Achi yá.

*Jeē ní cacahān de jeē jejniñu ya  
fuerza Satanás*

*(Mt. 12.22-30; Mr. 3.19-27)*

14 Te quénehen ya ñn tachī ini ñn  
tēe, jeē ní cuiñhín de ni sáha. Te nuū  
ní quenda tachī, te ni nacahān tēe ni  
cuiñhín un. Te ni canaa ni ñayuu cájito  
i.

15 Te sava ñayuu ún chi ni cacahān i:  
Jín fuerza Satanás jeē cujéhnū nuū  
tachí, quénehen tēe yáha táca táchī ini  
ñayuu, achi i.

16 Te sava ga i cúni i coto ndee i ya,  
te ni cajicān i jeē sáha ya jeē coo ñn  
seña ichi andivī.

17 Te máá yá jíní yā jeē súcuan cájeni  
ni i, te ni cahān yā:

Tácá nación jeē sasñn máá te cua-  
jnáhan máá, núu súcuan te snáa jeē iyó  
váha máá. Te núu ñayuu ñn vehe sásñn  
máá te cuajnáhan máá, núu súcuan te  
ma cúu ga coyūcu cáhnu.

18 Te suni súcuan Satanás, núu sásñn  
máá jín jnáhan tachī, ¿te ndese cuiñi  
nihin jeē ndácu jniñu núu súcuan?  
Chi cácahān rō jeē jín fuerza Satanás  
quénehen rī tachī ini ñayuu.

19 Te núu súcuan cúu núu, te ñayuu  
cascuáha jín máá rō jijnáhan rō, ¿na  
jín fuerza cáquenehen máá i tachī,  
cájeni ni rō? Núu súcuan te máá i  
jijnáhan i cachi jeē ní castivī ndasí rō  
ni cacahān rō jeē cáquenehen rī tachī  
jín fuerza Satanás.

20 Te tuú chi sa suhva jín fuerza Yaā  
Dios cúu jeē quénehen rī tachī. Núu  
súcuan te je ndéé Yaā Dios mēhñu rō  
jéē ndácu ya jniñu.

21 Te núu ñn tēe ndacuī, ndíto de  
vehe de jín nújī de, núu súcuan te tú  
ni ñn ndajniñu de ndoñúhún.

22 Te núu quiñi inga tēe ndacuī gā,  
te cundeyí jín tēe ún, núu súcuan te  
quende nují de jeē ndíto de vehe de,  
te sáha de ndese cúni maá de jín nda-  
jniñu jeē quénde de. Te nájnūhun tēe  
ndacuī gā ún, súcuan cúu máá rī nuū  
Satanás.

23 Te ñayuu tu íyó mánī jín rí, núu  
súcuan te jito uhū i ruhū. Te ñayuu tu  
nástútú jín rí, núu súcuan te sa jéte  
núu i ñayuu vējicoo nuū rī.

*Tachī jeē nastútú jnáhan ndávi ini ñayuu*

*(Mt. 12.43-45)*

<sup>24</sup> 'Núu ni quenda ñn tachī ini ñn tēe tu cándíje, te jíca cuu nuū ñúhun téhé, ndúcú núu ndétátú, te tu níhín, yūcuán na te jéni ní maá: Na quínuhun rī vehe nuū ní quenda rī.

<sup>25</sup> Te núu ni ndee tucu, te jíto jeē tēe tu cándíje un cúu de nájnūhun ñn vehe jeē ní ndundoo.

<sup>26</sup> Yūcuán na te jéquihin uxā gā tachī xeén gā vēsú maá. Te quívicoo ini tēe un jēe cóyūcu yúcuán. Núu súcuán te xeén gā ndoho tēe un jēe sándīhí vēsú jeē xíhna ñúhún. Achí yá.

*Yōhyo ndetū ñayuu cájini nahín jnúhun ya*

<sup>27</sup> Te níni cáhán yā jnūhun yáha, te ñn ñahan íne mēhñu ñayuu cuehē un, ní cahān jee ña jíin yá:

Yōhyo ndetū ñahan ní scácu níhín te ní scáxin ña níhín, áchí ña.

<sup>28</sup> Te ní cahān yā:

Sa suhva yōhyo ga ndetū ñayuu cájini nahín jnúhun Yaā Dios te cásquicu i, áchí yá.

*Jeē ní cajicān ñayuu tu cácandíje ñn jniñu jéhnu*

*(Mt. 12.38-42; Mr. 8.12)*

<sup>29</sup> Te ní cataca cuehē gā ñayuu nuū Jesús, te ní quejéé yá cahān yā:

Ñayuu iyó vijna máni cásáha néé i. Te cájicān i ñn jniñu jéhnu jeē steén núu Yaā ní tají Yaā Dios cúu rī. Te tú na inga jniñu jéhnu stéén rī nuū i, chí máá-ni jniñu jéhnu nájnūhun ní cuu jíin Jonás, tēe ní nacani jnūhun Yaā Dios nde jenahán.

<sup>30</sup> Chí nájnūhun ní cajini ñayuu ñuu Nínive jeē ní cuu ñn jniñu jéhnu jíin Jonás, suni súcuán cuni ñayuu tiempo yáha jeē coo ñn jniñu jéhnu jíin rúhū, Yaā ní nduu tēe, jeē quijnáhan jíin modo ní ndoho Jonás.

<sup>31</sup> Te reina jeē ní cújéhnu nación ichi sur, natecu ña jíin ñayuu tiempo yáha, quivī juicio jeē sándaā yā cuēchi, te cahān ña cuēchi síquī i. Chí nde jíca téyí ní quiji ña ní jini nahín ña jnūhun ndíchí ní cahān rey Salomón. Te vijna

chí cújéhnu ga ruhū, Yaā íne yáha vēsú Salomón, te tu cácandíje ró rúhū.

<sup>32</sup> Te tāca ñayuu ñuu Nínive nuū ní nacani Jonás jnūhun, natecu i jíin ñayuu tiempo yáha, quivī juicio jeē sándaā yā cuēchi, te cahān i cuēchi síquī ñayuu yáha. Chí máá i ní canacani ní i ní castoo i cuēchi i quivī ní nacani Jonás jnūhun nuū i. Te vijna chí cújéhnu ga ruhū, Yaā íne yáha vēsú Jonás, te tu cácandíje ró rúhū.

*Jnūhun yátá síquī lámpara*

*(Mt. 5.15; 6.22-23)*

<sup>33</sup> 'Núu nástín ñayuu ñn lámpara, tu chísāhí i, ní tu chúne i chíji ñn cajón. Chí sa suhva jéni i nuū sucún, návāha cundijin nuū ñayuu quívicoo vehe.

<sup>34</sup> Te tinūu ró cúu nájnūhun lámpara nuū yiqui cúñu rō. Núu súcuán te núu tinūu ró íyó ndijin, te ní-ni yiqui cúñu rō cúndijin. Te núu tinūu ró tu íyó ndijin, te ní-ni yiqui cúñu rō iyó nee.

<sup>35</sup> Te suni súcuán cúu ánuá rō, te coto ró jēe ma cáni néé ní rō, návāha tú coo nee ini anuá rō.

<sup>36</sup> Chí núu máni jniñu váha cásáha ró, te tú na jniñu néé cásáha ró, núu súcuán te luz yā cúndijin vāha ini anuá rō, nájnūhun ñn lámpara jeē sáha jeē cúndijin vāha. Achí yá.

*Jeē ní cahān yā jeē iyó cuēchi de jíjnáhan de*

*(Mt. 23.1-36; Mr. 12.38-40; Lc. 20.45-47)*

<sup>37</sup> Te nuū ní cuu ní cahān yā, te ñn tēe grupo fariseo ní cana de ya jeē caji yā staā vehe de. Te ní quivī ya, te ní cucōo ya mesa jeē caji yā staā.

<sup>38</sup> Te tēe fariseo un náā ní de jíto de jeē tu squícu ya costumbre jeē nandahá yá te caji yā staā.

<sup>39</sup> Te ní cahān maá Jítoho yō jíin de:

Róhó tēe fariseo jíjnáhan ró, chí nájnūhun jeē cánacate ró yátā vaso jíin yátā cohó cúu jeē nandahá ró. Te ichi íni rō chí ñúhun máni máá jnúhun cuíhná jíin jnúhun néé.

<sup>40</sup> Tēe cánéé cácuu ró. ¿A tu cájini rō jeē Yaā ní sáha yiqui cúñu rō, suni ní sáha ya anuá rō?

<sup>41</sup> Te jeē cájēhe ró caridad nuū ñayuu ndahú, na sáha ró síquī jeē

cundáhú ndije ni rō i. Te súcuan te coo ndaā anuá rō.

<sup>42</sup> 'Nacā xeēn ndoho rōhó té fariseo, chi cásquicu ró tǎcǎ jniñu lúli, te tu cásquicu ró jniñu cánuú. Chi cásáha ró úxī uxī nuhnī tamīnu jíin ruda jíin táca yucū, te cásocō rō ññ ññ siquī tǎca úxī un núu Yaā Dios. Te tu cásáha cuiti rō jniñu ndaā, ni tu cáhiyo manī rō jíin Yaā Dios. Tǎca jēe yáha cánuú sáha ró núu, te suni ma stóo ró jēe socó rō tǎca yúcū ún.

<sup>43</sup> 'Nacā xeēn ndoho rōhó té fariseo, chi máni cánujnahan ni rō cucōo ró núu silla yññuhún gá ini vehe ññ sinagoga. Te cánujnahan ni rō jēe cahán yññuhún ñáyuu jíin ró nuū calle.

<sup>44</sup> 'Te nacā xeēn ndoho rōhó té castéén tutu ley Yaā Dios, jíin rōhó té fariseo, chi tēe stáhú-ni cácuu ró. Chi cándāa ró nájnūhun yaū ndīyi jēe tú ndijin, chi cásnāa rō anuá ñáyuu, te tu jíin i jēe súcuan cásáha ró jíin i. Achí yá jíin de.

<sup>45</sup> Yūcuán na te ni cahán ññ tēe stéén tutu ley:

Maestro, jēe ni cahán ni táca jnúhun yáha, suni nde siquī maá ná jíjnáhan ná ní cahán ní, áchí de jíin yá.

<sup>46</sup> Te ni cahán yā:

Suni nacā xeēn ndoho rōhó té castéén tutu ley. Chi suni castéén rō tǎca ley ni catava maá ró jēe yí sáha, te tu cácuñdeyí ñáyuu squícu i. Te máa ró, chi ni ññ xinī ndáha ró tu cáscánda ró jēe squícu ró.

<sup>47</sup> 'Nacā xeēn ndoho ró jíjnáhan ró. Chi cásáha ró vehe siquī nuū yíndūji ndīyi jíi rō, tēe ni canacani jnúhun Yaā Dios nde jenahán. Te suni tǎca jíi rō ni cajehni de tēe ún.

<sup>48</sup> Te jēe casáha ró súcuan cúu jēe cáquijnáhan ró jíin de siquī níñu ní casáha de. Chi máa de ni cajehni tēe ún, te máa ró cásáha ró vehe ndīyi ún.

<sup>49</sup> 'Jēe yúcuan nde jenahán ní cahán Yaā Dios ññ jnúhun ndíchí: Tají rí tǎca tēe nacani jnúhun rí jíin táca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios.

<sup>50</sup> Te súcuan te siquī ñáyuu tiempo yáha na cóndee cuēchi jēe ní cajehni jíi

i tēe ni canacani jnúhun Yaā Dios, nde quiví ni jécōo ñayiví te nde vijna,

<sup>51</sup> nde Abel xīhna gā te nde Zacarías, tēe ni cajehni de ini templo sava mēhñu cuarto ññ jíin altar. Núu súcuan te cáhán rí jíin ró jēe siquī ñáyuu tiempo yáha condee tǎca cuēchi ún.

<sup>52</sup> 'Nacā xeēn ndoho rōhó jēe castéén tutu ley, chi cájesi rō ichi jēe jécūhun ni ñáyuu jnúhun ya. Chi ni máa ró tu cácuñi rō jecūhun ni rō, ni tu cájēhe ró jnúhun jēe jecūhun ni ñáyuu cácuñi. Achí yá.

<sup>53</sup> Te jēe ni cáhán yā jnúhun yáha, te tēe castéén tutu ley Yaā Dios jíin tēe fariseo, yōhyo ni caquití ni de nuū yā. Te ni caquejéé de cástíchí de ya siquī cuehē gā jnúhun.

<sup>54</sup> Chi yuhu-ni cánducú de núu sanaa te stíví yá jnúhun cahán yā, návāha nihīn de cuēchi siquī yā.

*Siquī jnúhun stáhú cácahán tēe fariseo*

## 12

<sup>1</sup> Te níni súcuan cúu, te ni cacutútú cuēhē mil ñáyuu, chi nde cájeñū i siquī jehé jnáhan i. Te xīhna gā ni quejéé yá cahán yā jíin tēe cáscuáha jíin yá:

Coto má candíje ró levadura tēe grupo fariseo, chi suu cúu jnúhun stáhú cácahán de. Chi jíte núu nuū ñáyuu, nájnūhun ndécava levadura nuū ññjen pan.

<sup>2</sup> Chi jnúhun stáhú un má quéndōo sáhi cuiti, chi ndihí natūu ndijin, te cuni ñáyuu.

<sup>3</sup> Núu súcuan te suni máa ró, tǎca jnúhun ni cacahán rō jēe tu ní jíin ñáyuu, ññ quiví te cuni vāha i. Te tǎca jnúhun ni cacahán sáhi ró jēe ndihyú yehyí, ññ quiví te cahán jee ñáyuu yatá tǎca vehe.

*Jēe ní cachi yā ndé ññ cúu jēe yūhu yó*

*(Mt. 10.28-31)*

<sup>4</sup> 'Cáhán rí jíin ró jíjnáhan ró, amigo: Ma yūhu ró coto ró ñáyuu cahni yiqui cúñu rō, chi núu ni cajehni i rōhó, te tuá na vé cúu sáha ga i.

<sup>5</sup> Te na cáchi rī nuū rō ndé ñn yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó infierno. Suu máá yá cúu jeē yūhu ró jeē ma stívi ró nuū yā.

<sup>6</sup> Te tācá saa chi tú yahu ndéé tī, chi nde uhūn tī jeē uú centavo lulí. Te ni ñn tī tu náa ni Yaā Dios jeē tu ndíto ya.

<sup>7</sup> Te nagā ni cuu rōhó jijnáhan ró, chi nde ndíhi ixi xíní rō je ni cahu ya. Núu súcuan te ma yūhu ró jijnáhan ró, chi cánuú ndasí gá rō nuū yā vēsú cuehē tācá saa.

*Ñayuu jejnúhún Jesucristo nuū ñnga ñayuu*

*(Mt. 10.32-33; 12.32; 10.19-20)*

<sup>8</sup> Te cáhán rī jín ró, tāca ñayuu jeē cuajnúhún rúhū nuū ñnga ñayuu, suni súcuan ruhū, Yaā ní nduu tēe, cuajnúhún rí i nuū tācá ndajéhé Yaā Dios.

<sup>9</sup> Te tāca ñayuu jeē ma cuajnúhún rúhū nuū ñnga ñayuu, suni súcuan ma cuajnúhún rí i nuū tācá ndajéhé Yaā Dios.

<sup>10</sup> Te núu ndé ñayuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñayuu cahān ndevāha i siquī Espíritu Santo, ma cone cáhnu ni Yaā Dios nuū i.

<sup>11</sup> Te núu cuandeca i rōhó táca vehe ñi sinagoga nuū tēe cásandaā cuēchi, jín núu tēe cácuu tohō, te ma nácani ndasí ni rō ndese stío cuíñi rō jnūhun nuū de.

<sup>12</sup> Chi máá hora un te Espíritu Santo steén yā nuū rō ndese cahān rō. Achí yá.

*Siquī jeē ma ténuū yō ndajníñu cúcá*

<sup>13</sup> Yūcuán na te ñn tēe íne nuū ñayuu cuehē un ní cahān de jín Jesús:

Maestro, cahān ni jín ñani na jéē na táhú sáva de tahū na jín de, achí de.

<sup>14</sup> Te ni cahān yā jín de: ¿Ndé ñn ni jeni ruhū jeē ndacu ri jniñu tahū sáva tahū rō? Achí yá.

<sup>15</sup> Te ni cahān gā yā: Condito ró máá ró jijnáhan ró jéē ma ndíyo ni rō xūhun jín táca gá. Chi vēsú cuehē ndasí ndajníñu névāha ñn tēe, te nasūu jéē yúcuan sáha jeē quéndōo ndetū de, achí yá.

<sup>16</sup> Yūcuán na te ni cahān yā ñn jnūhun yátá jín i:

Ni íyo ñn tēe cúcá jeē névāha ñnūhun jeē cúu vāha ndasí itu.

<sup>17</sup> Te tēe cúcá un ní nacani ni de: ¿Ndese sáha rí? Chi tuá ndé cuhun ñiñi rí. Achí de.

<sup>18</sup> Te ni jeni ni de: Suhva na sáha rí. Na cánu rī tāca yácā rī, te nasáha rí jeē náhnu ga. Te yūcuán chuvāha ndíhi rí ñiñi rí jín táca ndajníñu rí.

<sup>19</sup> Yūcuán na te cahān rī jín ánuá rī: Vjna te cuehē teyí névāha yó jéē canda cuehē cuiyā. Na ndétātu yó te caji yō coho yó, te na cúsiñi ni yō, ni jeni ni de.

<sup>20</sup> Te ni cahān Yaā Dios jín de: Tēe cánéé cúu ró. Chi jecuáā vjna cuu rō, te tāca jéē ní chuvāha ró, ¿ndé tēe cuu? Achí Yaā Dios jín de.

<sup>21</sup> Te súcuan ndoho tāca tēe jeē sacúcá de máá de, te tu ndúcú de jeē quendōo ndetū de sáha Yaā Dios. Achí yá.

*Yaā Dios ndíto ya yohó*

*(Mt. 6.25-34)*

<sup>22</sup> Te ni cahān yā jín tēe cáscuáha jín yá:

Núu súcuan te cáhán rī jín ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun ró.

<sup>23</sup> Chi Yaā Dios ni sáha ya jeē técu rō jín yiquí cúñu rō, te nagā ni cuu jeē ma cuáha ya jeē cáji rō jín jéē cuhun ró.

<sup>24</sup> Condēhe ró ndese cátecu quití cácuu nájnūhun calú, chi tu cátaji tī, ni tu cánastútú tī jeē chívāha tī, ni tú yacā tī. Te vēsú súcuan te máá Yaā Dios scáji yā tī. Te cánuú ndasí gá rō jijnáhan ró vēsú tācá quití ún.

<sup>25</sup> ¿Te ndé ñn ró, á cuu scuéhnu ró máá ró sava metro gā, vēsú na nácani ndasí ni rō?

<sup>26</sup> Te núu ma cúu sáha ró vēsú ñn jniñu lulí súcuan, ¿te najehē cánacani ndasí ni rō siquī jeē cáji rō jín jéē cuhun ró?

<sup>27</sup> Condēhe jijnáhan ró ndese jéē ita tāca yúcū. Chi tu sájniñu, ni tu táu. Te cáhán rī jín ró jeē ni rey

Salomón, quivī ní ñúhun de sahma váha ndasí, tu ní ñúhun de sahma lúu súcuan nájnūhun ita ún.

28 Te núu súcuan jéhe Yaā Dios sahma lúu ita un jéē jée vijna te sajnē cayū nuū ñuhún, te nagā ni cuu rōhó jíjnáhan ró jéē ma sáha ya jeē nihín rō sahma. ¿Te naun tu cá candíje nīhin ró jéē ndíto ya rohó?

29 Núu súcuan te ma nácani cuíhyá ni rō ndese caji rō ndese coho ró.

30 Chi tāca ñáyuu ñayīvi jéē tu cá candíje cúu jeē máni siquī jeē yáha cándihvī ni i. Te máá ró jíjnáhan ró, chi íyó Tátá rō andiví, te jíní yā jeē cájini ñuhún ró tāca jéē yáha.

31 Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō tāca jéē yáha.

*Ndese coo cúcá yó nde andiví  
(Mt. 6.19-21)*

32 'Ma yūhu ró jíjnáhan ró chi cácuu ró nájnūhun lanchi ri. Chi vēsú jecu-ni cácuu ró, te máá Tátá rō cúsi ni yā jeē quívicoo ró ñuu nuū ndácu ya jniñu.

33 Xīco ró jeē cánevāha ró, te cuāha ró xúhun un núu ñáyuu ndahú. Te súcuan caya rō tahū rō nde andiví núu ma cútúhú, nájnūhun jeē chívāha ró xúhun ini yijni. Chi nde andiví te ma náā jeē váha conevāha ró. Chi yūcuan má quívī ñacuīhná, ni ma cúu stívī tiquíxin.

34 Chi nde nuū nihín rō tahū váha ró, yūcuan cúu nuū cóndihvī ni rō siquī.

*Jeē na cóo tūhva yó jéē ndéē yā*

35 'Coo tūhva ró jíjnáhan ró jéē ndéē Jitoho rō, te coo ró nájnūhun mozo jeē nastín i lámpara i.

36 Chi íyó tūhva i te cándetu i jeē ndéē patrón i jeē cuahán de vico nándaaha. Chi núu ni ndee de te cahán de, te nune-ni i yéhyí jíjnáhan i.

37 Te yōhoyo ndetū mozo un núu ni ndee patrón i, te cuni de jeē cándito i. Jendaá cahán rī jíin ró jeē máá patrón sátūhva de máá de, te scúcoo de i mesa te caní de cohó i.

38 Te vēsú cucuéé de ndee de nde sava ñuú, chí jéē néē gā, te núu cuni de jeē súcuan cándito mozo de, te yōhoyo ndetū i jíjnáhan i núu súcuan.

39 Te na jécūhun ni rō jeē cahán jnūhun yátá yáha: Tēe chíí vehe, núu ni jini de na hora quiiji ñacuīhná, te condito de, te ma cuāha de jnūhun jeē sacuíhná vehe de núu.

40 Te suni súcuan coo tūhva ró jíjnáhan ró, chí núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yá jíin de.

*Jnūhun mozo vāha jíin mozo tu squícu  
(Mt. 24.45-51)*

41 Yūcuán na te Pedro ni cajnūhún de ya:

¿A jíin máá-ni ná jíjnáhan ná cáhán ni jnūhun yátá yáha, chí suni cáhán ni jíin ndihí ga ñayuu? achí de.

42 Te ni cahán maá Jítoho yō:

Cáhán rī jíin ndé-ni ñayuu cúu nájnūhun mozo jeē ndito xiní te squícu vāha. Te máá patrón sáha de jeē condiso jniñu i coto i ñayuu vehe de, návāha scáji i máá hora.

43 Te yōhoyo ndetū mozo un jéē núu ni ndee patrón, te cuni de jeē súcuan squícu vāha i.

44 Jendaá cahán rī jíin ró jeē caní de mozo un jéē cóto i ndihí ndajniñu de.

45 Te núu jéni ni i jeē ma ndíji yachí patrón i, te quejéé i caní i tēe jíin ñahan cácuu jnáhan mozo i, te caji i coho i te najini i,

46 núu súcuan te ndee-ni patrón quiví jeē tu ndétu i jíin hora jeē tú na vé jéni ni i. Te stóho xeēn de i, te squívī de i ndoho i jíin ñáyuu tu cásquícu.

47 'Te mozo jeē jini i ndese nújnahan ni patrón i, te núu tu sátūhva i ni tu squícu i jeē cuni de, ndoho xeēn i jíin yujnu xí.

48 Te mozo jeē tu jini i ndese nújnahan ni patrón i, te núu sáha i jniñu jeē caní de i, núu súcuan te cūhva-ni caní de i. Chi ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu

téjníñu ya i, suni cuehē gā nandacān yā nuū i.

*Jeē siquí Jesús te cusín ini ñayuu  
(Mt. 10.34-36)*

<sup>49</sup> 'Ni quee rī jeē nájñuhun jeē scuiquín rī ñuhūn ini ñayiví, te suu cúu jeē cusín ini ñayuu jeē siquí ruhū. Te cúní rī jeē yachī coo súcuan, návāha quivícoo ñayuu ndaha Yaā Dios.

<sup>50</sup> Te íyó ñn jñúndóho cánuú ndoho ri, te cúcuíhyá ndasí ni rī chi nde jñu ndoho ri, te ndusñ ni rī.

<sup>51</sup> ¿A cájeni ni rō jeē véji ri jeē cóyūcu mání ñayuu ñayiví? Cáhán rī jín ró jeē tuú, chí sa suhva jeē cusín ini ñayuu jeē siquí ruhū.

<sup>52</sup> Chi nde vijna te quejéé jéē uhūn ñayuu ñn vehe, sásñ máá jínáhan, unī siquí uú, te uū siquí uní.

<sup>53</sup> Chi tátá cusín ini jín séhe yí, te séhe yí jín tátá, te náná jín séhe síhí, te séhe síhí jín náná, te náná chíso jín séhe jēnú, te séhe jēnu jín náná chíso. Achí yá.

*Jeē ni cáhān yā siquí seña andiví  
(Mt. 16.1-4; Mr. 8.11-13)*

<sup>54</sup> Te suni ni cahān yā jín ñayuu cuehē ún:

Núu cájito ró jeē náne vicō ichi núu cáne niāndii, te cácahān rō jeē cuun saū, te súcuan cúu.

<sup>55</sup> Te núu quéé tachī vēji ichi sur te cácahān rō jeē nandii, te súcuan cúu.

<sup>56</sup> Tēe stáhú-ni cácuu ró. Chi cájecūhun ni rō ndese stéén seña andiví jín ini ñayiví, ¿te naun tu cájecūhun ni rō ndé ñn cúu ruhū jeē sáha ri táca jñiñu jéñnu tiempo yáha?

*Jeē cóndihvī ni yō jeē ma cóndee  
cuēchi siquí yō*

*(Mt. 5.25-26)*

<sup>57</sup> ¿Te najehē tu cánacani ni maá ró ndé ñn cúu jñiñu ndaā sáha ró?

<sup>58</sup> Te núu ñn ñayuu quihñ i jín ró nuū tohó jeē cacán i cuēchi siquí rō, núu súcuan te níní cuáhān rō jín i ichi te cóndihvī ni rō sándaā rō jín i. Chi núu tuú, te squíví i rōhó núu juez, te juez siáha de rōhó núu policía, te policía chune de rōhó vecāa.

<sup>59</sup> Te jendaá cahán rī jín ró jeē ma quénda cuítí rō yūcuán chí nde chunaa rō ndihí cuítí xūhun cájicān de. Te suni súcuan cóndihvī ni rō cahān ndahú ró jín Yaā Dios, návāha ma ndácunehen ya cuēchi siquí rō. Achí yá jín de.

*Jeē cánuú nacani ni yō jeē stóo yó  
cuēchi yó*

## 13

<sup>1</sup> Te ñn quiví yúcuán ní quecoo jecu tēe, ni canacani de jñuhun nuū yā ndese ni candoho jecu tēe Galilea. Chí ná cájehni de quítí jeē socó de, te ni quecoo mozo Pilato ni cajehni tēe ún.

<sup>2</sup> Te ni cahān Jesús:

Tēe Galilea un, ¿á cájeni ni rō jeē súcuan ni candoho de siquí jeē xeēn gā ni íyo cuēchi de vēsú táca gá ñayuu Galilea?

<sup>3</sup> Cáhán rī jín ró jeē tuú. Te rōhó jínáhan ró suni jñahnū ndetū rō núu tú nacani ni rō jeē stóo ró cuēchi ró.

<sup>4</sup> Te xahūn unī tēe jeē ní cotúú torre Siloé siquí de, te ni cajihí de, ¿á cájeni ni rō jeē ní casáha de cuēchi xeēn gā vēsú táca gá ñayuu ñuu Jerusalén?

<sup>5</sup> Cáhán rī jín ró jeē tuú. Te máá ró jijnáhan ró, suni jñahnū ndetū rō núu tú nacani ni rō jeē stóo ró cuēchi ró.

*Jñuhun yátá núndēhe higo*

<sup>6</sup> Yūcuán na te ni cahān yā jñuhun yátá yáha jéē steén yā ndese cácuu ñayuu tu squícu jñuhun Yaā Dios:

Cácuu i nájñuhun ñn nundēhe higo jeē ín nuū ñuhun ñn tēe. Te ni jecondēhé de núu ín ndehē xiní, te tú na vé ín.

<sup>7</sup> Te ni cahān de jín mozo sájñiñu nuū ñuhun de: Vijna te je íyó unī cuiyā jeē quíji ri nducú rí ndehē xiní yújnu higo yáha, te tú na vé cúun xiní. Núu súcuan te cahnde rō, chí máá jéē sajnēñu nuū ñuhun, áchí de.

<sup>8</sup> Te ni cahān mozo un jín de: Stóo ní na cuññi ñn na cuiyā, te na nástáyā ná jéhē te chuhun ná jéhen.

<sup>9</sup> Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.



*Jeē ní nasávāha ya ñn ñahan quivī ndétātú*

<sup>10</sup> Te ñn quivī ndétātú te stéén Jesús jnūhun ini vehe ñ sinagoga.

<sup>11</sup> Te íyó ñn ñahan jeē ní cuu xahūn unī cuiyā kuhú ña. Chi ñn tachī ni sáha jeē jíca tñhí ña, te tuá cúu cuiñi caca jnuu ña.

<sup>12</sup> Te ni jito Jesús nuū ña, te ni cana ya ña, te ni cahān yā jíin ña:

Vijna te nduvāha ní jēē kuhú ni.

<sup>13</sup> Te ni soó yá ndaha ya síquī ña, te ni nucuññi jnuu-ni ña, te ni nacuatáhú ña nuū Yaā Dios.

<sup>14</sup> Te tēe cújéhnū ini vehe ñ sinagoga, ni quiñi ni de nuū Jesús jeē ní nasávāha ya ñahan un quivī ndétātú. Te ni cahān de jíin ñáyuu:

Iñū quivī iyó jēē sájniñu yó, te tāca quivī ún quiñicoo ró nduvāha ró. Te quivī ndétātú chi ma cúu, áchí de.

<sup>15</sup> Yūcuán na te ni cahān maá Jítoho yō jíin de:

Tēe stáhú-ni cácuu ró. Quivī ndétātu ¿á tu cándají ró stiquī rō burro ró jēē quíscóho ró tí ndute?

<sup>16</sup> Te ñahan yáha jēē cúu ña ñn sēhe yucūn Abraham, chi nájnūhun ni conuhñi ña xahūn unī cuiyā ni sáha Satanás. ¿Te á tu íyó váha jeē nájnūhun nandají rí ña nuū cuehyī ndóho ña quivī ndétātú? Achí yá.

<sup>17</sup> Te jeē ni cahān yā súcuan, te tāca tēe cájito uhū de ya, ni cacucanu de. Te ndihí ñayuu ún chi ni cacusñi ni i jíto i tācá jniñu jéhnū sáha ya.

*Jnūhun yátá síquī ndiquin mostaza (Mt. 13.31-32; Mr. 4.30-32)*

<sup>18</sup> Te ni cahān yā:

Na cáhān rī ñn jnūhun yátá návāha cuni rō ndese ndúcuehē ñayuu ndácu Yaā Dios jniñu nuū.

<sup>19</sup> Ndúcuehē i nájnūhun jéhnū ñn ndiquin mostaza jeē jéquin ñn tēe nuū ñūhun de, te ndúu nájnūhun ñn yujnu. Te cúu cáhnu, te tācá saa chi cásáha tí tacā tñ chiji ndaha ún. Achí yá.

*Jnūhun yátá síquī levadura (Mt. 13.33)*

<sup>20</sup> Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū:

<sup>21</sup> Cúu nájnūhun levadura jeē ní quiñin ñn ñahan, te ni saca ña jíin ún kilo harina, te ni ndaa ndihí ñujen ni sáha. Achí yá.

*Siquī jeē quivī yó yéhyí túū (Mt. 7.13-14, 21-23)*

<sup>22</sup> Te jíca Jesús jeē cuahán yā ichi ñūū Jerusalén, te yáha ya tācá ñūu náhnū jíin ñūu lulí, te stéén yā jnūhun.

<sup>23</sup> Te ñn ñayuu ni cajñuhún i ya:

¿A jecu-ni ñayuu jnama Yaā Dios, chí naún? Achí í.

Te ni cahān yā jíin i:

<sup>24</sup> Condiñvī ni rō quivicoo ró ndaha Yaā Dios. Chi cúu nájnūhun ñn yéhyí túū. Te cáhān rī jíin ró jeē ñn quivī te cuehē ñayuu nducú i quivicoo i, te ma cúu ga.

<sup>25</sup> Te quivī ún te sáha rī nájnūhun ñn tēe chí vehe jeē ndocuiñi de te nacasi de yéhyí. Te ichi yátá véhe cuiñi ró jíjnahan ró, te scáján ró yéhyí, te cahān rō: Nune ní yéhyí na quivicoo ná. Te cahān de jíin ró: ¿Ndé nuū véjicoo ró? Chi tu jíin rī rohó, achi de.

<sup>26</sup> Yūcuán na te quejéé ró cahān rō jíin de: Ni cayejí ná ni cajihí ná jíin ní, te ini calle ñūu na ní steén ni jnūhun, achi rō.

<sup>27</sup> Te cahān maá de: Cáhān rī jíin ró jeē tu jíin rī rohó ndé chí véjicoo ró. Cuiñi quingoo ró, chí ñayuu casáha jniñu néé cácuu ró. Achi de.

<sup>28</sup> Te quivicoo ró núū ndahyú rō, te nacayñí yuhu ró jēē ndoho xeēn rō. Te coto ró núū Abraham jíin Isaac jíin Jacob jíin ndihí tēe ni canacani jnūhun Yaā Dios, cáyucú de ñūu nuū ndácu ya jniñu. Te rohó, vésú cácuu ró yucūn de, te quivicoo ró núū ndoho ró.

<sup>29</sup> Te cuehē ñayuu, vésú tu cácuu i yucūn de, te quiñicoo i ichi núū cáne niāndii jíin ichi núū quée niāndii, ichi norte jíin ichi sur. Te cucōo i mesa cají i staā ñūu nuū ndácu Yaā Dios jniñu.

<sup>30</sup> Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

*Jeē ní cucuíhyá ni yā siquī ñáyuu ñuu  
Jerusalén*

*(Mt. 23.37-39)*

<sup>31</sup> Te máá quivī un ní quecoo jecu tēe fariseo, te ni cacahān de jíin yá:

Cujiyo ní quihīn ní inga lado, chi cúní Herodes cahni de níhín, áchí de.

<sup>32</sup> Te ni cahān yā:

Cuángoo te castūhun ró nuū tēe mañoso un jēē ná tu jinū quivī cuu rī, chi vijna jíin sājnē quenehen ri tachī ini ñayuu, te nasávāha ri ñayuu cácu hū. Te isá te jīnu jniñu sáha ri, achi rō.

<sup>33</sup> Chi cánuú jēē cáca ri quihīn rī vijna jíin sājnē jíin isá, te jinū rī Jerusalén. Chi tēe cánacani jnūhun Yaā Dios, tu cájihī de inga lado, chi máá-ni ini ñuu Jerusalén cájehni i de. Achí yá.

<sup>34</sup> 'Róhó ñuu Jerusalén, jé hni rō tēe cánacani jnūhun Yaā Dios, te jéhe ró yūu xinī tēe tájī Yaā Dios vējicoo nuū rō. Te cuehē jínu ni cuni rī nastútú rí sēhe ró, nájnuhun ndují jēē nastútú tí sēhe tí chíji ndijēn tí, te tu ní cúní rō.

<sup>35</sup> Núu súcuan te vijna te stóo uun na ri rohó jíin sēhe ró. Te cáhān rī jíin ró jēē ndé vijna te ma cóto cuiti gā rō nuū rī, chi nde quiji quivī jeē cahán sēhe ró: Yōhoyo vāha Yaā cúu Yaā véndiji jíin jniñu máá Jítóho yō Yaā Dios, achi i. Achí yá.

*Jeē ní nasávāha ya ñn tēe cúhú  
cuehyī cuiñi*

## 14

<sup>1</sup> Te ñn quivī ndétātu ní jehēn yā vehe ñn tēe fariseo cujé hnu, ni jecaji yā staā jíin de. Te tāca gá tēe fariseo cájito yuhu de ya núu stívi yá.

<sup>2</sup> Te yūcuan íne ñn tēe cúhú de cuehyī cuiñi, índichi de nuū yā.

<sup>3</sup> Te ni cajnuhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácu hū quivī ndétātu, chí tuú? áchí yá.

<sup>4</sup> Te máá de tu ní cácahān cuiti de. Te ni jñi ya tēe cúhú un, te ni nasávāha ya de, te ni cahān yā jeē na núhun de vehe de.

<sup>5</sup> Te ni cahān yā jíin de jíin áhan de:

¿Ndé ñn róhó núu burro ró chí stíquī rō ñingava tí ini pozo, te á tu yachí

natava rō tí vēsú quivī ndétātu cúu, chí naún? Achí yá.

<sup>6</sup> Te tu ní cúu stío cuiñi de ni ñn jnūhun nuū yā jeē súcuan ni cahān yā.

*Jnūhun siquī ñayuu jéngoo vico*

<sup>7</sup> Te ni jito Jesús jeē tēe ni cataca ún, cánacāji de silla yñúhún gá nuū mesa cucōo de. Te ni cahān yā jnūhun yáha jíin de:

<sup>8</sup> Núu ñn tēe cana de jeē quihín rō ñn vico nándāha, te ma cúcōo ró lugar nuū yñúhún gá. Chi núu súcuan te sanaa te je ni cana de ñn tēe cújé hnu ga vēsú rohó.

<sup>9</sup> Te quee tēe ni cana róhó, te cahān de jíin ró: Ndonga, te na cúcōo tēe yáha jíñā. Yūcuán na te cucanu rō jeē quihín rō cucōo ró ndé sandihí na.

<sup>10</sup> Chi sa suhva núu ni cana ñn tēe róhó, te cucōo ró ndé lugar sandihí na. Te núu quee tēe ni cana róhó, te cahān de jíin ró: Amigo, nehen cucōo ró ñn lugar nuū yñúhún gá, achi de. Yūcuán na te ñayuu cáyūcu mesa jíin ró coto i jeē sajé hnu de róhó.

<sup>11</sup> Súcuan ni cahān rī jnūhun yáha návāha cuni rō jeē tāca ñáyuu jeē sajé hnu i máá i, nuu i sáha Yaā Dios. Te ñayuu jeē snúu i máá i, ndujé hnu i sáha ya. Achí yá.

<sup>12</sup> Te suni ni cahān yā jíin tēe ni cana ya yéji yā staā:

Núu sáha ró ñn vico cúsamá chí jēē cuxíni, te ma cána ró ñáyuu cácuu amigo rō, jíin ñani rō, jíin jnáhan ró, jíin ñáyuu cucá. Chi núu súcuan te suni máá i nacana i róhó, te súcuan nanihīn rō jeē ni jéhe ró.

<sup>13</sup> Chi sa suhva núu sáha ró vico, te cana ró ñáyuu ndahú, ñayuu cuhdú, ñayuu chacuá, jíin ñáyuu cuaá.

<sup>14</sup> Te súcuan te quendōo ndetū rō, chí ma cúu nacuāha i nuū rō. Te nihīn rō tahū rō quivī nátecu ñayuu ndaā, achí yá.

*Jnūhun yátá síquī vico cúxíni*

<sup>15</sup> Te ñn tēe yéji staā jíin yá, ni jini de jnūhun yáha, te ni cahān de jíin yá:

Yōhoyo ndetū ñayuu jeē cáji staā nde ñuu nuū ndácu Yaā Dios jniñu, áchí de.

16 Yūcuán na te ni cahān Jesús ñn jñuhun yátá jéē steén yā jeē cána Yaā Dios ñayuu quívicoo i ñuu nuū ndácu ya jniñu:

Ñn tēe ni sáha de ñn vico cáhnu cuxíni, te ni tají de mozo ni cana cuehē ñayuu.

17 Te máá quívī cuxíni, te ni tají de mozo de cuacana ñayuu jeē quíjicoo caji staā: Nehen ní jíjnáhan ní, chi je iyó túhva ndihí, áchí mozo.

18 Te ndihí i ni cacahān i jeē na cóne cáhnu ni de chi ma quíngoo i. Ñn tēe ni cahān de: Sáá ní jeen ri ñn ñuhun te cánuú quícondēhe rí, te na cóne cáhnu ni de chi ma jeé rī. Achí de.

19 Te inga de ni cahān: Ni jeen ri uhūn yunta sīquī, te quihīn rī coto ndee rī tī, te na cóne cáhnu ni de nuū rī chi ma jeé rī, achí de.

20 Te inga de ni cahān de: Sáá ní quijnáhan ri, te jeē yúcuan ma cúu jeé rī, achí de.

21 Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quítī ni patrón, te ni cahān de jíin mozo de: Yachī quihīn rō tāca calle náhnu jíin calle lulí, te cana ró ñáyuu ndahú, ñayuu cuhndú, ñayuu chacuá, jíin ñáyuu cuaá, na quíjicoo i vico, áchí de.

22 Te ni jehēn mozo, te ni ndee de, te ni cahān de jíin patrón de: Je ni sáha ná jéē ni cahān ní, te cúmanī gā ñayuu te chitú vehe ní, áchí de.

23 Te ni cahān tucu patrón: Quihīn tucu ró tāca calle jíin ichi, te cana fuerza rō ñayuu na quíjicoo i, návāha chitú vehe rī.

24 Chi cáhán rī jíin ró jeē ní ñn tēe ni cana ri xīhna ñúhún, ma cuáha cuítī rī jñuhun jeē cuxíni de vehe ri, achí de. Achí yá.

*Jñuhun jeē cánuú nacani vāha ni yō te condiquīn yō Cristo*

25 Te cuehē ndasí ñáyuu cándiquīn i Jesús cuango i jíin yá, te ni ndió cóto ya nuū i, te ni cahān yā jíin i:

26 Núu na-ni ñayuu cuní condiquīn ruhū, te núu manī gā i jíin tátá i, náná i, ñasihí i, sēhe i, ñani i, cuāha i, vēsú jíin

ruhū, ma cúu cuu i ñayuu scuáha jíin rí. Te núu ndíhvī gā ni i sīquī jeē cóo vāha máá i vēsú jeē cóndiquīn i ruhū, te suni ma cúu tucu.

27 Te na-ni ñayuu núu tu jéhe i jñuhun ndoho i jñundóho vēsú nde cuu i jeē sīquī jeē cóndiquīn i ruhū, te ma cúu cuu i ñayuu scuáha jíin rí.

28 Chi núu ndé ñn ró cúní rō sáha ró ñn vehe cáhnu, ¿á tu cánuú jéē xīhna gā cucōo ró te tava rō cuenta núu canda xūhun jéē sínu ró?

29 Chi núu tuú, te núu je ni jequin rō cimientó, te tu canda xūhun ró sínu ró, yūcuán na te tāca ñáyuu sácatā i coto i rōhó.

30 Te cahān i: Tēe yáha ní quejéé de sáha de vehe, te tu ní canda de sínu de, achí i.

31 Te suni súcuan núu ñn rey quihīn de cuajnáhan de jíin inga rey jeē véji sīquī de, ¿á tu cánuú jéē xīhna gā cucōo de te nacani ni de núu canda uxī mil soldado jeē cuajnáhan de jíin inga rey jeē véji sīquī de jíin ócō mil soldado?

32 Chi núu tú canda de, te níní jícá gá véji inga rey, te tají de tēe cándiso jñíñu, cajñuhún de na vé cuní inga rey jeē cuáha de nuū, te jecuiñī-ni.

33 Te máá ró jíjnáhan ró, suni súcuan cánuú jéē xīhna gā nacani ni rō cahnde ni rō stóo ró ndihí jeē névāha ró, chi núu tuú te ma cúu cuu ró ñáyuu scuáha jíin rí.

*Jñuhun yátá sīquī ññ*  
(Mt. 5.13; Mr. 9.50)

34 Te ñayuu cácdíje cácuu i nájnūhun ññ. Vāha íyó ññ, te núu ññ ún na náa jeē uhvuá, ¿te ndese nduu uhvuá tucu?

35 Tuá cuajníñu cuítī, ni jeē chúhun ñayuu nuū ítu, ni jeē ndúu jēhen, chi máá cate iñ-ni i. Tāca rōhó jéē jíni sōho, na chúsóhó ró. Achí yá.

*Jñuhun yátá sīquī lanchi ní sana*  
(Mt. 18.10-14)

## 15

1 Te tāca tēe cástútú xūhun renta jíin táca gá tēe cásáha cuēchi, ni quecoo de nuū Jesús jeē cuni sōho de jñuhun cáhán yā.

2 Te tāca tée grupo fariseo jíin tée cástéén tutu ley Yaā Dios, ni cacahān de siquī yā:

Tēe yáha jétáhú de tāca tée cásáha cuēchi te yéji de jíin, áchí de.

3 Te ni cahān yā jnūhun yátá yáha jíin de:

4 ¿Ndé ñn ró núu névāha ró ñn ciento lanchi, te núu scuíta ró ñn tí, te á tu stóo ró cúūn xico xahūn cuūn gā tī yucu, te quinanducú ró quití ní sana ún ndé nanihīn rō tī?

5 Te núu ni nanihīn rō tī, te coso sūcun ró tī, te cusī ni rō.

6 Te núu ni ndee rō vehe ró, te nastútú ró tācá amigo rō jíin ñáyuu yúcu yajni jíin ró, te cahān rō jíin i: Na cúsī ni yō, chi ni nanihīn rī lanchi ri jeē ní sana. Achi rō.

7 Te cáhán rī jíin ró jeē suni sūcuan cúu nde andiví. Chi cúsī gā ni yā jíin ñn ñayuu iyó cuēchi núu nacani ni i jeē stóo i cuēchi i, vēsú jíin cúūn xico xahūn cuūn ñayuu iyó ndáā jeē tuá jíni ñúhún nacani ni i.

*Jnūhun yátá síquī ñahan ní scuíta xūhún*

8 Te núu ñn ñahan névāha ña uxī peso cāa, te núu scuíta ña ñn, ¿á tu nastūn ña lámpara te nastáa ña vehe, te nanducú yúcún ña nde nanihīn ña?

9 Te núu ni nanihīn ña, te nastútú ña tācá amiga ña jíin ñáyuu yúcu yajni jíin ña, te cahān ña jíin i: Na cúsī ni yō, chi ni nanihīn rī xūhun jéē ní scuíta ri. Achí ña.

10 Te cáhán rī jíin ró jeē suni sūcuan cúsī ni tācá ndajéhé Yaā Dios siquī ñn ñayuu iyó cuēchi núu nacani ni i jeē stóo i cuēchi i. Achí yá.

*Jnūhun yátá síquī sūchi ní jéhēn jecó*

11 Te ni cahān gā yā:

ñn tēe ni iyo uū sēhe yí de.

12 Te tēe suchí gā ni cahān i jíin tátá i: Tátā, tahú sáva ní ndajníñu ní, te cuāha ní sava cuu tahū ná, áchí i. Te ni tahú sáva de tahū ndíndúú i.

13 Te ni cuu jecu-ni quiví, te tēe suchí gā un ní stutú ndihí i ndajníñu i. Te ni quenda i cuahān i ñn ñuu jicá. Te yūcuan ní snáā i tahū i, chi ni jexīn cāhá i.

14 Te ná ni ndihí ni jexīn i, te ni quee ñn jnamā xeén ini ñuu ún, te ni quejéé cúmanī jeē cáji i.

15 Yūcuán na te cuanducú jníñu i nuū ñn tēe ñuu ún. Te ni tají de i cuahān i rancho de jeē cóto i quinī de.

16 Te cúní i caji i vēsú soō ndúchi jeē cáyeji quinī ún, návāha ndutú chíji i. Te ni ñn ñayuu tú na vé jéhe nuū i.

17 Yūcuán na te ni quejéé i nácani ni i: Tāca mozo casájniñu vehe tátá rī, íyó cuéhē staā cáyeji i. Te ruhū chi jíi rī sōco yāhá.

18 Na quínuhun rī nuū tátá rī, te cahān rī jíin de: Tátā, ni sáha ná cuēchi nuū Yaā Dios jíin núu maá ní.

19 Vijna te nasūu gā tēe vāha cúu ná jéé cónaní ná sēhe ní. Te cuāha ní jnūhun cuu ná nájñūhun ñn mozo ni, achi rī.

20 Yūcuán na te ni naquihin i ichi cuanuhun i vehe tátá i.

Te níní jicá gā vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techūhú de i.

21 Yūcuán na te ni cahān i jíin de: Tátā, ni sáha ná cuēchi nuū Yaā Dios jíin núu maá ní. Vijna te nasūu gā tēe vāha cúu ná jéé cónaní ná sēhe ní. Achí i.

22 Te máá tátá i chi sa ni cahān de jíin táca mozo de: Cuáquihin sahma váha ga te chuhun ró i. Te chuhun ró ñn xehyu ndaha i, te chihi ró ndíjēn jehē i.

23 Te quiquihin ró becerro xéhen, te cahni rō tī na cáji yō, chi sáha yó vico.

24 Chi sēhe yí rí yáha, nájñūhun je ni jihí i, te ni natecu i. Chi tu ní jíni rī ndé chi ní jéhēn i, te ni ndee i, áchí de. Te ni caquejéé de cásáha de vico.

25 Te sūchi jévāha, íne i nde rancho, te vëndiji i, te ni cuyajni i yatā véhe. Te ni jíni i jeē cúu yaa te cájita jéhé ñáyuu.

26 Te ni cana i ñn mozo, te ni cajñūhún i na vé cúu jeē cúu.

27 Te ni cachi mozo un núu i: Ni ndee ñani rō, te tátá rō ni jehni de becerro xéhen, chi ni ndee vāha i nuū de, áchí mozo.

28 Yūcuán na te ni quitī ni sūchi jévāha, te tu ní cúní i ndīvi i. Te ni quenda tátá i, te ni cahān ndahú de jíin i jeē na ndīvi i.

29 Te ni cahān i jíin tátá i: Níní sáha ná jniñu ndácu ní, te tu cúnihni cuiṭi ni na núu ní. Te tu jéhe ní vésú in lítú núu ná, jeē sáha ná vico caji na jíin táca amigo na.

30 Te ni ndee sēhe ní yáha jeē ni jéxīn cāhá i xūhun ní jíin táca ñahan. Te ni jehni ní becerro xéhen caji i, áchí i jíin tátá i.

31 Yūcuán na te ni cahān de jíin i: Séhē, róhó chi níní ndéé ró jíin rí, te ndīhi jeē névāha ri chi suni cuenta maá ró cúu.

32 Te vijna chi íyó váha jeē sáha yó vico te cusī ni yō. Chi ñani rō yāhá, nájnūhun ni jihī i, te ni natecu i. Chi tu ní jíin yō ndé chi ní jéhēn i, te ni ndee i, áchí de. Achí yá.

*Jnūhun yátá síquī mozo jeē ni stáhú de patrón de*

## 16

1 Te suni ni cahān Jesús jíin téé cácuáha jíin yá:

In tēe cúca ní iyo in mozo de jeē ndíso jniñu nuū táca gá mozo. Te ni cacahān jíin patrón un jéé mozo un snáā cāhá ndajniñu de.

2 Te ni cana de mozo un, te ni cahān de jíin: ¿Na jnūhun cúu yáha jéé nihín rī síquī rō? Nacuāha cuenta jniñu ndíso ró, chí ma cóndiso jniñu ga rō nuū mozo rī. Achí de.

3 Yūcuán na te jéni ni maá de: ¿Ndese sáha ri vijna? Chi patrón rī quenehen de jniñu ri. Te tú ndacuī rī jeē cáte ri ñuhun, te jeē cacán rī caridad chí cúcanu rī.

4 Núu súcuan te jíin rī in jeē sáha ri, návāha ñayuu cájeen nuū patrón rī, cuāha i vehe condee rī núu na quéé quivī jeē quenehen de jniñu ri.

5 Te ni cana de ná in ná in tēe jeē cátaū nuū patrón de. Te ni cajnūhún de in: ¿Nasaa táu rō nuū patrón rī?

6 Te ni cahān tēe ún: In ciento barril aceite, achí de. Te ni cahān mozo un: Yáhá na cuāha ri lista rō, te cucōo

yachī rō, te na sáha ró inga lista jeē uú xico uxī na, achí de.

7 Yūcuán na te ni cajnūhún de inga tēe: Te róhó, ¿nasaa táu rō? Te tēe un ní cahān de: In ciento cajón trigo, achí de. Te ni cahān de jíin tēe ún: Yáhá na cuāha ri lista rō, te na sáha ró inga lista jeē cuún xico na, achí de.

8 Yūcuán na te patrón ni cahān de: Nacā jeē ndichí ní sáha tēe cúnéé un, áchí de. Te cāhán rī jíin ró jeē ñayuu ñayīvi yáha, ndichí gá casáha i jeē quendōo vāha i nuū jnāhan i, vésú ñayuu cácan díje nuū Yaā Dios.

9 'Núu súcuan te cāhán rī jíin ró jeē ndichí gá na sáha ró vésú jeē ni sáha mozo ndichí un. Chi ini ñayīvi yáha nuū yīhi cuēchi, na sáha ró jniñu váha jíin xūhun ró, cuāha ró núu ñayuu ndahú, návāha vésú núu ni ndīhi xūhun ró ñayīvi yáha, te quivī vico ró andiví núu coo vehe ró ní cáni.

10 'Tēe jeē squícu vāha jíin in jniñu lúli-ni, suni squícu vāha de jíin jniñu cāhnu. Te tēe jeē stahú jíin in jniñu lúli-ni, suni stáhú de jíin jniñu cāhnu.

11 Núu súcuan te núu tu squícu vāha ró jíin xūhun jeē iyó ñayīvi yáha nuū yīhi cuēchi, te ma cuāha ya jeē váha cuu ró ní cáni andiví.

12 Te núu tu squícu vāha ró jíin ndajniñu jeē ni jéhe núu ya nuū rō ñayīvi yáha, te ma cuāha ya tahū cuu ró ní cáni.

13 'Ni in mozo ma cúu cuajniñu de nuū uū patrón. Chí quitī ní de nuū in te coo manī de jíin inga, chí squícu vāha de nuū in te sájéé ní de nuū inga. Te suni súcuan ma cúu cuajniñu ró núu Yaā Dios te núu máni síquī xūhun ndāhvī ni rō, achí yá.

14 Te tēe fariseo ni casácatā de nuū yā jeē ní cajini de táca jnūhun cāhán yā, chí tēe cútóo xūhun cácuu de.

15 Te ni cahān yā jíin de:

Máá ró casáha ró jéé tēe ndaā cácuu ró núu ñayuu. Te Yaā Dios chí jíin yā ndese cáa ini anuá rō. Chí jniñu cájeni ni ñayuu jeē jniñu jéhnu cúu, te nuū Yaā Dios chí jniñu néé cúu.

*Síquī ley Yaā Dios jíin síquī jeē ndácu ya jniñu*

16 'Nde ná tu quiji Juan tēe scuándute, te ni iyo ley jeē ni jéhe Yaā Dios nuū Moisés, te suni ni castéén tāca tēe cánacani jnūhun ya. Yūcuán na te ná ni quiji Juan, te ni quejéé jítē núu jnūhun vāha ndese ndácu Yaā Dios jniñu. Te tāca ñáyuu nducú ndéyí i quívicoo i ndaha ya.

17 'Te yí gá cúu jeē náā ñn letra nuū tútu ley yā vēsú jeē náā andiví jíin ñáyiví, chí squícu ndihí jnūhun cáhán.

*Siquí jeē ma stóo jnáhan tēe jíin ñahan (Mt. 19.1-12; Mr. 10.1-12)*

18 'Núu ñn tēe stóo de ñasihí de te quijnáhan de jíin inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusñn, suni cásiquí ndéē de ña, áchí yá.

*Jnūhun tēe cúcá jíin Lázaro*

19 Te ni cahān gā yā:

Ni iyo ñn tēe cúcá, ní ñuhun de sahma lúu váha ndasí. Te ndiquíví ni iyo vāha ndasí jéē ní yeji de.

20 Te suni ni iyo ñn tēe ndáhú, nání de Lázaro, néne de yéhyí tēe cúcá un, te ní cáhnu de ín ndíhyi.

21 Te máni cúní de jeē ndutú chíji de jíin stáa cuēchi jeē stíví tēe cúcá un. Te quécoo ina te cánayuu tí nuū ndíhyi de.

22 Te ni jihí tēe ndáhú un, te tācá ndajéhé Yaā Dios cuango ya jíin ánuá de nde andiví nuū néne Abraham. Te suni ni jihí tēe cúcá un, te ni quindūji de.

23 Te tēe cúcá un xeēn ndóho de íne de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de.

24 Yūcuán na te ni cana cóhó de: Tātā Abraham, cundáhú ni ní sáña, te tají ní Lázaro, na quíchundaji de xiní ndáha de nuū ndúte, te quiji de stáji de yáá ná. Chí xeēn ndóho ná núu yáñuhūn yāhá. Achí de.

25 Te ni cahān Abraham jíin de: Séhē, nucūhun ni rō jeē ni níhīn rō ndihí jeē váha ná ní cotecu rō, te Lázaro chí sa suhva jnūndóho ni níhīn de. Te vijna je ni ndusñ ni de yāhá, te róhó chí ndóho ró jíñā.

26 Te suni íyó ñn jeē cunú téyí, íne mēhñu yó jijnáhan yó. Te ñayuu cáhīn yāhá, vēsú cácuni i yāha i jeē i nuū rō, te ma cúu. Te ni ma cúu yāha máá ró quijicoo ró yāha. Achí Abraham.

27 Yūcuán na te ni cahān tēe cúcá: Núu súcuan te cáhán ndahú ná jíin ní, Tātā Abraham, tají ní Lázaro na quíhīn de vehe tātá na.

28 Chí íyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yāha, áchí de.

29 Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jnūhun Yaā Dios. Suu yūcuán na chúhun ni i, áchí Abraham.

30 Te ni cahān tucu tēe cúcá: Vēsú súcuan, Tātā Abraham, te núu ñn ñayuu ni jihí quíhīn nuū i, yūcuán na te nacani ni i jeē stóo i cuēchi i, áchí de.

31 Te ni cahān Abraham jíin de: Núu tu chúhun ni i jnūhun ni nacani Moisés jíin táca tēe ni canacani jnūhun Yaā Dios, suni ma candíje cuítí i núu natecu ñn ndíyí quíhīn nuū i, áchí de.

*Xeēn coo siquí ñáyuu squíví jnáhan nuū cuéchi (Mt. 18.6-7, 21-22; Mr. 9.42)*

## 17

1 Te ni cahān Jesús jíin tēe cáscuáha jíin yá:

Máni íyó jéē nducú squíví ñayuu nuū cuéchi. Te nacā xeēn ndoho ñayuu jeē squíví jnáhan nuū cuéchi.

2 Vāha ga núu ni conuhnī ñn yōso cáhnu sucūn i te quēe i chíji ndute mar, vēsú jeē squíví i ñn sūchi lúlí yāha núu cuéchi.

3 Coto ma sáha ró súcuan jíjnáhan ró.

'Te núu jnáhan ró sáha de cuéchi siquí rō, te cahān rō nuū de. Te núu nacani ni de, te cone cáhnu ni rō nuū de.

4 Te núu uxā jínu jeē ñn quíví sáha de cuéchi siquí rō, te núu uxā jínu nácani ni de te cahān de jíin ró jeē cone cáhnu ni rō chí ma sáha ga de, te cánuú cone cáhnu ni rō nuū de. Achí yá.

*Jeē yóhyo cújéhnu jnūhun cándíje*

<sup>5</sup> Te tēe cácuu apóstol ni cacahān de jíin Jítóho yō:

Sáha ní jéē nihin ga candíje ná jéē sáha Yaā Dios jeē cájicān na núū yā, achí de.

<sup>6</sup> Te ni cahān maá Jítóho yō jíin de:

Núu cácandíje ró vēsú ĩn tíhlí-ni, nájnūhun ĩn ndiquin mostaza jeē tíhlí-ni cáa, te cuu cahān rō jeē núyūhndu yáha na quenda te nucondichi nde nuū mar, te coo nájnūhun cahān rō.

*Jeē cánuú squícu vāha yó núū yā*

<sup>7</sup> 'Ndé ĩn ró íyó mozo rō jeē jítu de chí ndító de quiti ndéca ró, te núu ni najinū de vehe ró, te tu cáhān rō jíin de jeē cúcōo de caji de staā.

<sup>8</sup> Chi sa suhya cáhān rō: Sáha ró ndeyu cuxíni ri, te caní ró cóhō rī. Te núu ni cuu ni yeji rī ni jihí ri, yūcuán na te caji maá ró coho ró, cácahān rō.

<sup>9</sup> Te cácahān rō jeē tu cánuú nacuatahú ró nuū mozo núu ni sáha de jniñu ní ndacu ró, chí jeē cánuú sáha de cúu.

<sup>10</sup> Te suni súcuan máá ró jijnáhan ró, cácuu ró mozo Yaā Dios. Te núu ni casquícu ró táca jniñu ní ndacu ya nuū rō, te cahān rō: Tu cánuú nacuatahú yá nuū rī, chí ni sáha ri máá-ni jeē cánuú sáha ri, achí rō. Achí yá.

*Jeē ní nasávāha ya uxī tēe ndóho cuehyī stehyú*

<sup>11</sup> Te jíca Jesús ichi cuahān yā ñuu Jerusalén, te ni yāha ya cuahān yā mēhñú región Samaria jíin Galilea.

<sup>12</sup> Te ni jinū yā ĩn ñuu, te uxī tēe ndóho cuehyī stehyú ní quendacoo de vejnahan de ya, te jíca ní cajecuiñī de.

<sup>13</sup> Te ni cacana jee de:

Jesús, Maestro, cundáhú ni ni sáña, achí de jíjnáhan de.

<sup>14</sup> Te ni jito Jesús nuū de, te ni cahān yā jíin de:

Cuángoo te stéén rō maá ró nuū táca sūtū jeē ní canduvāha ró, achí yá.

Te níní cuángoo de te ni canduvāha-ni de.

<sup>15</sup> Yūcuán na te ĩn-ni de ni nandió cóo de nuū Jesús, te cáhān jee de, nácuatahú de nuū Yaā Dios jeē ní nduvāha de.

<sup>16</sup> Te ni jecuiñī yití de nuū yā, te ni jequin de nuū de nde nuū ñúhun, te ni nacuatáhú de nuū yā. Te tēe Samaria cúu de.

<sup>17</sup> Te ni cahān Jesús:

¿A násūú ndihúxí de ni canduvāha? Te ĩn gā de, ¿naun tu ní cánandicó de nacuatáhú de?

<sup>18</sup> ¿A máñúhún-ni tēe ñuu jíca yáha cúu jeē ní nandicó de nácuatahú de nuū Yaā Dios?

<sup>19</sup> Te ni cahān yā jíin tēe ún:

Ndocuiñī quinhun rō. Chi ni candíje ró jéē cuu nasávāha ri rohó, te jeē yúcuan ní nduvāha ró, achí yá.

*Ndese coo quivī jeē ndíji ya ndacu ya jniñu*

*(Mt. 24.23-28, 36-41)*

<sup>20</sup> Te tēe fariseo ni cacajnūhún de Jesús ndé quivī quejéé jéē ndácu Yaā Dios jniñu ini ñayiví. Te ni cahān yā jíin de:

Ma quéē ndijin jeē ndácu Yaā Dios jniñu.

<sup>21</sup> Ni ma cúu cahān ñayuu: Yáha íne ya ndácu ya jniñu, chí: Yūcuán íne ya, achí i. Chi je ndácu Yaā Dios jniñu mēhñu ró jijnáhan ró. Achí yá.

<sup>22</sup> Yūcuán na te ni cahān yā jíin tēe cáscuáha jíin yá:

Quee tiempo jeē yóhyo cúu ni rō coto ró jéē ndíji ruhū, Yaā ní nduu tēe, te ma cóto ró jíjnáhan ró.

<sup>23</sup> Te cahān ñayuu jíin ró: Yáha íne ya, chí: Yūcuán íne ya, achí i. Te ma quíngoo ró condēhe ró, ni ma cóndiquín rō i.

<sup>24</sup> Chi nájnūhun sáha taja jeē ndíndéé ĩn lado andiví te cúndijin nde inga lado, suni súcuan cuu quivī ndíji ruhū, Yaā ní nduu tēe, chí ndíhi ñayuu coto.

<sup>25</sup> Te jíni ñúhún jéē xihna gā ndoho xeén rī, te ñayuu iyó vijna, squéhichí i ruhū.

<sup>26</sup> Chi nájnūhun ni cuu quivī ni íyo Noé, suni súcuan cuu quivī ndíji ruhū, Yaā ní nduu tēe.

<sup>27</sup> Chi quivī un ní cayeji i, ni cajihí i, ni canandāha i, ni cajēhe i sēhe síhí i jeē nándāha, nde ni jinū quivī jeē ní quiví Noé ini barco cáhnu jeē naní

arca. Te ni cuun saū xeén, te ni ndaa ndute ni cajihī ndihī i.

<sup>28</sup> Te suni súcuan ni cuu quivī ni íyo Lot. Ni cayeji i, ni cajihī i, ni cajeen i, ni caxícó i, ni cataji i itu, ni cajeni i vehe.

<sup>29</sup> Te quivī jeē ní quenda Lot ini ñuu Sodoma cuahān de, te ni cuun ñuhūn jīn azufre ichi ándiví, te ni snāā ndihī ñayuu.

<sup>30</sup> Te suni súcuan coo quivī jeē ndíji ruhū, Yaā ní nduu tēe.

<sup>31</sup> Te quivī ún te ñayuu cáhīn yatā vehe, te ndajniñu i ñūhun ini vehe, cáhān rī jīn i jeē ma ndívī i naquihin i, chi cánuú cunu yachī i jeē cácu i. Te suni súcuan ñayuu casájniñu nuū itu, ma quínuhun i vehe i jeē quíhin i ndajniñu i.

<sup>32</sup> Te nucūhun ni rō ndese ni ndoho ñasihí Lot jeē ni jíhī ña.

<sup>33</sup> Te núu ndé ñáyuu cuní i cācu i nuū jnúndóho quiji nuū i jeē síquī ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē síquī ruhū, te cotecu i ní cáni.

<sup>34</sup> Te cáhān rī jīn ró jeē quivī ndíji ri te quíxí uū tēe ñn jito jecuáā, te ñn de naquihin ri, te ñnga de ndōo, chi tu ní cándíje de.

<sup>35</sup> Te coo uū ñahan jeē ndíco cáhnu, te ñn ña naquihin ri, te ñnga ña ndōo.

<sup>36</sup> Te uū tēe sájniñu de nuū itu, te ñn de naquihin ri, te ñnga de ndōo. Achí yá.

<sup>37</sup> Te jeē ní cajini de jnūhun yáha, te ni cacajñuhún de ya:

¿Ndé mí coo súcuan nájñuhun ni cahān ní? Achí de.

Te ni cahān yā jīn de:

Nájñuhun jeē cutútú téji ndé-ni cúu nuū catú quítī ní jíhī, suni súcuan coo tāca jéē ni cáhān rī ndé-ni cúu-ni nuū cáhīyo ñayuu.

*Jnūhun yatá síquī juez jīn ñahan viuda*

## 18

<sup>1</sup> Te ni cahān yā ñn jnūhun yatá jīn de jeē cánuú jeē niní cácan tahu de, te ma ndínuu ni de jīn.

<sup>2</sup> Te ni cahān yā:

Ni íyo ñn juez ini ñn ñuu. Te ni tu ndíso íyo de nuū Yaā Dios, ni tu yúhú de nuū ní ñn ñayuu.

<sup>3</sup> Te suni ñuu un íyó ñn ñahan ní ndóo ndáhú. Te ñahan un jéhén-ni jéhén-ni ña nuū de, jícán ña jeē na sándaā de síquī ñn ñayuu jeē jito uhū i ña.

<sup>4</sup> Te cuehē quivī tu ní cúni de sándaā de, te yūcuán na te ni jeni ni de: Vēsú tu ndíso íyo ri nuū Yaā Dios, ni tu yúhú rí nuū ní ñn ñayuu,

<sup>5</sup> te ñahan viuda yáha, yōhyo stáhān ña ruhū, te jeē yúcuan na sándaā rī síquī ñáyuu jeē jito uhū i ña. Chi núu tuú, te quejéé rí jnaníní ni rī jeē quíji quíji ña. Achí de. Achí máá Jítoho yō.

<sup>6</sup> Te ni cahān gā yā:

Súcuan cúu jeē ni cáhān juez, tēe tú ndaā.

<sup>7</sup> Te Yaā Dios, nasūu súcuan cúu ya, chi sándaā yā síquī jníñu ñayuu ní nacāji ya jeē nduú ñuú cácahān ndahú i jīn yá. Chi jnama ya i nuū tāca jéē cájito uhū i. ¿Te á cuéé jnama ya i?

<sup>8</sup> Cáhān rī jīn ró jeē yachī. Te quivī ndíji ruhū, Yaā ní nduu tēe, ¿á níhīn gā rī ñayuu cácañíje níhin ini ñayiví? Achí yá.

*Jnūhun yatá síquī tēe fariseo jīn tēe stútú xúhun renta*

<sup>9</sup> Te suni ni cahān yā jnūhun yatá yáha jīn jecu ñayuu jeē cájeni ni i jeē ñáyuu ndaā cácuu i, te cájeni ni i jeē sava ga ñayuu tu cáhīyo ndaā:

<sup>10</sup> ñn tēe fariseo cuahān de templo jeē cacān tahu de. Te ñn tēe stútú xúhun renta suni cuacacān tahu de templo.

<sup>11</sup> Te tēe fariseo, índichi de, te súcuan ni jicān tahu de: Tātā Yaā Dios, na cútahū na núu ní, chi tu cúu ná nájñuhun cándaā sava ga tēe, tēe cuíhná, tēe néé, tēe cásíquí ndéē jnāhan cácuu de. Ni tu cúu ná nájñuhun cáca tēe yúcuan jéē stútú xúhun renta jeē scāa ga de jícán de nuū ñáyuu.

<sup>12</sup> Te uū jīnu jeē semana iyó ndite ni na núu ní, te jéhe ná nuū ní ñn ñn síquī tāca úxī ndajniñu níhīn na, áchí de.



13 Te tēe stútú xúhun renta, ni jecuiñi jicá de nuū templo, ni tu ní chúndeyí ni de jeē ndonehen de nuū de, chi sa suhva ni cani de yīqui jicā de jeē cucuíhyá ni de. Te ni cahān de: Tātā Yaā Dios, cundáhú ni ni sáña, chi tēe íyó cuéchi cúu ná, áchí de.

14 Te cáhán rī jín ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chi tu ní jétáhú yá de. Chi ñayuu jeē sajhēnu i máá i, sa ndululí i. Te ñayuu jeē sálulí i máá i, sa ndujēnu i. Achí yá.

*Jeē ni jicān tahu Jesús jehē sūchi lúli (Mt. 19.13-15; Mr. 10.13-16)*

15 Te ni quecoo ñayuu jín sūchi lúli núu Jesús, jeē na sóo yá ndaha ya xiní i. Te tēe cáscuáha un ní cajini de jeē súcuan cúu, te ni cacahān de nuū ñayuu vējicoo jín i.

16 Te máá Jesús ni cana ya de, te ni cahān yā:

Cuāha jnūhun na quíjicoo sūchi lúli jínā nuū rī, te ma cási rō jeē quíjicoo i. Chi ñayuu jeē ndió cóo ni i cani ni i nájñūhun sūchi yáha, suu i quívi ndaha Yaā Dios jeē ndacu ya jniñu nuū i.

17 Te jendaá cahān rī jín ró, núu ñayuu tú cuatáhú i jeē ndácu Yaā Dios jniñu nuū i, nájñūhun jétáhú ñayuu sūchi lúli, ma quívi cuíti i ndaha ya, achí yá.

*Jnūhun tēe cúca (Mt. 19.16-30; Mr. 10.17-31)*

18 Te ñayuu tēe cújēnu ni cajñūhún de ya:

Tēe vāha cúu ní Maestro. ¿Te na jniñu vāha sáha ná te nihīn tahu na cotecu na ní cáni andiví? Achí de.

19 Te ni cahān Jesús jín de:

¿Naun cáhán rō jeē tēe vāha cúu ri? Tú ni ñayuu tēe vāha íyó, chi máá ñayuu ni Yaā Dios.

20 Te jíní rō tācá jniñu ní ndacu Yaā Dios: Ma cosiquí ndéē jnāhan ró. Ma cáhni rō ndiyí. Ma sacuíhná ró. Ma sajnūhún ró. Cuatáhú ró nuū tatá rō nuū naná rō. Achí yá.

21 Te ni cahān maá de:

Tācá jniñu yáha je ni squícu ná ndé ná lúli ná, achí de.

22 Te Jesús ni jini ya jnūhun yáha, te ni cahān yā jín de:

Ñayuu na jniñu cúmaní sáha ró núu súcuan. Xicó ndihí jeē névāha ró, te cuāha ró núu ñayuu ndahú. Te nde andiví cuāha ya jeē vāha ndasí núu rō. Yūcuán na te quiji ró condiquīn rō ruhū, achí yá.

23 Te ná ni jini sōho de jnūhun yáha, te yōhyo ni cucuíhyá ni de, chi cúca ndasí de.

24 Te jito Jesús jeē súcuan cucuíhyá ni de, te ni cahān yā:

Tēe cúca chi yōhyo yí quívicoo de ndaha Yaā Dios jeē ndacu ya jniñu nuū de.

25 Yachí gā yāha ñayuu camello yaú yutícuí vésú jeē quívi ñayuu cucá ndaha Yaā Dios jeē ndacu ya jniñu nuū i, achí yá.

26 Te tēe ní cajini jnūhun yáha, ní cacahān de:

¿Ndé ñayuu cúu jeē cácu núu súcuan? Achí de.

27 Te ni cahān yā jín de:

Ñayuu chi ma cúu squívi i máá i ndaha Yaā Dios, te máá yá chi cuu sáha ya, achí yá.

28 Yūcuán na te ni cahān Pedro:

Sáña jijnáhan ná ní castóo ná ndihí jeē cánevāha ná, te cándiquīn na níhín, achí de.

29 Te máá yá ni cahān yā jín de:

Jendaá cahān rī jín ró jijnáhan ró, núu na-ni ñayuu stóo i vehe, chí tátá, chí ñani, chí ñasihí, chí séhe, jeē siquí jeē scáca i jnūhun jeē ndácu Yaā Dios jniñu nuū ñayuu,

30 núu súcuan te nanihīn cuehē gā i ini ñayiví yáha, te tiempo quiji te cotecu i ní cáni, achí yá.

*Jeē ni cáhán tucu ya jeē cúu yā (Mt. 20.17-19; Mr. 10.32-34)*

31 Te ni cana sán ya ndihúxí uū tēe cáscuáha jín yá, te ni cahān yā jín de:

Vijna je cuángoo yó ñayuu Jerusalén. Te yūcuan squícu ndihí jnūhun ndese ndoho ruhū, Yaā ní nduu tēe, nájñūhun ni catee tēe ni canacani jnūhun Yaā Dios nde jenahán.

32 Chi ñayuu nastúu i ruhū nuū tēe nación Roma jeē cáyucú Jerusalén

cándacu jniñu. Te tēe un sácata de nuū rī, te cahān neé de nuū rī, te tesihí de nuū rī.

<sup>33</sup> Te cani de ruhū, te sáa te cahni de ruhū. Te nuū uní quivī te natecu rī. Achí yá.

<sup>34</sup> Te máa de tu ní cájecūhun cuiti ni de tāca jnúhun yáha. Chi jnúhun yí cúu, te tu ní cúu jecūhun ni de jeē cahán yā.

*Jeē ní nasávāha ya ñn tēe cuáá ñuu Jericó*

*(Mt. 20.29-34; Mr. 10.46-52)*

<sup>35</sup> Te ni cuyajni ya cuahān yā ñuu Jericó. Te ñn tēe cuáá néne de yuhíchi, jícán de caridad.

<sup>36</sup> Te ni jini sōho de jeē yáha cuehē ñayuu cuangoo i, te ni cajnúhún de naun cuángoo i.

<sup>37</sup> Te ni cacahān i jíin de jeē Jesús, tēe ñuu Nazaret, yáha ya cuahān yā.

<sup>38</sup> Yūcuán na te ni cana jee de: Jesús Sēhe yucūn David, cundáhú ni ni sáña, achí de.

<sup>39</sup> Te ñayuu cuangoo ichi núú yā, ni cacahān i nuū de jeē na cási de yuhu de. Te máa de víhyá gā ni cana jee de:

Máa ní jeē cúu ní Séhe yucūn David, cundáhú ni ni sáña víi, achí de.

<sup>40</sup> Yūcuán na te ni jecuíñi Jesús, te ni cahān yā jeē na quíndeca i de. Te nuū ní cuyajni de nuū yā, te ni cajnúhun yá de:

<sup>41</sup> ¿Na vé cuní rō jeē sáha ri jíin ró? achí yá.

Te ni cahān de: Jeē na ndúndijin tinūu ná cuní na, achí de.

<sup>42</sup> Te ni cahān Jesús jíin de: Ndundijin tinūu ró núu súcuan. Ni candíje ró jeē cuu nasávāha ri rohó, te jeē yūcuan ní nduvāha ró, achí yá.

<sup>43</sup> Te ni ndundijin-ni tinūú de, te ni ndiquīn de ya, te nácuatáhú de nuū Yaā Dios. Te ndihí ñayuu jeē ní cajito i, suni ni cacahān i jeē yóhoyo vāha Yaā cúu Yaā Dios.

*Jnúhun Zaqueo*

## 19

<sup>1</sup> Te ni quivī Jesús ini ñuu Jericó, te ni yāha-ni ya cuahān yā.

<sup>2</sup> Te yūcuan íyó ñn tēe cúca nání de Zaqueo, te cújéhnú de nuū tēe cástútú xúhun renta.

<sup>3</sup> Te cúni de coto de návāha cuni de ndé ñn cúu Jesús. Te tu ní cúu, chi cuehē ñayuu cuangoo i jíin yá, te ndiqui-ni cáa de.

<sup>4</sup> Te jínu de ni cosnúú de. Te ni caa de xinī ñn nuyūhndú návāha coto de nuū yā, chi yūcuan yáha ya quihīn yā.

<sup>5</sup> Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachī nuu ró, chi jíni ñúhún jéē ndóo ri vehe ró vijna, achí yá.

<sup>6</sup> Yūcuán na te ni cusī ni de, te yachī ni nanuu de, te ni jeca de ya cuahān de jíin yá vehe de.

<sup>7</sup> Te ni cajito ñayuu jeē súcuan ni cuu, te ni cacahān i síquī yā jeē cuahán yā ndóo ya vehe ñn tēe sáha cuēchi.

<sup>8</sup> Yūcuán na te ni ndocuíñi Zaqueo, te ni cahān de jíin máa Jítoho yō:

Vijna te sava ndihí ndajniñu ná chi cuāha ná núu ñayuu ndahú. Te núu ni scáa ga na ní jicān na xúhun nuū ñayuu, te nacuāha ná únī gā síquī naquihin i, achí de.

<sup>9</sup> Te ni cahān Jesús:

Vijna te vehe yáha je ni cācu ñn tēe jeē ma jnahnú ndetū de, chi ni candíje de nájnūhun ni candíje jíi de Abraham.

<sup>10</sup> Chi ruhū, Yaā ní nduu tēe, ni quiiji ri nducú rí ñayuu jeē jnahnú ndetū, te jnama ri i, achí yá.

*Jnúhun yátá síquī uxī mozo jíin xúhun*

<sup>11</sup> Te nuū ñayuu ní cajini tāca jnúhun yáha, ní cahān gā Jesús ñn jnúhun yátá jéē steén yā ndese coo quivī ndíji ya. Chi je ni cuyajni ya ñuu Jerusalén, te cájeni ni i jeē víjna ñúhún quejéé jéē ndácu ya jniñu sáha Yaā Dios.

<sup>12</sup> Te ni cahān yā:

Ñn tēe cújéhnú cuahān jicá de inga nación, návāha nihīn jniñu de cuu de rey, te ndíji de ndacu de jniñu.

<sup>13</sup> Te nde ná tu quihīn de, te ni cana de uxī mozo de, te nuū ñn ñn i ni jēhe de ñn xúhun jéē ndeé yahu ndasí. Te ni cahān de jíin i: Sájniñu ró jéē na

ndúcuehē xūhun yáha jíjnáhan ró níni jéē quihín rī te ndee rī, achí de.

<sup>14</sup> Te ñayuu nación de cáquitī ni i nuū de, te ni catajī i jecu tēe cándiso jniñu cuango yata de jeē cahān: Tu cánujnahan ni ñayuu nación na jéē cuáha ní jniñu nuū tēe yáha jéē cuu de rey nuū i, achí.

<sup>15</sup> Te vēsú súcuan te ni nihīn jniñu de cuu de rey, te vendiji de nación de. Te nuū ní ndee de, te ni ndacu de jniñu jeē na quíjicoo mozo jeē ní jéhe de xūhun núū, návāha na cúni de nasaa ni canihīn ĩn ĩn i siquī.

<sup>16</sup> Te ni quee ĩn mozo un núū de, te ni cahān i: ĩn xūhun jéē ní jéhe ní núū ná, ni nduu uxī, achí i.

<sup>17</sup> Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jíin ĩn jniñu lúli-ni, te vijna te sáha ri jeē cujéhnú ró ndacu ró jniñu nuū uxí ñuu jnī ri, achí de.

<sup>18</sup> Te ni quee inga mozo, te ni cahān i: ĩn xūhun jéē ní jéhe ní núū ná, ni nduu uhūn, achí i.

<sup>19</sup> Te suni ni cahān de jíin mozo un: Róhó, cujéhnú ró ndacu ró jniñu nuū uhún ñuu jnī ri, achí de.

<sup>20</sup> Te ni quee inga mozo, ni cahān i: Yāha nácuāha ná xūhun ní, chi ni chuvāha ná ĩni ĩn pañuelo.

<sup>21</sup> Chi ni yūhu ná nihín, chi tēe xeēn cúu ní. Chi cuehē gā nándacān ní vēsú jeē ní jéhe ní, te cuehē gā cuní ni vēsú jeē cúu sáha mozo ni, achí de.

<sup>22</sup> Yūcuán na te ni cahān rey: Mozo neé cúu ró núu súcuan, te jíin jnūhun ni cahān rō te sándaā rī jeē iyó cuéchi ró jéē tu ní sájniñu ró jíin xūhun rí. Chí jéni ni rō jeē tēe xeēn cúu ri, te cuehē gā nándacān rī vēsú jeē ní jéhe ri, te cuehē gā cuní rī vēsú jeē cúu sáha mozo rī.

<sup>23</sup> Núu súcuan ¿te naun tu ní chúne ró xūhun rí vēsú nuū banco? Te jeē ní ndee rī te naquihin ri xūhun rí nde jíin séhe xūhun núu. Achí de.

<sup>24</sup> Te ni cahān de jíin ñayuu cáhīn yūcuán: Quende xūhun jíñā nuū i, te cuāha ró núū mozo jeē névāha uxī, achí de.

<sup>25</sup> Te ñayuu un ní cacahān i jíin de:

Te ndese, chi je névāha de uxī, achí i.

<sup>26</sup> Te ni cahān tucu rey: Cáhán rī jíin ró jeē ñayuu je névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i.

<sup>27</sup> Te tēe jeē cájito uhū ruhū, jeē tu ní cánujnahan ni de jeē cuu ri rey nuū de, cuáquihin de na quíjicoo de yāhā. Te cahni rō de coto ri, achí de. Achí Jesús.

*Jeē ni quívi Jesús ñuu Jerusalén (Mt. 21.1-11; Mr. 11.1-11; Jn. 12.12-19)*

<sup>28</sup> Te nuū ní ndīhi ni cahān yā jnūhun yáha, te ni jica ga yā cuahān yā ñuu Jerusalén.

<sup>29</sup> Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuāha jíin yá jeē quíngoo de.

<sup>30</sup> Te achí yá jíin de:

Cuáhán ñuu lúli íne ichi núu. Te núu ni quívi ró, te nihīn rō ĩn burro núhni tī, jeē ní ĩn tēe ná tu coso de tī. Te ndají ró tī quiji ró jíin tī.

<sup>31</sup> Te núu ndé ĩn cajnūhún naun cándají ró tī, te cahān rō jíin: Máá Jítóho yō jíni ñúhún yá tī, achí rō. Achí yá.

<sup>32</sup> Te cuango tēe ni tají yá, te ni canihīn de tī nájñūhun ni cahān yā jíin de.

<sup>33</sup> Te jeē cándají de tī, te ni cacahān jítóho tī jíin de:

¿Naun cándají ró burro ri? achí.

<sup>34</sup> Te ni cacahān de:

Máá Jítóho yō jíni ñúhún yá tī.

<sup>35</sup> Te ni ndecoo de jíin tī nuū Jesús. Te ni casoó de sahma de siquī tī, te ni casáha de jeē ní jecosō yā siquī tī.

<sup>36</sup> Te ná-ni cuahān yā, sáá cáscáá ñayuu sahma i ĩni ichi.

<sup>37</sup> Te nuū ní cuyajni ya nuū cúun ichi yucu Olivos, te ndīhi ñayuu cácdíje jeē cándiquīn i ya, ni caque-jéé i cácusī ni i, te cácana jee i jeē yóhoyo vāha Yaā cúu Yaā Dios siquī táca jniñu jéhnú ni sáha ya ni cajito i.

<sup>38</sup> Te achí i:

Yóhoyo vāha Yaā cúu Rey jeē véji jíin jniñu máá Jítóho yō Yaā Dios. Te sáha ya jeē cóo manī yō jíin Yaā Dios

andiví. Te yōhyo cújéhnu Yaā Dios, achí i jíjnáhan i.

<sup>39</sup> Yūcuán na te jecu tēe fariseo cáhiin mēhñu ñáyuu cuehē ún, ní cacahān de jíin yá:

Maestro, cahān ni núū ñáyuu cándiquín nihín jēe na cási i yuhu i, achí de.

<sup>40</sup> Te ni cahān Jesús:

Cáhán rī jíin ró jeē núū ñáyuu yáha na cási i yuhu i, te tāca yúū chi cana jee, achí yá.

<sup>41</sup> Te nuū ní cuyajni ya Jerusalén, te ni jito ya ñuu ún, te ni ndahyū yā síquī.

<sup>42</sup> Te ni cahān yā:

Róhó ñáyuu Jerusalén, yōhyo ni cuu ni rī jeē na jécūhun ni rō jeē cuu ndumanī rō jíin Yaā Dios sáha ri. Te síquī jeē tu cácandíje ró, te vijna chi ma cúu ga jecūhun ni rō.

<sup>43</sup> Chi quee quiví jeē coo jnūndóho, te ñáyuu cájito uhū rohó, cuicó ndúū i ñuu rō, te casi cutú i jíin yúū, te tāca lado ndonda i síquī rō.

<sup>44</sup> Te ndíhi vehe scótúú i, te cahni i róhó jíjnáhan ró. Te ma stóo i ni ñn vehe jeē cóso jnáhan ga yuū. Chi ni quiji ri nde nuū Yaā Dios jeē jnáma ri rohó, te tu ní cácandíje ró. Achí yá.

*Jeē ní quenehen ya ñáyuu ini templo*  
(Mt. 21.12-17; Mr. 11.15-19;  
Jn. 2.13-22)

<sup>45</sup> Te ni quiví ya ini templo cáhnu, te ni quejéé yá quenehen ya tāca ñáyuu cájeen quiti te cánaxico núū ñáyuu jeē socō i.

<sup>46</sup> Te ni cahān yā jíin i:

Yósó núū tútu ñi jeē cahán Yaā Dios: Vehe ri chi vehe nuū cájicān tahu cúu, achí Yaā Dios. Te máá ró jíjnáhan ró, chi nájnūhun yaū cava ñacuñna ní canasáha ró, achí yá.

<sup>47</sup> Te ndiquiví ni steén yā jnūhun ini templo. Te sutū cácujeñnu jíin tēe cástéén tutu ley Yaā Dios jíin tēe cácujeñnu nuū ñáyuu ñuu ún, cánducú de modo ndese cahni de ya.

<sup>48</sup> Te tu cániñn de modo sáha de, chi ndivii ñáyuu yōhyo cájetáhú i cájini nahín i jnūhun cáhán yā.

*Siquí jeē ndíso jniñu Jesús*  
(Mt. 21.23-27; Mr. 11.27-33)

## 20

<sup>1</sup> Te ñn quiví steén yā jnūhun nuū ñáyuu ini templo, te nácani ya jnūhun jeē jnáma Yaā Dios ñáyuu. Te ni quecoo sutū cácujeñnu jíin tēe cástéén tutu ley Yaā Dios jíin táca tēe jéñnu cándacu jniñu.

<sup>2</sup> Te ni cacahān de:

Castūhún, ¿ndé ní nihín jniñu ró jēe sáha ró jniñu yáha? ¿Te ndé ñn ni tee jniñu síquī rō jeē sáha ró súcuan? Achí de.

<sup>3</sup> Te ni cahān Jesús jíin de:

Suni ruhū cajnūhun rí rohó ñn jnūhun jíjnáhan ró. Castūhun núū rī:

<sup>4</sup> ¿Ndé ñn ni tee jniñu síquī Juan jeē ni scuándute de? ¿A Yaā Dios chí táca tēe? Achí yá.

<sup>5</sup> Yūcuán na te ni candajnūhun máá de:

¿Ndese cahān yō? Núu cahān yō jeē Yaā Dios ni tee ya jniñu un síquī Juan, te cahān de jíin yó: ¿Najehē tu ní cácandíje ró de núu súcuan?

<sup>6</sup> Te núu cahān yō jeē ñáyuu ni catee jniñu un síquī de, te ndivii ñáyuu cahni i yóhó jíin yúū, chi cácandíje i jeē tēe ni nacani jnūhun Yaā Dios ni cuu ndije Juan, achí de cácahān maá de.

<sup>7</sup> Te ni cacahān de jeē tu cájini de ndé ñn ni tee jniñu síquī Juan jeē ni scuándute de.

<sup>8</sup> Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu síquī rī sáha ri jniñu yáha, achí yá.

*Jnūhun yátá síquī tēe néé cásjniñu nuū uva*  
(Mt. 21.33-44; Mr. 12.1-11)

<sup>9</sup> Te ni quejéé Jesús cahán yā jnūhun yátá yáha jíin ñáyuu ún:

Ñn tēe ni nachuhun de cuehē uva nuū ñūhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahán de inga ñuu.

<sup>10</sup> Te máá tiempo ndutútú uva, te ni tají de ñn mozo cuahān nuū tēe cásjniñu ún, návāha naquihin de sava ndehē uva un. Te tēe un ní

cacani de mozo, te ni canatají de i cuanuhun i súcuan-ni.

<sup>11</sup> Te tēe chíí uva ni tají tucu de inga mozo cuahān. Te tēe cásájniñu ún, suni ni cacahān ndevāha de nuū i, te ni cacani de i, te ni canatají de i cuanuhun i súcuan-ni.

<sup>12</sup> Te tēe chíí uva ni tají tucu de inga mozo cuahān. Te tēe cásájniñu ún, suni ni castújí de mozo un, te ni cascúnu de i.

<sup>13</sup> Yūcuán na te ni cahān tēe chíí uva: ¿Nde se sáha ri? Na tájí rí sēhe ri jeē maní rí jíin, chi sanaa te núu ni cajito de i te coo yíñuhún de nuū i. Achí de.

<sup>14</sup> Te tēe cásájniñu ún, ná ni cajito de jeē véji i, te ni cacahān de: Tēe chíí táhū cúu jeē véji ún. Na cáhni yō de, te ndōo tahū de cuu máá yó, achí.

<sup>15</sup> Te ni caquenehen de i inga lado, te ni cajehni de i, achí yá.

Te ni cajnūhun yá de:

Núu súcuan ¿te ndese sáha tēe chíí uva jíin tēe cásájniñu ún?

<sup>16</sup> Ndihi de te cahni de tēe un jíjnáhan, te cuāha de ñuhun cáá uva un núu inga sava tēe sájniñu nuū, achí yá.

Te jeē ní cajini ñayuu jnūhun yáha, te ni cacahān i:

Aí, núu ma cóo cuiñi súcuan víi, achí i.

<sup>17</sup> Te ndéhé yá nuū i jíjnáhan i, te ni cahān yā:

Núu súcuan ¿te á cájecūhun ni rō jnūhun yáha jēe yosó núu tútu ñi jeē cúu ri nájnūhun ñin yuū? Chi achí tutu: Yuū jeē ní casquéhichí tēe cájeni vehe, yuū yáha nduu jeē quítuu vehe.

Achí.

<sup>18</sup> Te ñayuu tu cá candíje, ndoho i nájnūhun ndóho ñayuu jeē cotúú siquī yuú te jnánhú i. Te quiví sándaā Yaā Dios cuēchi, te ñayuu tu cá candíje, ndoho i nájnūhun ndóho ñayuu jeē nánga yuū siquī i te cundihí i sáha. Achí yá.

*Siquī xúhun renta*

(Mt. 21.45-46; 22.15-22; Mr. 12.12-17)

<sup>19</sup> Yūcuán na te sutū cácujuhnu jíin tēe cástéén tutu ley Yaā Dios, ni cacuni de jñi de ya maá hora un. Chi ni cajecūhun ni de jeē siquī maá de

cúu jnūhun yátá ní cahān yā siquī tēe cásájniñu nuū uva jíin tēe cájeni vehe. Te tu ní cúu, chi cáyūhú de jeē quítu ni ñayuu.

<sup>20</sup> Yūcuán na te ni catají de jecu tēe cuacoto yuhu de ya, te tēe un cásáha-ni de jeē tēe ndaā cácuu de. Te cánducú de sáha de jeē cahán yā ñin jnūhun jeē nihín de cuēchi siquī yā, te quindecá de ya nuū tēe cúu gobernador.

<sup>21</sup> Te ni cacahān de:

Maestro, cájini na jēe cahán vāha ní, te stéén ndaā ní. Te tu sáha ní cuenta ndese cúu ñin ñin ñayuu, chi inuú-ni sáha ní jíin i. Te stéén ndaā ní ndese squícu ñayuu nuū Yaā Dios.

<sup>22</sup> Núu súcuan te cachi ní: ¿A íyó váha jeē chúnaa yō renta nuū rey nación Roma jeē jñi nación yō, chí tuú? achí de.

<sup>23</sup> Te ni jini yā jeē cá cuni de stáhú de ya, te ni cahān yā jíin de:

¿Najehē cájito ndee rō ruhū?

<sup>24</sup> Stéén ñin xūhún na cóto ri. ¿Ndé ñin nuū cúu jeē ndeé nuū xúhun yáha, te ndé síhví cúu jeē ndeé yāhá? achí yá.

Te ni cacahān de jíin yá:

Nuū jíin síhví rey un cúu, achí de.

<sup>25</sup> Yūcuán na te ni cahān yā jíin de:

Núu súcuan te nacuāha ró núu rey un jēe yíhi cuenta nuū de, te nacuāha ró núu Yaā Dios tāca jēe yíhi cuenta nuū maá yá, achí yá.

<sup>26</sup> Te tāca tēe ún tu ní cúu nihín de cuēchi siquī yā jíin ni ñin jnūhun cáhán yā, cájito jínúu ñayuu. Chi sa ni canaa ni de jeē ndichí ní stió cuiñí yā jnūhun nuū de, te tuá na vé ni cácahān de.

*Jeē ní cacajnūhún de siquī jeē nátecu ndíyi*

(Mt. 22.23-33; Mr. 12.18-27)

<sup>27</sup> Yūcuán na te jecu tēe grupo sáduceo ni quecoo de nuū yā. Te tēe un cácahān jeē tu nátecu cuiñi ndíyi. Te ni cacahān de jíin yá:

<sup>28</sup> Maestro, Moisés ni tee de nuū tútu jeē cánevāha yó: Núu ñin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de

jeē cácu jíin ña nucuiñi i nuū ndíyí ñani de, áchí tutu.

<sup>29</sup> Núu súcuan te ni iyo uxā ñani. Te tēe núu ní quijnáhan de jíin ñahan. Te ni jihí de, te tú sēhe de ní íyo.

<sup>30</sup> Te tēe uū ni naquihin de ña, te suni ni jihí de, te tú na sēhe de ní íyo.

<sup>31</sup> Te tēe unī ni naquihin de ña. Te suni súcuan ndihúxá de ni condeca de ña, te ni cajihí ndihí de, te ni ñin de tú sēhe de ní íyo.

<sup>32</sup> Te jeē sándihí te suni ni jihí ñahan ún.

<sup>33</sup> Núu súcuan te núu na nátecu de jíjnáhan de quiñi nátecu ndíyí, ¿te ndé ñin de cuu ña ñasihí de? Chi ndihúxá de ni condeca de ña. Achí de jíjnáhan de.

<sup>34</sup> Yūcuán na te ni cahān yā jíin de:

Ñayiví yáha chi cáquijnáhan tēe jíin ñahan.

<sup>35</sup> Te ñayuu vāha jeē natecu i quivicoo i andiví, ma quijnáhan ga i yūcuán, chi tuá na jñuhun quijnáhan tēe jíin ñahan coo.

<sup>36</sup> Ni ma cúu cuiñi gā i, chi coo i nájñuhun ndajéhé Yaā Dios. Te sēhe Yaā Dios cuu i, chi je ni canatecu i.

<sup>37</sup> Te suni máá Moisés cáhān de jeē nátecu ndíyí, chi ni tee de nuū tútu ndese ni cahān yā jíin de mēhñu yúcū jeē cayú yáñuhūn. Chi ni cahān de jeē cúu ya Yaā Dios Abraham jíin Isaac jíin Jacob.

<sup>38</sup> Te jeē ni cahān de súcuan cúu jeē ní cachi de jeē cátecu tāca ndíyí. Chi vēsú je ni cajihí i, te cátecu i nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de.

<sup>39</sup> Te jecu tēe cástéén tutu ley Yaā Dios ni cacahān de:

Vāha ni cahān ní Maestro.

<sup>40</sup> Te tuá ni cáchundeyí ni de ca-jñuhūn de ya.

*Siquí jeē cúu Cristo sēhe yucūn David*

(Mt. 22.41-46; Mr. 12.35-37)

<sup>41</sup> Te ni cahān yā jíin de jíjnáhan de: ¿Ndese cúu jeē cácahān ñayuu jeē Cristo cúu sēhe yucūn David?

<sup>42</sup> Chi máá David suhva ni cahān de jñuhun ya nuū tútu Salmo:

Máá Jítóho yō Yaā Dios suhva ni cahān yā jíin Jítóho rī, Yaā quiñi:

Cucōo ró lado váha ri nuū cujéhnú ró, <sup>43</sup> te na sáha ri jeē quende rō poder tāca jeē cájito uhū rohó.

Achí Yaā Dios. Achí David.

<sup>44</sup> Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

*Jeē ni cáhān yā jeē iyó cuéchi de jíjnáhan de*

(Mt. 23.1-36; Mr. 12.38-40; Lc. 11.37-54)

<sup>45</sup> Te ni cahān yā jíin tēe cáscuáha jíin yá, te suni ni cajini sōho ndihí ñayuu:

<sup>46</sup> Coto má cándíje ró tāca tēe cástéén tutu ley. Chi cácusí ni de cáñuhun de sahma cáni jeē steén jeē cujéhnú de, cájica cuu de jíin. Te cánujnahan ni de jeē cahān yíñuhún ñayuu jíin de nuū yáhu. Te cánujnahan ni de cucōo de nuū silla yíñuhún gá ini vehe i sin-agoga, jíin silla yíñuhún gá nuū víco cáyeji ñayuu.

<sup>47</sup> Te cáquende de vehe ñahan ní caquendōo ndáhú. Te nahān cájicān tahu de návāha caní ni ñayuu jeē tú na cuéchi de. Tēe yáha jíjnáhan de chi xeēn gā ndoho de castigo. Achí yá.

*Jeē ni sócō ñahan viuda xūhún*

(Mr. 12.41-44)

## 21

<sup>1</sup> Te ná ni iyo ya ini templo, te jító ya nuū ñayuu cucá jéē cáchuhun i cuehē xūhún ini tāca yéjnū nuū cásocō i.

<sup>2</sup> Te suni ni jító ya nuū ñin ñahan viuda jeē ndóho ndáhú, te ni chuhun ña uū centavo lulí ini yejnū ún.

<sup>3</sup> Te ni cahān yā:

Jendaá cahān rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca gá ñayuu.

<sup>4</sup> Chi tācá i ni casocō i jeē ni ndóo siquí xūhun cuéhē i. Te ñahan yáha, vēsú ndahú ndóho ña, te ni chuhun ndihí ña jeē cótecu ña. Achí yá jíin de.

*Jeē ní cachi yā jeē náa templo*

(Mt. 24.1-2; Mr. 13.1-2)

<sup>5</sup> Te sava de ni cacahān de jeē luu cáa templo cáhnu, chi ni cuvāha jíin

táca yūu luu jíin táca jéē ní casocō ñayuu. Yūcuán na te ni cahān yā:

<sup>6</sup> Ndihi jeē cájito ró yáha, quee quivī jeē ma cóso jnāhan ga ni ñn yuū, chi ndihi jnanū, achí yá.

*Na seña coo nuū cuácuyajni ndihi ñayiví*

*(Mt. 24.3-28; Mr. 13.3-23)*

<sup>7</sup> Te ni cacajnuhún de ya:

Maestro, ¿ndé quivī coo táca jéē ní cachi ní jéē coo? ¿Te na seña coo nuū cuácuyajni squícu táca jéē ní cáhān ní? achí de.

<sup>8</sup> Te ni cahān yā:

Coto ró jéē ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quivī ndihi ñayiví, achi de. Te ma cóndiquín rō de.

<sup>9</sup> Te núu nihin rō jnūhun jeē táca lado iyó guerra te cándonda ñayuu siquī tohō, te ma yūhu ró, chi cánuú jéē xíhna gā coo súcuan, te ni ma jinú yachī quivī ndihi ñayiví. Achí yá.

<sup>10</sup> Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajnáhan.

<sup>11</sup> Te cháha chúcuan jnāa téyí, te coo jnamā jíin cuéhyī xeēn. Te coo seña jéhnū ichi ándiví jéē yūhú ndasí ñayuu coto i.

<sup>12</sup> Te nde ná tu coo táca jniñu yáha, te coto xeēn i róhó, te jniñ i róhó. Te quindecá i sava ró táca vehe ñi sinagoga jeē cahán i cuēchi siquī rō. Te chune i sava ró vecāa. Te quindecá i sava ró núu táca rey jíin núu táca gobernador, te cahān i cuēchi siquī rō jeē siquī jeē cá candíje ró rúhū.

<sup>13</sup> Te jeē súcuan coo, te cuitē núu ga jnūhun ri, chi nacani ndaā rō nuū de jíināhan de.

<sup>14</sup> Núu súcuan te cundaā ni rō jeē ma nacani ni rō xíhna gā ndese stío cuiñí rō nuū de te cācu ró.

<sup>15</sup> Chi ruhū cuāha ri jnūhun ndíchi cahān rō, návāha ñayuu jeē cájito uhū rohó, ma cúndeyí i jíin ró ni ma cúu cahān i siquī rō.

<sup>16</sup> Te nde tatá rō, naná rō, ñani rō, jnāhan ró, jíin amigo rō, nastúu i róhó núu ñáyuu xeēn. Te cahni i sava ró.

<sup>17</sup> Te táca ñáyuu chi quitī ni i nuū rō jeē siquí ruhū.

<sup>18</sup> Te ni ñn ixi xíní rō jíināhan ró ma náa, chi coto ya rohó.

<sup>19</sup> Te núu cuiñi nihin ró jíin jnūhun ri, te cotecu rō ní cáni.

<sup>20</sup> Te núu ni cajito ró jéē ní cajicó ndúu soldado ñuu Jerusalén, te na jécūhun ni rō jeē jé yajni naa ñuu ún.

<sup>21</sup> Yūcuán na te ñayuu cáyūcú región Judea, na cúnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhīn nde rancho, ma nándicó i ñuu ún.

<sup>22</sup> Chi táca quivī un cuāha Yaā Dios castigo nuū ñáyuu jeē siquí cuéchi i, návāha squícu táca jnūhun jeē yosó núu tútu.

<sup>23</sup> Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachī ña. Chi yōhyo xeēn coo jnūndóho ini ñayiví, te quiji castigo xeēn siquí ñáyuu yáha.

<sup>24</sup> Te sava i cuu nuū guerra, te sava i quingoo preso nde táca inga nación. Te ñayuu táca gá nación ndacu nihin i jniñu nuū ñáyuu ñuu Jerusalén, nde jīnu tiempo jeē jéhe Yaā Dios jnūhun ndacu i jniñu.

*Ndese coo quivī ndiji Yaā ní nduu tēe*

*(Mt. 24.29-35, 42-44; Mr. 13.24-37)*

<sup>25</sup> Yūcuán na te coo seña nuū níandii jíin núu yoó jíin núu quími. Te ini ñayiví te quiji jnūndóho xeēn siquí ñáyuu táca nación. Te cunéé ni i, te yūhú i jeē nihin xeēn mar te ndóna xeēn ndute mar vēji nuū ñūhun.

<sup>26</sup> Te cuu sōo sava ñayuu jeē cáyūhú i cándetu i táca jnūndóho quiji siquí ñayiví. Te táca jéē ín andiví chi quisí i.

<sup>27</sup> Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu kujéhnū ri.

<sup>28</sup> Te núu ni quejéé táca jniñu yáha, te ndeyí coo ni rō, te cocunuū rō

andiví, chi je yajni jnama ya rohó. Achí yá jíin de jíjnáhan de.

<sup>29</sup> Te suni ni cahān yā jnūhun yátá yáha:

Condēhe jíjnáhan ró ndese sáha nundēhe higo jíin táca gá yujnu.

<sup>30</sup> Núu cájito ró jéē ní quejéé náne numa yújnu ún, te cájini rō jeē jé yajni coo tiempo jihní.

<sup>31</sup> Te suni súcuan núu ni cajito ró jéē ní quejéé cúu táca jniñu jeē ni cáhān rī, yūcuán na te na jécūhun ni rō jeē ní cuyajni quivī ndacu Yaā Dios jniñu ini ñayiví.

<sup>32</sup> Jendaá cahán rī jíin ró jeē ma cúu ndihí ñayuu tiempo un, chi nde squícu ndihí jniñu ún.

<sup>33</sup> Andiví jíin ñáyiví chi naa, te táca jnúhun cáhān rī chi ma náā, chi ndihí squícu.

<sup>34</sup> Te coto ma stíví ró maá ró jijnáhan ró jéē sáha ró táca cuéchi, jíin jéē najini ró, jíin jéē cujnéñu ró jíin táca ndajniñu cotecu rō, návāha tú sanaa ni rō te quee quiví un síquī rō.

<sup>35</sup> Chi nájnūhun jeē núu ñn trampa, súcuan quee jnūndóho siquī ñayuu cáyūcu ní cáhnu ñayiví.

<sup>36</sup> Núu súcuan te ndito coo ni rō, te níní cácan tahu rō, návāha cuu cácu ró núu táca jnūndóho jeē quíji ún, te cuu cuiñí ró núu ruhū, Yaā ní nduu tēe. Achí yá.

<sup>37</sup> Te ndiquiví steén yā jnūhun ini templo, te ndijnahan jecuáá jéndōo ya nde yucu jeē naní Olivos.

<sup>38</sup> Te táca jénéhen quécoo ñayuu nuū yā ini templo jeē cúni sōho í jnūhun steén yā.

*Jeē ní casquíjnáhan de jnūhun jnā de Jesús*

(Mt. 26.1-5, 14-16; Mr. 14.1-2, 10-11; Jn. 11.45-53)

## 22

<sup>1</sup> Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi.

<sup>2</sup> Te sutū cácujeñnu jíin tēe cástéén tutu ley, ni canducú yuhu de modo

cahni de Jesús, chi cáyūhú de jeē quiti ni ñayuu.

<sup>3</sup> Te ni quiví Satanás ini anuá Judas jeē nastúu de ya. Te suni nání de Iscariote, te cúu de ñn jnáhan jeē ndihúxí uū tēe apóstol.

<sup>4</sup> Te ni jehēn de ni candajnūhún de jíin táca sūtū cácujeñnu jíin tēe cándiso jniñu ini templo, núu ndese nastúu de ya nuū tēe un jíjnáhan.

<sup>5</sup> Te tēe un ní cacusiñi ni de, te ni cajejnūhun de jeē cuáha de xūhun núu Judas.

<sup>6</sup> Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

*Jeē ní jequin yā Cena yā*  
(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup> Te ni quee maá quiví vico jeē cáyeji ñayuu pan jeē tú na levadura yíhi, te suni quiví un cájehni í londe nájnūhun ni ndacu Yaā Dios jniñu jeē sáha í vico pascua un.

<sup>8</sup> Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jéē cuxíni yó vico pascua, achí yá.

<sup>9</sup> Te ni cacajnūhún de ya:

¿Ndé nuū cuní ni jéē quisátūhva ná? áchí de.

<sup>10</sup> Te ni cahān yā jíin de:

Cuángoo ñuu yūcuán, te núu ni quivícoo ró te najnáhan ró jíin ñn tēe ndíso quíyí ndute. Te condiquín rō de quihín rō jíin de nde vehe nuū ndívi de.

<sup>11</sup> Te cahān rō jíin tēe chíí vehe ún: Achí máá Maestro: ¿Ndé ñn cúu cuarto vehe ní cuáha núu ní núu cuxíni ya vico pascua jíin tēe cácuáha jíin yá, achí rō.

<sup>12</sup> Yūcuán na te steén de ñn cuarto cáhnu nde xiní véhe jeē je íyó túhva, te yūcuan sátūhva ró jéē cuxíni yó, áchí yá.

<sup>13</sup> Te cuangoo de, te ni canihín de nájnūhun ni cahān yā. Te ni casátūhva de jeē cuxíni ya vico pascua.

<sup>14</sup> Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tēe cácuu apóstol.



15 Te ni cahān yā jín de:

Yōhyo ni cuu ni rī cuxíni ri jín ró jijnáhan ró vico pascua yáha, vijna nde ná tu cuu rī.

16 Chi cáhān rī jín ró jeē ma cáji cuiṭi gā rī vico pascua, chi nde quiṭi quiṭi ndacu Yaā Dios jniñu ní ñayīví, te sáa te caji tucu ri, achí yá.

17 Te ni quihin ya ñn copa ndūxi uva, te ni nacuatáhu yá, te ni cahān yā:

Quihin copa yáha, te coho ró jín jnáhan ró.

18 Chi cáhān rī jín ró jeē ndé vijna te ma cóho ga rī ndūxi uva, chi nde quiṭi quiṭi ndacu Yaā Dios jniñu ní ñayīví, te sáa te coho tucu ri. Achí yá.

19 Te ni quihin ya pan, te ni nacuatáhu yá, te ni tahú cuéchi yá, te ni jēhe ya nuū de jijnáhan de. Te ni cahān yā:

Yāha cúu yiqui cúñu rī jeē socō rī jeē chunaa rī cuēchi ró jijnáhan ró. Te níni caji rō súcuan jeē cáñuhun ni rō ruhū jeē ni jīhī rī jehē rō. Achí yá.

20 Te suni súcuan ni sáha ya jín copa ndūxi uva, ná ni cuu ni cuxíni ya. Te ni cahān yā jín de:

Yāha cúu niñī rī jeē cuáha ri jeē cúu contrato jeé, te cati jeē ndundoo cuēchi ró jijnáhan ró.

21 Te vijna chi tē nastúu ruhū, néne de jín rí nuū mesa yáha.

22 Chi ruhū, Yaā ní nduu tē, jendaá cúu jeē quihín rī cuu rī nájnūhun je ni sándaā Yaā Dios jeē súcuan coo. Te nacā xeēn ndoho tē jeē nastúu ruhū, achí yá.

23 Yūcuán na te ni caquejé de cácajnūhun jnáhan de ndé ñn de cúu jeē nastúu de ya.

*Jeē ní cacahān de siquī ndé ñn de cújéhu ga*

24 Yūcuán na te yōhyo ni cacahān de siquī ndé ñn de cújéhu ga nuū jnáhan de.

25 Te ni cahān Jesús jín de:

Rey tācá nación chi cándacu nīhin de jniñu nuū ñayuu cájni de, te cácahān i jeē tēe cásáha vāha cúu jeē cácujeḥnu nuū i.

26 Te róhó jijnáhan ró, ma cóo ró súcuan. Chi núu ndé ñn ró cújéhu ga, te sa nasáha lulí ró maá ró. Te núu ndé ñn ró ndácu jniñu, te sa nasáha ró máa ró tēe jéjníñu nuū jnáhan.

27 ¿Te ndé ñn cúu jeē cujéhu ga, á tēe yéji nuū mesa, chí tēe jéni cohō? ¿A násūu tēe jeē yéji nuū mesa cúu jeē cujéhu ga? Te ruhū nasūu súcuan cúu ri, chi ni nasáha ri maá rí nájnūhun tēe jéjníñu nuū rō, chi vēji ri sáha ri jeē níhín tahú rō.

28 Te máa ró cácuu tēe jeē níni cáhīn jín rí tāca quíṭi jeē ndóho ri jnūndóho.

29 Núu súcuan te nájnūhun ni sáha Tátá rī jeē ndácu ri jniñu, suni súcuan sáha ri jeē ndacu ró jniñu jijnáhan ró.

30 Te caji rō coho ró jín rí ini ñuu nuū ndacu ri jniñu. Te cucōo ró ñn ñn mesa jeē sándaā rō jniñu ndihúxí uū yucūn Israel. Achí yá.

*Jeē ní cachi yā jeē yūhu Pedro cahān de jeē jini de ya*

(Mt. 26.31-35; Mr. 14.27-31; Jn. 13.36-38)

31 Te suni ni cahān maá Jítoho yō jín Simón Pedro:

Simón, cuni sōho ró, chi ni jicān Satanás rohó jijnáhan ró jéē coto ndee rohó nájnūhun jeē síjin trigo, te stúu ndé ñn ró cácuu nájnūhun paja jeē nayūhu ró, te ndé ñn ró cácuu nájnūhun trigo jeē candíje níhin ró.

32 Te ni jicān tahú rī jehē rō návāha ma náyūhu ró jeē ma cándíje ga rō. Te jeē nácañíje tucu ró, te sáha ró jéē íje tāca jnáhan ró jín jnūhun ri. Achí yá.

33 Te ni cahān de jín yá:

Je íyó túhva ná quíhīn na jín ní vecāa te vēsú na cuu na jín ní, achí de.

34 Te ni cahān yā:

Pedro, cáhān rī jín ró jeē nde ná tu cana líhli vijna, te yūhu ró jeē jniñu ñayuu rohó, te unī jínu cahān rō jeē tu jini rō ruhū, achí yá.

*Jeē ní cuyajni coto ya jnūndóho*

35 Yūcuán na te ni cajnūhun yá de jijnáhan de:

Ná ni tají rí rohó ní jengoo ró jéē tu ní cóndiso ró ñunu ni yijni xūhún ni

ndijēn, ¿te á ní īyo ñn jeē ní cumanī nuū rō? Achí yá.

Te ni cacahān de:

Tú ni ñn ní cúmanī.

<sup>36</sup> Te ni cahān yā:

Nde vijna sa cáhān rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de máá de, na xíco de ticāchí de te na cuáan de.

<sup>37</sup> Chi cáhān rī jín ró jeē quee quivī ndoho yó jnúndóho, chi cánuú squícu jnúhun yáha jéē cahān nuū tútu síquī rī: Sáha ñayuu jín yá nájnūhun cásáha i jín téé sáha cuēchi xeēn, áchí tutu. Chi táca jnúhun un jéē yosó cáhān síquī rī, chi squícu nahín, áchí yá.

<sup>38</sup> Yūcuán na te ni cacahān de:

Yáha íyó úu espada, achí de.

Te ni cahān yā jín de:

Jín jéē yáha-ni, áchí yá.

*Jeē ni jicān tahú yā nuū huerto Getsemani*

(Mt. 26.36-46; Mr. 14.32-42)

<sup>39</sup> Te ni quenda ya cuahān yā yucu Olivos nájnūhun sáha sáha ya. Te tēe cáscuáha jín yá ni candiquín de ya cuango de jín yá.

<sup>40</sup> Te nuū ni jínū yā yūcuán, te ni cahān yā jín de:

Cacān tahú rō jijnáhan ró jéē chindéé ñáhán yá rohó jéē ma sáha ró cuéchi núu coto ndee jeneé rōhó, achí yá.

<sup>41</sup> Te ni jica ya jecu, cūhva jeē jicá jínú yuū jeē squíín. Te ni jecuiñī yití yá, te suhva ni jicān tahú yā:

<sup>42</sup> Tátā, núu cúní ni te tejiyo ní jnúndóho yáha jéē ma quíji síquī ná. Te nasūu jéē cuní maá ná, chi jeē cuní maá ní na cóo, áchí yá.

<sup>43</sup> Te ni cane ñn ndajéhé andiví núu yā, te ni jēhe fuerza nuū yā.

<sup>44</sup> Te cúcuíhyá ndasí ni yā jeē quiiji jnúndóho síquī yā, te ni nducú ndéyí gá yā ni jicān tahú yā. Te ni cane jnañū yā, te tóo nuū ñūhun nájnūhun yúyú nahnu niñī.

<sup>45</sup> Te ná ni ndocuiñī yā jeē ni jicān tahú yā, te ni ndee yā nuū téé cáscuáha jín yá. Te ni jito ya jeē cáquixí de, chi tuá cáhīyo ndeyí ni de cacān tahú de jeē cácuquíhyá ndasí ni de.

<sup>46</sup> Te ni cahān yā jín de:

¿Naun cáquixí rō? Ndonda te cacān tahú rō jeē chindéé ñáhán yá rohó jéē ma sáha ró cuéchi jeē cóto ndee jeneé rōhó. Achí yá.

*Jeē ní cajñī de Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Te sá cáhān gā yā súcuan, te ni quecoo cuehē ñayuu. Te tēe nání Judas, ñn jnáhan jeē uxí uū tēe scuáha jín yá, yósnúu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya.

<sup>48</sup> Te ni cahān Jesús jín de:

Judas, ¿á jín jéē téchūhu ró ruhū cúu jeē nastúu ró rúhū, Yāá ní nduu tēe? Achí yá.

<sup>49</sup> Te tēe cáhīin jín yá, ni cajito de jeē ní quejéé cúu, te ni cacajñūhún de ya: ¿A ndonda ná jijnáhan ná síquī de jín espada? áchí de.

<sup>50</sup> Te ñn de ni stují de mozo sutū kujénu ga, chi ni jehnde de sōho lado váha.

<sup>51</sup> Te ni cahān Jesús:

Siáá, na jécuiñī, achí yá.

Te ni tee ya ndaha ya sōho mozo un, te ni nasávāha ya de.

<sup>52</sup> Te ni cahān yā jín sūtū cácujeñnu jín téé cándiso jniñū ini templo jín táca téé jénu jeē ní quecoo de jeē jni de ya:

¿Te va tēe cuíhná cúu ri jeē véjicoo ró jín espada jín yujnu jeē jñī ró rúhū jeē súcuan?

<sup>53</sup> Táca quívī ni ine ri jín ró jijnáhan ró ini templo cáhnu, te tu ní cájñī ró rúhū. Te vijna te ni quee hora jeē jñī ró rúhū jín jéē sáha ró táca jniñū jeē ndácu jeneé jéē ndeé núu néé. Achí yá.

*Jeē ní cachi Pedro jeē tu jíní de ya*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Te ni cajñī de ya cuango de jín yá vehe sutū kujénu ga. Te Pedro chi jicá-ni ndíquín de ya.

<sup>55</sup> Te táca policía ni cascáyú de ñuhūn ini patio, te ni condúu de

yuñúhún un cáyūcú de. Te suni ni cucōo Pedro jíin de.

<sup>56</sup> Te ñn ñahan jéjníñu ini vehe un, ní jito ña nuū de jeē néne de yuñúhún. Te ni jito vāha ña nuū de, te ni cahān ña:

Tēe yāha suni ni jica de jíin tēe ún, áchí ña.

<sup>57</sup> Te máa de tu ní cáchi de, chi ni cahān de:

Tu jíin rī tēe ún, áchí de.

<sup>58</sup> Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jnáhan tāca tēe un cúu ró, áchí.

Te ni cahān Pedro:

Nasūu cúu rī, hombre, achí de.

<sup>59</sup> Te ni cuu nájnūhun ñn hora gā, te ni cahān ñhin inga de:

Jendaá ndije jeē tēe yāha ní jica de jíin tēe ún, chi suni tēe región Galilea cúu de, áchí de.

<sup>60</sup> Te ni cahān Pedro:

Hombre, tu jíin rī na jnūhun cáhán rō.

Te sá súcuan cáhán gā de, te ni cana-ni líhli.

<sup>61</sup> Yūcuán na te ni ndió cóto máa Jítoho yō, te ni jito ya nuū Pedro. Te ni nucūhun ni de jnūhun ni cahān yā jíin de: Nde ná tu cana líhli, te yūhu ró te cahān rō unī jínu jeē tu jíin rō ruhū.

<sup>62</sup> Te ni quenda de cuahān de, te yōhyo ni ndahyū de jeē ní cachi de jeē tu jíin de ya.

*Jeē ní casacatā de nuū yā*

*(Mt. 26.67-68; Mr. 14.65)*

<sup>63</sup> Te tāca tēe cándito Jesús, ni casacatā de nuū yā, te ni cacani de ya.

<sup>64</sup> Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñn cúu jeē ní cani róhó, áchí de.

<sup>65</sup> Te cuehē gā jnūhun súcuan ni cacahān neé de jíin yá.

*Jeē ní indichi Jesús nuū junta tēe cácujuhnu ga*

*(Mt. 26.59-66; Mr. 14.55-64; Jn. 18.19-24)*

<sup>66</sup> Te jeē ní cundijin, te ni candutútú táca tēe jéhnu cándacu jniñu nuū ñayuu hebreo, jíin sūtū cácujuhnu, jíin tēe cástéén tutu ley Yaā Dios. Te cuango

de jíin yá nuū junta tēe cácujuhnu ga, te yūcuan ní cacajnūhún de ya:

<sup>67</sup> Cachi, ¿á máa ró cúu Cristo jeē ní taji Yaā Dios? Achí de.

Te ni cahān yā jíin de:

Vēsú na cáhán rī jeē suu ri cúu, te ni ma candíje cuiti rō.

<sup>68</sup> Te suni núu cajnūhun máa rí rohó jíin náhan ró, te suni ma stió cuñí rō nuū rī, ni ma siaá rō ruhū.

<sup>69</sup> Te ruhū, Yaā ní nduu tēe, tāca quívi jeē quíji conene ri lado vāha máa Yaā iyó poder, achí yá.

<sup>70</sup> Yūcuán na te ndihi de ni cacajnūhún de ya:

¿A máa ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájnūhun cácahān rō, achí yá.

<sup>71</sup> Yūcuán na te ni cacahān de:

¿Na testigo gā jíin níñhún yó núu súcuan? Chi ni cajini sōho yó jíin yuhu máa de jeē cáhán ndevāha de jeē cúu de Sēhe Yaā Dios. Achí de jíin náhan de.

*Jeē ní indichi Jesús nuū Pilato*

*(Mt. 27.1-2, 11-14; Mr. 15.1-5; Jn. 18.28-38)*

## 23

<sup>1</sup> Yūcuán na te ni candocuiñi ndihi de, te cuango de jíin yá nuū Pilato.

<sup>2</sup> Te yūcuan ní caquejéé de cácahān de cuēchi siquī yā:

Ni canihīn na tēe yāha jéē stóna de ñayuu siquī tohō. Te cáhán de jeē tú vāha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhán de jeē maá de cúu Cristo, Rey jeē ní taji Yaā Dios. Achí de jíin náhan de.

<sup>3</sup> Yūcuán na te Pilato ni cajnūhún de ya:

¿A máa ró cúu Rey ñayuu hebreo?

Te ni cahān yā:

Suu ri cúu, nájnūhun cáhán rō, achí yá.

<sup>4</sup> Te ni cahān Pilato jíin sūtū cácujuhnu jíin ñayuu cuehē ún:

Tú ni ñn jnūhun stívi cáhán tēe yāha jéē nihín rī cuēchi siquī de, áchí de.

<sup>5</sup> Te máa de víhyá gā ni cacahān de:

Tēe yáha stónnda ndasí de ñayuu siquī tohō jín jnūhun stéén de ní Judea. Chi ni quejéé de stéén de nde Galilea, te vijna te nde yáha, áchí de.

### *Jeē ní indichi Jesús nuū Herodes*

<sup>6</sup> Te nuū ní jini sōho Pilato jeē Galilea cácahān, te ni cajnūhún de ñayuu núu tēe región Galilea cúu ya.

<sup>7</sup> Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jín yá nuū Herodes, tēe cúu gobernador Galilea. Chi quiṽi ún suni íne Herodes ñuu Jerusalén.

<sup>8</sup> Te nuū ní jito de nuū Jesús, te yōhyo ni cusī ni de, chi je ni cuu cuehē tiempo jeē cuní de coto de nuū yā. Chi ni níhín de jnūhun ya, te ñūhun ni de jeē sáha ya ñn jniñu jéhnú coto de.

<sup>9</sup> Te ni cajnūhún de ya cuehē jnūhun, te tu ní stío cuíñi yā ni ñn jnūhun nuū de.

<sup>10</sup> Te suni cáhīn táca sūtū cácujeñnu jín tēe cástéén tutu ley, te níhín ni cacahān de cuēchi siquī yā.

<sup>11</sup> Yūcuán na te Herodes jín táca soldado de ni cacahān neé de jín yá, te ni casacatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quíndeca de ya nuū Pilato.

<sup>12</sup> Te máá quiṽi un ní candumanī jnáhan Pilato jín Herodes, chi ichi yátá ni caquiṽi jnáhan ni de.

### *Jeē ní cundaā jeē cúu yā*

(Mt. 27.15-26; Mr. 15.6-15; Jn. 18.39-19.1)

<sup>13</sup> Yūcuán na te ni cana Pilato táca sūtū cácujeñnu jín táca tēe cándiso jniñu jín táca gá ñayuu, ni candutútú.

<sup>14</sup> Te ni cahān de:

Ni caquindeca ró tēe yáha núu rī, jeē cácahān rō jeē stónnda de ñayuu siquī tohō. Te je ni stichí rī de, ni cajito jínúu rō. Te tu ní níhín rī ni ñn cuēchi siquī de nájnūhun jeē cácahān rō.

<sup>15</sup> Te ni Herodes, tu ní níhín de, chi ni natají tucu de tēe yáha núu rī. Te tú cuiṽi ni ñn cuēchi ní sáha de jeē cúu de.

<sup>16</sup> Núu sūcuan te na cuáha ri castigo de, te siáá rī de quihín de, áchí Pilato.

<sup>17</sup> Te íyó costumbre jeē tācá vico pascua siaá Pilato ñn preso jeē cuní ñayuu.

<sup>18</sup> Te ñayuu cuehē ún, inuú-ni ni cacana jee i:

Na cúu tēe jíñá, te siáá ní Barrabás, achí i.

<sup>19</sup> Te Barrabás íne de vecāa siquī jeē ni stónnda de ñayuu siquī tohō ini ñuu ún, te ni jehni de ndīyi.

<sup>20</sup> Te Pilato cuní de siáá de Jesús, te ni cahān tucu de jín ñayuu.

<sup>21</sup> Te máá i víhyá gā ni cacana jee i:

Cata caa ní de jicā cruz, na cúu de, áchí i.

<sup>22</sup> Te ni cahān tucu de jín i vuelta unī:

¿Na cuēchi ni sáha de núu sūcuan? Tu ní níhín cuiṽi rī ni ñn cuēchi siquī de jeē cúu de. Núu sūcuan te na cuáha ri castigo de, te siáá rī de quihín de, áchí Pilato.

<sup>23</sup> Te víhyá gā ni cacana jee ñayuu un, ní cacahān níhín i jeē na cúu yā jicā cruz. Te máá i jín táca sūtū cácujeñnu, ni cacana jee ndasí i. Te ni cacundeyí i ni cascāhān i Pilato jeē na cúu yā.

<sup>24</sup> Yūcuán na te ni ndacu Pilato jniñu jeē na cóo nájnūhun cácuñi i.

<sup>25</sup> Te ni siaá de tēe jeē ní cajicān i, tēe jeē íne vecāa jeē ni stónnda de ñayuu siquī tohō te ni jehni de ndīyi. Te ni jēhe de jnūhun jeē na cúu Jesús nájnūhun cácuñi i.

### *Jeē ní cacata caa de ya jicā cruz*

(Mt. 27.32-44; Mr. 15.21-32;

Jn. 19.17-27)

<sup>26</sup> Te cuango tācá soldado jín yá jeē cahni de ya jicā cruz. Te ni canihín de ñn tēe ñuu Cirene, nání de Simón, vendiji de jeē ni jéhēn de rancho. Te ni catejníñu de tēe un jēe cóndiso de cruz yā quihín de yatā yā.

<sup>27</sup> Te cuehē ndasí ñayuu ndíquín i yatā yā cuango i. Te suni cuehē ñahan cuango ña, te cándahyū cohó ña jeē cácuñi yá ni ña jehē yā.

<sup>28</sup> Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chí sa suhva

ndahyū rō jehē maá ró jíin jéhē sēhe ró jíjnáhan i.

<sup>29</sup> Chi quee quivī jeē coo jnūndóho xeēn siquī rō, te cahān rō: Yōhyo ndetū tācá ñahan númá, jíin jēē tu ní scácu sēhe, jíin jēē tu ní cóndeca yiquín, chí tú sēhe ña jeē jnahuhū ni ña jeē ndóho i, achi rō jíjnáhan ró.

<sup>30</sup> Quivī ún te quejéē ñayuu cahān i jíin táca yucu: Cotúú siquī rī jíjnáhan rī nāvāha cuu rī. Te suni jíin táca loma: Casi siquī rī jíjnáhan rī, achi i.

<sup>31</sup> Chi núu casáha xeēn i jíin rúhū jeē tú na cuēchi rī, te nagā ni cuu jeē ma cóo xeēn siquī ndihī ñayuu chí íyó cuēchi i. Achí yá.

<sup>32</sup> Te suni cuangoo de jíin úū tēe ni casáha cuēchi xeēn, jeē suni cuu de jíin yá.

<sup>33</sup> Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ni cacata caa de ndindúú tée ni casáha cuēchi xeēn un núu uū gā cruz, ñin de lado váha ya, te inga de lado jecó yá.

<sup>34</sup> Te níní jēē súcuan cúu, te ni cahān Jesús:

Tátā, cone cáhnu ni ni núu de jíjnáhan de, chí tu cájini de na vé casáha de, achí yá.

Te soldado un ní casáha de sorteo jeē siquī ndese nihīn ñin ñin de sahma ya.

<sup>35</sup> Te cáhīn ñayuu yūcuan, cájito i nuū yā. Te suni nde tēe cándiso jniñu, cácahān catá de cájito de ya:

Núu inga ñayuu ni jnama de, te na jnáma de máá de vijna, te núu ndaā jeē Cristo jeē ní nacāji Yaā Dios cúu de, achí.

<sup>36</sup> Te tācá soldado suni ni casácatā de nuū yā, chí ni quecoo de nde nuū yā, te ni cajēhe de vinagre iyá coho ya.

<sup>37</sup> Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, achí de.

<sup>38</sup> Te suni ni íyo jnūhun jeē ndeé xinī cruz yā jeē cahán na siquī ni jíhī yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

<sup>39</sup> Te ñin jeē ndindúú tée ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnáma ró máá ró te suni jnama ró ndindúú rí, achí de.

<sup>40</sup> Te inga de ni cahān de nuū jnáhan de:

¿A tu yúhú ró Yaā Dios naún? Chi ñnuú cándoho yó jíin Yaā yáha.

<sup>41</sup> Te máá yó chí vetū-ni cándoho yó, chí yāha cánihīn yō castigo siquī jniñu neé ní casáha yó. Te Yaā yáha chí tú ni ñin cuēchi ní sáha ya, achí de.

<sup>42</sup> Te ni cahān de jíin yá:

Jesús, nucūhun ni ni sáña jēē quéjéé ní ndacu ní jniñu, achí de.

<sup>43</sup> Yūcuán na te ni cahān Jesús jíin de:

Jendaá cahán rī jíin ró jeē víjna te condee rō jíin rí nuū jardín andiví, achí yá.

### *Jeē ní jíhī Jesús*

(Mt. 27.45-56; Mr. 15.33-41; Jn. 19.28-30)

<sup>44</sup> Te nuū ní cuu nájñūhun cahuxī uū, te ni cunee ní cáhnu nde cahunī.

<sup>45</sup> Te ni cujñúú níándii. Te sahma ndíta caa jeē ndihyú cuarto íi ini templo cáhnu, ni ndatā-ni sava sava.

<sup>46</sup> Yūcuán na te ni cana jee Jesús:

Tátā, naquihin ní ánuá na, achí yá.

Te súcuan ni cahān yā, te ni jíhī-ni ya.

<sup>47</sup> Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhyo cújéhnu Yaā Dios, te achí de:

Jendaá ndije jeē tée tú na cuēchi cúu tēe yáha, achí de.

<sup>48</sup> Te ndivii ñayuu cáhīn yūcuan ní cajito i tāca jēē ní cuu, te cácani i yiqui jicā i jeē cájnahuhū ni i, te ni nandió cóo i cuanungoo i.

<sup>49</sup> Te tāca ñayuu cájini jnáhan jíin yá, jíin táca ñahan Galilea jeē ní cajica ña jíin yá, cáhīn jicā ña cájito ña tāca jēé ní cuu.

### *Jeē ní quindūji Jesús*

(Mt. 27.57-61; Mr. 15.42-47; Jn. 19.38-42)

50 Te ni Iyo ñn tēe vāha tēe ndaā, nání de José. Te tēe ñuu Arimatea ndañúu Judea cúu de. Te cúu de jnáhan tāca tēe hebreo cácujuhnu ga jeē casáha junta.

51 Te ñúhun ni de jeē quiji quivī jeē ndacu Yaā Dios jniñu, te suni tu ní núnjahan ni de jeē ní casándaā junta un jēe cúu Jesús.

52 Te tēe un ní jehēn de nuū Pilato, ni jicān de yiqui cúñu Jesús.

53 Te ni snúu de ya jicā cruz, te ni chusúcún de ya ñn sahma cuitá. Te ni chindūji de ya ini ñn yaū jeē ní caan jicā ñn cava, nuū ná tu quindūji ndīyi.

54 Te quivī un cúu quivī casátūhva ñayuu, chi jehíni un quéjéé quivī ndétátú.

55 Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya.

56 Te cuanungoo ña vehe ña, te ni casátūhva ña tācá perfume jíin aceite yucū jeēn asñ. Te ni candetátú ña quivī ndétátú, nájnūhun ndácu ley Yaā Dios jniñu.

*Jeē ní natecu Jesús*

*(Mt. 28.1-10; Mr. 16.1-8; Jn. 20.1-10)*

## 24

1 Te jenéhen ndasí quivī domingo, te ni jinūcoo tucu ñahan un núu ní yindūji Jesús, te cándahá ña tācá perfume jíin aceite ni casátūhva ña. Te suni cuangoo sava ga ñahan jíin ña.

2 Te nuū ni jínūcoo ña, te ni cajito ña jeē ní cujiyo yuū ndihyú yuyáú ndīyi.

3 Te ni quivīcoo ña yaū ún, te tuá yiqui cúñu Jitoho yō Jesús ni cájito ña.

4 Te ni cacunéé ni ña cájito ña jeē tuá ndīyi. Sáa te ni cajito ña uū ndajéhé Yaā Dios jeē cáa nájnūhun tēe, cáhīn ya xiin ña, te cáñūhun ya sahma ndíndéé.

5 Te yōhyo ni cayūhú ña, te ni cajexin ña nuū ña nde nuū ñúhun. Te ni cacahān ndajéhé un jíin ña:

¿Naun sa nuū cáyindūji ndīyi cáanducú ró Yaā técu?

6 Tuá yā yāhá, chi je ni natecu yā. Te nucūhun ni rō ndese ni cahān yā jíin ró ná íne ga yā región Galilea.

7 Chi ni cachi ya jeē maá yá, Yaā ní nduu tēe, cánuú natūu ya nuū tāca tēe cáhīyo cuēchi, jeē jñ de ya cahni de ya jicā cruz, te nuū uní quivī te natecu yā. Achí ndajéhé un.

8 Yūcuán na te ni canucūhun ni ña tāca jnúhun ni cahān Jesús.

9 Te ni quendacoo ña nuū ní yindūji ya, te cuanungoo ña. Te ni canacani ña tāca jnúhun yáha núu ndihúxi ñn apóstol jíin núu tāca gá de.

10 Te ñahan ní canacani jnúhun yáha núu tēe cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña.

11 Te tācá apóstol chi cájeni ni de jeē jnúhun cánéé cáñúú cácahān ña, te tu ní cá candíje de.

12 Te vēsú súcuan, te Pedro ni quenda de, te jínu de cuacondéhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu máá na. Te cuanuhun de vehe de, te nahán náa ni de jeē ní jito de jeē tuá yā.

*Jeē ní ndajnūhun yá jíin úu de ichi cuáhán Emaús*

*(Mr. 16.12-13)*

13 Te suu quivī un cuángoo uū jnáhan de ñn ñuu naní Emaús, jeē jicá nájnūhun uxī ñn kilómetro jíin ñuu Jerusalén.

14 Te cándajnūhún de siquī tācá jniñu jeē ní cuu ún.

15 Te níní cándajnūhún de te cácajnūhun jnáhan de, te máá Jesús ni cuyajni ya yatā de, te jica ya cuahān yā jíin de.

16 Te ni sáha jíin de jeē tu ní cánacuni de ya, vēsú cájito de nuū yā.

17 Te ni cajnūhun yá de:

¿Na jnūhun cándajnūhun ró cájica ró? ¿Te najehē cácuuíhyá ni rō? Achí yá.

18 Te ñn de jeē naní Cleofas ni cahān de jíin yá:

Ndihí cuiti ñayuu cájini i tācá jniñu ní cuu ini ñuu Jerusalén tāca quivī yáha. ¿Te á máñúhún-ni níhín cúu jeē ní quee ní ñuu un jēe tu jíiní ni na vé ni cuu? Achí de.

19 Te ni cajnūhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jnūhun Yaā Dios. Te jíin poder Yaā Dios ni sáha ya tācá jniñu jéhnú te ni nacani ya jnūhun, jíto jíinú Yaā Dios jíin táca ñáyu.

<sup>20</sup> Te sutū cácujuhnu jíin téé cándiso jniñu nuū ná, ni canastúu de ya nuū tāca téé Roma, te téé un ní casándaā de jeē cúu yā jicā cruz.

<sup>21</sup> Te máá ná ní cañūhun ni na jéé maá yá jnama ya nación na Israel nuū ñáyu Roma nuú. Te siquī tācá jniñu yáha, te ni cane inga jnūhun. Chi vijna je íyó úní quivī jeē ní cuu ún.

<sup>22</sup> Te sava ñahan cájini jnáhan ná jíin, ni canacani ña ñn jnūhun jeē yóhoyo cánaa ni na sáha, chi cacahān ña jeē ní natecu yā. Chi jenéhen ndasí ní jengoo ña yaū ndīyí ún.

<sup>23</sup> Te tuá ni cájito ña yiqui cúñu yā. Te ni ndecoo ña nuū na jíinánhan ná, te cacahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús.

<sup>24</sup> Te ni jengoo sava jnáhan ná ndé yaū ndīyí ún, te ni cajito de jeē súcuan íyó, nájnūhun ni cacahān ñahan ún, te tu ní cájito cuiti de nuū yā.

<sup>25</sup> Yūcuán na te ni cahān maá yá jíin de:

Téé tu cájecūhun cuiti ni cácuu ró. Yóhoyo uhū cácandije ró táca jnūhun Cristo ni cacahān téé ni canacani jnūhun Yaā Dios nde jenahán.

<sup>26</sup> ¿Te á tu súcuan ní jíini ñúhún ndoho Cristo táca jnúndóho yáha, te sáá te quinhun yā nuū lúu cujéhnú ya? Achí yá.

<sup>27</sup> Te ni nacani cájy yá táca jnúhun jeē yosó núu tútu íi jeē cahán siquī maá yá. Te ni quejéé yá jíin jnúhun ni tee Moisés, te ni cahān gā yā táca jnúhun jeē ní cateé téé ni canacani jnūhun ya nde jenahán.

<sup>28</sup> Te nuū ni jíinūcoo de ñuu nuū cuángoo de ún, te Jesús ni sáha ya jeē cáca ga yā quihīn yā.

<sup>29</sup> Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, áchí de.

Yūcuán na te ni quivī ya jeē quéndōo ya jíin de.

<sup>30</sup> Te nuū ní cucōo ya mesa jeē cáji yā jíin de jíinánhan de, te ni quihin ya staā, te ni jicān tahu yā, te ni tahu cuéché yá, te ni jéhe ya nuū de.

<sup>31</sup> Te jeē sáha ya súcuan, te nájnūhun ni cananune tinūú de, te ni canacuni de ya. Te ni ndoñúhún-ni ya nuū de cuahān yā.

<sup>32</sup> Te ni cacahān maá de:

Jendaá jeē yóhoyo ni cacusī ni yō ná ni nacani ya jnūhun nuū yō ichi ún te ni castūhun cájy yá jnūhun cáhán tutu íi. Achí de.

<sup>33</sup> Yūcuán na te yachī ni canaquihin de ichi, ni canandicó de cuanungoo de ñuu Jerusalén. Te ni canajnáhan de jíin ndihúxí ñn ga apóstol, cáyūcu tútu de jíin sava ga jnáhan de.

<sup>34</sup> Te ni cacahān téé cáyūcu tútu un:

Jendaá ndije jeē ní natecu maá Jítoho yō, te ni nane ndijin yā nuū Simón, achí de jíinánhan de.

<sup>35</sup> Yūcuán na te ndindúú téé un ní canacani de jnūhun ndese ni najnáhan ya jíin de ichi, jíin ndese ni canacuni de ya ná ni tahu cuéché yá staā.

*Jeē ní nane ya nuū téé cáscuáha jíin yá*

*(Mt. 28.16-20; Mr. 16.14-18; Jn. 20.19-23)*

<sup>36</sup> Te sá cacahān gā de táca jnúhun yáha, te ni jecuiñī-ni Jesús mēhñú de jíinánhan de. Te ni cahān yā jíin de:

Ndeyí sñ coo ni rō jijnánhan ró, áchí yá.

<sup>37</sup> Te ni candacoto íyo de, ni cayūhú ndasí de, chi ni cajeni ni de jeē ñn ánuá cúu ya.

<sup>38</sup> Te ni cahān yā jíin de:

¿Naun cáyūhu ró, te naun cájeni siquí ni rō súcuan?

<sup>39</sup> Condéhé ndaha ri jíin jéhé rī, te cuni rō jeē maá rí cúu. Jñi ruhū te cuni rō, chi ñn ánuá tu névāha cūñu ni yiqui nájnūhun cájito ró jéé névāha máá rí, achí yá.

40 Te jeē ni cáhān yā súcuan, te ni steén yā ndaha ya jehē yā nuū ni yñi ndūyu cāa.

41 Te yōhyo ni cacusī ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? achí yá.

42 Yūcuán na te ni cajēhe de ñn pedazo chācá ní tau nuū yā, jíin ñn pedazo ñahmā ndūxi yocō.

43 Te ni quihin ya, te ni yeji yā nuū de jíjnáhan de.

44 Te ni cahān yā jíin de:

Tāca jēe ní cuu jíin rí cúu jeē ni cáhān rī ná ni ine rí jíin ró jíjnáhan ró ndé saá, jeē cánuú squícu tāca jnūhun rí jeē yosó núu tútu ley Moisés, jíin núu tācá tutu tēe ni canacani jnūhun Yaā Dios, jíin núu tútu salmo, achí yá.

45 Te ni nune ya jeē níjnūnī de, návāha cuu jecūhun ni de tāca jēe cahán tutu īi.

46 Te ni cahān yā:

Súcuan cáhān nuū tútu jeē ruhū Cristo, cánuú cuu rī, te nuū uní quivī natecu rī.

47 Te cuitē núu jnūhun rí jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuitē núu jnūhun yáha, te quihīn nuū ñáyuu tācá nación.

48 Te máá ró cácuu tēe nacani jnūhun tācá jniñu ní cajito ró.

49 Te tají rí Espíritu Santo quiji ya nuū rō jíjnáhan ró, nájnūhun ni je-jnūhun Tátá rī. Te na quéndōo ró ñuu Jerusalén condetu ró ndé nihīn rō poder Espíritu Santo jeē quíji nde andiví. Achí yá.

*Jeē ní ndaa ya cuanuhun yā andiví  
(Mr. 16.19-20)*

50 Yūcuán na te ni quenda ya ñuu Jerusalén, cuahān yā nde ñuu Betania jíin de jíjnáhan de. Te ni ndonehen ya ndindúú ndaha ya, te ni jicān tahu yā jehē de.

51 Te níiní jicān tahu yā jehē de, te ni cujiyo-ni ya nuū de, ni ndaa ya cuanuhun yā andiví.

52 Te máá de ni cachiñúhún de ya. Te saá te cuanungoo de ñuu Jerusalén, te yōhyo cácusī ni de.

53 Te níiní cáhīn de ini templo cáhnu, cánacuatáhú de nuū Yaā Dios. Te ni cuu. Amén.



## JNUHUN VAHA NI TEE SAN JUAN

*Yaā naní Jnúhun Yaā Dios ni nduu ya tēe*

<sup>1</sup> Nde xihna ñúhún ná ni jecōo ndihi jeē iyó, te je iyó Yaā naní Jnúhun Yaā Dios, chi steén yā ndihi jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya.

<sup>2</sup> Máá yá ndeé yá nde jeē xihna ñúhún jíin Yaā Dios.

<sup>3</sup> Te ni sáha Yaā Dios jeē jíin máá yá ni jecōo ndihi tāca jéé iyó. Te ma jécōo ni ñin jeē iyó núu tu ní sáha máá yá.

<sup>4</sup> Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ni i síquī Yaā Dios.

<sup>5</sup> Te Yaā cúu luz ún ndíndēe núu ñayuu tu cájica ndaā, jeē nájnuhun cáhiyo i nuū néē. Te ñayuu cáhiyo nuū néē tu cúu ndahva i luz yā.

<sup>6</sup> Te ni iyo ñin tēe jeē ní tají Yaā Dios, naní de Juan.

<sup>7</sup> Tēe un ní quiji de jeē nácani cájī de jnúhun máá Yaā cúu luz, návaha candíje tāca ñayuu jeē jíin jnúhun cáhán de.

<sup>8</sup> Nasūu máá Juan cúu luz ún, chi cúu de ñin jeē ní nacani cájī jnúhun máá luz un.

<sup>9</sup> Te máá Yaā cúu luz ndije jeē steén ini anuá tāca ñayuu, nde saá ní quiji ya ini ñayíví.

<sup>10</sup> Te Yaā cúu Jnúhun Yaā Dios ni condee yā ini ñayíví, te vésú jeē jíin máá yá ni sáha Yaā Dios ñayíví, te ñayuu ñayíví tu ní cácuni i cuatáhú i jeē máá yá cúu.

<sup>11</sup> Ni quiji ya nuū ñayuu maá yá nación hebreo, te ñayuu ún tu ní cájetáhú i ya.

<sup>12</sup> Te vésú súcuan te sava ñayuu chi ni cajetáhú i ya, te ni cacandíje i jeē sáha ya jehē i. Te nuū maá i ni jēhe ya jnúhun jeē ndúu i sēhe Yaā Dios.

<sup>13</sup> Te jeē ndúu i sēhe Yaā Dios, nasūu jíin modo jeē cácacu ñayuu ini ñayíví, ni nasūu síquī jeē cácuni tēe, chi máá Yaā Dios sáha ya jeē ndúu i sēhe ya.

<sup>14</sup> Te máá Yaā cúu Jnúhun Yaā Dios ni nduu ya tēe, te ni condee yā jíin yó. Te ni cajito yó jéé yóhyo luu cújéhu ya, chi máñúhún-ni ya cúu Sēhe Tátá yā, Yaā cújéhu súcuan. Te máni máá jéé sáha ya jeē váha yóhó, te máni máá jnúhun ndaā cahán yā.

<sup>15</sup> Te Juan ni nacani de jnúhun ya, te ni cahán de:

Yaā yáha cúu jeē ni cáhán rī náa áchí rí jeē Yaā quiji chi cújéhu ga yā vésú ruhū, chi je iyó yá nde ná tu cacu ri, achí de.

<sup>16</sup> Te ndihi yó ní canihín yō cuehē ndasí jeē váha iyó núu yā, chí máni jeē váha sáha sáha ya jíin yó.

<sup>17</sup> Moisés ni steén de ley Yaā Dios nuū ñayuu jenahán, te Jesucristo chí sáha ya jeē váha yóhó te steén yā tāca jnúhun ndaā Yaā Dios nuū yō.

<sup>18</sup> Tú ni ñin ñayuu ni jíto cuítī nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ni steén nuū yō ndese Yaā cúu Yaā Dios.

*Jnúhun Jesús jeē ni cáhán Juan tēe scuándute*

*(Mt. 3.11-12; Mr. 1.7-8; Lc. 3.15-17)*

<sup>19</sup> Te ñayuu hebreo ñuu Jerusalén, ni catajī i jecu sutū jíin tēe grupo levita jeē cájeñíñu ini templo, ni jengoo de nuū Juan, návaha cajnúhún de ndé ñin cúu Juan te na jniñu ndíso de.

<sup>20</sup> Te Juan cájī ní cachi de:

Nasūu rúhū cúu Cristo, achí de.

<sup>21</sup> Te ni cacajnúhún tucu de:

Núu súcuan ¿te ndé ñin cúu ró? ¿A cúu ró Elías, tēe ni nacani jnúhun Yaā Dios nde jenahán, chí naún?

Te ni cahán Juan:

Nasūu de cúu ri.

Te ni cacajnúhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ñi jeé quíji?

Tuú, achí tucu Juan.

<sup>22</sup> Te ni cacahán tucu jíin de:

¿Te ndé ñin cúu ró núu súcuan? Cachi nuū rī jijnáhan ri, chí jíni ñúhún

castūhun rí nuū tāca tée ni catajǎ ruhū vējicoo ri. Cachi na jniñu ndíso ró víi.

<sup>23</sup> Te ni cahān Juan:

Máá rí cúu tēe jeē ni cáhān Isaías, tēe ni nacani jnūhun Yaā Dios nde jenahán, jeē quíji ri cana jee ri nde nuū ñūhun téhé. Te cáhān rí jín ñáyuu jeē na sātūhva i máá i, chi quiji máá Jítóho yō. Achí Juan.

<sup>24</sup> Te tēe grupo fariseo cácuu jeē ní catajǎ tée ni quijicoo ún.

<sup>25</sup> Te ni cacajñūhún de Juan:

Núu súcuan ¿te naun scuándute ró te núu nasūu Cristo ni Elías ni máá tée quiji nacani jnūhun Yaā Dios cúu ró?

<sup>26</sup> Te ni cahān Juan:

Ruhū chi jín ndute scuándute ri. Te mēñu ró jijnáhan ró íne ñn Yaā jeē tu cájini rō.

<sup>27</sup> Te Yaā un cúu jeē ni cáhān rí jeē quíji ya te cújēhnu ga yā vēsú ruhū. Chi tú na vé jēhnu cuiti cúu ri nuū yā, ni jeē cuajñíñu ri nuū yā vēsú ñn jniñu lúli gá nájñūhun jeē ndajǎ rí correa ndijēn yā. Achí de.

<sup>28</sup> Súcuan ni cuu jeē ní candajñūhún de jín Juan nde Betábara jeē íne ichi núu cáne niāndii yūte Jordán, nuū scuándute Juan.

### *Siquē jeē cúu ya Londe Yaā Dios*

<sup>29</sup> Te inga quiví un ní jito Juan nuū Jesús jeē véji ya nuū de. Te ni cahān de jín ñáyuu:

Condēhe jijnáhan ró, chi yāha véji Yaā cúu Londe jeē ní tajǎ Yaā Dios, te cuu yā jeē sándoo ya cuēchi ñayuu ñayiví.

<sup>30</sup> Yaā yāha cúu jeē ni cáhān rí jeē quíji ñn Yaā cujēhnu ndasí, chi je íyó yá nde ná tu cacu ri.

<sup>31</sup> Te nde saá te tu ní jín rí jeē yāha cúu Yaā ní tajǎ Yaā Dios. Te ni quiji ri jeē scuándute ri ñayuu ñuu yō Israel jín ndute, návāha stéén rí nuū i jeē suu ya cúu, áchí Juan.

<sup>32</sup> Te suni ni cahān gā de jnūhun ya:

Ni jito ri Espíritu Santo, ni cuun ya ichi ándiví, cáa ya nájñūhun paloma, te ni quee ya xiní Jesús.

<sup>33</sup> Te nde saá te ná tu cuni rí jeē Jesús cúu. Te máá Yaā Dios jeē ní tajǎ

yá ruhū jeē scuándute ri jín ndute, ni cahān yā jín rí: Núu ni jito ró jēe cúun Espíritu Santo te quendōo xiní ñn tēe, yūcuan cúu Yaā jeē cuáha Espíritu Santo condee ini anuá ñayuu, achí Yaā Dios.

<sup>34</sup> Te je ni jito ri ún, te nacani cájǎ rí jnūhun jeē maá yá cúu Sēhe Yaā Dios. Achí Juan.

### *Uū tēe jeē ní cana ya xīhna gā*

<sup>35</sup> Te inga quiví ún te Juan íne tucu de yūcuan jín úu tēe cájica jín de.

<sup>36</sup> Te ni jito de nuū Jesús jeē jica ya yūcuán. Te ni cahān de:

Condēhe jijnáhan ró, chi yūcuan cúu Yaā cúu Londe jeē ní tajǎ Yaā Dios.

<sup>37</sup> Te ndíndúú tée cájica jín Juan ni cajini sōho de jnūhun yāha, te ni candiquín de Jesús.

<sup>38</sup> Te ni ndió cóto Jesús, te ni jito ya jeē cándiquín de yatā yā. Te ni cahān yā jín de:

¿Na vé cánanducú ró?

Te ni cacahān de jín yá:

Maestro, ¿ndé nuū ndeé ní?

<sup>39</sup> Te ni cahān yā jín de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jín yá quiví ún, chi nájñūhun cacuún jehíni cúu.

<sup>40</sup> Te Andrés, ñani Simón Pedro, cúu ñn jeē ndíndúú tée un jēe ní cajini sōho jnūhun ni cahān Juan, te ni candiquín Jesús.

<sup>41</sup> Te Andrés, yachí ni jenanducú de ñani de Simón, te ni cahān de jín:

Ni caquijnáhan ri jín Mesías, achí de. Te jnūhun un cúní cahān Cristo, Yaā ní tajǎ Yaā Dios.

<sup>42</sup> Yūcuán na te cuanuhun de nuū Jesús jín Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jnūhun un cúní cahān Pedro, jeē cuní cahān yuū.

### *Jeē ní cana ya Felipe jín Natanael*

<sup>43</sup> Te inga quiví un cúní Jesús quihñ yā región Galilea. Te ni nihñ jnāhan ya jín Felipe, te ni cahān yā jín de:

Condiqūn ruhū na quíhín yō.

<sup>44</sup> Te Felipe cúu tēe ñuu Betsaida, jeē cúu ñuu Andrés jíin Pedro.

<sup>45</sup> Te ni jenanducú de Natanael, te ni cahān de jíin:

Ni canihīn jnāhan ri jíin Yaā jeē yosó jnúhun ya nuū tútu ley jeē ní tee Moisés, jíin núū tútu ni catee tēe ni canacani jnúhun Yaā Dios nde jenahán. Te Jesús sēhe José ñuu Nazaret cúu ya. Achí de.

<sup>46</sup> Te ni cahān Natanael jíin de:

¿Te ndese cúu cujéhnū ñn tēe jeē ní cacu ñuu ndahú Nazaret?

Te ni cahān Felipe:

Quíhín yō de cuni rō, achí de.

<sup>47</sup> Te ni jito Jesús jeē véji Natanael, te ni cahān yā:

Yāha véji ñn tēe ndaā jeē cúu ndije yucūn Israel, chí tu stáhú cuīti de, achí yá.

<sup>48</sup> Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jéhē nundéhe higo, achí yá.

<sup>49</sup> Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

<sup>50</sup> Te ni cahān Jesús:

¿A máá jéē ni cahān rī jeē ní jito ri rohó ná íne ró jéhē nundéhe higo, te jeē yūcuan cándíje ró rúhū naún? Tuú chí coo jniñu jéhnū ga coto ró vésú jeē yāha, achí yá jíin de.

<sup>51</sup> Te ni cahān gā yā:

Jendaá cahán rī jíin ró jijnáhan ró jéē nde vijna te coto ró jéē núne andiví, te tācá ndajéhe Yaā Dios cándaa cánuu nuū ruhū, Yaā ní nduu tēe, achí yá.

*Jeē ni jéhēn yā ñn vico nándāha ñuu Caná*

## 2

<sup>1</sup> Te ni yāha unī quivī, te ni iyo ñn vico nándāha ñuu Caná ndañūū Galilea. Te yūcuan íne náná Jesús.

<sup>2</sup> Te suni ni cacana i Jesús jíin tēe cáscuáha jíin yá, ni jéhēn yā vico un jíin de.

<sup>3</sup> Te ni ndoco vino. Te náná Jesús ni cahān ña jíin yá:

Ni ndoco vino i, achí ña.

<sup>4</sup> Te ni cahān Jesús jíin ña:

¿Naun cáhán ni súcuan jíin ná náná? Chí ná tu quee quivī jeē sáha ná jniñu jéhnū, achí yá.

<sup>5</sup> Te náná yā chí ni cahān ña jíin ñáyuu cájeni cohō:

Sáha ró jijnáhan ró táca jéē cahān yā jíin ró. Achí ña.

<sup>6</sup> Te yūcuan íyó íñū tenéja yuū jeē ñúhun ndute cájichi ñayuu hebreo jeē ndúndoo i nuū Yaā Dios. Te ñn ñn tenéja un cánda cuhun cuūn xico chí ciento litro ndute.

<sup>7</sup> Te ni cahān Jesús jíin ñáyuu cájeni cohō:

Scútú ndñ rō tācá tenéja yáha.

Te ni cascútú ndñ i.

<sup>8</sup> Te ni cahān yā jíin i:

Vijna te quēen ró jecu te quindecá ró coto ndee tēe ndíto vico, achí yá.

Te ni cajendeca i nuū de.

<sup>9</sup> Te ni séyūhú de ndute jeē ní nduu vino, te tu jíiní de ndé ní canihīn i. Chí máni mozo un cúu jeē cájini, chí máá i ni caquēen ndute ún. Yūcuán na te tēe ndíto vico ni cana de tēe nándāha.

<sup>10</sup> Te ni cahān de jíin:

Tāca ñáyuu chí xīhna gā vino váha cájēhe i, te núu je ni cajihī vāha ñayuu cáhīn vico, yūcuán na te jéhe de vino ndahú na. Te máá ró tucu ni sáha ró, chí nde jeē sándihí te jéhe ró vino jeē yóhoyo vāha ga jíhi, achí de.

<sup>11</sup> Jniñu yāha jéē ni sáha Jesús ini ñuu Caná ndañūū Galilea cúu jniñu jéhnū xīhna ñúhún jéē ni sáha ya jeē steén yā poder yā. Te súcuan ni steén yā jeē yóhoyo cújéhnū ya. Te tēe cáscuáha jíin yá ni cacandíje de ya.

<sup>12</sup> Te ná ni yāha jniñu yāha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yá yūcuán jecu quivī.

*Jeē ní quenehen ya ñayuu ini templo (Mt. 21.12-13; Mr. 11.15-18; Lc. 19.45-46)*

13 Te jeē cuácuyajni vico pascua casáha jnáhan ñuu yā hebreo, te cuahān yā ñuu Jerusalén.

14 Te ini templo cáhnu ni jito ya ñayuu cáxícó stiquī jín lanchi jín paloma, jín ñayuu castáyi xūhun, cáyūcú i nuū mesa i.

15 Te jeē súcuan ni jito ya, te ni sáha ya ñin cuarta ñi. Te ni scúnu ya taca i ini templo, nde jín lanchi jín stiquī i. Te ni jete yā xūhun ñayuu castáyi. Te ni scotúú yā taca mesa i.

16 Te ni cahān yā jín ñayuu cáxícó paloma:

Tava taca quiti yáha. Te ma sáha ró yáhu ini vehe Tátá rī. Achí yá.

17 Yūcuán na te tēe cáscuáha jín yá, ni canucūhun ni de jnūhun yósó núu tútu i: Je yajni cuu na jéé yóhyo ndíhvī ni na síquī vehe ní, achí yá jín Tátá yā, achí tutu.

18 Te tēe ñuu yā hebreo ni caca-jnūhún de ya:

¿Na jniñu jéhu sáha ró jéé steén rō poder rō, te cucáhnu ni rī jeé ndíso jniñu ró sáha ró súcuan? achí de jín yá.

19 Te ni cahān yatá Jesús:

Canu rō templo yáha, te nuū uní quivī te nucondichi sáha rī, achí yá.

20 Yūcuán na te ni cacahān tēe hebreo un:

Uū xico iñu cuiyā te ni jīnu ni cuvāha templo yáha. Te róhó, ¿á núu uní-ni quivī te nucondichi sáha ró naún? Achí de.

21 Te templo jeē cahán Jesús cúu máa yiqui cúñu yā, chi cahni ñayuu yā te natecu yā nuū uní quivī.

22 Jeē yúcuan cúu jeé ná ni natecu yā jeé ni jīhī yā, te tēe cáscuáha jín yá ni canucūhun ni de jeé ni cahān yā jnūhun yáha. Te ni cacandíje de jnūhun jeé yósó núu tútu i, jín jnūhun yáha jeé ni cahān Jesús.

*Jeé jini Jesús ndese cáa ini anuá ñayuu*

23 Te ná íne Jesús ñuu Jerusalén máa vico pascua, te cuehē ñayuu ni cacandíje i jeé cúu ya Cristo, chi ni cajito i taca jniñu jéhu sáha ya jeé steén yā poder yā.

24 Te máa Jesús chi tu ní jétáhú yá i, chi je jíní yā ndese cáa ini anuá i jínáhan i.

25 Te tu jíní ñúhún yá jeé cáchi ni ñin ñayuu nuū yā ndese íyó taca ñayuu, chi máa yá je jíní yā ndese cáa ini anuá i.

*Jeé ní candajnūhún Jesús jín Nicodemo*

### 3

1 Te ni Iyo ñin tēe grupo fariseo, naní de Nicodemo, te cújéhu de nuū ñayuu ñuu de hebreo.

2 Tēe yáha ní quiji de nuū Jesús ñin jecuáa, te ni cahān de jín yá:

Maestro, je cájini na jéé maá Yaā Dios ni tají yá nihín jéé steén ni jnūhun ya nuū na jínáhan ná. Chi núu tu íyó Yaā Dios jín ní, te ma cúu sáha ní ni ñin jniñu jéhu nájñūhun sáha máa ní jeé steén ni poder ní, achí de.

3 Te ni cahān Jesús:

Jendaá cahán rī jín ró jeé núu tu nacacu jeé ñin ñayuu, te ma cúu quivī i ndaha Yaā Dios jeé ndacu ya jniñu nuū i, achí yá jín de.

4 Te ni cahān Nicodemo jín yá:

¿Te ndese cuu nacacu ñin tēe te núu je ni jéhu de? ¿A cuu nucūhun tucu de chíji náná de te nacacu tucu de? achí de.

5 Te ni cahān Jesús:

Jendaá cahán rī jín ró jeé núu tu nacacu ñin ñayuu, te ma cúu quivī i ndaha Yaā Dios jeé ndacu ya jniñu nuū i. Te jeé nácacu i cúu jeé ndúndoo cuēchi i nájñūhun jín ndute, te condee Espíritu Santo ini anuá i.

6 Jeé cácu sáha ñayuu, chi sēhe ñayuu cúu. Te jeé cácu sáha Espíritu yā, chi sēhe ya cúu.

7 Ma náa ni rō cañi ni rō ndese cúu jnūhun ni cahān rī jín ró jeé cánuú jéé nacacu jeé ró jijnáhan ró.

8 Te tachí chi quée cuahān ndé-ni cúu nuū cuní maá, te jini sōho ró jéé cáyu, te tu jíní rō ndé nuū véji ni ndé nuū quihín. Te suni súcuan cúu taca ñayuu jeé nácacu sáha Espíritu, chi tu jíní rō ndese sáha ya jniñu ún, achí yá.

9 Te ni cahān tucu Nicodemo:

¿Ndese ga cúu núu súcuan?

10 Te ni cahān Jesús:

Máá ró cúu ñn maestro jeē cujéhu nuū ñayuu ñuu yō Israel, te ¿á tu jécūhun ni rō jñūhun yáha naún?

11 Jendaá cahān rī jín ró jeē jñūhun cájecūhun ni rī cúu jeē cácahān rī jín ró. Te cánacani cájí rí jñūhun jniñu ní cajito rí. Te tu cácañdíje ró jñūhun cácahān rī.

12 Chi ni cahān rī jñūhun ndese sáha Yaā Dios ini ñayiví, te tu cácañdíje ró. Núu súcuan ¿te ndese candíje ró núu cahān rī jñūhun tācá ndese sáha ya nde andiví?

13 'Chi ni ñn tu ní cáa andiví jeē cúni ndese íyó yúcuan, chi mañúhún-ni ruhū, Yaā ní nduu tēe. Chi andiví ndéé rí, te ni cuun ri vēji rí.

14 Te nájnūhun ni cata caa Moisés ñn coō cāa nuū ñn yujnu, ná ni cajica ñayuu nuū ñūhun téhé, suni súcuan máá rí, Yaā ní nduu tēe, cánuú jéē cóndita caa ri jicā cruz.

15 Te súcuan cánuú návāha tāca ñayuu jeē candíje i jeē jnáma rí i, ma jnahnú ndetū i, chi sa suhva cotecu i ní cáni andiví.

*Yōhyo ni cundáhu ni yā ñayuu ñayiví*

16 'Chi Yaā Dios yōhyo ni cundáhu ni yā ñayuu ñayiví. Jeē yúcuan ní tají yá Séhe ya ni quiji, vēsú mañúhún-ni ya iyó, návāha tāca ñayuu jeē candíje i jeē jnáma ya i, ma jnahnú ndetū, chi sa suhva cotecu i ní cáni andiví.

17 Chi tu ní tají Yaā Dios Séhe ya ini ñayiví jéē snahnú ndetū yā ñayuu, chi sa suhva jeē jnáma ya ñayuu.

18 'Ñayuu jeē candíje i jeē jnáma ya i, ma jnahnú ndetū i. Te ñayuu tu cándíje, je ni jnahnú ndetū i, chi tu ní cándíje i máá Séhe Yaā Dios, te máá ñn-ni ya iyó.

19 Máá Yaā jeē stíndéé ini anuá ñayuu, je ni quee ya ini ñayiví. Te cánujnahān gā ni ñayuu caca i nájnūhun nuū néé vēsú nuū luz yā, chi jniñu cásáha i cúu jniñu néé. Jeē yúcuan cúu jeē jnahnú ndetū ñayuu tu cácañdíje ún.

20 Chi tāca ñayuu casáha jniñu néé, tu nújnahan cuiñi ni i luz yā. Te tu jéhe

i jñūhun jeē stíndéé yá ini anuá i, chi tu cúni i jeē natūu jniñu néé cásáha i.

21 Te ñayuu jeē cájica jín jniñu ndaā, jéhe i jñūhun jeē stíndéé yá ini anuá i, návāha natūu ndijin jeē tācá jniñu cásáha i cúu jniñu cúni Yaā Dios. Achí yá jín de.

*Jeē ni cáhān tucu Juan jñūhun Jesús*

22 Yūcuán na te Jesús jín téē cáscuáha jín yá, cuahān yā región Judea. Te ni condee yā yūcuán jecu tiempo jín de, te cáscuándute de ñayuu.

23 Te suni scuándute Juan, íne de lugar jeē naní Enón yajni ñuu Salim, chi yúcuan íyó cuéhē ndute. Te ni quijicoo ñayuu nuū de, te ni scuándute de i.

24 Súcuan ni sáha Juan nde ná tu quiví de vecāa.

25 Yūcuán na te sava tēē cáscuáha jín Juan yōhyo ni cacahān de jín sava jnáhan de hebreo siquí núu ndé ñn cúu modo vāha ga jeē cúchi ñayuu ndundoo i nuū Yaā Dios.

26 Te ni quecoo de nuū Juan, te ni cacahān de:

Maestro, tēe ní ine jín ní yūte Jordán ichi núu cáne niāndii, jeē ní nacani ní jñūhun de nuū ná, vijna te scuándute máá de, te ndivii ñayuu cuango i nuū de.

27 Te ni cahān Juan:

Ni ñn tēe ma cúu sáha de jniñu Yaā Dios te núu ma tejníñu ya de.

28 Máá ró jijnáhan ró chi ni cajini sōho ró jéē ni cáhān cají rí jeē násūu máá rí cúu Cristo, chi cúu rí ñn jeē ní tají Yaā Dios jeē cósnúu nacani jñūhun jeē quíji ya.

29 Te núu cásáha vico quíjnáhan, te máá yñi cúu jeē ndéca ñasihí. Te amigo yñi un íne jín de, te jini sōho jñūhun cáhān de. Te yōhyo cúsiñi ni jini sōho jñūhun cáhān yñi ún. Te suni súcuan ruhū, chi cúu rí nájnūhun amigo yñi, chi ni quee maá Cristo, te yōhyo cúsiñi ni rí jini sōho rí jñūhun cáhān yā.

30 Te jini ñúhún jéē ndujéhu ga maá yá te ndululí gá maá rí, achí Juan.

*Jeē ní quiji ya nde nuū sucún*

<sup>31</sup> Te Yaā jeē véji nde andiví, cújéhnū ya nuū ndíhi. Chi tāca jéē ní cacu ini ñayīvi yáha, sēhe ñayīvi cúu, te máni jnūhun ñayīvi cáhán. Te Yaā jeē véji ichi ándiví, chi cújéhnū ya nuū ndíhi ñayuu.

<sup>32</sup> Te nácani ya jnūhun jeē ní jito ya jíin jéē ní jini sōho ya. Te ñayuu chi tu cácan díje i jnūhun cáhán yā.

<sup>33</sup> Te núu ñn ñayuu candíje i jnūhun cáhán yā, suu cúu jeē jejnūhún i jeē Yaā ndaā cúu Yaā Dios.

<sup>34</sup> Chi Yaā ní tají Yaā Dios vēji, máni máá jnūhun Yaā Dios cáhán yā. Chi Yaā Dios tu yícuāha jéhe ya Espíritu yā nuū Yaā ní tají yá.

<sup>35</sup> Máá yá jeē cúu ya Tatá, yōhyo manī yā jíin Séhe ya, te ndivii ní jēhe ya ndaha Séhe ya jeē ndacu ya jniñu nuū.

<sup>36</sup> Ñayuu jeē candíje máá Séhe ya jeē jnáma ya i, cotecu i ní cání andiví. Te ñayuu tu cúní candíje Séhe ya, ma cótecu i ní cání andiví, chi sa suhva cuāha Yaā Dios castigo jeē ndoho i ní cání.

*Jeē ni cáhān Jesús jíin ñahan ñūū Samaria*

## 4

<sup>1</sup> Te tēe grupo fariseo, ni canihīn de jnūhun jeē iyó cuéhē gā tēe cáscuáha jíin Jesús vēsú jíin Juan, jíin jéē cuehē gā ñayuu scuándute ya vēsú Juan.

<sup>2</sup> Te nasūu jéē scuándute máá yá, chi tēe cáscuáha jíin yá cúu jeē cascuándute.

<sup>3</sup> Te ná ni jini Jesús jeē súcuan ni canihīn de jnūhun, te ni quenda ya región Judea, te cuanuhun yā región Galilea.

<sup>4</sup> Te ichi jeē nuhún yā chi yáha región Samaria.

<sup>5</sup> Te ni jinū yā ñn ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jenahán.

<sup>6</sup> Te yūcuan íne pozo jeē naní pozo Jacob. Te ni cucōo Jesús xiin pozo un, chi ni cuíta yá jeē cuahán yā ichi. Te nájnūhun cahuxī uū cúu.

<sup>7</sup> Te ni quee ñn ñahan Samaria, vēji ña vequihin ña ndute. Te ni cahān Jesús jíin ña:

Cuāha ní ndute coho ná, áchí yá.

<sup>8</sup> Te tēe cáscuáha jíin yá, chi je cuan-goo de nde ñuu, cuacuaan de jeē cáji de jíin yá.

<sup>9</sup> Te ñahan Samaria un ní cahān ña jíin yá:

¿Ndese cúu jeē jicán ni ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chi ñayuu hebreo tu cácahān i jíin ñayuu Samaria.

<sup>10</sup> Te ni cahān Jesús:

Núu jeē jiní ni ndese cúní Yaā Dios sáha ya jeē váha níhín, jíin ndé ñn cúu sãña jéē jicán na ndute nuū ní, yūcuán na te máá ní cacān ni núu ná, te cuāha ná ndute jeē cótecu ni ní cání sáha, áchí yá.

<sup>11</sup> Te ni cahān ña jíin yá:

Tátā, yōhyo cúnú pozo yáha, te tú na vé ndahá ní jéē táva ní ndute. Núu súcuan ¿te ndé nuū nihín ni ndute jeē cótecu na sáha?

<sup>12</sup> ¿Te á cújéhnū ga máá ní vēsú jíi yō Jacob, chí naún? Chi máá de ni stóo de pozo yáha nuū yō. Te yāha ní cajihí máá de ndute, jíin táca séhe de, jíin quití ndéca de. Achí ña.

<sup>13</sup> Te ni cahān Jesús:

Tāca ñayuu jeē jíhi ndute yáha, chi jichí tucu i.

<sup>14</sup> Te ñayuu coho ndute jeē cuáha na núu i, chi ma jichí cuíti gā i. Chi ndute jeē cuáha ná un, cane ini i nájnūhun ndute jeē cáne ñuhún, te sáha jeē cotecu i ní cání, áchí yá jíin ña.

<sup>15</sup> Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuíti gā ná, ni tuá jíni ñūhun quiquihin ná ndute pozo yáha, áchí ña.

<sup>16</sup> Te ni cahān Jesús jíin ña:

Cuácana ní yí ní te quiji ní jíin de, áchí yá.

<sup>17</sup> Te ni cahān ña:

Tú yí ná íyó.

Te ni cahān Jesús:

Ndaā cahán ni jéē tú yí ní íyó.

18 Chi je ni cuu uhūn yī ní, te tēe ndéca ní vijna chi nasūú yī ní cúu de. Yāha cúu jeē ni cáhān ndaā ní, áchí yá.

19 Te jeē súcuan ni cahān yā, te ni cahān ña:

Tátā, ñn tēe nácani jnūhun Yaā Dios cúu ní, jéni ni ná.

20 Tāca jíi na ñáyuu Samaria, yucu yáha ní cachiñúhún i Yaā Dios. Te máá ní ñayuu hebreo, cácahān ni jéē ñuu Jerusalén cúu nuū cánuú chiñúhún yó yā, achí ña.

21 Te ni cahān Jesús jíin ña:

Nánā, candíje ní jnúhun cáhán na, chi quee quivī jeē ni nasūú yucu yáha ni nasūú ñuu Jerusalén cúu nuū chiñúhún ní maá Yaā cúu Tátá, chi ndihī-ni lugar te cuu chiñúhún ní yá.

22 Máá ní ñáyuu Samaria tu cájini ni ndé ñn cúu jeē cáchiñúhún ní. Te máá ná jijnáhan ná chi cájini na ndé ñn cúu jeē cáchiñúhún ná. Chi nde nuū maá ná jijnáhan ná ñáyuu hebreo cúu nuū véji Yaā jnama ñayuu.

23 Te je ni quee quivī jeē ñáyuu cáchiñúhún ndaā, vijna te chiñúhún ndije i Yaā cúu Tátá nde jíin ini jíin ánuá i. Chi máá Tátá cúní yā jeē súcuan chiñúhún ñáyuu yā.

24 Yaā Dios cúu Espíritu, te ñayuu jeē cúní i chiñúhún i ya, cánuú jéē chiñúhún ndije i ya jíin ini jíin ánuá i, achí yá.

25 Te ni cahān ñahan ún:

Jíní na jéē quíji Mesías jeē cúu Cristo, Yaā jeē tají Yaā Dios. Te núu ni quee maá yá, te stéén cají yá tāca jnúhun nuū yō.

26 Te ni cahān Jesús:

Máá ná jeē cahán jíin ní, suu ná cúu Yaā ún.

27 Te sá cáhán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájñūhun yá jíin ñahan yúcuan. Te ni ñn de tu ní cájñūhún de ya núu na vé cájñūhun yá ña chí na vé ndájñūhun yá jíin ña.

28 Yūcuán na te ñahan un ní stóo ña quiyī ña, te cuahān ña nde ñuu. Te ni cahān ña jíin ñáyuu ún:

29 Nehen na quíngoo yó te coto ró ñn tēe jeē ní cachí ndihī tāca jéē ni sáha

ri. Sanaa te máá yá cúu Cristo, jeē cándetu yó quiji, áchí ña.

30 Yūcuán na te ni quendacoo i ñuu ún, te cuangoo i nuū íne Jesús.

31 Te nde ná tu jinūcoo i, te tēe cáscuáha jíin yá ni cacahān ndahú de jíin yá:

Maestro, caji ni stáa víi, achí de.

32 Te ni cahān yā jíin de:

Iyó stáa caji rī jeē tu cájini rō ndese cúu.

33 Yūcuán na te tēe cáscuáha jíin yá, ni cacajñūhun jnáhan de:

¿A ní quindeca ñn ñayuu jeē ní yeji yā, chí naún? áchí de.

34 Te ni cahān Jesús:

Jeē ní cachí rī jeē iyó jéē cáji rī cúu jeē cúsiñi ni rī sáha ri jniñu cúní Yaā ní tají rúhū vēji ri, jíin jéē sínu ri jniñu ún.

35 Te cácahān rō jeē cúmanī cuñ gā yoō te tahndé trigo. Te ruhū chi cáhán rī jíin ró: Condēhe jijnáhan ró, chí ñayuu cuehē cácuu i nájnūhun trigo jeē jé ni cuaan jeē tahndé, chi je cáhīyo tūhva i candíje i ruhū.

36 Te tēe scándíje ñayuu cácuu de nájnūhun tēe cájehnde trigo, te nihīn de yāhu de. Te jeē cánastútú de ñayuu cúu jeē cótecu i ní cáni andiví. Te tēe cáscuíté núu jnūhun ri, inuú-ni cusī ni de jíin tēe cástéén gā jnūhun ri.

37 Chi ndaā cúu jnūhun jeē cahán: ñn tēe jéte, te inga tēe nástútú, achí.

38 Te suu cúu jeē ní tají rí rohó jijnáhan ró jéē scándíje ró ñayuu jeē jé ni canihīn jnūhun ya ni casáha inga tēe. Chi inga tēe je ni canacani de jnūhun nuū ñáyuu, te máá ró chí nájnūhun cánastútú ró i cúu jeē scándíje ró i.

39 Te cuehē ñayuu Samaria jeē cáyūcú ñuu ún, ni cacandíje i Jesús jeē ní jini sōho i jnūhun ni cahān ñahan ún. Chi ni cahān ña: Ni cachí ya ndihī tāca jéē ni sáha ri.

40 Te jeē yúcuan cúu jeē ñayuu Samaria un ní jinūcoo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yūcuan úu quivī.

41 Te cuehē gā i ni cacandíje i ya jíin jnúhun cáhán maá yá.

42 Te ni cacahān i jíin ñahan ún:

Tuá niní jeē cahán maá ró te candíje ri yā, chí je ni cajini sōho ri jnúhun cáhán maá yá. Te cájini yō jeē maá yá cúu ndije Cristo, Yaā jnama ñayuu ñayiví. Achí i.

*Jeē ní nasávāha ya sēhe tēe ndíso jníñu nuū rey*

43 Te nuū ni yáha uū quiví ún, te Jesús ni quenda ya Samaría, te ni quihin tucu ya ichi cuanuhun yā región Galilea.

44 Chí je ni cahān maá yá jeē tēe cánacani jnúhun Yaā Dios, tu cáhīyo yíñúhún ñayuu ñuu de jíin de, te suni súcuan ni cuu jíin máá yá.

45 Te ná ni najinū yā Galilea, te ñayuu un ní cajetáhú i ya, chí suni máá i ni jengoo i vico pascua ñuu Jerusalén, te ni cajito i tācá jniñu ní sáha ya quiví ni íyo vico ún.

46 Yūcuán na te ni jehēn tucu ya ñuu Caná ndañú Galilea, nuū ni sáha ya jeē ndúte ni nduu vino. Te ini ñuu Capernaum ni íyo ñin tēe cújéhu jeē ndíso jníñu nuū rey. Te cúhú sēhe de.

47 Tēe un ní jini jnúhun de jeē ní najinū Jesús región Galilea jeē ni jéhēn yā región Judea. Te ni jecondēhé de ya, te ni cahān ndahú de jíin yá jeē na quíhín yā jíin de vehe de, te nasávāha ya sēhe de, chí je yajni cuu i.

48 Te ni cahān Jesús jíin de:

Núu tú coto ró jniñu jéhu jeē náā ni rō sáha, te ma candíje cuiti rō jijnáhan rō, achí yá.

49 Te tēe ndíso jníñu nuū rey, ni cahān de:

Cava vāha ni ní na quíhín yō, chí núu cucuéé ní te cuu sēhe ná, achí de.

50 Yūcuán na te ni cahān Jesús:

Cuanuhun vehe ró, chí cotecu sēhe ró.

Te tēe un ní candíje de jnúhun ni cahān Jesús, te cuanuhun-ni de.

51 Te ní jica de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, achí i.

52 Te ni cajnúhún de na hora ni quejé nduvāha i. Te ni cacahān i jíin de:

Cahān jeē ícu ni quenda quíji i.

53 Yūcuán na te máá tátá i ni sáha de cuenta jeē hora un cúu jeē ni cáhán Jesús jíin de jeē cótecu sēhe de. Te ni candíje de jíin ní vehe de jeē cúu ya Yaā ní tají Yaā Dios.

54 Yāha cúu vuelta uū jeē ni sáha Jesús jniñu jéhu jeē ni stéén yā poder yā región Galilea, jeē ní najinū yā jeē ni jéhēn yā región Judea.

*Jeē ní nasávāha ya ñin tēe catú yuhu pila Betesda*

## 5

1 Yūcuán na te cuahān tucu Jesús ñuu Jerusalén, chí íyó tucu vico cásáha jnáhan ñuu yā hebreo.

2 Te Jerusalén íyó ñin pila ndute yajni yéhyí jeē naní yéhyí lanchi. Te yuhu hebreo naní Betesda. Te nuū íne pila un íyó úhūn corredor.

3 Te ini tācá corredor un cácaā cuehē ñayuu cácuñu, jeē cuaá, jeē chacuá, jeē ni íjin. Te cándetu i jeē canda ndute ún.

4 Chí íyó quiví jeē cúun ñin ndajéhé yā ini pila un, te scánda ya ndute. Te ñayuu quiví xīhna gā ini pila un ná scánda ya ndute, te nduvāha i na-ni cuehyí ndóho i.

5 Te yūcuan íyó ñin tēe jeē ní cuu ocō xahūn uní cuiyā cuhú de.

6 Te ni jito Jesús jeē catú de, te ni jini yā jeē ní cuu cuehē cuiyā cuhú de. Te ni cahān yā jíin de:

¿A cúní rō nduvāha rō? achí yá.

7 Te ni cahān tēe cúhú un jíin yá:

Tu níhín na ni ñin tēe squiví sãñá ini pila hora jeē canda ndute. Chí tāca jinu jeē cuní na quiví ná, te quiví-ni inga ñayuu xīhna gā. Achí de.

8 Te ni cahān Jesús:

Ndocuñi te naquihin ró camilla rō te caca ró, achí yá.

9 Te tēe un ní nduvāha-ni de. Te ni naquihin de camilla de, te ni quejé de jica de. Te quiví ndétātu cúu quiví ún.

10 Yūcuán na te jnáhan de tēe hebreo un ní cacahān jíin de:



Quiivī ndétātu cúu vijna. Te áchí ley jeē ma cúu condiso ró camilla rō.

11 Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin rí camilla rí te caca rí, achí de.

12 Yūcuán na te ni cacajnūhún un de:

¿Ndé tēe ni cahān jíin ró jeē náquihin ró camilla rō te caca ró?

13 Te tēe ni nduvāha ún, tu jíin de ndé in cúu jeē ní nasávāha de. Chi cáhīn cuehē ñayuu yūcuán, te Jesús je cuahān yā.

14 Te cúcuéé gá te ni najnáhan Jesús jíin de ini templo cáhnu. Te ni cahān yā:

Vijna chi je ni nduvāha ró. Ma sáha ga rō cuēchi, chi núu tuú, te quiiji in jnūdóho xeēn gā siquī rō, achí yá.

15 Yūcuán na te cuahān tēe ún, te ni castūhún de nuū jnáhan de hebreo un jeē Jesús cúu jeē ní nasávāha ya de.

16 Te siquī jeē ní sáha Jesús jniñu yáha quiivī ndétátú, jeē yúcuán cúu jeē tēe hebreo un cájito xeēn de ya, te cácuni de cahni de ya.

17 Te ni cahān Jesús jíin de:

Máa Tátá rí chi ní cáni te nde vijna sáha ya jniñu váha, te suni súcuán ruhū sáha rí jniñu váha.

18 Te siquī jeē ni cáhān yā súcuán, te tēe hebreo un víhyá gā cácuni de cahni de ya. Chi nasūu máa in-ni jeē tu squícu ya jeē cahán ley siquī quiivī ndétátú, chi suni jeē ni cáhān yā jeē Tátá yā cúu Yaā Dios, te súcuán sáha inuú yá máa yá jíin Yaā Dios.

*Siquī jeē ndíso jniñu Sēhe Yaā Dios*

19 Te ni cahān Jesús:

Jendaá cahán rí jíin ró jijnáhan ró: Ruhū jeē cúu Sēhe Yaā Dios, tú na vé cúu sáha rí jeē máa rí, chi máni sáha rí jeē jíto rí sáha Tátá rí. Chi táca jéé sáha Tátá rí, suni sáha ruhū jeē cúu rí Sēhe ya.

20 Chi máa Tátá rí, manī yā jíin ruhū jeē cúu rí Sēhe ya, te stéén yā nuū rí ndihī jeē sáha ya. Te jéhnu ga jniñu stéén yā vésú jeē ní cuu vijna, jeē naa ni rō coto ró jijnáhan ró.

21 Te nájnūhun jeē nastécu máa Tátá rí ndīyī te cotecu tucu i, suni súcuán ruhū jeē cúu rí Sēhe ya, nastécu rí ndé-ni cúu jeē cuní máa rí.

22 Te máa Tátá rí, tu sándaā yā siquī ni in ñayuu, chi ni jēhe ya jnūhun jeē sándaā máa rí siquī táca ñayuu, chi Sēhe ya cúu rí.

23 Te súcuán te coo yíñúhún ndihī ñayuu nuū rí, nájnūhun yíñúhún i nuū Tátá rí. Te ñayuu tu íyó yíñúhún núu rí, núu súcuán te suni tu yíñúhún i nuū máa Tátá rí jeē ní tají yá ruhū vēji rí.

24 Jendaá cahán rí jíin ró: Núu in ñayuu chuhun ni i jnūhun cáhān rí, te candíje i jeē Yaā ndaā cúu Yaā ní tají rúhū vēji rí, ñayuu ún cotecu i ní cáni andiví, te ma jnahnú ndetū i. Chi ma cúu ga i nájnūhun ndīyī, chi sa suhva cotecu i ní cáni.

25 Jendaá cahán rí jíin ró jeē quiiji quiivī, te vijna je ni quejéé, jeē táca ñayuu cácuu nájnūhun ndīyī, cuní nahín i jnūhun cáhān ruhū, Sēhe Yaā Dios. Te ñayuu cuatáhú, chi cotecu i ní cáni.

26 Chi nájnūhun íyó poder máa Tátá rí jeē sáha ya jeē técu ndihī-ni, suni súcuán ni jēhe ya poder nuū ruhū jeē sáha rí jeē cotecu ndihī-ni.

27 Te suni ni sáha ya jeē ndíso jniñu rí sándaā rí siquī ñayuu, chi cúu rí Yaā ní nduu tēe.

28 Ma náa ni rō canī ni rō siquī jnūhun cáhān rí. Chi quee quiivī jeē táca ndīyī cuní sōho i jnūhun cahān rí,

29 te quendacoo i nuū yíndūji i. Te ndīyī jeē ní casáha jniñu váha, natecu i jeē cótecu i ní cáni. Te ndīyī jeē ní casáha jniñu néé, natecu i te quiivícoo i nuū jnahnú ndetū i.

*Ndé vé cúu jeē steén jeē ní tají Yaā Dios yā*

30 "Tú na vé cúu sáha rí jeē máa rí. Chi nájnūhun ndácu Yaā Dios jniñu nuū rí, súcuán sándaā rí jniñu. Te ndaā sándaā rí, chi tu sáha rí jeē cuní máa rí, chi sáha rí jeē cuní máa Tátá rí, Yaā ní tají rúhū vēji rí.

31 Núu ruhū cahān rī jeē cúu ri Sēhe Yaā Dios, te cachi ñayuu jeē tu jéjníñu jnūhun cáhān rī.

32 Te íyó inga jeē cahán jeē cúu ri Sēhe ya. Te jíní rī jeē jnúhun un jéé cahán yā, chi níhín jníñu.

33 Máá ró ni catají ró tēe ni caca-jnūhún de Juan. Te Juan chi ndaā ni cahān de jnūhun rī.

34 Te vēsú súcuan te nasūu rúhū cúu jeē jíní ñúhún jeē steén ñn tēe jeē Sēhe Yaā Dios cúu ri. Chi máá ró cúu jeē jíní ñúhún návāha candíje ró te cācu ró jínáhan ró. Jeē yúcuan ní cahān rī jeē iyó ndaā jnūhun ri jeē ní nacani Juan.

35 Máá Juan ni cuu de nájñūhun ñn lámpara jeē cayú te cúndijín, cúu jeē ní nacani de jnūhun rī. Te máá ró, jecu-ni quiví ni canujnahan ni rō jeē ni steén de nuū rō.

36 Te íyó jéé steén cají gá jeē cujéhnu ri vēsú jeē ní cahān Juan. Suu jniñu sáha ri, jniñu jeē ní tejníñu Tátá rī ruhū jeē sáha ri, jniñu un steén ndije jeē maá yá ni tají rúhū vēji rī.

37 Te Tátá rī jeē ní tají yá ruhū vēji ri, suni máá yá cahán nuū tútu ñn jeē cujéhnu ri, vēsú tu ní cájini sōho cuiti rō jeē cahán yā, ni tu ní cájito ró yá.

38 Te tu ní cáchuhun ni rō jnūhun un jéé ní cahān Tátá rī, chi tu cácandíje ró rúhū, Yaā ní tají yá vēji.

39 Cánanducú vii rō tāca jnúhun cáhán tutu ñn, chi cájeni ni rō jeē yúcuan níhín rō jnūhun jeē cótecu rō ñn cáni sáha. Te jnūhun siquī maá rí cúu jeē cahán tutu ún.

40 Te vēsú súcuan te tu cácuni rō cuatáhú ró ruhū quivícoo ró ndaha ri návāha cotecu rō ñn cáni.

41 'Tu chíhi ri cuenta jnūhun jeē cácahān ñayuu jeē cujéhnu rī.

42 Chi je jíní rī ndese cándāa ánuá rō jeē tu cáhīyo manī rō jíní Yaā Dios.

43 Ruhū vēji ri jíní jniñu cúní Tátá rī, te tu cájetáhú ró ruhū. Te núu inga tēe quee de jíní jniñu cúní maá de, sa tēe un yáchí cuatáhú ró de.

44 ¿Ndese cuu candíje ró jínáhan ró? Chi máni cácuni rō jeē cujéhnu ró sáha jnáhan ró, te tu cánducú ró jeē cujéhnu ró sáha Yaā Dios, jeē maá ñn-ni ya iyó.

45 Ma cáni ni rō jeē cáquin rī cuēchi siquī rō nuū Tátá rī. Chi íyó ñn jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndaā rō jíní ley jeē ní tee de.

46 Chi núu ní cácandíje ró jéé ní tee Moisés, te suni candíje ró rúhū nuú, chi jnūhun máá rí ni tee de.

47 Te núu tu cácandíje ró jnúhun ri jeē ní tee de, ¿te ndese candíje ró jnúhun cáhán maá rí núu súcuan? Achí yá jíní de.

*Jeē ní scáji yā uhūn mil tēe*

*(Mt. 14.13-21; Mr. 6.30-44; Lc. 9.10-17)*

## 6

1 Yūcuán na te cuahān Jesús inga lado mar Galilea, jeē cúu mar Tiberias.

2 Te yōhyo cuehē ñayuu ni candiquín i ya, chi ni cajito i tācá jniñu jéhnu jeē steén yā poder yā jeē ní nasávāha ya ñayuu cácuñu.

3 Te ni caa ya ñn yucu, te ni cucōo ya yúcuan jíní tēe cáscuáha jíní yá.

4 Te je ni cuyajni vico pascua jeē cánucūhun ni jnáhan ñnu yā hebreo jeē ní cacācu i nuū ñayuu nación Egipto.

5 Te ni ndacoto ya, te ni jito ya jeē véjicoo cuehē ndasí ñayuu. Te ni cahān yā jíní Felipe:

¿Ndé nuū cuaan yó jéé cáji ñayuu yáha jínáhan i?

6 Te súcuan ni cahān yā jeē jito ndee yā de núu ndese cahān de. Chi je jíní maá yá ndese sáha ya.

7 Te ni cahān Felipe jíní yá:

Te ni ma cánda uū ciento denario staā, ni vēsú jeē cáji i jecu jecu jínáhan i, áchí de.

8 Yūcuán na te ni cahān Andrés, ñani Simón Pedro, inga tēe scuáha jíní yá un:

9 Yāha íne ñn sūchi yí jéé ndíso i uhūn staā cebada jíní úu chácá. ¿Te ndé canda cuiti ún, chi ñayuu cuehē ndasí cúu?

10 Yūcuán na te ni cahān Jesús:

Cahān jíní ñayuu na cucōo i, áchí yá.

Te yūcuan cáa cuehē ite, te ni cacucōo i, te nájñuhun uhūn mil tēe cúu.

<sup>11</sup> Te ni quihín Jesús staā ún, te ni nacuatáhu yá nuū Yaā Dios. Te ni jēhe ya nuū tēe cáscuáha jíin yá, te máá de ni casaja de nuū ñayuu ní cacucōo ún. Te suní súcuan ní sáha ya jíin cháca, te ni cayeji i nasaa cácuni maá i.

<sup>12</sup> Te nuū ní candutú chíji i, te ni cahán yā jíin tēe cáscuáha ún:

Nastútú ró tēcá pedazo jeē ni ndóo, návāha tu stívi cuiñi yō.

<sup>13</sup> Te ni canastútú de, te ni chitú úxī uū jíca pedazo jeē ni ndóo síquī ndihúhún staā cebada un jeē tuá ni ndíhi caji ñayuu.

<sup>14</sup> Te ñayuu un ní cajito i jniñu jéhu ni sáha Jesús jeē ni stéén yā poder yā. Te ni cacahán i:

Jendaá ndije jeē tēe yáha cúu jeē cahán tutu jeē quíji ini ñayívi jéé nácani jñuhun Yaā Dios. Achí i.

<sup>15</sup> Te ni jini Jesús jeē cácuni i sáfuerza i ya jeē cuu ya rey i núú. Te ni cujiyo tucu máá ñn-ni ya, ni caa ya cuahán yā nuū sucún gá yucu.

*Jeē ní jica jéhé yá nuū mar  
(Mt. 14.22-27; Mr. 6.45-52)*

<sup>16</sup> Te nuū cuácuaa, te tēe cáscuáha jíin yá ni nanuu de cuango de nde mar.

<sup>17</sup> Te ni ndívicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de.

<sup>18</sup> Yūcuán na te ni jequíhi ñn tachí níhin, te sáha jeē ndóna ndute mar un.

<sup>19</sup> Te jeē ní cuu nájñuhun uhūn chí íñu kilómetro cájica de jíin barco, te ni cajito de jeē jíca Jesús nuū mar, te ni cuyajni ya vēji ya nuū barco. Te ni cayúhu de.

<sup>20</sup> Te máá yá ni cahán yā jíin de:

Máá rí cúu. Ma yūhu ró jijnáhan ró.

<sup>21</sup> Te ni cacusñi ni de jeē na quívi ya ini barco. Te ni sáha ya jeē yachí-ni ni jinūcoo-ni de ñuhun íchi núu cuángoo de ún.

*Jeē cánanducú ñayuu Jesús*

<sup>22</sup> Te inga quívi ún, te ñayuu jeē ní caquendōo inga lado mar, ni cajini i jeē tēe cáscuáha jíin yá cuango de jíin máñuhún-ni barco ni íne yūcuán, jíin jéé tu ní quívi Jesús quihín yā jíin de jíináhan de.

<sup>23</sup> Te sava ga barco jeē véjicoo ichi ñuu Tiberias, ni quecoo yajni lugar nuū ní cayeji i staā jeē ní nacuatáhu máá Jítoho yō jehē.

<sup>24</sup> Te jeē ní cajito ñayuu un jéé tuá Jesús íne ya yūcuán, ni tēe cáscuáha jíin yá, te ni quívicoo i tēca barco un, te cuango i ñuu Capernaum cuananducú i ya.

*Jesús cúu staā jeē cótecu yō ní cáni*

<sup>25</sup> Te nuū ni jínūcoo i nde inga lado mar, te ni nanihín jnáhan i jíin Jesús. Te ni cacajnūhún i ya:

Maestro, ¿na hora ni quee ni yáha?

<sup>26</sup> Te ni cahán Jesús:

Jendaá cahán rí jíin ró jeē cánanducú ró ruhū síquī jeē ní cayeji rō nde ni candutú chíji ró, te nasūu síquī jeē ní cajito ró tēca jniñu jéhu jeē steén rí poder rí.

<sup>27</sup> Ma cóndihví ni rō máá síquī jeē caji rō jeē yachí nataxín, chí sa suhva cóndihví ni rō síquī jeē nihín rō jeē cótecu rō ní cáni sáha. Te máá rí, Yaā ní nduu tēe, cuāha ri nájñuhun staā jeē cótecu rō ní cáni sáha. Chí Tátá rí Yaā Dios ni jeni ya ruhū jeē sáha ri súcuan. Achí yá jíin i.

<sup>28</sup> Yūcuán na te ni cacajnūhún i ya:

¿Ndese sáha ná návāha squícu ná jniñu cúni Yaā Dios?

<sup>29</sup> Te ni cahán Jesús:

Jniñu jeē cuní Yaā Dios cúu jeē candíje ró ruhū, Yaā ní tají yá vēji.

<sup>30</sup> Yūcuán na te ni cacahán i:

Núu súcuan ¿te na jniñu jéhu sáha ní coto ná jíináhan ná te candíje ná jéé ní tají yá nihín? ¿Na jniñu cúu jeē sáha ní?

<sup>31</sup> Chí tēca jíi yō jenahán ni cayeji de maná jeē ní cuun ichi ándiví ndé nuū ñuhun téhé, nájñuhun yósó núu tútu: Yaā Dios ni jēhe ya staā ni cuun ichi ándiví, ni cayeji i, áchí tutu. Achí i jíin yá.

32 Te ni cahān Jesús:

Jendaá cahán rī jīn ró: Nasūú Moisés ni jéhe staā un núū de jijnáhan de jeē ní cuun ichi ándiví, chi máá Tátá rī ni jéhe. Te máá yá jéhe staā andiví jeē cótecu rō ní cání sáha.

33 Chi staā jéhe Yaā Dios cúu máá Yaā ní quiji ichi ándiví, te sáha ya jeē ñáyuu ñayiví cotecu i ní cání andiví. Achí yá.

34 Te ni cacahān i jīn yá:

Níní cuáha ni stāá ún caji na núu súcuan.

35 Te ni cahān Jesús:

Máá rí cúu máá stāá jeē cótecu rō ní cání sáha. Ndé vé quíví ndaha ri, ma cúu cuíti gā sōco. Te ndé vé candíje ruhū, ma jichí cuíti gā.

36 Te nájnūhun je ni cahān rī jīn ró, tu cáandíje ró rúhū, vēsú ni cajito ró núū rī.

37 Tāca ñáyuu jeē sáha Tátá rī jeē candíje i ruhū, máá i quívícoo ndaha ri. Te jétáhú rí tāca jéē cuní quíví ndaha ri, chi ma squéhichí cuíti rī quihīn.

38 Chi ni quiji ri ichi ándiví návāha sáha ri jniñu jeē cuní Yaā ní tají rúhū, te nasūu jéē sáha ri jeē cuní máá rí.

39 Te jniñu jeē cuní Tátá rī, Yaā ní tají rúhū, cúu jeē ma scuíta ri ni ñn ñayuu ni jéhe ya nuū rī, chi condito ri i te nastécu rī i quíví jínu ñayiví.

40 Te Yaā ní tají rúhū, cuní yā jeē tāca ñáyuu jeē nihín i jnūhun ruhū, Sēhe Yaā Dios, te candíje i ruhū, cotecu i ní cání andiví. Chi nastécu rī i quíví jínu ñayiví. Achí yá.

41 Yūcuán na te ni caquejéé jnāhan ñuu yā hebreo cácahān de siquī yā, chi ni cahān yā jeē máá yá cúu staā ní quiji ichi ándiví.

42 Te ni cacahān de:

¿A násūu téé yáha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ni quíji de ichi ándiví núu súcuan?

43 Te ni cahān Jesús jīn de:

Ma cahán rō siquī rī jijnáhan ró.

44 Ni ñn ñayuu ma cúu quíví i ndaha ri núu ma sáha Tátá rī jeē cúu ni i quíví

i, chi máá yá ni tají rúhū vēji ri. Te nastécu rī i quíví jínu ñayiví.

45 Te suhva yósó núu tútu ni cateo tēe ni canacani jnūhun Yaā Dios: Tācá i chi stēen Yaā Dios nuū i, achí. Núu súcuan te tāca ñáyuu jīni sōho jnūhun cáhán Tátá rī, te jétáhú i jeē steén yā nuū i, ñayuu ún chi quívícoo i ndaha ri.

46 Te tu ní jító ni ñn ñayuu nuū máá Tátá rī. Chi máñúhún-ni ruhū ni jito ri nuū yā, chi nde nuū máá yá vēji ri.

47 Jendaá cahán rī jīn ró jijnáhan ró jéē ñayuu jeē candíje i jeē jnáma ri i, máá i cotecu i ní cání.

48 Máá rí cúu staā jeē cótecu rō ní cání sáha.

49 Tāca jī rō jenahán, ni cayeji de staā maná jeē ní cuun ichi ándiví ndé nuū ñūhun téhé, te tu ní sáha jeē cótecu de ní cání andiví.

50 Te staā jeē cahán rī jeē vēji ichi ándiví, chi na-ni ñayuu caji, te cotecu i ní cání andiví.

51 Te suu máá rí cúu staā un jéē ní quiji ichi ándiví jéē sáha jeē cótecu rō ní cání. Te ñayuu jeē cáji staā yáha, cotecu i ní cání andiví. Te staā jeē cuáha ri un cúu yiqui cúñu rī, te cuáha ri návāha ñayuu ñayiví cotecu i ní cání andiví. Achí yá.

52 Yūcuán na te jnāhan ñuu yā hebreo ni cacahān de jīn táca jnāhan de:

¿Ndese cuu cuáha téé yáha yiqui cúñu de caji yō? achí de.

53 Te ni cahān Jesús jīn de:

Jendaá cahán rī jīn ró: Núu tú candíje ró jéē yiqui cúñu ruhū, Yaā ní nduu téé, cúu nájnūhun staā, te niñí rī cúu nájnūhun ndute, núu súcuan te ma cótecu rō ní cání andiví.

54 Chi ñayuu cáandíje jeē yiqui cúñu rī cúu nájnūhun staā te niñí rī cúu nájnūhun ndute, máá i cotecu i ní cání. Te nastécu rī i quíví jínu ñayiví.

55 Chi yiqui cúñu rī jīn níñí rī cúu ndije jeē sáha jeē cótecu i ní cání.

56 Te ñayuu cáandíje jeē yiqui cúñu rī jīn níñí rī cúu nájnūhun staā jīn ndute jeē cótecu i ní cání sáha, máá i níní ndúú i jīn rí, te ndúú rí jīn i.

<sup>57</sup> Máá Tátá rī, Yaā técu, ni taji yá ruhū vēji ri, te técu rī sáha máá yá. Te suni súcuan, ñayuu cá candíje jeē cúu ri nájnūhun staā i ndute i, suni súcuan cotecu i ní cáni sáha rī.

<sup>58</sup> Máá rī cúu staā ní quiji ichi ándiví. Te staā jeē cahán rī tu cúu nájnūhun staā maná jeē ní cayeji táca jíi rō jenahán, chi tu ní sáha jeē cótecu de ní cáni. Te staā jeē cahán rī, chi ñayuu caji, cotecu i ní cáni sáha, áchí yá.

<sup>59</sup> Táca jnúhun yáha ní steén Jesús nuū ñáyuu ní candutútú ini vehe i sinagoga ñuu Capernaum.

### *Jnúhun cotecu yō ní cáni*

<sup>60</sup> Te cuehē ñayuu cascuáha jíin yá, ni cajini sōho i jnúhun yáha jēé ni steén yā. Te ni cacahán maá i:

Yōhyo yí jnúhun cáhán yā yāhá. ¿Nde se cuu cuatáhú yó?

<sup>61</sup> Te ni jini Jesús jeē cácahán i jeē yí cúu jnúhun yāhá, te ni cahán yā jíin i:

¿A yí sáha jnúhun yáha jíin ró jijnáhan ró?

<sup>62</sup> ¿Te ndese sáha ró núu coto ró jéé ruhū, Yaā ní nduu tēe, ndaa ri nuhun rī nuū ní cóndee rī xihna ñúhún?

<sup>63</sup> Máá ánuá ñayuu cúu jeē sáha jeē técu i. Chi yiqui cúñu i tu jéjníñu cuiti súcuan. Te táca jnúhun ni cahán rī jíin ró cúu jeē quéndōo vāha ánuá rō, te cotecu rō ní cáni sáha.

<sup>64</sup> Te sava ró chi tu cá candíje ró. Achí yá.

Chi nde xihna ñúhún je jíin Jesús ndé-ni cúu ñayuu jeē ma cándíje, jíin ndé ñn de cúu jeē nastúu de ya.

<sup>65</sup> Te ni cahán gā yā:

Jeē yúcuan ní cahán rī jíin ró jeē ma cúu quiví ni ñn ñayuu ndaha ri, te núu tu sáha Tátá rī jeē cúu ni i quiví i, áchí yá.

<sup>66</sup> Te nde quiví ún te cuehē ñayuu cascuáha jíin yá, ni castóo i ya, te tuá ni cájica i jíin yá.

<sup>67</sup> Yūcuán na te ni cahán yā jíin máá ndihúxí uū tēe cáscuáha jíin yá:

¿A suni cáuni máá ró quingoo ró, chí naún?

<sup>68</sup> Te ni cahán Simón Pedro:

¿Ndé núu gā quingoo ná? Chi máá ní cúu jeē nácani jnúhun jeē cótecu na ní cáni sáha.

<sup>69</sup> Te ni cacandíje ná te cájini na jéé maá ní cúu Cristo, Sēhe Yaā Dios, Yaā técu, achí de.

<sup>70</sup> Te ni cahán Jesús:

Te vēsú ni nacáji ri ndihúxí uū rō, te íyó ñn ró jeē ní quiví jexeén ini. Achí yá.

<sup>71</sup> Te súcuan ni cahán yā siquí Judas Iscariote, sēhe Simón. Chi máá de nastúu de ya, vēsú ñn jnáhan jeē uxí uū tēe cáscuáha jíin yá cúu de.

### *Jeē tu ní cá candíje ñani Jesús*

## 7

<sup>1</sup> Yūcuán na te jíca cuu Jesús región Galilea. Chi tu cúni yā caca cuu ya región Judea, chi jnáhan ñuu yā hebreo jeē cáyūcu yúcuan, cáuni de cahni de ya.

<sup>2</sup> Te cuacuyajni vico jeē casáha ñayuu yā hebreo vehe ramadá, cáyūcu i chíji.

<sup>3</sup> Te ñani yā ni cacahán de jíin yá:

¿Naun máá yáha-ni íne ró? ¿Naun tú quihín rō región Judea, návāha tēe yúcuan jéé cá candíje de róhó, suni coto de jniñu jéñu sáha ró.

<sup>4</sup> Chi núu cúni ñn tēe jeē cuité núu jnúhun de, te tu sáha yuhu de jniñu. Te núu sáha nde ró táca jniñu jéñu, vāha ga na sáha ró jéé cúni ndiví ñayuu.

<sup>5</sup> Súcuan ni cacahán ñani yā jíin yá, chi ni máá de tu cá candíje de ya.

<sup>6</sup> Yūcuán na te ni cahán Jesús:

Ná tu quee maá quiví jeē quihín rī. Te máá ró jijnáhan ró chi na-ni quiví-ni te cuu quingoo ró.

<sup>7</sup> Chi ma quití ni ñayuu ñayiví núu rō, te máá rí chi quití ní i jíto i ruhū, chi cáhán rī jeē jíin rī jeē máni jniñu néé casáha i.

<sup>8</sup> Cuángoo máá ró vico ún. Te máá rí chi ma quihín rī vijna, chi ná tu quee maá quiví cánuú quihín rī. Achí yá.

<sup>9</sup> Súcuan ni cahán yā jnúhun yáha jíin de, te ni quendōo ya Galilea.

### *Jeē ni jéñen Jesús vico vehe ramadá*

10 Te nuū ni yáha ñani yā cuango de vico ún, te sáa te suni cuahān maá yá. Te tú cuahān ndijin yā, chi tu ní stéen yā maá yá.

11 Te jnáhan ñuu yā hebreo cánanducú i ya nuū víco ún, te cácahān i:

¿Ndé nuū íne tēe ún? áchí i.

12 Te yōhyo ni cacahān ñayuu jeē siquí yā, chí sava i cácahān: Tēe váha cúu de. Te sava ga i cácahān: Tuú chí stáhú de ñayuu.

13 Te yuhu-ni ni cacahān i jnūhun ya, chí cáyūhú i jeē quití ni jnáhan i tēe hebreo.

14 Te jeē ní cuu sava vico, te ni quee Jesús, ni quiví ya templo cáhnu, te ni quejéé yá steén yā jnūhun.

15 Te ni canaa ni jnáhan ñuu yā hebreo cájini sōho i, te ni cacahān i:

¿Ndese jíní tēe yáha cuéhē jnūhun ndíchí, chí tu ní jíca de escuela? áchí i.

16 Yūcuán na te ni cahān Jesús:

Jnūhun stéen rī chí nasūu jnúhun máá rí cúu, chí jnūhun jeē ni jéhe máá Yaā ní tají rúhū cúu.

17 Núu ñn ñayuu cuní i sáha i jniñu cuní Yaā Dios, ñayuu ún chí jecūhun ni i núu nde nuū Yaā Dios vēji jnūhun stéen rī, chí jnúhun jeē jéni ni maá-ni rí cúu.

18 Tēe cáhán jnūhun jéni ni maá de, tēe un ndúcú de jeē na sájéhnu ñayuu de. Te núu ñn tēe ndúcú de jeē sajeéhnu de Yaā ní tají de, tēe un cúu tēe ndaā, te tú na jnūhun stáhú íyó jíin de.

19 ¿A násūu jéē ni jéhe Moisés ley yā nuū rō jeē squícu ró? Te ni ñn ró tu cásquícu. Chí sa jeē cácumí rō cahni rō ruhū, ¿te najehē cúu? Achí yá.

20 Te ni cacahān ñayuu cuehē ún:

Tachī ndóho ró. ¿Ndé ñn cuní cahni rohó?

21 Te ni cahān Jesús:

Ni nasávāha rí ñn tēe quiví ndétátú, te ndivii rō ni canaa ni rō ni cajito ró jéē quiví ndétátú ni sáha rí jniñu ún.

22 Te Moisés ni jéhe de ley jeē cúu circuncidar nuū rō. Te cása ha ró circuncidar sūchi yí núu uná quiví jeē ní cacu i, vésú quiví ndétātu cúu. (Te

nasūu máá Moisés ní jéquin ley un, chí je ni ñyo nuū tāca jíí de.)

23 Núu súcuan te núu cása ha ró circuncidar vésú quiví ndétātu cúu, návāha squícu ró ley Moisés, ¿te najehē cáquití ni rō jeē ní nasávāha ndihí rí ñn tēe quiví ndétátú?

24 Ma yachí caní ni rō jeē cuéchi cúu jeē sáha rí. Chí sa caní vāha ni rō siquí tācá jniñu váha. Achí yá.

### *Jeē ní cachi Jesús ndé nuū vēji ya*

25 Yūcuán na te sava ñayuu ñuu Jerusalén ni cacajnúhun jnáhan i:

¿A násūu tēe yáha cúu jeē cánanducú tēe cácujeéhnu jeē cáhni de, chí naún?

26 Te yáha cáhán ndijin de nuū chitú, te tú na jnūhun cácahān jíin de. ¿A sanaa te ni cacundaā ni tēe cácujeéhnu jeē tēe yáha cúu Cristo jeē achí tutu jeē quiji, chí naún?

27 Te tuú chí je cájini yō nuū vēji tēe yáha. Te jeē quíji Cristo, chí ni ñn yó má cúni ndé chí quíji ya. Achí i.

28 Yūcuán na te ni cahān jee Jesús jeē steén yā jnūhun ini templo:

Cájini rō ruhū, te cájini rō ndé ñuu vēji rí. Te vésú súcuan te máá Yaā ndaā cúu jeē ní tají rúhū vēji rí, te tú vēji rí jeē cuní máá rí. Te tu cájini rō ndese Yaā cúu ya.

29 Te máá rí chí jíní rí yā, chí nde nuū maá yá vēji rí, te máá yá ni tají rúhū, achí yá.

30 Yūcuán na te ni canducú de jnñ de ya. Te ni ñn de tu ní cúu jnñ de ya, chí ná tu quee máá quiví jeē jnñ de ya.

31 Te cuehē ñayuu chí ni cacandíje i ya, te ni cacahān i:

¿A násūu tēe yáha cúu Cristo, Yaā ndétu yó jéē quiji? Chí cuehē ndasí jniñu jéhnu sáha ya jeē steén yā poder yā. Achí i.

### *Jeē ní catajé de policía jeē jnñ de Jesús*

32 Te ni cajini tēe fariseo jeē súcuan cácahān ñayuu jnūhun ya. Te máá de jíin sūtū cácujeéhnu, ni catajé de policía cándito templo jeē jnñ de ya.

33 Te ni cahān Jesús:

Jecu na quivī condee rī jín ró jínáhan ró. Yūcuán na te nuhun rī nuū Yaā ní tají rúhū vēji ri.

34 Te nanducú ró ruhū, te ma nánihīn rō ruhū. Chi ma cúu jinūcoo ró núu cóndee rī. Achí yá.

35 Yūcuán na te máá téē un ní caca-jnūhun jnáhan de:

¿Te ndé nuū quihín tēe yáha jeē ma nánihīn yō de? ¿A quihīn de nuū jnáhan yó hebreo jeē ní cajitē núu cáyūcu ndé nación Grecia? ¿Te á stéén de jnūhun nuū ñáyuu Grecia, chí naún?

36 ¿Te na jnūhun cúu jeē ni cáhān de jín yó jeē nanducú yó de te ma nánihīn yō de, chi ma cúu jinūcoo yó núu cóndee de? Achí téē un jínáhan de.

*Siquī ndute jeē cótecu yō ní cáni sáha*

37 Te quivī sándihí vico ún te cúu vico cáhnu ga. Te quivī un ní ndocuiñí Jesús, te ni cahān jee ya:

Núu ndé ñáyuu jnáa ndasí i tāca jéē váha jeē sáha rī jehē i, nájnuhun jeē jichí i ndute, núu súcuan te na quivī i ndaha rī te coho i ndute, cúu jeē nihín i jeē váha ún.

38 Te ñáyuu jeē candíje jeē jnáma rī i, chí ini anuá i condee Espíritu Santo, te cuu ya nájnuhun yūte cáne ñuhún jeē sáha ya jeē cótecu i ní cáni, nájnuhun cáhān tutu iī. Achí yá.

39 Te súcuan ni cahān yā jeē ñáyuu candíje jeē jnáma ya i, nihín i Espíritu Santo. Chí ná tu quee Espíritu ún, chí ná tu ndaa Jesús quinhun yā nuū ndujéhnu ya.

*Jeē ní cacusín ñáyuu siquī yā*

40 Te sava ñáyuu cuehē ún, ná ni cajini sōho i jnūhun yáha, te ni cacahān i:

Jendaá jeē téē yáha cúu jeē achí tutu jeē quiji de nacani de jnūhun Yaā Dios, achí i.

41 Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chí ni cacahān i:

Tuú chí nasūú Galilea quiji Cristo.

42 Chi cáhān tutu iī jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

43 Te súcuan te ni cacusín ñáyuu jeē siquī yā.

44 Te sava i cácuni i jnī i ya, te ni ñn i tu ní jnī i ya.

*Jeē tu ní cá candíje tēe cácu jéhnu*

45 Yūcuán na te policía cándito templo tu ní cájni de Jesús, te cuanungoo de nuū tāca téē fariseo jín núu sutú cácu jéhnu. Te tēe ún ni cacajnuhún de policía:

¿Najehē tu ní quécoo ró jín de? áchí.

46 Te ni cacahān policía un:

Tú cuiti ni ñn tēe cáhān váha ndasí nájnuhun cáhān tēe yúcuan, áchí.

47 Te ni cacahān tēe fariseo:

¿Te á suni nde máá ró jínáhan ró ní stáhú de naún?

48 Ni ñn jnáhan ruhū tēe cácu jéhnu jín téē fariseo, tu cá candíje rī jnūhun cáhān tēe ún, ¿te naun cá candíje máá ró?

49 Te ñáyuu cuehē yáhá jéē tu cájecūhun ni i ley Moisés, chí jnahnū ndetū i jeē cá candíje i tēe ún, áchí de jínáhan de.

50 Te ni cahān Nicodemo, tēe ni jéhēn nuū yā ñn jecuáá, te suni ñn tēe fariseo cúu de:

51 Cáhān ley yō jeē ma cúu tee yó cuéchi siquī ñn tēe, te núu tú xīhna gā cuni sōho yó ndese cáhān de, návāha cucáhnu ni yō na cuéchi ni sáha de. Achí de.

52 Te ni cacahān jín de:

Te róhó, ¿á suni nde Galilea vēji ró jéē cahān rō jehē tēe ún? Nanducú váha ró núu tútu iī te cuni rō jeē ndé Galilea tu quénda cuiti ni ñn tēe nácani jnūhun Yaā Dios. Achí jín de.

53 Te cuanungoo de ná vehe ná vehe de.

*Jnūhun ñahan ní casiquí ndéē jnáhan*

## 8

1 Te ni caa Jesús cuahān yā yucu Olivos.

2 Te jeē cuácundijin inga quivī, te ni ndee tucu ya templo. Te ndihí ñáyuu

ni quecoo i nuū yā. Te ni cucōo ya, te ni steén yā jnūhun nuū i.

<sup>3</sup> Yūcuán na te tēe cástéén tutu ley Yaā Dios jíin tēe grupo fariseo, ni quecoo de jíin ñn ñahan jeē ní canihīn de ña jeē casíquí ndéē ña. Te ni cajeni de ña mēhñú.

<sup>4</sup> Te ni cacahān de jíin yá:

Maestro, ni canihīn ná ñahan yáha jeē casíquí ndéē ña.

<sup>5</sup> Te ley Moisés ndácu jniñu nuū yō jeē cuáha yó yūū xinī ñahan cásáha súcuan návāha cuu ña. Te máá ní, ¿ndese cáhán ní?

<sup>6</sup> Te súcuan ni cacahān de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi síquī yā. Te Jesús ni jīta ndeyi ya, te ni tee ya nuū ñúhun jíin xīnī ndáha ya.

<sup>7</sup> Te jeē cácajnūhun cácajnūhún de ya, te ni ndonehen ya maá yá, te ni cahān yā jíin de:

Núu ndé ñn máá ró tú na cuēchi ró, te xīhna gā maá ró cuāha yuū xinī ña núu súcuan, áchí yá.

<sup>8</sup> Te ni jīta ndeyi tucu ya, te ni tee tucu ya nuū ñúhun.

<sup>9</sup> Te nuū ní cajini de jeē súcuan ni cahān yā, te ni cajecūhun ni de jeē suni cáhīyo cuēchi de. Te ná ñn ná ñn de ni quendacoo de cuahān de, xīhna gā tēe jéhnu ga te nde nuū ní ndīhi na. Te ni ndōo máá ñn na Jesús jíin ñahan índichi mēhñú un.

<sup>10</sup> Te ni ndonehen tucu ya maá yá, te tuá ni ñn tēe un ní jíto ya, chi máá na ñahan ún. Te ni cahān yā jíin ña:

¿Ndé chi cuángoo tēe cájequin cuēchi síquī rō? ¿A tú ni ñn de ní ndóna cahān gā cuēchi síquī rō?

<sup>11</sup> Te ni cahān ña:

Tú ni ñn de, áchí ña.

Yūcuán na te ni cahān Jesús jíin ña:

Ni ruhū, ma cahán rī cuēchi síquī rō. Cuáhán te ma sáha ga rō cuēchi, áchí yá.

*Jesús cúu máá luz jeē steén ini anuá ñayuu*

<sup>12</sup> Te inga jínu ni cahān Jesús jíin ñayuu:

Máá rí cúu nájnūhun luz jeē steén ini anuá ñayuu ñayīví, jeē sáha jeē

jécūhun ni i síquī Yaā Dios. Ñayuu candíje ruhū chi ma cáca i nájnūhun nuū néē, chi sa suhva coneváha i luz ini anuá i jeē sáha jeē cótecu i ñí cáni.

<sup>13</sup> Yūcuán na te ni cacahān tēe fariseo jíin yá:

Róhó chi cáhán rō jnūhun jehē maá ró, te tu jéjníñu jnūhun cáhán rō.

<sup>14</sup> Te ni cahān Jesús jíin de jíjnāhan de:

Vēsú cáhán rī jehē maá rí, te íyó ndāá jnūhun cáhán rī. Chi jíni rī ndé nuū véji rí jíin ndé nuū quihín rī. Te róhó tu cájini rō ndé nuū véji rí ni ndé nuū quihín rī.

<sup>15</sup> Máá ró chi cuenta ñayuu ñayīví cásandaā rō síquī jnūhun cáhán rī. Te ruhū chi tu sándaā mañúhún rí síquī ni ñn ñayuu.

<sup>16</sup> Te núu sándaā rī síquī i, te ndaā sáha rí, chi tu sáha mañúhún rí, chi sándaā rī nde jíin máá Tátá rī, Yaā ní tají ruhū véji rí.

<sup>17</sup> Te yósó núu tútu ley cánevāha ró jéé núu ñnuú cacahān uū testigo, te jíni ñúhún cuatáhú ró jeē cacahān, chi íyó ndāá jnūhun ún.

<sup>18</sup> Núu súcuan te ruhū cúu ñn jeē cahán ndaā rī jehē rī. Te inga jeē cahán ndaā jehē rī cúu máá Tátá rī, Yaā ní tají ruhū. Achí yá.

<sup>19</sup> Te ni cacahān de jíin yá:

¿Ndé nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tátá rī nuú.

<sup>20</sup> Tāca jnūhun yáha ní cahān Jesús jeē steén yā ini templo nuū cáyūcu yéjñū jeē cásocō i xūhún. Te tú ni ñn de ní jñí de ya, chi ná tu quee maá quíví jeē jñí de ya.

*Jeē ni cáhán yā jeē ma cúu jinūcoo de nuū cóndee yā*

<sup>21</sup> Te ni cahān tucu Jesús jíin de:

Ruhū chi quihín rī, te nanducú ró ruhū, te ma nánihīn rō ruhū, chi quendōo cuēchi ró síquī rō quíví cúu rō. Te jeē yúcuan má cúu jinūcoo ró núu quihín rī, achí yá.

<sup>22</sup> Yūcuán na te tēe hebreo un ní cacahān maá de:



¿A cahni tēe yáha máá de, te jeē yúcuan cáhán de jeē ma cúu jinūcoo yó nuū quihín de, chí naún? Achí de.

<sup>23</sup> Te ni cahān yā:

Máá ró jijnáhan ró chi ñayīvi yáha véjicoo ró, te ruhū chi nde andiví véji ri. Máá ró cácuu ñayuu ñayīvi yáha, te ruhū chi nasūu tēe ñayīvi yáha cúu ri.

<sup>24</sup> Jeē yúcuan ní cahān rī jeē quendōo cuēchi ró siquī rō quivī cúu rō. Chi núu ma candíje ró jēe maá rí cúu Cristo, te quendōo nahín cuéchi ró siquī rō quivī cúu rō. Achí yá.

<sup>25</sup> Te ni cacajñuhún de ya:

Núu súcuan ¿te ndé ñn cúu ró?

Te ni cahān yā:

Je ni cachi ri nuū rō nde xīhna ñuhún ndé ñn cúu ri.

<sup>26</sup> Te íyó cuéhē gā jñuhun cuu cahān rī jín ró te sándaā rī siquī rō. Te ma cahān rī, chi ini ñayīvi yáha cáhán rī maá-ni jñuhun jeē ní jini ri ni cahān Yaā ní tají rúhū véji ri. Te máni jñuhun ndaā cahān yā. Achí yá.

<sup>27</sup> Te tu ní cájecūhun ni de jeē cahān yā jñuhun Tátá yā andiví jín de.

<sup>28</sup> Jeē yúcuan ní cahān gā yā:

Nde na yáha jeē cáta caa ró rúhū, Yaā ní nduu tēe, jicā cruz, yūcuán na te cuni rō ndé ñn cúu ri. Te cuni rō jeē tú na vé sáha ri jeē maá rí, chi cáhán rī maá-ni jñuhun ni steén Tátá rī nuū rī.

<sup>29</sup> Chi máá Tátá rī, Yaā ní tají rúhū, ndéé yá jín rí. Te tu stóo máñuhún yá ruhū, chi níni sáha ri jniñu jeē nújnahan ni maá yá. Achí yá.

<sup>30</sup> Te jeē ni cáhān yā jñuhun yáha, te cuehē ñayuu ni cacandíje i ya.

*Siquī ndé-ni cúu sēhe Yaā Dios jín séhe jexeén*

<sup>31</sup> Yūcuán na te ni cahān Jesús jín jnáhan ñuu yā hebreo jeē ní cacandíje i ya:

Te núu cuiñi nīhin ró jín jñuhun steén rī nuū rō, te cuu ndije ró ñayuu scuáha jín rí.

<sup>32</sup> Te jecūhun ni rō jñuhun ndaā, te jñuhun ndaā un sáha jeē nduu libre rō nuū jeē yíhi ró ndaha.

<sup>33</sup> Te ni cacahān i jín yá:

Sēhe yucūn Abraham cácuu ri, te tu cáyihí cuiti rī ndaha ni ñn. ¿Te ndese cúu jeē cahān rō jeē nduu libre rī núu súcuan?

<sup>34</sup> Te ni cahān Jesús:

Jendaá cahān rī jín ró jeē tāca ñayuu casáha cuēchi, tu íyó libre i, chi yíhi i chíji cuēchi jeē jejniñu cáhá i nuū.

<sup>35</sup> Te ñayuu jejniñu cáhá, chi tu cúu i ñn jnáhan ñayuu vehe nuū jejniñu i. Te ñn sēhe chi sa suhva cúu ndije i jnáhan ñayuu vehe ún.

<sup>36</sup> Núu súcuan te máá rí jeē cúu Sēhe Yaā Dios, núu sáha ri jeē tuá cuajniñu cáhá ró nuū cuéchi, núu súcuan te nduu libre ndije ró jijnáhan ró, te cuu ró séhe ya.

<sup>37</sup> Te jín rī jeē séhe yucūn Abraham cácuu ró, te vésú súcuan te cácuu rō cahni rō ruhū, chi tu cájetáhú rō jñuhun cáhán rī.

<sup>38</sup> Ruhū chi cáhán rī jñuhun jeē ni steén Tátá rī nuū rī. Te máá ró chi casáha ró jniñu jeē ni cáhán tátá maá ró jijnáhan ró. Achí yá.

<sup>39</sup> Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candíje ró nájnūhun ni candíje Abraham návaha cuu ndije ró yucūn de, yūcuán na te jniñu váha ni sáha de suni sáha máá ró nuú.

<sup>40</sup> Te vijna chi cácuu rō cahni rō ruhū, vésú ni cahān rī jín ró tāca jñuhun ndaā ni steén Tátá rī nuū rī. Te Abraham chi tu ní sáha cuiti de súcuan.

<sup>41</sup> Máá ró chi ñnuú casáha ró jín tátá maá ró. Achí yá jín i.

Yūcuán na te ni cacahān i:

Máá rí chi tu cácuu ri sēhe ndáhú jéé tu tátá. Chi íyó ñn-ni tátá rī, te Yaā Dios cúu ya.

<sup>42</sup> Te ni cahān Jesús:

Núu Yaā Dios cúu ndije tátá rō, te coo manī rō jín rí nuú. Chi nde nuū Yaā Dios ni quenda ri véji ri. Te tú véji ri jeē cuní maá rí, chi máá yá ni tají rúhū.

<sup>43</sup> ¿Te najehē tu cájecūhun ni rō jñuhun cáhán rī núu súcuan? Suu siquī

jeē tu cáculi rō chusóhó ró jnúhun nácuni rī.

<sup>44</sup> Máá ró jijnáhan ró chi tátá rō cúu jexeén. Te cáculi rō sáha ró máá jéē cuní tátá rō ún. Máá jéxeén ni jehni ndīyī nde jeē xíhna ñúhún. Te tu ní ín cuiti jíin jnúhun ndaā, te tú cuiti na jnúhun ndaā cahán. Te jeē cahán jexeén jnúhun stáhú cúu jeē súcuan cáa máá. Chi máá un cúu jeē ndíso jnúhun stáhú, te máá un cúu jeē ní squéjéé ndíhi jnúhun stáhú.

<sup>45</sup> Te ruhū chí cáhán rī jnúhun ndaā, te jeē yúculi cúu jeē tu cáculi rō rúhū.

<sup>46</sup> Te ni ñn ró ma nihín rō cuéchi síquī rī, chí tú cuiti na cuéchi rī. Te máni jnúhun ndaā cahán rī, ¿te naun tu cáculi rō rúhū?

<sup>47</sup> Ñayuu cáculi séhe Yaā Dios, chí cáculi i jnúhun Yaā Dios. Te nasūu séhe Yaā Dios cáculi ró, te jeē yúculi tu cáculi rō chusóhó ró. Achí yá jíin de.

#### *Iyó Jesús nde ná tu coo Abraham*

<sup>48</sup> Yūculi na te ni cacahán jnáhan ñuu yá hebreo un:

Ndaā cacahán rī jeē canéé ró nájnúhun ñayuu Samaria, te ñúhun tachī ini rō.

<sup>49</sup> Te ni cahán Jesús:

Tu ñúhun tachī ini rī, chí yíñúhún rī jíin Tátá rī. Te máá ró jijnáhan ró chí tu cáhīyo yíñúhún ró jíin rī.

<sup>50</sup> Máá rí tu ndúculi rí jeē cujéhu rī. Iyó ñn jeē sáha jeē cujéhu rī, te máá yá sándaā síquī jnúhun cacahán rō.

<sup>51</sup> Jendaá cahán rī jíin ró, núu ndé ñayuu síquī jnúhun cáhán rī, ma cúu cuiti i. Achí yá.

<sup>52</sup> Te tē hebreo un tu ní cáculi un ni de, te ni cacahán de:

Vijna te ni cacacáhu ni rī jeē ñúhun ndije tachī ini rō. Chí Abraham jíin táca tē ni canacani jnúhun Yaā Dios nde jenahán, ni cajihī de. Te róhó cáhán rō, núu ndé vé síquī jnúhun cáhán rō, te ma cúu cuiti i, achí ró.

<sup>53</sup> ¿Te chí jéhu ga rō vésú jíi yō Abraham naún? Chí ni jihī de, te suni ni cajihī táca tē ni canacani jnúhun ya. ¿Te ndé ñn ga sáha ró máá ró núu súcuan? Achí de.

<sup>54</sup> Te ni cahán Jesús:

Núu ruhū sajéhu rī maá rí, te tu níhín jníñu. Máá Tátá rī cúu jeē sajéhu ruhū. Te cacahán rō jeē maá yá cúu Yaā Dios maá ró.

<sup>55</sup> Te vésú súcuan te tu cáculi rō ndese Yaā cúu ya. Te ruhū chí jíin rī yá. Te núu cahán rī jeē tu jíin rī yá, te cuu rī tē stáhú nájnúhun máá ró jijnáhan ró. Te tuú chí jíin ndije rī yá, te síquī rī jnúhun cáhán yá.

<sup>56</sup> Te jíi rō Abraham ni cusī ni de jeē coto de quivī quēē rī. Te je ni jito de, te ni jito rī jeē ní cusī ndasí ni de. Achí yá.

<sup>57</sup> Yūculi na te ni cacahán tē hebreo un jíin yá:

Ni ná tu coo ró uū xico uxī cuiyá, ¿te ndese cúu jeē cahán rō jeē ní jito ró núu Abraham? achí de.

<sup>58</sup> Te ni cahán Jesús:

Jendaá cahán rī jíin ró jeē nde ná tu cacu Abraham te je iyó rí, achí yá.

<sup>59</sup> Yūculi na te ni caquihin de yūu jeē cuáha de xinī yá. Te Jesús chí ni quenda sáhi yá ni yáha ya mēhñú de, ni quenda ya ini templo cuahán yá.

#### *Jeē ní nasávāha ya ñn tē ni cacu cuáa*

## 9

<sup>1</sup> Te jeē jíca Jesús cuahán yá, te ni jito ya nuū ñn tē ni cacu cuáa.

<sup>2</sup> Te tē cáculi jíin yá ni cacajnúhún de ya:

Maestro, ¿naun ni cacu cuáa tē yáha? ¿A cuéchi tátá de náná de cúu, chí cuéchi máá de cúu, chí naún?

<sup>3</sup> Te ni cahán Jesús:

Nasūu cuéchi máá de, ni nasūu cuéchi tátá de náná de cúu jeē ní cacu de súcuan, chí sa suhva návāha cuni ñayuu jniñu jéhu sáha Yaā Dios jíin de.

<sup>4</sup> Níní jéē cúu nájnúhun nduú ini ñayīví, te cánuú sáha rī jniñu Yaā ní tají rúhū. Chí quee tiempo jeē coo nájnúhun jecuáa, jeē tuá cuu sájniñu ni ñn.

<sup>5</sup> Níní jéē iyó rí ini ñayīví te cúu rī luz jeē cúndijin ini anuá ñayuu ñayīví, návāha jecūhun ni i síquī Yaā Dios. Achí yá.

6 Te ná ni cahān yā súcuan, te ni tesīhi yá nuū ñúhun, te ni sáha ya ndehyū jín tesīhi yá un, te ni tee ya siquī tīnūu tēe cuáá un.

7 Te ni cahān yā jín de:

Cuáhán núu pila Siloé te nacate ró tīnūu ró, achí yá. Te jnūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tīnūu de, te ni ndundijin-ni, te ni nandicó de vēji de.

8 Yūcuán na te ñayuu yúcu yajni jín de, jín ñáyuu jeē ní cajito jeē cúu de tēe cuáá, ni cacajnūhun jnáhan i:

¿A násūu tēe yáha cúu jeē ndeé-ni yáha te jícán caridad?

9 Te sava i ni cacahān:

Suu de cúu.

Te sava ga i ni cacahān:

Nasūu de cúu, te súcuan cúní coto de.

Te máá de chi ni cahān de:

Suu ri cúu.

10 Yūcuán na te ni cacajnūhún i de:

¿Te ndese cúu jeē ní nanune tīnūu ró núu súcuan?

11 Te ni cahān de:

Tēe nání Jesús ni sáha de ndehyū, te ni tee de tīnūu rí, te ni cahān de jín rí: Cuáhán núu pila Siloé te nacate ró tīnūu ró. Te ni jehēn rī, te ni nacate ri, te ni nanune-ni tīnūu rí, achí de.

12 Yūcuán na te ni cacajnūhún i de:

¿Ndé nuū íne tēe ún? achí i.

Tu jíní rī, achí de.

*Jeē ní castíhí tēe fariseo tēe ni cacu cuáá*

13 Yūcuán na te ni cajendeca i tēe ni iyo cuáá un núu tēe grupo fariseo.

14 Te quivī ndétātu cúu jeē ni sáha Jesús ndehyū jeē ní nanune ya tīnūu de.

15 Te tēe fariseo un ní cacajnūhún tucu de tēe ún ndese ni nanune tīnūu de. Te ni cahān de:

Ni tee de ndehyū siquī tīnūu ná, te ni nacate ná, te ni ndundijin-ni tīnūu ná, achí de.

16 Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chi tu nēe iī de quivī ndétátú.

Te sava ga de chi ni cacahān:

¿Ndese cuu sáha tēe un táca jniñu jéhnú yáha te núu tēe íyó cuéchi cúu de?

Te ni cacusín de siquī yā.

17 Te ni cacajnūhún tucu de tēe ni iyo cuáá un:

Róhó, ¿ndese cáhán rō siquī tēe ni nanune tīnūu ró núu súcuan?

Te máá de ni cahān de:

Ín tēe nácani jnūhun Yaā Dios cúu de, achí de.

18 Te tēe hebreo un chi tu ní cá candíje de jeē ní iyo cuáá tēe ún te ni ndundijin tīnūu de. Te ni cacana xinī tatá de náná de.

19 Te ni cacajnūhún de:

¿A yáha cúu sēhe ro jēe ní cacu cuáá cácahān rō? Núu súcuan ¿te ndese ni ndundijin tīnūu de vijna? achí.

20 Te ni cacahān tatá de náná de:

Suu sēhe ri cúu tēe yáha jēe ní cacu cuáá.

21 Te tu cájini rī ndese ni ndundijin tīnūu de vijna, ni tu cájini rī ndé tēe ni nanune tīnūu de. Cajnūhun ró maá de, chi je jéhnú de, te na cáchi máá de.

22 Súcuan ni cacahān tatá de náná de, chi cáyūhú de cájito de jnáhan de tēe hebreo. Chi je ni casándaā tēe un jēe núu ndé ñáyuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quivī i ini vehe iī sinagoga.

23 Jeē yúcuán ní cacahān tatá de náná de: Cajnūhun ró maá de, chi je jéhnú de.

24 Yūcuán na te tēe hebreo un ní cacana tucu de tēe ni iyo cuáá un. Te ni cacahān de jín:

Cachi cají ró nuū rī, jító jínúu Yaā Dios. Chi cájini rī jeē tēe íyó cuéchi cúu tēe ni nanune tīnūu ró.

25 Yūcuán na te ni cahān de:

Tu jíní na núu íyó cuéchi de, chí naún. Te íyó ín jeē jiní ná, cúu jeē tēe cuáá ní cuu ná, te vijna chi ni ndundijin tīnūu ná. Achí de.

26 Te ni cacajnūhún tucu de:

¿Ndese ni sáha de jín ró? ¿Ndese ni nanune de tīnūu ró núu súcuan?

27 Te ni cahān de:

Je ni cuu ni castūhun ná nuū ní, te tu ní cá cuni ní cuatáhú ní. ¿Te najehē cá cuni ni jēe cáchi tucu ná núu ní? ¿Te

chí suni cácu ni jíjnáhan ní candíje ní yá naún?

28 Yūcuán na te ni cacahān neé jíin de, te áchí:

Máá ró chí candíje ró téé ún, te máá rí chí cácu de rí Moisés.

29 Te cájini rī jeē ni cáhān Yaā Dios jíin Moisés. Te téé yūcuán, ni tu cájini rī ndé nuū véji de.

30 Te ni cahān téé ni iyo cuáá:

Náa ni na jéé cacahān ni jéé tu cájini ní jeē véji de nuū Yaā Dios, vésú ni nanune de tinūu ná.

31 Te cájini yō jeē Yaā Dios tu jíni nahín yá jeē cájicān ñayuu iyó cuéchi. Chí jíni nahín yá nuū maá-ni ñayuu jeē cáchiñúhún i ya te cásáha i jeē cuní yā.

32 Te ní véji yó te tu ní jíni sōho cuiti yō jeē in téé nanune de tinūú inga téé ni cacu cuáá.

33 Te núu nasūu ndé nuū Yaā Dios véji téé ún, te ma cúu cuiti sáha de in jniñu súcuán. Achí de.

34 Te ni cacahān téé hebreo un:

Róhó chí iyó ndasí cuéchi ró ndé quívī ní cacu ró, ¿te á máá ró steén nuū rī naún? áchí.

Te ni caquenehen téé un yátā vehe i sinagoga.

*Siquī ñayuu cáhīyo cuáá ánuá*

35 Te ni jini jnūhun Jesús jeē ní caquenehen de téé ún. Te ni nihīn jnáhan ya jíin de, te ni cahān yā jíin de:

¿A candíje ró Séhe Yaā Dios?

36 Te ni cahān de:

¿Ndé in cúu ya návāha candíje ná yá?

37 Te ni cahān Jesús:

Je ni jito ró núu yā, te suu cúu ruhū jeē cahān jíin ró, achí yá.

38 Yūcuán na te ni jecuiñī yití de nuū yā, te ni cahān de:

Candíje ná jéé nihín cúu Jitoho ná.

39 Te ni cahān Jesús:

Véji rī ini ñayiví yáha jéé sándaā rī siquī ñayuu. Chí ñayuu jeē nájnūhun cácuáá ánuá, ndundijin ini anuá i jeē jécūhun ni i siquī rī. Te ñayuu jeē jéni ni i jeē cájecūhun ni i, nájnūhun nducuáá ánuá i. Achí yá.

40 Te sava téé fariseo jeē cáhīn jíin yá, ná ni cajini de jnūhun yáha, te ni cacahān de jíin yá:

¿Te chí jéni ni rō jeē suni téé tu cájecūhun ni cácu máá rí naún?

41 Te ni cahān Jesús:

Núu jeē cácu ró téé tu jécūhun ni nuú, te ma cóo cuéchi ró. Te siquī jeē ní cacahān rō jeē cájecūhun ni rō, te tu cájetáhú ró, jeē yūcuán condee cuéchi siquī rō.

*Jnūhun yátā siquī lanchi*

## 10

1 'Jendaá cahān rī jíin ró, núu yáhi lanchi ini corral cánevāha cáhnu ñayuu, te núu ndé téé tu quívī de ichi yéhyí corral un, chí sa suhva inga lado cáa de quívī de, téé un cúu ñacuīhná, chí véji jeē sacuíhná.

2 Te téé quívī ichi yéhyí, chí téé un cúu pastor ndíto lanchi.

3 Te téé ndíto yéhyí, núne de te quívī téé ún. Te lanchi de cáacu ni tī tachī de. Te cána de síhvī lanchi máá de, te táva de tī.

4 Te núu ni tava de ndíhi lanchi máá de, te yósnúu de nuū tī cuahān de. Te lanchi un cándiquīn tī de, chí nácuni tī tachī de.

5 Te ma cóndiquīn tī yatā inga téé, chí sa suhva cunu tī coto tī de, chí nácuni tī jeē nasūu jítoho tī cúu.

6 Jnūhun yátā yáha ní cahān Jesús jíin ñayuu, te tu ní cájecūhun ni i na jnūhun cúu jeē ni cahān yā.

*Jesús cúu máá pastor vāha*

7 Yūcuán na te ni cahān gā Jesús jíin i:

Jendaá cahān rī jíin ró: Máá rí cúu nájnūhun yéhyí corral nuū quívīcoo ñayuu cácu nájnūhun lanchi rī.

8 Tāca téé jeē tu ní tájí Yaā Dios, jeē ní quijicoo de nde ná tu quee rī, cácu de nájnūhun ñacuīhná, chí tu ní cástéén de jnūhun ndaā. Te ñayuu cácu nájnūhun lanchi rī, tu ní cájetáhú i de.

9 Máá rí cúu nájnūhun yéhyí. Te ñayuu jeē jíin máá rí quívīcoo, jnama rī i. Te cuu i nájnūhun lanchi

jeē ndívicoo ti nuū yīhi vāha ti, te quéndacoo ti nuū cáji vāha ti.

10 'Tēe cuíhná chi máni vēji de jeē sacuíhná de lanchi, te cahni de, te snáa de. Te ruhū chi vēji ri návāha cotecu ñayuu cácuu lanchi ri, te nde yōhyo vāha ndetū coo i.

11 Máá rí cúu máá pastor vāha. Te pastor vāha chi ndító vāha de lanchi de, vēsú nde cuu de jeē síquī tī.

12 Te ñin tēe yíyāhu, nasūú pastor tī cúu de, chi nasūú lanchi máá de cúu ti. Te núu jíto de jeē véji yīhī, te stóo de lanchi, te jínu de cuahān de. Te yīhī chi jnāi ti lanchi, te sáha ti jeē jité núu lanchi.

13 Te tēe yíyāhu ún chi jínu de cuahān de síquī jeē lanchi tátú cúu jeē ndító de, te jeē yúcuan tu cúndáhú ni de ti.

14 'Máá rí cúu máá pastor vāha. Te jíni rī tāca ñayuu cácuu nájnuhun lanchi ri, te máá i cájini i ruhū.

15 Te yāha cúu nájnuhun jeē Tatá rī jiní yā ruhū, te máá rí jiní rī Tatá rī. Te cuu rī jeē síquī ñayuu cácuu lanchi ri.

16 Te suni íyó gá ñayuu jeē cácuu lanchi ri, te sín sín ñayuu cácuu i. Te cánuú jéē suni condeca ri ñayuu ún. Te cuatáhú i jnuhun cáhán rī. Te coyūcu cáhnu-ni ndihī ñayuu candíje, te coo ñin-ni pastor i.

17 'Te Tatá rī manī ndasí yá jíin rí síquī jeē jéhe ri máá rí jeē cúu rī jehē ñayuu, te natecu tucu ri.

18 Ni ñin ma cúu cahni ruhū, chi máá rí cúu jeē jéhe jnuhun cuu rī. Jeē cachí máá rí te cuu rī, te jeē cachí máá rí te natecu rī, chi súcuan íyó poder rī. Súcuan ni cahān Tatá rī jeē sáha ri. Achí yá.

19 Te jeē ní cajini jnāhan ñuu yā hebreo jnuhun yáha, te ni cacusín tucu i.

20 Te cuehē i ni cacahān:

¿Naun cáchusóhó ró jeē cahán de? Chi ñúhun tachī ini de, te ni tivī xínī de.

21 Te sava ga i ni cacahān:

Tu súcuan cáhán tēe ñúhun tachī ini, nájnuhun cáhán tēe yáha. Te tēe ñúhun

tachī ini, ¿á cuu nanune de tinūu tēe cuáá naún? Achí.

### *Jeē ní casquéhichī i Jesús*

22 Te tiempo míjin cúu, te ñuu Jerusalén cánasáha ñayuu vico jeē cánucūhun ni i quivī ní cuhiī templo cáhnu.

23 Te jica cuu Jesús ini templo, ini corredor jeē naní Salomón.

24 Te jnāhan ñuu yā hebreo ni cacutútú i nuū yā, te ni cacahān i:

¿Nasaa ga quivī sáha ró jéē ma cucáhnu ni rī? Cachí cají nuū rī jnāhan ri núu máá ró cúu Cristo.

25 Te ni cahān Jesús:

Je ni castūhun rí nuū rō, te tu ní cá candíje ró. Tācá jniñu jeē ní tejniñu Tátá rī ruhū sáha ri, yúcuan stéén cají jéē maá yá ni tají rúhū.

26 Te tu cá candíje ró, chi nasūú lanchi ri cácuu ró, nájnuhun je ni cahān rī jíin ró.

27 Ñayuu cácuu lanchi ri, chi nácuni i jeē maá rí cúu jeē cahán jíin i. Te jíni rī i, te cándiquīn i ruhū.

28 Te cotecu i ñí cáni sáha ri, te ma jnahnú ndetū cuiti i. Te ni ñin ma cúu quende i ndaha ri.

29 Máá Tátá rī ni squívī ya i ndaha ri. Te cújéhnu ga maá yá vēsú tāca gá. Te ni ñin ma cúu quende i ndaha ya.

30 Máá rí jíin Tátá rī, chi ñin-ni cúu ri, achí yá.

31 Yūcuán na te jnāhan ñuu yā hebreo ni caquihin tucu de yuū jeē cuáha de xinī yā.

32 Te ni cahān yā jíin de:

Ni steén rī cuehē jniñu vāha nuū rō jeē ni sáha ri jíin poder Tatá rī. ¿Te á síquī jeē ni sáha ri jniñu vāha cúu jeē cuáha ró yúu xinī rī núu súcuan? Achí yá.

33 Te ni cacahān de jíin yá:

Nasūu síquī jeē ni sáha ró jniñu vāha cúu jeē cuáha ri yuū xinī rō, chi síquī jeē cahán ndevāha ró jéē achí ró jeē inuú cúu ró jíin Yaā Dios. Chi tēe-ni cúu ró, te sáha ró jéē inuú cúu ró jíin Yaā Dios. Achí de jíin yá.

34 Te ni cahān Jesús:

Yósó núū tútu ley cánevāha ró jéē ni cáhān Yaā Dios: Nájñūhun yaā cácuu ró, áchí Yaā Dios, achí tutu.

<sup>35</sup> Chi ñayuu jeē ní cajetáhú jñūhun ya, ni cahān yā jeē cácuu i nájñūhun yaā. Te cájini yō jeē ma cúu cahān yō jeē tú ndaā jñūhun cáhān tutu iī.

<sup>36</sup> Núu súcuan ¿te naun cácahān rō jeē jñūhun ndevāha cúu jeē ni cáhān rī jeē Séhe Yaā Dios cúu rī? Chi máá Yaā Dios ni jeni ya ruhū síquī jñíñu iī, te ni tají yá ruhū vēji ri ini ñayīví.

<sup>37</sup> Núu tu sáha ri jñíñu sáha Tátá rī, núu súcuan te ma candíje ró rúhū.

<sup>38</sup> Te núu sáha ri, te vēsú tu cácaandíje ró rúhū, te na cándíje ró síquī jñíñu sáha ri ún. Te súcuan te cucáhnu ni rō jeē ñn-ni cúu Tátá rī jín rí, te ñn-ni cúu ri jín Tátá rī. Achí yá.

<sup>39</sup> Yūcuán na te cánducú tucu de jñi de ya. Te ni ndoñhún-ni ya cuahān yā.

<sup>40</sup> Te cuanuhun yā yūte Jordán ichi núū cáne niāndii, nuū ni íne Juan ni scuándute de. Te ni condee yā yūcuán.

<sup>41</sup> Te ni quiijicoo cuehē ñayuu nuū yā, te ni cacahān i jín táca jñáhan i:

Ndaā chi vēsú tu ní sáha Juan ni ñn jñíñu jéhnū, te ni cundaā ndihí jñūhun ni cahān de síquī ndese sáha tēe yáha. Achí i.

<sup>42</sup> Te cuehē ñayuu jeē ni jéngoo nuū yā yūcuán, ni cacandíje i ya.

### *Jeē ni jñíñu Lázaro*

## 11

<sup>1</sup> Te ni iyo ñn tēe cūhú, nání de Lázaro. Te máá de jín cuáha de María jín Marta, cácuu de ñayuu ñuu Beta-nia.

<sup>2</sup> Te María un jéē cúu cuāha Lázaro, suu ña cúu jeē ní chihi aceite perfume jehē Jitoho yō, te ni nasíchí ña jín ixi xíní ña.

<sup>3</sup> Te ndíndúú cuáha de un ní catají ña jñūhun cuahān nuū Jesús:

Tēe jeē maní ni jín, cūhú de, áchí ña, áchí mozo.

<sup>4</sup> Te ná ni jini Jesús jñūhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā

Dios jeē cuni ñayuu ndese cújéhnū ya. Chi ruhū, Séhe Yaā Dios, jín cuéhyī yáha te stéén rī jeē suni cújéhnū máá rí. Achí yá.

<sup>5</sup> Te maní Jesús jín Marta jín cūhū ña jín Lázaro.

<sup>6</sup> Te vēsú súcuan te nuū ni níhīn yā jñūhun jeē cūhú de, te ni quendōo ya uū gā quivī nuū ndeé yá un.

<sup>7</sup> Yūcuán na te ni cahān yā jín tēe cáscuáha jín yá:

Na quíhīn tucu yó región Judea.

<sup>8</sup> Te tēe cáscuáha un ní cacahān de jín yá:

Maestro, ná tu cuu quivī jeē ní canducú jñáhan yó hebreo cuáha de yuū xinī ní. ¿Te cúní ni quíhīn tucu ní yúcuan naún? Achí de.

<sup>9</sup> Te ni cahān Jesús:

Ma cúu cahni ñayuu ruhū núu ná tu quee maá quivī cuu rī. Chi jeē iyó rí ñayīví yáha cúu nájñūhun jeē iyó úxī uū hora ñn nduú. Te jeē sáha ri jeē cuní Yaā Dios, cúu ri nájñūhun tēe jeē jíca nduú, te tu cáchihi de jehē de, chi cúndijin nuū de ñayīví yáha.

<sup>10</sup> Te tēe jeē tu sáha jeē cuní Yaā Dios, chi nájñūhun jíca de jecuáa, te nájñūhun cáchihi de jehē de, chi tu cúndijin ini anuá de. Achí yá.

<sup>11</sup> Yūcuán na te ni cahān tucu ya:

Amigo yō Lázaro quíxí de, te quíhīn rī sáha ri jeē nátañū ni de. Achí yá.

<sup>12</sup> Yūcuán na te tēe cáscuáha un ní cacahān de:

Núu quíxí de te jíní yō jeē nduvāha de.

<sup>13</sup> Te Jesús chi súcuan ni cahān yā jeē jé ni jñíñu de. Te cájeni ni tēe cáscuáha jeē quíxí ndije de.

<sup>14</sup> Yūcuán na te ni cahān cají yá:

Je ni jñíñu Lázaro.

<sup>15</sup> Te cúsiñ ni rī jeē tu ní cóyūcu yó yūcuán, návāha vāha ga candíje ró jéē coto ró jñíñu jéhnū sáha ri. Núu súcuan te na quíngoo yó núū ndíyí ún. Achí yá.

<sup>16</sup> Yūcuán na te Tomás, tēe cúu cuátí, ni cahān de jín jñáhan de jeē cascuáha jín yá:

Suni na quíngoo yó návāha cuu yō jín yá, achí de.

*Jesús cúu jeē sáha jeē nátecu te cotecu ní cáni*

<sup>17</sup> Te nuū ní quee Jesús, te jíní yā jeē ní cuu cuūn quiṽi yíndūji Lázaro.

<sup>18</sup> Te yajni-ni íne ñuu Betania jíin ñuu Jerusalén, nájñuhun uū kilómetro yosáva.

<sup>19</sup> Te Marta jíin María, ni quecoo cuehē jnáhan ña hebreo jeē cahán i jñuhun ndeyí ni jíin ña jeē siquí jeē ni jíhí cuāha ña.

<sup>20</sup> Te nuū ní jini Marta jeē véji Jesús, te ni quenda ña cuajnahán ña ya. Te María chi ni ndōo ña vehe.

<sup>21</sup> Te ni cahán Marta jíin Jesús:  
Núu ní íyo ní yáha, te ma cúu cuāha ná núu.

<sup>22</sup> Te vēsú súcuan te jíní na jéē tāca jéē cacán ni núu Yaā Dios, te sáha ya, achí ña.

<sup>23</sup> Te ni cahán Jesús jíin ña:  
Natecu cuāha ró.

<sup>24</sup> Te ni cahán Marta:  
Jíní na jéē nátecu de quiṽi nátecu tāca ndíyi nde quiṽi jíinu ñayívi.

<sup>25</sup> Te ni cahán Jesús:  
Máá rí cúu Yaā sáha jeē nátecu jíin jéē cótecu ní cáni. Ñayuu candíje jeē jnáma ri i, vēsú na cúu i, te natecu i.

<sup>26</sup> Te ñayuu cátecu te cándíje i ruhū, cotecu i ní cáni andívi. ¿A cándíje ró jnúhun yáha? Achí yá.

<sup>27</sup> Te ni cahán ña:  
Cándíje ná jéē maá ní cúu Cristo, Sēhe Yaā Dios, jeē achí tutu jeē quíji ini ñayívi, achí ña.

*Jeē ni ndáhyū Jesús nuū yíndūji Lázaro*

<sup>28</sup> Te ná ni cahán ña súcuan, te cuahán-ni ña, cuacana yuhu ña cuhū ña María:

Máá Maestro ni quee yā, te cána ya rohó, achí ña.

<sup>29</sup> Te jeē ní jini María jñuhun yáha, te yachí ni ndocuiñi ña, cuahán ña nuū yā.

<sup>30</sup> Te ná tu quiṽi Jesús ñuu, chi ni ndōo-ni ya nuū ni jéjnahan Marta yā.

<sup>31</sup> Te ñayuu hebreo un jéē cáyūcú ini vehe jíin María, jeē cácahán i jñuhun ndeyí ni jíin ña, ni cajito i jeē yachí

ni ndocuiñi ña cuahán ña. Te ni candiquín i ña cuangoo i, chi cájeni ni i jeē cuándahyū ña nde nuū yíndūji ndíyi.

<sup>32</sup> Yūcuán na te ni jinū María nuū íne Jesús, te ni jecuiñi yití ña nuū jehé yā, te ni cahán ña:

Núu ní íyo ní yáha, te ma cúu cuāha ná núu, achí ña.

<sup>33</sup> Te ni jito Jesús jeē ndahyū ña jíin jéē cándahyū ñayuu vējicoo jíin ña. Te yōhyo ni nducuíhyá ni yā, te ni jnahuhū ni yā jeē cundáhú ni yā i.

<sup>34</sup> Te ni cajñuhun yá ña:  
¿Ndé mí ní cachindūji ró de?  
Te ni cacahán ña jíin yá:  
Quíhín yō te cuni ní, achí ña.

<sup>35</sup> Te ni ndahyū Jesús.  
<sup>36</sup> Yūcuán na te ni cacahán ñayuu hebreo un:

Condēhe náa yōhyo maní de jíin ndíyi ún.

<sup>37</sup> Te sava i chi ni cacahán i:  
Tēe yáha jéē ní nanune de tinūu tée cuáá, ¿á tu ní cúu sáha de jeē ma cúu Lázaro nuú? achí i.

*Jeē ní natecu Lázaro*

<sup>38</sup> Te yōhyo ni jnahuhū ni tucu Jesús, te ni quee yā nde nuū yíndūji ndíyi. Te ñin yaū cava cúu, te yuyáú un ndíhyū ñin yuū.

<sup>39</sup> Te ni cahán yā:  
Tejiyo yuū un jíjnahan ró, achí yá.  
Te Marta, cuāha ndíyi un, ní cahán ña:

Je jéén xicō de, chi je ni cuu cuūn quiṽi yíndūji de.

<sup>40</sup> Te ni cahán Jesús jíin ña:  
¿A násūú je ni cahán rí jíin ró jeē núu candíje ró te coto ró jéē yōhyo cújehnu Yaā Dios jíin poder yā? achí yá.

<sup>41</sup> Yūcuán na te ni catejiyo i yuū jeē ndési yuyáú ndíyi ún. Te ni ndacoto-ni Jesús ichi ándívi, te ni cahán yā:

Tátā, na cútahū na núu ni jéē sáha ní jéē jicán na.

<sup>42</sup> Te jíní na jéē niní sáha ní jéē jicán na. Te jeē váha ñayuu cáhīin yáha cúu jeē súcuan cáhán na, návāha na cándíje i jeē maá ní ni tají sáña.

43 Te ná ni cahān yā sūcuan, te ni cahān jee ya:

Lázaro, quenda quiji ró, áchí yá.

44 Te ni quenda-ni tēe ni jihī ún, te ñúsúcún ndaha de sīhin de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

*Jeē ní casquijnáhan de jnūhun jeē cáhni de Jesús*

(Mt. 26.1-5; Mr. 14.1-2; Lc. 22.1-2)

45 Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chi ni cajito i jniñu ni sáha ya.

46 Te sava i chi cuangoo i nuū tēe grupo fariseo, te ni cacastūhún i ndese ni sáha Jesús.

47 Yūcuán na te tēe fariseo un jíin sūtū cácujeñnu ni candutútú de junta jíin táca gá tēe cácujeñnu. Te ni cacahān de:

¿Ndesa sáha yó? Chi tēe ún yōhyo cuehē jniñu jéñnu sáha de.

48 Te núu condēhé-ni yó, te ndivii ñayuu candíje i de. Te quijicoo táca tēe nación Roma jeē cácujeñnu, te canu de templo cáhnu yó, te scuíté núu de ñayuu nación yō, achí de jíjnáhan de.

49 Te ñin jnáhan de jeē naní Caifás, jeē cúu máá sūtū cujeñnu ga cuiyā ún, ni cahān de:

Róhó chi tu cájini cuiñi rō,

50 ni tu cájecūhun ni rō jeē váha ga jeē cúu ñin tēe jehē ñayuu nación yō vésú jeē náā ndivii i, áchí de.

51 Te tu ní cáhán de jnūhun yáha jéē jéni ni maá de. Chi siquī jeē cúu de sūtū cujeñnu ga cuiyā ún, te ni sáha Yaā Dios jíin de jeē ní nacani de jnūhun jeē cúu Jesús jehē ñayuu nación hebreo.

52 Te nasūu máá ñin-ni jehē nación hebreo, chi suni jehē ndivii ñayuu cácuu sēhe Yaā Dios jeē ní cajitē núu táca nación, návāha ñin na cuu i jíjnáhan i.

53 Yūcuán na te nde quiñi ún te táca tēe hebreo cácujeñnu un, ní

casquijnáhan de jnūhun jeē cáhni de Jesús.

54 Jeē yūcuan tuá ní jíca ndijin yā nuū jnáhan ñuu yā hebreo un, chi ni quenda ya región Judea, te cuahān yā ñin ñuu naní Efraín, nuū iyó yajni ñuhun téhé. Te ni condee yā yūcuan jíin tēe cácuáha jíin yá.

55 Te ni cuyajni vico pascua jeē cánasáha ñayuu hebreo. Te cuehē ñayuu táca ñuu yūcuán cuángoo i ñuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáá te quejéé vico pascua.

56 Te cánanducú i Jesús, te cácajnūhun jnáhan i ini templo:

¿Ndesa cájeni ni rō? ¿A quiji de vico, chí tuú? Achí i.

57 Te sūtū cácujeñnu jíin tēe fariseo ni candacu de jniñu jeē núu ndé ñin ñayuu jiní ndé nuū íne ya, te na cástūhún i, návāha jniñi de ya.

*Jeē ní chuhun María perfume jehē Jesús*

(Mt. 26.6-13; Mr. 14.3-9)

## 12

1 Te cúmanī iñū gā quiñi te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jihī te ni nastécu yā de.

2 Te ni casáha i ñin vico xíni jeē yñíhún i jíin yá. Te Marta ni jeni ña cohō. Te Lázaro yéji de staā jíin yá nuū mesa jíin táca gá ñayuu.

3 Yūcuán na te María ni quee ña jíin nájñūhun sava litro aceite perfume jeē máni ita nardo cúu, te yōhyo yahu ndeé. Te ni chuhun ña jehē Jesús, te ni nasíchí ña jíin ixí ña. Te ní ini vehe un ní chitú xícō perfume un.

4 Yūcuán na te ni cahān Judas Iscariote sēhe Simón, ñin tēe scuáha jíin yá un, te suu de cúu jeē nastúu de ya:

5 ¿Najehē tu ní cúyāhu perfume yáha jéē uní ciento denario, te cuáha yó núu ñayuu ndahú núu. Achí de.

6 Sūcuan ni cahān de, nasūu jéē cundáhú ndije ni de ñayuu ndahú, chí sa suhva jeē cúu de tēe cuiñá. Chi



máa de ndíso yijni xūhún, te quihin cuíhná de jeē cájequin tāca téé ún.

<sup>7</sup> Yūcuán na te ni cahān Jesús:

Ma stáhān rō ña. Chi jeē ni sáha ña yāhá cúu jeē ni sātūhva ña ruhū nde quivī jeē quíndūji rī.

<sup>8</sup> Chi níni cáyūcu ñáyuu ndahú jíin ró, te ruhū chí tuá condee rī jíin ró. Achí yá.

*Jeē ní casquínáhan de jnūhun jeē cahni de Lázaro*

<sup>9</sup> Te cuehē ñayuu hebreo ni cajini jnūhun i jeē néne ya ñuu Betania. Te ni jinūcoo i, te nasūu máa ñn jeē cuní i coto i nuū Jesús, chí suni jeē cuní i coto i nuū Lázaro, tēe jeē ní nastécu yā.

<sup>10</sup> Yūcuán na te sutū cácujeñhu ni casquínáhan de jnūhun jeē suni cahni de Lázaro.

<sup>11</sup> Chí jeē siquí Lázaro te ni cujiyo cuehē jnáhan ñuu de hebreo nuū de, te cácaníje i Jesús.

*Jeē ni quívi Jesús Jerusalén*

(Mt. 21.1-11; Mr. 11.1-11; Lc. 19.28-40)

<sup>12</sup> Te inga quivī ún, te ñayuu cuehē jeē ní quecoo vico pascua un, ní cajini jnūhun i jeē véji Jesús ñuu Jerusalén.

<sup>13</sup> Te ni cajehnde i ndaha ñúú, te ni quendacoo i cuajnahān i ya. Te cácana jee i:

Yōhyo cújéñhu Yaā Dios. Yōhyo vāha Yaā cúu Yaā jeē véji jíin jniñu máa Jítóho yō Yaā Dios. Yōhyo vāha Yaā cúu Rey nación yō Israel. Achí i.

<sup>14</sup> Te ni nihīn Jesús ñn burro, te ni jecosō yā tī, nájnūhun cáhān tutu i:

<sup>15</sup> Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō, te yósó yá ñn burro.

Achí tutu.

<sup>16</sup> Te quivī ún te tēe cáscuáha jíin yá, tu ní cájecūhun ni de jeē súcuan squícu tāca jéé yosó núu tútu i. Te nde ná ni ndujéñhu Jesús jeē cuánuhun yā andiví, te sáa te ni canucūhun ni de tāca jnūhun yósó síquī yā, jíin jéé ní casáha de súcuan jíin yá.

<sup>17</sup> Te ñayuu ní cahīn jíin yá ná ni cana ya xinī Lázaro nuū ní yíndūji

de, te ni nastécu yā de, ni canacani i jnūhun ndese ni sáha ya.

<sup>18</sup> Jeē yúcuan ní quendacoo ñayuu cuehē un, ní jejnahan i ya, chí ni cajini jnūhun i jeē ni sáha ya jniñu jéñhu un jéé ni steén yā poder yā.

<sup>19</sup> Yūcuán na te ni cacahān maá téé fariseo:

Vijna te je ni cajito yó jéé ma cúu cuiti gā casi yō. Chí jító yó jéé ndivii cuiti ñayuu cuango i jíin de. Achí de jíjnáhan de.

*Ñayuu nación Grecia nánducú i Jesús*

<sup>20</sup> Te sava ñayuu nación Grecia, suni ni quijicoo i ñuu Jerusalén vico pascua un jéé chíñúhún i Yaā Dios.

<sup>21</sup> Te ni quecoo i nuū Felipe, tēe ñuu Betsaida ndañúu Galilea. Te ni cacahān i jíin de:

Tátā, cácani ná cahān na jíin Jesús, achí i.

<sup>22</sup> Te ni jehēn Felipe, ni castūhún de nuū Andrés. Te ndíndúú de cuacastūhún de nuū Jesús.

<sup>23</sup> Te ni cahān Jesús jíin de:

Je ni quee quivī jeē ndujéñhu Yaā ní nduu tēe.

<sup>24</sup> Te jendaá cahān rī jíin ró, ñn nuní trigo núu tú ñingava nuū ñúhun te quíndūji, núu súcuan te quendōo máa ñn-ni. Te núu quíndūji, te nacayā cuehē ndasí. Te suni súcuan cánuú cuu rī quíndūji rī, návāha coo cuehē ñayuu jeē ndúu i sēhe Yaā Dios.

<sup>25</sup> Te na-ni ñayuu núu tu jéhe i jnūhun ndoho i jeē siquí ruhū, te jnahnū ndetū i. Te ñayuu jeē jéhe i jnūhun ndoho i jeē siquí ruhū ini ñayiví yáha, cotecu i ní cáni andiví.

<sup>26</sup> Núu ndé ñáyuu cuní i cuajniñu i nuū rī, na cóndiquīn i ruhū. Te nuū cóndee rī, suni yūcuán condee ñayuu jejniñu nuū rī. Te ñayuu jejniñu nuū rī, chí sáha Tátá rī jeē cujéñhu i.

*Jeē ní cahān Jesús jeē cuu yā*

<sup>27</sup> Te vijna te cúcuíhyá ndasí ni rī sáha jnūndóho quiji síquī rī. ¿Te ndese cahān rī? ¿A cahān rī jíin Tátá rī: Jnama ní sáña núu jnūndóho jeē quíji síquī ná, achí rī? Ma cúu, chí jeē siquí yúcuan cúu jeē véji rī.

28 Tātā, stéén ni jēē cujéhnu ndasí ní jíin poder ni, áchí yá.

Yūcuán na te ichi ándiví ní cahān ĩn jnūhun:

Je ni steén rī jeē cujéhnu ri, te sáha tucu ri ĩnga jínu, áchí yá.

29 Te ni cajini ñayuu cáhĭin yūcuán, te ni cacahān i jeē taja cáhān. Te sava ga i ni cacahān:

Ĩn ndajéhé Yaā Dios ni cahān jíin yá.

30 Te ni cahān Jesús jíin i:

Tu ní cáhān jnūhun yáha jēē siquī ruhū, chi sa suhva návāha cuni rō siquī jnūhun jeē ni cáhān yā jíin rí.

31 Vijna cúu jeē sándaā Yaā Dios siquī cuéchi ñayuu ñayīvi yáha. Vijna cúu jeē scúnu ya jexeén jeē ndácu jniñu ĩni ñayīvi yáha.

32 Te ruhū, núu na jínu condita caa ri cuu rī ĩni ñayīvi, te sáha ri jeē jnāā tāca ñáyuu quīvicoo i ndaha ri, achí yá.

33 Súcuan ni cahān yā jeē steén yā ndese modo cuu yā.

34 Te ni cacahān ñayuu jíin yá:

Ni cajini sōho ná jēē cahān tutu ley Yaā Dios cánevāha yó, jeē Cristo cotecu yā ní cáni. ¿Te naun cáhān ni jēē Yaā ní nduu tēe, cánuú condita caa ya cuu yā? ¿Ndé ĩn cúu máá Yáā ní nduu tēe núu súcuan? Achí i.

35 Yūcuán na te ni cahān Jesús:

Máá jecu na quīvī condee rī jíin ró jeē cúu ri luz cundijin ĩni anuá rō. Núu súcuan te vijna jeē iyó gá luz rī jíin ró, te caca ró jíin, chi sanaa ni rō te cuahān rī, te nájñūhun quendōo ró núu néē. Chi ñayuu cájica nájñūhun nuū néē, tu cájini i ndé nuū cuángoo i.

36 Núu súcuan te níni ndéé gá rī jíin ró, te candíje ró rúhū jeē cúu ri luz, návāha nduu ró ñáyuu cájica jíin luz, achí yá.

Súcuan ni cahān Jesús tāca jnūhun yáha, te cuahān-ni ya, te tuá ni stéén yā maá yá nuū i.

*Jeē tu ní cá candíje ñayuu hebreo jeē cúu ya Cristo*

37 Te vēsú cuehē jniñu jéhnu ni sáha Jesús jeē steén yā poder yā nuū i, te tu ní cá candíje i ya.

38 Chi squícu nahín jnūhun ni cahān Isaías, tēe ni nacani jnūhun Yaā Dios nde jenahán:

Tātā Yaā Dios, tu ní cá candíje ñayuu jnūhun ni canacani ná, te tu ní cá candíje i jniñu jéhnu jeē ni stéén ni poder ni núu i.

Achí Isaías.

39 Jeē yúcuan tu ní cúu candíje i, chi ni cahān tucu Isaías:

40 Ni sáha ya jeē nájñūhun cáhĭyo cuáá ánuá i,

jíin jēē cá cunĭhni ni i, návāha coo nájñūhun jeē tu cájito i, te ni ma jécūhun ni i, ni ma násāma ĩni i quīvicoo i nuū rī, jeē nasávāha ri anuá i nuū cuéchi i.

Achí Cristo, achí tutu.

41 Jnūhun yáha ní cahān Isaías, chi je ni jito de ndese yōhho cújéhnu Jesús, te ni cahān de ndese coo quīvī jeē quíji ya.

42 Te vēsú súcuan te cuehē ñayuu hebreo chi ni cacandíje i ya, te suni nde jíin sava tēe cándacu jniñu. Te tu ní cá cachi de jeē cá candíje de ya, chi siquī jeē cáyūhú de tāca tēe fariseo. Chi núu súcuan te quenehen ún de ĩni vehe ĩi sinagoga jeē ma cuáha ga jnūhun quīvicoo de.

43 Chi cá cusĭ gā ni de jeē cujéhnu de sáha ñayuu, vēsú jeē cujéhnu de sáha Yaā Dios.

*Jnūhun cáhān Jesús cúu jeē sándaā siquī ñáyuu*

44 Te ni cahān jee Jesús:

Ñayuu cá candíje ruhū, nasūu máñūhún-ni ruhū cá candíje i, chi suni cá candíje i nde maá Tātá rī, Yaā ní tají rúhū.

45 Te ñayuu cájito nuū rī, suni cájito i nuū Yaā ní tají rúhū.

46 Máá rí jeē cúu ri luz cundijin ĩni anuá ñayuu, ni quíji ri ĩni ñayīvi návāha tāca ñáyuu cá candíje ruhū, ma cáca i nájñūhun nuū néē.

47 Te núu ĩn ñayuu jíni sōho i jnūhun cáhān rī, te núu tu jétáhú i, te nasūu rúhū sándaā siquī i. Chi tú vēji ri jeē

ndénehen ri cuēchi siquī ñayuu ñayīví, chi sa suhva jeē jnáma ri i.

48 Te ñayuu jeē casquéhichī i ruhū te tu cájetáhú i jnūhun cáhán rī, íyó ñn jeē sándaā siquī i. Suu tāca jnúhun jeē ni cáhán rī, jnūhun un cúu jeē ndenehen cuēchi siquī i quiví jínu ñayīví.

49 Chi tu cáhán rī jeē cúu ni maá rí, chi Tátá rī, Yaā ní tají ruhū, maá yá ni ndacu jniñu nuū rī ndese cahán rī jíin ndese stéén rī.

50 Te jíin rī jeē jniñu ndácu Tátá rī sáha jeē cótecu ñayuu ñí cáni. Núu súcuan te jnūhun cáhán rī, chi máni jnūhun jeē ní cachi Tátá rī cúu, áchí yá.

*Jeē ní nacate ya jehē tēe cáscuáha*

### 13

1 Te jehíni inga quiví te quejéé vico pascua. Te je jíin Jesús jeē ní quee quiví jeē quénda ya ñayīví yáha quínuhun yā nuū Tátá yā. Te níni cúndáhú ni yā ñayuu maá yá jeē cáyūcú ini ñayīví. Te vijna jeē jíin jeē íne ya ñayīví, te sáha ya ñn jniñu jeē steén cají yá jeē cundáhú ni yā i.

2 Te jexeén je ni squívi ini anuá Judas Iscariote sēhe Simón, jeē vijna nastúu de ya.

3 Te jíin Jesús jeē véji ya nuū Yaā Dios, te nuhūn yā nuū Yaā Dios, jíin jéē ni sáha Tátá yā jeē cujéhnú ya siquī ndíhi-ni.

4 Te cúxíni ya jíin tēe cáscuáha jíin yá, te ni ndocuíñi yā. Te ni stáa ya sahmandí ya, te ni jihni yā ñn toalla chíji ya.

5 Te ni chuhun ya ndute ini ñn ti-jehēn. Te ni quejéé yá nacate ya jehē tēe cáscuáha. Te násíchí yā jíin toalla jeē nuhní chíji ya.

6 Te ni jinū yā nuū Simón Pedro. Te ni cahán Pedro jíin yá:

¿Sa maá ní nacate jehē ná naún?

7 Te ni cahán Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.

8 Te ni cahán Pedro jíin yá:

Ma nacate cuíti ni jehē ná.

Te ni cahán Jesús:

Núu tú nacate ri jehē rō, te ma cúu cundúu rō jíin rí.

9 Te ni cahán Simón Pedro:

Núu súcuan cúu te nasūu maá jehē-ni ná, chi suni nacate ní ndaha ná jíin xíní ná, áchí de.

10 Te ni cahán Jesús jíin de:

Tēe jeē sa ní jichi, tu jíin ñúhún ndundoo ñí cáhnu de, chi maá jehē-ni de, chi je íyó ndoo ñí cáhnu de. Te maá ró chi je ni candundoo ró. Te tú ndíhi ró cáhīyo ndoo.

11 Chi je jíin yā ndé ñn de cúu jeē nastúu de ya, te jeē yúcuán ní cahán yā: Tú ndíhi ró cáhīyo ndoo.

12 Te nuū ni jíin ni nacate ya jehē de jíinahan de, te ni naquihin ya sahmandí ya, te ni nucōo tucu ya nuū mesa. Te ni cahán yā:

¿A cájecūhun ni rō na vé cuní cahán jeē ni sáha ri jíin ró?

13 Cácahán rō jeē Maestro jíin Jítoho rō cúu ri, te ndaā cácahán rō, chi suu ndije cúu ri.

14 Núu súcuan te vēsú Maestro rō jíin Jítoho rō cúu ri, te ni nacate ri jehē rō jíinahan ró, te suni súcuan cánuú jéē nacate maá ró jehē jnáhan ró.

15 Chi jniñu yáha ni sáha ri jeē steén rī nuū rō jeē suni súcuan sa cuajníñu ró núu jnáhan ró, nájnūhun sa maá rí ni jejniñu ri nuū rō.

16 Jendaá cahán rī jíin ró jeē ñn mozo tu cújéhnú de nuū patrón de, te tēe jíca jniñu táhú nuū de, te cújéhnú de nuū tēe ni tají de. Te maá ró cácu mozo rī, te na cuájníñu ró núu jnáhan ró nájnūhun ni steén rī nuū rō.

17 Te núu ni cajecūhun ni rō jnūhun yáha, te yōhyo ndetū rō te núu squícu ró.

18 Te nasūu jéē cahán rī jeē ndíhi ró ndetū, chi je jíin rī tāca rōhó jéē ní nacáji ri. Te cánuú squícu jnūhun yáha jeē cáhán tutu íi: Tēe yéji staā jíin rí, ni ndió cuíñi de siquī rī, achí tutu.

19 Te vijna te je cástūhun rí tāca jéē yáha núu rō nde ná tu coo, návāha núu na cóo, te candíje ró jéē maá rí cúu Yaā ní tají Yaā Dios.

20 Jendaá cahán rī jíin ró jeē na-ni ñayuu jeē cuatáhú i tāca jéē tají rí, te ruhū jetáhú i. Te ñayuu jetáhú ruhū,

suní jétáhú i Yaā ní tají rúhū vēji ri, achí yá.

*Jeē ní cachi yā jeē nastúu Judas yā*  
(Mt. 26.20-25; Mr. 14.17-21;  
Lc. 22.21-23)

<sup>21</sup> Te ná ni cahān Jesús tāca jnúhun yáha, te ni cucuíhyá ndasí ni yā. Te ni cahān cají yá:

Jendaá cahán rī jín ró jijnáhan ró jée ñn máá ró nastúu ruhū, achí yá.

<sup>22</sup> Yūcuán na te tēe cáscuáha jín yá, ni candacoto de nuū jnáhan de, cájeni ni de ndé ñn de cúu jeē ni cáhān yā.

<sup>23</sup> Te ñn máá tēe scuáha jeē maní gā yā jín, néne de xiin ya mesa jeē cáxúini de jín yá.

<sup>24</sup> Te ni sáha Simón Pedro seña nuū de jeē na cájnūhún de ya ndé ñn de cúu jeē ni cáhān yā.

<sup>25</sup> Yūcuán na te tēe un ní scáyí de máá de nuū Jesús, te ni cajnūhún de ya:

¿Ndé ñn de cúu? áchí de jín yá.

<sup>26</sup> Te ni cahān Jesús:

Na chúndaji ri staā te cuāha ri nuū ñn de, te suu tēe un cúu, achí yá.

Te ni chundaji ya staā, te ni jēhe ya nuū Judas Iscariote sēhe Simón.

<sup>27</sup> Te jeē ní quihín de staā ún, te ni quívi-ni Satanás ini anuá de. Yūcuán na te ni cahān Jesús jín de:

Jniñu jeē sáha ró, na sáha yachī rō.

<sup>28</sup> Te ni ñn tēe cáyeji staā jín yá, tu ní cájecūhun ni de naun ni cahān yā súcuan jín de.

<sup>29</sup> Chi sava de cájeni ni de jeē ni cáhān Jesús jín Judas jeē cuāan de jeē jíní ññhún yá vico ún, chí jée cuáha de jecu xūhun núu ñayuu ndahú. Chi máá de ndíso yijni xūhún.

<sup>30</sup> Te jeē ní yeji de staā ún, te ni quenda-ni de cuahān de. Te je ni cuaa.

*Jeē ní ndacu ya jniñu jée*

<sup>31</sup> Yūcuán na te jeē cuahán Judas te ni cahān Jesús:

Vijna te ruhū, Yaā ní nduu tēe, stéén rī ndese cújéhnú ri, te suni jín rúhū te cuni ñayuu ndese cújéhnú Yaā Dios.

<sup>32</sup> Te núu jín rúhū cuni ñayuu ndese cújéhnú Yaā Dios, núu súcuan te suni

stéén Yaā Dios ndese cújéhnú ruhū jeē cúu ri Sēhe ya. Te yachī-ni stéén yā.

<sup>33</sup> Séhē, tuá nahán condee rī jín ró jijnáhan ró. Te nanducú ró ruhū, te nájnūhun ni cahān rī jín táca jnáhan yó hebreo, suni súcuan cáhān rī jín ró vijna, jeē ma cúu jinūcoo ró núu quihín rī.

<sup>34</sup> Te vijna te ndácu ri ñn jniñu jée núu rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō jnáhan ró.

<sup>35</sup> Te núu cúndáhú ni rō jnáhan ró, súcuan te cuni tāca ñáyuu jeē cácuu ró tēe cáscuáha jín rí, achí yá.

*Jeē ní cachi yā jeē yūhu Pedro cahān de jeē jíní de ya*  
(Mt. 26.31-35; Mr. 14.27-31;  
Lc. 22.31-34)

<sup>36</sup> Te ni cahān Simón Pedro jín yá:

¿Ndé nuū quihín ni núu súcuan?

Te ni cahān Jesús:

Nuū quihín rī chí ma cúu condiquín rō ruhū vijna, te cúcuéé gá te jinū rō.

<sup>37</sup> Te ni cahān Pedro:

¿Najehē ma cúu condiquín na níhín vijna? Tu yúhú ná cuu na jée síquí ni.

<sup>38</sup> Te ni cahān Jesús:

¿A jéni ni rō jeē tu yúhú ró cuu rō jeē síquí rī? Jendaá cahán rī jín ró jeē nde ná tu cana líhli, te uní jínu yūhu ró te cahān rō jeē tu jíní rō ruhū. Achí yá.

*Jesús cúu ichi jeē jínú yō nuū Tatáyā*

## 14

<sup>1</sup> Te ni cahān gā yā:

Ma cucuíhyá ni rō síquí tāca jnúndóho. Na cándíje ró jée sáha Yaā Dios jehē rō, te suni na cándíje ró jée sáha ri jehē rō.

<sup>2</sup> Chi nuū ndeé Tátá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rí nuū rō nuú. Núu súcuan te quihín rī quisátūhva ri nuū cóyūcu ró.

<sup>3</sup> Te jeē quihín rī sátūhva ri nuū cóyūcu ró, te ndiji ri quinaquihín ri rohó quíhín yō, návāha suni cóyūcu ró nuū cóndee máá rí.

4 Te je cájini rō ndé nuū quihín rī, te cájini rō ndese jinū rō yūcuán. Achí yá.

5 Te ni cahān Tomás jiín yá:

Tu cájini na ndé nuū quihín ni, ¿te ndese cuni ná ichi jínú yūcuan núu súcuan?

6 Te ni cahān Jesús jiín de:

Máá rí cúu ichi jinū rō andiví, te máá rí cúu jnūhun ndaā jiín jnúhun cotecu rō nī cáni. Te ni ñn ma jinú nuū Tatá rī te núu tú ruhū.

7 Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chi je ni cajito rō núu rī, achí yá.

8 Te ni cahān Felipe jiín yá:

Stéen ni Tátá ni núu ná, te na cúvaha ni na jijnáhan ná, achí de.

9 Te ni cahān Jesús:

Felipe, je ni cuu cuehē quiví jica ri jiín ró jijnáhan ró, ¿te á ná tu cuni rō ndé ñn cúu ri naún? Tēe jeē jito ruhū, suu Tátá rī jito de. Núu súcuan ¿te najehē cahán rō jeē steén rī Tatá rī nuū rō?

10 ¿A tu cándije ró jéē ñn-ni cúu ri jiín Tátá rī, te Tátá rī ñn-ni cúu ya jiín rí? Tāca jnúhun cáhán rī jiín ró, nasūu jnúhun máá rí cúu. Chí Tátá rī jeē ñn-ni cúu ya jiín rí, máá yá sáha tāca jniñu jeē sáha ri.

11 Candije ró jijnáhan ró jéē ñn-ni cúu ri jiín máá Tátá rī, te Tátá rī ñn-ni cúu ya jiín rí. Te núu tu cájecūhun ni rō, te cándije ró rúhū siquī tāca jniñu sáha ri.

12 Jendaá cahán rī jiín ró, núu ndé ñayuu cándije ruhū, jniñu jéhu jeē sáha ri yāhá, suni sáha i. Te jéhu ga jniñu sáha i vésú yāhá, chi quinuhun rī nuū ndeé Tatá rī.

13 Te tāca na-ni vé cacán rō nuū Tatá rī siquī jeē cándije ró jéē cúu ri Sēhe ya, te sáha ri jeē cacán rō, te súcuan steén rī jeē yóhyo cújéhu Tatá rī.

14 Chí tāca na-ni vé cacán rō siquī jeē cándije ró rúhū, te sáha nahín rí.

*Jeē ni jéjñuhun ya jeē tají yá Espiritu Santo*

15 Te núu manī rō jiín rí jijnáhan ró, te na squícu ró jniñu ndácu ri nuū rō.

16 Te cacán tahu rī nuū Tatá rī, te tají yá inga Yaā chindéé ñáhán róhó, te sáha ya jeē cóo sñ ni rō jijnáhan ró. Te Yaā un cúu máá Espiritu jeē steén jnūhun ndaā, te condee yā jiín ró nī cáni.

17 Te ñayuu ñayiví má cúu cuatáhu i ya, chi tu cúu coto i nuū yā, ni tu cúu cuni i ndese Yaā cúu ya. Te máá ró chi je cájini rō ndese Yaā cúu ya, chi ndeé yá jiín ró, te condee yā ini anuá rō nī cáni.

18 Ma stóo uun ri rohó, chi ndiji ri nuū rō.

19 Jecu na quiví te ma cóto ga ñayuu ñayiví núu rī. Te máá ró jijnáhan ró chi coto ró núu rī, chi cotecu rī nī cáni, te jeē yúcuan suni cotecu máá ró.

20 Te quiví ún te cuni rō jeē ñn-ni cúu ri jiín Tátá rī, te máá ró ñn-ni cúu ró jiín rí jeē ndeé rí ini anuá rō jijnáhan ró.

21 Te na-ni ñayuu núu ñúhun ni i jniñu ní ndacu ri, te squícu i, ñayuu un cúu jeē maní ndije jiín rí. Te ñayuu jeē maní jiín rí, suni coo manī Tatá rī jiín i. Te suni ruhū coo manī rī jiín i, te steén rī nuū i jeē nduú rí jiín i. Achí yá.

22 Te ni cahān Judas jiín yá (te nasūu tée cúu Iscariote):

Najehē cúu jeē steén ni máá ní nuū ná, te nuū ñayuu ñayiví chi tuú?

23 Te ni cahān Jesús:

Ñayuu jeē maní jiín rí, chi cásquícu i jeē cahán rī. Te coo manī Tatá rī jiín i. Te Tátá rī jiín máá rí quijicoo ri cundúu rí jiín i.

24 Te ñayuu jeē tú manī jiín rí, tu cásquícu i jeē cahán rī. Te jnūhun cájini sōho ró cáhán rī, nasūu jnúhun máá rí cúu, chi jnūhun máá Tatá rī jeē ní tají rúhū cúu.

25 Tāca jnúhun yáha cáhán rī jiín ró níní íne ga rī jiín ró.

26 Te Tátá rī chi tají yá Espiritu Santo, quiji nucuiñi nuū rī. Te máá yá chindéé ñáhán yá rohó, te sáha ya jeē cóo sñ ni rō. Te steén yā tāca jnúhun nuū rō, te nacachi tucu ya tāca jéē ni cáhán rī jiín ró.

27 'Te jeē quihín rī, te sáha ri jeē cóo ndeyí coo sī ni rō. Nájñūhun íyó ndeyí sī ni maá rí, suni súcuan coo ndeyí sī ni rō sáha ri. Te jeē sáha ri jeē cóo ndeyí sī ni rō, tu quíjnáhan jíin jñūhun ndeyí cácahān ñayuu ñayīví. Ma cucuíhyá ni rō siquī tāca jñúndóho, te ni ma yūhu ró.

28 Je ni cajini sōho ró jēē ni cáhān rī jeē quihín rī, te ndiji ri cundúú rí jíin ró. Te núu cáhīyo manī vāha ró jíin rí, te cusī ni rō jeē ni cáhān rī jeē nuhún rī nuū Tatá rī. Chi cújéhnū ga Tatá rī vijna vēsú ruhū.

29 Je ni castūhun rí nuū rō tāca jñūhun yáha nde ná tu coo, návāha núu je ni cuu, te candíje ró rúhū jijnáhan ró.

30 'Ma cahán rī cuehē gā jñūhun jíin ró, chi je vēji jexeén jeē ndácu jñiñu ini ñayīví yáha. Te tú na vé cúu sáha siquī rī nuū.

31 Te na cóo nájñūhun ni ndacu Tatá rī jñiñu nuū rī, návāha cuni ñayuu ñayīví jēē manī rī jíin Tatá rī, te sáha ri jñiñu ní ndacu ya. Ndocuiñī jijnáhan ró na quíngoo yó. Achí yá.

*Jesús cúu nájñūhun yoyúcú uva*

## 15

1 'Maá rí cúu nájñūhun yoyúcú uva vāha ndaā, te Tatá rī cúu nájñūhun tēe ndító yoyúcú uva un.

2 Te máá ró chi cácuu ró nájñūhun ndaha, te núu tu jéhe ró ndéhē te quende yā rohó. Te núu cácuu ró nájñūhun ndaha jeē jéhe ndehē, te nasándoo ya nacahnde yā rohó nájñūhun jeē cúu ró ndaha ún, návāha cuāha ró cuehē gā ndehē.

3 Te máá ró chi je ni candundoo ánuá rō jíin jñūhun ni steén rī nuū rō, nájñūhun ndúndoo ndaha uva.

4 Na cundúú ró jíin rí, te suni máá rí cundúú rí jíin ró. ñn ndaha uva ma cúu cuāha ndehē jeē maá, te núu tu yíjnī jicā yóho. Te suni súcuan máá ró, ma cúu sáha ró jñiñu vāha te núu tu cundúú ró jíin rí.

5 'Maá rí cúu yoyúcú un, te máá ró cácuu ndaha ri. Ñayuu jeē nduú jíin

rí, te ruhū ndúú rí jíin i, máá i cúu nájñūhun ndaha jeē jéhe cuehē ndehē. Chi núu tú cundúú ró jíin rí, te tú cuiñi na jñiñu vāha cuu sáha ró.

6 Ñayuu jeē tu cundúú jíin rí, quende yā i nájñūhun ñn ndaha uva, te ichī. Te ndoho i nájñūhun ndaha uva un jēē ndutútú te cayū nuū ñuhún.

7 'Núu ndúú ró jíin rí, te cáñuhun ni rō jñūhun cáhān rī, yūcuán na te cacān rō na-ni vé cácuu rō, te sáha ri jeē cácahān rō.

8 Te núu cásaáha ró cuehē jñiñu vāha, súcuan cástéén rō jeē cúu ndije ró ñayuu cascuáha jíin rí, te súcuan nácuni ñayuu jeē yóhyo cújéhnū Tatá rī.

9 Nájñūhun manī Tatá rī jíin rí, suni súcuan manī rī jíin ró jijnáhan ró. Núu súcuan te ma siaá rō jñūhun manī rī jíin ró.

10 Núu squícu ró jñiñu ní ndacu ri nuū rō, te níní coo manī rī jíin ró, nájñūhun máá rí squícu ri jñiñu ní ndacu Tatá rī nuū rī, te níní íyó mání yā jíin rí.

11 'Súcuan ni cahán rī jíin ró návāha coo sī ni rō nájñūhun íyó sī ni rī, chi nde cusī teyí ni rō.

12 Te yāha cúu jñiñu ndácu ri nuū rō jijnáhan ró: jeē na cundáhú ni rō jñáhan ró nájñūhun cundáhú ni rī rohó.

13 Núu ñn tēe cuu de jehē amigo de, te tuá na vé cúmanī gā sáha de jeē cundáhú ni de amigo de.

14 Te máá ró cácuu amigo rī núu squícu ró jñiñu ndácu ri nuū rō.

15 Ma cahán gā rī mozo jíin ró, chi ñn mozo tu cástūhún patrón nuū i ndese jéni ni de sáha de. Chi sa suhva amigo cahán rī jíin ró, chi je ni castūhun rí nuū rō tāca jñūhun ni cahán Tatá rī jíin rí.

16 Máá rí ni nacāji rohó jēē jnáma ri rohó, te nasūu máá ró ni cánacani ni xihna gā jeē cóndiquín rō ruhū. Te ni jeni ri rohó jēē caca ndaā rō te scándíje ró cuehē ñayuu jeē cuu i sēhe ri ní cáni. Te súcuan te ndiñi jeē cacán rō nuū Tatá rī siquī jeē cácuu ró rúhū, sáha ya jeē jicán rō.

17 Te yāha cúu jniñu ndácu ri nuū rō: jeē na cúndáhú ni rō jnáhan rō.

*Jeē cáquitī ni ñayuu ñayīvi nuū Jesús jín nuū ñayuu cácandíje*

18 'Te núu cáquitī ni ñayuu ñayīvi nuū rō jijnáhan rō, te je cájini rō jeē xíhna gā nuū maá rí ni caquitī ni i.

19 Te núu jeē iyó gá rō jín modo ñayuu ñayīvi, te coo manī ñayuu ñayīvi jín rō nuú, nájñuhun manī i jín jnáhan i. Te ni nacāji ri rohó jéē tuá coo rō jín modo ñayuu ñayīvi. Te jeē yúcuan cáquitī ni i nuū rō, chi tuá cácuu rō cuenta ñayīvi.

20 Nucūhun ni rō jñuhun ni cahān rī jín rō: Núu tu iyó yñúhún ñayuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rohó jéē cácuu rō mozo rī. Te núu jeē ni cájetáhú i jñuhun ni steén rī, te suni cuatáhú i jñuhun cásteén rō.

21 Te tācá jniñu yáha sáha i jín rō jeē siquī ruhū, chi tu cájini i Yaā ní tají rúhū vēji ri.

22 'Núu jeē tu ní quiji ri nacani ri jñuhun nuū i, te ma cóo cuēchi i núu. Te vijna chi ma cúu ga cahān i jeē tu jín i jeē iyó cuēchi i.

23 Ñayuu jeē cáquitī ni nuū rī, suni nuū Tatá rī cáquitī ni i.

24 Núu jeē tu ní sáha ri jniñu jéhu nuū i jeē ní ñn tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitī ni i nuū rī jín nuū Tatá rī.

25 Te súcuan cásáha i návāha squícu jñuhun yósó núu tútu ley Yaā Dios jeē cánevāha i: Ni caquitī ni i nuū rī, vēsú tú na cuēchi ri, achí.

26 'Te tají rí maá Yaā chindéē ñáhán rohó te sáha ya jeē cóo sī ni rō. Te Yaā un cúu maá Espíritu jeē steén jñuhun ndaā, te quiji ya nde nuū Tatá rī, te nacani cáj yá jñuhun rī.

27 Te suni maá rō nacani rō jñuhun ri, chi je cáhīn ro jín rí nde ná ni quejéé rí nacani ri jñuhun.

## 16

1 'Tāca jñuhun yáha ní cahān rī jín rō návāha ma náyūhu rō jeē quiji jñundóho.

2 Chi quenehen i rohó jéē ma cuáha ga i jñuhun cone rō táca vehe iī sinagoga. Te quee quivī jeē cahni i rohó, te cani ni i jeē ñn jniñu váha ni sáha i nuū Yaā Dios.

3 Te súcuan sáha i jín rō, chi tu cájini cuítī i máá Tatá rī ni máá rí.

4 Te ni cahān rī jñuhun yáha jín rō návāha núu je ni quee quivī jeē súcuan coo, te nucūhun ni rō jeē jé ni cahān rī jín rō.

### *Jniñu sáha Espíritu Santo*

'Te tu ní cáhán rī jñuhun yáha jín rō nde xíhna ñúhún, chi íne máá rí jín rō jijnáhan rō.

5 Te vijna chi nuhūn rī condee rī jín Yaā ní tají rúhū vēji ri. Te ni ñn rō tu cájñuhun rō ndé nuū quihín rī.

6 Chi máá jéē cácuquíhyá ndasí ni rō jeē ni cáhán rī súcuan jín rō.

7 Jendaá cahān rī jín rō: Jeē váha máá rō jijnáhan rō cúu jeē quihín rī. Chi núu tú quihín rī, te ma quiji Yaā chindéē ñáhán rohó te sáha ya jeē cóo sī ni rō. Te núu cuahān rī, te tají rí yā quiji ya nuū rō.

8 Te jeē quée yā, te steén yā nuū ñayuu ñayīvi jéē iyó cuēchi i, jín ndese quivícoo i ichi ndaā, jín jéē sándaā Yaā Dios siquī cuēchi i.

9 Steén yā jeē iyó cuēchi i, chi tu cácandíje i ruhū.

10 Te steén yā siquī ichi ndaā, chi máá rí nuhūn rī nuū Tatá rī, te ma cóto ga rō nuū rī.

11 Te steén yā siquī jeē sándaā Yaā Dios cuēchi ñayuu, chi je ni cundaā jeē jnahnú ndetū maá jéxeén jeē cujéhu ñi ñayīvi yáha.

12 'Te iyó cuéhē gā jñuhun cúní rī cahān rī jín rō, te ma cúu jecūhun ni rō vijna.

13 Te jeē quée maá Espíritu jeē steén jñuhun ndaā, te máá yá steén tāca jñuhun ndaā un núu rō. Chi ma cahān yā jeē maá yá, chi cahān yā tāca jéé jín

sōho ya cahán Yaā Dios. Te stéén yā siquī tācá jniñu jeē coo.

14 Te stéén yā jeē kujénu ri, chi nacastūhun yá nuū rō tāca jnúhun jeē jé ni cahán rī, te sáha ya jeē jécūhun ni rō.

15 Ndihi ndese cújénu Tátá rī, suni súcuan cújénu máá rí. Jeē yúcuan ní cahán rī jeē Espíritu Santo nacastūhun yá nuū rō tāca jnúhun jeē jé ni cahán rī, te sáha ya jeē jécūhun ni rō jijnáhan ró.

*Vēsú cácuíhyá ni rō, te ndusī ni rō*

16 Jecu na te ma cóto ga rō nuū rī. Te jecu tucu quivī te coto tucu ró núū rī, chi quínuhun rī nuū ndeé Tátá rī. Achí yá.

17 Yūcuán na te sava tēe cáscuáha jín yá, ni cacajnūhun jnáhan de:

¿Na jnúhun cúu jeē yáha jeē cahán yá jín yó? Chi áchí yá jeē jecu na te ma cóto ga yō nuū yā, te jecu tucu quivī te coto tucu yó núū yā, chi siquī jeē quínuhun yá nuū ndeé Tátá yā.

18 ¿Na jnúhun cúu jeē yáha jeē cahán yā, jecu na? Tu cájecūhun ni yō na vé cúu jeē cahán yā. Achí de.

19 Te ni jini Jesús jeē cáconi de cajnúhún de ya. Te ni cahán yá jín de:

¿A cácajnūhun jnáhan ró na vé cúu jeē ni cahán rī jín ró jeē jecu na te ma cóto ga rō nuū rī, te jecu tucu quivī te coto tucu ró núū rī?

20 Jendaá cahán rī jín ró jeē ndahyū rō jijnáhan ró te cucuíhyá ni rō, te ñayuu ñayiví chi sa cusī ni i. Te vēsú cucuíhyá ni rō, te sa ndusī ni rō jeē cóto tucu ró núū rī.

21 ñn ñahan núu cuacuyajni scácu ña, te jéhnde chíji ña, chí je ni quee hora jeē scácu ña. Te núu je ni scácu ña sūchi lúlí, te tuá nahán ña jeē ní ndoho ña, chí cusī ni ña jeē ní cacu sēhe ña.

22 Te suni súcuan cúu jeē cándoho ró vijna, chí cácuíhyá ni rō jín rí. Te jecu-ni quivī te coto jnáhan tucu yó, te cusī ndasí ni rō. Te ni ñn ma cúu casí jeē cusī ni rō.

23 Te quivī ún chí tú na vé cacán gā rō nuū rī. Chí jendaá cahán rī jín ró jeē nuū maá Tátá rī cacán rō, te

sáha ya ndihi jeē cájicān rō, siquī jeē cácaandíje ró rúhū.

24 Nde vijna te ná tu cacán rō nuū Tátá rī jeē jín síhví rí. Te vijna te na quéjéé ró cacán rō jín síhví rí, te nihīn rō, návāha cusī ndasí ni rō.

*Je ni quende yā poder ndihi jeneé cáhīyo ini ñayiví*

25 Tāca jnúhun yáha ní cahán yatá rí jín ró. Te quee quivī jeē ma cahán yatá gá rí jín ró, chí sa suhva castūhun cájí rí nuū rō siquī Tátá rī.

26 Te quivī ún chí cacán rō nuū Tátá rī siquī jeē cácaandíje ró rúhū. Te tu cáhan rī jín ró jeē cacán tahu rī jehē rō nuū Tátá rī.

27 Chí máá Tátá rī je cúndáhú ni yā rohó siquī jeē cáhīyo manī rō jín rí, te ni cacandíje ró jéé ndé nuū maá yá vēji rí.

28 Ni quenda ri nde nuū Tátá rī, te ni quee rí ini ñayiví. Te vijna te quenda ri ini ñayiví, te nuhūn tucu ri nuū Tátá rī. Achí yá.

29 Te ni cacahán tēe cáscuáha jín yá:

Vijna te cáhan cají ní, te tuá cahán yatá ní.

30 Vijna te cájini na jéé jini ni ndivii cuiti, te tuá jini ñúhún jéé cájnūhún ni ñn ná níhín. Jeē yúcuan cácaandíje ná jéé véji ní ndé nuū Yaā Dios. Achí de.

31 Te ni cahán Jesús jín de:

¿A ndé vijna te cácaandíje ró naún?

32 Te quiji quivī, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jéé quéndōo máñúhún rí, chí Tátá rī íne ya jín rí.

33 Tāca jnúhun yáha ní cahán rī jín ró návāha coo ndeyí coo sí ni rō siquī jeē cácaandíje ró rúhū. Ini ñayiví chí cánuú coto ró jnúndóho. Te vēsú súcuan te na cóo sí ni rō, chí je ni quende rí poder tāca jéneé cáhīyo ini ñayiví. Achí yá.

*Jeē ni jicān tahu Jesús jehē ñayuu cácaandíje*



## 17

1 Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátā, je ni quee quiví jeē ndóho ná. Vijna te stéén ni jéē cujéhnu máá ná jeē cúu ná Séhe ní, návāha suni máá ná steén na jéē cujéhnu máá ní.

2 Chi ni sáha ní jéē ndíso jniñu ná síquī tāca ñáyuu, návāha tāca ñáyuu jeē ni jéhe ní núū ná, cotecu i ní cáni sáha ná.

3 Te suhva cúu jnúhun cotecu i ní cáni: suu jeē na cúni i níhín jéē mañúhún-ni ní cúu Yaā ndaā, jíin jéē cúni i sãñá jeē cúu ná Jesucristo, Yaā ní tají ní.

4 Je ni steén na núū ñáyuu ñayiví jéē cujéhnu ní, te je sínu ná jniñu ní ndacu ní núū ná.

5 Te vijna, Tátā, sáha ní jéē ndujéhnu tucu ná ndé nuū néne ní, nájnūhun cujéhnu ná jíin ní nde ná tu jecōo ñayiví.

6 Ñayuu jeē ní nacāji ní ini ñayiví, ni jéhe ní i nuū ná, te ni steén na núū i ndese Yaā cúu ní. Cuenta máá ní cúu i, te ni jéhe ní i nuū ná. Te ni cajetáhú i jnúhun ní, te ni casquícu i.

7 Te vijna te cájini i jeē ndé nuū máá ní vëji tāca jéē iyó jíin ná.

8 Chi tāca jnúhun ni cahān ni jíin ná, ní castūhun ná núū i, te ni cajetáhú i. Te ni cajini i jeē ní quenda ndije ná ndé nuū máá ní, te ni cacandíje i jeē máá ní ni tají sãña.

9 Te jíicán tahu na jéhē máá i jíinahan i. Tu jíicán tahu na jéhē ñáyuu ñayiví jéē tu cáandíje, chi sa jehē máá ñáyuu ni jéhe ni núū ná, chi cuenta máá ní cácuu i.

10 Te tācá i jeē yíhi i ndaha máá ná, suni cuenta máá ní cúu. Te tācá i jeē cúu i cuenta máá ní, suni cuenta máá ná cúu i. Te cástéén i ndese cujéhnu ná.

11 Te tuá condee ná ini ñayiví. Te máá i chi quendōo i ini ñayiví, te máá ná chi najeē ná condee na jíin ní. Yaā iñ Yaā ndoo cúu ní, Tátā. Te jíin poder ní condito ní táca ñáyuu ni jéhe ni núū

ná, návāha inuú na cóo ni i jíinahan i, nájnūhun cúu máá yó.

12 Te jeē ní condee na jíin i ini ñayiví, te jíin poder ni ní condito ná i. Tāca ñáyuu ni jéhe ni núū ná, ni condito yúcún ná i. Te tu ní jéhe na jnúhun naa i jíinahan i, chi máá in-ni tēe jeē je cúu de tēe jnahnū ndetū, návāha squícu jnúhun yósó núū tútu iñ.

13 Te vijna te najeē na núū ní, te cáhán na táca jnúhun yáha jíin i níni jéē íne ga ná ini ñayiví, návāha na cóo sñ ndasí ni i nájnūhun cúsiñ ni máá ná.

14 Ni castūhun ná jnúhun ní núū i. Te ni caquíñi ni ñayuu ñayiví núū i, chi tuá cácuu i cuenta ñayiví, nájnūhun máá ná tu cúu ná cuenta ñayiví.

15 Te tu jíicán tahu na jéē quénehen ní i ini ñayiví, chi sa suhva jeē cóndito ní i nuū jexeén.

16 Nasūu cuenta ñayiví cácuu i, nájnūhun máá ná jéē násūu cuenta ñayiví cúu ná.

17 Jíin jnúhun ndaā ní te sáha ní jéē coo ndoo coo iñ i nuū ní. Tāca jnúhun cáhán máá ní cúu jnúhun ndaā.

18 Te nájnūhun ni tají ní sãña ní quiñi ná ini ñayiví, suni súcuan tají ná i nacani i jnúhun ní núū ñáyuu ñayiví.

19 Te jehē máá i cúu jeē jéhe ná máá ná cuu ná, návāha suni máá i coo ndoo coo iñ i nuū ni jéē jíin jnúhun ndaā.

20 Te nasūu máá in-ni jehē ñáyuu yáha jíicán tahu na, chi suni jehē tāca gá ñáyuu jeē candíje i sãña núu na cúni sōho i jnúhun jeē nacani máá i jíinahan i.

21 Te jíicán tahu na jéē inuú na cóo ni i jíinahan i. Nájnūhun in-ni cúu ní jíin ná, Tátā, te in-ni cúu ná jíin máá ní, suni súcuan na cóo inuú i jíin yó. Te cúni na jéē inuú na cóo ni i, návāha na cándíje ñayuu ñayiví jéē máá ní ni tají ní sãña.

22 Ni sañéhnu ná i nájnūhun ni sañéhnu ní sãña, návāha inuú na cóo ni i, nájnūhun inuú-ni cúu yó.

23 Te ndúú ná jíin i, te ndúú ní jíin ná, te súcuan te inuú cuñi coo ni i jíinahan i. Yūcuán na te cuni ñayuu ñayiví jéē máá ní ni tají ní sãña, jíin jéē

maní ndasí ní jíin i nájnūhun manī ni jíin ná.

<sup>24</sup> Tātā, máá ní ni jēhe ní i nuū ná. Te cúní na jēē cóyūcú i jíin ná nuū cóndee ná, návāha coto i ndese luu cújēhnu ná ni sáha ní. Chi iyó manī ndasí ní jíin ná nde ná tu jecōo ñayíví te nde vijna.

<sup>25</sup> Yaā ndaā cúu ní, Tātā, te ñayuu ñayíví tu jíin i níhín, te máá ná chi jíin na níhín. Te ñayuu yáha chi cájini i jeē máá ní ni tají sáña.

<sup>26</sup> Ni steén na nuū i jíin náhan i ndese Yaā cúu ní. Te stéén gā na súcuan nuū i, návāha na cóo manī ndasí i jíin náhan i, nájnūhun iyó manī ndasí ní jíin ná, te návāha condee ná ini anuá i. Achí yá.

*Jeē ní cajñi de Jesús*  
(Mt. 26.47-56; Mr. 14.43-50;  
Lc. 22.47-53)

## 18

<sup>1</sup> Te nuū ní cuu ni cahān Jesús tāca jnúhun yáha, te ni quenda ya jíin téē cáscuáha jíin yá, cuahān yā inga lado yuu Cedrón. Te yūcuan iyó ñin huerto nuū ní quívi ya jíin téē cáscuáha jíin yá.

<sup>2</sup> Te Judas, téē jeē nastúu de ya, suni jíin de lugar un, chi cuehē jíin ni nataca Jesús yūcuan jíin téē cáscuáha jíin yá.

<sup>3</sup> Te ni jinū de yūcuan jíin ñin grupo soldado jíin jecu policía cándito templo, jeē ní catajé sutū cácuajēhnu jíin téē grupo fariseo. Te cándiso de machete, te cájñi de linterna jíin yiti.

<sup>4</sup> Te Jesús je jíin yā tāca jnúndóho jeē véji siquí yā. Te ni quenda ya ichi núu de, te ni cahān yā:

¿Ndé ñin cámanducú ró?

<sup>5</sup> Te ni cacahān de jíin yá:

Jesús téē ñuu Nazaret cámanducú rí.

Te ni cahān yā:

Máá rí cúu.

Te Judas, téē jeē nastúu de ya, suni ine de jíin téē ún.

<sup>6</sup> Te jeē súcuan ni cahān yā, máá rí cúu, te ni cajica yátá de, te ni cacotúu-ni de.

<sup>7</sup> Yūcuán na te ni cajñuhún tucu ya de:

¿Ndé ñin cámanducú ró?

Te ni cacahān de:

Jesús téē ñuu Nazaret.

<sup>8</sup> Te ni cahān Jesús:

Je ni cachi rí jeē máá rí cúu. Te núu ruhū cámanducú ró, te máá-ni ri jñi ró, te téē yáha na quíngoo de. Achí yá.

<sup>9</sup> Súcuan ni cuu návāha na squícu jnúhun jeē ni cahān yā jíin Tātá yā: Tu ní jēhe na jnúhun naa ni ñin téē jeē ní jēhe ni núu na, achí yá.

<sup>10</sup> Te Simón Pedro ndíso de ñin espada. Te ni tava de, te ni jehnde de sōho lado váha ñin téē nání Malco. Te téē un cúu de mozo máá sutū cujēhnu.

<sup>11</sup> Te ni cahān Jesús jíin Pedro:

Nachuvāha espada rō ini cubierta. ¿A tu cánuú jēē ndóho ri jnúndóho yáha jeē ni sándaā Tātá rí jeē ndóho ri? Achí yá.

*Jeē ní indichi Jesús nuū sutú cujēhnu*  
(Mt. 26.57-58; Mr. 14.53-54;  
Lc. 22.54)

<sup>12</sup> Yūcuán na te tācá soldado un, jíin capitán de, jíin táca policía téē hebreo un, ni cajñi de Jesús, te ni cajihni de ya.

<sup>13</sup> Te xīhna gā vehe Anás cuangoo de jíin yá. Te tātá chíso Caifás cúu Anás. Te Caifás cúu máá sutū cujēhnu ga cuiyā ún.

<sup>14</sup> Te suu de ni cachi nuū jnáhan de hebreo jeē cánuú jēē cúu ñin téē jehē nación de.

*Jeē ní cachi Pedro jeē tu jíin de ya*  
(Mt. 26.69-70; Mr. 14.66-68;  
Lc. 22.55-57)

<sup>15</sup> Te Simón Pedro jíin inga téē scuáha, cándiquín de Jesús cuangoo de yatā yā. Te inga téē scuáha ún chi jíin jnáhan de jíin sutū cujēhnu. Jeē yūcuan ní quívi de jíin Jesús ini patio vehe sutū cujēhnu ún.

<sup>16</sup> Te Pedro ni quendōo de yatā yehyí. Te máá téē scuáha jēē jíin jnáhan jíin sutū cujēhnu ún, ni quenda de ni cahān de jíin ñahan ndíto yéhyí, te ni squívi de Pedro ini patio.

<sup>17</sup> Yūcuán na te ñahan ndíto yéhyí un ní cajñuhún ña Pedro:

¿A násūú ñin téē scuáha jíin téē indichi nuū sutú un cúu ró?

Te ni cahān de:  
Nasūu cúu ri, achí de.

<sup>18</sup> Te tāca mozo jíin policía un ní cascáyú de ñuhūn jíin tícāyí, chí mījin sáha. Te cáhīin de cánasaā de. Te suni índichi Pedro, násaā de jíin táca téé ún.

*Jeē ní stichí sutū cujéhnū ún Jesús*  
(Mt. 26.59-66; Mr. 14.55-64;  
Lc. 22.66-71)

<sup>19</sup> Te sutū cujéhnū un ní stichí de Jesús ndé-ni cúu tēe cáscuáha jíin yá, jíin na jnūhun cúu jeē steén yā.

<sup>20</sup> Te ni cahān Jesús:

Níní ní cahān rī nuū chítú ñáyuu, ní cajini sōho ndíhi ñayuu. Te níní ní steén rī jnūhun ini tācá vehe iī sinagoga jíin ini templo cáhnu nuū ndutútú ndivii jnáhan yó hebreo. Te tú ni iin jnūhun ní cáhán sáhi rí.

<sup>21</sup> ¿Te naun cájnūhun ró ruhū? Cajnūhun ñáyuu ní cajini sōho jnūhun ní cahān rī, te máá i cachi ndese ní cahān rī. Chí cájini i ndese ní cahān rī.

<sup>22</sup> Te jeē ní cahān Jesús súcuan, te iin policía ndíto templo jeē índichi de yūcuán, ní cani-ni de nuū yā. Te ni cahān de jíin yá:

¿A súcuan cáhán rō jíin sūtū cujéhnū naún?

<sup>23</sup> Te ni cahān Jesús:

Núu ní cahān rī iin jnūhun néé, cachi na jnūhun néé ní cahān rī. Te núu tu ní cáhán rī iin jnūhun néé, ¿te naun cáni ró ruhū? achí yá.

<sup>24</sup> Yūcuán na te Anás, sutū cujéhnū un, ní tají de ya, núhni yā cuahān yā nuū Caifás, tēe cúu máá sūtū cujéhnū ga.

*Jeē ní cachi tucu Pedro jeē tu jíin de ya*

(Mt. 26.71-75; Mr. 14.69-72;  
Lc. 22.58-62)

<sup>25</sup> Te níní jēé súcuan cúu, te índichi-ni Pedro, násaā de yuñuhún. Te ni cacahān jíin de:

¿A násūú iin tēe scuáha jíin téé un cúu ró, chí naún?

Te máá de tu ní cáchi de:  
Nasūu cúu ri, achí de.

<sup>26</sup> Yūcuán na te iin mozo sutū cujéhnū, jnáhan tēe jeē ní jehnde Pedro sōho, ní cahān jíin de:

¿A násūu máá ró cúu jeē ní jito ri jíin de ini huerto?

<sup>27</sup> Te Pedro tu ní cáchi tucu de. Te ni cana-ni líhli.

*Jeē ní índichi Jesús nuū Pilato*  
(Mt. 27.1-2, 11-14; Mr. 15.1-5;  
Lc. 23.1-5)

<sup>28</sup> Yūcuán na te ni quendacoo de jíin Jesús vehe Caifás, cuangoo de jíin yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu stívī i ley i jeē cahán jeē ma quívī i ini vehe iin ñayuu jeē násūú hebreo cúu. Chí núu súcuan te ma cúu cuxíni i vico pascua jeē cóo inga quívī ún.

<sup>29</sup> Yūcuán na te ni quenda Pilato, tēe cúu gobernador, ní cahān de jíin i jíin náhan i:

¿Na cuēchi cájicān rō siquī téé yáha?

<sup>30</sup> Te ni cacahān i:

Núu jeē násūu téé cúnéé cúu tēe yáha, te ma jnī ná de jeē quíndeca ná de nuū ní núú, achí i.

<sup>31</sup> Te ni cahān Pilato:

Cuángoo jíin náhan ró, te sándaā rō siquī de jíin ley cánevāha máá ró.

Te ni cacahān ñayuu hebreo un:

Máá ná jeē cácuu ná ñáyuu hebreo, tú na permiso cánevāha ná jēé cáhni ná ni iin ñayuu.

<sup>32</sup> Súcuan ní cacahān i návāha squícu jnūhun jeē ní cachi Jesús jeē quívī ya ndaha tēe Roma te cahni de ya jíicā cruz.

<sup>33</sup> Te ni ndivī Pilato ini palacio, te ni cana de jeē na quíji Jesús. Te ni cajnūhún de ya:

¿A máá ró cúu Rey ñayuu hebreo naún?

<sup>34</sup> Te ni cahān Jesús jíin de:

¿A cájnūhun ró ruhū jeē súcuan jéni ní máá ró, chí jēé ní cacastūhun ñáyuu hebreo nuū rō?

<sup>35</sup> Te ni cahān Pilato:

¿Chí téé hebreo cúu ri jeē cúni rí? Ñayuu nación máá ró jíin sūtū cácujehnū ní cachihí rōhó ndaha rí. ¿Na vé ní sáha ró núu súcuan? Achí de.

<sup>36</sup> Te ni cahān Jesús:

Nasūu jēé ndácu ri jniñu nájnūhun cándacu tāca rey ñayivī yáha. Chí

núu jeē ñáyuu ñayīvi ní casáha jeē cúu ri rey, yūcuán na te tēe cándiquīn ruhū, cuajnáhan de návāha ma quívi ri ndaha jnáhan ri hebreo nuú. Te nasūu núu ñayīvi yáha cúu jeē ndácu ri jniñu vijna. Achí yá.

<sup>37</sup> Yūcuán na te ni cahān Pilato jíin yá:

¿Te á ñin rey cúu ró jeē súcuan?

Te ni cahān Jesús:

Rey cúu ri, nájñuhun cáhán rō. Ni quiji ri ni cacu ri ini ñayīvi yáha návāha nacani ri jñuhun ndaā. Te ndíhi ñayuu cájetáhú jñuhun ndaā, cájini nahín i jñuhun cáhán rī. Achí yá.

<sup>38</sup> Te ni cahān Pilato:

¿Ndese cuni yō ndé ñin cúu máá jñuhun ndaā?

*Jeē ní cundaā jeē cúu yā*

*(Mt. 27.15-31; Mr. 15.6-20; Lc. 23.13-25)* ¿Ndé nuū véji ró?

Te jeē ni cáhān de jñuhun yáha, te ni quenda tucu de nuū ñáyuu hebreo. Te ni cahān de jíin i:

Tú cuíti na cuēchi níhín rī síquī de.

<sup>39</sup> Te íyó costumbre maá ró jíin náhan ró jeē vico pascua te siaá rī ñin tēe íne vecāa nuū rō. ¿Te á tu cácu ni rō jeē siaá rī Rey rō nuū rō? Achí de.

<sup>40</sup> Yūcuán na te ndivii i ni cacana jee tucu i:

Ma siaá ni tēe jíñá, chi Barrabás siaá ni, áchí i.

Te tēe cuíhná cúu Barrabás.

## 19

<sup>1</sup> Yūcuán na te ni cahān Pilato jeē na jñí soldado Jesús, te caní de ya jíin cuarta ñíi.

<sup>2</sup> Te ni casáha de ñin corona iñu, ni cachuhun de xinī yā. Te ni cachuhun de ya ñin sahma cuehé ndíhí jeē cúu sahma rey.

<sup>3</sup> Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

<sup>4</sup> Yūcuán na te ni quenda Pilato inga jíinu, te ni cahān de jíin ñáyuu:

Yáha condēhe ró tava rī de, návāha na cúni rō jeē tú na cuēchi níhín rī síquī de.

<sup>5</sup> Te ni quenda Jesús, ñúhun ya corona iñu jíin sahma cuehé ndíhí un. Te ni cahān Pilato jíin i:

Yáha condēhe ró de jíin náhan ró.

<sup>6</sup> Te nuū ní cajito sutū cácu jéhnú jíin táca policía nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najñí máá ró de te cahni rō de. Chi ruhū, tú na cuēchi níhín rī síquī de.

<sup>7</sup> Te ni cacahān ñayuu hebreo un:

Cáneváha ná ñin ley, te jeē síquí ley un cánuú jeē cúu de, chí sáha de máá de jeē Séhe Yaā Dios cúu de.

<sup>8</sup> Te jeē ní jini sōho Pilato jñuhun yáha, te víhyá gā ni yūhú de.

<sup>9</sup> Te ni ndivicoo tucu de ini palacio, te ni cajñuhún de Jesús:

Te tu ní cáhán cuíti Jesús jíin de.

<sup>10</sup> Yūcuán na te ni cahān de jíin yá:

¿Naun tu cáhán rō jeē cahán rī? ¿A tu jíin rō jeē ndíso jniñu ri jeē cáhni rī rohó jicā cruz, te suni ndíso jniñu ri jeē siaá rī rohó quíhín rō?

<sup>11</sup> Te ni cahān Jesús:

Núu tu ní sáha Yaā Dios jeē ndíso jniñu ró, te tú na vé cúu sáha ró síquī rī. Jeē yúcuán tēe jeē ní nacuāha ruhū ndaha ró, cuēchi xeēn gā condee síquī de vēsú maá ró. Achí yá.

<sup>12</sup> Yūcuán na te nde hora un ndúcú ndéyí Pilato ndese siaá de ya. Te ñayuu hebreo chí cacana jee i:

Núu siaá ni tēe jíñá, te tu cúu ní amigo rey Roma jeē cujéhnú ndácu jniñu núu súcuan. Chí táca tēe jeē sáha de rey maá de, núu súcuan te cúu de enemigo síquī rey un. Achí i.

<sup>13</sup> Te jeē ní jini sōho Pilato jñuhun yáha, te ni ndacu de jniñu jeē na quenda Jesús ini vehe quiji ya. Te ni cucōo de silla nuū cundaā jniñu, nuū máni máá yūu ni jecāva, te lugar un nání Gabata nuū yúhu hebreo.

<sup>14</sup> Te cuacuu cahuxī uū, te jehíni quívi ún quejéé vico pascua. Te ni cahān Pilato jíin ñáyuu hebreo:

Yáha índichi maá rey rō.

<sup>15</sup> Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jēē cata caa rī rey rō jicā cruz naún?

Te sutū cácujuhnu un ní cacahān de:

Tuá na inga rey cánevāha ná jíināhan ná, chí máá-ni rey Roma jeē cujuhnu ndácu jniñu nuū ná.

<sup>16</sup> Yūcuán na te Pilato ni nacuāha de ya nuū i jeē na cúu yā jicā cruz. Te ni cajni i ya cuango i jíin yá.

*Jeē ní cacata caa de ya jicā cruz*

(Mt. 27.32-44; Mr. 15.21-32; Lc. 23.26-43)

<sup>17</sup> Te ni quenda Jesús, ndíso ya cruz yā, cuango de jíin yá in lugar nuū naní Yiqui Xíní, te nuū yúhu hebreo naní Gólgota.

<sup>18</sup> Te yūcuan ní cacata caa de ya jicā cruz. Te suni ní cacata caa de uū tēe nuū uū gā cruz, in in de in lado yā, te máá Jesús mēhñú.

<sup>19</sup> Te suni ní ndacu Pilato jniñu jeē na cóndee jnūhun xinī cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí.

<sup>20</sup> Te cuehē ñayuu hebreo ni cacahu i jnūhun yáha, chí máá yajni yuñúú cúu nuū ní cacata caa de ya. Te jnūhun un yósó jíin yuhu hebreo jíin griego jíin latín.

<sup>21</sup> Te tāca sūtū cácujuhnu nuū ñayuu hebreo, ni cacahān de jíin Pilato:

Ma tēe ní jēē cúu de Rey ñayuu hebreo, chí sa suhva tee ní jēē maá de ni cahān jeē cúu de Rey ñayuu hebreo.

<sup>22</sup> Te ni cahān Pilato:

Ma násama ri jeē jé ni ndacu ri jniñu ni jecondee.

<sup>23</sup> Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuūn parte, te in in parte ni cuu in in soldado un. Te suni ni caquihin de camisa yā. Te camisa un tu ní quícu, chí ni cunu ní.

<sup>24</sup> Te ni cacahān maá de:

Ma cáhnde yō, chí vāha ga na sáha yó sorteo, te na cóndēhe yó ndé in yó níhñ, achí de.

Te súcuan ni squícu jnūhun yósó núú tútu iī nde jenahán jēē cahān Jesús: Ni caquihin de sahma ri cuu máá de. Te ni casáha de sorteo siquī camisa rī. Achí. Súcuan ni casáha soldado un.

<sup>25</sup> Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala.

<sup>26</sup> Te ni jito Jesús nuū naná yā jíin núú tēe scuáha jeē maní gā yā jíin, suni índichi de yūcuán. Te ni cahān yā jíin náná yā:

Náná, nde vijna te máá de nucuiñí de cuu de sēhe ní.

<sup>27</sup> Yūcuán na te ni cahān yā jíin tēe scuáha ún:

Nde vijna te cuu ña nájñuhun náná rō, achí yá.

Te nde hora un ní cana de ña cuacondee ña vehe de condito de ña.

*Jeē ní jhī Jesús*

(Mt. 27.45-56; Mr. 15.33-41; Lc. 23.44-49)

<sup>28</sup> Yūcuán na te ni jini Jesús jeē jé ni jinu tācá jniñu jeē cánuú ndoho ya. Te návāha squícu jnūhun cáhán tutu iī, te ni cahān yā:

Jíchí rī ndute, áchí yá.

<sup>29</sup> Te yūcuan íin in tñdohō ñuhun chitú vinagre iyá. Te ni cachundaji de in cachí nuū vinagre un, te ni catee de xiní in ndaha yújnu hisopo, te ni catee de yuhu ya jeē cóho ya.

<sup>30</sup> Te ná ni jihí ya vinagre un, te ni cahān yā:

Je ni jñu, áchí yá.

Te ni cāyí-ni xiní yā, te ni jihí-ni ya.

*Jeē ní cují soldado lanza xiin ya*

<sup>31</sup> Te inga quiví ún coo vico pascua. Te tēe hebreo tu cácuñi de jeē cóndita caa ndíyí ún jicā cruz quiví ndétátú un. Chí quiví ndétátú jeē cúu vico pascua, iī ndasí gá vēsú tāca gá quiví ndétátú. Te ni cacahān de jíin Pilato jeē na ndácu de jniñu jeē jnahnú sñin tēe cándita caa, te na cújiyo de jicā cruz.

<sup>32</sup> Te ni quecoo soldado, te ni cajehñu de sñin in tēe jeē ndíta caa jíin yá, te suni súcuan inga de.

<sup>33</sup> Te nuū ní quecoo de nuū Jesús, te ni cajito de jeē jé ni jihī yā. Jeē yúcuan tu ní cájehnū de s̄h̄in ya.

<sup>34</sup> Te ñn soldado chi ni cují de lanza xiin ya, te ni cane-ni ññī jín ndute.

<sup>35</sup> Te máá rí jeē tée tutu yáha, ni jito ri jeē súcuan ni cuu, te nácani ndaā rī jñūhun ndese ni cuu. Te jíní rī jeē iyó ndaā jñūhun cáhán rī, návāha suni candíje máá ró jijnáhan ró.

<sup>36</sup> Chi súcuan ni cuu návāha squícu jñūhun cáhán tutu ñ: Ma cahnú de ni ñn yiqui ya, achí.

<sup>37</sup> Te suni inga jñūhun cáhán tutu ñ: ñn quiv̄i te coto i nuū Yaā jeē ní cují i lanza, achí.

### *Jeē ní quindūji Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Te ni cuu tāca jéē yáha. Te iyó ñn tēe ñnuu Arimatea jeē naní José, te cúu de tēe cándíje Jesús. Te yuhu-ni cándíje de, chi yúhú de jnáhan de hebreo. Te ni cahān ndahú de jín Pilato jeē na cuáha jñūhun quihin de yiqui cúñu Jesús. Te ni jēhe Pilato jñūhun. Yūcuán na te cuahān José, ni snúu de yiqui cúñu Jesús.

<sup>39</sup> Te suni ni jinū Nicodemo, tēe ni quiji nuū Jesús ñn jecuáā. Te ndíso de nájñūhun ocō uxī kilo sūje uvuā jeē ní saca jnáhan jín yúcū áloe.

<sup>40</sup> Te ndindúú de ni caquihin de yiqui cúñu Jesús, te ni cachusúcún de jín tira sahma jeē ni quiv̄i yucū jeē jeén as̄ñ ún, nájñūhun iyó costumbre maá ñáyuu hebreo jeē cáchindūji i ndīyi.

<sup>41</sup> Te yajni nuū ni jihī Jesús iyó ñn huerto. Te nuū huerto un ndéé ñn yaū jeē ní caan jeé jicā ñn cava, nuū ná tu quindūji ndīyi.

<sup>42</sup> Te yūcuan ní cachindūji de Jesús, chi ñe yajni yaū ndīyi ún. Chi je yajni quejéé quiv̄i ndétátú de jeē cácuu de ñáyuu hebreo, te tú na ley chindūji de ndīyi núu je ni quejéé quiv̄i ún.

### *Jeē ní natecu Jesús*

(Mt. 28.1-10; Mr. 16.1-8; Lc. 24.1-12)

## 20

<sup>1</sup> Te jenéhen quiv̄i domingo ni jinū María ñnuu Magdala nuū ní yindūji Jesús, te yínee gā cúu. Te ni jito ña jeē ní cujiyo yuū ndihyú yuyáú ndīyi.

<sup>2</sup> Yūcuán na te jínu ña cuahān ña nuū Simón Pedro jín núu inga tēe scuáha ún jeē maní gā Jesús jín. Te ni cahān ña jín de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

<sup>3</sup> Te ni quendacoo Pedro jín inga tēe scuáha ún, cuácondēhé de yaū ndīyi.

<sup>4</sup> Te cájini tayí ndindúú de. Te inga tēe scuáha ún, ñhin ga ni jinu de vēsú Pedro. Te xīhna gā de ni jinū yaū ndīyi.

<sup>5</sup> Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quiv̄i de.

<sup>6</sup> Te sáá te ni jinū Simón Pedro jeē ndiquín jnáhan de vēji de jín inga tēe ún. Te ni quiv̄i de nuū ní yindūji Jesús. Te suni ni jito de jeē tira sahma cáyūcu máá na.

<sup>7</sup> Te ni jito de sahma jeē ni ñúsúcún xíní Jesús, tu cátú jín tira sahma, chi ni natuu te cátú s̄ñ.

<sup>8</sup> Yūcuán na te suni ni quiv̄i inga tēe scuáha jeē ni jinū xīhna gā nuū ní yindūji ya. Te ni jito de ndese iyó, te ni candíje de jeē ní natecu yā.

<sup>9</sup> Chi nde ná tu jinūcoo de yaū ndīyi, te tu ní jécūhun ni de jñūhun cáhán tutu ñ, jeē jíní ñúhún natecu yā núu je ni jihī yā.

<sup>10</sup> Yūcuán na te ndindúú tēe cáscuáha ún cuanungoo de vehe de.

### *Jeē ní nane ya nuū María ñnuu Magdala*

(Mr. 16.9-11)

<sup>11</sup> Te María índichi ña ndáhyú ña nuū ní yindūji ya. Te níní ndáhyú ña, te ni scáyí ña máá ña, ni jito nihni ña ini yaū ún.

<sup>12</sup> Te ni jito ña uū ndajéhé andiv̄í, cáñuhun ya sahma cuijín. Te ñn ya néne ichi xíní, te inga ya néne ichi núu jehé nuū ni cátu yiqui cúñu Jesús.

13 Te ni cacahān yā jín ña:  
¿Najehē ndahyú rō?  
Te ni cahān ña:  
Ni catava de Jítoho ná, te tu jíní na ndé nuū ní cachune de ya.

14 Te jeē ni cáhān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nácuni ña jeē maá yá cúu.

15 Te ni cahān yā jín ña:  
¿Najehē ndahyú rō? ¿Ndé ñn nánducú ró? achí yá.

Te maá ña jéní ni ña jeē té ndíto huerto cúu ya. Te ni cahān ña jín yá:

Núu maá ní ni quenehen ní yá, te cachi ní ndé nuū ni jéchune ní yá, te na quínuquihin ná yá, achí ña.

16 Te ni cahān Jesús jín ña:  
María, achí yá.

Te jeē ni cáhān yā súcuan, te ni nácuni ña ya, te ni ndió cóto ña, te ni cahān ña jín yuhu hebreo:

Raboni, achí ña. Te jnūhun un cúní cahān, Maestro.

17 Te ni cahān Jesús jín ña:  
Ma quehé ró rúhū, chí ná tu ndaa ri quínuhun rī nuū Tatá rī. Te cuáhán núu táca hermano rī, tē ni cascuáha jín rí, te cachi rō nuū de jeē ndaa ri quínuhun rī nuū Tatá rī, jeē suni Tatá maá ró jijnáhan ró cúu. Te cúu ya Yaā Dios maá rí jín Yaā Dios maá ró jijnáhan ró. Achí yá.

18 Yūcuán na te María ñuu Magdala un, cuáhān ña, te ni castūhún ña nuū té cascuáha un jéē ní jito ña nuū maá Jítoho yō jín jéē ni cáhān yā jnūhun yáha jín ña.

*Jeē ní nane ya nuū té cascuáha jín yá*

(Mt. 28.16-20; Mr. 16.14-18; Lc. 24.36-49)

19 Te jeē ní cuaa maá quívī domingo un, te cáhān tútú té cascuáha ún ini ñn vehe. Te cándihyū yehyí, chí cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vésú ndihyú yehyí, te ni cahān yā jín de:

Ndeyí sñ coo ni rō jijnáhan ró, achí yá.

20 Te ná ni cahān yā súcuan, te ni steén yā ndaha ya jín xiin ya nuū de. Te ni cacusiñ ni tē cascuáha un jéē ní cajito de nuū maá Jítoho yō.

21 Yūcuán na te ni cahān tucu Jesús:  
Ndeyí sñ coo ni rō jijnáhan ró. Te nájñūhun ni tají Tatá rī ruhū ini ñayīví, suni súcuan tájí rí rohó nacani ró jnūhun ri nuū ñáyuu. Achí yá.

22 Yūcuán na te ni tīvī tachī yā nuū de jijnáhan de. Te ni cahān yā:

Vijna te ni canihñ rō Espiritu Santo.

23 Te táca ñáyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

### *Jeē ní nane ya nuū Tomás*

24 Te Tomás, tē ni cacu cuatí, ñn jnáhan jeē uxí uū tē cascuáha jín yá, tu ní íne de quívī jeē ní nane Jesús nuū táca gá tē cascuáha.

25 Yūcuán na te sava ga tē cascuáha un, ní cacahān de jín Tomás:  
Ni cajito ri nuū maá Jítoho yō.

Te ni cahān Tomás:  
Núu tú coto ri nuū ni túji ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuítī rī, achí de.

26 Te nuū uná quívī, te tē cascuáha un cáhñn tútú tucu de ini ñn vehe. Te íne Tomás jín de. Yūcuán na te ni quee-ni tucu Jesús, ni jecuiñī yā mēhñú de, vésú cándihyū yehyí. Te ni cahān yā jín de:

Ndeyí sñ coo ni rō jijnáhan ró.  
27 Te ni cahān-ni ya jín Tomás:

Chune xinī ndáha ró ini ndaha ri yáhá te coto ró. Te scáá ndaha ró, te chune ró xiin ri nuū ni tújī. Te ma cáni siquí gá ni rō, chí sa suhva na cándíje ró.

28 Yūcuán na te ni cahān Tomás jín yá:

Aí, Jítoho maá ná jín Yaā Dios maá ná cúu ní, achí de.

29 Te ni cahān Jesús jín de:  
Tomás, nde ni jito ró núu rī, te ni candíje ró. Te yōhyo ndetū táca ñáyuu

jeē candíje ruhū vēsú tu ní jíto i nuū rī, achí yá.

*Najehē ni tee Juan libro yáha*

<sup>30</sup> Te suni ni sáha Jesús cuehē gā jniñu jéhu jeē ni stéén yā poder yā nuū téē cáscuáha jíin yá, jeē tu yósó nuū tútu yáha.

<sup>31</sup> Te tāca jniñu yáha ní tee ri návāha candíje ró jijnáhan ró jéē Jesús cúu Cristo, maá Séhe Yaā Dios. Chi jeē candíje ró yá, te cotecu rō ní cání sáha ya.

*Jeē ní nane ya nuū uxá tēē cáscuáha jíin yá*

## 21

<sup>1</sup> Te ni cuu jecu quivī, te inga jínu ni nane Jesús nuū téē cáscuáha jíin yá, jeē cáhīn de yumar Tiberias. Te suhva ni steén yā maá yá nuū de:

<sup>2</sup> Cáhīn tútú Simón Pedro, jíin Tomás, tēē ni cacu cuatí, jíin Natanael, tēē ñuu Caná ndañúu Galilea, jíin ndindúú séhe Zebedeo, jíin úu gā tēē cáscuáha.

<sup>3</sup> Te ni cahān Simón Pedro jíin de jijnáhan de:

Quíjni ri chācá.

Te ni cacahān de:

Suni quingoo ri jíin ró.

Te cuango de, te ni quivīcoo de ñn barco. Te tu ní cáníhīn cuiti de ti jecuāā yúcuān.

<sup>4</sup> Te jeē cuácundijin, te íne Jesús yumar. Te tēē cáscuáha ún, tu ní cánacuni de jeē maá yá cúu.

<sup>5</sup> Yūcuān na te ni cahān yā jíin de:

Aá rō jijnáhan ró, ¿á ní canihīn rō chācá caji yō?

Te ni cacahān de:

Tú cuiti, achí de.

<sup>6</sup> Yūcuān na te ni cahān yā jíin de: Síngava ñunu ró ichi lado váha barco, te nihīn rō tī.

Te ni casíngava de ñunu, te tuá ní cúu cuiti natava de, jeē ni quivīcoo cuehē ndasí cháca.

<sup>7</sup> Yūcuān na te tēē scuáha jeē maní gā Jesús jíin, ní cahān de jíin Pedro:

Maá Jítoho yō cúu, achí de.

Te jeē ní jini sōho Simón Pedro jeē maá Jítoho yō cúu, te ni nachuhun de

sahma de, chi ni tava de jeē sájniñu de. Te ni ndava-ni de nuū mar cuahān de nuū yā.

<sup>8</sup> Te tāca gā tēē cáscuáha ún, vendicoo de jíin barco yundúte, cástáa de ñunu ñuhun chitú cháca. Chi tu jíca cáhīn de jíin ñuhun íchi, chi nájnūhun ciento-ni metro cúu.

<sup>9</sup> Te nuū ní quendacoo de ini barco, te ni cajito de jeē nduhvá tīcua ñuhūn, te íne staā jíin ñn chācá chíhyó.

<sup>10</sup> Te ni cahān Jesús jíin de:

Cuáquihin jecu chācá jéē sa ní cajni ró, na táu yó, achí yá.

<sup>11</sup> Te ni quivī Simón Pedro ini barco, te ni stáa de ñunu, ni quee de jíin ndé nuū ñuhun íchi. Te ñuhun chitú cháca náhnu, ñn ciento uū xico uxī unī tī cúu. Te vēsú ñn súcuān tī ñuhun, te tu ní táhndé ñunu.

<sup>12</sup> Te ni cahān Jesús jíin de:

Nehen jijnáhan ró na cási ni yō.

Te ni ñn tēē cáscuáha ún tu ní cúndeyí ni de cajnūhún de ya núu ndé ñn cúu ya. Chi je cājini de jeē maá Jítoho yō cúu ya.

<sup>13</sup> Te ni quindēhe Jesús yuñuhún, te ni quihin ya staā ún, te ni jēhe ya nuū de, te suni súcuān chācá un.

<sup>14</sup> Yáha cúu vuelta unī jeē ní nane Jesús nuū téē cáscuáha jíin yá, ná ni natecu yā.

*Jeē ní ndajnūhún Jesús jíin Simón Pedro*

<sup>15</sup> Te nuū ní cuu ni cajesi ni de, te Jesús ni cajnūhun yá Simón Pedro:

Simón séhe Jonás, ¿á maní gā rō jíin rí vēsú tāca gā tēē yáha?

Te ni cahān de:

Je jíiní ni jéē maní na jíin ní, achí de.

Te ni cahān yā jíin de:

Núu súcuān te stéén rō jnūhun ri nuū ñáyuu cácuu nájnūhun londe ri.

<sup>16</sup> Te ni cajnūhun yá de vuelta uū:

Simón séhe Jonás, ¿á maní rō jíin rí?

Te ni cahān de jíin yá:

Je jíiní ni jéē maní na jíin ní, achí de.

Te ni cahān yā:

Condito ró ñáyuu cácuu nájnūhun lanchi ri núu súcuān.

<sup>17</sup> Te ni cajnūhún tucu ya de vuelta unī:

Simón séhe Jonás, ¿á maní rō jíin rí?



Te ni cucuíhyá ni Pedro jeē ní ca-  
jnūhun yá de vuelta unī núu manī de  
jín yá. Te ni cahān de:

Máá ní jiní ni ndihí, te jíní ni jéē  
maní na jín ní.

Te ni cahān yā:

Núu súcuan te stéén rō jnūhun ri nuū  
ñáyuu cácuu nájnūhun lanchi ri.

<sup>18</sup> Te jendaá cahán rī jín ró jeē  
nde ná suchí ró, te ni quihín máá ró  
sahma ró, te ni jica ró ndé nuū cuní  
maá ró. Te núu na yí ró, te nasūu jéē  
cuní maá ró, chi inga ñayuu quindēca i  
róhó nuū tu cúní rō quihín rō. Te scáá  
rō ndindúú ndaha ró jéē cuu rō.

<sup>19</sup> Jnūhun yáha ní cahān yā jeē ni  
stéén yā jeē cóndita caa de jicā cruz  
cuu de, te jeē súcuan cuatáhú de cúu  
jeē steén de jeē yóhyo cújéhu Yaā  
Dios. Yūcuán na te ni cahān gā yā:

Condiquín rō ruhū jeē sáha ró jniñu  
ní ndacu ri nuū rō, achí yá.

*Jnūhun tēe scuáha jeē maní gā yā jín*

<sup>20</sup> Te ni ndió cóto Pedro, te ni jito  
de tēe scuáha jeē maní gā Jesús jín,  
ndíquín de vēji de yatā. Tēe un cúu jeē  
ní conene xiín Jesús ná ni cacuxíni de  
jín yá, te ni cajnūhún de ya: ¿Ndé ñn  
de cúu jeē nastúu níhín?

<sup>21</sup> Te jeē ní jito Pedro nuū tēe ún, te  
ni cajnūhún de Jesús:

Te tēe yáha, ¿ndese coo jín de?

<sup>22</sup> Te ni cahān Jesús:

Núu cúní rī jeē cótecu de nde quiví  
ndíji ri, ¿te naun ndíhví ni rō? Máá  
ró chi condiquín rō ruhū jeē sáha ró  
jniñu ní ndacu ri nuū rō, achí yá.

<sup>23</sup> Yūcuán na te jnūhun yáha ní jitē  
núu nuū tācá hermano, jeē tēe scuáha  
un má cúu de. Te tu ní cáhán Jesús  
jeē ma cúu de, chi sa suhva ni cahān  
yā: Núu cúní rī jeē cótecu de nde quiví  
ndíji ri, ¿te naun ndíhví ni rō?

<sup>24</sup> Te tēe scuáha un jéē maní gā Jesús  
jín, suu cúu ruhū jeē nácani jnūhun  
tācá jniñu yáha, te suu ri tēe tāca  
jnūhun yáha. Te cájini rō jijnáhan ró jéē  
iyó ndáá jnūhun nácani ri.

<sup>25</sup> Te suni íyó cuéhē ndasí gá jniñu  
ní sáha Jesús. Te núu tee yó ná ñn ná  
ñn, te ma cánda ní ñáyiví cuhun tutu

jeē cóso jnūhun ún, jéni ni rī. Te ni cuu.  
Amén.

## JNIÑU JEHNU JEE NI CASAHA TEE APOSTOL

*Jeē ni jéjnūhun ya quiji Espiritu Santo*

<sup>1</sup> Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jíin táca jnúhun ni steén yā nde quiiví ní quejéé yá ni sáha ya

<sup>2</sup> te nde quiiví ní ndaa ya cuanuhun yā andiví. Te nde ná tu ndaa ya quihīn yā, te ni sáha Espiritu Santo jeē ní ndacu ya jniñu nuū táca apóstol, tēe ni nacāji ya.

<sup>3</sup> Te nuū ni jínu ni ndoho ya jeē ni jíhī yā, te uū xico quiiví te tijni jínu ni steén ndijin yā maá yá nuū tēe un jíjnáhan de, te súcuan ni cajini de jeē iyó ndáa jeē ní natecu yā. Te ni cahān yā jíin de siquī ndese ndácu Yaā Dios jniñu.

<sup>4</sup> Te ná cáhīn tútú de jíin yá, te ni cahān yā jíin ndihī de jeē ma quéndacoo de ini ñuu Jerusalén, chí áchí yá:

Condetu ró ndé quee Espiritu Santo jeē ni jéjnūhun máá Tátá rī Yaā Dios. Chí je ní cachi rī nuū ró jeē ni jéjnūhun ya quiji Espiritu Santo.

<sup>5</sup> Chí Juan, jendaá jeē maá ndute-ni ni scuándute de ñayuu. Te róhó jíjnáhan ró, jecu na quiiví te nájnūhun cuandute ró jíin Espiritu Santo, cúu jeē condee yā ini anuá ró, achí yá.

*Jeē ní ndaa Jesús cuanuhun yā andiví*

<sup>6</sup> Yūcuán na te tēe cáhīn tútú jíin yá, ni cacajnūhún de ya:

¿A vijna te nasáha ní jéē ñayuu ñuu yō Israel ndujéhnu i ndacu i jniñu nuū nación yō chí naún? áchí de.

<sup>7</sup> Te ni cahān yā:

Ma cúu cuni ró quiiví chí cuíyā jeē cóo jeē ni sándaā maá Tátá rī, chí máá ñn-ni máá yá jíin yā na quiiví sáha ya.

<sup>8</sup> Te jeē cúni ró cúu jeē quée Espiritu Santo te condee yā ini anuá ró jíjnáhan ró. Yūcuán na te nihīn ró poder te nacani ró jnúhun ri ní ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

<sup>9</sup> Te ni ndihī ní cahān yā táca jnúhun yáha. Te níiní cájito de nuū yā, te ni ndaa-ni ya cuanuhun yā andiví. Te ni quee vicō ní jesi-ni nuū cuahán yā, te tuá ní cájito de ya.

<sup>10</sup> Te níiní cáhīn de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñūhun ya sahma cuijín ní cajecuiñī yā xiin de jíjnáhan de, te cájito ya nájnūhun tēe.

<sup>11</sup> Te ni cacahān yā jíin de:

Róhó tēe Galilea, ¿najehē cájito ndaa ró ichi ándiví? Chí máá Yāā Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

*Jeē ní canacāji de Matías jeē nucuñī de nuū Judas*

<sup>12</sup> Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jíin ñuu Jerusalén, nájnūhun ñn kilómetro-ni, cūhva jeē ní jéhe ley permiso caca ñayuu quiiví ndétātú.

<sup>13</sup> Te ni ndivícoo de ini ñuu. Te ni ndacoo de cuarto xinī véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jíin Judas ñani Jacobo.

<sup>14</sup> Táca tēe yáha, níiní cándutútú inuú de cájicān tahu de jíin táca ñani Jesús jíin náná yā María jíin sava ga ñahan.

<sup>15</sup> Te ñn quiiví te ni jecondichi Pedro nuū táca hermano cácandíje. Te cáhīn nájnūhun ciento ocō ñayuu. Te ni cahān de:

<sup>16</sup> Hermano jíjnáhan ní, ni squícu nahín jnúhun cáhán tutu ñn jeē ní cáhān David nde jenahán ní sáha Espiritu Santo. Te jnúhun un ní cuu siquī Judas jeē ní yosnúu núu tēe ní cajñī Jitoho yō Jesús.

17 Te suu tēe un ní jica de jíin yó, te ni chindéé ñáhán jnáhan de jíin yó síquī jníñu ní jeni ya yohó.

18 Te ni cajeen ñn ñuhun jíin xúhun ní nihīn tēe un síquī jníñu neé ní sáha de. Te ni ñinga ndeyi de, te ni ndatā sáva chíji de, te ndihí yiti de ni jītē.

19 Te ni jītē jnūhun yáha núū tāca ñáyuu cáyūcú ñuu Jerusalén, te jeē yúcuán cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta ñíñī.

20 Chi súcuán je yósó núū tútu Salmo síquī Judas:

Vehe de na quéndōo iyú,

te ma cóndee ni ñn ga ñayuu ini vehe ún.

Te suni cáhán:

Jniñu ní condiso de na cóndiso ñnga tēe.

Achí.

21 'Núu súcuán te jíni ñúhún jéē núcuñī ñn tēe lugar maá de jíin yó. Te tēe núcuñī jíin yó un, nacāji yó de mēhñu táca tēe ni cajica jíin yó tāca quívī jeē ní jica máá Jítoho yō Jesús jíin yó.

22 Te tēe nacāji yó un cúu tēe jeē ni íyo de jíin yó nde quívī ní jendute ya ní sáha Juan, te nde quívī ní ndaa ya cuanuhun yā andiví. Te tēe núcuñī jíin yó na cúu de testigo jíin yó jeē jé ni natecu yā, achí de.

23 Te ni catee nuū de uū jnáhan tēe: Matías jíin José jeē naní de Barsabás te suni naní de Justo.

24 Te ni cajicān tahu de:

Tátā Yaā Dios, máá ní chi jíni ni ndese cáa ánuá tāca ñáyuu. Núu súcuán te jeē ndindúú tēe yáha, stéén ni ndé ñn de cúu jeē ní nacāji ní.

25 Te condiso jniñu de cuu de apóstol. Te naquihin de jniñu ní stóo Judas, chi ní sáha de cuēchi te cuahān de lugar xeēn nuū cánuú quíhīn de, achí de.

26 Yūcuán na te ni casáha de ñn sor-teo te ni jinū Matías, te ni núcuñī de ni nduu de jnáhan ndihúxí ñn apóstol.

*Jeē ní quee Espíritu Santo*

## 2

1 Te máá quívī víco Pentecostés ni cahīn tútú ñáyuu cá candíje ñuu Jerusalén.

2 Te sanaa-ni te ni quejéé ñhīn vēji nde andiví nájñūhun tachī ñhīn quée, te tāca ñáyuu jeē cáyūcú ini vehe un ní cajini sōho i jeē ñhīn ún.

3 Te ni cajito i nájñūhun yáñuhūn jeē ní cajitē núu te ni cacucōo xinī ná ñn ná ñn i.

4 Te ndihí i, ni cunuú Espíritu Santo jíin i, te ni quejéé i cácahān i sñn sñn yuhu, ndese ni steén maá Espíritu nuū ná ñn ná ñn i cahān i.

5 Te ñuu Jerusalén, suni cáhīn ñayuu hebreo, yíñúhún núū Yaā Dios, jeē ní quijicoo i nde tācá nación ñí cáhnu ñayiví.

6 Te jeē ni ñhīn súcuán te ni cacutútú cuéhē ñayuu ún. Te ni cunéé íi ní i jíjnáhan i, chí ná ñn ná ñn i ni cajini sōho i jeē tēe ni canihīn Espíritu Santo cácahān de jnūhun yuhu ñúū jicá nuū vēji i.

7 Te ni canaa ni i cájito i te ni cacahān i:

¿A násūu tēe Galilea cácuu tāca tēe yáha jéē cácahān de tācá yuhu ñúū nuū véjicoo yó?

8 ¿Na vé ni cuu yáha núu súcuán? Chi ná ñn ná ñn yó cájini sōho yó cácahān de jnūhun yuhu ñúū nuū ní cacacu yó.

9 Chi vējicoo yó ndé tācá ñuu jicá. Sava yó vēji nde Partia jíin Media jíin Elam. Te sava ga yō vēji yó ndé Mesopotamia jíin Judea jíin Capadocia jíin Ponto jíin Asia.

10 Suni nde Frigia jíin Panfilia jíin Egipto jíin tijni ñuu jeē íne nde yatā gā ñuu Cirene ñuhun Africa vējicoo yó. Te sava ga yō nde ñuu Roma vējicoo yó, te cáyūcu jínu-ni yó yáha. Te máá yó jeē vējicoo ñuu Roma, sava yó cácuu máá ñáyuu hebreo te sava ga yō cácuu ñayuu sñn ñuu, ni cacandíje yó ndíquin yō ley ñayuu hebreo.

11 Suni nde Creta jíin Arabia vējicoo sava yó. Te cájini sōho yó jéē jíin jnūhun yuhu ñúū ná ñn ná ñn máá yó cácahān de tācá jniñu jéhnu ní sáha Yaā Dios, achí i.

12 Te ndihí i chi ni canaa ií ni i cájini nahín i. Te ni candajnuhún i jíin jnáhan i:

¿Na vé cúu jeē ní cuu núu súcuan jeē cácahān de yuhu ñūū yō? achí i.

13 Te sava i ni cacahān catá i:  
Tuú chi jeē cánajīni de, achí i.

*Jeē ní nacani Pedro jnūhun nuū ñáyuu*

14 Yūcuán na te ni candocuiñī Pedro jíin ndihúxí iin ga apóstol, te ni cahān jee Pedro jíin ñáyuu ún:

Nihín jnáhan ñuu yō hebreo, jíin ndihí nihín jéē cáyūcu ní Jerusalén, jnūhun yáha na chúhun ni ni jíin náhan ní, chi cuni nahín ní cahān na jíin ní.

15 Chi máá ná jijnáhan ná, nasūu jéē cájini ná nájnūhun cájeni ni ní, chí sáá cahīn jenéhen cúu, te nasūu hora cánajīni ñáyuu cúu.

16 Chi sa suhva squícu jniñu yáha nájnūhun ni cahān Joel, tēe ni nacani jnūhun Yaā Dios nde jenahán, chí súcuan ni cahān de:

17 Achí Yáā Dios: Quiví sándihí na te tají rí Espíritu rí cunuú yá jíin táca ñáyuu,

te sēhe yí ró jíin séhe sñhí ró, nacani i jnūhun rí,

te táca tēe lulí chí coto ndijin de jeē steén rí nuū de,

te táca tēe jéhnú chí sáha rí jeē scóto jēni de.

18 Te quiví ún chí tají rí Espíritu rí cunuú yá jíin táca mozo rí, cúu tēe cúu ñahan,

te nacani i jnūhun rí.

19 Te ichi ándiví sáha rí jniñu jéhnú jeē nāā ni ñáyuu coto i,

te sáha rí jniñu jéhnú ini ñayīvi jéē steén jeē kujéhnú rí,

chí coo niñī jíin ñúhūn jíin ñúhmā nájnūhun vicō.

Yūcuán cúu jeē sáha rí jeē cóo jnūndóho xeēn.

20 Te nduu jnúú níāndii te ma cúndijin gā,

te yoō coto cuéhé nájnūhun niñī.

Yūcuán na te quee quiví jeē ndíji máá Jítóho rō Jesús.

Quiví ún coo cuehē jniñu jéhnú, te cuni ndihí ñáyuu jeē quiví maá Jítóho rō cúu.

21 Te táca ñáyuu jeē cahān ndahú i jíin yá te jnama ya i, achí Yáā Dios.

Achí Joel ni nacani de jnūhun ya.

22 Jeē yūcuán nihín tēe ñuu yō Israel, cuni nahín gá ni jnūhun yáha jíin náhan ní. Ni steén Yaā Dios jeē ní tají yá maá Jesús, Yaā ní jéhnú ñuu Nazaret, chí máá Yáā Dios ní jéhe ya jeē ní sáha Jesús jniñu jéhnú mēhñu máá ní, jíin jniñu jeē steén jeē kujéhnú ya, te jniñu un ní canaa ni ní ní cajito ní. Te je cájini vāha ní jéē súcuan ni cuu.

23 Te máá ní ní cajñī ní yá, te ni cajendēca ní yá nuū tēe xeēn ni cajehni de ya jicā cruz ni casáha ní. Te nde jíin tiempo je ni jini Yaā Dios jeē súcuan sáha ní jíin náhan ní, chí súcuan je ni sándaā yā.

24 Te ni nastécu Yaā Dios Jesús te tuá ni cúu ya ndīyi, chí jnūhun xeēn jeē jihí ñáyuu, tuá na vé cúu ga sáha jíin yá.

25 Chi nde jenahán suhva ni tee David jnūhun ndese ni cahān Jesús jíin Yáā Dios:

Jíní na núu maá ní jeē cúu ní Jítóho ná, chí ñī cáni ndéé ní jíin ná,

chí ndéé ní ichi ndáváha ná, cúu jeē chindéé ñáhán ní sāña návāha coo ndeyí ni ná.

26 Jeē yūcuán cúsiñi ni ná te cáhán na jnūhun siñi.

Jeē yūcuán ma nácani uhū ni na síquī jnūhun cuu ná.

27 Chi ma cuáha ni jnūhun quendōo ánuá na lugar nuū cáyūcu ánuá ndīyi,

ni ma cuáha ni jnūhun tehyū ná, chí jéjníñu ná núu ní te manī ni jíin ná.

28 Te ni steén ni núu na jéē nátecu ná, te sáha ní jéē cusī teyí ni ná condee na jíin ní ñī cáni.

Achí Jesús, ni achí David.

29 Tāca nihín jíin náhan ní, na cástūhun cájī ná nuū ni jnūhun jíi yō David, chí tu ní cáhán de jnūhun yáha síquī maá de. Chí ni jihí de te ni quindūji de, te jíní yō nuū yándūji de nde vijna.

<sup>30</sup> Chi ni cuu de tēe ni nacani jnūhun Yaā Dios nde jenahán. Te ni jini de jeē váha ni jejnūhun ya nuū de jeē chíji yucūn maá de quiiji Cristo, te condee yā mesa de ndacu ya jniñu nájñūhun ni ndacu de jniñu jeē ní cuu de rey.

<sup>31</sup> Te nde jiín tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndīyí, ni yiqui cúñu yā ma tehyú.

<sup>32</sup> Chi Yaā Dios ni nastécu yā Jesús, te máá ná cácuu ná testigo jeē ní natecu yā.

<sup>33</sup> Te ni ndujéhnu tucu ya ni sáha Yaā Dios jiín poder yā. Te nde nuū maá Yāā Dios, Yaā cúu Tátá yā, ni nihīn Jesús Espíritu Santo, chi súcuan ni jejnūhun ya. Te ni tají Jesús Espíritu Santo, te suu ya sáha jniñu jeē cájito ní te cájini sōho ní vijna.

<sup>34</sup> Te David, nasūu síquī maá de ní cáhán de tāca jnúhun yáha, chi tu ní ndáa yiqui cúñu de andiví. Chi síquī Cristo cúu jeē ní cáhán de suhva:

Máá Yāā Dios ni cahān yā jiín Jítoho rī Cristo:  
Cucōo ró ichi ndáváha ri jeē steén jeē cujéhnu ró.

<sup>35</sup> Te na sáha ri jeē quende rō poder tāca jéē cájito uhū rohó, áchí yá. Achí David.

<sup>36</sup> 'Núu súcuan te ndihí ní jéē cácuu yó ñayuu Israel, na cúni vāha ní jéē vésú ni cajehni ní yá jicā cruz, te Yaā Dios ni jeni ya maá Jesús jeē cúu ya Jítoho yō te suni cúu ya Cristo, Yaā jnáma yóhó, áchí Pedro jiín i.

<sup>37</sup> Te jeē súcuan ni cajini sōho i jnūhun yáha, te ni cajnahuhū ni anuá i. Te ni cacajnūhún i Pedro jiín táca gá apóstol:

¿Te ndese sáha ná jíjnáhan ná núu súcuan? áchí i.

<sup>38</sup> Te ni cahān Pedro jiín i:

Nacani ni ní jéē stóo ni cuéchi ní jíjnáhan ní, te cuandute ní jéē ní candíje ní Jesucristo, návāha cone cáhnu ni Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ni.

<sup>39</sup> Chi súcuan ni jejnūhun máá Tátá yō Yaā Dios nuū yō jiín núu séhe yó, te

suní súcuan ni jejnūhun ya nuū ñáyuu tāca gá nación, tācá i jeē cána ya i candíje i.

<sup>40</sup> Te jiín cuéhē gā jnūhun súcuan ni cahān cají Pedro, te ni stihví ni de i:

Nducú ndéyí ní jeē na cácu ní, chi jnahnū ndetū ñayuu casáha jniñu néé, áchí de.

<sup>41</sup> Yūcuán na te tācá i jeē ní cajetáhú jnúhun ni cahān de, ni cajendute i. Te quiví un ní nducuehē gā ñayuu cácuandíje, nájñūhun unī mil gā ñayuu.

<sup>42</sup> Te ni cahīn nihīn i síquī jnúhun cástéén apóstol. Te inuú-ni cándajnūhun mánī i te cájicān tahu i, te ñn cáhnu-ni cáyeji i pan, nájñūhun ni steén maá Jítoho yō jeē núcūhun ni yō síquī yā.

*Ndese ni coyūcu ñáyuu jeē ní candíje jeē xíhna ñúhún*

<sup>43</sup> Te ndihí ñayuu ni cayūhú i ni cajito i, chi cuehē jniñu jéhnu jeē steén jeē cujéhnu ya ní casáha tēe apóstol.

<sup>44</sup> Te inuú ní cahīyo ní ñayuu cácuandíje, te ni cacuu inuú i tāca jéē cánevāha i.

<sup>45</sup> Te ni caxícó i na-ni na vé cánevāha i, te ni casaja i xūhún un núu tāca jnáhan i, núu ndese jíni ñúhún ñn ñn i.

<sup>46</sup> Te ndijnahan quiví ni candutútú i ini templo. Te manī ni cayejí cáhnu i pan tācá vehe jnáhan i nájñūhun ni steén yā, te ni cahīyo sī ni i.

<sup>47</sup> Te ni cacahān i jeē yóhyo cujéhnu Yaā Dios. Te ndihí ñayuu ñuu un ní cajejnúhún i ñayuu cácuandíje. Te ndijnahan quiví ní jnama Jítoho yō sava ga ñayuu, te ni nduu inuú i jíin ñáyuu cácuandíje.

*Jeē ní nduvāha tēe ríngo*

### 3

<sup>1</sup> Te ñn quiví te máá cáhunī jehíni ní caa Pedro jiín Juan cuango de templo, chi hora un cájicān tahu jnáhan de hebreo.

<sup>2</sup> Te cájendēca ñayuu ñn tēe cáríngo nde quiví ní cacu de. Te tēe un ndéé de ndijnahan quiví yehyí templo jeē naní Hermosa, jícan de caridad nuū tāca ñáyuu quívicoo ini templo.

3 Te tēe un ní jito de nuū Pedro jíin Juan jeē véji de quivícoo de ini templo, te ni jicān de caridad nuū Pedro jíin Juan.

4 Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núu rī jijnáhan ri, achí de.

5 Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núu de.

6 Te ni cahān Pedro:

Tú na xūhun plata ni xūhun oro cánevāha ri. Te íyó ñn jeē váha ga sáha ri jíin ró: jíin poder maá Jesucristo, Yaā ní jehnu ñuu Nazaret, cáhán rī jíin ró, ndocuiñi te caca ró, achí de.

7 Te ni jñi de ndavāha tēe ún, te ni ndonehen de. Te jehē de jíin súcūn jehé de ni nduvāha-ni.

8 Te ñn ni scānda de máá de ni ndocuiñi de, te ni quejéé de jíca de. Te ni quiví de jíin Pedro jíin Juan ini templo, jíca de, cánda de, te nácuatáhú de nuū Yaā Dios.

9 Te ni cajini tāca ñayuu jeē jíca de te nácuatáhú de nuū yā.

10 Te ni canacuni i de jeē maá de cúu tēe ni condee yehyí templo jeē naní Hermosa, ni jicān de caridad. Te ni canaa ni i ni cajito i, te ni cayūhú i cajito i jeē ní nduvāha tēe ún.

*Jeē ní nacani Pedro jñūhun ini corredor jeē naní Salomón*

11 Te tēe ni nduvāha ún, tu siáa de Pedro jíin Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cajito i.

12 Te ni jito Pedro jeē ní cutútú ñayuu ún, te ni cahān de jíin i:

Níhín tēe ñuu yō Israel jijnáhan ní, ¿najahē cánaa ni ní cajito ní jñiñu yáha? ¿Najahē cajito ní núu ná te cájeni ni ní jeē maá ná jijnáhan ná íyó poder na jeē sáha ná jeē nácaca tēe yáha? ¿Chí ní nduvāha de siquí jeē tēe cájica ndaā cácuu ná cájeni ní ní?

13 Tuú chi máá Yáa Dios jíi yō Abraham jíin Isaac jíin Jacob jíin táca gá jíi yō, ni sáha ya jñiñu yáha návāha cuni ñayuu jeē cujéhnu Sēhe ya Jesús, Yaā jeē ní cajendēca ní núu tēe cácujeñu.

Te ná ni cuni Pilato jeē siaá de ya, te tu ní cájēhe ni jñūhun.

14 Te ni casquéhichí ni yá vēsú cúu ya Yaā ndaā, Yaā iī. Te sa suhva ñn tēe jéñni ndīyi ni cacahān ni jíin Pilato jeē na siáa de.

15 Te ni cacahān ni jēē na cúu Yaā jeē sáha jeē técu ndihí-ni. Te Yaā Dios ni nastécu yā Jesús jeē ní cuu ya ndīyi, te máá ná cácuu testigo jeē ní natecu yā.

16 Te tēe yáha jēē cájito ní te cánacuni ní de, ni candíje de jíin ná jeē iyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájñūhun cájito ndihí ní.

17 Te na cástūhun ná nuū ni jíjnáhan ní, je jíni na jēē maá ní jíjnáhan ní jíin tēe cácujeñu nuū yō, tu ní cájécūhun ni ní, te jeē yúcuan ní cajehni ni yá.

18 Te súcuan ni squícu jñūhun ni cahān Yaā Dios nde jenahán jēē cánuú ndoho Cristo siquí cuéchi ñayuu, chi ni sáha ya jeē súcuan ni cacahān tēe ni canacani jñūhun ya nde jenahán.

19 Te na nácani ni ní jēē stóo ni cuéchi ní, te nasāma ini ní, te quivícoo ní ndaha Yaā Dios návāha ndahva yā cuéchi ní. Te quee quiví jeē ndúsñi ni ní sáha máá Jítóho yō.

20 Te natají yá Jesús ndiji ya, chi cúu ya Cristo, Yaā ní jeni Yaā Dios jeē jñáma ya yohó.

21 Te jíni ññūhún jēē cóo ya andiví ndé nasájeé yá tāca jēē iyó, nájñūhun ni cacahān tēe ndoo ni canacani jñūhun nde jenahán ní sáha Yaā Dios.

22 Chi suhva ni nacani jíi yō Moisés jñūhun nuū tāca jíi yō: Máá Jítóho yō Yaā Dios cani ya Yaā nacani jñūhun nuū rō jijnáhan ró, nájñūhun ni jeni ya ruhū. Te cuu ya ñn jñáhan ñuu yō. Te na chúhun ni rō tāca jñūhun jeē nácani ya ún.

23 Te núu ndé tēe tú chuhun ni de jñūhun cahān yā, jñahnū ndetū de, te ma cúu ga de jñáhan ñayuu yā Israel, achí Moisés.

24 Te tāca tēe ni canacani jñūhun nde jenahán, nde tiempo ni quiiji Samuel te ní gá nde vijna, suni ni

canacani de jnūhun siquī tācá jniñu cúu quiivī yáha.

<sup>25</sup> Yucūn maá tée ni canacani jnūhun ya nde jenahán cácuu yó, te suni siquī maá yó jijnáhan yó cúu jeē ni sáha Yaā Dios contrato jíin jíi yō. Chi ni cahān yā jíin Abraham: Yucūn maá ró cane Yaā sáha jeē quéndōo ndetū tāca ñáyuu ní cáhnu ñayīvi, áchí yá.

<sup>26</sup> Te jeē ní nastécu Yaā Dios Sēhe ya, te ni quiji ya nuū maá yó xíhna gā, návāha quéndōo ndetū yō sáha ya, chi sama ya anuá yō jeē ma sáha ga yō jniñu neé, áchí Pedro.

*Jeē ní cajendēca de Pedro jíin Juan nuū tée cácujeñnu*

## 4

<sup>1</sup> Te Pedro jíin Juan níni cácahān gā de jíin ñáyuu ún te ni quecoo tāca sūtū jíin tée grupo saduceo, jíin tée cácujeñnu nuū tée cándito templo.

<sup>2</sup> Te yōhyo ni caquitī ni de siquī jeē castéén Pedro jíin Juan nuū ñáyuu, jíin jéē canacani de jnūhun jeē nátecu ndīyī chi je ni natecu Jesús.

<sup>3</sup> Te ni cajni ún de, te ni cachuhun ún de vecāa cone de nde cundijin inga quiivī, chi je ni ini.

<sup>4</sup> Te cuehē ñáyuu jeē ní cajini sōho jnūhun ni cacahān Pedro jíin Juan ni cacandíje i. Te ni nduu nájnūhun uhūn mil jeē maá nene tée jeē ní cacandíje.

<sup>5</sup> Te jeē ní cundijin inga quiivī ún, te tée cácujeñnu nuū ñáyuu hebreo jíin tée jéñnu cándiso jniñu jíin tée castéén jnūhun tutu ley yā, ni candutútú de ini ñuu Jerusalén.

<sup>6</sup> Te suni ni candutútú de jíin Anás jeē cúu sutū cujeñnu ga, jíin Caifás jíin Juan jíin Alejandro jíin táca gá jeē cácuu jnáhan sutū cujeñnu ga ún.

<sup>7</sup> Te ni candacu jniñu jeē na quíjicoo Pedro jíin Juan condichi de mēñū, te ni cacajnūhún de:

¿Ndé ñin ni tejniñu róhó te ndese ni nihīn jniñu ró ní sáha ró jéē nduvāha tée yáha? áchí.

<sup>8</sup> Yūcuán na te Pedro chi ni cunuú maá Espíritu Santo jíin de, te jíin poder yā ni cahān de jíin táca tée ún:

Tāca níhín tée cácujeñnu nuū ñūū yō Israel jíin táca níhín tée jéñnu cándiso jniñu,

<sup>9</sup> vijna te cástichí ni sáña siquī ñin jniñu váha ní casáha ná jéē ní nduvāha tée cúhú yāhá.

<sup>10</sup> Te na cástūhun ná nuū nihín jéē cácujeñnu ní, návāha suni cuni ndíhi jnáhan ñuu yō Israel jeē jíin poder maá Jesucristo, Yaā ní jehnu ñuu Nazaret, ni nduvāha tée índichi nuū ni yáha. Te suu ya cúu Yaā jeē ní cajehni ni jíca cruz, te ni sáha Yaā Dios jeē ní natecu yā.

<sup>11</sup> Jesús cúu nájnūhun yuū cimientu jeē quítuu vehe. Te máa ní jijnáhan ní cácuu nájnūhun tée casáha vehe, te ni casquéhichí ni yá nájnūhun jeē cátejiyo ní yūū, chi tu ní cácaandíje ní yá. Te ni sáha Yaā Dios jeē cúu ya nájnūhun yuū cánuú gá jeē quítuu vehe.

<sup>12</sup> Te tú cuiti inga jeē cúu jnama yóhó, chi tuá na inga jeē cujeñnu ní jéni Yaā Dios ini ñayīvi yáha jéē cúu jnama yóhó, áchí Pedro.

<sup>13</sup> Yūcuán na te ni cajini un jéē Pedro jíin Juan jéñnu-ni cácahān de. Te je cajini jeē tú tūhva de, chi tée súcuan-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús.

<sup>14</sup> Te cándēhe núū tée ni nduvāha un, índichi de jíin Pedro jíin Juan, te tu ní cánihīn gā modo ndese ga cahān.

<sup>15</sup> Yūcuán na te ni candacu jniñu jeē na quéndacoo sín de yatā véhe juzgado te ndajnūhun máa jijnáhan.

<sup>16</sup> Te ni cacahān:

¿Ndese sáha yó jíin tée yáha núu súcuan? Chi ni jité jnūhun yáha núu tāca ñáyuu ñuu Jerusalén jeē súcuan ni casáha de ñin jniñu jéñnu, te ma cúu cahān yō jeē tu íyó ndáa.

<sup>17</sup> Te návāha ma cuité ga jnūhun yáha, na cúxeēn yō nuū de jeē ma cahān cuiti gā de jnūhun Jesús nuū ní ñin ñáyuu, áchí.

<sup>18</sup> Te ni cacana ún de, te ni cacahān nihīn jíin de jeē ma cahān cuiti gā de

jnūhun Jesús ni ma steén gā de jnūhun un núū ní ññayuu.

<sup>19</sup> Yūcuán na te ni cacahān Pedro jíin Juan:

Caní vāha ni ní te núū nújnahan ni Yaā Dios jeē stóo ná jniñu ní ndacu ya jeē sáha ná te cuandije ná máá na jniñu nándacu ní.

<sup>20</sup> Chi ma cúu stóo ná jniñu jeē nacani ná jnūhun ní cajini sōho ná jíin jniñu ní cajito ná, áchí de.

<sup>21</sup> Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáá de cuango de, chí tú cuiñi na modo stóho de chí cáyūhu cájito ñayuu, chí siquī jniñu jéhu ni cuu ún te ndihí i cacahān i jeē yóhyo cújéhu Yaā Dios.

<sup>22</sup> Chi tēe jeē ní sáha ya jniñu jéhu jíin de jeē ní nduvāha de, víhyá gā uū xico cuiyā de.

*Jeē ní cajicān tahuñ ñayuu cá candíje*

<sup>23</sup> Te ná ni casiáá un Pedro jíin Juan cuango de, te ni najinūcoo de nuū táca gá jnāhan de, te ni cacachi de ndese ni cacahān sutū cácujeñu jíin tēe jéhu cándiso jniñu.

<sup>24</sup> Te jeē ní cajini sōho de jnūhun yúcuān, te ññuú-ni ni cajicān tahuñ de nuū Yaā Dios:

Tátā Yaā Dios jeē cújéhu ní núū ndihí, máá ní cúu Yaā Dios ni sáha andiví jíin ñáyiví jíin mar jíin táca ndihí jeē iyó.

<sup>25</sup> Te jeē jíin Espíritu Santo te ni sáha ní jēe ni cáhān mozo ní David nde jenahán:

¿Najehē cáquitī ndevāha ni ñayuu sñn nación?

¿Te najehē cájeni sáá ni i jeē ndóna i siquī ní?

<sup>26</sup> Ni cacutútú jēe cácuu rey ñáyiví jíin náhan,

te tēe cácujeñu ni cacutútú de, te ññuú-ni ni candonda de siquī maá ní jeē cúu ní Jitoho ná,

jíin siquī Cristo, Yaā jeē ní jeni ní. Achí David.

<sup>27</sup> Te jendaá chí Herodes jíin Poncio Pilato jíin táca tēe ññuú yō Israel jíin tēe táca gá nación, ni cacutútú de ini

ññuú yáha ní candonda de siquī Séhe ññi ní Jesús, Yaā ní jeni ní.

<sup>28</sup> Te súcuān ni cuu návāha squícu táca jniñu jeē jíin poder ni ní cundaā ni ní ndé jenahán jēe súcuān coo.

<sup>29</sup> Te vijna, Tátā, coto ní ndese cácahān xeēn de nuū na jíin náhan ná, te cuāha ni fuerza ni núū na jēe cácuu ná mozo ni, návāha jéhu-ni nacani ná jnūhun máá ní.

<sup>30</sup> Te jíin poder ní nasávāha ni ñáyuu cácuñu, te sáha ní jniñu jéhu jeē steén jeē cújéhu ní. Te táca jēe yáha sáha ní jíin poder Séhe ññi ní Jesús, áchí i jíin náhan i.

<sup>31</sup> Te nuū ní ndihí ni cajicān tahuñ i, te nuū cáyūcu tútu i un ní sáha ya jeē ni jnáa. Te ndihí i ni cunuú Espíritu Santo jíin i, te ni jēhe ya fuerza te jéhu-ni ni canacani i jnūhun Yaā Dios.

*Jeē ní canevāha cáhu i ndajniñu*

<sup>32</sup> Te ñayuu cuehē jeē ní cacandíje chí ññuú cáhīyo ni i jíin náhan i. Te tú ni ññi i ní cáhān jeē ndajniñu jeē névāha máá i cuu máá-ni i, chí táca ndajniñu ni canevāha cáhu i.

<sup>33</sup> Te ññin cácanani apóstol jnūhun jeē ní cajito de jeē ní natecu Jitoho yō Jesús. Te yóhyo ni chindéé ññahán yá ñayuu cá candíje.

<sup>34</sup> Chí tú cuiñi ni ññi i ní ndóho jeē cumaní nuū i, chí táca ñáyuu cánevāha cuehē ññuhun chí vehe, ni caxícó i sava te ni caquindeca i xūhún un.

<sup>35</sup> Te ni cajēhe i xūhún un núū tēe apóstol, te ni casaja tēe apóstol nuū ñáyuu cá candíje núū ndese jíni ññuhún ññi ññi i.

<sup>36</sup> Te iyó ññi tēe nání José jeē cúu yucūn Leví, ni cacu de Chipre, ññuhun jeē íne sñn nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhān jnūhun ndeyí ni.

<sup>37</sup> Te ni xícó de ññi ññuhun de, te ndáhá de xūhún un ní jēhe de nuū tēe apóstol.

*Siquī cuēchi jeē ní casáha Ananías jíin Safira*



## 5

1 Te suni inga tēe nání Ananías jíin ñasihí de Safira, ni caxīcó de ññ ñuhun de.

2 Te ni chuvāha de sava xūhún un cuu máá de jíin ñña, chi súcuan ni candajnūhún de jíin ñña, te ndáhá de inga sava nájnūhun jeē ndíhi cúu, te ni jēhe de nuū tēe cácuu apóstol.

3 Te ni cahān Pedro:

Ananías, ¿naun ni jēhe ro jnúhun jeē quiví jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní caxīco ró ññuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajniñu máá ró, chi ni sáha ró nájnūhun jeē ndíhi xūhun ní jēhe ró.

4 ¿Te á násūu cuenta maá ró cúu ññuhun un ndé ná tu xīco ró? Te ná ni xīco ró ¿te á násūu cuenta maá ró cúu xūhun jēe cuajniñu ró ndé nuū cuní maá ró? ¿Te naun ni jeni ni rō jeē stahú ró súcuan? Te násūu máni máá tēe cúu jeē jícu ró stáhú ró, chi suni Yaā Dios, áchí Pedro.

5 Te ná ni jini sōho Ananías táca jnúhun yáha, te ni cotúú-ni de ni jihí de. Te táca ñáyuu ní canihín jnúhun ún, yōhyo ni cayūhú i.

6 Te ni candocuiñí tēe suchí, te ni cachusúcún de ndíyí un cuáchindūji de.

7 Te ni cunúu nájnūhun unī hora. Te ni jinū ñasihí ndíyí un ní quiví ñña ini vehe ún, te tú na vé jiní cuiñí ñña.

8 Te Pedro ni cajnūhún de ñña:

Cachi nuū rī, ¿á ññ súcuan-ni ni caxīco ró ññuhun ró chí tuú? áchí de.

Te ni cachi ñña:

Suu súcuan-ni ni caxīco ná, áchí ñña.

9 Te ni cahān Pedro jíin ñña:

¿Naun ni casquijnáhan jnúhun ró jēe cóto ndee rō Espíritu Santo maá Jítoho yō? Chi ni nducú ró stahú ró yā. Cuni nahín jēe cáhma nanecoo tēe cuachindūji yí ró, te suni súcuan quichindūji de rōhó, áchí de.

10 Te ni cotúú-ni ñña nuū jehé Pedro te ni jihí-ni ñña. Te ni ndivicoo tēe suchí un te ni cajito de jeē jé ni jihí ñña, te ni caquenehen de ñña, te ni jechindūji de ñña xiin yí ñña.

11 Te yōhyo ni cayūhú ndivii ñáyuu cá candíje jíin táca gá ñáyuu jeē ní cajini jnúhun jeē súcuan ni cuu.

*Cuehē jniñu jénu ni casáha apóstol*

12 Te cuehē jniñu jénu jeē steén jeē cujénu Yaā Dios ni casáha tēe apóstol nuū ñáyuu. Te táca ñáyuu cá candíje, ñnuú-ni cándutútú i ini corredor jeē naní Salomón.

13 Te tu ní cáchundeyí ni inga ñáyuu quijnáhan jíin i. Te cájejnūhún i ñáyuu cá candíje.

14 Te ni nducuehē gā i, chi cúu tēe cúu ññahan ni cacandíje i máá Jítoho yō.

15 Te cáquindeca ñáyuu jnáhan i jeē cácuu, te cájequin i ini calle cáca i nuū camilla jíin núu yúu, chi cácuu i vésú ste cuándahū Pedro na yáha siquí i te nduvāha i.

16 Te suni cuehē ñáyuu táca ññu cáhīyo yajni yūcuan ní quijicoo i ññu Jerusalén ni caquindeca i jnáhan i jeē cácuu jíin jēe cándoho tachí, te ndíhi i ni canduvāha i.

*Jeē ní cajito xeēn i tēe cácuu apóstol*

17 Yūcuán na te sutū cujénu ga jíin táca gá jnáhan jeē cá candíje sahan saduceo, ni cacucuésun ni jeē siquí tēe cácuu apóstol.

18 Te ni cajni de tēe cácuu apóstol ni cachuhun de vecā.

19 Te ññ ndajéhé maá Jítoho yō ni nune ya yehyí vecā ún jecuáá, te ni quenehen ya de jíjnáhan de. Te ni cahān yā jíin de:

20 Cuáhán te cuiñí ró ini templo, te yūcuán nacani cájí ró jnúhun nuū ñáyuu siquí ndese nihín tahu i cotecu i ní cáni, áchí ndajéhé yā.

21 Te ni cajini sōho de jnúhun yáha. Te nuū ní cundijin te nehen ni quivicoo de ini templo, te cástéén de jnúhun ya nuū ñáyuu.

Te níni cástéén de te sutū cujénu ga jíin táca jnáhan de ni canastútú de tēe junta cujénu ga, jeē cúu ndíhi tēe jénu cándiso jniñu nuū ñáyuu nación Israel. Te ni catajé de policía cuaquenehen tēe apóstol ini vecā.

22 Te nuū ni jínūcoo te tuá gā tēe apóstol. Te ni canandió cóo te ni cachi:

23 Jendaá cúu jeē ní cajito ná ndési vāha vecāa, te cáhīn tēe cándito yéhyí un. Te nuū ní canune ná, te tú cuiti gā tēe un cáhīn ini vecāa ún, áchí de.

24 Te sutū kujéhu ga jíin tēe cújéhu nuū tēe cándito templo jíin sūtū cácujuhnu, nuū ní cajini sōho de jnūhun yáha, te ni cajeni ni de ndese ga cúu un núu súcuan.

25 Te ni quee-ni ĩn tēe te ni cachi:

Tēe jeē ní cachuhun ní vecāa, cáhīn de ini templo, te cástéén de jnūhun nuū ñáyuu, áchí de.

26 Yūcuán na te tēe cácujuhnu nuū tēe cándito templo, jíin tēe cácuu policia de, ni jengoo de, te yúcún ní nacueca de táca tēe apóstol vendicoo de jíin, chí cáyūhú de jeē sanaa te cuāha ñayuu yuū xinī de núu sáha xeēn de jíin táca tēe apóstol.

27 Te nuū ní najinūcoo de jíin tēe apóstol, te ni cajecuiñī de nuū tēe casáha junta. Te sutū kujéhu ga ni cahān:

28 Ni cacahān nīhin ri jíin ró jeē ma steén cuiti gā rō jnūhun tēe nání Jesús. ¿Te naun ni casáha ró jēe ní ndecāva jnūhun un ní ñuu Jerusalén yāhā? Te cácuuni rō stau yáhu ró rúhū jijnáhan ri siquī jeē ni jíhī tēe ún, áchí.

29 Te Pedro jíin táca gá apóstol ni cacahān de:

Cánuú jēe squícu ná jniñu ní ndacu Yaā Dios nuū ná te nasūú jniñu nándacu tēe.

30 Máá Yáa Dios jíi yō ni nastécu yā Jesús, Yaā ní cajehni maá ní jeē ní cata caa ní yá jicā cruz.

31 Te ni sáha Yaā Dios jeē ní ndujéhu tucu Jesús néne ya ichi ndávaha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios návaha yóhó, jēe cácuu yó ñáyuu Israel, na nácani ni yō jeē stóo yó cuéchi yó, te cone cáhnu ni yā nuū táca cuéchi yó.

32 Te máá ná ni cajito ná táca jniñu yáha, te suni máá Espíritu Santo steén cají yá jeē súcuan cúu, chí jéhe Yaā

Dios Espíritu Santo yā condee ini anuá táca ñáyuu jeē cájendetū nuū yā, achí de.

33 Te ná ni cajini sōho un jnūhun yáha, te yōhyo ni caquitī ni, te cahni de cácuuni nuū.

34 Te mēhñú un jíjnáhan néne ĩn tēe grupo fariseo nání de Gamaliel, te cúu de maestro jeē steén ley yā, te táca ñáyuu cájejnūhún i de. Te ni ndocuiñī de, te ni ndacu de jniñu jeē na cújiyo núu tēe apóstol.

35 Te ni cahān de:

Róhó jnáhan ñuu yō Israel, cani vāha ni rō núu na vé cácuuni rō sáha ró jíin táca tēe yáha.

36 Chí nucūhun ni rō jeē ĩn cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nájñūhun cuūn ciento tēe jíin de. Yūcuán na te ni cajehni ñayuu Teudas, te táca jēe ní caquiñáhan jíin de ni cajitē núu cuangoo sáa-ni, te ni jecuiñī-ni jniñu ún.

37 Yūcuán na te quivī ni íyo censo te Judas, ĩn tēe Galilea, ni ndonda de siquī gobierno, te ni cacutútú cuéhē tēe jíin de. Te suni ni cajehni ñayuu Judas, te táca tēe jeē ní caquiñáhan jíin de ni cajitē núu cuangoo.

38 Te vijna na cuáha ri consejo rohó. Ma stáhān gā rō tēe yáha. Siáá de na quíngoo de. Chí núu ñayuu-ni ni squejéé jniñu yáha, te jecuiñī ĩ.

39 Te núu Yaā Dios ni squejéé, te ma cúu casi rō, chí sanaa te siquī Yaā Dios cándonda ró, áchí de.

40 Te ni cachusóhó jēe ni cáhān Gamaliel. Te ni canacana tēe cácuu apóstol, te ni cacani de jíin cuarta ñi te ni cacahān xeēn jíin de jeē ma cahān gā de jnūhun Jesús, te ni casiáá de cuangoo de.

41 Te máá apóstol ni quendacoo de nuū junta cuangoo de, cácusī ni de jeē ni jéhe ya jnūhun ndoho de jeē cuáha ñayuu jnūhun canu de siquī jeē cácandíje de ya.

42 Te ndiquivī castéén de jnūhun vāha Jesucristo, te cánacani de jnūhun ún ini templo jíin táca-ni vehe.

*Jeē ní cajeni de uxā tēe cuajniñu mēhñu ñáyuu cá candíje*

## 6

<sup>1</sup> Te ni cucuehē ñáyuu cá candíje. Te tiempo un te tēe hebreo jeē cá cahān yuhu griego, ni quejé de cá cahñu de nuū jnāhan hebreo de, áchí de jeē ñahan viuda jeē cá cahān yuhu griego tu cá nihīn vāha ña staā jeē cá saja de tāca quívī cuu ña.

<sup>2</sup> Yūcuán na te máá ndihúxí uū apóstol ni canastútú de tāca ñáyuu cá candíje, te ni cacahān de:

Tú vāha jeē jécuiñī jniñu jeē cá nacani ri jñuhun Yaā Dios siquī jeē cá saja rī staā.

<sup>3</sup> Núu sūcuan te róhó, hermano, nacāji ró úxā jnāhan máá yó, te na cóndiso jniñu de saja de staā. Te nacāji ró tēe jeē cá jējñuhún ñáyuu de, tēe ndíchí jēē ní cunuú Espíritu Santo jíin de.

<sup>4</sup> Te ruhū jijnāhan ri, máni cacān tahu rī jíin jēē nācani ri jñuhun ya, achí de.

<sup>5</sup> Te ndihī ñáyuu ni canujnahan ni i jñuhun ni cacahān de. Te ni canacāji i Esteban, tēe cá ndíje vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cá ndíje sahān ñáyuu hebreo nde ná tu candíje de jñuhun Cristo.

<sup>6</sup> Te ni cajeni i tāca tēe yāha núu tēe cá cuu apóstol, te tēe apóstol un ní casoó de ndaha de xinī tāca tēe un ní cajicān tahu de nuū Yaā Dios siquī jniñu condiso de.

<sup>7</sup> Te jñuhun Yaā Dios ni jītē gā cuahān, te ni nducuehē teyí ñáyuu cá candíje i jñuhun ya ini ñuu Jerusalén. Te suni cuehē sutū ni cacandíje de jñuhun ya.

### *Jeē ní cajni de Esteban*

<sup>8</sup> Te ni chindéē ñahán yá Esteban ni jēhe ya poder nuū de, te ni sáha de tācá jniñu jéhu nuū ñáyuu, jniñu jeē steén jeē cujéhu Yaā Dios.

<sup>9</sup> Te ñáyuu hebreo jeē ní cacuyāhu i te ni canduu libre i, íyó vehe i sinagoga i. Te tēe un cá cuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejé de cá stāhān jnāhan de jíin Esteban.

<sup>10</sup> Te tu ní cá cundeyí jíin de, chi ndíchí ní cahān de ni sáha máá Espíritu Santo.

<sup>11</sup> Yūcuán na te ni cascāhān sava tēe jeē na cá hān jñuhun stāhú siquī Esteban. Te ni cacahān jeē ní cajini sōho cá hān ndevāha Esteban siquī Moisés jíin siquī Yaā Dios.

<sup>12</sup> Te jeē sūcuan ni cacahān te ni caquitī ni tāca ñáyuu jíin tēe jéhu cá ndiso jniñu jíin tēe cá stéén jñuhun tutu ley yā. Te ndihī de ni candonda siquī Esteban, te ni cajni de cuango jíin de nde nuū junta cujéhu ga.

<sup>13</sup> Te ni cajeni de tēe cahān jñuhun yáá siquī Esteban, te suhva ni cacahān:

Tēe yāha tu ndé jécuiñī de jeē cahān ndevāha de siquī templo i yāha jíin siquī ley yā.

<sup>14</sup> Chi ni cajini sōho ná cá hān de jeē Jesús, tēe ni jehnu ñuu Nazaret, canu de templo yāha te nasama de jeē tajnúni ley yā jeē ni jēhe Moisés nuū yō, áchí.

<sup>15</sup> Yūcuán na te ndihī tēe cá yūcu núu junta un ní candacoto vāha nuū Esteban, te ni cajini jeē jito nuū de ná jito nuū in ndajéhe Yaā Dios.

### *Jñuhun ni nacani Esteban*

## 7

<sup>1</sup> Te máá sūtū cujéhu ga ni ca-jñuhún Esteban:

¿A ndáa jeē sūcuan ni sáha ró nájñuhun cá cahān de yāhá? áchí.

<sup>2</sup> Te ni cahān Esteban:

Ndihī níhín jēē cá cuu ní jnāhan ñuu yō, jíin ndihī níhín jēē cá cujéhu ní núu ñúu yō, cuni nahín ní jñuhun cahān ná: Máá Yáa Dios jeē yóhyo cújéhu ya, ni steén yā máá yá nuū jíi yō Abraham nde na néne ga de región Mesopotamia, nde ná tu quihīn de condee de ñuu Harán.

<sup>3</sup> Te ni cahān yā jín de: Stóo ñuu rō jín táca jnáhan ró te quihīn rō nuū cuáha ri condee rō, chí máá rí steén ichi nuū quihín rō, achí yá.

<sup>4</sup> Yūcuán na te ni quenda de región Caldea, te ni jinū de ni condee de ñuu Harán. Te yūcuan ní jihī tatá de. Yūcuán na te ni sáha Yaā Dios jeē ní quee de ñuu yáha núū cáyūcu yó vijna.

<sup>5</sup> Te tu ní jéhe ya ni ñn tíhlí ñuhun yáha cuu tahū de. Te vésú súcuan te ni jejnūhun ya jeē cuáha ya ñuhun un núū de nde jín núū táca séhe de, vésú ná tu coo séhe de sáá.

<sup>6</sup> Te súcuan ni cahān Yaā Dios jín de: Séhe ró coyūcu jícá i inga ñuu, te cuñ ciento cuiyā sájniñu sáá-ni i te stóho ñayuu yūcuan i.

<sup>7</sup> Te siquī jeē súcuan sáha i jín séhe ró, te máá rí chí stóho ri ñayuu ñuu ún. Te sáá te quendacoo séhe ró yūcuan, te nucoyūcú i yáhá chiñúhún i ruhū, achí yá.

<sup>8</sup> Te ni cahān yā jín Abraham jeē na cúu de circuncidar, jeē cúu ñn jnunī jeē ni sáha ya contrato jín de. Te ná ni cacu séhe de Isaac te ni sáha de circuncidar i nuū uná quivī. Te suni súcuan ni sáha Isaac jín séhe de Jacob, te Jacob jín séhe yí de jeē cácuu ndihúxí uū yucūn ñayuu Israel.

<sup>9</sup> Te táca séhe Jacob ni cacucuésun ni de jín ñani maá de José, te ni caxícó de i nuū téé jeē ní cajendēca i nde nación Egipto. Te Yaā Dios chí ni ndito ya José.

<sup>10</sup> Te ni jnama ya i nuū táca jnúndóho ní jito i, te ni cundíchí i ni sáha ya. Te Faraón, tēe cúu rey nación Egipto, ni cusī ni de jín i ni sáha ya, te ni tejniñu de José jeē cúu de gobernador te ndacu de jniñu nación Egipto jín núū ñayuu cáyūcú vehe Faraón.

<sup>11</sup> Te ni quiji quivī jeē ni íyo ñn jnamā xeēn, te ni ndoho ñayuu ní cáhnu nación Egipto jín ndé ñuu Canaán. Te táca jíyō ún, tuá ni cánihīn de jeē cáji de.

<sup>12</sup> Te ni nihīn Jacob jnūhun jeē iyó trigo nde nación Egipto, te ni tají de

séhe de ni jengoo de ni cajeen de trigo vuelta ñn.

<sup>13</sup> Te jeē cuángoo de vuelta uū te ni nastúu José jeē maá de cúu ñani de jínáhan de. Yūcuán na te ni jini rey Faraón ndé ñn jnáhan cúu José.

<sup>14</sup> Te ni cahān José jín táca ñani de jeē na cóndeca de tatá de Jacob jín ndihī jnáhan vehe de. Te ni íyo unī xico xahūn i.

<sup>15</sup> Te súcuan ni cuu jeē ni jínū Jacob ni condee de nación Egipto nde ni jihī de. Te suni yūcuan ní coyūcu séhe de jeē cácuu jíyō un ndé ni cajihī maá de.

<sup>16</sup> Te ná ni quee quivī jeē ndénehen ya táca yūcūn de jeē cáyūcu tátú de nación Egipto, te ni cacondiso de yiqui ndihúxí uū ndīyī jíyō un jéē ndīji ñuu Siquem, te ni cachindūji de ini yaū ndīyī ndeé jícá cáva jeē ní jeen jíyō Abraham nuū táca séhe Hamor ñuu Siquem.

<sup>17</sup> Te nde ná cáyūcu gá de nación Egipto, te cuacuyajni quivī jeē squícu jnūhun ni cahān Yaā Dios jín Abraham jeē quéndacoo séhe de nucoyūcú i ñuu ni jéjnūhun ya nuū i, te ñayuu un ní tahū cuehē i ini nación Egipto.

<sup>18</sup> Yūcuán na te ni nucuiñī inga rey ñuu Egipto jeē tu ní jíní de jeē váha ni sáha ndīyī José.

<sup>19</sup> Te rey un ní stahú de táca jíyō te ni sáha ndeváha de jín i, chí ni sáha fuerza de i jeē ma cóto ga i séhe yiquín i te na cúu.

<sup>20</sup> Te tiempo un ní cacu Moisés, te ni cusī ni Yaā Dios jín i. Te unī yoō ni condito sáhi náná i tátá i.

<sup>21</sup> Te tuá ni cúu condito sáhi de i, te ni cachune de i nuū nanihīn séhe sáhi Faraón i, te ni naquihīn séhe ña i ni scuéhnu ña i nájnūhun séhe máá ña.

<sup>22</sup> Te ni cutūhva Moisés táca jnúhun ndíchí ñuu Egipto, te ni cujéhnu de jín jnúhun cáhán de jín jniñu sáha de.

<sup>23</sup> Te nuū uú xico cuiyā de te ni jecondēhé de jnáhan de jeē cácuu ñayuu Israel.

<sup>24</sup> Te ni jito de nuū ñn tēe nación Egipto jeē sáha ndeváha jín ñn tēe Israel. Te Moisés ni jnama de jnáhan de Israel ún, chí ni jehni de tēe Egipto

un. Te súcuan ni ndutahū jeē ni sāha ndevāha jíin jnāhan de ún.

25 Te máá Moisés jéni ni de jeē jécūhun ni tāca jnāhan de jeē Yáa Dios ni tají yá de jeē jnáma de jnāhan de ún ini nación Egipto nuú, te tu ní cájecūhun cuiṭi ni jnāhan de ún.

26 Te inga quivī suni ni jito de nuū uú tēe Israel jeē cájejnāhan, te cúní de jeē na jécuiñī. Te jeē yúcuan ní cahān de jíin: ¿Najehē casáha ndevāha ró jíin jnāhan ró? Chi nájnūhun ñn ñani-ni cácuu ró, áchí de.

27 Te máá tēe cáni tahū jnāhan un ní chundahá de Moisés te ni cahān de: ¿Ndé ñn ni jeni róhó jéē cujéhnū ró núū rī te sándaā rō jniñu ri jijnāhan ri?

28 ¿Chí suni cúní rō cahni rō ruhū nájnūhun ni jehni rō tēe Egipto icu chí naún? áchí de jíin Moisés.

29 Te nuū ní jini sōho Moisés jnūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yúcuan ní scácu ñasihí de uū sēhe yí de.

30 Te ni jíinu uū xico cuiyā jeē néne de yūcuán. Yūcuán na te ñn ndajéhe Yaā Dios ni quenda ya nuū de nde nuū ñúhun téhé nuū ín yucu súcún Sinaí. Te ni quenda ya nuū de xinī ñn yucū cuií cáhnu cándahá yáñuhūn, te tu ní cáyú yucū ún.

31 Yūcuán na te Moisés ni naa ni de jíto de ún, te ni jehēn de nde nuū, návāha coto vāha de. Te ni jini sōho de jeē cahán maá Jítóho yō jíin de:

32 Máá rí cúu Yaā Dios tāca jíí rō jehán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yúcuan tuá ni cúndeyí ni de coto de nuū.

33 Te máá Jítóho yō ni cahān yā jíin de: Quenehen ndijēn rō chi nuū ín ró, ñuhun íí cúu.

34 Je ni jini rī ñayuu maá rí jeē yóhyo cándoho i nación Egipto, te suni jíni sōho ri jeē cájnana uhū i, te ni cuun ri vēji ri jeē jnáma ri i jíjnāhan i. Núu súcuan te vijna chi tají rí rohó ndicó ró quihīn rō nde nación Egipto, achí yá jíin de.

35 Te nde ná tu quenda Moisés Egipto, te tāca jnāhan de ni casquéhichī i de jeē ní cacahān i jíin de: ¿Ndé ñn ni jeni róhó jéē cujéhnū ró núū rī te sándaā rō jniñu ri? ni cacahān i jíin de. Te vēsú súcuan te máá ndajéhe Yaā Dios ni quenda nuū Moisés un jéē cándahá cáyú yucū cuií ún. Te súcuan ni cuu jeē ní natají yá de cuanuhun de nde Egipto jeē ndácu de jniñu nuū i te jnama de i.

36 Te máá Moisés ni sāha de jeē ní quendacoo jnāhan ñuu de ini nación yúcuan, te ni cayāha de Mar Rojo, te ni cajica cuu de ñuhun téhé úú xico cuiyā. Te ní tiempo un ní sāha de cuehē jniñu jéhnū jeē steén jeē cujéhnū Yaā Dios.

37 Te máá Moisés cúu jeē suhva ni cahān de jnūhun yáha jíin jnāhan ñuu yō Israel: Máá Yáa Dios caní ya Yaā nacani jnūhun nuū rō jijnāhan ró nájnūhun ní jeni ya ruhū. Te cuu ya ñn jnāhan ñuu yō. Te na chūhun ni rō jnūhun cahān Yaā ún, áchí.

38 Te suni nde ná ni cajica cuu jíí yō nde nuū ñúhun téhé, te ni cahān ndajéhe yā jíin Moisés xinī yucu súcún Sinaí, te ni nihīn de jnūhun jeē cahán ndese nihīn tahú yō cotecu yō, te ni nacani de jnūhun un núū tāca jíí yō, te ni quendōo jnūhun un núū yō.

39 Te tāca jíí yō ún tu ní cácu ni de cuandetū de nuū Moisés, chi sa suhva ni cacuni de squéhichī ni de Moisés, te ni cacuni de nandicó de nungoo de Egipto nuú.

40 Te ni cacahān de jíin Aarón: Sáha ní tijni yaā na cósnūu núū yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéē jeē cuahán de xinī yucu Sinaí, achí.

41 Yūcuán na te ni cajēhe de oro ni cuvāha ñn becerro oro, te nuū becerro ídolo un ní casocō de quiti, te ni cacusī ni de jíin ídolo ni casáha de ún.

42 Te Yaā Dios ni cujiyo ya cuahān yā, te ni stóo ya de na chíñúhún de nuū tāca jéē jíto yó ín andiví, nájnūhun yósó núū tútu tēe ni canacani jnūhun

Yaā Dios nde jenahán:

Ni cahān yā: Róhó ñáyuu Israel,  
¿á cájeni ni rō jeē nuū ruhū ni casocō  
rō quiṭi

ná ni cajica cuu ró úū xico cuiyā nde  
nuū ñúhun téhé?

<sup>43</sup> Tuú, chi sa suhva ni cacondiso  
ró nicho jeē íne ídolo jeē naní  
Moloc

jíin figura quṫmi jeē naní Renfán,  
ídolo jeē ní casáha máá ró ni  
cachiñúhún ró.

Jeē yúcuān cúu jeē siáha ri rohó quiḥīn  
jicá ró nde yatā ñúū Babilonia,  
achí yá.

<sup>44</sup> Te ni ndacu ya jniñu nuū Moisés  
jeē na sáha de vehe ñiñ nuū chiñúhún  
de ya, nájnūhun cáa jeē ní steén yā  
nuū de. Te tāca jíi yō, nde nuū ñúhun  
téhé ní canevāha de vehe iī un núū  
ní cachuvāha de tabla yuū jeē yosó  
jnúhun ley yā.

<sup>45</sup> Te ni castóo de vehe un núū ndiḥi  
sēhe de jeē cúu jíi yō. Te ni quṫvi Josué  
jíin jíi yō ini nación yáha, te ni sáha ya  
jeē ní cacundeyí de jíin táca ñáyuu jeē  
ní cacoyūcu yáha ní cajinu i cuango  
i. Te ni quṫvicoo de tāca ñuu i jíin vehe  
iī ún, te ni quendōo nde quiṫi ní cuu  
David rey.

<sup>46</sup> Te ni cusḥi ni Yaā Dios jíin rey  
David. Te ni jicān de nuū yā jeē sáha  
de ñin vehe iī yā nuú, chi máá yá cúu  
Yaā Dios jíi de Jacob.

<sup>47</sup> Te ni cuu jeē nde sēhe yḥi de Sa-  
lomón ni sáha vehe iī yā.

<sup>48</sup> Te vēsú súcuān ni cuu te Yaā  
cujéhnú téyí, tu ndéé yá máá vehe jeē  
casáha ñayuu, nájnūhun ni cahān tēe ni  
nacani jnúhun ya nde jenahán:

<sup>49</sup> Ni cahān yā:  
Andiví cúu nájnūhun mesa nuū ndácu  
ri jniñu

te ñayṫvi cúu nájnūhun ñin nuū yṫtuu  
jehē rī.

Núu súcuān ¿te ndese cuu sáha ró vehe  
jeē cōndee rī,

te ndese cuu sáha ró núū ndétātu rí?

<sup>50</sup> ¿A násūu máá rí ní sáha ndiḥi jeē  
iyó?

áchí máá Jítoho yō Yaā Dios.

<sup>51</sup> Te cáhán gā Esteban:

Yōhyo cácuñhni ni ní, te tu cácuñi  
ní chusóhó ní, te cácuñi ní nájnūhun  
ñayuu tācá nación jeē tu cájini i jnúhun  
ya ni tu cácuñi i ya. Chi níni cájesi  
ni núū Espiritu Santo, te nájnūhun  
ni casáha jíi yō jenahán, suni súcuān  
cásáha ní vijna.

<sup>52</sup> ¿A ní iyo tēe nácani jnúhun ya nde  
jenahán jeē tu ní sáha ndevāha jíi yō  
jíin de? Chi jíi yō ni cajehni de tēe  
ni canacani jnúhun jeē quiṫi máá Yāā  
ndaā. Te je ni quiṫi Yaā ún, te máá ní  
ni canastúu ni yá nuū tēe ni cajehni  
de ya.

<sup>53</sup> Te vēsú nde jíin táca ndajéhé yā ni  
jēhe ya ley yā nuū yō, te máá ní chi tu  
cásquicu ní, áchí Esteban.

### *Jeē ní cajehni de Esteban*

<sup>54</sup> Tāca jnúhun yáha ní cajini sōho, te  
yōhyo ni caquiṫi ni, te cánacayḥi yuhu  
cájito nuū Esteban.

<sup>55</sup> Te máá Esteban chi ni cunuú  
Espiritu Santo jíin de. Te ni jito de  
ichi ándiví, te ni jini de jeē ndíndēe  
núū néne Yaā Dios, te índichi Jesús ichi  
ndáváha ya.

<sup>56</sup> Te ni cahān de:

Vijna te jito ri jeē núne andiví, te jito  
ri nuū maá Yāā ní nduu tēe, índichi yā  
nuū kujéhnú ya lado váha Yaā Dios,  
áchí de.

<sup>57</sup> Yūcuān na te ni cajesi un sóho,  
te ni cacana cóhó, te ñnuú-ni ni can-  
donda siquṫ Esteban.

<sup>58</sup> Te ni caquenehen Esteban cuan-  
goo jíin de nde yatā ñúū. Te tēe ni  
cacahān yaá un jíin ndiḥi jnáhan de  
ni cachucú de ticāchí de ndíto ñin tēe  
suchí nání Saulo, te ni cacani de yuū  
xiní Esteban.

<sup>59</sup> Te níni jēe cácuñi tāca tēe un yūu  
xiní de te ni jicān tahu de nuū yā:

Tátā Jesús jeē cúu ní Jítoho ná,  
naquiḥin ní ánuá na vijna, áchí de.

<sup>60</sup> Te ni jecuiñi yṫtí de te ni cahān jee  
de:

Tátā Yaā Dios, ma quénehen ní  
cuéchi siquṫ i jeē casáha i jíin ná, áchí  
de.

Súcuān ni cahān de te ni jihī-ni de.

### *Jeē ní jito xeēn Saulo ñayuu cácuñi*

## 8

<sup>1</sup> Te Saulo, ni nujnahan ni de jeē ni jíhī Esteban.

Te quívi un ní caquejéé de cájito xeēn ndasí de ñayuu cá candíje Jesús ini ñuu Jerusalén, te jeē yúcuán cúu jeē ní cajitē núu ñayuu cá candíje cuangoo i ní Judea jíin ní Samaria. Te tēe apóstol chi tu ní cajitē núu de.

<sup>2</sup> Te sava tēe yíñúhún núu Yaā Dios, ni cachindūji de Esteban. Te yōhyo ni candahyū de jeē ni jíhī Esteban.

<sup>3</sup> Te Saulo chi jito xeēn de ñayuu cá candíje, te quívi de ndijnahan vehe te jñí de tēe, ñahan, chūhun de i vecāa.

*Jeē ní canacani i jñūhun Yaā Dios ndañúū Samaria*

<sup>4</sup> Te tācá ñuu nuū cuángoo tāca ñayuu ní cajitē núu un ní canacani i jñūhun ndese jnáma Yaā Dios ñayuu.

<sup>5</sup> Te ni jinū Felipe ñn ñuu ndañúū Samaria, te nuū ñayuu yúcuán ní nacani de jñūhun Cristo, Yaā ní jeni Yaā Dios jeē jnáma ya yohó.

<sup>6</sup> Te tāca ñayuu ní cacutútú un ní cajini nahín váha i tāca jñūhun ni nacani Felipe, te ni cajito i tācá jniñu jéhu ni sáha de.

<sup>7</sup> Chi cuehē ñayuu cándoho tachī ni canduvāha i, te cácana cóhó táchī un ní caquendacoo. Te cuehē ñayuu ni jíin jíin ñayuu ríngo ni canduvāha.

<sup>8</sup> Te jeē yúcuán ní cacusī teyí ni ñayuu ñuu ún.

<sup>9</sup> Te ini ñuu un néne ñn tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ñn tēe cújéhu teyí cúu máá de.

<sup>10</sup> Te nde tēe cácujeñu jíin ndivii cuítī ñayuu, cájetáhú ndasí i jñūhun cáhán de, te ni cajeni ni maá i te ni cacahān i:

Tēe yáha ní jēhe Yaā Dios cuehē poder nuū de, áchí i.

<sup>11</sup> Te cájetáhú váha i jñūhun cáhán de, chi cuehē tiempo ni sáha de jniñu stahú ní canaa ni i ni cajito i.

<sup>12</sup> Te nuū ni jinū Felipe, ni nacani de jñūhun váha ndese ndácu Yaā Dios

jniñu, jíin jñūhun Jesucristo, te ni candíje i te ni cajendute i, cúu tēe cúu ñahan.

<sup>13</sup> Te suni máá Simón ni candíje de te ni jendute de, te ni jica cuu de jíin Felipe. Te ni naa ni de jito de tācá jniñu jéhu jeē sáha Felipe jeē steén jeē cujéhu Yaā Dios.

<sup>14</sup> Te cáyūcu tēe apóstol ñuu Jerusalén, te ni canihīn de jñūhun jeē ñayuu Samaria ni cacandíje i jñūhun Yaā Dios. Te ni catají de Pedro jíin Juan cuangoo de yūcuán.

<sup>15</sup> Te ni jinūcoo de, te ni cajicān tahú de jehē ñayuu un návāha na quívi Espíritu Santo ini anuá i jíjnáhan i.

<sup>16</sup> Chi ná tu quívi ya ini anuá ni ñn i, chi máá-ni jeē ní cajendute i jeē ní cacandíje i Jitoho yō Jesús.

<sup>17</sup> Yūcuán na te Pedro jíin Juan ni casoó de ndaha de xinī i jíjnáhan i, te ni quívi Espíritu Santo ini anuá i.

<sup>18</sup> Te ni jito Simón jeē súcuán casoó apóstol ndaha de xinī ñayuu ún te súcuán quívi Espíritu Santo ini anuá i, te cúní de cuāha de xūhun núu tēe apóstol návāha nihīn de poder un núu.

<sup>19</sup> Chi ni cahān de:

Cúní na jēe cuāha ní poder yáha núu na, návāha núu ndé ñayuu soó ná ndaha ná xinī i te quívi Espíritu Santo ini anuá i, áchí de.

<sup>20</sup> Yūcuán na te ni cahān Pedro jíin de:

Na náā xūhun ró je jnahnū ndetū rō siquī jeē jéni ni rō jeē jíin xūhun te cuu cuaan ró táhū jeē véji nuū Yaā Dios.

<sup>21</sup> Ma nihín tahú rō jeē sáha ró jniñu yáha, chi tu íyó ndáā anuá rō nuū Yaā Dios.

<sup>22</sup> Núu súcuán te jíni ñúhún jēe stóo rō jñūhun jeē jéni néé ni rō súcuán te cahān ndahú ró jíin Yáā Dios, te máá yá sanaa te cone cáhnu ni yā siquī jeē jéni néé ni rō súcuán.

<sup>23</sup> Chi jíni rī jeē cucuésún ni rō siquī jeē sáha ri jniñu yáha. Te tāca jēe néé jéni ni rō ni cunuú un jíin ró, achí Pedro jíin de.

<sup>24</sup> Yūcuán na te ni cahān Simón jíin de:

Cacān tahu ni jéhē na jíjnáhan ní nuū maá Jítóho yō návāha tú jnahnū ndetū na nájnūhun ni cahān ní, áchí de.

<sup>25</sup> Te Pedro jíin Juan ni cacahān cají de ndese cáandíje de jnūhun Yaā Dios. Te jeē cuánungoo de ichi ñúū Jerusalén, te tijni ndañúū Samaria ni canacani de jnūhun jeē jnáma ya ñayuu.

### *Felipe jíin tée nación Etiopía*

<sup>26</sup> Yūcuán na te ni cahān ndajéhé maá Jítóho yō jíin Felipe:

Quihin ichi te quihīn rō ichi sur, ichi jeē quenda Jerusalén cuahān nde ñuu Gaza, áchí yá.

Te ichi chūcuan chi máá ñuhun téhé cúu.

<sup>27</sup> Te ni quihin Felipe ichi cuahān de. Te nde nación Etiopía ni quiiji ñn tēe eunuco jeē ndíso jníñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñuhún de Yaā Dios ñuu Jerusalén.

<sup>28</sup> Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jenahán.

<sup>29</sup> Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

<sup>30</sup> Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnūhún de tēe ún:

¿A jécūhun ni ni jnúhun jeē cáhu ní chí tuú? áchí de.

<sup>31</sup> Te ni cahān maá tée un jíin Felipe:

¿Te ndese jecūhun ni ná? Chi tú na tēe castūhun núū ná ndese cúu ún, áchí de.

Te ni cahān de jíin Felipe jeē na cáa de conēne ndúú de jíin de ini carreta.

<sup>32</sup> Te jnūhun cáhu de tutu ñi un cáhán suhva:

Nájñūhun lanchi jeē cuahán tī nuū cúu tī, súcuan ni casáha ñayuu jíin yá.

Te nájnūhun ñn londe quiiti sáte jéē tú ndáhyú tī, súcuan ni sáha ya,

chi tú na vé ni cáhán cuiti yā ná ni cajicān i cuēchi síquī yā.

<sup>33</sup> Te hora jeē ní cajēhe i jnūhun canu yā, tu ní casáha ndaā i síquī yā jíin jnúhun ndaā,

te ni cajehni i ya ini ñayivī yáha.

Te coo cuehē ñayuu candíje nuū yā jeē ma cánda ni ñn ñayuu cahu i ñayuu ún.

Achí.

<sup>34</sup> Yūcuán na te ni cahān tēe Etiopía un:

Cava vāha ni ní cachi ni núū ná, ¿ndé síquī cahán tēe ni nacani jnūhun yáha? ¿A síquī maá de chí síquī inga tēe? áchí de jíin Felipe.

<sup>35</sup> Yūcuán na te ni nacani Felipe jnūhun vāha Jesús nuū tée ún, chi ni quejéé de ni castūhún de jnūhun jeē ní cahu tēe ún, jíin táca gá jnūhun jeē yosó núū tútu yā.

<sup>36</sup> Te níni cuángoo de ichi ún te ni jinūcoo de nuū ñúhun ndute, te ni cahān tēe Etiopía:

Yāha ñúhun ndute ¿te á tú cuu cuandute ná? áchí de.

<sup>37</sup> Te ni cahān Felipe:

Cuu te núu cándíje ñihin ni ndé jíin ini jíin ánuá ni táca jéē ni sáha Jítóho yō Jesús jehē yō, áchí de.

Te ni cahān tēe Etiopía:

Cándíje ná jéē Jesucristo cúu máá Séhe Yaā Dios, áchí de.

<sup>38</sup> Te ni sáha de jeē na jécuiñī carreta de, te ni nuu ndíndúú de cuangoo de ichi véyí núū ñúhun ndute ún, te ni scuándute Felipe tēe Etiopía.

<sup>39</sup> Te nuū ní quendacoo de nuū ndúte, te Espíritu maá Jítóho yō ni sáha ya jeē ní ndoñuhún-ni Felipe. Te tēe Etiopía vésú tuá ni jíto de nuū Felipe, te cúsiñi ni de cuahān de.

<sup>40</sup> Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de táca ñuu nde ni jinū de Cesarea.

*Jeē ní nasāma ini Saulo ni sáha Jesucristo*

(Hch. 22.6-16; 26.12-18)

## 9

<sup>1</sup> Te Saulo chi máni cáhán de jeē cáhni de táca ñayuu cáandíje i máa



Jítóho yō, te jeē yūcuan ní jehēn de nuū sutú cujéhnū ga.

<sup>2</sup> Te ni jicān de carta jeē cahán jeē quihín de tǎcá vehe iī sinagoga ñuu Damasco te cuhni de tēe ñahan jeē cácandíje i Jesús, quiji de jíin i ñuu Jerusalén nuū.

<sup>3</sup> Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēe ñn luz nuū de.

<sup>4</sup> Te ni cotúú-ni de nuū ñúhun, te ni jini sōho de ñn jnūhun cáhán jíin de:

Saulo, Saulo, ¿najehē jító xeēn rō ruhū? achí.

<sup>5</sup> Te ni cahān maá de:

¿Na nihín cúu jeē cahán, Tátā?

Te ni cahān yā jíin de:

Máá rí cúu Jesús, te jeē jító xeēn rō ñayuu cácandíje i ruhū cúu jeē jító xeēn rō ruhū. Te jeē sáha rō súcuan cúu nájnūhun stiquí jeē tu jéndíje ti te jéñú yatá tí xinī pulla, te súcuan stóho ti maá tí, achí yá.

<sup>6</sup> Te máá de chi quísi i de jeē yūhú de, te ni cahān de:

Tátā, ¿na vé cuní ni jéē sáha ná núu súcuan? achí de.

Te ni cahān maá Jítóho yō jíin de:

Ndocuiñī, quiví rō ini ñuu, te yūcuan íyó ñn tēe jeē cachi nuū rō na vé cúu jeē cánuú sáha rō, achí yá.

<sup>7</sup> Te tēe cuango jíin Saulo, ni canaa ndasí ni de cájini sōho de ndusu jeē cahán, te tu ní cájito cuiti de nuū jeē cahán un.

<sup>8</sup> Yūcuán na te ni ndocuiñī Saulo. Te ni nducú de coto de, te tuá cúu coto de, te ni cajni tēe ún ndaha de ni jinūcoo jíin de nde ini ñuu Damasco.

<sup>9</sup> Te yūcuan ní condee de unī quiví. Te tu ní cúu cuiti coto de, ni tú na vé ni yéji de, ni tú na vé ni jíhi de.

<sup>10</sup> Te ñuu Damasco néne ñn tēe cándíje, nání de Ananías. Te máá Jítóho yō ni steén ndijin ya maá yá nuū de te ni cahān yā jíin de:

Ananías, achí yá.

Te máá de ni cahān de jíin yá:

Naun ní sáña, Tátā, achí de.

<sup>11</sup> Te ni cahān maá Jítóho yō jíin de:

Quihin ichi te quihín rō calle jeē naní Calle Derechá, te vehe Judas cajnūhun rō ñn tēe nání Saulo ñuu Tarso, chi jícán tahu de.

<sup>12</sup> Te nájnūhun ni jito ndijin de jeē maá rō, Ananías, ni jinū rō, te ni soó rō ndaha rō xinī de, te ni nanune tinūú de, achí yá.

<sup>13</sup> Yūcuán na te ni cahān Ananías: Tátā, cuehē ñayuu cácahān jeē tēe yūcuan yōhyo jító xeēn de ñayuu cácandíje i nihín ñuu Jerusalén.

<sup>14</sup> Te vijna ni quee de yāhá, chi sutū cácujehnū ni catejniñū de véji de jni de tǎca ñáyuu cácahān ndahú i jíin ní, achí de.

<sup>15</sup> Te ni cahān maá Jítóho yō jíin de:

Cuáhán, chi máá rí ni nacaji tēe un jéē quihín de nacani de jnūhun ri nuū tǎca ñáyuu nación Israel jíin núu ñáyuu tǎca gá nación nde jíin núu tǎca rey.

<sup>16</sup> Chi stéén rí nuū de jeē cánuú ndoho de cuehē jnūndóho jeē siquí rí, achí yá.

<sup>17</sup> Yūcuán na te cuahān Ananías. Te ni quiví de ini vehe nuū néne Saulo, te ni soó de ndaha de xinī Saulo, te ni cahān de:

Hermano Saulo, máá Jítóho yō Jesús, Yaā ní quenda ndijin nuū ní ichi jeē véji ní, ni taji yá sáña véji ná núu ni návāha na nánune tinūu ní, te návāha na cúnuú Espíritu Santo yā jíin ní, achí de.

<sup>18</sup> Te ni nanune-ni tinūu Saulo, chi ni nungoo-ni nájnūhun soó chácá ní condihyū tinūú de ún. Te ni ndocuiñī de ni jendute de.

<sup>19</sup> Yūcuán na te ni nacaji de staā, te ni nanihín ni de. Te ni condee de jecu quiví jíin tēe cácandíje jeē cáyucú ini ñuu Damasco.

*Jeē ní nacani Saulo jnūhun ini ñuu Damasco*

<sup>20</sup> Te ni quejéé-ni de nacani de jnūhun Jesús ini tǎcá vehe iī sinagoga, achí de jeē Jesús cúu Sēhe Yaā Dios.

<sup>21</sup> Te tǎca ñáyuu ni cajini sōho jnūhun cáhán de ni canaa ni i, te ni cacahān i:

¿A násūu tēe yáha cúu jeē yóhyo jító xeēn de tǎca ñáyuu Jerusalén jeē

cájicān tahú nuū Jesús? Te siquī yúcuān ní quee de yāha jēē cúhni de ñayuu cá candíje, te quihīn de jíin i nuū sutú cá cujé hnu núú, á chí i.

22 Te víhyá gā ni nacani Saulo jnūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cá yūcú ñuu Damasco, tu ní cá nihīn de modo cahān de jeē tu íyó ndáā jeē cahān Saulo.

*Jeē ni cá cu Saulo nuū jnáhan de hebreo*

23 Te ni yāha cuehē quivī. Te jnáhan de hebreo ni casquínáhan jnūhun de jeē cá hni de Saulo.

24 Te ni nihīn Saulo jnūhun jeē cá ndito de nduú ñuú táca yéhyi pared jeē ní condúu ndihyú ñuu ún.

25 Yūcuán na te ñin jecuáā te tēe cá candíje ni caquihin de Saulo, te ini ñin jīca cá hnu ní cascúun de Saulo jīca pared ún, te súcuān ni cá cu de.

*Jeē ní najinū Saulo ñuu Jerusalén*

26 Te nuū ní najinū de ñuu Jerusalén, te cúni de najnáhan de jíin tēe cá candíje. Te ni cayūhu tēe un ní cajito de Saulo, chi tu ní cá candíje de jeē ní nduu Saulo tēe cá ndíje nuū Jesús.

27 Te Bernabé cuahān de jíin Saulo nuū cá yūcu tēe apóstol, te ni nacani de jnūhun nuū tēe ún ndese ni jini Saulo nuū maá Jítóho yō ichi nuū cuahān de, jíin jēē ní cá hān yā jíin de, jíin jēē jé hnu-ni ni nacani de jnūhun Jesús ini ñuu Damasco.

28 Te ni condee Saulo ñuu Jerusalén ni jīca de jíin táca tēe apóstol.

29 Te jé hnu-ni ni nacani de jnūhun maá Jítóho yō. Te jnáhan ñuu de hebreo jeē cá cahān yuhu griego, ni castá hān jnáhan jíin de, te maá tēe un cá cuni de cahni de Saulo.

30 Te ni cajini táca hermano cá candíje, te ni cajendēca de Saulo nde ñuu Cesarea. Te yūcuān ní canatají de Saulo cuanuhun de nde ñuu de Tarso.

31 Te ñayuu cá candíje Jesús jeē cá yūcú Judea jíin Galilea jíin Samaria, tuá ni cá jito xeēn ñayuu i. Te ni ije ga i

jíin jnūhun ya, te cá ndiso íyo i nuū maá Jítóho yō. Te Espíritu Santo ni chindéé ñáhān yá i te ni nducuehē gā i.

*Jeē ní nduvāha Eneas*

32 Te táca lado jécondēhe Pedro ñayuu cá candíje, te suni ni jecondēhé de ñayuu cá candíje cá yūcú ñuu Lida.

33 Te yūcuān ní jini de nuū ñin tēe nání Eneas jeē ní cuu unā cuiyā cáa de chi ni íjin de.

34 Te ni cahān Pedro jíin de:

Eneas, Jesucristo cúu Yaā nasávāha ya rohó. Ndocuñī te natuu rō yuu ró, á chí de.

Te ni ndocuñī-ni tēe ún.

35 Te táca ñayuu cá yūcú ñuu Lida jíin ndúhvā Sarón ni cajito i jeē ní nacaca Eneas, te ni casquéndōo i táca jnūhun jeē tu íyó ndáā te ni cacandíje i maá Jítóho yō.

*Jeē ní natecu Dorcas*

36 Te nde ñuu Jope ni íyo ñin ñahan cá ndíje, nání ña Tabita, te nuū yūhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhān ña ñayuu cúmanī nuū.

37 Te tiempo yúcuān ní quejéé cuéhyi jíin ña, te ni jihī ña. Te ni cascúchi i ndíyī ún, te ni cajequin i ndíyī un ndé ini cuarto xinī véhe.

38 Te yajni íne ñuu Lida jíin ñuu Jope, te tēe cá candíje ñuu Jope ni cajini jnūhun de jeē néne Pedro ñuu Lida, te ni catají de uū tēe cuacana de Pedro, te ni cacahān de:

Ma cucuéé ní na quíhīn yachī yō ñuu Jope, á chí de.

39 Yūcuán na te ni quihin Pedro ichi cuahān de jíin tēe ún. Te nuū ni jínū de, te ni cacao tēe un jíin de nde xinī véhe nuū catú ndíyī ún. Te táca ñahan viuda ni candicó ndúū ña de cá ndahyū ña, te cástéén ña táca sahma jíin tícāchi jēē ní sáha Dorcas te ni saja ña nde na técu ña.

40 Yūcuán na te ni ndacu Pedro jniñu jeē na quéndacoo ndíhī ñayuu ún quingoo i nde yatā véhe. Te ni jecuñī yití de ni jicān tahú de, te ni nandió cóto de nuū catú ndíyī ún, te ni cahān de:

Tabita, ndocuiñi ní, áchí de.

Te máá ña ni ndacoto-ni ña te ni jito ña nuū Pedro, te ni nucōo-ni ña.

41 Te ni jñi de ndaha ña, te ni ndonehen de ña. Yūcuán na te ni nacana de xinī ñáyuu cácanđije nde jín ñahan viuda ni ndivicoo i, te ni steén de ña nuū i jeē ní natecu ña.

42 Te ni jitē jñuhun jñiñu yáha nñi ñuu Jope cuahān, te cuehē ñayuu ni cacandije i jñuhun máá Jítóho yō.

43 Te cuehē quivī ni ndōo Pedro ini ñuu Jope, néne de vehe ñn tēe sáha curtir ñi, nání de Simón.

### *Pedro jín Cornelio*

## 10

1 Te ini ñuu Cesarea ni iyo ñn tēe nání Cornelio, ni cuu de capitán grupo soldado jeē naní Italiano.

2 Te cúu de tēe ndiso iyo nuū Yaā Dios nde jín ndihi ñayuu vehe de, te yōhyo caridad ni tēe cúu de, chi jéhe de xūhun núu ñáyuu hebreo cándoho ndáhú, vēsú nasūu tēe hebreo cúu de. Te níní jícán tahu de nuū Yaā Dios.

3 Te ñn quivī ni steén ndijin yā nuū tēe yáha nájnūhun cahunī jehini, te ni jito de jeē ñn ndajéhé maá Yáā Dios ni quivī ya nuū néne de. Te ni cahān yā jín de:

Cornelio, achí yá.

4 Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tātā? achí de.

Te ni cahān yā jín de:

Je chíhi Yaā Dios cuenta jeē jicán tahu rō jín jēe sáha ró caridad.

5 Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de.

6 Chi néne núu de vehe tocayo de Simón, tēe sáha curtir ñi, te ndéé vehe ún yajni yumar. Te máá de castūhun núu rō na vé cúu inga jeē cánuú sáhá ró, achí ndajéhé yā.

7 Te ndajéhé yā jeē ni cahān jín Cornelio, cuahān-ni ya. Te ni cana de uū mozo de jín ñn soldado jeē yñúhún núu Yaā Dios, chi cúcáhu ni de jeē squícu vāha tēe ún.

8 Te ni nacani ndihi de jñuhun nuū tāca tēe ún, te ni tají de cuangoo nde ñuu Jope.

9 Te inga quivī un cájica de ichi cuangoo de, te cuacuyajni de ñuu Jope. Te je yajni cahuxī uū cúu, te suu hora un ní caa Pedro siquī véhe chi cándaā, te yūcuan cácan tahu de.

10 Te ni quee sōco chíji de, te ni cuni de caji de staā. Te sáá cásaña ña ndeyu te ni steén ndijin yā nuū de.

11 Te ni jito de jeē núne andiví. Te ni jito de nájnūhun ñn sahma manta jitē cáhnu te núhni jnáhan ndicúún punta, te ni cuun vēji nuū de.

12 Te chíji un cáñūhun ndinuū quití, táca quití cúún ndaha jín táca cóo jín táca quití cándava.

13 Te ni jini sōho de ñn jñuhun ni cahān:

Pedro, ndocuiñi te cahni rō táca quití jiñā, te caji rō tī, achí.

14 Te ni cahān Pedro:

Ma cáji na, Tātā, chí tu yéji cuiti na táca quití jeē cahān ley ni jēe tú vāha caji na tí, chí nájnūhun jeē tu cáhīyo ndoo tī nuū ní, achí de.

15 Te ni cahān tucu jñuhun un jín de:

Achí rí jeē iyó vāha caji rō táca quití jiñā, chí ni sándoo rí, te ma cahān maá ró jeē tu cáhīyo ndoo tī, achí. Te súcuan ni steén caji yá nuū de jeē cúu quihñ de nuū ñáyuu vēsú násūu jnáhan ñuu de hebreo cúu.

16 Te unī jínu ni cahān súcuan jín de. Te sahma un ní ndaa cuanuhun andiví.

17 Te níní nácani ndasí ni Pedro na vé cuní cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún.

18 Te cácahān jee de cácajnūhún de núu yūcuan ndéé Simón jeē suni nání de Pedro.

19 Te níní nácani ga ni Pedro siquī jeē ní jito ndijin de ún, te Espíritu Santo ni cahān yā jín de:

Ni quecoo unī tēe cánanducú róhó.

20 Ndocuiñi te nanuu ró, te ma cáni ni rō jeē tú vāha quihñ rō jín de, vēsú nasūu jnáhan ñuu rō hebreo cácuu de,

chi máá rí ni tají rí de vējicoo de, áchí yá.

<sup>21</sup> Yūcuán na te ni nanuu Pedro nuū téē ni tají Cornelio, te ni cahān de:

Máá ná cúu tēe cánanducú ní. ¿Te na siquī vējicoo ní nuū na núu súcuan? áchí de.

<sup>22</sup> Te ni cacahān mozo un:

Cornelio, tēe cúu capitán, ni tají de sañá. Te tēe ndaā, tēe ndiso iyo nuū Yaā Dios cúu de, te tāca ñáyuu hebreo suni cácahān i jeē téē vāha cúu de. Te ni cahān ñn ndajéhé yā jiín de jeē na cána de níhín jeē ní vehe de te chusóhó de jnūhun cahān ni jiín de.

<sup>23</sup> Yūcuán na te ni cahān Pedro jiín mozo un jéē na cúcōo de ini vehe ún, te ni candōo de yūcuán. Te nuū ní cundijin, te ni quihin Pedro ichi cuahān de jiín mozo un. Te suni cuango jecu hermano cácañíje ñuu Jope jiín de.

<sup>24</sup> Te nde inga quivī ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de tāca jnáhan de jiín táca amigo de jeē quijnáhan vāha ga de jiín.

<sup>25</sup> Te nuū ni jínū Pedro jijnáhan de, te ni quenda Cornelio ni cahān de jiín Pedro, te ni jecuñī yití de jeē chíñúhún de Pedro nuú.

<sup>26</sup> Te Pedro ni ndonehen de Cornelio, te ni cahān de:

Ndocuñī ní, chí sañá suni ñn tēe-ni cúu ná, áchí de.

<sup>27</sup> Te cándajnūhún de ni quivicoo de ini vehe. Te ni jito Pedro jeē cáyūcu cuéhē ñayuu ini vehe de.

<sup>28</sup> Te ni cahān Pedro jiín ñáyuu ún:

Je cájini vāha ni jijnáhan ní jéē ley jeē cánevāha saña ñáyuu hebreo, cáhán jeē tú vāha jeē quijnáhan ná jiín ní quivicoo ná vehe ní siquī jeē cúu ní ñáyuu sñn nación. Te Yaā Dios chí ni steén yā nuū na jéē ma cujéē ni na núu ní ñn ñayuu.

<sup>29</sup> Jeē yúcuan cúu jeē vēji-ni ná, chí ni cana ní saña, te tu ní sájéē ni ná. Te na cájnūhun ná nihín, ¿na siquī ni cana ní saña? áchí Pedro.

<sup>30</sup> Yūcuán na te ni cahān Cornelio:

Vijna íyó cúun quivī nájnūhun máá hora yáha jéē cúu cahunī jehíni, te

ndite ni ná chí súcuan chíñúhún ná nuū yā, te jicán tahu na ini vehe ná. Te ní quiji ñn ndajéhé yā nuū ná, te ndíndēē sahma ñūhun ya.

<sup>31</sup> Te ni cahān yā jiín ná: Cornelio, je ni jini sōho Yaā Dios jeē jicán tahu rō, te chíhi ya cuenta jeē sáha ró caridad.

<sup>32</sup> Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chí tēe un néne de vehe tocayo de Simón, tēe sáha curtir ñii, te yajni yumar ndeé vehe de. Te quee tēe ún te castūhún de nuū rō jnūhun cánuú, áchí yá jiín ná.

<sup>33</sup> Súcuan ni cuu te ni tají-ni ná mozo na cuajēcoo de cana de níhín, te na cútahū ná, chí vāha ni sáha ní jéē véji ní. Te vijna ni candutútú ná yāha návāha tāca ná cuni sōho ná ndihi jnūhun Jitoho yō Yaā Dios jeē ni jéhe ya cahān ní, áchí de.

### *Jeē ní nacani Pedro jnūhun ya vehe Cornelio*

<sup>34</sup> Yūcuán na te ni cahān Pedro:

Vijna te ni jini vāha ná jéē Yaā Dios inuú-ni sáha ya jiín táca ñáyuu, cúu ñayuu hebreo jiín ñáyuu tāca gá nación.

<sup>35</sup> Chí cúsiñi ní yā jiín ñáyuu táca-ni nación núu cándiso iyo i nuū ya te casáha i jniñu ndaā.

<sup>36</sup> Chí ni cahān yā jiín ñáyuu Israel jeē ndivicoo tāca ñáyuu nuū jnūhun manī yā jiín i sáha Jesucristo. Te máá yá cúu Jitoho tāca yóhó.

<sup>37</sup> Máá ní je cájini ní ndese ni cuu. Chí ná ni jinu ni nacani Juan jnūhun jiín jéē ni scuándute de ñayuu, te ni quejéé Jesús nácani ya jnūhun nde Galilea, te ni jitē jnūhun un ní cáhnu Judea.

<sup>38</sup> Te cájini ní jéē Yaā Dios ni jéhe ya Espiritu Santo jiín poder nuū Jesús, Yaā ní jehnu ñuu Nazaret. Te cájini ní jéē ní jica cuu ya ni sáha ya jniñu vāha, te ni nasávāha ya tāca ñáyuu jeē cándoho i sáha jexeén, chí Yaā Dios ni chindéé ñáhán yá Jesús.

<sup>39</sup> Chí máá ná cácani cájí ná jnūhun táca jniñu ní cajito ná ní sáha ya ní cáhnu Judea jiín ini ñuu

Jerusalén. Yūcuán na te ni cajehni i ya, chi ni cata caa i ya jicā cruz.

<sup>40</sup> Te Yaā Dios ni nastécu yā maá Jesús nuū uní quivī, te ni ndiji ya nuū na ní cajito ná núū yā ni sáha Yaā Dios.

<sup>41</sup> Te tu ní quíji ya nuū tācá inga ñayuu, chi nuū maá-ni tāca ná jeē jé ni nacāji Yaā Dios sãña jéē nácani ná jnúhun tācá jniñu jeē ní cajito ná. Chi ni cayeji na stáa ni cajihí ná ndute jíin yá ná ni nane ya jeē ní natecu yā.

<sup>42</sup> Te ni ndacu ya jniñu nuū na jíinahan ná jéē na nácani ná jnúhun ya nuū tāca ñayuu te cahān cají ná jeē maá Yāā Dios ni jeni ya Jesús jeē sándaa yā jniñu ñayuu cátecu jíin ñayuu ní cajihí.

<sup>43</sup> Chi jnúhun Jesús cúu jeē ní cacahān tāca téē ni canacani jnúhun Yaā Dios nde jenahán. Chi ni cacahān de jeē tāca ñayuu jeē candíje i Jesús, cone cáhnu ni yā nuū cuéchi i, áchí Pedro.

*Jeē ni quivī Espiritu Santo ini anuá ñayuu jeē násūú hebreo cácuu*

<sup>44</sup> Te níni cáhán gā Pedro tāca jnúhun yáha te ni quivī-ni Espiritu Santo ini anuá tāca ñayuu cájini nahín jnúhun ya jeē cahán de.

<sup>45</sup> Te tēe hebreo jeē ni jíinūcoo jíin Pedro jeē suni cácandíje de Jesús, nahán ní canaa ni de ni cajito de jeē suni ni quivī Espiritu Santo ini anuá ñayuu jeē násūú hebreo cácuu.

<sup>46</sup> Chi ni cajini sōho de cácahān ñayuu un sín yuhu, te cácahān i jeē yōhyo cújéhnu Yaā Dios.

<sup>47</sup> Yūcuán na te ni cahān Pedro:

¿Ndé ñin casi jeē ma cuándute ñayuu yáha? Chi ni quivī Espiritu Santo ini anuá maá i, nájnūhun ni quivī ya ini anuá maá yó, áchí de.

<sup>48</sup> Te ni cahān de jíin i jeē na cuándute i siquī jeē ní cacandíje i Jesucristo. Yūcuán na te ni cacahān ndahú i jíin Pedro jeē na quéndōo de jecu quivī jíin i.

*Jeē ní nacuāha Pedro cuenta nuū ñayuu cácandíje ini ñuu Jerusalén*

## 11

<sup>1</sup> Te tēe apóstol jíin táca hermano cáyūcú Judea, ni canihín de jnúhun jeē súni ñayuu sín nación ni cacandíje i jnúhun Yaā Dios.

<sup>2</sup> Te cuanuhun Pedro ñuu Jerusalén. Te sava tēe hebreo jeē cácandíje de ya ni cacahān de nuū Pedro:

<sup>3</sup> ¿Najehē ni condee ní vehe ñayuu jeē násūu ñayuu nación yō cúu? Te ni yeji ni jíin i, áchí.

<sup>4</sup> Yūcuán na te ni nacani cájī Pedro jnúhun nuū téē ún ndihí ndese ni cuu siquī téē sín nación:

<sup>5</sup> Néne ná ñuu Jope. Te níni jícan tahu na, te ni steén ndijin yā nuū ná, te ni jito ná nájnūhun ñin sahma manta jité cáhnu jeē nuhní jnahan ndicúún punta, te nde ichi ándiví ní cuun ni quiji nuū ná.

<sup>6</sup> Te ni jito vāha ná, te ni jini na jéē chíji un cáñūhun quiti cúún ndaha jíin quiti xéén jíin cóo jíin quiti cándava.

<sup>7</sup> Te ni jini sōho ná ñin jnúhun ni cahān jíin ná: Pedro, ndocuñí te cahni rō tācá quiti jiñā, te caji rō tí, áchí jíni ná.

<sup>8</sup> Te ni cahān ná: Ma cáji na, Tátā, chi tu yéji cuiti na táca quiti jeē cahán ley ni jéē tu cáhīyo ndoo tí nuū ní, áchí ná.

<sup>9</sup> Yūcuán na te jnúhun jeē véji nde ándiví ní cahān tucu jíin ná: Ni sándoo máá rí tí, te ma cahán gā rō jeē tu cáhīyo ndoo tí, áchí jíni ná.

<sup>10</sup> Te uní jínu ni cahān súcuan. Yūcuán na te ni ndaa sahma un cuanuhun ándiví.

<sup>11</sup> Te hora un ní jinūcoo uní tēe vehe nuū ni cóndee ná un, cánanducú de sãñá, te ñin jnahan ñuu de Cesarea ni tají de vējicoo de.

<sup>12</sup> Te máá Espiritu ni cahān yā jíin ná jeē ma cáni ni na jéē tú vāha quihín na jíin de. Te suni iñū hermano yáha ní jengoo jíin ná, te ni quivīcoo ná ini vehe tēe nání Cornelio.

<sup>13</sup> Te tēe un ní nacani de jnúhun nuū na jíinahan ná jéē ní jito de ñin ndajéhé Yaā Dios, índichi yā ini vehe de, te ni cahān yā jíin de: Tají ró jecu tēe na quíngoo de ñuu Jope, quicana de

Simón jeē suni nání de Pedro, na quíji de.

<sup>14</sup> Te tēe ún cachi de nuū rō ndese jnama Yaā Dios rohó jíin ndihí ñayuu cáyūcú vehe ró, áchí yá. Achí Cornelio jíin ná.

<sup>15</sup> Te nuū ní quejéé ná cahán na, te ni quívi-ni Espiritu Santo ini anuá i jíinánhan i, nájñūhun ni quívi ya ini anuá maá yó xíhna gā.

<sup>16</sup> Yūcuán na te ni nucūhun ni na jñūhun ni cahán maá Jítóho yō: Jendaá jeē maá ndute-ni ni scuándute Juan ñayuu. Te rōhó jíinánhan ró chi nájñūhun cuandute ró jíin Espiritu Santo, cúu jeē cóndee yā ini anuá rō, achí yá.

<sup>17</sup> Te suni ni jēhe Yaā Dios Espiritu yā nuū maá i nájñūhun ni jēhe ya nuū maá yó jeē cácadíje yó Jítóho yō Jesucristo. Núu súcuan ¿te ndé ñn cúu ná jéé cási ná jniñu jeē sáha Yaā Dios? achí Pedro.

<sup>18</sup> Súcuan ni cajini sōho de jñūhun yáha, te tuá ni cácahán de nuū Pedro, chi sa suhva ni cacahán de jeē yóhyo cújéhnū Yaā Dios. Te ni cacahán de:

Suni ni jēhe Yaā Dios jñūhun jeē na nácani ni ñayuu tāca gá nación jeē stóo i cuēchi i nāvāha cotecu i ní cáni núu súcuan, áchí de.

### *Ñayuu cácadíje ini ñuu Antioquía*

<sup>19</sup> Te quívi ní cajehni de Esteban ni quejéé de cájito xeēn de ñayuu cácadíje, te jeē yúcuan ní cajitē núu ñayuu un táca ñuu cuango i, te ni jinūcoo i Fenicia jíin Chipre jíin ñuu Antioquía. Te ni canacani i jñūhun vāha ya nuū máni jnáhan hebreo i jeē cáyūcu yúcuan, te tu ní cácanani i jñūhun ya nuū ínga ñayuu.

<sup>20</sup> Te jecu tēe cácadíje jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñayuu tāca nación jeē tu cájini i jñūhun ya ni canacani de jñūhun máá Jítóho yō Jesús jeē jnáma ya i.

<sup>21</sup> Te máá Jítóho yō ni chindéé ñáhán yá de, te cuehē ñayuu ni castóo i jniñu jeē tu íyó ndáá te ni cacandíje i máá Jítóho yō.

<sup>22</sup> Te ñayuu cácadíje ini ñuu Jerusalén ni cajini jñūhun i, te ni catajǐ i Bernabé cuahán de nde ñuu Antioquía.

<sup>23</sup> Te nuū ni jíinū Bernabé yūcuán, te ni jini de jeē yóhyo vāha ni sáha Yaā Dios jíin i, te ni cusí ndasí ni de. Te ni stíhvǐ ni de tāca ñayuu un jéé jíin ini jíin ánuá i na cóndíhvǐ ni i squícu vāha i nuū maá Jítóho yō, te ma náyūhú i.

<sup>24</sup> Chi tēe vāha cúu Bernabé, te ni cunuú Espiritu Santo jíin de, te cándíje níhin de. Te ni cacandíje cuehē ñayuu nuū maá Jítóho yō ni sáha de.

<sup>25</sup> Yūcuán na te cuahán de nde ñuu Tarso cuananducú de Saulo. Te ni nanihín jnáhan de jíin Saulo, te ndéca de tēe un ní ndee de ñuu Antioquía.

<sup>26</sup> Te ní ñn cuiyā ni candutútú de jíin ñayuu cácadíje yūcuán, te ni castéén de jñūhun ya nuū cuehē ñayuu. Te ñuu Antioquía cúu nuū xíhna ñúhún gá ni caconaní ñayuu cristiano siquǐ jeē ní cacandíje i Cristo.

<sup>27</sup> Te suni tiempo un ní quenda-coo tēe cácanani jñūhun Yaā Dios ñuu Jerusalén cuango de nde ñuu Antioquía.

<sup>28</sup> Te ñn jnáhan de jeē naní Agabo ni ndocuiñǐ nuū hermano cácadíje. Te ni steén Espiritu Santo nuū de, te ni castúhún de jeē cóo ñn jnamā xeēn ní cáhnu. Te ni cuu jnamā ún ñn parte tiempo jeē ní ndacu Claudio jniñu jeē ní cuu de rey.

<sup>29</sup> Yūcuán na te ni candajñūhun tēe cácadíje ñuu Antioquía jeē cuáha ñn ñn de nasaa canda de cuáha de te tajǐ de quihín cotecu hermano cáyūcú Judea.

<sup>30</sup> Te súcuan ni casáha de. Te ni catajǐ de Bernabé jíin Saulo ni cajendéca de nuū tēe jéhnū cándiso jniñu nuū ñayuu cácadíje cáyūcú Judea.

*Jeē ní jehni Herodes Jacobo, te ni chune de Pedro vecā*

## 12

<sup>1</sup> Te suu tiempo un ní quejéé rey Herodes jító xeēn de sava ñayuu cácadíje.

2 Te ni ndacu de jniñu jeē jiín es-pada na cáhni i Jacobo ñani Juan.

3 Te ni jini de jeē ní cacusñi ni tēe hebreo jeē ni sáha de súcuan, te jeē yúcuán suni ni jñi de Pedro. Te máá quívi un ní cuu vico jeē yéji ñayuu pan jeē tu yíhi levadura.

4 Te nuū ní jñi de Pedro, te ni chune de vecāa, te ni jeni de cuñ grupo soldado jeē cóndito Pedro, cuñ cuñ soldado cúu jeē ñi grupo. Chi cúní Herodes jeē na yáha vico un jéē cúu vico pascua te quenehen de Pedro vecāa un stéén de nuū ñayuu cuehē.

5 Te súcuan íne Pedro vecāa, te cándito soldado un de. Te ñayuu cáncandije chi ñihin ni cajicān tahu i jehē Pedro nuū Yaā Dios jeē na cácu de.

#### *Jeē ní quenehen Yaā Dios Pedro vecāa*

6 Te jeni ni Herodes jeē na cundijin inga quívi te quenehen de Pedro vecāa, te stéén de nuū ñayuu un núu. Te núhni Pedro jiín úu cadena, cátú de quíxi de mēhñu úu soldado jecuāa ún, te suni cáhñi ga soldado cándito yéhyí vecāa ún.

7 Te suu jecuāa ún te sanaa-ni te ni jinū ñi ndajéhé maá Jítoho yō, te ni ndindéé ini vecāa. Te ni squíhi ya Pedro, te ni natahū ni de. Te ni cahān yā:

Yachī ndocuiñi rō, achí yá.

Te cadena nuhni ndaha de un ní canandaji-ni.

8 Te ni cahān ndajéhé yā jiín de:

Nacuhni ñihin chíji ró, te nuquñi ró ndíjēn rō, achí yá.

Te súcuan ni sáha de. Te ni cahān tucu ndajéhé yā jiín de:

Condii ticāchi ró, te condiquñ rō ruhū na quíhñ yō, achí yá.

9 Te ni quenda de ndíquín de ya cuahān de jiín yá, te jeni ni de jeē násūu jéndaá cúu jeē sáha ndajéhé yā jiín de, chi jeni ni de jeē ñi jeē ni stéén yā jito ndijin de cúu.

10 Te ni yáha ya jiín de uū nuū cándito soldado. Te ni jinū yā jiín de yéhyí cáa nuū quenda de caca de calle, te yéhyí un ní nune iñ-ni máá.

Te ni quenda ya jiín de, te ni yáha de ñi calle cuahān de. Yūcuán na te ni cujiyo-ni ndajéhé yā nuū de cuahān yā.

11 Te ni nducájí ni Pedro te ni cahān maá ní cahān ñi de:

Vijna te ni jini ndaā rī jeē ní tají máá Jítoho rī ndajéhé yā ni quiji, te ni jnama ya ruhū nuū Herodes jiín núu tāca ñayuu hebreo jeē cácu ni i sáha xeēn i jiín rí nuú, achí de.

12 Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuán cáhñi tūtú cuehē ñayuu cájicān tahu i jehē Pedro.

13 Te cáhān Pedro ni jinū de yéhyí fuera, te ñi sūchi sñi nání Rode cuahān i jeē cúni i núu ndé ñi cúu jeē cahān.

14 Te ni nacuni i tachí Pedro, te jeē ní cusñi ni i te tu ní núne i yéhyí un, chi ni nandió cóo i te jínu i ni ndívi i ini cuarto. Te ni castühún i jeē ní quee Pedro índichi de yéhyí fuera.

15 Te ni cacahān jiín i:

Jeē cahān neé ró, achí.

Te máá i ñihin cáhān i jeē maá de cúu. Yūcuán na te ni cacahān:

Ndajéhé yā jeē ndíto Pedro cúu núu súcuan, achí.

16 Te víhyá gā cahān Pedro. Yūcuán na te ni canune i yéhyí, te ni canacuni i nuū de, te nahān ní canaa ni i cájito i.

17 Te máá de ni sáha de ndaha de jeē ma cúvaā gā i, te ni castühún de ndese ni quenehen máá Jítoho yō de vecāa. Te ni cahān de:

Castühun núu Jacobo jiín núu tāca gá hermano jeē ní quenehen ya ruhū vecāa, achí de.

Te ni quenda de cuahān de inga lugar.

18 Te nuū ní cundijin, te ni cacuvaā teyí soldado jeē tuá Pedro.

19 Te ni ndacu Herodes jniñu jeē na nánducú váha i Pedro. Te tu ní cánanihñ i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

### *Jeē ni jīhī Herodes*

<sup>20</sup> Te yōhyo ni quiṭī ni rey Herodes nuū ñáyuu ñuu Tiro jíin ñuu Sidón. Te ñayuu un ní candajnūhún i jeē inuú-ni quivicoo ndihī i nuū rey un. Te ni casáha i amigo i jíin Blasto, tēe cújehnu jéjníñu nuū rey un. Te ni cacahān ndahú i jíin de jeē na cáhán ndahú de jíin rey un jéē na ndéē ni de jíin i. Chi nde ñuu maá rey un cájeen i jeē cáyeji i.

<sup>21</sup> Te ni jeni Herodes in quiṭī. Te ni nucūhun de sahma yíñúhún de, te ni cucōo de mesa nuū ndácu de jniñu, te ni cahān de in jnūhun jehū ni cajini sōho i.

<sup>22</sup> Te ñayuu un ní caquejéē i cácahān jee i jnūhun yíñúhún jíin de:

Nasūu tēe-ni cúu ní, chi in yaā cúu ní, áchí i jíjnáhan i.

<sup>23</sup> Te máá hora un ní sáha-ni in ndajéhé maá Jítoho yō jeē ní jñi in cuehyī xeēn rey Herodes, te ni cayeji tindácú de, te ni jihī de, chi ni sandúxí-ni de máá de te tu ní cáhán de jeē Yaā Dios cúu jeē cújehnu.

<sup>24</sup> Te ni jitē gā jnūhun máá Jítoho yō, te cuehē ndasí ñáyuu ni cacandíje i tácá-ni lugar.

<sup>25</sup> Te ni jñu jniñu jeē ní quindecá Bernabé jíin Saulo jeē cótecu ñayuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

### *Jeē ní caquejéē Bernabé jíin Saulo caca cuu de nacani de jnūhun ya*

## 13

<sup>1</sup> Te mēhñu grupo ñayuu cácaandíje ini ñuu Antioquía ni cahīyo tēe cástéēn jíin tēe canacani jnūhun Yaā Dios, te cánaní de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galilea.

<sup>2</sup> Te in quiṭī jeē cáhīyo ndite ni tēe yáha cáchiñúhún de nuū maá Jítoho yō, te ni cahān maá Espiritu Santo jíin de:

Cúni rī jeē sasín ró Bernabé jíin Saulo na quíngoo de jniñu jeē ní jeni ri de, áchí yá.

<sup>3</sup> Yūcuán na te ni cajicān tahú ndite ni de, te ni casoó de ndaha de xinī Bernabé jíin Saulo, te súcuan ni catajī de ndindúú tēe ún cuanacani de jnūhun nuū tāca ñáyuu.

### *Jeē ní canacani Bernabé jíin Saulo jnūhun ya nde Chipre*

<sup>4</sup> Te ni sáha Espiritu Santo jeē íchi ñúu Seleucia cuangoo de. Te yūcuan ní quivicoo de in barco cuangoo de nde Chipre, ñuhun jeē íne sín nuū ndúte.

<sup>5</sup> Te ni jinūcoo de ñuu Salamina nuū cájecuñī barco, te ni canacani de jnūhun Yaā Dios ini tácá vehe i sinagoga jnáhan hebreo de. Te suni cuahān Juan chindéē ñáhán jíin de.

<sup>6</sup> Te ni cajica nuu de nñi-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū in tēe hebreo nání Barjesús. Te tēe tásí cúu de, te cáhán stahú de jeē in tēe nácani jnūhun Yaā Dios cúu de.

<sup>7</sup> Te tēe tásí un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jnūhun Yaā Dios.

<sup>8</sup> Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún.

<sup>9</sup> Te Saulo jeē suni nání de Pablo, ni cunuú Espiritu Santo jíin de, te ni ndacoto vāha de nuū tēe tásí un.

<sup>10</sup> Te ni cahān de:

Tēe sáha jniñu néē stahú ñáhán cúu ró, chi sēhe jexeén cúu ró te jési rō nuū tácá jniñu ndaā. Te tu jécuiñī rō jeē sáca núu ró síquī jnūhun ndaā maá Jítoho yō návāha ma candíje ñayuu nuū yā.

<sup>11</sup> Te máá Jítoho yō stóho ya rohó vijna, te cucuáá ró jeē ma cóto ga rō niāndii jecu quiṭī, achí Pablo.

Te ni cunee-ni nuū tēe tásí un, te quéndāha quéhiyú de cuahān de ndúcú de ndé vé jñi ndaha de stéēn ichi nuū de quinhun de.



<sup>12</sup> Yūcuán na te ni jini gobernador jeē súcuan ni cuu, te ni candíje de jnūhun máá Jítóho yō, te náa ni de jini sōho de jnūhun ya.

*Jeē ní coyūcu Pablo jín Bernabé Antioquía ndañū Pisidia*

<sup>13</sup> Yūcuán na te ni quendacoo Pablo jín Bernabé jín Juan ñuu Pafos, te ni quivícoo de barco te cuango de ñuu Perge ndañū Panfilia. Te yūcuan ní cusín Juan, te cuanuhun de ñuu Jerusalén.

<sup>14</sup> Te ni quendacoo Pablo jín Bernabé ñuu Perge cuango de, te ni jinūcoo de ñuu Antioquía ndañū Pisidia. Te quiví ndétatu ní quivícoo de ini vehe i sinagoga, te ni cacucōo de.

<sup>15</sup> Te ni cahu tutu ley yā jín tutu ní catee tē ni canacani jnūhun ya nde jenahán. Yūcuán na te tē cácujeñu ini vehe i sinagoga, vii-ni ni catajé de tē cahán jín Pablo jín Bernabé:

Amigo, núu íyó jnúhun cahán ni jéé stihví ni ni ñáyuu yáha, te cahán ní na cúni nahín i núu súcuan, áchí de.

<sup>16</sup> Yūcuán na te ni ndocuiñi Pablo te ni sáha de seña jín ndaha de jeé nahín-ni coo ñayuu ún, te ni cahán de:

Nihín jnáhan ñuu yō Israel jín nihín tēe jeé suni cáchiñúhún ní Yaā Dios, cuni nahín ní jijnáhan ní.

<sup>17</sup> Máá Yáa Dios yohó ñáyuu Israel, ni nacáji ya jii yō jijnáhan de. Te ní jéé cáyūcu tátú de ñuu Egipto, te ni sáha ya jeé ní nducuehē de. Yūcuán na te jín poder maá yá ni quenehen ya de nación Egipto.

<sup>18</sup> Te uū xico cuiyā ni cajica de nuū ñúhun téhé, te ni jendeyí ni yā jín de jeé ní castívi de.

<sup>19</sup> Te ni snāa yā uxā nación Canaán, te ni jēhe ya ñuhun un núu tāca jí yō cúu tahū de.

<sup>20</sup> Yūcuán na te ni jeni ya tāca tēe ni candacu jniñu nuū de nájnūhun cuñ ciento uū xico uxí cuiyā, nde quiví ní cotecu Samuel, tēe ni nacani jnūhun ya.

<sup>21</sup> Yūcuán na te máá ñáyuu un ní cajicān i ñn rey, te ni jeni Yaā Dios Saúl ni ndacu de jniñu nuū i uū xico

cuiyā. Te yucūn Benjamín sēhe Cis ni cuu Saúl.

<sup>22</sup> Te ni quenehen ya jniñu Saúl, te ni jeni ya David ni cuu de rey nuū i. Te ni cahán cají yá jnūhun de: Cúsñ ní rī jín David sēhe Isaí, chí sáha de tāca jeé cuni rī, achí yá.

<sup>23</sup> Te cáhán gā Pablo:

Te sēhe yucūn David ni cacu Jesús, Yaā ní jeni Yaā Dios jeé jnáma ya yohó ñáyuu Israel, chí súcuan ni jejnūhun ya.

<sup>24</sup> Te nde ná tu quejéé Jesús nacani ya jnūhun nuū ñáyuu, te ni nacani Juan jnūhun nuū tāca jnáhan ñuu yō Israel jeé na nácani ni i jeé stóo i cuēchi i, te cuandute i.

<sup>25</sup> Te nuū cuácuyajni jeé cúu Juan, te ni cahán de: Cándetu ró jéé quíji Cristo, te jeni ni rō jeé ruhū cúu, te nasūu rí cúu. Chí quíji ya, te cújéñu ndasí yá jeé ni ndijēn yā tu cújéñu rí tava rī, achí de.

<sup>26</sup> 'Amigo jijnáhan ní, tāca nihín jéé cácuu yó séhe yucūn Abraham jín táca nihín jéé suni cándiso íyo ní núu Yaā Dios, chí cúni Yaā Dios jeé na cúni yō jnūhun yáha jeé cáhán ndese jnáma ya yohó.

<sup>27</sup> Chí tāca ñáyuu ñuu Jerusalén jín táca tēe cácujeñu nuū i, tu ní cájecūhun ni i jeé Jesús cúu Cristo, Yaā ní jeni Yaā Dios jeé jnáma ya yohó. Te ndijnahan quiví ndétatu ní cajini sōho i jnūhun ni cacahu jeé ní catee tēe ni canacani jnūhun Yaā Dios nde jenahán. Te vēsú súcuan te tu ní cájecūhun ni i, te ni candonda i ni cacahán i jeé na cúu yā. Te súcuan ni casquícu i síquī tāca jnúhun jeé ní cacahán tēe ni canacani jnūhun ya nde jenahán.

<sup>28</sup> Vēsú tu ní cánihín i ni ñn cuēchi síquī yā jeé cúu yā, te ni cacahán ñhín i jín Pilato jeé na cúu yā.

<sup>29</sup> Te ná ni jīnu ni síquīcu síquī yā tāca jnúhun cáhán nuū tútu i, te ni casnúu de ya jicā cruz, te ni cachindūji de ya ñn yaū ní jete jicā cáva.

<sup>30</sup> Te ni sáha Yaā Dios jeé ní natecu yā.

<sup>31</sup> Te ñayuu Galilea jeē ni jéngoo jíin yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñayuu un cácuu jeē cánacani cájí jnúhun ya nuū táca gá jnáhan yó hebreo vijna.

<sup>32</sup> Te maá ná jijnáhan ná cánacani ná jnúhun vāha yáha núū ni jijnáhan ní jéē súcuan ni jejnūhun ya nuū tāca jíi yō.

<sup>33</sup> Te jnúhun yáha ní squícu Yaā Dios nuū maá yó jeē cácuu yó séhe yucūn de, chi ni nastécu yā Jesús. Chi suhva cáhán salmo uū jeē cahán yā jíin Séhe ya Jesús: Máá ró cúu Séhe ri, te vijna ni sajhenu ri rohó jéē cúu ri Tatá rō, achí yá.

<sup>34</sup> Te ni nastécu yā Séhe ya Jesús návāha ma tehyú cuiti yā, chi suhva cáhán tutu i jeē ni cáhān Yaā Dios nde jenahán: Te nihīn maá ró tāca jéē vāha ni jejnūhun ri nuū David, achí.

<sup>35</sup> Te suni súcuan cáhán inga salmo jeē ní tee David jnúhun jeē cahán Jesús jíin Yāā Dios: Ma cuáha ni jnúhun tehyū ná, chi jéjníñu ná núū ní te maní ni jíin ná, achí.

<sup>36</sup> Te David chi jíin yō jeē ní jejníñu de nuū ñáyuu ní cotecu de jíin, nájnūhun ni cuni Yaā Dios. Te ni jihī de, te ni quindūji de nájnūhun ni quindūji tāca jíi yō, te ni tehyū de.

<sup>37</sup> Te Jesús, Yaā ní nastécu Yaā Dios, chi tu ní téhyú cuiti yā.

<sup>38</sup> Jeē yúcuan jíin ñúhún jecūhun ni ní, amigo, jeē Jesús cúu Yaā cóne cáhnu ni nuū tāca cuéchi yó.

<sup>39</sup> Chi ni canducú ní ndahva ni cuéchi ní jéē squícu ní ley jeē ní jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndáhva ndihī cuéchi ñayuu jeē cácan díje i tāca jéē ni sáha ya jehē i.

<sup>40</sup> Núu súcuan te coto ní jíin náhan ní jéē ma ndóho ní táca castigo jeē ní cacahān tēe ni canacani jnúhun Yaā Dios nde jenahán, chi suhva ni cahān Yaā Dios:

<sup>41</sup> Tāca rōhó ñáyuu jeē casácatā, na cóto ró na castigo xeēn quiiji siquī rō, te naa ni rō coto ró, te cuu rō.

Chi tiempo maá ró te sáha ri jniñu xeēn jeē ma cándíje cuiti rō jeē súcuan sáha ri vēsú nacani ñayuu jnúhun un núū rō, achí yá.

Achí Pablo.

<sup>42</sup> Te ni quendacoo Pablo jíin táca jnáhan de vehe i sinagoga jnáhan hebreo de. Te ñayuu sīn nación ni cacahān ndahú i jíin de jeē inga quivī ndétátú nacani tucu de jnúhun yáha núū i.

<sup>43</sup> Te ni jitē ñayuu un cuángoo i. Te cuehē ñayuu hebreo jíin ñáyuu sīn nación jeē ní cacandíje sahān hebreo te cáchiñúhún i nuū Yaā Dios, cuángoo i jíin Pablo jíin Bernabé. Te ni cacahān nihīn de jíin i jeē na cuíñi nihīn i jíin jnúhun jeē maní Yaā Dios jíin i.

<sup>44</sup> Te quivī ndétátú inga semana te ye yajni ndihī ñayuu ñuu un ní candutútú i jeē cúni nahín i jnúhun Yaā Dios.

<sup>45</sup> Te nuū ní cajini tēe hebreo jeē ní candutútú cuéhe ñayuu, te ni cacucuésún ni de, te ni cacahān de jeē násūu jnúhun vāha cúu jeē steén Pablo, te ni cacahān neé de nuū Pablo.

<sup>46</sup> Yūcuán na te jéhnu-ni ni cacahān Pablo jíin Bernabé, achí de:

Cánuú jéē xihna gā nuū maá ní jeē cácuu ní jnáhan ñuu yō hebreo nacani ná jnúhun Yaā Dios, te tu ní cájetáhú ní. Núu súcuan te cuéchi máá ní cúu jeē ma nihín tahu ni cotecu ni ní cáni. Te vijna te quinacani ná jnúhun ya nuū ñáyuu táca nación jeē tu cájini i jnúhun ya.

<sup>47</sup> Chi suhva ni ndacu máá Jítóho yō jniñu nuū na jíin náhan ná:

Ni jeni ri rohó jéē cúu ró nájnūhun luz jeē steén ini anuá ñayuu táca nación,

chi ní ñayivī stéén rō jnúhun ri nuū ñáyuu jeē jnáma ri i, achí yá.

Achí de.

<sup>48</sup> Te ñayuu sīn nación, nuū ní cajini sōho i jnúhun yáha te ni cacusiñ teyí ni i. Te ni cacahān i jeē yōhyo vāha jnúhun cúu jnúhun máá Jítóho yō, te

tāca ñáyuu jeē ní nacāji Yaā Dios i jeē cótecu i ñí cáni, ni cacandíje i.

<sup>49</sup> Te ni jitē jnūhun máá Jítóho yō cuahān ní región yūcuán.

<sup>50</sup> Te ñuu Antioquía cáyūcú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujuhnu ñuu ún, te ni cajito xeēn i Pablo jíin Bernabé te nde ni cascúnu i de cuango de.

<sup>51</sup> Te ni cascóyo de ticachā jehē de jeē steén de jeē iyó cuéchi i. Te ni jínūcoo de ñuu Iconio.

<sup>52</sup> Te vēsú súcuan te ñayuu cácuandíje un ní cunuú Espiritu Santo jíin i, te cácusī teyí ni i.

*Jeē ní coyūcu Pablo jíin Bernabé ñuu Iconio*

## 14

<sup>1</sup> Te ñuu Iconio ni quivícoo Pablo jíin Bernabé ini vehe i sinagoga jnáhan de hebreo. Te jíin jnúhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sín nación ni cacandíje i.

<sup>2</sup> Te jnáhan de hebreo jeē tu ní cácuandíje, ni cascáhán de ñayuu sín nación, te ni cajeni ni i jeē násū ñáyuu vāha cácuu ñayuu cácuandíje.

<sup>3</sup> Te ni caquendō Pablo jíin Bernabé yūcuan cuéhē gā quiví. Te jéhnuni ni canacani de jnūhun Jítóho yō, chi cácuahnu ni de ya jeē vāha quihīn jniñu un sáha ya. Te máá yá chi ni steén yā jeē iyó ndáā jnūhun jeē yóhō vāha ni yā jíin i jeē cánacani de, chi ni jēhe ya jeē sáha de jniñu jéhnuni jeē steén jeē cujuhnu ya.

<sup>4</sup> Te ñayuu ñuu un ní cacusīn ni i jíinánhan i, sava i jíin tēe hebreo jeē tu cácuandíje de Jesús, te sava ga i jíin tēe apóstol.

<sup>5</sup> Te ñayuu hebreo jíin ñáyuu sín nación jíin tēe cácuu tohō ni casquínánhan jnūhun jeē sáha xeēn jíin Pablo jíin Bernabé, jíin jéē cuáha yuū xinī de núu.

<sup>6</sup> Te ni cajini de jeē súcuan cácuu sáha, te ni cajinu de cuango de nde ñuu Listra jíin ñuu Derbe ndañū Li-caonia jíin táca ñuu yajni yūcuán.

<sup>7</sup> Te yūcuan ní canacani de jnūhun jeē jnáma ya yohó.

*Jeē ní cajēhe i yuū xinī Pablo ini ñuu Listra*

<sup>8</sup> Te ñuu Listra néne iin tēe jeē tu cúu caca, te tu jíca cuiti de chi nde quiví ní cacu de cácuó de.

<sup>9</sup> Tēe un ní jini sōho de jnūhun jeē cahán Pablo, te ni jito vāha Pablo nuū de, te ni jini de jeē candíje vāha tēe un jéē nduvāha de.

<sup>10</sup> Te ni cahán jee Pablo jíin de:

Ndocuñī, condichi rō, achí de.

Te ni scánda tēe un máá de ni nucōndichi-ni de, te ni quejé de caca de.

<sup>11</sup> Te ni cajini ñayuu ún jniñu jéhnuni jeē ni sáha Pablo, te ni cacahán jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájnuhun cájica tēe, achí i.

<sup>12</sup> Te ni cacahán i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jnūhun.

<sup>13</sup> Te yajni yuñū un néne veñūhun yaā Júpiter. Te máá sūtū jejniñu ini veñūhun un ní quihin de stiquí jinnáhan ti te ni scutú de ti ita te vēji de nde nuū quiví i yuñū, te máá de jíin ñáyuu ñuu un cácuu de cahni de stiquí un sócō de nuū Bernabé jíin Pablo nuú.

<sup>14</sup> Te Bernabé jíin Pablo, tēe cácuu apóstol, ni cajito de jeē súcuan cácuu ñayuu un sáha i, te ni candatá de sahna de jeē steén de jeē castíví ndasí i jeē casáha i súcuan. Te ni quenendava de ni quivícoo de mēñu ñáyuu cuehē ún, te ni cacana jee de:

<sup>15</sup> Tātā jinnáhan ní, ma sáha cuiti ni súcuan, chi sáñá suni tēe-ni cácuu ná nájnuhun máá ní jíinánhan ní. Te vējicoo ná nacani ná jnúhun vāha Yaā Dios nuū ní, chi cahán na jíin ní jeē ma sáha ga ni táca jniñu yáha jéē tu nde jéjniñu cuiti, chi sa suhva na chíñúhún ní maá Yáā Dios, Yaā técu, Yaā ni sáha andiví jíin ñáyiví jíin ndute mar jíin táca gá jeē iyó ní cáhnu.

<sup>16</sup> Te nde jenahán ní jēhe ya jnūhun jeē na sáha táca ñáyuu modo cácuu maá i.

17 Te vēsú súcuan te níní stéén yā ndese Yaā cúu ya, chi máni sáha ya jniñu váha jíin yó, chi scúun ya saū, te sáha ya jeē cúu váha itu yō, te jéhe ya jeē jíni ñúhún yó návāha caji yō te coo sī ni yō, achí ndindúú de.

18 Te vēsú súcuan ni cacahān de, te yōhyo uhū ni cajesi de nuū ñáyuu un návāha tú socō i sīquī un núu de jeē chiñúhún i ndindúú de.

19 Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhán de ñayuu cuehē ún, te ni cajēhe i yuū xinī Pablo. Te ni caque-nehen i de yatā ñúu ún, chi ni cajeni ni i jeē jé ni jihī de.

20 Te tēe cá candíje ni cacondúu de Pablo, te ni ndonda Pablo, te ni ndīvi de ini ñuu. Te inga quivī ni quihin de ichi cuahān de jíin Bernabé nde ñuu Derbe.

21 Te ini ñuu un ní canacani de jnūhun jeē jnáma ya ñayuu, te ni candíje cuehē ñayuu ni casáha de. Te ni canandicó de cuanuhun de ñuu Listra jíin ñuu Iconio jíin ñuu Antioquía.

22 Te ni cahije ga ni ñayuu cá candíje yūcuan ní casáha de. Te ni castíhvī ni de i jeē na cuñi ñihin i jíin jnúhun ya, chi ni cacahān de jeē níní quiji cuehē jnūndóho sīquī yō te yūcuán na te jinū yō ñuu nuū ndácu Yaā Dios jniñu.

23 Te tēcá ñuu ni cajeni de tēe jéhnū cándiso jníñu condito de ñayuu cá candíje. Te ni cahīyo ndite ni Pablo jíin Bernabé nuū yā, te ni cajicān tahu de, te ni cacahān de jíin máá Jítóho yō jeē na cóto ya ñayuu ún chi cá candíje i máá yá.

*Jeē cuánuhun tucu Pablo jíin Bernabé ñuu Antioquía ndañúu Siria*

24 Te ni cayāha de cuango de región Pisidia, te ni najinūcoo de región Panfilia.

25 Te ni canacani de jnūhun ya ini ñuu Perge región Panfilia, te sáa te cuango de ñuu Atalia.

26 Te yūcuan ní quivīcoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahu ñayuu nuū Yaā Dios jehē de jeē na

chíndéé ñáhán yá de jeē quíngoo de nacani de jnūhun. Te ni jīnu jniñu, te ni najinūcoo de ñuu ún.

27 Te nuū ní najinūcoo de yūcuán, te ni casáha de junta jíin ñáyuu cá candíje, te ni canacani de jnūhun tēcá ndese cuehē jeē váha ni sáha Yaā Dios jíin de, chi ni jéhe ya jnūhun jeē suni candíje ñayuu tēcá nación jeē tu ní cájini i jnūhun ya.

28 Te ni caquendōo de yūcuan cuehē quivī jíin ñáyuu cá candíje.

*Siquī junta ñuu Jerusalén*

## 15

1 Yūcuán na te jecu tēe Judea ni quijicoo de ñuu Antioquía, te ni castéén de nuū tēcá hermano jeē núu tu sáha i circuncidar, nájnūhun cáhán ley jeē ni jéhe ya nuū Moisés, te tú na modo cácu i.

2 Te Pablo jíin Bernabé ni cate-jnáhan de jíin tēe ún, te tu ní cūndaā. Te jeē yūcuan ní candajnūhún de jeē quíngoo Pablo jíin Bernabé jíin jecu gā tēe cá candíje un ndé ñuu Jerusalén, te yūcuán ndajnūhún de sīquī jnúhun yáha jíin tēe cácuu apóstol jíin tēe jéhnū cándiso jníñu nuū ñáyuu cá candíje yūcuán.

3 Te ñayuu cá candíje un ní canachuhun íchí i de. Te ni cayāha de ichi Fenicia jíin Samaria, te canacani de jnūhun jeē suni ñayuu tēcá gá nación jeē tu ní cájini i jnūhun ya, ni castóo i jniñu jeē tu iyó ndáa te ni cacandíje i Yaā Dios. Te yōhyo ni cacusī ni tēcá hermano jeē ní canihīn de jnūhun jeē súcuan ni cacandíje ñayuu ún.

4 Te ni najinūcoo de ñuu Jerusalén, te ñayuu cá candíje yūcuan jíin tēe apóstol jíin tēe jéhnū cándiso jníñu nuū ñáyuu un, ní cacusī ni de jeē ní najinūcoo jnáhan de ún. Te Pablo jíin Bernabé ni canacani de tēcá jnúhun ndese cuehē jeē váha ni sáha ya sīquī jníñu jeē ní canacani de jnūhun ya.

5 Te sava tēe grupo fariseo jeē cá candíje ni candocuíñi te ni cacahān:

Ñayuu s̄in naci3n jeē c3candije i Jes3s, jini ñuh3n jeē s3ha i circuncidar n3jn3hun c3s3ha m3a y3, te c3nu3 ndacu y3 jniñu nu3 i jeē na squicu i ley jeē ni j3he ya nu3 Mois3s, 3ch3.

<sup>6</sup> Te t3ca t3e ap3stol j3in t3ca t3e j3hnu c3ndiso jniñu nu3 ñayuu c3candije, ni candut3t3 de junta n3v3ha ndajnuh3n de te s3nda3 de siqu3 jnuhun y3ha.

<sup>7</sup> Te t3c3 de ni cacah3n de ndese c3j3ni ni de. Y3cu3n na te ni ndocu3ñ3 Pedro, te ni cah3n de:

Hermano jijn3han n3, je c3j3ni v3ha ni j3e je iy3 tiempo jeē n3 nac3ji Ya3 Dios s3ña j3e quih3n na nu3 ñayuu s̄in naci3n te nacani n3 jnuhun nu3 i jeē jn3ma ya i, n3v3ha candije i Jesucristo.

<sup>8</sup> Te Ya3 Dios chi jini y3 ndese c3a 3nu3 ndih3 ñayuu, te ni ste3n y3 jeē jet3h3 y3 i, chi suni ni j3he ya Esp3ritu Santo nu3 i jijn3han i, n3jn3hun ni j3he ya nu3 m3a y3.

<sup>9</sup> Te inu3-ni s3ha ya j3in y3 j3in m3a i, chi siqu3 jeē suni ni cacandije i jnuhun jeē jn3ma ya i, te jeē y3cuan ni s3ndoo ya anu3 i nu3 t3ca cu3chi i.

<sup>10</sup> Te vijna 3naun c3cuni ni ndacu ni jniñu jeē na squicu i ley un? Chi tu n3jnahan ni Ya3 Dios jeē s3cuan. Chi c3cuni ni tee ni jniñu y3 y3ha siqu3 ñayuu c3candije un, te ni t3ca j3i y3 tu ni c3cundey3 de squicu de, te ni m3a y3.

<sup>11</sup> Chi sa suhva c3candije y3 j3e jn3ma ya yoh3 s3cuan-ni siqu3 jeē y3hyo v3ha ni m3a J3toho y3 Jes3s j3in y3, te suni s3cuan-ni jn3ma ya m3a i, nas3u siqu3 jeē squicu i ley un, 3ch3 de.

<sup>12</sup> Y3cu3n na te t3e cueh3 un ni cacuu nay3u de, te ni cajini nah3n de jnuhun c3cah3n Bernab3 j3in Pablo. Chi ni cacast3h3n de jeē ni j3he ya poder jeē ni cas3ha de t3c3 jniñu j3hnu jeē ste3n jeē cuj3hnu ya, ni cajito ñayuu t3c3 naci3n jeē tu c3j3ni i jnuhun ya.

<sup>13</sup> Te nu3 ni j3nu ni cacah3n Pablo j3in Bernab3, te ni cah3n Jacobo:

Hermano jijn3han n3, cuni s3ho ni na c3h3n na.

<sup>14</sup> Ni nacani Sim3n Pedro jnuhun ndese ni quej3e nu3 jniñu jeē jn3ma

Ya3 Dios ñayuu t3c3 naci3n jeē tu c3j3ni i jnuhun ya, chi suni m3hñu m3a i nac3ji ya ñayuu jeē nd3u i ñayuu m3a y3.

<sup>15</sup> Te quijn3han jnuhun ni cah3n de y3ha j3in jnuhun ni cate3 t3e ni canacani jnuhun Ya3 Dios nde jenah3n jeē yos3 nu3 t3tu i:

<sup>16</sup> Ach3 Y33 Dios:

N3jn3hun ni cot3u3 vehe David c3u jeē tu3 ndacu s3he yuc3n de jniñu, n3jn3hun ni ndacu m3a de jniñu nde jenah3n.

Te in qui3v3 te ndee r3

te jeē nas3ha ri vehe de c3u jeē s3ha ri jeē nandacu S3he yuc3n de jniñu.

<sup>17</sup> S3cuan s3ha ri n3v3ha t3ca g3 ñayuu na n3nduc3 i ruh3 nde j3in ñayuu t3c3 naci3n jeē tu c3j3ni jnuhun ri, t3c3 i jeē c3na ri i candije i ruh3.

<sup>18</sup> S3cuan c3h3n m3a J3toho y3, te nde jenah3n ni ste3n y3 jnuhun y3ha nu3 ñayuu.

Ach3 t3tu i.

<sup>19</sup> Jeē y3cuan j3ni na j3e ñayuu t3ca g3 naci3n jeē ni cast3o i jniñu jeē tu iy3 nd33 te ni cacandije i m3a Y33 Dios, ma st3h3n y3 i jeē ndacu y3 jniñu jeē squicu i ley Mois3s.

<sup>20</sup> Chi sa suhva na t3e y3 carta quih3n nu3 i jeē ma c3ji i ndeyu jeē ni s3c3 nu3 idolo, te ma c3ca jn3ni, te ma c3ji i c3ñu qui3 jeē jih3 jeē tu j3ti niñ3 t3, te ni ma c3ji i niñ3.

<sup>21</sup> Jnuhun y3ha-ni tee y3 quih3n nu3 i n3jn3hun je c3st33n nde jenah3n. Chi nde jenah3n je iy3 t3e c3st33n jnuhun ley jeē ni j3he ya nu3 Mois3s, te ndijnahan qui3v3 nd3t3tu c3cahu de ley un ini vehe i3 sinagoga t3c3 ñuu, 3ch3 Jacobo.

<sup>22</sup> Y3cu3n na te t3e ap3stol, j3in t3e j3hnu c3ndiso jniñu, j3in ndiv3i ñayuu c3candije, ni cacunda3 ni de jeē nac3ji de t3e quingoo j3in Pablo j3in Bernab3 nde ñuu Antioqu3a. Te t3e ni canac3ji de un c3cuu Silas j3in Judas, te inga sihv3 de c3u Barsab3s. Te c3ndiso jniñu de nu3 t3c3 hermano c3candije.

<sup>23</sup> Te ni cajendēca de carta jeē cahán suhva:

Máá ná cácuu tēe apóstol, jíin táca tēe jéhnú cándiso jniñu nuū ñáyuu cácandíje, jíin táca gá hermano yō. Te cátee ná carta yáha cuájeē nuū ni jíjnáhan ní, hermano, jeē cácuu ní ñáyuu sún nación jeē cáyūcu ní ñuu Antioquía jíin Siria jíin Cilicia. Cuandeyí ni ni jíjnáhan ní.

<sup>24</sup> Ni cajini jnūhun ná jéē ní quenda-coo sava jnáhan ná yáha ní jengoo nuū ní, te jíin jnūhun jeē ní cacahān de te ni casáha jeē ní canacani ndasí ni ní, te ni cacuxí ni ní, chi cándacu de jniñu jeē sáha ní circuncidar jíin jéē squícu ní jniñu cáhán ley jenahán jéē ní jéhe ya nuū Moisés. Te nasūu sáña ní cátají tēe un jéē jeé de nuū ní.

<sup>25</sup> Jeē yúcuu ní cajeni ni ná, te inuú-ni ni cacundaā ni ná, te ni nacāji ná tēe cuajēcoo nuū ni jíin úu hermano yō jeē maní yō jíin, cúu Bernabé jíin Pablo.

<sup>26</sup> Te ndíndúú de je ni catana de máá de nuū jnúndóho vésú na cúu de jeē síquí jnūhun Jítoho yō Jesucristo.

<sup>27</sup> Núu súcuu te cátají ná Judas jíin Silas jeē nuū ní, te suni nájnūhun cáhán carta yáha suni súcuu castūhún de nuū ni jíjnáhan ní.

<sup>28</sup> Chi máá Espíritu Santo ni steén yā ñn modo jeē ní cacundaā ni na jéē ma tēe ná táca jniñu yí ley Moisés síquí ní, chi máá-ni jniñu yáha jéē cánuú gá:

<sup>29</sup> Ma cáji ni táca jéē ní casocō nuū ídolo, ni ma cáji ni níñí ni quiti jeē jihí jeē tu jéti níñí tī, te ma cáca jnéni ní. Te vāha squícu ní núu tuá sáha ní táca jéē yáha. Súcuu na cóo te sándeýí ni ní, áchí carta.

<sup>30</sup> Yūcuán na te tēe quingoo un cuángoo de nde ñuu Antioquía. Te ni cacana de xiní ñáyuu cácandíje ni candutútú de junta, te ni cajēhe de carta un núu í.

<sup>31</sup> Te ni cacahu í, te ni candusií ni í jeē ni níhín í jnūhun ndeyí ni nuū carta ún.

<sup>32</sup> Te suni tēe cánacani jnūhun Yaā Dios cácuu Judas jíin Silas, te jíin

cuéhē jnūhun ni cacahān de te ni candundeyí ni tēcá hermano un, te ni cahije ga ni í jíin jnūhun ya.

<sup>33</sup> Te ni coyúcú de yūcuán jecu quiví. Yūcuán na te hermano yúcuu ní canacuatáhú í nuū de jeē quinuuhun de nuū tēe jeē ní catají de.

<sup>34</sup> Te Silas ni nujnahan ni de ni quendōo de yūcuán.

<sup>35</sup> Te suni ni caquendōo Pablo jíin Bernabé ñuu Antioquía, te máá de jíin sava ga tēe ni castéén de te ni canacani de jnūhun vāha máá Jítoho yō.

*Jeē quihín Pablo ñga jínu nacani de jnūhun ya*

<sup>36</sup> Te ni cuu ga quiví, te ni cahān Pablo jíin Bernabé:

Vijna te na quícondēhe yó tēcá hermano yō ndíjnahan ñuu nuū ní nacani yó jnūhun máá Jítoho yō, na cóndēhe yó ndese cáhíyo í, áchí de.

<sup>37</sup> Te Juan jeē suni nání de Marcos, cúni Bernabé jeē quihín tēe un jíin de.

<sup>38</sup> Te tu ní cúni Pablo jeē quihín tēe un jíin de, chi nde Panfilia ni cusín Marcos nuū Pablo jíin Bernabé, chi tuá ni chindéé ñáhán de ndíndúú tēe un síquí jniñu ya nde saá.

<sup>39</sup> Te nahán ní candajnūhun Pablo jíin Bernabé, te tu ní cácuandaā ni de síquí Marcos, te ni cacusín de. Te Bernabé ni jeca de Marcos, te ni quivícoo de barco cuango de nde Chipre, ñuhun jeē íne sún nuū ndúte.

<sup>40</sup> Te Pablo ni nacāji de Silas quihín jíin de. Te tēcá hermano cácandíje ni cajicān tahú de nuū maá Jítoho yō jeē síquí jeē vāha ni yā te na chindéé ñáhán yá Pablo. Te cuahān Silas jíin Pablo.

<sup>41</sup> Te ni cajica cuu de ní Siria jíin Cilicia. Te táca grupo ñayuu cácandíje ni cahije ga ni í jíin jnūhun ya ni casáha de.

*Jeē cuahán Timoteo jíin Pablo jíin Silas*

## 16

<sup>1</sup> Yūcuán na te sáa te ni jinū Pablo jíin Silas ñuu Derbe jíin ñuu Listra. Te yūcuu néne ñn tēe suchí cándíje, nání í

Timoteo. Sēhe yí ñin ñahan hebrea cúu i, te ñahan cándíje cúu ña. Te tátá i chi tēe griego cúu de.

<sup>2</sup> Te tǎcǎ hermano ñuu Lистра jíin ñuu Iconio cájejníñu de Timoteo.

<sup>3</sup> Te cúni Pablo condeca de Timoteo quihín de jíin i. Te ni cahán Pablo jeē quihín i cuu i circuncidar, chi tu cúni Pablo jeē cahán ñayuu hebreo jeē tu ní squícu Timoteo costumbre un, chi ndihí ñayuu cájini i jeē tēe griego cúu tátá i.

<sup>4</sup> Te tǎcǎ ñuu nuū cuángoo de te ni cacastúhún de nuū ñáyuu cáccandíje jeē na squícu i máá jniñu jeē ní casándaā tēe apóstol jíin táca tēe jéhnú cáyúcú ñuu Jerusalén jeē cándíso jniñu nuū ñáyuu cáccandíje.

<sup>5</sup> Te ñayuu cáccandíje ni cahije ga ni i. Te ndijnahan quiví ni cacandíje cuehē gǎ ñayuu.

*Jeē ní jito ndijin Pablo ñin tēe ñuu Macedonia*

<sup>6</sup> Te tu ní jéhe Espíritu Santo yǎ jnūhun jeē nǎcǎni de jnūhun ya nǎ Asia. Jeē yúcuan ní cayāha de ichi Frigia jíin Galacia cuangoo de.

<sup>7</sup> Te ni jinūcoo de nuū quijnáhan Misia jíin Bitinia. Te cáccuni de quingoo de Bitinia, te máá Espíritu Jesús tu ní jéhe ya jnūhun quingoo de.

<sup>8</sup> Te ni cayāha de ñin lado Misia cuangoo de ñuu Troas jeē íne yajni yumar.

<sup>9</sup> Te ñin jecuáā te nǎjnūhun ñin jēni ni jito ndijin Pablo, te ni jito de jeē índichi ñin tēe ñuu Macedonia nuū de cáhán ndahú jíin de: Nehen ní ñuu ná Macedonia te chindéé ñáhán ní sǎña jíjnáhan ná, áchí.

<sup>10</sup> Te súcuan ni jito ndijin de. Yūcuán na te sǎña, Lucas, ni quijnáhan ná jíin de. Te ni casátúhva ná jíin de jíjnáhan de jeē quíngoo ná Macedonia, chi ni cajini cají ná jeē maá Yáa Dios tájí yǎ sǎña jíjnáhan ná jéē castúhun ná nuū ñáyuu yúcuan jnūhun jnama ya i.

*Jeē ní coyūcu Pablo jíin Silas ñuu Filipos*

<sup>11</sup> Te jíin barco ni quendacoo ná ñuu Troas, te cuangoo ndaā-ni ná ndé

Samotracia, ñuhun jeē íne sǎn nuū ndúte. Te ñnga quiví ni jinūcoo ná ñuu Neápolis.

<sup>12</sup> Te yūcuan ní quendacoo ná, te ni jinūcoo ná ñuu Filipos jeē cúu ñuu cujéhnú ga íne Macedonia, chi máá ñáyuu ñuu Roma ni casáha i ñuu i ún. Te ni coyūcu ná ñuu Filipos jecu quiví.

<sup>13</sup> Te ñin quiví ndétātu ní quendacoo ná ñuu ún, te ni jengoo ná ñin yuyúte, chi yūcuan cúu ñin lugar nuū cájicǎn tahu ñayuu. Te ni cacucōo ná, te ni canacani ná jnūhun ya nuū tǎcǎ ñahan ní canataca yūcuán.

<sup>14</sup> Te ñin ña nǎní Lidia jeē véji ña ñuu Tiatira, xíco ña sahma ndihí jéē yáhu ga ndeé. Te máá ña níni chíñúhún ña Yáa Dios. Te ni jini sōho ña jnūhun cánacani ná, te máá Jítóho yō Jesús ni sáha ya jeē ní candíje ña jnūhun jnáma ya ña jeē ni cahán Pablo.

<sup>15</sup> Te ni jendute ña nde jíin ñáyuu cáyúcú vehe ña, te ni cahán ndahú ña jíin ná:

Núu cáccúhnu ni ni jéē candíje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sǎña jíjnáhan ná.

<sup>16</sup> Te ñin quiví te cuangoo tucu ná suu lugar nuū jéngoo ñayuu cájicǎn tahu. Te ni canajnáhan ná jíin ñin sūchi sǎhí jéē ñúhun tachí ini i, te máá un sáha jeē cahán i tǎcǎ ndese coo te cúndaā jeē cahán i. Te sūchí un ní cajeen patrón i, nǎvǎha nihín de cuehē xūhun síquí jeē cástúhún i nuū ñin ñayuu ndese coo ichi núu.

<sup>17</sup> Te sūchí un ndíquín i sǎña jíjnáhan ná cána jee i:

Tēe yáha cájejníñu de nuū Yáa Dios, Yáa cujéhnú téyí, te cáccastúhún de ndese cácu ní núu cuéchi ní jíjnáhan ní, áchí i.

<sup>18</sup> Te cuehē quiví ni cuu súcuan te nde ni jnaniní ni Pablo. Te ni ndió cóto de nuū i, te ni cahán de jíin táchí ún:

Jíin poder maá Jesucristo ndácu ri jniñu nuū rō jeē na quénda ró ini i quihín rō, achí de.

Te hora un ní quenda-ni cuahán.

19 Yūcuán na te ni cajini patrón i jeē ma níhín gā i xūhún cuu de, te jeē yúcuan ní cajni de Pablo jíin Silas cuango jíin de nde vehe juzgado nuū cáyūcu tóhō.

20 Te ni cajeni ún de nuū juez, tēe cásandaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i.

21 Te cájequin de inga costumbre jeē ma cúu cuatáhú cuiti yō, ni ma cúu sáha yó, chi tu jéhe ley nación yō jnūhun, chi ñayuu nación Roma cácuu yó, áchí.

22 Te suni ni candonda ñayuu siquī Pablo jíin Silas. Te tēe cácuu juez ni candacu de jniñu jeē na quénda sahna ndindúú de te cani yujnu siquī de.

23 Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndindúú tēe ún.

24 Te jeē súcuan ni tahū jniñu nuū tēe ndíto vecāa te ni squíví de Pablo jíin Silas nde ichi íni gā, te ni squíví jehē de t̄sin yujnu ndéé yaū te ni cajihni de.

25 Te nuū ní cuu sava ñuú, te cájicān tahú Pablo jíin Silas, te cájita de yaa íi nuū maá Yáa Dios. Te ñayuu cáhīn jíin de vecāa un ní cajini nahín i.

26 Te sanaa-ni te ni jnāa nīhin téyí, te nde nuū cimientō vecāa un ní canda. Te ni canune-ni yéhyí vecāa ún, te ni canandajī-ni cadena jeē cánuhnī táca ñayuu ún.

27 Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni de máa de núú, chi ni jeni ni de jeē ndivii cuiti ñayuu cáhīn vecāa un cuango i.

28 Te ni cana jee Pablo:

Ma cáhni ni máa ní, chi cáhīn ndihí ná, áchí de.

29 Yūcuán na te máa tēe ndíto vecāa ni cana de jeē na quíndeca i ñuhūn, te yachī ni quíví de ini vecāa. Te ni jecuiñī yití de nuū Pablo jíin Silas, te quísí i de jeē yūhú de.

30 Te ni quenehen de Pablo jíin Silas, te ni cajnūhún de:

Tátā, ¿na vé cánuú sáha ná te jnama ya sãñá? áchí de.

31 Te ni cacahān de jíin tēe ún:

Candíje ní táca jēe ni sáha Jitoho yō Jesucristo jehē ní te cácu ní, te suni súcuan cácu ndihí ñayuu cáyūcú vehe ní, áchí de.

32 Te ni canacani de jnūhun máa Jitoho yō nuū tēe un jíin núú táca ñayuu cáyūcú vehe de.

33 Te suu máa jecuáa yúcuan ní nacate tēe ndíto vecāa un núú ní catují Pablo jíin Silas jeē ní cacani yujnu siquī de. Yūcuán na te ni jendute de jíin ndihí ñayuu cáyūcú vehe de.

34 Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusī ni ndihí de vehe de jeē ní cacandíje de Yáa Dios.

35 Te nuū ní cundijin, te tēe cácuu juez ni catají de policía cuango jíin jnūhun jeē na siáá tēe ndíto vecāa un Pablo jíin Silas quingoo de.

36 Te tēe ndíto vecāa un ní castūhún de jnūhun yáha núú Pablo:

Tēe cácuu juez ni catají de jnūhun vējé jeē na siáá na níhín quíngoo ní. Núú súcuan te quendacoo ní quíhīn ní, te cuandeyí ni ní, áchí de.

37 Te ni cahān Pablo jíin policía:

Cuehē ñayuu ni cajito i jeē ní cacani de sãñá, te ni tu ní cásandaā de xīhna gā núú ndaā jeē iyó cuéchi ná. Te ni cachuhun de sãñá vecāa, vēsú cácuu ná séhe nación Roma, te iyó ley jeē ma cúu sáha súcuan jíin ñayuu cácuu sēhe nación Roma. Te vijna ¿á quenehen sãhí de sãña cácuu de naún? Ma cúu cuiti. Na quícoo máa de quenehen de sãña jíjnáhan ná, áchí Pablo.

38 Te ni canandió cóo policía ni castūhún de jnūhun yáha núú tēe cácuu juez, te ni cayūhú de jeē ní cajini sōho de jnūhun jeē séhe nación Roma cácuu Pablo jíin Silas.

39 Te ni quecoo tēe cácuu juez ún, te yōhyo ni cacahān ndahú jíin Pablo jíin Silas jeē na cóne cáhnu ni de. Te



ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de.

<sup>40</sup> Yūcuán na te ni quendacoo de vecāa, te ni jengoo tucu de vehe Lidia, te ni cacahān de jnūhun ndeyí ni jíin táca hermano. Te ni caquihin de ichi cuango de.

*Jeē ní cacuvaā ñayuu Tesalónica*

## 17

<sup>1</sup> Te Pablo jíin Silas ni cayāha de ñuu Anfípolis jíin ñuu Apolonia cuango de, te ni jinūcoo de ñuu Tesalónica nuū iyó in vehe iī sinagoga jnāhan de hebreo.

<sup>2</sup> Te ni coyūcú de yūcuan únī semana, te tāca quívī ndétātu jéhén Pablo vehe iī sinagoga, nájñūhun sāha sāha de, te ni nacani de jnūhun ya nuū té un.

<sup>3</sup> Te jíin jnūhun cáhán tutu iī ni steén de jeē súcuan ni jini ñūhún ndoho Cristo jeē cúu yā te natecu yā. Te ni cahān de:

Jnūhun nácani ná núu ni cúu jnūhun Jesús, te máá yá cúu Cristo, Yaā ní jeni Yaā Dios jeē jnáma ya yohó, áchí de.

<sup>4</sup> Te ni cacandíje sava jnāhan de hebreo jíin cuéhē ñayuu griego jeē cáchiñúhún i Yaā Dios, jíin cuéhē ñahan cácuu nuū, te ni nduu inuú ni i jíin Pablo jíin Silas.

<sup>5</sup> Yūcuán na te yōhyo ni cacucuésun ni jnāhan de hebreo jeē tu cacandíje, te ni castútú té cunée jée cájica cúxí-ni, te ni quejée cácana ndee cuango. Te súcuan ni casaca núu de xinī ñáyuu ñuu ún. Te ni jengoo de vehe Jasón cánanducú de Pablo jíin Silas jeē jnái de té un quíndēca de nuū ñáyuu cuehē.

<sup>6</sup> Te tu ní cánanihín de, te ni cañuhun de Jasón jíin sava ga hermano cuango de jíin núu tohó ñuu ún. Te jeē siquí Pablo jíin Silas ni cacana jee de:

Tē jeē castívī xínī ñáyuu ní ñáyīví, je ni quecoo de nde yāhá.

<sup>7</sup> Te máá Jasón ni jēhe núu vehe cáyūcu té un. Te té un tu cájetáhú de ley maá rey yohó ñáyuu Roma, chi sa suhva cácahān de jeē cájetáhú de

nuū inga rey jeē naní Jesús, achí de jíjnāhan de.

<sup>8</sup> Te ñayuu jíin tée cácuu tohó ni cajini sōho i jnūhun yáha, te ni cacuvaā i siquí.

<sup>9</sup> Te Jasón jíin táca gá hermano ni castóo de xūhún de, chi ni cacahān tohó un jíin de jeē nde núu tají de Pablo jíin Silas quíngoo de inga ñuu, yūcuán na te nacuāha tohó un xūhún de. Te súcuan te ni casiáá de Jasón jíin táca gá hermano cuango de.

*Jeē ní coyūcu Pablo jíin Silas ñuu Berea*

<sup>10</sup> Yūcuán na te tācá hermano un, yachī-ni ni cascáca de Pablo jíin Silas jecuáa un, cuángoo de nde ñuu Berea. Te nuū ni jinūcoo de yūcuán, te ni quívīcoo de vehe iī sinagoga jnāhan ñuu de hebreo.

<sup>11</sup> Te jnāhan ñuu de hebreo cáyūcu yūcuan, vāha ga ni maá de vēsú jnāhan ñuu de hebreo cáyūcú ñuu Tesalónica, chi vāha ni cacusī ni de jíin jnūhun ni cacahān Pablo jíin Silas. Te ndíjnahan quívī cánanducú yúcún de nuū tutu iī núu súcuan cáhán chí tuú.

<sup>12</sup> Jeē yūcuan ní cacandíje cuehē jnāhan ñuu de hebreo te suni nde jíin cuéhē ñayuu griego, cúu tée cúu ñahan cácuu nuū.

<sup>13</sup> Te jnāhan ñuu de hebreo cáyūcú ñuu Tesalónica ni cajini jnūhun de jeē suni nde ñuu Berea nácani Pablo jnūhun Yaā Dios, te ni caquihin de ichi cuango de Berea, te suni yūcuan ní castónnda de ñayuu siquí Pablo.

<sup>14</sup> Yūcuán na te tācá hermano ni catají-ni de Pablo cuahān de nde yumar. Te ni ndōo Silas jíin Timoteo ñuu Berea.

<sup>15</sup> Te jecu hermano ni cajendēca de Pablo nde ñuu Atenas. Te ni cahān Pablo jíin de jeē cahān de jíin Silas jíin Timoteo jeē na quíngoo yachī de nuū Pablo. Te vendicoo de ñuu Berea.

*Jeē ní ine Pablo ñuu Atenas*

<sup>16</sup> Te níni ndétu Pablo jeē jinúcoo Silas jíin Timoteo nuū de ñuu Atenas, te ni jini de jeē ñáyuu ñuu ún yōhyo cáchiñúhún i ídolo, te ni nacani cuíhyá ni de.

17 Te ini vehe iī sinagoga ni cahān de jnūhun ya jīn jnāhan ñuu de hebreo jīn táca gá tēe cáchiñúhún Yáa Dios. Te suni táca quíivī ni nacani de jnūhun ya nuū táca ñáyuu cáhīn nuū yáhu.

18 Te sava tēe cáscuáha jnūhun jeē castéén grupo epicúreo, jīn inga sava tēe cáscuáha jnūhun jeē castéén grupo estoico, ni caquejéé cácahān jīn Pablo. Te sava ni cacahān:

¿Na jnūhun cáhān tēe tlóhlé yāha? áchí.

Te sava ga de ni cacahān:

Tēe nácani jnūhun táca yáa jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndíyī.

19 Te ni cajeca de Pablo cuango de, te ni jinūcoo de nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnúhun jeé jēe steén ni.

20 Chi cáhān ni jnúhun jeē ná tu cuni cuiti na jínáhan ná, te jeē yúcuan cácuni ná jecūhun ni na síquī táca jnúhun yáha, áchí jīn de.

21 Chi táca ñáyuu ñuu Atenas jīn táca ñáyuu inga ñuu jeē cáyūcu núu i yūcuán, tuá na inga jniñu cácusī gā ni i jīn chi máa-ni jeē cuni nahín i jnúhun jeé chí jēe cahán i jnúhun jeé.

22 Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jijnáhan ní, jító ná jēe yóhoyo cáchiñúhún ní yāa maá ní.

23 Chi ni jica nuu ná, te ni jecondēhe ná nuū jeē cáchiñúhún ní, te ni jito ná iñ altar jeē yosó jnúhun yáha: Yāha cúu altar yāa jeē ná tu cuni yō jnúhun ya, achí. Te máa Yáa un jēe cáchiñúhún ní, vēsú ná tu cuni ni jnúhun ya, suu jnúhun Yāa un cúu jeē nácani ná núu ní vijna.

24 'Chi Yāa un cúu Yāa jeē ni sáha ñayīví jīn táca ndíhi jeē iyó, te máa yá cúu Jitoho andīví jīn ñáyīví, te tu ndéé yá ini veñūhun cásáha ñayuu.

25 Te ni tu cúmanī ni iñ nuū yā jeē cuáha ñayuu nuū yā, chi máa yá sáha

jeē técu ñayuu, jīn jēe stáa i tachī i, jīn jēe nihín i ndíhi jeē jīni ñúhún i.

26 'Te ni sáha ya jeē chíji iñ-ni yucūn ni tahū táca ñáyuu jeē ní nduu táca nación, návāha coyūcú i ní cáhnu ñayīví, te ni tana yā cuiyā cotecu ñayuu jīn lugar coyūcú i jínáhan i.

27 Te súcuan ni sáha ya chi cúní yā jeē nanducú yó yā, chí núu nanducú yó yā te cuni yō jeē iyó yá, chí yajni-ni cúu ya jīn iñ iñ yó.

28 Chi máa yá sáha jeē iyó yó jīn jēe cátecu yō jīn jēe cáanda yō. Chi suni súcuan ni cacahān sava tēe ñuu ni jēe cátava yaa: Suni nde yucūn maá yá cácuu yó, áchí.

29 Te núu yucūn Yāa Dios cácuu yó, te ma cáni ní yō jeē ídolo oro chí plata chí yūu cúu ya, chí cájeni ni ñayuu jeē súcuan cáa ya, te súcuan cásávāha i ídolo.

30 Te ni jendeyí ni yā síquī jeē tu ní cájecūhun ni i ní ndé saá, te vijna chí ndácu ya jniñu jeē ñáyuu ní cáhnu ñayīví na nácani ni i jeē stóo i cuēchi i.

31 Chi Yāa Dios, je ni jeni ya quíivī jeē ndaā sándaā yā síquī ñayuu ñayīví, te ni jeni ya Jesús jeē maá yá sándaā. Te je ni steén cají Yāa Dios nuū táca ñáyuu jeē maá yá ni jeni Jesús, chí ni nastécu yā Jesús, achí Pablo.

32 Te jeē ní cajini sōho i jnúhun jeē nátecu ndíyī te sava i ni cacahān catá i, te sava ga i ni cacahān i:

Vāha te núu cuu cuni sōho na jnúhun cáhān ni ndé inga jīnu, áchí i.

33 Te ni quenda Pablo mēhñu ñáyuu un cuáhān de.

34 Te cuahān jecu ñayuu jīn Pablo, te ni cacandíje. Te iñ de cúu Dionisio, tēe ndútútú jīn tēe cácujeñu cásáha junta nuū naní Areópago, jīn iñ ñahan naní Dámaris, jīn jecu gā i.

### *Jeē ni íne Pablo ñuu Corinto*

## 18

1 Yūcuán na te ni quenda Pablo ñuu Atenas, te cuahān de nde ñuu Corinto.

2 Te yūcuan ní jito de nuū iñ jnāhan ñuu de hebreo, naní Aquila, te tēe región Ponto cúu de. Te sáa jecu-ni tiempo ni quee de jīn ñasihí de

Priscila jeē ní quenda de Italia, chi rey Claudio ni ndacu de jniñu jeē na quéndacoo tāca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jiín Priscila jeē cáyūcú de ñuu Corinto.

<sup>3</sup> Te suni jniñu sāha tēe un sāha Pablo, chi cáquīcu de ñii cuu vehe. Te ni quendōo Pablo jiín tēe ún, te ni casájniñu de.

<sup>4</sup> Te tāca quívī ndétātu ní jehēn Pablo vehe iī sinagoga ni nacani de jnūhun ya, te ni nducú ndéyí de jeē na cándije ñayuu jnūhun Jesús, cúu jnáhan ñuu de hebreo jiín ñáyuu tācá nación jeē tu ní cájini i jnūhun ya.

<sup>5</sup> Te ni jinūcoo Silas jiín Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sāha Pablo, chi máni jnūhun ya nácani cájī de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñūhun ni i quiji ya.

<sup>6</sup> Te ni caquejéé i ni cacahān i siquī jnúhun ún, te ni cacahān xeēn i nuū Pablo. Te máá de ni caja de sahma de jeē cúu seña jeē stóo de i jiín cuéchi i, te ni cahān de jíin i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihīn na núu ñáyuu tācá nación jeē tu cájini i jnūhun ya, te nacani ná jnúhun ya nuū i, áchí de.

<sup>7</sup> Te ni quenda de ini vehe iī sinagoga, te ni jinū de vehe iñ tēe nání Justo ni condee de. Te chíñúhún tēe un Yáā Dios, te vehe tēe un néne yajni xiin véhe iī sinagoga.

<sup>8</sup> Te Crispo, tēe cújéhnú ini vehe iī sinagoga, ni cándije de máá Jítoho yō nde jíin ndihī ñayuu vehe de. Te cuehē ñayuu ñuu Corinto ni cajini nahín i jnūhun nácani Pablo, te ni cacandíje i, te ni cajendute i.

<sup>9</sup> Te iñ jecuáā ni sāha máá Jítoho yō jeē ní jito ndijin Pablo yā ni cahān yā jiín de:

Ma yūhu ró ni ma cási rō yuhu ró, chi níni nacani ró jnúhun ri.

<sup>10</sup> Chi ndító ri rohó, te ma cúu sāha xeēn ni iñ ñayuu jiín ró. Nacani ró

jnūhun ri, chi coo cuehē ñayuu cándije jnūhun ri ñuu yáha, áchí yá.

<sup>11</sup> Te ni condee Pablo yūcuán iñ cuiyā yosáva ni steén de jnūhun Yaā Dios nuū ñáyuu ún.

<sup>12</sup> Te ná cúu Galión gobernador Acaya, te ñayuu hebreo jeē cúu jnáhan ñuu Pablo, iñ cáhnu-ni ni candonda i siquī Pablo. Te ni cajeca i de cuango i jíin de nde vehe juzgado.

<sup>13</sup> Te ni cacahān i jíin Galión:

Tēe yáha yōhyo scáhán de tāca ñáyuu jeē inga modo chíñúhún i Yaā Dios, suu iñ modo jeē cúu contra siquī ley, achí i.

<sup>14</sup> Te quejéé Pablo cahān de núu, te ni cahān-ni Galión jiín ñáyuu hebreo un:

Ñayuu hebreo jijnáhan ró, núu iñ cuéchi xeēn cúu, te cánuú cuni nahín rí jnūhun cácahān rō núu.

<sup>15</sup> Te tuú, chi máni siquī jnúhun-ni jíin siquī ley maá ró jíin siquī tēe cástéén cúu. Te na sándaā maá ró siquī jniñu yáha, chi tu sándaā rī siquī maá iñ jeē súcuan-ni, áchí de.

<sup>16</sup> Te ni cahān de nuū i jeē na quíngoo i fuera.

<sup>17</sup> Yūcuán na te ñayuu griego ni cajni i Sóstenes, tēe cújéhnú ini vehe iī sinagoga, te máá fuera yehyí vehe juzgado ni cacani i de, te Galión chi tu ní sāha cuíti de cuenta.

*Jeē ní najinū Pablo ñuu Antioquia, te cuahān de vuelta unī jeē nacani de jnūhun ya*

<sup>18</sup> Te cuehē gā quívī ni condee Pablo ñuu Corinto. Yūcuán na te ni nacuatáhú de nuū tācá hermano yúcuán, te Aquila jiín ñasihí de Priscila cuango de jíin Pablo, te ni jinūcoo de ñuu Cencrea. Te yúcuán ní saté lī Pablo xinī de, te súcuan stéén de jeē squícu de nuū Yaā Dios jeē ni jéjnūhun de. Te ni quívicoo de barco jiín Aquila jiín Priscila quihīn de región Siria.

<sup>19</sup> Te ni jinūcoo de ñuu Efeso, te yúcuán ní caquendōo Aquila jiín Priscila. Te ni jehēn-ni Pablo vehe iī sinagoga, te ni cahān de jnūhun ya jiín jnáhan ñuu de hebreo jeē cándutútú yúcuán.

20 Te ni cacahān ndahú i jíin de jeē na cónēne de jecu gā quivī jíin i, te tu ní jéhe de jnūhun.

21 Chi ni nacuatáhú de nuū i, te ni cahān de:

Cánuú jēē nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, áchí de.

Te ni quenda de ñuu Efeso, te ni quivī de barco cuahān de.

22 Te ni jinū de ñuu Cesarea, te ni jehēn de ñuu Jerusalén. Te nuū ní ndihí ni cahān de jíin grupo ñayuu cá candíje yūcuán, te cuanuhun de ñuu Antioquía.

23 Te ni coyūcú de yūcuán jecu quivī, te sáa te ni quenda tucu de cuahān de ni jica cuu de n̄ Galacia jíin Frigia. Te ñayuu cá candíje ni cahije ga ni i jíin jnūhun ya ni sáha de.

### *Jeē ní nacani Apolos jnūhun Jesús ñuu Efeso*

24 Te ñuu Efeso ni quee ñn tēe hebreo nání Apolos, te tēe ñuu Alejandría cúu de. Te vāha nācani de jnūhun ya, chi vāha jíin de jnūhun jeē cahán tutu ñ.

25 Te je ni cutūhva vāha tēe un jíin jnūhun máa Jítoho yō Jesús, vēsú jíin de máni máa jnūhun ya jeē ni stēen Juan ná ni scuándute de ñayuu, te ndíhví ni de stēen cají de jnūhun ya nuū ñayuu.

26 Te jéhnu-ni ni nacani de jnūhun ya ini vehe ñ sinagoga. Te ni cajini sōho Aquila jíin Priscila jnūhun nācani de, te ni cajeca de Apolos cuangoo s̄n de, te ni cacastūhun yúcún ndíndúú de jnūhun ya jeē ná tu cuni Apolos.

27 Te cúní Apolos quihīn de nde región Acaya. Te je cá candíje sava ñayuu yúcuan ní sáha Yaā Dios síquī jeē váha ni yā. Te tācá hermano ñuu Efeso ni cachindéé ñáhán i de, chi ni catee i carta quihīn de jíin núu ñayuu cá candíje cáyūcú Acaya jeē na cuatáhú i Apolos. Te nuū ni jíin de yūcuán, te vāha ni chindéé ñáhán de tāca ñayuu cá candíje un jíin jnūhun ya.

28 Te nuū tāca ñayuu ñuu un ndé jíin jnāhan ñuu de hebreo jeē cáyūcu yúcuan, ní stēen cají de ndese cástívi

tāca jnāhan hebreo de síquī jnūhun ya. Te tu ní cánihīn jnāhan de un jnūhun cahān síquī jeē ni stēen de, chi jíin jēē cahán tutu ñ ni stēen de jeē Jesús cúu Cristo, Yaā jeē cáñūhun ni de quiji ya.

### *Jeē ní ñne Pablo ñuu Efeso*

## 19

1 Te níin néne Apolos ñuu Corinto, te ni yāha Pablo ichi síquī ñuu Efeso, te ni nanuu de ni jinū de máa ñuu ún. Te yūcuan ní nijnāhan de jíin tijni tēe cá candíje.

2 Te ni cajnūhún de tēe ún:

¿A ní canihīn ní Espíritu Santo ná ni cacandíje ní, chí ná tuú? áchí de.

Te ni cacahān de jíin Pablo:

Tuú, chi ni ná tu nihīn na jnūhun jeē iyó Espíritu Santo, achí de.

3 Yūcuán na te ni cahān Pablo:

¿Na síquī ni cajendute ní núu súcuan? áchí de.

Te ni cacahān de:

Ni cajendute ná síquī jnūhun ni stēen Juan, achí de.

4 Te ni cahān Pablo:

Jeē ní scuándute Juan ñayuu cúu jeē ni stēen de jeē na nācani ni i jeē stóo i cuēchi i, te ni cahān de jeē na cándíje i máa Yáa quiji jeē cúu Cristo Jesús, achí Pablo.

5 Te nuū ní cajini sōho tēe un jnūhun yāha, te ni cajendute de jeē ní cá candíje de máa Jítoho yō Jesús.

6 Te ni soó Pablo ndíndúú ndaha de xini tāca tēe ún, te ni quivī ní Espíritu Santo ini anuá de jíināhan de, te ni cacahān de s̄n s̄n yuhu te ni canacani de jnūhun ya.

7 Te ni ñyo nājnūhun uxī uū jnahán tēe.

8 Te unī yoō ni jehēn jehēn Pablo vehe ñ sinagoga. Te jéhnu ni nacani de jnūhun ya, te ni nducú ndéyí de jeē na cándíje ñayuu jnūhun ndese ndácu Yaā Dios jniñu.

9 Yūcuán na te sava i ni cacunīhni ni i te tu ní cá candíje i, chí sa ni cacahān neé i síquī jnūhun vāha Yaā Dios jíin ñayuu cánataca. Jeē yúcuan ní cujiyo-ni Pablo nuū ñayuu ún, te ñayuu cá candíje cuangoo i jíin de. Te ndijnahan quivī ni stēen de nuū

ñáyuu ún ini escuela ñin tēe nání Tiranno.

<sup>10</sup> Te súcuan ni sáha de uū cuiyā, te tāca ñáyuu cáyūcu Asia, cúu ñáyuu hebreo cúu ñáyuu tāca gá nación, ni cajini sōho i jnūhun máá Jítoho yō Jesús.

<sup>11</sup> Te ni jēhe Yaā Dios poder nuū Pablo jeē sáha de cuehē jniñu jéhu téyí.

<sup>12</sup> Te nde pañú jiín sahma jeē ní jniñ de ni cajengoo jiín núū ñáyuu cácuñu, te ni canduvāha-ni i cuehyī cándoho i, te ni quendacoo tachī ini i cuangoo.

<sup>13</sup> Te jecu tēe hebreo cájica cuu de jeē quenehen de tachī ini ñáyuu, te ni cajeni siquí ni de jeē suni jiín poder máá Jítoho yō Jesús quenehen de tachī, te suhva ni cacahān de jiín tāca táchī:

Jiín poder Jesús jeē nácani Pablo jnūhun ya, cáhān ñihin ri jiín ró jeē na quénda ró quíhīn rō, achí de.

<sup>14</sup> Te súcuan ni casáha uxā sēhe yí ñin tēe hebreo nání Esceva, cúu de ñin sutū cujéhu.

<sup>15</sup> Te ná ni casáha de, te ni cahān-ni tachī ún:

Je jíní rī Jesús, te suni jíní rī Pablo. Te róho jínáhan ró ¿ndé tēe cácuu ró jéē cuatáhú rí rohó? áchí jiín de.

<sup>16</sup> Te tēe ndóho tachī un ní ndonda de, te ni cundeyí de siquí ndihúxá tēe ún. Te ni sáha xeēn ndasí de jiín ndé ni catujī te ni cacuvichí lí ni quendacoo vehe un ní cajinu cuangoo.

<sup>17</sup> Te jnūhun yáha ní cajini tāca ñáyuu cáyūcú ini ñuu Efeso, cúu ñáyuu hebreo cúu ñáyuu tāca gá nación, te yōhyo ni cayūhú i, te ni cacahān i jeē yōhyo cújéhu máá Jítoho yō Jesús.

<sup>18</sup> Te cuehē ñáyuu jeē ní cacandíje ni quijicoo i nuū Pablo ni nacani ndaā i jnūhun tāca jniñu neé ní casáha i.

<sup>19</sup> Te cuehē i jeē ní casáha jniñu tásí ní jinūcoo i cándiso i tutu i, te ni cajehmu i tutu un jíto nuū tāca ñáyuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu.

<sup>20</sup> Te ni jitē jnūhun máá Jítoho yō cuahān, te ndihī ñáyuu ni cajini i jeē cujéhu ndasí jnūhun ya.

<sup>21</sup> Te nuū ní ndihī tācá jniñu yáha, te jéni téyí ni Pablo jeē quíhīn de Macedonia jiín Acaya, te sáá te najinū de ñuu Jerusalén. Te ni cahān de jeē na najinū de ñuu Jerusalén, yūcuán na te jini ñúhún quíhīn de nde ñuu Roma.

<sup>22</sup> Te uū tēe jeē cáchindéé ñáhān jiín Pablo cúu Timoteo jiín Erasto, te ni scāndu de ndindúú tēe yāhá cuángoo de nde Macedonia, te ni quendōo máá de Asia jecu gā quivī.

### *Jeē ní cacuvaā ñáyuu ñuu Efeso*

<sup>23</sup> Te suu quivī ún yōhyo ni candonda ñáyuu siquí jnūhun ya.

<sup>24</sup> Chi ni iyo ñin tēe sájniñu siquí plata, nání de Demetrio. Te máá de jiín ndihī tēe casájniñu jiín de, cánihīn de cuehē xūhún, chí jiín plata casáha de vehe lulí jéē modo veñūhun ídolo i jeē cúu yaā Diana.

<sup>25</sup> Te Demetrio ni nastútú de tēe casájniñu jiín de jiín táca gá tēe jeē suni jniñu yúcuán casáha, te ni cahān de:

Tátā, cájini ni jéē siquí jniñu casáha yó yáha vāha cánihīn yō xūhún.

<sup>26</sup> Te cájito ní te cájini sōho ní jéē ñin tēe nání Pablo chí cáhān de jeē násūu yāá cácuu jeē casáha ñáyuu. Te je ni scandíje de cuehē ñáyuu, nasūu máá ñin-ni ñuu Efeso yāhá chí ní cáhnu Asia.

<sup>27</sup> Te quíyūhú ni na jéē cahān ñáyuu jeē tu ndé jéjniñu jeē casáha yó. Te sanaa te suni súcuan cahān i coto i máá veñūhun yaā síhí Diana jeē cujéhu, te suni sájéē ni i nuū yaā Diana, te ma cúu ga cujéhu ya vésú ndivii ñáyuu Asia jiín ñáyuu ní cáhnu ñayīví cáchiñúhún i ya vijna, achí de.

<sup>28</sup> Súcuan ni cajini sōho de jnūhun yáha te yōhyo ni caquítī ni de, te ni cacana jee de:

Cújéhu téyí Diana, yaā cúu patrona ñuu yō Efeso, achí de.

<sup>29</sup> Te ñáyuu ñuu Efeso ni cacuvaā i, te ñin cáhnu-ni ni candonda i ni cajniñ i Gayo jiín Aristarco cuangoo i jiín de nde vehe nuū cándutútú ñáyuu casáha i junta. Te ndindúú tēe un cácuu tēe Macedonia, te cájica de jiín Pablo.

<sup>30</sup> Te cúní Pablo quíiví de nuū ñáyuu cuehē un cahān de jíin i, te ñáyuu cácandíje tu ní cájēhe i jnūhun quihīn de.

<sup>31</sup> Te suni sava tohō jeē cácuu amigo de cáyūcu Asia, ni catají jnūhun cuahān nuū de, cácahān ndahú jíin de jeē ma quihín de nuū ní cacutútú ñáyuu ún.

<sup>32</sup> Te ñáyuu ní cacutútú un, sava i ni cacana jee i ñin jnūhun te sava ga i inga jnūhun, te súcuan ni cacuvaā teyí i, te cuehē i ni tu cájini cuítí i na síquī cúu jeē ní cacutútú i.

<sup>33</sup> Te sava tēe hebreo ni cajeni de ñin jnáhan de jeē naní Alejandro nuū ñáyuu cuehē ún, te ni cacastūhún de nuū tēe ún na síquī cúu jeē cacuvaā i. Yūcuán na te Alejandro ni sáha de seña jíin ndaha de jeē na cúnayúú ñáyuu, chí cúní de cahān de jíin i jeē násūu cuéchi táca ñáyuu hebreo cúu.

<sup>34</sup> Te ni canacuni ñáyuu un jēe tēe hebreo cúu de, te jeē yúcuan ní cacana jee téyí gá i nájnūhun uū hora:

Cújéhnú téyí Diana, yaā cúu patrona ñuu yō Efeso, achí i.

<sup>35</sup> Yūcuán na te ni cacunahín ñáyuu ni sáha tēe cúu secretario ñuu ún, te ni cahān de:

Nihín ñáyuu ñuu yō Efeso, ndihí ñáyuu chí je cájini i jeē cándito vāha yó veñūhun yaā Diana jíin imagen Diana jeē ní ñinga nde andiví.

<sup>36</sup> Te ni ñin chí ma cúu cahān jeē tú ndaā jnūhun yáha. Núu súcuan te vāha ga na cási ní yuhu ní, te ma sáha yachí ní ñin jeē tu ní nácani vāha ni ní síquī.

<sup>37</sup> Chí tēe yáha ní caquindeca ní de yāhá vēsú tu ní cásaha de ni ñin cuéchi síquī Diana yō, ni tu ní cácahān ndevāha de ni ñin jnūhun síquī.

<sup>38</sup> Te Demetrio jíin táca gá tēe jeē ñin-ni jniñu cásaha jíin de, núu cácuu de cahān de cuéchi síquī ñin tēe, te na quíngoo de nde vehe juzgado nuū cáyūcu juez, tēe cásandaā jniñu, te yūcuán cundaā síquī de jíin náhan de.

<sup>39</sup> Te núu íyó jnūhun jeē ma cúu cundaā yūcuán, te jíni ñúhún cundaā nuū ñin junta nájnūhun tájnúní ley.

<sup>40</sup> Chí yúhú ná jeē sanaa te cahān táca tóhō Roma jeē síquī gobierno de ni candonda yó, chí ma nihín yō jnūhun castūhun yó na síquī cúu jeē ní cacutútú yó ni cacuvaā yō vijna, achí de.

<sup>41</sup> Te nuū ní ndihí ni cahān secretario jnūhun yáha, te ni cajitē ñáyuu un cuángoo.

*Jeē ni jéhēn Pablo Macedonia jíin Grecia*

## 20

<sup>1</sup> Te ná ni yāha jēe ní cacuvaā ñáyuu, te ni cana Pablo ñáyuu cácandíje, te ni jeni ichí de i. Te ni cañunundee jnáhan de jíin Pablo jeē ní nacuatáhú de, te cuahān de Macedonia.

<sup>2</sup> Te ni jica cuu de táca ñuu yúcuan. Te jíin cuéhē jnūhun ni stihví ni de táca hermano cácandíje. Te ni jinū de Grecia.

<sup>3</sup> Te ni condee de yúcuan úní yoō. Te je yajni quihín de jíin barco nde Siria nuú, te máa quíiví ún te ni nihín de jnūhun jeē jnáhan ñuu de hebreo ni casquíjnáhan jnūhun jeē ndonda síquī de ichi nuū quihín de, te jeē yúcuan ní nacani ni de te cuahān tucu de ichi Macedonia.

<sup>4</sup> Te ni cahīyo sava tēe cájica jíin Pablo, te cánaní de Sópater ñuu Berea, Aristarco jíin tēe naní Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo.

<sup>5</sup> Te ni cacandu tēe yáha, te cándetu de Pablo jíin sáña, Lucas, nde ñuu Troas.

<sup>6</sup> Te nuū ni yáha vico jeē cáyeji i pan jeē tu yáhi levadura, te jíin barco ni quendacoo ná ñuu Filipos, te nde nuū uhún quíiví te ni canajnáhan ná jíin de nde ñuu Troas. Te ñuu yúcuan ní coyūcu ná uxā quíiví.

*Jeē ni íne Pablo ñuu Troas*

<sup>7</sup> Te máa quíiví domingo ni candutútú ñáyuu cácandíje jeē cáji i pan, nájnūhun ni steén maá Jítoho yō jeē núcūhun ni yō síquī yā. Te ni steén Pablo jnūhun nuū ñáyuu ún. Te síquī jeē inga quíiví un jíni ñúhún quenda

de quih̄n de, te nahán ní nacani de jnūhun nde ni cuñuú.

<sup>8</sup> Te vehe yósó jnáhan cúu vehe ún. Te nde cuarto xinī nuū ní candutútú ná un ní ūyo cuehē lámpara ni cundijin.

<sup>9</sup> Te ñn sūchi yí nání i Eutico, néne i yuhu ventana. Te jeē ní cunahán nácani Pablo jnūhun, te yōhyo jíi i mánhá, te ni quixī-ni i. Te nde piso unī un ní ñinga i nde nuū ñūhun. Te je ni jihī i ni candonehen de i.

<sup>10</sup> Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jijnáhan ní, chi ni natecu i, áchí de.

<sup>11</sup> Te ni ndaa Pablo, te ni yeji de pan jíin i jijnáhan i jeē cánucūhun ni de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de.

<sup>12</sup> Te Eutico chi íyó váha i cuanuhun i jíin de jijnáhan de, te ndivii ñayuu ún yōhyo cácusñ ni i.

*Jeē ní quenda Pablo ñuu Troas cuahān de ñuu Mileto*

<sup>13</sup> Te ni quiv̄icoo ná ini barco cuango ná. Te Pablo chi cúní de caca jéhe de, te ni cundaā jeē najnáhan ná jíin de nde ñuu Asón.

<sup>14</sup> Te nuū ní canajnáhan ná jíin de ñuu Asón, te ni quiv̄i de barco te cuango ná jíin de nde ñuu Mitilene.

<sup>15</sup> Te yūcuan ní quendacoo tucu ná jíin barco te inga quiv̄i ni jinūcoo ná xiin Quío, ñuhun jeē íne sñn nuū ndúte. Te quiv̄i uní ni jinūcoo ná Samos jeē súni nuū ndúte íne, te ni caquendōo ná Trogilio. Te quiv̄i cuún ni jinūcoo ná ñuu Mileto.

<sup>16</sup> Te tu ní jéngoo ná ñuu Efeso, chi jéni ni Pablo jeē yáha-ni de ñuu un quih̄n de, návaha ma cucuéé de Asia te naa tiempo nuú, chi núú de jinū yachī de ñuu Jerusalén cone de máa quiv̄i Pentecostés núu na cúu.

*Jeē ní jeni ichí Pablo tēe jéhu cándiso jniñu nuū ñáyuu cá candíje ñuu Efeso*

<sup>17</sup> Te ná íne ga Pablo ñuu Mileto, te ni tají de jnūhun cuahān nde ñuu

Efeso jeē na quíjicoo tēe jéhu cándiso jniñu nuū ñáyuu cá candíje yūcuán.

<sup>18</sup> Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna.

<sup>19</sup> Chi ní tiempo jeē ni íne ná jíin ní te nde vijna, jéjniñu vāha na síquī jnūhun máa Jítoho yō, te tu ní sándúxí ná maá ná. Te íyó jínu ni ndahyū na jéhe ñáyuu. Te ni ndoho ná jnúndóho ni casáha jnáhan ñuu ná hebreo, chi ni casquijnáhan jnūhun i siquī ná.

<sup>20</sup> Te cájini ni jéé tu ní táñúhún ná ni ñn, vēsú ndese ga cácahān ñayuu siquī ná, chi ni nacani ná ndih̄i jnūhun ya jeē quéndōo vāha ní sáha. Te ni steén na jnúhun ya nuū ni jijnáhan ní, cúu nuū chitú cúu tācá vehe ní.

<sup>21</sup> Te ñnuú-ni jnūhun ni nacani ná núú ndih̄i ní, cúu jnáhan ñuu ná hebreo cúu ñayuu tāca gá nación, chi ni cahān na jéé na nácani ni ni jéé stóo ni cuéchi ní te na cándíje ní máa Jítoho yō Jesucristo.

<sup>22</sup> Te vijna chi ñūhun ichí ná quih̄n ná ñuu Jerusalén, chi stíhv̄i ni Espíritu Santo sãña quih̄n ná. Te tu jíin ná ndese ga coo jíin ná yūcuán.

<sup>23</sup> Te íyó ñn jeē jiní na, cúu jeē chune i sãñá vecāa te quiji jnúndóho siquī ná, chi Espíritu Santo súcuan cáhán jíin ná ndijnahan ñuu nuū jica ná.

<sup>24</sup> Te ni tu sáha ná cuenta vēsú na cáhni i sãñá, chi jeē cuní na cúu jeē na sínu vāha ná jniñu jeē ní tee máa Jítoho yō Jesús siquī ná, te súcuan cusñ ni ná. Te jniñu un cúu jeē nácani ná jnúhun vāha ya nuū tāca ñáyuu ndese vāha ni Yaā Dios jíin yó.

<sup>25</sup> Te je ni jica cuu ná, ní nacani ná jnúhun ya nuū ní ndese ndácu Yaā Dios jniñu. Te vijna chi jíin na jéé ni ñn ní ma najnáhan ga yō nuū ñáyiv̄i yáha.

<sup>26</sup> Jeē yūcuan cástūhun cájí ná nuū ni jijnáhan ní vijna jeē násū cuéchi ná cúu núu ndé ñn ní stív̄i.

<sup>27</sup> Chi ni nacani ná núú ní ndih̄i jnūhun Yaā Dios jeē ni sãndaā yā ndese coo, te tu ní quéndōo ni ñn jnūhun.

<sup>28</sup> Nūu sūcuan te coto vāha ní máá ní jíin ndihí ñayuu cá candíje, chí Espíritu Santo ni jeni ya nihín jéē cóndito ní ñayuu maá Jítóho yō, chí ni nacuaan ya i jíin níñi yā.

<sup>29</sup> Chí jeē quihín na te jíin na jéē quijicoo tēe cástáhú quívicoo mēhñu ní, te nducú de snāa de jnūhun ni cajetáhú ñayuu cá candíje, te xeēn sáha jnūhun stáhú de nájnūhun xeēn sáha yihí jeē cájehni tī lanchi.

<sup>30</sup> Te suni nuū grupo maá ní quejéé sava de cahān de jnūhun stáhú, te stáhú de sava ñayuu cá candíje jeē na cóndiquīn i jnūhun stáhú stéén de.

<sup>31</sup> Jeē yúcuán condito ní jéē ma cóo sūcuan. Te ma náa ni ni jéē uní cuiyā ndiquiví ndíñuu ni condihví ndasí ni na ndé ndahyú na jéhē ni, ní jeni ichí ná ñn ñn ní jíinahan ní.

<sup>32</sup> Te vijna, hermano, jíicán tahu na nuū Yaā Dios jeē coto ya nihín. Chí jnūhun jeē vāha ni yā ndíso poder sáha jeē íje ga ni jíin, te suu sáha jeē ñn quiví te cuāha ya tahū jeē ndujéhu luu ní ndé jíin ndihí ñayuu ní nacāji ya jeē cóo ndoo coo íi i nuū yā.

<sup>33</sup> Tu ní ndúcú ná jeē nihín na xūhun chí sahma nuū ní ñn i.

<sup>34</sup> Chí je cájini vāha ni jéē sa suhva ni sájniñu nihín ná návāha nihín na jéē cótecu na ndé jíin táca tēe cájica jíin ná.

<sup>35</sup> Te níiní ní steén na nuū ni jéē sūcuan jíin níñu sájniñu yó návāha nihín yō jeē cuāha yó nuū ñayuu cúmaní nuū. Te ma náa ni ni jnūhun jeē ni cáhān maá Jítóho yō Jesús, chí suhva ni cahān yā: Ndetū gā quendōo yó jéē cuāha yó vēsú jeē nihín yō, achí yá. Achí Pablo.

<sup>36</sup> Te ni ndihí ni cahān de táca jnūhun yāha, te ni jecuiñí yití de, te ni jíicán tahu de jíin ndihí tēe ún.

<sup>37</sup> Yūcuán na te ndihí de ni cajecunundee jnāhan de jíin Pablo ní catechūhú de jeē cánacuatáhú de, te ni candahyū de.

<sup>38</sup> Chí cácuuíhyá ndasí ni de jíin jnūhun ni cahān Pablo jeē ma ndácoto jnāhan ga de. Te cuangooní de jíin Pablo nde nuū íin barco.

*Jeē cuánuhun Pablo ñuu Jerusalén*

## 21

<sup>1</sup> Yūcuán na te ni caquendōo táca hermano ñuu Efeso, te ni quívicoo ná barco, te cuangooní ná ndé Cos. Te inga quiví ni jinūcoo ná Rodas, te yūcuan ní quendacoo ná te ni jinūcoo ná ñuu Pátara.

<sup>2</sup> Te ni cane ñn barco jeē quihín Fenicia, te ni quívicoo ná cuangooní.

<sup>3</sup> Te nuū ní cajito ná nuū Chipre jeē íne sñn nuū ndúte, te ni quendōo ichi lado jecó barco, chí ni cayāha ná cuangooní nde Siria. Te ni jinūcoo ná ñuu Tiro, chí yūcuan ndóo jeē ndíso barco ún.

<sup>4</sup> Te ni jenanducú ná ñayuu cá candíje, te ni caquendōo ná jíin i uxā quiví. Te máá Espíritu Santo ni steén nuū i jeē quíji jnūndóho síquí Pablo ñuu Jerusalén, te jeē yúcuán ní cacahān i jíin de jeē ma quihín de.

<sup>5</sup> Te ni yāha uxā quiví ún, te ni quendacoo ná. Te táca tēe cá candíje jíin ñasihí de jíin séhe de ni cachuhun ichí de sāña ní jengoo de jíin ná nde yatā ñúu, te ni cajecuiñí yití ná jíin de yumar te ni cajicán tahu na.

<sup>6</sup> Te ni cañunundee jnāhan ná ní canacuatáhú ná yūcuán, te ni quívicoo ná barco cuangooní. Te ni canandió cóo de cuanungoo de vehe de.

<sup>7</sup> Te ni quendacoo ná ñuu Tiro cuanungoo ná jíin barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jíin táca hermano, te ni caquendōo ná jíin de ñn quiví.

<sup>8</sup> Te inga quiví un ní cajica jéhé ná jíin Pablo, te ni jinūcoo ná ñuu Cesarea, te ni quívicoo ná vehe Felipe, tēe nácani jnūhun vāha ya. Tēe un cúu jnāhan jeē ndihúxá tēe jeē ní casaja staā nuū ñāhan viuda. Te ni caquendōo ná jíin de.

<sup>9</sup> Te tēe un íyó cúun séhe síhí de jeē cáhīyo máá i, te cánacani i jnūhun Yaā Dios.

<sup>10</sup> Te ni coyūcu ná yūcuán tijni quiví. Te ichi Judea ni quíji ñn tēe nácani jnūhun Yaā Dios, nání de Agabo.



11 Te ni quee de nuū ná. Te ni quihin de sanchíi Pablo, te ni jihni de ndaha de jíin jéhē de, te ni cahān de:

Suhva cáhān Espíritu Santo. Jnáhan yó hebreo súcuan cuhni i tēe chíi sanchíi yáha ini ñuu Jerusalén, te nastúu i de nuū ñáyuu sñn nación, áchí de.

12 Te jeē ní cajini sōho na jnúhun yáha te máá ná jíin táca tēe cácandíje cáyūcú ñuu Cesarea ni cacahān ndahú ná jíin Pablo jeē ma quihín de ñuu Jerusalén.

13 Yūcuán na te ni cahān Pablo:

¿Najehē cándahyū ni jíjnáhan ní, te cásáha ní jeē cucuíhyá ni ná? Chi sañá je íyó túhva ná jeē násūu máá jeē cónuhnī ná ini ñuu Jerusalén, chi suni jeē vēsú na cúu na jēe síquī maá Jítóho yō Jesús, áchí de.

14 Te jeē tu ní cúu cuiiti casícoo ná, yūcuán na te sa suhva ni cacahān ná:

Na cóo ndese cúni maá Jítóho yō nuu súcuan, áchí ná.

15 Yūcuan na te sáá te ni casátūhva ná, te cuangoo ná ñuu Jerusalén.

16 Te suni jecu tēe ñuu Cesarea jeē cácandíje cuangoo de jíin ná. Suni cuahān ñn tēe Chipre nání de Mnasón, te je ni cuu cuehē cuiyā candíje de. Te ná ni jinūcoo ná ñuu Jerusalén, te ni cacoyūcu ná vehe de.

### *Jeē ní jécondēhe Pablo Jacobo*

17 Te nuū ni jíinūcoo ná ñuu Jerusalén, te hermano cáyūcú ñuu ún yóhō ni cacusñi de jeē ní jíinūcoo ná.

18 Te ñnga quivī un ní cajengoo ná jíjnáhan ná jíin Pablo vehe Jacobo, te yūcuan ní candutútú táca tēe jéhnū cándiso jníñu nuū ñáyuu cácandíje.

19 Te Pablo ni sáha de saludar tēe ún jíjnáhan de. Yūcuán na te ni castūhún de ndihī jniñu ní sáha Yaā Dios ná ni nacani de jnúhun ya nuū ñáyuu táca nación jeē tu cájini i jnúhun ya.

20 Te ni cajini sōho de jnúhun yáha, te ni cacahān de jeē yóhō cújéhnū Yaā Dios. Te ni cacahān de jíin Pablo:

Hermano, vijna te jíni ní náa cuehē mil jnáhan ñuu yō hebreo ni cacandíje i Jesús, te cácahān ñhin i jeē cánuú

squícu yó ley jeē ni jéhe ya nuū Moisés.

21 Te ni canihīn i jnúhun cácahān jeē stívi ní steén ni núu táca jnáhan yó ñáyuu hebreo cáyūcu jíca i táca gá nación, chi ni steén ni núu i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i táca gá jeē tajnúni jenahán.

22 ¿Ndese sáha ní núu súcuan? Chi cuni ñayuu un jēe ní ndee ní te cutútú cuéhē i.

23 Suhva sáha ní núu súcuan. Yāha íyó cúun tēe jeē ní cajejnūhun de ñn jeē squícu de nuū Yaā Dios.

24 Cueca ní tēe yáha quihīn ni jíin de templo, te cuchī ní nasándoo ní máá ní jíin de nuū yā, te cuaan ní jeē socó de nuū Yaā Dios jíjnáhan de. Yūcuán na te cuu sāté de xinī de, te suu stéén jeē ní casquícu de ndihī jeē ní cajejnūhun de nuū yā. Yūcuán na te cuni ndihī ñayuu jeē tú ndaā táca jnúhun ni cajini sōho i síquī ní, chi coto i jeē suni máá ní sa squícu ní ley yā.

25 Te ñayuu táca nación jeē násūu ñáyuu hebreo cácuu i te ni cacandíje i ya, je ni catee ná carta cuahān nuū i jeē tu cánuú squícu i ley un, chi máá-ni jeē ma cáji i cūñu jeē ní sóco nuū ídolo ni ñiñī ni quiiti jeē jihí jeē tu jéti ñiñī tī, te ni ma cáca jnéni i, áchí de.

### *Jeē ní cajni de Pablo ini templo*

26 Yūcuán na te ni jeca Pablo tēe ún, te ñnga quivī un ní cajichi de ni canasándoo de máá de nuū yā. Te ni quivī Pablo ini templo ni cachi de nuū sutú na quivī jínu jeē nasándoo tēe un máá de nuū yā, te quindecas de quiiti jeē socó de nuū yā.

27 Yūcuán na te cácuu de jeē sínu de ndihúxá quivī jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ní cascáhān de ndihī ñayuu, te ni cajni i Pablo.

28 Te ni cacana jee i:

Tēe ñuu yō Israel, cuāha núu ní ndaha jíjnáhan ní na jñi yó tēe yáha. Chi máá de cúu tēe jíca cuu ñi cáhnu stéén de nuū táca ñáyuu, te cáhān de síquī nación yō jíin síquī ley jeē ni jéhe

ya nuū Moisés jíin síquī templo yáha. Te suni je ni quívicoo de jíin jecu tēe griego ini templo iī yáhá, te súcuan stívi de jnūhun iī jeē cahán jeē ma cúu quívi ñayuu ini templo te núu nasūu ñáyuu hebreo cúu i, áchí.

<sup>29</sup> Chi nde na íne Pablo ini ñuu un ní cajini tēe hebreo jeē jíca de jíin Trófimo, tēe ñuu Efeso jeē násūú hebreo cúu de, te cájeni ni de jeē ni quívi tēe un jíin Pablo ini templo.

<sup>30</sup> Te ndíhi ñayuu ñuu un ní cuvaā, te ni cacutútú-ni i, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí.

<sup>31</sup> Te ni cacuni i cahni i de núú. Te general, tēe cújéhnú nuū ndíhi soldado, ni nihín de jnūhun jeē ndíhi ñayuu ñuu Jerusalén ni candonda i cácuvaā i.

<sup>32</sup> Te ni jeca general tācá soldado jíin capitán, te cájinu de cuango de nde nuū cáhíin ñayuu cuehē ún. Te ná ni cajito ñayuu jeē ni jínūcoo general jíin soldado, te ni cajecuiñí i jeē cácani i Pablo.

<sup>33</sup> Yūcuán na te ni quívi general mēhñu ñáyuu, te ni jni de Pablo, te ni ndacu de jniñu jeē conuhní de jíin úu cadena. Yūcuán na te ni cajnūhún general ndé tēe cúu Pablo te na cuēchi ni sáha de.

<sup>34</sup> Te ni cacana ñayuu cuehē ún, sava i ñn jnūhun te sava ga i inga jnūhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahán Pablo nde cuartel.

<sup>35</sup> Te nuū ni jínū Pablo escalera cuartel ún, te soldado ni cajni de Pablo cándiso de síquī jeē cácani ñayuu ún jni i Pablo sáha xeēn i jíin de.

<sup>36</sup> Chi ndíhi i vėjicoo i ichi yátá soldado, te cácana jee i:

Cahni ni tēe jíñá, achí i.

*Jeē ni cahán Pablo jehē maá de nuū ñáyuu*

<sup>37</sup> Te cásquívi de Pablo ini cuartel nuú, te jíin jnūhun griego ni cahán Pablo jíin general:

¿A cuáha ni jnūhun cahán ná ñn jnūhun jíin ní? achí de.

Te ni cahán general jíin de:

Te jíin rō cahán rō yuhu griego jeē súcuan.

<sup>38</sup> Núu súcuan te nasūu róhó cúu tēe Egipto jeē jé ni cuu quívi ni ndonda síquī gobierno te ni quenehen cuūn mil tēe jéni ndíyi cuango jíin de nde nuū ñūhun téhé, achí.

<sup>39</sup> Yūcuán na te ni cahán Pablo:

Tuú, chi tēe hebreo cúu ná, te ni cacu ná ñuu Tarso, ñn ñuu jeē cújéhnú ndañúú Cilicia. Te quiñūhun ni ni cuáha ní jnūhun na cáhán na jíin ñáyuu yáha jíjnáhan i, achí de.

<sup>40</sup> Te general ni jēhe de jnūhun jeē cahán de. Te ni jecondichi Pablo nuū escalera, te ni sáha de seña jíin ndaha de jeē na cúu nayúú ñáyuu ún. Te nuū ní cuu nayúú-ni i, te jíin jnūhun yuhu ñúú de hebreo ni cahán de:

## 22

<sup>1</sup> Ndíhi níhín jeē cácuu ní jnáhan ñuu yō jíin ndíhi níhín jeē cácu jéhnú ní núú ñúú yō, cuni sōho ní jnūhun cahán na jehē maá ná, achí de.

<sup>2</sup> Te ni cajini sōho i jeē cahán Pablo yuhu hebreo jeē cúu yuhu ñúú i, te víhyá gā ni cacunahín i. Te ni cahán Pablo:

<sup>3</sup> Máa ná cúu jnáhan ñuu yō hebreo, te ni cacu ná ini ñuu Tarso ndañúú Cilicia. Te ini ñuu Jerusalén yáha ní jehnu ná, te ni cutūhva ná núú Gamaliel, te ni steén de nuū ná ndíhi síquī ley jeē ni jēhe ya nuū jíi yō. Te nde jíin ini jíin ánuá na ní nducú ndéyi ná squícu ná súcuan nuū Yaā Dios, nájnūhun cásáha máa ní vijna.

<sup>4</sup> Te ni jito xeēn na ñáyuu cácdíje i jnūhun Jesús te nde cuní na jéē na cúu ndíhi i núú. Chi cúu tēe cúu ñahan ni jni ná ni chuhun ná vecāa.

<sup>5</sup> Te sutū cújéhnú ga jíin táca tēe jéhnú cándiso jniñu nuū ñúú yō, cácu de testigo jeē súcuan ni sáha ná, te suni máa de ni cajēhe de tíjni carta cuahán na jíin jéē cuáha na núú táca jnáhan yó cáyūcú ñuu Damasco. Chi cuahán ná ñuu un jéē jni ná ñáyuu cácdíje i Jesús te quindecá ná i ñuu Jerusalén yáha, náváha ndoho i núú.

*Jeē ní cachi Pablo ndese ni sama ya de*  
(Hch. 9.1-19; 26.12-18)

<sup>6</sup> Te ni quihin ná ichi cuahān ná, te cuacuyajni ná ñuu Damasco, te nájnūhun caxū cúu. Te ichi ándiví ní quiji ñn nduva ní ndindēé ndaxín núu ná.

<sup>7</sup> Te ni cotúú-ni ná núu ñūhun, te ni jini sōho ná ñn jnūhun cáhán jíin ná: Saulo, Saulo, ¿najehē jito xeēn rō ruhū? achí.

<sup>8</sup> Yūcuán na te ni cahān ná: ¿Na nihín cúu jeē cahán, Tātā? achí ná. Te ni cahān yā jíin ná: Máá rí cúu Jesús jeē ní jehnu ñuu Nazaret, te jeē jito xeēn rō ñayuu cá candíje i ruhū cúu jeē jito xeēn rō ruhū, achí yá.

<sup>9</sup> Te tēe cuango jíin ná ni cajini ndije de jeē ndindēé, te ni cayūhú de, te tu ní cajini sōho de ndese ni cahān yā jíin ná.

<sup>10</sup> Yūcuán na te ni cahān ná: Tātā, ¿na vé cuní ni jēe sáha ná? achí ná. Te ni cahān maá Jítoho yō jíin ná: Ndocuññi te quihñ rō ñuu Damasco, te yūcuan íyó ñn tēe jeē cachi nuū rō na vé cúu jeē cánuú sáha ró, achí yá jíin ná.

<sup>11</sup> Te jeē ní ndindēé un ní sacuaá núu ná, te tēe cuango jíin ná un ní cajni de ndaha ná cuango de jíin ná ní jinūcoo ná ndé ñuu Damasco.

<sup>12</sup> Te yūcuan ní condee ñn tēe nání Ananías, te tāca jnāhan yó hebreo yūcuan cácahān jeē tēe vāha cúu Ananías, chi vāha squícu de ley jeē ni jéhe ya nuū Moisés.

<sup>13</sup> Te ni quee tēe un núu néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núu de.

<sup>14</sup> Te ni cahān Ananías: Máá Yāa Dios tāca jíi yō, je ni nacāji ya nihín návāha cuní ní na vé cuní yā jeē sáha ní, te coto ní núu maá Cristo, Yāa ndaā, te cuní sōho ni jnūhun jeē cahán yā.

<sup>15</sup> Te nacani ní jnūhun ya nuū ndivii ñayuu tāca jēe ní jito ní jíin jēe ní jini sōho ní.

<sup>16</sup> Ma cúhuun ni ni núu súcuan. Ndocuññi ní, te cuandute ní te cahān ndahú ní jíin maá Jítoho yō, návāha nacate ya anuá ni núu cuéchi, achí de jíin ná.

*Jeē ní cachi Pablo ndese ni tají Yāa Dios de nuū ñáyuu tāca gá nación*

<sup>17</sup> Te ni nandió cóo na ní ndee ná ñuu Jerusalén. Te jícán tahu na ini templo, te ni sáha maá Jítoho yō jeē ní jito ndijin ná.

<sup>18</sup> Te ni jini na núu yā ni cahān yā jíin ná: Yachí quenda ró ñuu Jerusalén yāhá, chi ma cuatáhu ñáyuu yáha jēe nacani ró jnūhun ri nuū i, achí yá.

<sup>19</sup> Te ni cahān na jíin yá: Tuú, chi cuatáhu i, Tātā, chi je cájini i jeē ni quívi ná ndijnahan vehe i sinagoga ni jni ná tāca ñáyuu cá candíje i nihín, te ni cani ná i, te ni chuhun ná i vecāa.

<sup>20</sup> Te je cájini i jeē quívi ní cajehni i Esteban, tēe ni nacani cáj jnūhun ní, suni ni indichi na yúcuán, te ni jejnūhún ná jeē na cúu de, chi ni condito ná sahma tēe ni cajehni Esteban, achí ná jíin yá.

<sup>21</sup> Te ni cahān yā jíin ná: Cuáhán, chi maá rí tají rí rohó quíhñ jicá ró nde nuū ñáyuu tāca nación jeē tu cájini i jnūhun ri, achí yá jíin ná. Achí Pablo.

*Jeē ni íne Pablo nuū general*

<sup>22</sup> Te tāca ñáyuu ún vāha-ni ni cajini sōho i te nde jnūhun sandñi yáha jēe ní tají yá de nuū ñáyuu tāca gá nación. Yūcuán na te ni cacuvaā i, te ni cacahān jee i:

Na cúu tēe jíñá, chi tú vāha jeē cótecu gā de, achí i.

<sup>23</sup> Te súcuan cácana jee i, te ni cascádoó i ticáchí i, te ni cascánda i ticachā. Te súcuan cástéén i jeē cáquiti xeēn ni i.

<sup>24</sup> Te ni ndacu general jniñu jeē na quívi Pablo ini cuartel, te ni cahān de jeē na stíchí soldado Pablo nde jíin cuarta ññ, návāha cujnúní ni general na síquí cúu jeē ní candonda ñayuu un síquí de.

<sup>25</sup> Te ni cajihni de Pablo návāha súcuan te caní de. Te ni cahān Pablo jíin capitán jeē indichi tūhva:

¿A jéhe ley jnūhun jeē cani ní cuarta tēe cúu sēhe nación Roma núu ná tu sándaā ní núu íyó cuéchi de? áchí de.

<sup>26</sup> Te ni jini sōho capitán jnūhun yáha, te ni jecahān jíin general:

Coto vāha ní jēe ma stívi ní sáha ní jíin tēe yáha, chí cúu de sēhe nación Roma, achí.

<sup>27</sup> Yūcuán na te ni jinū general nuū Pablo, te ni cajnūhún de:

Cachi núu jendaá cúu jeē séhe nación Roma cúu ró, achí.

Te ni cahān Pablo:

Suu cúu ndije ná, achí de.

<sup>28</sup> Te ni cahān general:

Ruhū chí nde jeē ní jéhe ri cuehē xūhún te ni nduu ri sēhe nación Roma, achí.

Te ni cahān Pablo:

Te sãñá chí nde quiví ní cacu ná cúu ná séhe nación yō Roma, achí de.

<sup>29</sup> Yūcuán na te tāca tēe jeē cáconi cani Pablo nuú, ni cacujiyo-ni cuango, te suni nde general ni yūhú de, chí ní stívi de jeē ní jihni de Pablo, chí tu íyó váha sáha súcuan jíin séhe nación Roma.

*Jeē ní índichi Pablo nuū junta cujéhnu ga jnáhan ñuu de hebreo*

<sup>30</sup> Te inga quiví un cúní general cundaā vāha ní de na síquī cúu jeē ní candonda tēe hebreo síquī Pablo. Te ni ndají de cadena jeē nuhní Pablo, te ni ndacu de jniñu ni cacutútú táca sūtū cácujeñnu jíin táca tēe cásaha junta cujéhnu ga, te ni quenehen de Pablo, te ni jeni de nuū tēe ni candutútú un.

## 23

<sup>1</sup> Yūcuán na te ní ndacoto Pablo nuū tēe ní candutútú junta un, te ni cahān de:

Tátā jijnáhan ní, ní ndé vijna vāha íyó ní anuá na jēe tú na cuēchi ná, jíto jíinúu Yaā Dios, achí de.

<sup>2</sup> Yūcuán na te Ananías, sutū cujéhnu ga, ni cahān jíin tēe cáhīn yajni nuū de jeē na cátu maá yuhu de.

<sup>3</sup> Te ni cahān Pablo jíin sūtū cujéhnu ga ún:

Yaā Dios stóho ya nihín chí tēe stáhú-ni cúu ní, chí néne ní jēe sándaā

ni núu ni stívi ná ley yā, ¿te naun stívi máá ní ley jeē ndácu ní jniñu jeē cáni de sãñá? áchí de.

<sup>4</sup> Te ni cacahān tēe cáhīn nuū de ún: ¿Naun cáhán rō súcuan jíin sūtū cujéhnu ga? Chí nuū Yaā Dios jeñniñu de, achí jíin de.

<sup>5</sup> Te ni cahān Pablo:

Tátā jijnáhan ní, tu ní jíin na jēe sutū cujéhnu ga cúu de, chí núu ní jíin na te ma cahān na súcuan núu, chí yósó núu tútu íi jeē ní cahān yā jeē ma cahān neé yó coto yó táca tēe cácujeñnu nuū yō, achí Pablo.

<sup>6</sup> Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu ñin jnáhan grupo fariseo, te suni súcuan ní íyo tátá na. Chí suni máá ná ñūhun ní na jēe nastécu yā ndīyi, te síquī yúcuu cúu jeē cácahān ní cuéchi síquī ná, achí de.

<sup>7</sup> Te jeē súcuan ní cahān de te ni cacusín ní tēe junta jeē cácuu grupo fariseo jíin grupo saduceo, te ni cacahān ñihin.

<sup>8</sup> Chí cácahān tēe grupo saduceo jeē ma nátecu ndīyi, ní tu cáhīyo ndajéhé yā ní ánuá, te tēe grupo fariseo cájejnūhún de ndinúní jnūhun yáha.

<sup>9</sup> Te yōhyo ní cuvaā. Te sava tēe cástéén jnūhun cáhán tutu ley yā jeē cácuu jnáhan grupo fariseo, ní candocuiñí de, te ni cacahān de:

Tú ní ñin cuēchi cánihīn na síquī tēe yáha. Sanaa te ni cahān ndije ñin ánuá jíin de chí ñin ndajéhé yā. Ma sánihni ní yō nuū Yaā Dios nuu súcuan, achí.

<sup>10</sup> Te yōhyo ní catejnáhan, te yúhú general jeē quende i chiyō Pablo, te ni ndacu de jniñu jeē na quiví soldado te quenehen de Pablo sava mēhñú i, te na ndívi de ini cuartel.

<sup>11</sup> Te jecuáa un ní quee-ni máá Jítoho yō nuū de, te ni cahān yā jíin de:

Pablo, cuandeyí ní rō, chí nájnūhun ní nacani ró jnūhun ri ini ñuu Jerusalén yāhá, suni súcuan nacani nahín ró jnūhun ri ini ñuu Roma, achí yá.

*Jeē ní casquíjnáhan jnūhun cahni Pablo*

<sup>12</sup> Te nuū ní cundijin te ni cacutútú sava ñayuu hebreo, te ni casquíjnáhan jnūhun, te ni cacahān teyí i jeē ma cáji cuiti i ni ñn ni ma cóho cuiti i nde núu tu cahni i Pablo.

<sup>13</sup> Te víhyá gā uū xico tēe hebreo ni cacahān teyí jnūhun yáha.

<sup>14</sup> Te ni jengoo nuū sutú cácujeñhu jíin núu tēe jéñhu cándiso jniñu nuū ñayuu hebreo, te ni cacahān jíin tēe ún:

Ni cacahān teyí ná jeē ma cáji cuiti ná ni ñn ní nde ná tu cahni na Pablo.

<sup>15</sup> Núu súcuan te máá ní jijnáhan ní jíin táca gá tēe cásáha junta cujéñhu ga, cuacáhān ni jíin general jeē quenehen de Pablo na jéé de nuū junta sajnē, chi cachi ni jéé cácuñi ni stíchí vāha ga ní de. Te máá ná jijnáhan ná cotūhva ná cahni ná de nde ná tu quee de nuū cáhān tútú ní, achí.

<sup>16</sup> Te sēhe yí cuáha Pablo ni nihān i jnūhun jeē súcuan ni cacahān, te ni jehēn i cuartel, te ni castūhún i nuū Pablo.

<sup>17</sup> Te ni cana Pablo xinī ñn jnáhan capitán, te ni cahān de:

Condeca ní súchi yáha quihān ni jíin i nuū general, chi íyó ñn jnūhun castūhún i nuū de, achí de.

<sup>18</sup> Te capitán un ní jeca de i cuahān i jíin de nuū general, te ni cahān de:

Pablo, tēe íne vecāa, ni cana de sañá, te ni cahān de jíin ná jeē quíndeca ná súchi yáha núu ní, chi íyó ñn jnūhun cahān i jíin ní, achí de.

<sup>19</sup> Te ni jniñ general ndaha i cuahān de jíin i ñn lado, te yuhu-ni ni ca-jnūhún de i:

Na jnūhun cúní rō cahān rō jíin rí, achí de.

<sup>20</sup> Te ni cahān i:

Tēe hebreo ni casquíjnáhan jnūhun de jeē cahān ndahú de jíin ní quenehen ní Pablo sajnē quihān de nuū táca tēe cásáha junta cujéñhu ga, chi cahān-ni de jíin ní jeē cácuñi de jeē stíchí vāha ga de Pablo.

<sup>21</sup> Te ma cuáha ni jnūhun, chi víhyá gā uū xico de cándetu sáhi de ichi, te ni cacahān teyí de jeē ma cáji cuiti

de ni ñn ni ma cóho cuiti de nde núu tú cahni de Pablo, te vijna je cándetu tūhva de jeē cuáha ni jnūhun quihān Pablo nuū junta, achí i.

<sup>22</sup> Te ni cahān general jíin i jeē ma cáchi i nuū ní ñn ñayuu jeē ni cáhān i jnūhun yáha jíin de, te ni tají de i cuanuhun i.

*Jeē ní tají general Pablo cuahān de nuū Félix, tēe cúu gobernador*

<sup>23</sup> Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhe jíin únī xico uxī jeē cáyōsō caballo jíin úu ciento jeē cándāha lanza, chi cahān jecuāá ún quendacoo de jíin Pablo quingoo de nde ñuu Cesarea.

<sup>24</sup> Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador.

<sup>25</sup> Te ni tee de ñn carta jeē cahān jnūhun yáha:

<sup>26</sup> Máá ná cúu Claudio Lisias, te tēe ná carta yáha cuajeē nuū ní, señor Félix, gobernador cujéñhu. Nde se tahū cúu ní.

<sup>27</sup> Ñayuu hebreo ni cajniñ i tēe yáha, te je yajni cahni i de núu, te ni jnama ná de jíin soldado, chi ni jini na jéé séhe nación Roma cúu de.

<sup>28</sup> Te ni jendeca ná de nuū junta maá i jijnáhan i jeē sándāa i núu na cuēchi ni sáha de.

<sup>29</sup> Te ni jini na jéé siquí ley maá i cúu cuēchi cácahān i siquí de, te tu níhín na ni ñn cuēchi siquí de jeē cúu de ni jeē cóne de vecāa.

<sup>30</sup> Te ni nihān na jnūhun jeē sava tēe hebreo ni casquíjnáhan jnūhun de jeē cahni de tēe yáha, te jeē yúcuan cúu jeē yachī ni tají ná de cuajeē de nuū ní. Te suni je ni cahān na jíin ñayuu cájicān cuēchi siquí de jecoo i nuū ní, te jiñā cahān i jíin ní na cuēchi ni sáha de. Je ni cahān yō, achí carta.

<sup>31</sup> Te ni cajeca ñuú-ni soldado Pablo cuangoo jíin de nde ñuu Antípatris, nájnūhun ni tahū jniñu nuū de.

<sup>32</sup> Te inga quivī ni canandió cóo-ni soldado cájica jéhe cuánungoo nde

cuartel, te soldado cáyōsō caballo cuango de jín Pablo.

<sup>33</sup> Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de.

<sup>34</sup> Te ni cahu gobernador carta un. Te ni cajnūhún de ndé ñuu cúu Pablo, te ni jini de jeē téē ndañūū Cilicia cúu Pablo.

<sup>35</sup> Te ni cahān de:

Nde na quécōo téē cájequin cuēchi siquī rō te cuni nahín rí jnūhun cahān rō, áchí de.

Te ni cahān de jeē na quíndihyū Pablo ini palacio ndīyī Herodes.

*Jeē ni cahān Pablo jehē maá de nuū Félix*

## 24

<sup>1</sup> Te nuū uhún quivī te Ananías, sutū cujéhnū ga, ni quee de ñuu ún. Te suni ni quecoo sava téē jéhnū cándiso jniñū nuū jnáhan ñuu de hebreo jín in téē cúu abogado, nání de Tértulo. Te ni quivicoo de nuū gobernador jeē cahān de cuēchi siquī Pablo.

<sup>2</sup> Te ni cana gobernador Pablo ni quee de. Te ni quejéé Tértulo cahán de cuēchi siquī Pablo, chi suhva ni cahān de jín Félix:

Tátā gobernador, siquī jeē cúu ní tōhō jeē váha ndíchí ndácu ní jniñū, te jeē yúcuan tú na jnūhun cájejnáhan íyó, chi cáyūcu váha yó.

<sup>3</sup> Te na cútahū ná, chi táca quivī váha cúu táca núū ndácu ní jniñū jeē váha sáha ní, tátā Félix.

<sup>4</sup> Te tu cúní na snáā na cuéhē tiempo ni, te cáhán ndahú ná jín ní cuni nahín ní jecu-ni jnūhun cahān na jín ní.

<sup>5</sup> Chi ni cajini na téē yáha jéē cúu de in téē tíxín, te sáha de jeē cánacuajnáhan máá jnáhan ñuu ná hebreo ní cáhnu-ni táca lado, te cúu de téē cújéhnū nuū ñáyuu cascuáha jnūhun téē nání Jesús jeē ní jehnu ñuu Nazaret.

<sup>6</sup> Te suni je ndúcú de jeē stívī de táca jniñū ini templo iī, te ni cajni ná de. Te cácuni na sándaā na siquī de núú, nájnūhun cáhán ley ñuu ná.

<sup>7</sup> Te ni jinū-ni general Lisias, te ni quende fuerza de téē yáha núū na jínáhan ná.

<sup>8</sup> Te ni ndacu de jniñū jeē táca ná jeē cácahān na cuēchi siquī téē yáha quijicoo ná ndé nuū ní. Te vijna cuu stíchí maá ní de, te jín jnūhun cahān maá de te cuni ni jéē ni sáha de cuēchi jeē cácahān na jín ní, áchí Tértulo.

<sup>9</sup> Te suni ni cacahān téē hebreo jeē ni jinūcoo jín de jeē iyó ndáā jeē súcuan cúu cuēchi Pablo.

<sup>10</sup> Yūcuán na te ni sáha gobernador seña nuū Pablo jeē na cáhán de, te ni cahān Pablo:

Je jíní na jéē cuehē cuiyā cúu ní gobernador ñuu yáha, te jeē yúcuan nújnahan ni na jéē sándaā ni siquī ná.

<sup>11</sup> Chi máá ní cuu nanducú ní te cuni ni jéē sáá máá úxī uū quivī ni cuu jeē ni jéhēn ná ñuu Jerusalén jeē chiñúhún ná Yaā Dios.

<sup>12</sup> Te tu ní stáhān jnáhan ná jín ni in ñayuu, ni tu ní stóna ná ñáyuu ini templo ni ini vehe iī sinagoga ni ini maá ñuu.

<sup>13</sup> Ni tú na jín stéén de jeē iyó ndáā jnūhun cácahān de siquī ná.

<sup>14</sup> Te jnūhun cáhán cají ná jín ní cúu jeē chiñúhún ná Yaā Dios táca jí na, te suu cúu jeē chiñúhún ná maá Jesucristo, te máá jnūhun yáha-ni cúu jeē cácahān de jeē stívī ná. Te cándije ná táca jnūhun yósó núú tútu ley yā jín núú tútu jeē ní catee téē ni canacani jnūhun ya nde jenahán.

<sup>15</sup> Te inuú núhun ni na jín de jeē sáha Yaā Dios jeē nátecu táca ndíyī, cúu ñayuu ní casáha váha jín ñáyuu ní casáha néé.

<sup>16</sup> Te jeē yúcuan máni jeē váha ndíhvī ní na sáha ná. Súcuan te váha íyó ni anuá na jéē tú na cuēchi ndéé siquī na núū Yaā Dios ni nuū ñáyuu.

<sup>17</sup> Te ni jica cuu ná táca ñuu jicá jecu cuiyā, te sáá te ni ndee na jín xúhun jéē ní cajēhe táca ñáyuu jeē chindéé ñáhán i jnáhan ñuu na cáyūcú Jerusalén. Te suni ni ndee na jéē socó na quiti nuū Yaā Dios.

<sup>18</sup> Te íne ná ini templo siquī jeē cuchi ná ndundoo ná núū Yaā Dios te socó ná. Te jecu jnáhan ñuu ná

hebreo jeē véjicoo Asia ni cajito de sãñá ini templo, te tú na ñayuu cuehē ni cóyūcu jíin ná jeē sávaā i.

19 Te núu ni stívī ná ¿te naun tu ní quijicoo tēe Asia un návāha suni cahān de ndese ni stívī ná?

20 Chí tēe ni quecoo yāhá na cáhān maá de núu na cuēchi ni canihīn de síquī na ná ni indichi na núu junta tēe cácujuhnu ini ñuu ná.

21 ¿Te chí cájequin de cuēchi síquī na jēe ni cáhān jee ná suhva ná ni iyo ná nuū junta naún? Chí ni achi na jēe cándije ná jēe nátecu tāca ndíyī, te jeē yúcuan cájequin ni cuēchi síquī ná, ni achi na jíin de. Achí Pablo.

22 Te Félix chi je jíin vāha de ndese cácañdije ñayuu Cristo. Te jeē ní jini sōho de jnūhun yāha te ni stétu de un jíināhan, te ni cahān de:

Nde na quée general Lisias te cajnūhun gá rī síquī jniñu yāha, achí de.

23 Te ni ndacu de jniñu nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnāhan de jeē chindée ñáhán i de.

24 Te ni cuu jecu quivī, te ni quiji tucu Félix jíin ñasihí de Drusila, te ñahan hebrea cúu ña. Te ni ndacu de jniñu jeē na quíji Pablo návāha nacani de jnūhun ndese candíje yó Jesucristo.

25 Te ni cahān Pablo jíin de jeē cánuú sáha yó jniñu ndaā, te cánuú coto yó máa yó jeē ma sáha yó jniñu stívī, chí quivī sándihí te sándaā Yaā Dios jniñu ndívī ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeē núne ri te cana ri rohó quiji ró, achí de.

26 Te ñūhun ni de jeē cuāha Pablo xūhun núu de te siáá de quenda de vecāa. Jeē yúcuan tijni jíinu ni cana de Pablo ni candajnūhún de.

27 Te súcuan ni cuu uū cuiyā, te sáa te ni nucuiñī Porcio Festo nuū Félix. Te cuní Félix jeē na cúsi ni ñayuu hebreo jíin de, te jeē yúcuan ní squéndō de Pablo vecāa.

*Jeē ni índichi Pablo nuū Festo*

## 25

1 Te sáa únī quivī jeē ni quivī Festo cuu de gobernador Judea, te ni quenda de ñuu Cesarea cuahān de ñuu Jerusalén.

2 Te tāca sūtū cácujuhnu jíin tēe cácujuhnu nuū ñayuu hebreo ni jinūcoo nuū Festo, te ni cajicān cuēchi síquī Pablo.

3 Te ni cacahān ndahú jíin Festo jeē núu vāha ni de te na nátaji de Pablo ndiji ñuu Jerusalén. Súcuan ni cacahān, chí je ni casquíjnāhan jnūhun jeē cahni Pablo ichi.

4 Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea.

5 Te jeē yúcuan ní cahān de jíin táca tēe ún:

Tāca níhín jeē cándiso jniñu, na quíngoo yó nde Cesarea, te yúcuan cácañ ni cuēchi síquī de te núu íyó cuēchi de, achí de.

6 Te ni ine de yúcuan únā chí úxī-ni quivī, te ni ndee de ñuu Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo.

7 Te je cáhīn tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndúu nuū de, te ni caquejéé-ni casájñūhún téyī síquī de, te tú na jíin ní cástéén jeē iyó ndāa jnūhun cácahān.

8 Te ni cahān Pablo jehē maá de:

Tu ní sáha ná ni ñin cuēchi síquī ley ñuu na jēe cácuu ná ñayuu hebreo, ni síquī templo, ni síquī rey nación Roma, achí de.

9 Te Festo chí cuní de jeē cusī ni ñayuu hebreo jíin de, te ni cajnūhún de Pablo:

¿A tu cuní rō quinhun rō Jerusalén te yúcuan sándaā rī síquī rō? achí de.

10 Te ni cahān Pablo:

Je índichi na núu cūndaā jniñu jeē ndácu máa tēe cúu rey nación Roma, te yāha cúu nuū cánuú cūndaā jniñu ná. Máa ní je jíin vāha ni jēe tú na cuēchi ní sáha ná síquī tāca jnāhan ñuu ná hebreo.

11 Chi núu ni sáha ná ñn cuēchi xeēn jeē jíni ñúhún cuu ná, te íyó váha jeē cúu na núu súcuan. Te núu tu íyó ndáa jnūhun jeē casájnúhún téé yáha síquī ná, te ni ñn tēe ma cúu chihi de sáñá ndaha téé yáha jíjnáhan de. Núu súcuan te cúní na quihín na nuū maá rey nación Roma sándaā de síquī na, áchí de.

12 Te ni cajnúhun Festo ndese cájeni ni tēe cándiso jníñu jíin de. Yūcuán na te ni cahān de jíin Pablo:

Je ni cahān rō jeē cuní rō quihín rō nuū maá rey nación Roma sándaā de síquī rō. Núu súcuan te quihín nahín ró nuū de, áchí de.

### *Jeē ni índichi Pablo nuū rey Agripa*

13 Te ni cuu jecu quivī, te rey Agripa jíin Berenice ni jecondēhé de Festo nde ñuu Cesarea.

14 Te tijni quivī ni coyūcú de yūcuán. Te ni nacani Festo jnūhun síquī Pablo nuū rey un. Te suhva ni cahān de:

Félix jeē ní cuu de gobernador, ni stóo de ñn tēe íne vecāa yāhá.

15 Te ná ni jehēn ná ñuu Jerusalén, te sutū cácujeñnu jíin ñáyuu jéñnu cándiso jníñu nuū ñáyuu hebreo ni jinūcoo i nuū na cájequin i cuēchi síquī téé ún, te cácuni i jeē na cúu de.

16 Te ni cahān na jíin i jeē tu íyó costumbre táca tóhō Roma jeē cahni de ñn tēe súcuan-ni, chi jíni ñúhún condichi de jíin ñáyuu cájequin cuēchi síquī de, návāha cahān de jehē maá de te cundaā núu íyó cuéchi de.

17 Yūcuán na te ni quecoo tūtú i yāhá. Te inga quivī ún tu ní cúcuéé ná, chi ni cucōo na mesa nuū sándaā na síquī cuéchi, te ni ndacu ná jniñu jeē na quíji tēe ún.

18 Te cáhīn ñayuu cájequin cuēchi síquī de. Te ni jeni ni na jéé iyó cuéchi xeēn cahān de síquī tēe un núú, te tú cuítí.

19 Chi jeē cácahān de cúu máni síquī jnúhun cácañdije-ni máá de, jíin síquī ñn tēe nání Jesús jeē jé ni jihī de, te Pablo cahān ñihin de jeē ní natecu ndije tēe ún.

20 Te tu ní cújnúní cuítí ni ná ndese sándaā ná, te ni cajnúhun ná de núu

cúní de quihín de ñuu Jerusalén te yūcuán cundaā síquī de.

21 Te máá Pablo ni cahān de jeē cuní de quihín de nuū Augusto, rey yō nación Roma, te yūcuan sándaā rey cuēchi de, ni achi de. Te ni cahān na jéé na cóne de vecāa nde tají ná de quihín de nuū rey un, áchí Festo.

22 Yūcuán na te ni cahān Agripa jíin Festo:

Suni cúní maá ná cuni sōho ná jéé cahán tēe un, áchí de.

Te ni cahān Festo:

Sajnē te cuni sōho ní jéé cahán de núu súcuan, áchí de.

23 Te inga quivī un ní quecoo Agripa jíin Berenice. Te cáñūhun de sahma cújéñnu de, ni quivīcoo de ini vehe juzgado jíin táca general jíin téé cácujeñnu ini ñuu ún. Te ni ndacu Festo jniñu jeē na quíji Pablo.

24 Te ni cahān Festo:

Cáhán na jíin ní, tátā rey Agripa, jíin ndihi níhín jéé cáyūcu jíin yó yāhá vijna. Yáha cúu tēe jeē síquī de ni candonda ndivii jnáhan de hebreo ñuu Jerusalén jíin ndé ñuu Cesarea yāhá, te máni cácahān i jeē tú vāha jeē cótecu gā de.

25 Te jéni ni maá ná jéé tú na cuēchi xeēn ni sáha de jeē cúu de. Te je ni cahān de jeē cuní de quihín de nuū rey Augusto jeē sándaā rey un síquī de, te jeē yūcuan ní cahān na jéé tají ná de quihín de nuū rey un.

26 Te tu cúcáñnu ni ná na jnūhun tee ná núu tūtú quihín jíin de nuū rey yō. Jeē yūcuan ní ndacu ná jniñu ni quee de nuū yō jíjnáhan yó, te cánuú gá nuū maá ní, tátā rey Agripa. Te stíchí ni de návāha nihín na jnúhun tee ná síquī de, te quihín jnūhun un jíin de nuū rey.

27 Chi tu jéjníñu cuítí jeē tají ná ñn preso quihín te núu tú castūhun ná nuū tūtú na cuēchi ni sáha de, áchí Festo.

*Jeē ni cáhān Pablo jehē maá de nuū rey Agripa*



## 26

<sup>1</sup> Yūcuán na te ni cahān rey Agripa jín Pablo:

Vijna te jéhe ri jnūhun cahān rō jehē maá ró, achí de.

Te Pablo ni sáha de ndaha de jeē ní quejéé de cáhán de, te suhva ni cahān de:

<sup>2</sup> Tātā rey Agripa, cúsi ni ná vijna jeē cúu cahān na jín ní siquī ndihí jeē casájnúhún ñáyuu ñuu yō hebreo siquī ná.

<sup>3</sup> Chi je jíní vāha máá ní tāca jéē ní tajnúni ñayuu ñuu yō hebreo jín tāca jnūhun jeē tu cáhīn inuú i jín. Jeē yúcuán cáhán ndahú ná jín ní jeē coo paciencia ni cuni sōho ní jnūhun cahān na jín ní.

*Jeē ní cachi Pablo ndese ni sáha de nde ná tu sama ya ini de*

<sup>4</sup> Je cájini tāca jnáhan ñuu yō hebreo ndese ni sáha ná ini ñuu nuū ní cacu ná jín ini ñuu Jerusalén nde ná lulí ná.

<sup>5</sup> Te núu cácu ni maá de cahān ndaā de, te je cájini de saña jéē ndé lulí ná ni quiví ná nuū grupo fariseo, te grupo un nīhin ga cánducú ndéyí de squícu de ley yā vēsú tāca gá grupo tēe nación yō.

<sup>6</sup> Te ñúhun ni na jnūhun ni jejnūhun Yaā Dios nuū tāca jí yō jeē nastécu yā ndiyí, te máá siquī tāca jnūhun yáha-ni cúu jeē cájequin de cuēchi siquī ná.

<sup>7</sup> Chi máá yó jeē cácu yó jnáhan ndihúxi uū yucūn ñayuu Israel, cáñūhun ni yō jnūhun ni jejnūhun ya jeē nastécu yā ndiyí, te jeē yúcuán nduú ñuu cáchiñúhún yó Yaā Dios te cájejniñu yó núu yā. Te suni súcuán ñúhun ni maá ná, tātā rey Agripa, te siquī jeē nácani ná jnūhun jeē natecu ndiyí cúu jeē cájicān jnáhan ñuu yō hebreo cuēchi siquī ná.

<sup>8</sup> ¿Te chí má nastécu Yaā Dios tāca ndiyí cájeni ni ní naún?

*Jeē ní cachi Pablo ndese ni jito xeēn de ñayuu cá candíje*

<sup>9</sup> Te máá ná chi ni jeni ni na jéē jini ñúhún ndonda ná siquī ñayuu cá candíje i Jesús, Yaā ní jehnu ñuu Nazaret.

<sup>10</sup> Te súcuán ni sáha ná ini ñuu Jerusalén, chí tāca sūtū cácujeñu ni cajēhe de jnūhun jeē cóndiso jniñu ná chuhun ná cuéhē ñayuu vecāa siquī jeē cá candíje i Jesús, te íyó váha ni na núu cájehni de i.

<sup>11</sup> Te tijni jínu ni sáha ndevāha na jín i ini tācá vehe i sinagoga jeē ni sáha fuerza na i jeē na stóo i jnūhun cá candíje i. Te xeēn ni quití ni na núu i, chí nde ñuu jicá ní jehēn ná ni sáha xeēn na jín i.

*Jeē ní cachi tucu Pablo ndese ni sama ya ini de*

*(Hch. 9.1-19; 22.6-16)*

<sup>12</sup> Te sūtū cácujeñu ni cajēhe de jnūhun jeē cóndiso jniñu ná quihīn na sáha xeēn na jín ñáyuu cá candíje cáyūcú ñuu Damasco nuū.

<sup>13</sup> Te cuahān ná ichi ún, tātā rey, te caxū cúu, te ichi ándiví ní quiji in nduva ni ndindéé ndaxín núu na jín núu tēe cuango jín ná, te víhyá gā ndí vēsú niāndii.

<sup>14</sup> Te ndihí ná ní cacotúú ná nuū ñúhun. Te ni jini sōho ná in jnūhun ni cahān jín ná jín jnūhun yuhu yó hebreo: Saulo, Saulo, ¿najehe jito xeēn rō ruhū? Chi jeē sáha ró súcuán cúu nájñūhun stiquī jeē tu jéndije ti, te jéñú yatá tí xiní pulla, te súcuán stóho ti maá tí, achí.

<sup>15</sup> Yūcuán na te ni cahān ná: ¿Na nihín cúu jeē cahán, Tātā? achí ná. Te máá jito na ní cahān yā jín ná: Máá rí cúu Jesús, te jeē jito xeēn rō ñayuu cá candíje i ruhū cúu jeē jito xeēn rō ruhū.

<sup>16</sup> Ndonga condichi rō, chí vēji ri nuū rō jeē tejniñu ri rohó sáha ró jniñu cúni rí, te nacani cáj rí jnūhun tāca jéē ní jito ró vijna, jín jéē steén gā rí nuū rō tāca quiví quiji.

<sup>17</sup> Te jnama ri rohó núu tāca jnáhan ñuu rō jín núu ñáyuu tāca gá nación, chí nuū ñáyuu un táj rí rohó quihīn rō.

<sup>18</sup> Te táj rí rohó quihīn rō nuū i, chí nájñūhun nanune ró tñuú i cúu jeē steén rō jnūhun ri nuū i te jecūhun ni i. Chí ñayuu ná tu candíje i ruhū, nájñūhun cájica i nuū néé. Te jeē

candíje i ruhū, quīvi i nuū luz rī, te tuá quīhi i chīji jniñu jeē cuní jexeén jeē cúu Satanás, chí sa suhva quīhi i chīji jniñu cuní maá rí. Te tájí rí rohó quīhīn rō nuū i, návāha candíje i ruhū te cone cáhnu ni rī nuū cuéchi i. Yūcuán na te inuú níhīn tahu i jíin táca gá ñayuu jeē ni sándoo ri anuá i, áchí yá jíin ná.

*Jeē ní cachi Pablo ndese ni jetáhú de jnūhun ni cahān yā*

<sup>19</sup> Jeē yúcuán tu ní sánīhni ni na núu jnúhun ni cahān yā ichi ándiví jíin ná, tátā rey Agripa.

<sup>20</sup> Chí ni jetáhú ná, te ni nacani ná jnúhun ya xīhna gā nuū ñáyuu ñuu Damasco, te sáá te ni nacani ná jnúhun ya nuū ñáyuu ñuu Jerusalén jíin ní región Judea jíin núu ñáyuu táca gá nación. Te jnúhun ni nacani ná núu i cúu jeē na nacani ni i jeē stóo i cuéchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i.

<sup>21</sup> Te siquī jeē súcuán ni nacani ná jnúhun te ni cajni jnáhan ñuu yō hebreo sāñá ini templo, te ni cacuni i cahni i sāña núu.

<sup>22</sup> Te ni chindéé ñáhán Yáā Dios sāñá, te jeē yúcuán índichi níhīn na ndé vijna nacani cájí ná jnúhun ya nuū ñáyuu cácujeñnu jíin núu táca-ni ñayuu. Chí tu chí só gá na jnúhun siquī jnúhun jeē ní nacani Moisés jíin táca gá tēe ni canacani jnúhun Yaā Dios nde jenahán.

<sup>23</sup> Te ni cundaā jnúhun ni canacani de un jéē cánuú ndoho Cristo nde cuu yā, te xīhna gā maá yá natecu vésú táca gá ndīyi, te súcuán steén cají yá nuū ñáyuu jeē jnáma ya i, cúu ñayuu nación yō Israel jíin ñáyuu táca gá nación, áchí Pablo.

*Jeē ní nducú ndéyi Pablo scandíje de Agripa jnūhun Jesús*

<sup>24</sup> Te súcuán ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuán ní tīvi xīnī rō, áchí de.

<sup>25</sup> Te ni cahān Pablo:

Tu ní tīvi xīnī na, tátā Festo, chí sa suhva íyó cájí ndáá jnúhun cáhán na.

<sup>26</sup> Te máá rey Agripa je jíin váha de táca jniñu ní íyo jeē ní nacani ná, te tu yúhú ná cahān na táca jnúhun yáha, chí je jíin váha na jéē jíin de táca jnúhun yáha, chí tú sáhi ní cúu táca jniñu yáha.

<sup>27</sup> Tátā rey Agripa, ¿á candíje ní jnúhun jeē ní cacahān tēe ni canacani jnúhun ya nde jenahán? Jéni ni na jéē candíje ní, áchí Pablo.

<sup>28</sup> Yūcuán na te ni cahān Agripa jíin Pablo:

Va jéni ni rō jeē jíin jecu jnúhun ni cahān rō te sáha ró jeē candíje ri Cristo, achí de.

<sup>29</sup> Te ni cahān Pablo:

Vésú jíin jecu-ni jnúhun chí jíin cuéhē, te jícán tahu na jéē maá ní jíin táca gá tēe cájini sōho jnúhun cáhán na vijna, na candíje ní nájnūhun candíje máá ná, te tu cuní na jéē cónuhni ní nájnūhun núhni na.

<sup>30</sup> Te ni ndīhi ni cahān Pablo táca jnúhun yáha. Te ni ndocuñi rey jíin gobernador jíin Berenice jíin táca gá tēe cácujeñnu cáyūcu jíin de.

<sup>31</sup> Te ni cacujiyo de, te ni canda-jnúhun sín máá de:

Tú ni ñn cuéchi ní sáha tēe yáha jéē cúu de ni jeē cóne ga de vecāa.

<sup>32</sup> Te ni cahān Agripa jíin Festo:

Cuu siáá ni tēe yáha núu jeē tu ní cáhán maá de jeē quihín de nde nuū rey yō nación Roma núu, áchí de.

*Jeē ní catají de Pablo cuahān de ñuu Roma*

## 27

<sup>1</sup> Te ni cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhīn vecāa ni quīvícoo de ndaha ñn capitán naní Julio jeē quíndeca de tēe un ndé Italia. Te Julio cúu ñn jnáhan grupo soldado naní Augusto.

<sup>2</sup> Te nde ñuu Adramitio nuū cájecuñi barco ni quenda ñn barco ni quee, te ni quīvícoo ná, te quihīn barco un táca ñuu jeē yíhi chīji Asia jeē yúcu yumar. Te suni cuahān

Aristarco jíin ná, te máá de cúu tēe ñuu Tesalónica región Macedonia.

<sup>3</sup> Te ñnga quivī ni jinūcoo ná ñuu Sidón nuū cájecuñī barco. Te Julio ni cundáhú ni de Pablo, te ni jēhe de jnūhun ni jecondēhe Pablo tǎcá amigo de, te ni cachindéé ñáhán i de.

<sup>4</sup> Te ñuu yúcuán ní quenda barco cuahān jíin ná. Te siquī jeē níhin yñi tachī te tu ní cúu quihīn yohó barco, te ni tee xín barco cuahān jíin ná xiin isla Chipre, ñuhun jeē íne sñn nuū ndúte, te lado jecó barco ni quendōo Chipre.

<sup>5</sup> Te ni cayāha ná yumar Cilicia jíin Panfilia cuahān ná, te ni jinūcoo ná ñuu Mira ndañū Licia.

<sup>6</sup> Te ñuu yúcuán ní nihīn capitán ñn barco jeē véji ñuu Alejandría te quihīn ichi Italia, te ni cahān de jíin ná ni quivicoo ná barco un.

<sup>7</sup> Te cuehē quivī ni cahīn na núū ndúte jíin barco, chi cuéé ní jica, te fuerza-ni ni jinūcoo ná yuñū Gnido. Te tuá ni jēhe tachī un jnūhun quihīn yohó barco, te ni cayāha ná núū jnūhma tachī xiin ñūū Salmón jeē íne nuū isla Creta.

<sup>8</sup> Te yōhyo ni canducú ndéyí tēe cáscaca barco un, ní yāha jíin ná ní yumar xiin Creta. Te ni jinūcoo ná ñn lugar naní Buenos Puertos nuū cájecuñī barco, te yajni un íne ñuu Lasea.

<sup>9</sup> Te je ni cuu cuehē quivī ni cajica ná jíin barco. Te je yajni quejéé vico míjin, te yúcuán cúu tiempo jeē yí jica barco te sanaa te coo jnūndóho nuū mar. Te ni cahān níhin Pablo jíin de:

<sup>10</sup> Tátā jijnáhan ní, jíní na jēe yóhyo yí coo viaje yāha, te quiiji jnūndóho siquī barco, te naa barco jíin ndajñū, te nde maá yó sanaa te cuu yō, achí de.

<sup>11</sup> Te tu ní chúsóhó capitán jeē cahán Pablo, chi sa suhva jeē cahán tēe scáca barco un jíin tēe chíí barco.

<sup>12</sup> Te siquī jeē tu íyó váha lugar nuū ni jécuiñī barco un jēe cóyucú de ní vico míjin, te ni cajeni ni cuehē gā de jeē váha ga núu quendacoo de yúcuán. Chi cájeni ni de jeē núu cuu

te jinūcoo de ñuu Fenice te yúcuán coyucú de vico míjin. Chi Fenice suni íne yundúte isla Creta nuū cájecuñī barco, te ndijin ichi noroeste jíin suroeste.

*Jeē ni jécuiñī ñn tachī níhin jeē stóna ndute mar*

<sup>13</sup> Te ni jecuñī vīta táchī ichi sur, te ni cajeni ni de jeē jinú de Fenice nuú, te ni cascáca ga de barco jica jíin de xiin Creta.

<sup>14</sup> Te ni cunúu jecu gā, te ni quejéé-ni ñn tachī níhin ndasí jeē naní táchī nordeste.

<sup>15</sup> Te tuá ni cúu ga quihīn yohó barco, chi ni chundahá-ni tachī cuahān jíin, te ni casiáá-ni de jeē cascáca de, te cháha chúcuán cuahān barco jíin ndihí ná sáha tachī.

<sup>16</sup> Te ni yāha jíin ná xiin isla lulí jēe naní Clauda, nuū jnūhma tachī. Te vésú súcuán te yōhyo uhū ni cascáca ná barco lulí jeē ndiquín yatā barco cáhnu.

<sup>17</sup> Te ni casquívī ná ini barco cáhnu. Te ni casucun núu de barco cáhnu jíin yoho. Te cáyuhú de jeē quihín barco nuū yaxín ndute nuū naní Sirte te jññ nuū ñíti, te jeē yúcuán ní casnúu de sahma cóquin jeē stehí te jica barco. Te ni casiáá de jeē na quihín ndé chi chūndahá táchī.

<sup>18</sup> Te tu jécuiñī cuiti jeē yñi tachī níhin. Te ñnga quivī un ní caquejéé de cájete de ndajññu ndiso barco, návāha nduñama gā barco te ma quee chíji ndute.

<sup>19</sup> Te quivī uní ni cajēhe núu ná ndaha ni cajete ná máá ndajññu jéjññu barco.

<sup>20</sup> Te cuehē quivī tu ní cájito ná níandii ni quimí siquī jeē íin vicō, ni tu jécuiñī cuiti tachī níhin ún, te tuá cáñūhun ni na cácu ná.

<sup>21</sup> Te ni cuu quivī jeē tuá cáyeji cuiti na stāa. Te ni jecondichi Pablo sava mēhñu tēe ún, te ni cahān de:

Tátā jijnáhan ní, núu ní cájetáhú ní jnūhun jeē ni cahān ná te ma quéndacoo yó Creta nuú, te ni ma cóto yó jnūndóho yāha ni ma náā ndajññu núu.

22 Te vijna cáhán nihin na jíin ní jeē cuandeyí ni ni jíjnáhan ní, chi ni ñn ní má cúu ní, vésú naa barco.

23 Chi jeē cúni ni quiji ñn ndajéhé jeē ní tají máá Yáa Dios nuū ná. Chi máá yá cúu Jitoho ná, te jéjníñu ná nuū yā.

24 Te ndajéhé yā ún suhva ni cahān yā jíin ná: Pablo, ma yūhu ró, chi vāha-ni jinū rō nuū rey nación Roma, te jeē siquí rohó te sáha Yaā Dios jeē cácu ndihí tēe cáhīn jíin ró ini barco yāhá, áchí yá jíin ná.

25 Tātā jijnáhan ní, ma yūhu ní núu súcuan, chi máá ná cúcáhu ni na Yáa Dios jeē coo nájnūhun ni cahān ndajéhé yā jíin ná.

26 Te jinū nahín yó ñn isla, te ma jinú yachí yō nuū quíngoo yó, áchí de.

27 Te ni cuu uxī cuūn jecuáā nde jeē ní quejéé táchī, te jíca barco nuū mar Adria, te cháha chúcuan cuahān barco sáha tachī. Te máá jecuáā ún te jeē ní cuu sava ñuú te cájeni ni tēe cáscáca barco jeē jé cuacuyajni jinū barco ñuhun íchi.

28 Te ni casínga de ñn jeē cáchicuāhá de nasaa cúnu ndute, te ni cajini de jeē iyó ócō xahūn ñn metro. Te ni jica barco jecu gā te ni casínga tucu de, te ni cajini de jeē iyó ócō uxā na metro.

29 Te cáyūhú de jeē jécujnáhan barco jíin toto, te ni cajihni de cuūn cāa gancho náhnu yatā barco un, te ni cascāne de nde jehē ndúte návāha chituu te jecuiñī barco. Te yōhyo jnāá de jeē na cúndijin yachī.

30 Te tēe cáscáca barco un ní canducú de cunu de quíngoo de jíin barco lulí te cácu de nuū jnúndóho quiji siquī barco cáhnu núu. Jeē yúcuan ní casnúu de barco lulí un núu ndúte, te cásáha-ni de nájnūhun jeē snúu de inga cāa gancho ichi núu barco návāha tú cuni ñayuu jeē cácuni de cunu de quíngoo de.

31 Te ni cahān Pablo jíin capitán jíin táca soldado:

Núu tú coyūcu tēe yáha ini barco cáhnu jíin yó, te ma cácu cuiñi maá ní jijnáhan ní, áchí de.

32 Yūcuán na te soldado ni cajehnde de yoho núhni barco lulí, te ni

jneni-ni cuahān.

33 Te nuū cuácundijin te ni cahān Pablo jíin táca tēe un jéē na cáji de staā. Te suhva ni cahān de:

Vijna íyó uxī cuūn quiñī jeē cándito ní te tu cáyeji cuiñi ni stāā.

34 Te cáhán ndahú ná jíin ní jeē na cáji ni stāā, návāha nanihīn ní ní te cácu ní, chi ni ñn yó má cúu, ni ma tují cuiñi yō, achí de.

35 Te ni ndihí ni cahān de jnūhun yáha, te ni quihin de ñn staā, te mēhñu táca ñáyuu un ní nacuatáhú de nuū Yaā Dios, te ni tahú sáva de staā ún, te ni quejéé de yéji de.

36 Yūcuán na te ni candusiñī ni ndihí de, te suni ni cayeji de staā.

37 Te ndivii na jéē cáñūhun ná ini barco cúu uñ ciento uní xico xahūn ñn ná.

38 Te ni cayeji vāha ndihí ná. Yūcuán na te ni cajete de trigo cuahān nuū ndúte un, návāha na ndúñama gā barco.

### *Jeē ni quée barco chíji ndute*

39 Te nuū ní cundijin te ni cajito de ñuhun, te tu ní canacuni de ndé nuū cúu. Te ni cajito de nuū íne cuiñi ndute, te suni máá ññti cúu, te cájeni ni de jinū de yúcuan jíin barco núu na cúu núu.

40 Te ni cajehnde de yoho núhni cāa gancho yúcuan, te ni caquendōo cāa un núu mar. Te ni canandají de yujnu jeē scotú chíi barco, te ni nacata caa de sahma cóquin ichi núu návāha chundahá táchī barco, te ni quejéé caca quihīn jíin de ichi núu iyó ññti.

41 Te ni jinū barco nuú níhin náquijnáhan ndute. Te ni quée barco nuū ññti ñūhun chíji ndute, te ni jññ-ni ichi núu te tuá ni jíca cuiñi, te yatā barco un ní cahya-ni jeē níhin ni cani suhmā ndute mar.

42 Yūcuán na te ni candajnūhún soldado jeē cáhni de táca preso návāha ma súde i te cunu i quíngoo i.

43 Te cúni capitán un jéē cácu Pablo, te ni jesicoo de. Chi sa ni cahān de núu ndé ñáyuu jiní suté te xīhna gā i na núngoo i suté i nuū ndúte, te na quénda-ni i quihīn i nuū ñūhun íchi.

<sup>44</sup> Te suni súcuan na quécoco ndihi i quihín i, sava i coso candá i jíin yujnu cúnu te sava ga i jíin pedazo yujnu barco. Te súcuan ní cacācu ndihi ná ní jinūcoo ná ñuhun íchi.

### *Jeē ni íne Pablo isla Malta*

## 28

<sup>1</sup> Te nuū ní cacācu ná te ñayuu cáyūcu yúcuan ní cacachi i nuū na jéē isla un nání Malta.

<sup>2</sup> Te ñayuu un ní cacundáhú ni i sãña jíinánhan ná, te ni cascáyú i ñin ñuhūn cáhnu, te ni cacahān i jíin ná jeē nasaā ná, chi mǐjin sáha jeē cúun saū.

<sup>3</sup> Te ni stutú Pablo jecu tujnu íchi. Te jeē jnāā de tujnu un núū ñuhún te ñin coō xeén jínu tí ni quenda tí tujnu un jéē ní cujihní, te ni chiyuhú-ni tí ndaha de.

<sup>4</sup> Te ñayuu cáyūcu yúcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndiyí núu súcuan, te vēsú je ni cācu de nuū mar, te máá yāā sándaā jniñu ñayuu tu jéhe ga yā jnūhun jeē cótecu de, áchí i.

<sup>5</sup> Te ni caja Pablo ndaha de, te ni ñinga coō un núū ñuhún, te tú na vé ni ndóho de.

<sup>6</sup> Te cándētu tāca ñáyuu jeē chūhun i cuiñi de chí cotúú-ni de te cuu de. Te ni cunahán téyí cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñin yaā cúu Pablo.

<sup>7</sup> Te yajni yūcuan íyó ñuhun tēe cújéhnu ga Malta un, nání de Publio. Te ni cana tēe un sãña jíinánhan ná, te ni jéhe núu de vehe de ni coyūcu ná jíin de uní quiví, te ni jito yúcún de sãñá.

<sup>8</sup> Te tátá Publio cáa de, chi ndóho de cuehyí quíji jíin cuehyí niñi. Te ni jecondēhe Pablo tēe ún, te ni jicān tahu de te ni soó de ndaha de siquí tēe ún, te ni nduvāha-ni de.

<sup>9</sup> Yūcuán na te ni quijicoo ndihi ga ñayuu cácuñu yūcuán, te suni súcuan ni canduvāha-ni i.

<sup>10</sup> Te ñayuu un ní cajéhe i cuehē ndajniñu ni cacutahū ná. Te nuū ni jíinū

quiví jeē quíngoo tucu ná jíin barco, te ni cajéhe i tācá ndajniñu cuu ná ichi.

### *Jeē ni jíinū Pablo ñuu Roma*

<sup>11</sup> Te uní yoō ni coyūcu ná Malta. Te ñin barco jeē véji ñuu Alejandría ni ine Malta ní vico mǐjin, te ichi núu barco un ndéé uū figura ídolo ñuu de nání Cástor jíin Pólux. Te ni quivícoo ná barco un cuángoo ná.

<sup>12</sup> Te ni jinūcoo ná ñuu Siracusa, te yūcuan ní coyūcu ná uní quiví.

<sup>13</sup> Te ni quenda barco cuahān jíin ná nduu nduu yundúte, te ni jinūcoo ná ñuu Regio. Te ñinga quiví ún vāha ni quíji tachí ichi sur, te ni quendacoo ná ñuu Regio, te uū quiví te ni jinūcoo ná ñuu Puteoli.

<sup>14</sup> Te yūcuan ní caquijnánhan ná jíin jecu hermano cácanđije, te ni cacana de sãña ní coyūcu ná jíin de ñin semana. Yūcuán na te ni quendacoo ná jéē quihín ná ñuu Roma.

<sup>15</sup> Te hermano cáyūcú ini ñuu Roma, je ni canihín de jnūhun jeē jinúcoo ná, te ni quendacoo de, te sava de ni caquijnahan de sãña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíinánhan de, te ni nacuatáhú de nuū Yaā Dios, te ni ndundeyí ni de.

<sup>16</sup> Te sáa te ni jinūcoo ná ini ñuu Roma, te capitán ni squíví de tāca preso ndaha tēe cújéhnu nuū tācá soldado ñuu Roma. Te ni cajéhe de jnūhun jeē cone sǐin Pablo te condito ñin soldado de.

### *Jeē ní nacani Pablo jnūhun ya ini ñuu Roma*

<sup>17</sup> Te nuū uní quiví te ni cana Pablo tāca tēe cácuñehnu nuū jnánhan ñuu de hebreo cáyūcú ini ñuu Roma. Te ni cacutútú de, te ni cahān Pablo jíin de:

Tátā jijnánhan ní, tú cuítí na vé ni sáha ná síquí jnánhan yó hebreo ni síquí tācá jniñu ní catajnúní jíi yō. Te vēsú súcuan te ni cajniñi i sãña ndé ñuu Jerusalén ni casquíví i sãñá ndaha tēe ñuu Roma jijnánhan de.

<sup>18</sup> Te tēe ñuu Roma jeē cácuñehnu cáyūcú Cesarea ni castíchí de sãñá,

te cáculi de siáá de sãña núú, chi ni cajini de jeē tú na cuēchi ná jēē cúu ná.

<sup>19</sup> Te jnáhan ñuu yō hebreo tu ní cájehe de jnúhun. Jeē yúcuan ní cahán na jēē quiji ná núu maá rey kujéhu ga nde ñuu Roma yáha te sándaá maá de siquī ná. Te tú vēji ná jēē cáquin na cuēchi siquī ñayuu nación yō.

<sup>20</sup> Jeē yúcuan ní cana ná níhín jíjnáhan ní, návaha cuni na táca ní te ndajnúhun yó. Chi yóhó ñayuu Israel cáñuhun ni yō jeē nátecu ndīyi, te suu jnúhun un nácani ná, te jeē yúcuan cúu jeē nuhní na jíin cadena yáha, áchí de.

<sup>21</sup> Te ni cacahán tēe un jíin Pablo:

Tú ni ñn carta ni cátaji ñayuu cáyúcú Judea nuū na jēē cástúhun de jnúhun ní, te táca jnáhan yó Judea jeē ní qui-jicoo yáha, tú ni ñn jnúhun néé ní cacahán de siquī ní.

<sup>22</sup> Te cánujnahan ni ná cuni sōho ná ndese cúu jnúhun jeē cahán ni, chi je cájini na jēē táca-ni lado cacahán ñayuu contra siquī jnúhun jeé jēē steén ni, áchí de.

<sup>23</sup> Te ni cajeni de ñn quivī, te ni qui-jicoo cuehē de vehe nuū néne Pablo. Te ni nacani de jnúhun ndese ndácu Yaā Dios jniñu, te ni steén cají de jnúhun nde jenéhen te nde ni ini. Te súcuan ni nducú ndéyi de scándíje de táca tēe un jnúhun Jesús, te ni steén de jeē suni súcuan cáhán ley jeē ni jéhe ya nuū Moisés jíin jnúhun jeē ní catee tēe ni canacani jnúhun Yaā Dios nde jenahán.

<sup>24</sup> Te ni cacandíje sava de jnúhun ni cahán Pablo, te sava ga de tu ní cájetáhú de.

<sup>25</sup> Chi tú ñnuú cáhīyo ni de. Te sáá cánducú de quingoo de te ni cahán Pablo:

Ndaā cahán jnúhun jeē ni cahán Isaías, tēe ni nacani jnúhun Yaā Dios nde jenahán, chi suhva ni cahán de jíin táca jíi yō ni sáha Espíritu Santo:

<sup>26</sup> Ni cahán Yaā Dios:  
Cuáhán núu jnáhan ñuu rō yáha te cahán rō jíin i:

Vēsú cuni nahín váha ró te ma jécúhun ni rō,

te vēsú coto vāha ró te ma cúni rō.

<sup>27</sup> Chi yōhyo níhni ni rō,

chi tu cáculi rō cuatáhú ró.

Te yōhyo uhū cájini sōho ró,

chi tu cánujnahan ni rō cuni sōho ró jnúhun ri.

Te nájnúhun cájesi rō tinūu ró

cúu jeē tu cáculi rō nanducú ró ndese cúu,

te tu cáculi rō jeē násāma ini rō

návaha nasávaha ri anuá rō nuū cuēchi ró, ní achi Yaā Dios.

Achí tutu.

<sup>28</sup> Núu súcuan te na cástúhun ná nuū ni jēē jnúhun ni táji Yáa Dios jeē jnáma ya yohó, nde vijna te táji yá jnúhun yáha quíhín nuū ñayuu táca nación jeē tu cájini i jnúhun ya, te máa i chi cuni sōho i, áchí de.

<sup>29</sup> Te ni jínu ni cahán de jnúhun yáha, te cuangoo jnáhan de hebreo, te yōhyo ni cacahán de siquī jnúhun yáha jíjnáhan de.

<sup>30</sup> Te ni condee Pablo uū cuiyā vehe jeē ní quihin núu de ún. Te ni cusī ni de cahán de jíin táca ñayuu ní qui-jicoo nuū de.

<sup>31</sup> Te jéhu-ni ni nacani de jnúhun ndese ndácu Yaā Dios jniñu, te ni steén de jnúhun máa Jítoho yō Jesucristo, te tú ni ñn ní jési jeē nacani de jnúhun.

## CARTA JEE NI TEE SAN PABLO APOSTOL NUU ÑAYUU ÑUU ROMA

<sup>1</sup> Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

<sup>2</sup> Te jnūhun un ní jejnūhun ya nde jenahán ndasí, te yósó núu tútu iī jeē ní catee tēe ni canacani jnūhun ya.

<sup>3</sup> Te jnūhun un cáhán siquī Jítoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David.

<sup>4</sup> Te ni natecu yā mēhñu ndíyí ni sáha Espíritu iī, te súcuan ni steén Yaā Dios jeē cúu ya Sēhe ya jeē ndíso poder.

<sup>5</sup> Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, návāha coo ñayuu táca nación jeē candíje i jeē sáha ya jehē i, te cuatáhú i nuū yā.

<sup>6</sup> Te suni máá ró jijnáhan ró, suni ni cana ya rohó ní quívicoo ró ndaha Jesucristo.

<sup>7</sup> Te tēe ri carta yáha cuajeē nuū rohó ñayuu ñuu Roma. Chi ni cundáhú ni Yaā Dios rohó, te ni cana ya rohó jéē coo ndoo coo iī rō nuū yā. Te ñūhun ni rī jeē maá Tátá yō Yaā Dios jíin Jítoho yō Jesucristo sáha ga yā jeē váha rōhó, te sáha ya jeē coo ndeyí coo sī ni rō.

### *Jeē cuní Pablo quihñ de ñuu Roma*

<sup>8</sup> Te xīhna gā cástūhun rí nuū rō jeē nácuatáhú rí nuū Yaā Dios jeē siquī rohó jijnáhan ró, chi ni sáha Jesucristo jeē váha rōhó. Chi ní ñáyívi jíté núu jnūhun cuahān ndese vāha cácandíje ró yá.

<sup>9</sup> Te máá Yaā Dios jiní yā jeē niní jícán tahú rī jehē rō jijnáhan ró nuū jícán tahú rī. Chi yōhyo ndíhví ni rī jejníñu ri nuū yā jeē nácani ri jnūhun Sēhe ya.

<sup>10</sup> Te niní jícán tahú rī nuū yā jeē núu cúni yā te nde vijna te cuu jecondēhe rí rohó.

<sup>11</sup> Chi cúu ni rī coto ri nuū rō jijnáhan ró, te stéén gā rī jnūhun ya nuū rō, návāha quendōo vāha ga anuá rō te cuiñi níhin ga rō jíin.

<sup>12</sup> Súcuan cúni rī návāha sáha yó jéē inuú coo ndeyí ni yō jijnáhan yó siquī jeē inuú cácandíje yó yá.

<sup>13</sup> Hermano jijnáhan ró, cúni rī jeē na jécūhun ni rō jeē tíjni jínu ni cuu ni rī jecondēhe rí rohó, te nde vijna ná tu cuu. Chi cúni rī scuité núu ga rī jnūhun ya mēhñu ró, nájñūhun ni sáha ri mēhñu ñayuu táca gá nación.

<sup>14</sup> Chi cúu ri tēe táu siquī jnúhun ya, chí táu rī nacuāha ri jnūhun ya nuū ndíhi ñayuu, cúu ñayuu jiní gā siquī ndíhi jeē iyó ñáyívi jíin jéē tu jíni cuiti, cúu ñayuu tūhva jíin jéē tú tūhva.

<sup>15</sup> Jeē yúcuan cúu jeē ndíhví ni rī jeē suni nuū rohó ñayuu ñuu Roma nacani ri jnūhun jnáma ya yohó.

### *Jeē ndíso jnūhun vāha ya poder*

<sup>16</sup> Chi tu cúcanu rī siquī jnúhun vāha ya, chí yúcuan cúu poder Yaā Dios jeē jnáma ya táca ñayuu cácandíje, xīhna gā ñayuu hebreo te suni táca gá ñayuu.

<sup>17</sup> Chi jnūhun vāha ya un stéén nuū yō jeē ndáhva Yaā Dios cuēchi yó siquī jeē candíje yó jéē sáha ya jehē yō, te máá jéē candíje yó ní cuahān yō. Chi súcuan cáhán nuū tútu iī: Ñayuu jeē ní ndahva yā cuēchi i, técu i jeē candíje i jeē sáha ya jehē i, áchí.

### *Siquī jeē iyó ndasí cuēchi ñayuu*

<sup>18</sup> Chi jíni vāha yó jéē Yaā Dios andiví, cuāha ya castigo xeēn nuū táca ñayuu tu cácandíje te máni cuēchi cásáha. Chi jíin jniñu néé cásáha i te cájesi i nuū jnúhun ndaā.

<sup>19</sup> Te ma cúu cahān i jeē tu jécūhun ni i siquī ndese Yaā cúu Yaā Dios, chí máá yá ni steén nuū i.

<sup>20</sup> Chi jíin táca jeē ni sáha ya te cúu jécūhun ni ñayuu ndese Yaā cúu máá Yaā tu jíto i nuū. Chi nde ni jecōo ñáyívi jíin ndé vijna te cúu jécūhun vāha ni i jeē maá yá cúu Yaā Dios te

íyó poder yā ní cáni. Te jeē yúcuan má cúu cuiṭi cahān i jeē tu jíni i jeē iyó yá.

<sup>21</sup> Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cāhá ni, chi ni candunéé í i, te ni quendōo nee ini anuá i.

<sup>22</sup> Cácahān i jeē ndichí i, te sa suhva cáacunéé i.

<sup>23</sup> Chi ni castóo i Yaā Dios jeē yóhoyo luu cújéhnú, jeē ma cúu cuiṭi. Te ni cajetáhú i tācá imagen jeē casáha i, jeē cáa nájnūhun tēe cájihī, te suni nde imagen saa jíni cóo jíni quiṭi cájica ndicúún ndaha.

<sup>24</sup> Te jeē yúcuan ní siaá Yaā Dios i jeē na sáha i tācá jniñu jnéhén jniñu néé jéé cuní i. Te casáha i jniñu néé jíni jnáhan i jeē cúu máa jnúhun canu.

<sup>25</sup> Chi tu ní cácanđije i jnúhun ndaā Yaā Dios, chi sa ní cacandíje i jnúhun stáhú. Te cáhīyo yíñúhún i te cáchiñúhún i nuū tāca jéé ni sáha ya, lugar jeē chiñúhún i máa Yaā ni sáha ún, Yaā jeē cánuú cahān yō jeē cujéhnú ya ní cáni. Amén.

<sup>26</sup> Jeē yúcuan ní siaá Yaā Dios i jeē na sáha i tācá jniñu néé jéé cándiyo ni i jeē cúu máa jnúhun canu. Chi nde ñahan ni casama ña modo sihí, te ni quiṭi ña jíni modo neé.

<sup>27</sup> Te suni súcuan tēe ni casiáa de modo chíjniñu jíni ñahan. Te nde ni nduquiṭi de ni casáha ndiyī de jíni jnáhan yí de, te tēe jíni tēe ni casáha de jniñu jnúhun canu. Te cándoho de castigo siquī jniñu néé ní casáha de.

<sup>28</sup> Te jeē tu ní cácani i cuajnúhún i Yaā Dios, jeē yúcuan ní siaá yā i jeē na cáni néé ni i, te sáha i tācá jniñu jeē tu íyó váha.

<sup>29</sup> Te máni máa na jniñu jeē tu íyó ndāa cándihvī ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cáccuésún ni, cájehni ndīyi, cájejnáhan, cástáhú, cáshuhū jnáhan, cásjnúhún siquī jnáhan.

<sup>30</sup> Cácahān jnúhun néé siquī jnáhan, cájito uhū Yaā Dios, cáccujéé ni, cáсандúxí máa, cástéyí máa, cájequin

costumbre neé, tu cájendetū nuū tatá nuū naná.

<sup>31</sup> Te tu cájecūhun cuiṭi ni, tu squícu jnúhun jéjnūhun, tu íyó máni jíni jnáhan, tu íne cáhnú ni nuū jnáhan, tu cúndáhú ni jnáhan.

<sup>32</sup> Te je cájini vāha i jeē ni sándaā Yaā Dios jeē ñayuu casáha súcuan, cánuú jnahnū ndetū i. Te vēsú súcuan cájini i, te níni casáha i jniñu néé un, te suni cánujnahan ni i jeē casáha jnáhan i súcuan.

### *Ndaā sándaā Yaā Dios siquī cuéchi*

## 2

<sup>1</sup> Núu súcuan te rōhó jéé cahán cuéchi siquī jnáhan, núu na-ni ñayuu cúu ró, ma cúu cahān rō jeē tú na cuéchi máa ró. Chi jeē cahán rō cuéchi siquī jnáhan ró cúu jeē ndénehen ró cuéchi siquī maá ró. Chi rōhó jéé cahán cuéchi, suni súcuan sáha máa ró cuéchi.

<sup>2</sup> Chi jíni yō jeē Yaā Dios, ndaā sáha ya jeē ndóna ya siquī cuéchi ñayuu casáha súcuan.

<sup>3</sup> Te rōhó jéé cahán cuéchi siquī ñayuu casáha cuéchi, te suni súcuan sáha máa ró, ¿te á jéni ni rō jeé cácu máa ró quiṭi ndóna Yaā Dios siquī cuéchi, chí naún?

<sup>4</sup> ¿A cújéé ni rō nuū jnúhun jeē yóhoyo vāha ni Yaā Dios jíni ró, jíni jéé iyó paciencia yā jeē tú yachī cuāha ya castigo nuū rō? ¿Te á tu jécūhun ni rō jeē jnúhun jeē yóhoyo vāha ni yā sáha jeē nácani ni rō siquī cuéchi ró?

<sup>5</sup> Chi níni ni rō te tu nácani ni rō siquī cuéchi ró. Te jeē yúcuan cáyā gā rō castigo siquī rō quiṭi sáha Yaā Dios juicio, máa quiṭi jeē cóo ndijin jeē ndaā sándaā yā siquī cuéchi.

<sup>6</sup> Chi chunaa yā nuū ná ñn ná ñn ñayuu núu ndese jniñu ni casáha i.

<sup>7</sup> Te ñayuu jeē tu jécuiñī i jeē sáha i jniñu váha, cuāha ya jnúhun jeé cótecu i ní cáni. Chi ndúcú i quiṭi i nuū ndujéhnú yíñúhún i, nuū ní cáni cotecu i.

<sup>8</sup> Te quiṭi ni yā te cuāha ya castigo nuū ñayuu cujéé ni nuū yā, te



cúniñni ni nuū jnúhun ndaā, chi sa nuū jnúhun yacuá yóho jetáhú i.

<sup>9</sup> Te tāca ñayuu casáha jniñu néé, chi nihīn i jnūndóho xeēn te cucuíhyá ndasí ni i, xīhna gā ñayuu hebreo te suni súcuan ñayuu tāca gá nación.

<sup>10</sup> Te sa suhva tāca ñayuu casáha jniñu váha, chi quivī i nuū ndujéhu yíñúhún i, te coo ndeyí coo sīi ni i, xīhna gā ñayuu hebreo te suni súcuan ñayuu tāca gá nación.

<sup>11</sup> Chi Yaā Dios tu sáha ya cuenta ndese cúu ñn ñn ñayuu, chi inuú sáha ya jíin i.

<sup>12</sup> Chi tāca ñayuu jeē casáha cuēchi, vēsú tu cáyihī i chíji ley jeē ni jéhe ya nuū Moisés, te tu níni ley un te jnahnū ndetū i. Te tāca ñayuu cáyihī chíji ley Moisés te casáha cuēchi, jíin ley un sándaā yā cuēchi i.

<sup>13</sup> Chi tu ndáhva Yaā Dios cuēchi ñayuu jeē maá jéé cúni nahín-ni i jnúhun cáhán ley yā. Chi sa suhva ñayuu squícu jeē cahán ley yā cúu jeē ndáhva yā cuēchi i.

<sup>14</sup> Chi ñayuu tācá nación jeē tu cánevāha tutu ley jeē ni jéhe ya nuū ñayuu hebreo, te núu cásquícu máa i ley yā, suu cúu jeē cánevāha i ley yā ini anuá i, vēsú tu cánevāha i tutu ley un.

<sup>15</sup> Te súcuan cástéén i jeē jnúhun ndácu ley un chí ñúhun ini anuá i. Te tāca jéé cájeni ni i jíin ánuá i, suu cúu jeē steén nuū i síquī núu ni sáha i cuēchi chí váha ni sáha i.

<sup>16</sup> Te súcuan coo máa quivī jeē jíin Jesucristo sándaā Yaā Dios síquī tāca jéé tu íyó váha jeē ní cajeni sáhí ni tāca ñayuu. Súcuan cáhán jnúhun vāha ya jeē nácani rí.

### *Siquí jeē tu cásquícu ñayuu hebreo ley Moisés*

<sup>17</sup> Te róhó cácahān rō jeē téé hebreo cácuu rō, te cátenuū rō maá ley Moisés, te cácutéyí rō jeē síquī Yaā Dios.

<sup>18</sup> Te cájeni ni rō jeē jiní rō ndese núnjahan ni yā, jíin jéé cúu nácāji vāha rō ndé-ni cúu jniñu váha, chí ni cacutúhva rō ley un.

<sup>19</sup> Te cájeni ni rō jeē maá rō cácuu téé steén ichí Yaā Dios nuū ñayuu tu cájini

cuiti, jíin jéé cúu sáha rō jéé cúndijin ini anuá ñayuu cájica nájñuhun nuū néé.

<sup>20</sup> Te cájeni ni rō jeē cúu steén rō nuū ñayuu tú tūhva jnúhun ya, jíin jéé maá rō cácuu maestro nuū ñayuu tu jécūhun ni. Chi jíin tutu ley yā te cájini rō ndese cúu jnúhun ndíchí jnúhun ndaā, cájeni ni rō.

<sup>21</sup> Núu súcuan te máá rō jeē castéén nuū ñayuu, ¿te naun tu cástéén rō nuū maá rō? Te máá rō jeē cácahān jeē ma sácúíhná i, ¿te naun cásácúíhná máa rō?

<sup>22</sup> Te máá rō jeē cácahān jeē ma cósiquí ndéé i, ¿te naun cásiquí ndéé maá rō? Te máá rō jeē cácahān jeē cácuquini ni rō ídolo, ¿te naun cásácúíhná rō ndajniñu jeē yúcu ini vehe ídolo?

<sup>23</sup> Te cácutéyí rō jíin ley Yaā Dios, te vēsú súcuan te casáha rō jéé cácahān ñayuu síquī yā, chí tu cásquícu máa rō jnúhun ndácu ley yā ún.

<sup>24</sup> Chi súcuan yósó núu tútu íi: Ñayuu tāca gá nación, máni cácahān ndevāha i síquī Yaā Dios, jeē síquí cuéchi róhó ñayuu hebreo.

<sup>25</sup> Te núu cásquícu rō ley Moisés, yūcuán na te níhín jniñu ndije jeē ní canihīn rō jnunī circuncidar. Te núu tu cásquícu rō ley un, te vēsú ni cuu rō circuncidar, te nájñuhun jeē tu ní cúu rō.

<sup>26</sup> Te tēe tācá nación, núu cásquícu de jniñu ndácu ley un, vēsú tu ní canihīn de jnunī circuncidar, núu súcuan te nájñuhun ni canihīn de jnunī circuncidar.

<sup>27</sup> Te tēe jeē tu ní cúu circuncidar yiquí cúñu de, te cásquícu de ley yā, máa de cahān cuēchi síquī rō. Chi tu cásquícu rō, vēsú cánevāha rō tutu ley un, te ni cuu rō circuncidar.

<sup>28</sup> Chi nasūu jéé cáa ichi síquí ñn tēe sáha jeē cúu ndije de tēe hebreo. Te ni nasūu jéé cúu circuncidar yiquí cúñu ñn tēe sáha jeē cúu de tēe ndaā.

<sup>29</sup> Chi sa suhva tēe cúu hebreo ndije, cúu jeē ini anuá de ñúhun jnúhun ndaā. Te tēe cúu circuncidar ndije, chí nde jíin ini jíin ánuá de sáha de jniñu ndaā te nasūu jéé ndíso de

jnunī circuncidar jeē cahán ley un cúu. Tēe cándāa súcuan, nasūu ñáyuu cájejnúhún i de, chi máá Yaā Dios.

### 3

<sup>1</sup> ¿Núu súcuan te na vé iyó gá nuū ñáyuu hebreo jeē quéndōo vāha ga i? ¿Te ndé níhín jníñu jeē casáha i circuncidar?

<sup>2</sup> Vāha ndasí níhín jníñu. Xīhna gā nihín jníñu jeē ni jéhe Yaā Dios jnūhun ya nuū maá i.

<sup>3</sup> Te vēsú sava i tu ní cá candíje, ¿te á suu sáha jeē ma squícu ga Yaā Dios jnūhun ni jejnūhun ya, chí naún?

<sup>4</sup> Tú cuíti jeē súcuan, chi vēsú núu ndíhi ñayuu castáhú i, te Yaā Dios chi iyó ndáa yā. Chi suhva yósó nuū tútu i jeē ni cáhán ñn tēe jíin yá:

Cahán ñayuu jeē iyó ndáa ni jíin táca jnúhun cáhán ni,  
te cuni i jeē iyó ndáa ní vēsú núu cácahán i síquī ní.

Achí tutu.

<sup>5</sup> Te cácahán sava ñayuu jeē iyó vāha jeē sáha yó cuéchi, chí cuéchi yó jéjníñu stéén jeē iyó ndáa Yaā Dios. Núu súcuan ¿te á cuu cahán yō jeē tú vāha sáha Yaā Dios jeē jéhe ya castigo núu jéjníñu cuéchi yó súcuan? (Va cáhán-ni nde ri nájnūhun cácahán ñayuu ñayíví.)

<sup>6</sup> Tú cuíti jeē súcuan. Chi núu jeē tú vāha sáha Yaā Dios, ¿te ndese cuu sándaā yā cuéchi ñayuu ñayíví?

<sup>7</sup> Te núu jnūhun stáhú cácahán ñayuu jéjníñu stéén jeē yóhō cújéhu Yaā Dios síquī jeē máni cáhán ndaā yā, ¿te á cuu cahán yō jeē tú vāha jeē cahán yā jeē cuéchi cúu jeē castáhú i?

<sup>8</sup> Tuú, chí núu jeē súcuan cúu, te cuu cahán yō jeē vetū-ni sáha yó jéē neé návāha quee jeē vāha núu. Te sava ñayuu cácahán ndevāha i síquī rī jeē súcuan cástéén rī, te tú ndaā. Ñayuu ún chí iyó vāha jeē ndénehen ya cuéchi síquī i.

#### *Ndivii yō iyó cuéchi*

<sup>9</sup> Núu súcuan ¿te á vāha ga ñayuu cácuu yóhō ñáyuu hebreo vēsú inga ñayuu naún? Tú cuíti jeē súcuan. Chí je

ni cacahán yō jeē vēsú ñayuu hebreo chí ñáyuu táca gá nación, ndivii yō yíhi chíji cuéchi.

<sup>10</sup> Chi suhva cáhán tutu i: Tú cuíti na ñayuu ndaā iyó, ni ñn i.

<sup>11</sup> Te tú cuíti ñayuu jécūhun ni iyó, te tú ni ñn i nánducú i Yaā Dios.

<sup>12</sup> Ndíhi i ni cascuíta i jnūhun ya, te ñnuú-ni ni castívī ndíhi i máá i. Te tú cuíti ñayuu sáha jníñu vāha íyó, ni ñn i.

<sup>13</sup> Yaū sucūn i cúu nájnūhun yaū ndíyī jeē núne,

chí máni jnūhun stáhú cácahán i.

Te nájnūhun veneno coō yíhi yuhu i,

<sup>14</sup> chí máni máá jnúhun ndevāha jnūhun uvuā cácahán i.

<sup>15</sup> Te yóhō ñama jehē i jeē cáhni i ndíyī.

<sup>16</sup> Te ndé-ni cúu-ni nuū cájica i te squívī i jnūndóho jeē jnahnú ndetū ñayuu.

<sup>17</sup> Te tu cájica cuíti i jíin jnúhun coyūcu mánī i,

<sup>18</sup> te ni tu canacani ni i jeē cónso íyo i nuū Yaā Dios.

Achí tutu.

<sup>19</sup> Te jíin yō jeē táca jnúhun cáhán ley jenahán, chí cáhán nuū ñáyuu yíhi chíji ley un, návāha ndíhi i ma cúu cahán i jehē i. Chi ndenehen Yaā Dios cuéchi síquī i nde jíin ñáyuu ní ñayíví.

<sup>20</sup> Chi tú ni ñn ñayuu quendōo ndaā i nuū yā jeē nducú i squícu i jníñu ndácu ley un. Chi ley un jéjníñu máni návāha cuni yō jeē iyó cuéchi yó.

#### *Jeē jnáma ya yohó síquī jeē candíje yó jéē sáha ya jehē yō*

<sup>21</sup> Te vijna te je cájini vāha yó ndese ndáhva Yaā Dios cuéchi yó. Te nasūu ley un sáha jeē quéndōo ndaā yō, vēsú maá tutu ley jíin tēe ni canacani jnūhun ya, ni cacahán ndese ndáhva yā cuéchi ñayuu.

<sup>22</sup> Chi táca ñáyuu jeē cá candíje i jeē ni jíhī Jesucristo jeē chúnaa yā cuéchi i, chí ndahva Yaā Dios cuéchi i síquī jeē súcuan cá candíje i. Chí ñnuú-ni cúu táca ndíhi ñayuu.

<sup>23</sup> Chí ndíhi yó ni casáha cuéchi, te jeē yúcuan tu ní cúu quendōo ndaā yō nuū Yaā Dios.

24 Te siquī jeē yóhyo vāha ni Yaā Dios, jeē yúcuan ndáhva yā cuēchi yó súcuan-ni. Chi siquī jeē ni jīhī Cristo Jesús cúu jeē jnāma ya yohó.

25 Chi Yaā Dios ni jeni ya Cristo návāha socō yā maá yá chunaa yā cuēchi yó jéē ni jīhī yā. Te jnāma ya yohó núu súcuan cándije yó. Te súcuan ni sáha Yaā Dios návāha stéén yā jeē Yaā ndaā cúu ya. Chi ichi yátá ni iyo paciencia yā, te tu ní chíhi ya cuenta cuēchi ñayuu.

26 Te tiempo yáha stéén yā jeē Yaā ndaā cúu ya, chi ndaā sáha ya jeē squéndōo ndaā yā ñayuu candíje vésú iyó cuéchi i, chi cáncandíje i jeē ní chunaa Jesús cuéchi i ni ndahva yā.

27 Núu súcuan ¿te á cuu cutéyí gá yō siquī maá yó? Ma cúu cuítí, chi ma cúu cutéyí yó cani ni yō jeē vāha squícu yó ley yā. Chi jnāma ya yohó máá siquī jeē candíje yó jéē sáha ya jehē yō.

28 Núu súcuan te je jíní yō jeē ndáhva Yaā Dios cuēchi yó siquī jeē súcuan cándije yó, te nasūu jéē nducú yó squícu yó jéē ndácu ley.

29 ¿Te á núu maá-ni ñayuu hebreo cúu ya Yaā Dios, chí naún? Tuú, chi suni cúu ya Yaā Dios jeē jnāma ñayuu tāca gá nación.

30 Chi ñn-ni Yaā Dios iyó, te ndáhva yā cuēchi ñayuu cáncandíje jeē ni sáha ya jehē i, cúu ñayuu ndíso jnunī circuncidar, cúu ñayuu jeē tuú.

31 Te jeē candíje yó jéē jnāma ya yohó, ¿á sáha jeē tuá jíní ñúhún squícu yó ley yā, chí naún? Tú cuítí, chi sa suhva sáha jeē vāha ga cuu squícu yó ley yā.

#### *Abraham cúu ñn ejemplo nuū yō*

### 4

1 Núu súcuan ¿te ndese cahān yō siquī tāca jéē ní cuu jín jí yō Abraham? ¿Ndese ni ndahvā cuēchi de?

2 Nasūu jéē ni sáha máá de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyí de jeē vāha ni sáha de. Te tu ní cutéyí de, chi nasūu siquī jeē ni sáha máá de cúu jeē ní ndahva Yaā Dios cuēchi de.

3 ¿Chi ndese cáhán tutu i? Cáhán jeē ní candíje Abraham jeē sáha ya jeē ni jéjnūhun ya nuū de, te jeē yúcuan ní ndahva yā cuēchi de.

4 Te ñn ñayuu sájniñu, te yāhu i chi nasūu jéē cútahū i cúu, chi jeē chúnaa yō nuū i cúu.

5 Te jeē jnāma Yaā Dios ñayuu, chi jeē cútahū i cúu. Chi vésú tu cúu squícu i tācá jniñu vāha, te núu candíje i jeē jnāma ya i nuū cuéchi i, yūcuán na te ndahva yā cuēchi i.

6 Te David suni ni cahān de ndese yóhyo ndetū ñayuu jeē ndáhva Yaā Dios cuēchi i, vésú tu cúu sáha i ni ñn jniñu jeē quéndōo ndaā i nuū yā.

7 Chi ni cahān de: Nacā ndetū ñayuu jeē íne cáhnu ni yā nuū jniñu néé ni sáha i, te tu ndénehen ya cuēchi siquī i.

8 Te nacā ndetū tēe jeē tuá chíhi máá Jítóho yō cuenta cuēchi de.

Achí tutu.

9 ¿Te á máni máá ñayuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de.

10 Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jéē jé ni cuu de circuncidar, chi nde ná tuú.

11 Te cuéé gá te ni nihīn de jnunī circuncidar. Te suu ni cuu ñn seña, nájñūhun ñn sello jeē ní ndahva yā cuēchi de siquī jeē súcuan ni candíje de. Te jeē yúcuan ní cahān yā jeē cuu de jíi nuū tāca ñayuu jeē candíje i jeē sáha ya jehē i, suni nuū ñayuu tu ní cúu circuncidar, chi suni ndahva yā cuēchi máá i.

12 Te suni cúu de jíi nuū ñayuu ní cuu circuncidar, te nasūu máni jeē ní cuu i circuncidar, chi suni jeē ní jñi i ejemplo de. Chi cáncandíje i jeē sáha ya jehē i, nájñūhun ni candíje máá de nde ná tu cuu de circuncidar.

*Núu candíje yó te sáha Yaā Dios jeē ni jéjnūhun ya*

13 Chi ni jejnūhun Yaā Dios nuū Abraham jíin núū tāca yúcūn de jeē cuāha ya ní ñáyiví cuu tahū de. Te nasūu síquī jeē ní nducú de squícu de ley yā cúu jeē ní jejnūhun ya un núū de, chi sa suhva síquī jeē ní candíje de jeē ni jéjnūhun ya, te ni ndahva yā cuēchi de.

14 Chi núu jeē máni máá ñáyuu nducú squícu ley cúu jeē nihín jeē ni jéjnūhun ya, núu súcuan te cándíje cāha yó nuú, te ma nihín jníñu jeē ni jéjnūhun ya ún.

15 Te ley chi sáha jeē nihín ñayuu castigo síquī jeē tu cúu squícu i. Te núu jeē tu ley, te suni tú na jnūhun stívi ñayuu síquī ley coo núú.

16 Núu súcuan te ni jejnūhun ya jeē sáha ya jeē váha jíin ñáyuu síquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núū maá-ni ñayuu jeē nducú squícu ley jenahán, chi suni nuū tāca ñáyuu cáncandíje nájñūhun ni candíje Abraham. Te súcuan cúu de jíi nuū tāca yó jeē cáncandíje yó.

17 Súcuan ni sáha Yaā Dios chi ni candíje de jeē sáha ya. Chi súcuan cáhán tutu ii: Ni jeni ri rohó cuu ró jíi nuū cuehē ndasí ñáyuu. Súcuan ni cahán maá Yaā jeē nastécu ndīyi te cáhán yā ndese coo tāca jéē ná tu coo.

18 Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vésú tuá na modo coo sēhe de núú. Te jeē yúcuan ní nduu de jíi nuū cuehē ndasí ñáyuu, nájñūhun ni cahán Yaā Dios: Súcuan nducuehē yucūn rō, achí yá jíin de.

19 Te je yajni jinū de ciento cuiyā, te vésú súcuan te tu ní quenda de nuū jnūhun cáncandíje de, vésú jíin de jeē maá de jíin ñasihí de Sara je jéñnu ndasí ndíndúú de jeē ma cúu ga coo sēhe de.

20 Te tu ní nácani síquí ni de jeē ma cáncandíje ga de jnūhun ní jejnūhun Yaā Dios jeē coo sēhe de. Chi sa suhva ni candíje nihin ga de, te ni nacuatáhú de nuū Yaā Dios.

21 Chi ni cucáhnu vāha ni de jeē cúu squícu Yaā Dios ndihí jeē ni jéjnūhun yā.

22 Te jeē yúcuan ní ndahva yā cuēchi de síquī jeē súcuan ni candíje de.

23 Te nasūu máá-ni síquī Abraham cúu jeē yosó núū tútu jeē ní ndahva yā cuēchi de jeē ní candíje de.

24 Chi suni yósó jéē síquí yohó jíinahan yó. Chi suni ndahva yā cuēchi máá yó jéē candíje yó jéē cúu ya Yaā ní nastécu Jitoho yō Jesús.

25 Chi ni jihí Jesús jeē chúnaa yā cuēchi yó, te ni natecu yā návāha ndahva Yaā Dios cuēchi yó.

*Ndese quéndōo ñayuu jeē ndáhva yā cuēchi*

## 5

1 Núu súcuan te je ni ndahva Yaā Dios cuēchi yó síquī jeē ní candíje yó jéē sáha ya jehē yō. Te jeē yúcuan ní sáha ya jeē ní ndīvi yó núu jnūhun maní yā jíin yó, síquī jeē ni jíhí Jitoho yō Jesucristo jehē yō.

2 Chi máá Cristo ni sáha jeē ni quívicoo yó núu Yaā Dios, chi ni sáha ya jeē váha yóhó síquī jeē súcuan cáncandíje yó. Te cáhīn nihin yó jíin jnūhun jeē sáha ya jeē váha yóhó. Te cúsi ni yō chi ñūhun ni yō jeē jinú yō nuū lúu cujéñnu yó jíin Yaā Dios.

3 Te nasūu máá yáha-ni, chi suni cúsi ni yō jeē ndóho yó jnúndóho. Chi jíin yō jeē maá jnúndóho sáha jeē jéndeýí ni yō.

4 Te jeē jéndeýí ni yō sáha jeē íje vāha yó cuu yó ñáyuu ndaā. Te jeē íje vāha yó sáha jeē ñūhun ni yō tāca jéē váha jeē cóo.

5 Te tāca jéē ñūhun ni yō, chi nihīn nahín yó. Chi jnūhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíin Espíritu Santo jeē ni jéhe ya nuū yō.

6 Chi náa ndóho yó jéē ma cúu cuiiti jnama yó máá yó, te ni jihí Cristo jehē yohó jéē cúu yó ñáyuu íyó cuéchi. Te ni jihí yā maá quíví jeē jé ni jeni Yaā Dios.

7 Te yí cúu jeē cúu ññ ñayuu jehē inga ñayuu, vésú jehē ññ ñayuu ndaā.

Chí sanaa te íyó jínu jeē chúndeyí ni ñn tēe cuu de jehē ñn tēe ndaā vāha.

8 Te máá Cristo chi ni jihī yā jehē yō náa máni cuēchi sáha yó, te súcuan ni steén Yaā Dios jeē cundáhú ni yā yohó.

9 Te vijna je ni ndahva Yaā Dios cuēchi yó síquī jeē ni jíhī Cristo jehē yō. Núu súcuan te suni jíni vāha yó jēe jnama Cristo yohó núu castigo quiiji quivī sáha Yaā Dios juicio.

10 Chi náa cúu ga yō enemigo Yaā Dios, te síquī jeē ni jíhī Sēhe ya jehē yō, te ni sáha ya jeē ndivī yó núu jnúhun manī yā jíin yó. Te jeē súcuan ní ndivī yó nuū jnúhun manī yā jíin yó, te suni jíni vāha yó jēe cācu yó síquī jeē técu Cristo, nduú yā jíin yó.

11 Te nasūu máá yáha-ni, chi suni cúsi ndasí ni yō jíin Yaā Dios síquī jeē ni sáha Jitoho yō Jesucristo jehē yō, chi máá yá ni sáha jeē ní ndivī yó núu jnúhun manī Yaā Dios jíin yó.

### *Jnúhun Adán jíin jnúhun Cristo*

12 Núu súcuan te jíni yō jeē ni quívī cuēchi ini ñayivī ní sáha máá ñn-ni tēe Adán. Te jeē síquī cuēchi yúcuan te ni jecōo cuehyī jéni ñayuu. Te jeē yúcuan cúu jeē jíhī ndihī ñayuu, chí ndihī i yíhi cuēchi.

13 Te nde ná tu cuāha ya ley nuū Moisés, te je íyó cuēchi ini ñayivī. Te síquī jeē ná tu coo ley yā, te tu ní chíhi ya cuenta jeē castivī i.

14 Te vésú súcuan te nde tiempo Adán te nde tiempo Moisés ni yíhi ñayuu chíhi cuehyī jeē jéni i síquī jeē iyó cuēchi i. Chí ni jihī i síquī cuēchi ni casáha máá i, vésú tu ní sáha i jnáhan cuēchi jeē ni sáha Adán jeē ní cunihni ní de nuū ñn jniñu ní ndacu ya. Te Adán ni cuu de ñn muestra máá Yaā ní quiiji cuéé gá.

15 Te jnúhun jeē ni sáha Adán cuēchi, tu quíjnahan cuiti jíin táhū jeē jnáma Yaā Dios yohó. Chí jeē ni stivī máá ñn-ni tēe ún, jeē yúcuan cúu jeē jíhī ndihī yó. Te jnúhun jeē jnáma Yaā Dios yohó cújénu ndasí gá, chí síquī jeē ni sáha máá ñn-ni tēe Jesucristo

cúu jeē súcuan-ni jnáma ya ndihī ñayuu candíje.

16 Te cuēchi jeē ni sáha máá ñn-ni Adán, tu quíjnahan cuiti jíin jnúhun jeē jnáma Yaā Dios yohó. Chí síquī máá ñn-ni cuēchi ún te ni quivicoo ñayuu chíhi jnúhun jnahnū ndetū i. Te jnúhun jeē jnáma ya ñayuu, sa suhva sáha jeē súcuan-ni ndáhva yā cuēchi i, vésú yóhyo cuehē cuēchi ní casáha i.

17 Chí síquī jeē ni sáha máá ñn-ni tēe Adán cuēchi, te ni nihīn poder cuehyī jéni ñayuu. Te sa suhva síquī jeē ni jíhī máá ñn-ni tēe Jesucristo, te víhyá gā ni nihīn ñayuu máá yá poder jeē cótecu i caca ndaā i jíin yá. Chí ni ndahva yā cuēchi i síquī jeē yóhyo vāha ni yā.

18 Núu súcuan te síquī jeē ni sáha máá ñn-ni tēe Adán cuēchi, te ni quivicoo ndihī ñayuu chíhi jnúhun jnahnū ndetū i. Te sa suhva síquī jeē ni sáha máá ñn-ni tēe Jesucristo ñn jniñu vāha ndasí, te ndáhva Yaā Dios cuēchi ndihī ñayuu te cotecu i ní cáni.

19 Chí síquī jeē tu ní jéndije máá ñn-ni tēe, te ni quivicoo cuehē ndasí ñayuu chíhi cuēchi. Te suni súcuan síquī jeē ní jéndije máá ñn-ni tēe Jesucristo, te ndáhva Yaā Dios cuēchi cuehē ndasí ñayuu.

20 Te ní jēhe ya ley yā návāha cuni yō jeē cuéhē cuēchi casáha yó. Te jeē ní nducuehē cuēchi yó, te víhyá gā cuehē cúu jnúhun jeē vāha ni yā jeē íne cáhnu ní yā nuū yō.

21 Núu súcuan te nájnūhun ni nihīn poder cuehyī jéni ñayuu síquī jeē iyó cuēchi i, suni súcuan íyó poder jnúhun jeē vāha ni yā jíin yó. Chí ndáhva yā cuēchi yó te cotecu yō ní cáni síquī jeē ni jíhī Jitoho yō Jesucristo jehē yō.

*Jeē tuá yíhi yó chíhi cuēchi chí yíhi yó ndaha Cristo*

## 6

1 Núu súcuan ¿te ndese cahān yō? ¿A caca ga yō jíin cuēchi návāha víhyá gā sáha ya jeē vāha yóhó jēe cóne cáhnu ní yā nuū yō?

2 Ma cúu cuiti. Chí nájnūhun je ni jihī yō jeē tuá yíhi yó chíhi cuēchi, te

ma cúu ga caca yó jíin cuéchi núu súcuan.

<sup>3</sup> ¿A tu cájecūhun ni rō jeē tāca yó jeē ní jendute yó síquī jeē ni quívi yó ndaha Cristo Jesús, suni ni jendute yó síquī jeē ni quívi yó chíji jnūhun jeē ni jíhī yō jíin yá?

<sup>4</sup> Chi jeē ní jendute yó cúu nájnūhun ni quindūji yó jéē ni jíhī yō jíin yá. Te vijna te cuu caca yó jíin vida jeé jeē ni jéhe ya nuū yō, chí nájnūhun suni ni natecu yō jíin yá. Chi ni natecu yā ni sáha Tátá yā jíin poder jeē cujéhu ndasí yá.

<sup>5</sup> Chi núu ni cundúú yó jíin yá síquī jnūhun jeē ni jíhī yō jíin yá, te suni súcuan cundúú yó jíin yá síquī jnūhun jeē ní natecu yō jíin yá.

<sup>6</sup> Chi jíin yō jeē ní naa modo maá yó jeē ni jíca yó jíin ichi yátá, chí ni quívi yó núu jnūhun jeē ni jíhī yō jíin Cristo jíca cruz. Te súcuan ni naa modo yō jeē cúu yó mozo nuū cuéchi, návāha tuá cuajníñu yó núu tācá jniñu jeē máni cuéchi cúu.

<sup>7</sup> Chi ñayuu jeē jé ni cajihī, je ni quendacoo i chíji tāca cuéchi.

<sup>8</sup> Te núu je ni jíhī yō jíin Cristo, te cándije yó jéē suni súcuan ni natecu yō jíin yá.

<sup>9</sup> Chi jíin yō jeē ní natecu Cristo, te ma cúu cuítī ga yā, chí cuehyī jéhni yóhó, tuá na vé cúu sáha jíin yá.

<sup>10</sup> Chi jeē ni jíhī yā, te ñn jínu-ni ni jíhī yā jeē síquī cuéchi ñayuu. Te jeé técu yā vijna, chí sáha ya jeē cuní Yāā Dios.

<sup>11</sup> Te suni súcuan róhó jíjnáhan ró, sáha ró cuenta jeē nájnūhun ni cajihī rō jeē ní quendacoo ró chíji cuéchi. Te cátecu rō návāha sáha ró jéē cuní Yāā Dios, chí ndúú ró jíin Jítóho yō Cristo Jesús.

<sup>12</sup> Núu súcuan te ma cuáha ga rō jnūhun quíhi ró chíji cuéchi jíin yíquī cúñu rō jeé cúu. Chi cuéchi ún stíhvī ni rohó jéē na sáha ró táca jéē ndíyo néé ni rō.

<sup>13</sup> Te ma cuáha ró máá ró cuajníñu ró núu cuéchi jeē cócuu ró jíin jniñu néé. Chí sa suhva cuáha ró máá ró nuū Yāā Dios, te sáha ró cuenta jeé

nájñūhun je ni cajihī rō te ni canatecu rō nuū yā. Te cuáha ndíhi ró máá ró nuū yā jeē cuajníñu ró núu jniñu ndaā.

<sup>14</sup> Chi tuá na poder cuéchi jeē cundeyí jíin ró, chí tuá cáyihī ró chíji ley jenahán, chí sa cáyihī ró chíji jnūhun jeē váha ni yā jíin ró.

*Jnūhun mozo jeē steén ndese quéndōo ñayuu cácandíje*

<sup>15</sup> ¿Ndese sáha yó núu súcuan? ¿A caca ga yō jíin cuéchi síquī jeē tuá yíhi yó chíji ley jenahán, chí sa yíhi yó chíji jnūhun jeē váha ni yā jíin yó? Ma cúu cuítī.

<sup>16</sup> Chi cájini rō jeē núu cuáha ró máá ró jeé cuatáhú ró sájniñu ró núu ñn tēe, núu súcuan te cácuu ró mozo nuū téé ún, te cánuú cuandije ró núu de. Te suni súcuan núu cuáha ró máá ró jeé sáha ró cuéchi, te mozo cuéchi cácuu ró, te cuu rō. Te núu cuatáhú ró nuū maá yá, te mozo yā cácuu ró jéé cáca ndaā rō.

<sup>17</sup> Te na cútahū yō nuū Yāā Dios, chí vésú ni cacuu ró mozo nuū cuéchi, te vijna chí nde jíin ini jíin ánuá rō ni cajetáhú ró nuū jnūhun ya jeē ni quívicoo ró núu.

<sup>18</sup> Te vijna te je ni nduu libre rō jeé tuá cácuu ró mozo nuū cuéchi, te cájejníñu ró núu jniñu ndaā.

<sup>19</sup> (Ni cahān rī ñn jnūhun ndese cúu síquī mozo ini ñayívi yáha, chí tu cájecūhun yachī ni rō síquī jnūhun ya.) Núu súcuan te nájnūhun ni cajéhe ró máá ró nde saá jeē ní cajejníñu ró núu tācá jniñu jnéhén jniñu néé, suni súcuan cuáha ró máá ró vijna jeé cuajníñu ró núu jniñu ndaā, návāha coo ndoo coo iī rō nuū Yāā Dios.

<sup>20</sup> Chi nde náa cácuu ró mozo nuū cuéchi, te tu ní cájejníñu ró núu jniñu ndaā.

<sup>21</sup> ¿Te na vé ni canihīn rō síquī cuéchi ni casáha ró un jéé cácuu rō vijna sáha? Tú cuítī, chí máá jéé jñahnú ndetū rō ní cáni sáha.

<sup>22</sup> Te vijna te je ni canduu libre rō jeé tuá cácuu ró mozo nuū cuéchi, te cájejníñu ró núu Yāā Dios. Te suu sáha jeé quéndōo váha ró, chí cáhīyo ndoo

cáhīyo īī rō nuū yā, te nde sandīhí te cotecu rō nī cāni.

<sup>23</sup> Chi yāhu jeē nihīn ñayuu siquī cuēchi cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō nī cāni andiví, siquī jeē nduú yó jíin Jítoho yō Cristo Jesús.

*Jnūhun ñasihí jíin yī jeē steén ndese quéndō ñayuu cá candíje*

## 7

<sup>1</sup> Hermano, je cájini rō ndese cáhán ley yā, te cájini rō jeē yīhī ñayuu chíji ley maá-ni núu técu i ñayīvi yāha.

<sup>2</sup> Te yāha cúu nájnūhun ñn ñahan jeē ní quijnáhan, chí cáhán ley jeē yīhī ña ndaha yī ña maá-ni núu técu de. Te núu ni jihī yī ña, te je ni quenda ña chíji ley jeē ní quijnáhan ña jíin de.

<sup>3</sup> Núu súcuan te núu quijnáhan ña jíin inga tēe ní ní técu gā yī ña, te cásiquí ndéē ña de. Te núu je ni jihī yī ña, te je ni quenda ña chíji ley un. Te cuu quijnáhan ña jíin inga tēe, chí nasūu jéē casíquí ndéē ña núu súcuan.

<sup>4</sup> Te suni súcuan rōhó jíjnáhan ró, ñánī mánī, chí ndúú ró jíin Cristo. Chí nájnūhun ni cajihī rō jíin Cristo, te ni quendacoo ró chíji ley jenahán. Te vijna chí nájnūhun ni quijnáhan ró jíin inga, cúu jeē ní quīvīcoo ró ndaha Cristo, Yaā ni natecu mēhñu ndíyī, návāha cuu sáha ró jniñu váha jeē cuní Yaā Dios.

<sup>5</sup> Chí ná ni cajica yó jíin modo maá yó nde saá, te ley un ní sáha jeē ní ndíyo néé ni yō tāca jéē cuní yīquí cúñu yō jeē sáha yó. Te yūcuan ní sáha jeē jnahnú ndetū yō nuú.

<sup>6</sup> Te vijna te je ni quenda yó chíji ley jenahán, chí nájnūhun je ni jihī yō jeē ma nihīn gā poder siquī yō. Te súcuan te íyó libre yō jeē cuajníñu yó núu Yaā Dios. Te jíca yó jíin modo jeé jéē cuní maá Espíritu, chí tuá yīhī yó chíji ley jeē ní tee Moisés jenahán.

*Siquī cuēchi jeē ñūhun ini anuá yō*

<sup>7</sup> ¿Ndeese cahán yō núu súcuan? ¿A ley ndíso cuēchi? Tú cuítī jeē súcuan. Te núu jeē tú ley yā, te ma cuní cuítī rī jeē íyó cuēchi rī. Chí ma cuní rī jeē cuēchi

cúu jeē ndíyo ni rī ndajníñu jnáhan rī núu tu ní cáhán ley jeē ma ndíyo ni yō.

<sup>8</sup> Te súcuan ni nihīn cuēchi modo cocuu jíin rī. Chí siquī jeē ndácu ley jniñu jeē ma sáha yó cuēchi, te ni quejéé ndíyo ni rī sáha rī tāca jéē neé. Te núu jeē tu ley, te suni tú na jnūhun stívi yó siquī ley nuú.

<sup>9</sup> Chí ni íyo tiempo jeē técu rī jeē ná tu jecūhun ni rī jeē cahán ley. Te ná ni quejéé rī jécūhun ni rī jniñu jeē ndácu ley, te ni jecūhun ni rī jeē íyó cuēchi rī, te ni nduu rī nájnūhun ndíyī.

<sup>10</sup> Chí ni jini rī jeē ley jeē sáha jeē cótecu anuá rī nuú, te tuú chí sa ni sáha jeē jnahnú ndetū rī nuú.

<sup>11</sup> Chí jíin jéē ndácu ley un jniñu, te ni nihīn cuēchi modo cocuu jíin rī, te ni stahú ruhū. Chí jíin jéē ndácu ley jniñu, te cuēchi ni sáha jeē ní quenda jnūhun jeē jnahnū ndetū rī.

<sup>12</sup> Núu súcuan te íyó ndáa maá ley, te tāca jniñu ndácu chí íyó ndoo íyó ndáa vāha.

<sup>13</sup> Núu súcuan te ley jeē íyó váha ún, ¿á suu sáha jeē jnahnú ndetū rī naún? Tú cuítī. Chí sa suhva maá cuēchi cúu jeē sáha jeē jnahnú ndetū rī, te súcuan stúu cuēchi ndese íyó maá. Chí jíin jniñu váha jeē ndácu ley te ni natūu jniñu néé jéē cúu cuēchi.

<sup>14</sup> Chí jíin yō jeē nuū maá Espíritu vēji ley. Te ruhū chí sa névāha rī ñn modo neé maá rī jeē ni squívi ruhū jejníñu cāha rī nuū cuēchi.

<sup>15</sup> Chí tāca jéē sáha rī, tu jécūhun ni rī najehē cúu jeē sáha rī. Chí jniñu váha jeē cuní rī sáha rī, tu ndé níhín rī fuerza sáha rī, chí sa suhva sáha rī jniñu néé jéē tu cúvāha ni rī sáha rī.

<sup>16</sup> Te náa sáha rī jniñu néé jéē tu cuní rī sáha rī, núu súcuan te nácuni rī jeē íyó ndáa ley.

<sup>17</sup> Núu súcuan te nasūu rúhū cúu jeē sáha jniñu néé un, chí modo neé jéē ñūhun ini anuá rī cúu jeē sáha cuēchi.

<sup>18</sup> Chí jíin rī jeē modo maá rī jeē névāha rī ini anuá rī, tú cuítī na vé jeē váha íyó. Chí cuní rī sáha rī jniñu váha, te tu ndé níhín rī fuerza sáha rī.

<sup>19</sup> Chí jniñu váha jeē cuní rī sáha rī, tu sáha rī. Te jniñu néé jéē tu cuní rī,

sa yūcuan sáha ri.

<sup>20</sup> Te náa sáha ri jniñu jeē tu cúní rī sáha ri, te nasūu rúhū cúu jeē sáha, chi modo neé jée ñúhun ini anuá rī cúu jeē sáha.

<sup>21</sup> Núu sūcuan te ni jini rī jeē sūcuan cúu jíin rí: Vēsú cuní rī sáha ri jniñu váha, te sa máni modo neé cúu jeē ñúhun ini anuá rī.

<sup>22</sup> Chi cúsñi ni rī jíin ley Yaā Dios nde jíin ini anuá rī.

<sup>23</sup> Te ni nacuni rī jeē iyó inga modo neé máa rí jeē jési nuū jeē cuní rī sáha ri jeē váha. Te cúu ri nájnūhun preso nuū cuéchi jeē jícu jíin rí.

<sup>24</sup> Nacā jeē ndahú gá cúu ri núu sūcuan. ¿Ndé ñn jnama ruhū nuū modo neé máa rí jeē jícu jíin rí jeē jnahnú ndetū rí?

<sup>25</sup> Na cútahū ndasí rí nuū Yaā Dios, chi máa yá cúu jeē jnáma ruhū nuū modo neé rí siquī jeē ni jíhī Jitoho rī Jesucristo jehē rī. Núu sūcuan te vēsú cuní yō squícu yó ley Yaā Dios, te jeē jíin fuerza maá yó ma cúu, chi modo neé máa yó sáha jeē jejniñu cāha yó nuū cuéchi.

*Siquī jeē jícu yó jíin modo cuní Espíritu Yaā Dios*

## 8

<sup>1</sup> Núu sūcuan te ma ndénehen Yaā Dios cuéchi siquī ñayuu cáyihī ndaha Cristo. Chi tuá cájica i jíin modo neé máa i, chi sa suhva cájica i nájnūhun cúní maá Espíritu yā.

<sup>2</sup> Chi modo jeē sáha Espíritu cúu jeē técu yō siquī jeē yíhi yó ndaha Cristo Jesús. Te yūcuan ní sáha jeē ní nduu libre yō nuū jnúhun jeē ni yíhi yó chíji cuéchi jeē jnahnú ndetū yō nuú.

<sup>3</sup> Chi ni sáha Yaā Dios jeē quéndō vāha ñayuu jeē tu ní cúu quéndō vāha jíin ley Moisés, siquī jeē tú na fuerza i jíin modo maá i jeē squícu i ley un. Chi ni tají yá Sēhe ya ni quiji, te ni nduu ya nájnūhun ñayuu cáhīyo cuéchi, návāha socō yā maá yá siquī cuéchi, vēsú tú na cuéchi ya. Te sūcuan ni ndonda Yaā Dios siquī cuéchi jeē ní casáha ñayuu jíin modo neé máa i.

<sup>4</sup> Sūcuan ni cuu návāha cuu squícu yó táca jniñu ndaā jeē ndácu ley, chi tuá jícu yó jíin modo neé máa yó, chi jícu yó nájnūhun cúní maá Espíritu.

<sup>5</sup> Chi ñayuu jeē cájica jíin modo neé máa, chi máni ndíhvī ni i siquī jeē cuní maá i. Te ñayuu jeē cájica nájnūhun cúní Espíritu, chi máni ndíhvī ni i siquī jniñu cúní maá Espíritu.

<sup>6</sup> Te jeē ndíhvī ni yō siquī modo cuní maá yó sáha jeē jnahnú ndetū yō. Te jeē ndíhvī ni yō siquī jniñu cúní maá Espíritu, sa suhva sáha jeē cotecu yō ní cáni te coo ndeyí coo siñ ni yō.

<sup>7</sup> Chi ñayuu jeē ndíhvī ni siquī modo neé cúní maá i, chi jíto uhū i Yaā Dios, chi tu cúní i cuatáhú i ley Yaā Dios, te ni ma cúu squícu i.

<sup>8</sup> Jeē yūcuan, ñayuu jícu jíin modo cuní maá, tu cúu sáha i jeē cúsñi ni Yaā Dios jíin i.

<sup>9</sup> Te máa ró jijnáhan ró, chi tuá cájica ró jíin modo cuní maá ró, chi cájica ró nájnūhun cúní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihī i ndaha ya.

<sup>10</sup> Te núu ndéé Cristo ini rō, te vēsú ñn quiñi te cuu yiquí cúñu rō jeē siquí cuéchi, te cotecu anuá rō siquī jeē ní ndahva Yaā Dios cuéchi ró.

<sup>11</sup> Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēhñu ndíyí, yūcuán na te máa yá suni sáha ya jeē natecu yiquí cúñu rō jeē cúu. Te sáha ya sūcuan jeē jíin maá Espíritu yā jeē ndéé ini rō.

<sup>12</sup> Núu sūcuan, hermano jijnáhan ró, ndéé jniñu yó jée caca ndaā yō, te nasūu jée sáha yó modo neé cúní maá yó.

<sup>13</sup> Chi núu caca ró jíin modo neé máa ró, te jnahnú ndetū rō. Te núu jíin fuerza maá Espíritu snāā rō táca jniñu casáha ró jíin modo neé máa ró, te cotecu rō ní cáni.

<sup>14</sup> Chi táca ñayuu jeē cándiquīn modo jeē steén Espíritu Yaā Dios, máa i cácuu sēhe Yaā Dios.

<sup>15</sup> Chi Espíritu jeē ní canihīn rō, tu ní sáha ya rohó jée cuu ró nájnūhun mozo nuū yā jeē yūhú tucu ró núu yā,



chi sa ni sáha ya jeē cúu yó séhe ya. Te jeē yúcuan cúu jeē cahán jee yó: Tátá maá ná.

<sup>16</sup> Te maá Espíritu steén yā ini anuá yō jeē cúu ndije yó séhe Yaā Dios.

<sup>17</sup> Te núu séhe ya cácuu yó, te suni nihīn yō maá táhū jeē ni jéjnūhun ya, te ñn cáhnu-ni coo tahū yō jiín Cristo. Chi núu ndóho yó jiín yá vijna, suni cujéhnū yó jiín yá andiví.

<sup>18</sup> Núu súcuan te sáha ri cuenta jeē táca jnúndóho jeē ndóho yó vijna, lúli ndasí cúu nuū jnúhun jeē cujéhnū luu yó jiín yá cucuéé gá.

<sup>19</sup> Chi ndíhi jeē ni jécōo, yōhyo cándētu jeē na sáha Yaā Dios jeē nduvāha, quiví quenda ndijin jeē cujéhnū séhe Yaā Dios jijnáhan i.

<sup>20</sup> Chi táca jéē ni jécōo, chi ni quiví chiji jnūhun jeē tu quéndōo vāha. Te nasūu jéē ní castiví maá, chi ñayuu ni casáha cuēchi, te jeē yúcuan ní squéndōo Yaā Dios súcuan. Te máni cándētu jeē ndúvāha.

<sup>21</sup> Chi ñn quiví te táca jéē ni jécōo, chi quenda chiji jnūhun jeē tívi jiín jéē tehyú. Te nduluu ndasí nájnūhun coo táca séhe Yaā Dios, chi cácu nuū jnúhun jeē tu quéndōo vāha.

<sup>22</sup> Chi jíní yō jeē táca jéē ni jécōo, chi nde vijna te nájnūhun ñnuú-ni cándoho te cájitū ni jeē na ndúvāha ndíhi.

<sup>23</sup> Te nasūu maá-ni táca jéē ni jécōo cúu jeē ndóho, chi suni nde maá yó ndóho yó, vēsú je névāha yó Espíritu jeē cúu seña jeē ñn quiví te nihīn yō ndíhi tahū yō. Chi yōhyo ndóho yó jnúndóho, te ndétu yó jéē náquihin séhe ya yohó te jnama ya yiqui cúñu yō jeē tuá ndoho yó jiín.

<sup>24</sup> Chi ni jnama ya yohó síquī jeē ñúhun ni yō jeē súcuan coo. Te núu je ni sáha ya nájnūhun ñúhun ni yō, yūcuán na te tuá ñúhun ni yō jeē sáha ya súcuan jiín yó. Chi tuá ndétu yó te núu je ni cuu súcuan.

<sup>25</sup> Te núu ná tu coto yó jéē sáha ya jeē ñúhun ni yō, yūcuán na te jiín paciencia ndétu yó jéē sáha ya.

<sup>26</sup> Te suni súcuan maá Espíritu chindéé ñáhán yá yohó jéē tú na

fuerza ini yō. Chi tu jíní yō cacān tahú yō nájnūhun cánuú. Te maá Espíritu cahán ndahú yá jiín Yaā Dios jehē yō síquī táca jéē jítú ndasí ni yō te tu níhín yō jnūhun ndese cacān tahú yō.

<sup>27</sup> Te maá Yaā Dios jeē jító ndee anuá yō, chi jíní yā táca jéē cuní maá Espíritu cahán yā jehē yō. Chi ñayuu cáyihí ndaha Yaā Dios, cáhán ndahú Espíritu jehē i nájnūhun cuní Yaā Dios.

### *Vāha-ni cúndeyí yó síquī ndíhi jeneé*

<sup>28</sup> Te jíní yō jeē táca-ni jeē quíji nuū ñayuu maní jiín Yaā Dios, jeē váha chí jéē uhú, chi quéndōo vāha ga i nuū yā, sáha ya jiín táca jéē yúcuan. Chi cácuu i ñayuu jeē ní cana ya i ni quivícoo i ndaha ya síquī jeē súcuan ni tee ni yā nde jenahán.

<sup>29</sup> Chi nde ná tu coo i te je jíní yā i, te je ni jeni ya i jeē ndoo ndaā nduu ánuá i ndacu i maá Séhe ya, návāha na cúu Séhe ya ñani jéhnū nuū cuehē ñayuu cácuu ñani cácandíje.

<sup>30</sup> Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē cujéhnū i.

<sup>31</sup> ¿Te ndese ga cahán yō síquī jnúhun jéhnū yáha núu súcuan? Chi núu íne Yaā Dios jiín yó, ¿te ndé ñn cuu cahán síquī yō? Tú ni ñn.

<sup>32</sup> Chi maá yá tu ní jnama ya Séhe ya jeē ma cúu yā, chi sa suhva ni jēhe ya Séhe ya ni jihí yā jehē ndíhi yó. Te núu súcuan ni jēhe ya Séhe ya, te nagā ni cuu jeē ma cuáha ya táca gá jeē jini ñúhún yó.

<sup>33</sup> ¿Te ndé ñn cuu cahán cuēchi síquī ñayuu jeē ní nacāji Yaā Dios? Tú ni ñn. Chi maá yá ni ndahva yā cuēchi i.

<sup>34</sup> ¿Te ndé ñn cuu ndenehen cuēchi síquī yō núu súcuan? Tú ni ñn. Chi maá Cristo cúu jeē ni jihí yā jehē yō, te suni ni natecu yā. Te vijna te ndéé yá lado váha Yaā Dios nuū cujéhnū ya, te cáhán ndahú yá jiín Yaā Dios jehē yō.

<sup>35</sup> ¿Te ndé ñn cuu quenehen yóhó núu jnúhun cúndáhú ni Cristo yohó? ¿A jnúndóho, chí táca jéē yí sáha, chí jéē cájito xeén ñayuu yohó, chí jnamā,

chí jéē cúmanī sahma, chí jnúhun yúhú, chí jéē cáhni i yóhó naún? Ni ñn tāca jéē yáha.

<sup>36</sup> Chí súcuan yósó núū tútu ñi jeē cácahān ñayuu cácañdije jíin Yaā Dios: Jeē siquí maá ní te ndihí-ni hora cácuñi i cahni i sãñá. Te cásaħa i jíin ná nájnūhun cásaħa i jíin lanchi, quití cúū.

Achí tutu.

<sup>37</sup> Te tuú chí vēsú cándoho yó táca jéē yáha, te vāha-ni cúndeyí yó siquí ndihí-ni, sáha maá Yaā jeē ní cundáhú ni yohó.

<sup>38</sup> Jeē yúcuan cúcaħnu ni rī jeē tú ni ñn cuu quenehen yóhó núū jnúhun cundáhú ni Yaā Dios yohó. Ni núu cuu yō, ni núu cotecu yō, ni tācá ndajéhé andiví, ni tāca jéē neé jéē cácuñehnu jñí poder, ni jeē iyó vijna, ni jeē cóo,

<sup>39</sup> ni jeē iyó núū sūcún, ni jeē iyó núū cūnú, ni tāca gá jeē ní jecōo, ma cúu cuiti quenehen yóhó núū Yaā Dios, jeē jíin Jítoho yō Cristo Jesús ni cundáhú ni yā yohó.

*Siquí ndese ni nacāji ya yucūn Israel*

## 9

<sup>1</sup> Te cáhán ndaā rī chí cúu ri tēe cáñdije Cristo, te tu stáhú rí, te jíin rī ini anuá rī jeē cahán ndaā rī sáha Espíritu Santo.

<sup>2</sup> Yōhyo cúcuíhyá ni rī, te níní jnáħuhū ni anuá rī

<sup>3</sup> jeē siquí tāca jnáħan ri ñayuu nación hebreo, chí ñn-ni yucūn rī jñ-jnáħan ri. Chí jeē siquí maá i te cúu ni rī jeē núu na cúu te cujiyo ri nuū Cristo te jnahnū ndetū rī, návāha jíin yúcuan te cuu cācu ánuá maá i núú.

<sup>4</sup> Chí cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēħñu vícō jeē ndíndēé ní condee yā jíin i sáá. Te jíin maá i ni sáha ya tācá contrato, te ni jēhe ya ley yā nuū Moisés jeē cúu maá i, te ni steén yā ndese chíñúhún i ya ini templo, te nuū maá i ni jejnūhun ya cuehē jnūhun.

<sup>5</sup> Te maá i cácuu yucūn tāca jíi yō jeē ní cacujéhnu, te suni yucūn maá i ni cacu Cristo jeē ní nduu ya tēe. Te

maá yá cúu Yaā Dios jeē jñí ndihí-ni, te ní cáni cahān ñayuu jeē cujéhnu ya. Amén.

<sup>6</sup> Te nasūu jéē tu ní quée ndaā tāca jnúhun jeē ní jéjnūhun Yaā Dios nuū ñayuu Israel. Chí ni quee ndaā nahín núū vēsú jecu-ni i, chí tú ndihí-ni yucūn Israel cúu jeē cácañdije.

<sup>7</sup> Chí nasūú ndihí yucūn Abraham cácuu ndije sēhe de jeē ni jéjnūhun ya. Chí ni cahān Yaā Dios jíin de: Nuū maá-ni sēhe ró Isaac cúu nuū coo yucūn rō jeē ní jéjnūhun ri nuū rō.

<sup>8</sup> Te jnūhun yáha cúní cahān jeē ni ñn ñayuu tu cúu i sēhe Yaā Dios siquí jeē ní cacu i ñn yucūn jeē jéni ni i jeē váha ga cúu. Chí sa suhva máni yucūn jeē ní jéjnūhun ya cúu ndije yucūn jeē chíhi ya cuenta.

<sup>9</sup> Chí yáha cúu jnūhun jeē ni jéjnūhun ya nuū Abraham: Máa tiempo jeē ní jeni ri te quiji ri, te cacu ñn sēhe yí ñasihí ró Sara, achí yá.

<sup>10</sup> Te nasūu maá yáha-ni, chí suni Rebeca ni cacu uū sēhe yí ña, te ñn-ni tátá ndíndúú i, jeē ní cuu jíi yō Isaac.

<sup>11-13</sup> Te nde ná tu cacu ndíndúú i, te ná tu sáha i jeē váha jeē uhú, te je ni cahān yā jíin Rebeca: Sūchi ní cacu xīħna gā cuajníñu i nuū sūchi sándihí, áchí yá. Chí suni súcuan cáhán tutu ñi: Ni jito manī rī Jacob, te Esaú chí tuú, áchí Yaā Dios. Te súcuan jíin yō jeē maá Yaā Dios cuu nacāji ya ñayuu núu ndese tēe ni maá yá, te nasūu siquí jñiñu jeē sáha i, chí sa suhva siquí ndese cúní maá yá nacāji ya i.

<sup>14</sup> ¿Ndesese cahān yō núu súcuan? ¿A jéē tu iyó ndaā Yaā Dios jeē sáha ya súcuan, chí naún? Tú cuiti.

<sup>15</sup> Chí nde jenahán ní cahān yā jíin Moisés: Ndé-ni cúu jeē cúní rī cundáhú ni rī, te cundáhú ni rī. Te ndé-ni cúu jeē cúní rī sáha ri jeē váha jíin, te sáha ri jíin, áchí yá.

<sup>16</sup> Núu súcuan te nasūu siquí jeē cúní maá ñayuu, ni nasūu jéē nducú ndeyí maá i cúu, chí siquí ndese cúní maá yá cundáhú ni yā i.

<sup>17</sup> Chí suni súcuan yósó núū tútu ñi jeē ni cáhán yā jíin rey ñuu Egipto: Ni jeni ri rohó jéē cúu ró rey, návāha jíin

róhó te stéén rī poder rī, te návāha cuitē núu síhví rí ní ñáyíví, áchí yá.

<sup>18</sup> Núu súcuan te núu ndé ñn cúní yā cundáhú ni yā, te cundáhú ni yā. Te núu ndé ñn cúní yā jeē cunīhni ni, te sáha ya jeē cunīhni ni.

<sup>19</sup> Te sanaa te cahān ñn ró jíin rí: Núu súcuan cúu ¿te najehē cahán gā yā jeē cuēchi sáha yó? Chi ma cúu casi yō nuū yā jeē ndese cúní maá yá sáha ya. Achí rō.

<sup>20</sup> Te sa suhva cáhán rī jíin ró: Róhó, ¿ndé ñn cúu ró jéē jéni ni rō stió cuíñí rō nuū Yaā Dios? ¿A cuu cahān quísi ñuhun jíin téé ni sáha: Najehē ni sáha ró rúhū súcuan? achí.

<sup>21</sup> Chi tēe sáha quísi, cuu sáha de ndese cúní maá de, chi ñn-ni ñuhun cuu sáha de ñn quísi fino te inga quísi corriente.

<sup>22</sup> ¿Te á tu jétáhú ró jeē suni súcuan sáha Yaā Dios jíin ñáyuu? Chi cúní yā steén yā ndese sáha ya juicio síquī ñáyuu, te súcuan te cuni i poder yā. Te vésú súcuan te ni íyo paciencia ni yā jeē tu ní ndóna yachí yā síquī ñáyuu jeē jnahnú ndetū.

<sup>23</sup> Te sáha ya súcuan návāha stéén yā ndese yóhvo luu cújéhnvū ya síquī jniñū sáha ya jíin yóhó ñáyuu cundáhú ni yā. Chi nde jenahán je ni sátūhva ya yohó jéē luu cújéhnvū yó jíin yá.

<sup>24</sup> Chi ni cana ya yohó jéē candíje yó, te sava yó cúu ñáyuu hebreo te sava yó cúu ñáyuu tāca gā nación.

<sup>25</sup> Chi suni súcuan ni cahān yā, yósó núu tútu Oseas: Ñáyuu jeē tu ní cúu ñáyuu maá rí, vijna te cahān rī jeē cácuu i ñáyuu maá rí.

Te ñáyuu jeē tu ní íyo maní rī jíin, vijna te cahān rī jeē cácuu i ñáyuu jeē maní rī jíin.

<sup>26</sup> Te maá lugar nuū ni cahān rī jeē násū ñáyuu rī cácuu i, suu yūcuan cahān ñáyuu jeē cácuu i sēhe Yaā Dios, Yaā técu ní cáni. Achí yá.

<sup>27</sup> Te Isaías sa suhva ni cahān de jnūhun ñáyuu Israel: Vésú ni cayā yucūn Israel nájnūhun ñíí yumar, te jecu-ni i jnama ya.

<sup>28</sup> Chi Jitoho yō Yaā Dios, yachí sínu ya jniñū jeē sándaā yā cuēchi ñáyuu ñáyíví. Achí tutu.

<sup>29</sup> Chi nájnūhun ni cahān tucu Isaías: Máá Yáā cúu Jitoho nuū tāca ndajéhé andíví, núu tu ní jnáma ya jecu yucūn yō nuú, te je ni ndoho yó nájnūhun ñáyuu ñuu Sodoma jíin ñuu Gomorra, jeē ní naa ndihí. Achí tutu.

*Jeē tu cájetáhú ñáyuu hebreo jnūhun jnama ya i*

<sup>30</sup> ¿Ndese cahān yō núu súcuan? Suu jeē ñáyuu tāca gā nación, vésú tu ní cánducú i quendōo ndaā i nuū Yaā Dios, te ni ndahva yā cuēchi i. Chi síquī jeē ní candíje i jeē ni jíhí Cristo jehē i cúu jeē ní ndahva yā cuēchi i.

<sup>31</sup> Te sa suhva ñáyuu Israel, vésú cánducú i quendōo ndaā i nuū Yaā Dios sáha ley yā, te tu cundeyí i quendōo ndaā i.

<sup>32</sup> ¿Te najehē? Síquī jeē tu cánducú i jeē ndahva yā cuēchi i jeē candíje i jeē ni jíhí Cristo jehē i, chi sa jéni ni i jeē squícu maá i ley te quendōo ndaā i. Te jeē stíví i súcuan cúu nájnūhun cácotúú i síquī maá yūu jeē cácachihí jehē, te suu cúu Cristo.

<sup>33</sup> Chi súcuan cáhán nuū tútu íi: Nde ñuu rī Sion sáha rī jeē cóne maá Yaā jeē cúu nájnūhun yuū jeē cácachihí i jehē i.

Te cúu ya nájnūhun toto jeē cotúú i sáha.

Te sa suhva ñáyuu cácdíje Yaā ún, chi jnama nahín yá i.

Achí Yaā Dios.

## 10

<sup>1</sup> Hermano jijnáhan ró, cúu ndasí ni rī te jícán tahu rī nuū Yaā Dios jehē ñáyuu nación rī Israel, jeē na jnáma ya i jijnáhan i.

<sup>2</sup> Chi cáhán rī jeē vāha cásáha i jeē ndíhví ni i cáchiñúhún i Yaā Dios. Te vésú súcuan te cáchiñúhún cáhá i.

<sup>3</sup> Chi tu cájecūhun ni i ndese ndáhva Yaā Dios cuēchi ñáyuu, te ndúcú i quendōo ndaā i maá-ni jeē squícu i ley. Te tu cájetáhú i maá modo jeē ndáhva Yaā Dios cuēchi i.

<sup>4</sup> Chi siquī jeē ni sáha Cristo te cuu quenda ñayuu chíji ley Moisés. Te ndáhva Yaā Dios cuēchi tāca ñáyuu jeē candíje i jeē ni sáha Cristo jehē i.

<sup>5</sup> Chi súcuan ni tee Moisés jnūhun ñayuu jeē cánducú quendōo ndaā jíin ley: Núu ñin ñayuu cuu squícu i tāca jniñu ndácu ley, te cotecu i núu, áchí.

<sup>6</sup> Te jnūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chí sa suhva cáhán: Ma cáni ni rō jeē jíni ñúhún caa ró andiví nasnúu ró Cristo jeē ndahva yā cuēchi ró.

<sup>7</sup> Ni ma cáni ni rō jeē jíni ñúhún cuun ró ndé nuū cūnú ndonehen ró Cristo mēhñu ndíyi, nájnūhun jeē tu ní nátecu yā.

<sup>8</sup> ¿Te ndese cáhán jnūhun un núu súcuan? Yajni íyó jnūhun ya jíin ró, chí ñúhún ini yuhu ró jíin ini anuá rō, achí tutu. Te suu cúu jnūhun jeē na cándíje yó jéē jnáma ya yohó. Te jnūhun yáha cúu jeē cánacani ri.

<sup>9</sup> Chi núu cahán rō jeē Jítóho rō cúu Jesús, te núu candíje ró jíin ini jíin ánuá rō jeē ní natecu yā mēhñu ndíyi ni sáha Yaā Dios, yūcuán na te jnama ya rohó.

<sup>10</sup> Chi jíin ini jíin ánuá yō cándíje yó jéē ni jíhi yā jehē yō, te súcuan te ndáhva Yaā Dios cuēchi yó. Te jeē cahán yō jeē Jítóho yō cúu Jesucristo, te súcuan te jnama ya yohó.

<sup>11</sup> Chi cáhán tutu i: Tāca ñáyuu jeē candíje i ya, chí jnama nahín yá i, áchí.

<sup>12</sup> Chi inuú-ni cúu ñayuu hebreo jíin tāca gá ñayuu, chí máá yá cúu Jítóho nuū ndihí yó, te cuehē jeē váha sáha ya jíin ñáyuu cácahán ndahú jíin yá.

<sup>13</sup> Chi súcuan cáhán jnūhun ya: Ndihi ñayuu cácahán ndahú jíin máá Jítóho yō, chí jnama ya i, áchí.

<sup>14</sup> ¿Te ndese cahán ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jnūhun ya? ¿Te ndese cuni sōho i te núu tú na ñayuu nacani jnūhun nuū i?

<sup>15</sup> ¿Te ndese nacani ñayuu jnūhun ya te núu jeē tu táji yá i quihín i? Chi nájnūhun cáhán tutu i: Yōhyo luu jniñu cásáha ñayuu cájica jíin jnūhun

ndeyí sñ ni jeē cánacani i jnūhun vāha ya, achí.

<sup>16</sup> Te nasūú ndihí i jétáhú nuū jnūhun jnama ya i. Chi ni cahán Isaías nde jenahán: Tátā Yaā Dios, ¿ndé ñáyuu ni candíje jnūhun jeē cánacani ná víi? áchí de.

<sup>17</sup> Núu súcuan te núu cuni nahín ñayuu te cuu candíje i. Te jnūhun cuni nahín i cúu jnūhun Cristo.

<sup>18</sup> Te cájnūhun rí: ¿A tu ní cájini sōho i jnūhun un núu súcuan? Tuú chí ni cajini sōho i, chí cáhán tutu i: Ní ñáyiví ní cajini sōho ñayuu jnūhun jeē ní canacani de.

Te nde nuū jicá gá tāca lado ni jinū jnūhun ún.

Achí tutu.

<sup>19</sup> Te suni cájnūhun rí: ¿A tu ní cájecūhun ni ñayuu Israel jnūhun ún? Tuú chí ni cajecūhun ni i, te tu ní cájetáhú i. Chi xīhna gā Moisés ni cachi de jeē ni cáhán Yaā Dios:

Cucuñí ró jijnáhan ró, chí cuāha ri jnūhun ri nuū inga ñayuu jeē násūú ñin nación cúu.

Te quití ni rō coto ró jéē cuāha ri jnūhun ri nuū ñin nación jeē tu jécūhun ni.

<sup>20</sup> Te suni Isaías ni chundeyí ni de ni cachi cājí de jeē ni cáhán Yaā Dios:

Ñayuu jeē tu ní cánanducú rúhū, ni cajini i ruhū.

Te nuū ñáyuu jeē tu ní cácajnūhún, ni steén rī nuū i ndese Yaā cúu ri.

<sup>21</sup> Te siquī ñáyuu Israel sa ni cahán de jeē ni cáhán yā: Ndiquíví ni cana ri i jeē quívicoo i nuū rī, te tu ní cácu ni i, chí ñayuu nīhni ni, ñayuu jéē ni cácuu i. Achí yá, achí Isaías.

*Jeē iyó jecu na ñayuu Israel jeē jnáma ya*

## 11

<sup>1</sup> Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuítí. Chi ruhū suni tēe Israel cúu ri, te yucūn Abraham cúu ri, te Benjamín cúu jíi rī jenahán.

<sup>2</sup> Tu ní stóo Yaā Dios ñayuu maá yá, chí je ni nacāji ya i nde jenahán. ¿A tu cájini rō ndese cáhán tutu i

jnūhun Elías, tēe ni nacani jnūhun ya jenahán? Chi náa jícán tahu de, te ni cahān de siquī ñáyuu Israel:

<sup>3</sup> Tātā Yaā Dios, ni cajehni i tāca tēe cáncani jnūhun ní, te ni cajenu i tācá altar ní. Te máñúhún na sãña ní quendōo, te vijna suni cáncuni i cahni i sãña, achí de.

<sup>4</sup> Te Yaā Dios ni nastió cuíñi yā: Iyó nahín úxā mil ñayuu cáncandíje ruhū jeē tu ní cájecuñi yití i nuū ídolo naní Baal, achí yá.

<sup>5</sup> Te suni súcuan vijna, chi íyó jecu na ñayuu jeē ní nacāji ya siquī jeē váha ni yā jíin i.

<sup>6</sup> Te núu ni nacāji ya i siquī jeē váha ni yā jíin i, te nasūu síquī jeē ní sáha i jniñu váha cúu. Chi núu síquī jeē ní sáha i jniñu váha cúu, yūcuán na te nasūu síquī jeē váha ni yā cúu.

<sup>7</sup> ¿Te ndese cúu núu súcuan? Cúu jeē ñáyuu Israel tu ní cúndeyí i quendōo ndaā i nájnūhun ni canducú i. Te sava i jeē ní nacāji ya, chi máá i ni ndahva yā cuēchi i. Te sava ga i ni ndunīhni ni i,

<sup>8</sup> nájnūhun cáhán tutu i: Ni sáha Yaā Dios jeē tu jécūhun cuiti ni i siquī yā, ni tu jíin i jíin tñnūú i, ni tu jíin nahín i jnūhun ya, te súcuan cúu nde vijna. Achí tutu.

<sup>9</sup> Te suni ni cahān David: Vico jeē casáha i, na cóo nájnūhun in trampa chí in xeyū, návāha nihīn i castigo xeēn siquī jeē castívi i casáha i cuēchi.

<sup>10</sup> Te ánuá i na ndúnee, nájnūhun jeē tuá cúu coto i, te na jécostíhí jnūndóho siquī i ní cáni. Achí tutu.

*Siquī jeē jnáma ya ñayuu tāca gá nación*

<sup>11</sup> Núu súcuan te cájnūhun rí: ¿A tuá cúu cuiti ndívi ñayuu Israel nuū Yaā Dios jeē súcuan ní castívi i? Tú cuiti. Chi sa suhva jeē ní cacunīhni ni i, te sa ñayuu tāca gá nación ní canihīn tahu máá i jnūhun jeē jnáma ya i. Te yūcuan sáha tucu jeē ñáyuu Israel condíhvī ni i jeē suni candíje máá i.

<sup>12</sup> Chi jeē ní castívi i, te sa ñayuu ní cáhnu ñayívi ní canihīn maá i

jnūhun ya. Te jeē ní cajica yátá i, suu ní sáha jeē ní canihīn ñayuu tācá nación jnūhun ya. Núu súcuan te quívi jeē ndívicoo tucu ndíhi ñayuu Israel ndaha ya, te ñayuu ñayívi víhyá gā quendōo ndetū i sáha ún.

<sup>13</sup> Te vijna te cáhán rī jíin róhó ñáyuu tācá nación jeē tu ní jíin jnūhun ya. Chi ni tají Yaā Dios ruhū jeē scáca ri jnūhun nuū rohó ñáyuu tācá nación. Te ndúcú rí jeē na cuájnuhún ró jijnáhan ró jniñu sáha ri jeē nácani ri jnūhun ya.

<sup>14</sup> Chi cúní rī jeē jíin yúcuán te nacani ni sava jnáhan ri ñayuu Israel jeē suni candíje máá i, te jnama ya i.

<sup>15</sup> Chi jeē ní stóo ya ñayuu Israel, jeē yúcuán cúu jeē sa ñayuu ñayívi ní sáha ya jeē ndívicoo i nuū jnúhun maní yā jíin i. Núu súcuan te quívi naquihin tucu ya ñayuu Israel, quívi ún suni váha ndasí sáha ya jíin ñáyuu ní cáhnu ñayívi. Chi coo nájnūhun jeē natecu i jeē cúu i nájnūhun ndívi.

<sup>16</sup> Te ñayuu Israel cásocō i nuū Yaā Dios pan jeē quénda xīhna gā nuū ñujen, te súcuan stéén i jeē ndíhi un cúu cuenta yā. Te in yujnu, núu yíhi jeē cuenta yā cúu, te suu cúu nde yoho jíin ndé ndíhi ndaha. Te suni súcuan ñayuu Israel, yíhi cuenta i nuū yā, siquī jeē jíi i xīhna ñúhún, ni quívicoo de ndaha ya.

<sup>17</sup> Chi ñayuu Israel cácuu i nájnūhun ndayújnu olivo váha, te sava ndaha un ní quendē. Te róhó ñáyuu tācá nación jeē tu jíin jnūhun ya, cácuu ró nájnūhun ndayújnu olivo yucú, te ni nachuhun ya rohó núu ní quendē ñayuu cácuu ndayújnu váha ún. Te nájnūhun inuú-ni cástáa ró ndúxi jíin cajin jeē véji nde yoho yújnu ún.

<sup>18</sup> Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ní quendē. Ma cutéyí ró, chi nucūhun ní rō jeē násūú jéé yoho stáa cajin nuū maá ró, chi sa máá ró stáa cajin jeē véji nde yoho.

<sup>19</sup> Te sanaa te cahān rō: Tú chi sava ndaha ní quendē návāha nachuhun ya ruhū nuū ní quendē ún, achi rō.

20 Ndaā, te ni quendē i siquī jeē tu ní cá candíje i Cristo. Te róhó chi máni siquī jeē cá candíje ró, jeē yúcuan cúu jeē ní quívicoo ró lugar i. Te ma sándúxí ró maá ró núu súcuan, chi sa suhva conso iyo ró núu Yaā Dios.

21 Chi tu ní íne cáhnu ni yā nuū maá ndaha jeē chíjniñu, te suni súcuan ma cóne cáhnu ni yā nuū rō jijnáhan ró te núu stívi ró.

22 Núu súcuan te sáha vāha ro cuenta ndese vāha ni Yaā Dios jíin ndese xeēn ni yā. Chi ni nduxeēn ni yā jíin ñáyuu hebreo jeē ní castívi ún, te sa cúndáhú ni yā rohó. Te cánuú cuiñi nihin ro jíin jnūhun jeē váha ni yā jíin ró. Chi núu tuú, te suni quende yā rohó.

23 Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i.

24 Núu súcuan te róhó ñáyuu tācá nación jeē tu ní jíni jnūhun ya, ni quendē rō xinī yújnu olivo yucú, te ni nachuhun ya rohó xinī yujnu olivo váha, vēsú nasūú ndaha máá yujnu un cácuu ró. Te nagā ni cuu ñáyuu hebreo jeē ma náchuhun ya i nuū ni quéndē i, chí cácuu i máá ndayújnu váha ún.

*Ín quívī te jnama ya ndíhi ñáyuu nación Israel*

25 Hermano, cúní rī jeē na jécūhun ni rō jijnáhan ró ndese íyó jnūhun yáha jéē ní yisāhí, návāha ma cutéyí ró caní ni rō jeē ndichí xinī maá ró: Chi sava ñáyuu Israel ni ndunīhni ni i, te súcuan coo máá-ni nde quívī jínu candíje ñáyuu tācá nación jeē tu jíni jnūhun ya.

26 Te sáá te jnama ya ndíhi ñáyuu nación Israel, chí cáhán tutu íi: Ichi ñuu rī Sión quiji Yaā jnáma ñáyuu, te sáha ya jeē tuá coo cuēchi nuū tāca yúcūn Jacob.

27 Te yāha cúu contrato jeē sándaā rī jíin i, quívī jeē quénde ri cuēchi i jíin áhí Yaā Dios. Achí tutu.

28 Chi ñáyuu hebreo un ní nduu i nájnūhun enemigo Yaā Dios siquī jeē tu ní cá candíje i jnūhun jnáma ya i. Te

jeē yúcuan te cuu cuitē núu jnūhun un núu tāca róhó. Te vēsú súcuan te siquī jeē ní nacāji ya tāca jíi i jenahán, te cúndáhú gá ni yā i jeē ma stóo ya i ní cáni.

29 Chi tu nácani yátá ni yā jeē cána ya ñáyuu jíin jéē jéhe ya tahū i.

30 Te róhó jíin áhan ró, suni ni cahīyo nīhni ni rō nuū Yaā Dios nde saá. Te vijna jeē ní cacunīhni ni maá ñáyuu hebreo, te cúndáhú ni yā rohó.

31 Te suni súcuan máá i, chí vēsú cacunīhni ni i vijna, te cúndáhú tucu ni yā i, nájnūhun cúndáhú ni yā maá ró jijnáhan ró.

32 Chi Yaā Dios ni sáha ya jeē ní quendōo ndívií ñáyuu chíi jnūhun cúnīhni ni i, návāha suni cuu cúndáhú ni yā ndívií i.

33 Núu súcuan te náhán náa ni yō jeē yóhyo cuehē jnūhun ndíhí íyó jíin Yaā Dios, te ndíhi cuiti jíni yā. Te ni ma cúu cuiti castūhun yó ndese téé ni yā sáha ya tācá-ni, te ma cánda cuiti yō jecūhun ni yō ndese cúu tāca jéē sáha máá yá.

34 Chi cáhán tutu íi: ¿Ndé íin ni jecūhun ni ndese jéni ni maá Jítóho yō? ¿Chí ndé íin ni steén nuū yā?

35 ¿Ndé íin ni jéhe xīhna gā nuū maá yá, návāha nachunaa yā nuū i?

36 Chi nde nuū maá yá vēji tāca jéē íyó, te máá yá ni sáha ndíhi, te jeē cúu máá yá cúu. Te na cáhán yō jeē yóhyo luu cújéhnu Yaā Dios ní cáni. Amén.

*Jeē na cóo ndoo ánuá yō cuajniñu yó núu Yaā Dios*

## 12

1 Núu súcuan te cáhán ndahú rí jíin ró jijnáhan ró, hermano, jeē siquī jeē cúndáhú ni Yaā Dios yohó. Na sócō rō maá ró núu yā, coo ndoo coo íi rō cuajniñu ró núu yā, nájnūhun cúsi ni yā. Chi yāha cúu jeē chíñuhún ró yā nde jíin íni jíin ánuá rō.

2 Te ma cáca ró jíin táca modo casáha ñáyuu ñayívi yáha, chí sa na sáma ró modo caní ni rō, te ndujeé jéē níjnūní rō. Te súcuan te cuu nacāji ró ndé-ni cúu jeē váha jeē nújnahan ni Yaā Dios,

jeē cúsī ni yā, jín jēe íje ni rō jín jnúhun ya.

<sup>3</sup> Te síquī jeē váha ni yā ni jēhe ya jniñu nácani ri jnúhun ya, jeē yúcuan cáhán rī jín ndihí ró jēe ma cáni ni rō jeē váha ga ñayuu cúu ró núu cūhva jeē iyó ró. Chi ná ñn ná ñn ró na cáni ndaā ni rō síquī maá ró, te ma scáa ga rō caní ni rō jeē váha ga ñayuu cúu ró vésú nuū cūhva jeē ni jēhe Yaā Dios fuerza ini rō cándije ró.

<sup>4</sup> Chi cácuu yó nájnūhun ñn yiquí cúñu jeē iyó cuéhē parte, te sñn sñn jéjníñu ñn ñn.

<sup>5</sup> Chi vésú iyó cuéhē yō, te nájnūhun ñn-ni yiquí cúñu cúu yó jēe yíhi yó ndaha Cristo, chi ñn-ni ni nduu yó jínáhan yó.

<sup>6</sup> Te sñn sñn tahū ni jēhe Yaā Dios nuū yō jeē cuajníñu yó núu yā, núu ndese ni nujnahan ni yā ni jēhe ya nuū ñn ñn yó. Núu súcuan te na cuajníñu vāha yó jín táhū ún. Núu ni nihīn yō tahū jeē nácani yó jnúhun ya, te cánuú sáha yó ndé maá cūhva ni jēhe ya cándije yó.

<sup>7</sup> Te núu ni nihīn yō tahū jeē chindéé ñáhán yó jnáhan yó, te na sáha yúcún yó. Te núu ni nihīn yō tahū jeē steén yō, te na cóndihvī ni yō steén yō.

<sup>8</sup> Te ñayuu jeē stihvī ni inga ñayuu, suni na sáha yúcún i. Te ñayuu jēhe nuū jnáhan, na cuáha i súcuan-ni. Te ñayuu ndíso jníñu, na ndácu vāha i jniñu. Te ñayuu jító ndáhú ñayuu ndahú, na cúsī ni i sáha i.

#### *Ndese cánuú squícu ñayuu cácandije*

<sup>9</sup> Te na cundáhú ndije ni rō jnáhan ró, nasūu maá jēe cahán-ni ró. Te coto uhū rō jniñu néé, te condiquīn rō jniñu váha.

<sup>10</sup> Te cánuú coo manī rō jín jnáhan ró nájnūhun jēe maní rō jín ñani rō. Te nducú ró jeē quéndōo yíñuhún gá jnáhan ró vésú maá ró.

<sup>11</sup> Te ma cucúxí ró jín jniñu casáha ró. Chi jín ini jín ánuá rō cóndihvī ni rō cuajníñu ró núu maá Jítóho yō.

<sup>12</sup> Te na cúsī ni rō jeē cáñuhun ni rō tāca jēe váha jeē cóo. Te na cuándeýí ni

rō núu ndóho ró jnúndóho. Te níní na cácan tahú rō.

<sup>13</sup> Te coto ndáhú ró ñayuu cácandije núu cúmanī nuū i. Te cuáha núu ró vehe nuū ñayuu cájica.

<sup>14</sup> Te cacān tahú rō jehē ñayuu cájito xeēn rohó. Ma cahán ndevāha ro síquī i, chi sa cacān tahú rō jehē i.

<sup>15</sup> Te núu cúsī ni ñayuu, te suni na cúsī ni rō jín i. Te núu cúcuíhyá ni ñayuu, te suni na cúcuíhyá ni rō jín i.

<sup>16</sup> Na cóo ñnuú ni rō jín táca jnáhan ró. Te ma cundúxí ró, chi sa quiñáhan ró jín ñayuu núu ga. Ma cáni ni rō jeē ndichí xínī rō.

<sup>17</sup> Te ma nasáha ndevāha ró jín ni ñn ñayuu, núu ni sáha ndevāha i jín ró. Na cóndihvī ni rō sáha ró jniñu váha, jító jínúu tāca ñayuu.

<sup>18</sup> Te na cóndihvī ni rō coyūcu manī rō jín táca ñayuu, vésú ndese cándāa maá i.

<sup>19</sup> Nánī manī jijnáhan ró, ma nácuāha ró jēe ndútahū ñayuu casáha ndevāha jín ró, chi sa cuáha ró jnúhun jeē maá Yaā Dios cuáha ya castigo i. Chi cáhán tutu i: Máa rí cuáha castigo i, máa rí nacuāha yāhu i, áchí Jítóho yō.

<sup>20</sup> Te suni cáhán tutu: Tēe jító uhū rohó, núu jí de sōco, te cuáha ró jēe cáji de. Te núu jíchi de, te cuáha ró jēe cóho de. Chi núu sáha ró súcuan, te cucanu de te nacani uhū ni de jeē ni jító uhū de rōhó.

<sup>21</sup> Ma cuáha ró jnúhun jeē cundeýí jniñu néé jín ró, chi sa jniñu váha na sáha ró návāha ndahvā jniñu néé.

## 13

<sup>1</sup> Tāca ñayuu na cuátahú i nuū tohō cándiso jníñu ñuu. Chi ma cóo tēe cándiso jníñu te núu tu ní sáha máa Yaā Dios. Te tēe cándiso jníñu chi Yaā Dios ni tee jniñu síquī de.

<sup>2</sup> Te ñayuu jeē tu jétahú núu tēe cándiso jníñu, núu súcuan te cúnihni ni i nuū jeē ní jeni Yaā Dios. Te ñayuu jeē cúnihni ni, chi cuēchi sáha i, te nihīn i castigo.

<sup>3</sup> Chi tāca tēe ndíso jníñu, nasūu jēe ndíso jníñu de jeē yūhú ñayuu casáha jniñu váha, chi sa jeē yūhú ñayuu

casáha jniñu néé. Te núu cúní rō jeē ma cúxeēn tēe cándiso jniñu nuū rō, na sáha ró jniñu váha núu súcuan. Yūcuán na te cuajnúhún de rōhó.

<sup>4</sup> Chi jéjníñu Yaā Dios de jíjnáhan de, návāha coyūcu váha ró jíjnáhan ró. Te núu sáha ró jniñu néé, te sa yūhu ró, chi nasūu cáha-ni cúu jeē cándiso jniñu de stóho de ñayuu. Chi jéjníñu Yaā Dios de, návāha cuāha de castigo ñayuu casáha jniñu néé.

<sup>5</sup> Jeē yúcuan cánuú jéē cuatáhú ró núu tēe cándiso jniñu, te nasūu máni jeē ma níhín rō castigo, chi suni jeē tú na cuēchi coo ánuá rō.

<sup>6</sup> Te jeē yúcuan cúu jeē suni cájēhe ró xúhun núu tēe cándiso jniñu cuu jniñu ñuu. Chi jéjníñu Yaā Dios de, te máni jniñu yúcuan cásáha de.

<sup>7</sup> Te chunaa rō ndihi jeē cátaū rō nuū tāca ñáyuu. Cuāha ró xúhun ñuu nuū tēe stútú xúhun ñuu, te cuāha ró xúhun renta nuū tēe stútú renta. Te na cóo respeto rō nuū ñáyuu cánuú coo respeto rō. Te na cóo yíñúhún ró nuū ñáyuu cánuú coo yíñúhún ró.

<sup>8</sup> Ma cótaū rō nuū ní ñn. Te íyó ñn jeē taú rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan ró. Chi ñayuu cundáhú ni jnáhan, je ni squícu i ndihi jeē ndácu ley yā.

<sup>9</sup> Chi súcuan ndácu ley jniñu: Ma cosíquí ndēē rō jnáhan ró, ma cáhni rō ndīyí, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te tāca jnúhun yáha jíin táca gá jniñu ndácu ley, ndihi-ni yíhi chíji jnúhun yáha: Cundáhú ni rō jnáhan ró nájnūhun cundáhú ni rō maá ró, áchí tufu.

<sup>10</sup> Te núu cundáhú ni yō jnáhan yó, te tu sáha yó ni ñn jeē tu íyó váha nuū i. Núu súcuan te jeē cundáhú ni yō jnáhan yó, yúcuan cúu jeē squícu yó ní ley yā.

<sup>11</sup> Súcuan sáha ró jíjnáhan ró, chi sáha ró cuenta jeē cuácuyajni quiví ndíji ya. Te ma cóo ga rō nájnūhun ñayuu quixí, jeē cúhuun ni rō. Chi vijna je ni cuyajni ga quiví jnáma ya

yohó vēsú quiví ní candíje yó jnúhun ya.

<sup>12</sup> Chi nájnūhun je yajni yāha jecuáā, te cuacundijin quiví jnáma ya yohó. Núu súcuan te na stóo yó jniñu jeē ni sáha yó núu néé, te na cúcutú yó jíin táca jniñu ndaā jeē caca yó jíin luz yā.

<sup>13</sup> Na cáca yíñúhún yó nájnūhun cánuú caca yó jíin luz yā. Ma nájini ró, ma sáha ró táca vico néé, ma cáca jnéni ró, ma sáha ró jniñu néé, ma cuajnáhan ró, ma cucuésún ni rō.

<sup>14</sup> Chi sa suhva cuiñi cutú ró jíin fuerza maá Jítóho yō Jesucristo, jeē ma cuáha ga rō jnúhun sáha ró jniñu cúní modo neé máá ró.

*Ma cahán neé yó coto yó jnáhan yó*

## 14

<sup>1</sup> Cuatáhú ró ñayuu jeē ná tu ije jíin jnúhun ya, te ma tejnáhan ró jíin i síquí tāca jnúhun jeē sín jéni ni i jíin máá ró.

<sup>2</sup> Chi íyó ñáyuu jeē jéni ni i jeē cúu caji i ndinuū-ni. Te íyó ñáyuu jeē ná tu ije jíin jnúhun ya, te cájeni ni i jeē tú váha caji i cūñu, chi jeē ní casocō ñayuu nuū ídolo cúu.

<sup>3</sup> Te rōhó tēe jeē yéji ndinuū-ni, ma cahán rō coto ró tēe jeē tu yéji ndinuū. Te rōhó tēe jeē tu yéji ndinuū, ma cahán rō coto ró tēe jeē yéji ndinuū. Chi Yaā Dios ni jetáhú yá tēe ún.

<sup>4</sup> Te rōhó, ¿ndé ñn cúu ró jéē cahán neé ró jito ró mozo Yaā Dios? Chi núu vāha chí néé sáha de, te máá yá cúu jeē sándaā jíin de, nasūu máá ró. Te tuú chi cuiñi vāha de, chi mozo maá Jítóho yō cúu de, te cuu sáha ya jeē ma stívi de.

<sup>5</sup> Te suni íyó ñáyuu jeē jéni ni jeē íi gā ñn quiví vēsú inga quiví. Te inga ñayuu chí jéni ni i jeē ñnuú-ni cúu tāca quiví. Te tācá i na cúndaā vāha ni maá i síquí jeē jéni ni i.

<sup>6</sup> Chi tēe jeē néé íi quiví, chíñúhún de máá Jítóho yō jeē sáha de súcuan. Te tēe jeē tu néé íi quiví, suni chíñúhún de Jítóho yō jeē sáha de súcuan. Te tēe jeē yéji ndinuū-ni, chíñúhún de máá Jítóho yō jeē sáha de súcuan, chí nácuatáhú de nuū Yaā Dios. Te tēe jeē tu yéji ndinuū, suni chíñúhún de



Jitoho yō jeē sāha de súcuan, te suni nácuatáhú de nuū yā.

<sup>7</sup> Chi ni ñn yó tu técu yō jeē váha máá-ni yó, te ni ñn yó tu jíhí yō jeē cuní maá yó.

<sup>8</sup> Chi núu técu yō, te técu yō jeē cuajníñu yó núu maá Jítoho yō. Te núu cuu yō, te suni cuu yō síquī jeē cuní maá Jítoho yō. Núu súcuan te núu jeē cótecu yō chí jéē cuu yō, te yñi yó ndaha Jítoho yō.

<sup>9</sup> Chi ni jihí Cristo te ni natecu yā, návāha cuu ya Jitoho nuū ñáyuu ni jíhí jíin ñáyuu técu.

<sup>10</sup> Te róhó, ¿naun jéni néé ni rō jíto ró jnáhan ró núu súcuan? ¿Te naun cújéé ni rō jíto ró de? Chi tāca yó cuiñi yó yuhu mesa Cristo jeē sándaā yā jniñu yó.

<sup>11</sup> Chi suhva yósó núu tútu ñi: Jendaá ndije chi nuū maá rí cuiñi yítí táca ñáyuu, te ndíhi i cahān jeē maá rí cúu Yaā Dios, áchí máá Jítoho yō.

<sup>12</sup> Núu súcuan te ná ñn ná ñn yó nacūaha yo cuenta nuū Yaā Dios ndese jniñu ni casáha yó.

*Ma sāha yó jéé quívi jnáhan yó cuéchi*

<sup>13</sup> Te jeē yúcuan ma cahán neé gá yō coto yó jnáhan yó. Chi sa tee ni rō jeē ma sāha ró ni ñn jniñu jeē sāha jeē stívi jnáhan ró te quívi i cuéchi.

<sup>14</sup> Te jíni rí jeē ni ñn jeē ni sāha Yaā Dios, tu stívi ánuá yō. Chi súcuan ni cucáhnū vāha ni rí síquī jeē candíje ri Jitoho yō Jesús. Te núu ñn ñáyuu jéni ni i jeē iyó jéé stívi ánuá i, yūcuán na te súcuan sāha un jíin máá i.

<sup>15</sup> Te núu jnáhan ró tu cúvāha ni de jeē yéji rō cūñu ni casocō ñáyuu nuū ídolo, chí jéni ni de jeē stívi un ánuá rō, núu súcuan te tu cúndáhú ni rō de jeē sāha ró súcuan. Coto má snāā rō ánuá jnáhan ró síquī jeē yéji rō ñn jeē jéni ni de jeē cuéchi cúu. Chi suni jehē maá de ni jihí Cristo.

<sup>16</sup> Ma sāha ró jniñu jeē cahán i síquī, vēsú jíni máá ró jeē iyó váha.

<sup>17</sup> Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chí sa suhva síquī jeē na sāha

yó jniñu ndaā, te coyūcu mání yō jíin jnáhan yó, te cusñi ni yō sāha Espíritu Santo.

<sup>18</sup> Te ñáyuu jeē súcuan jéjníñu nuū Cristo, chí cúsní ni Yaā Dios jíin i, te suni cájejnúhún ñáyuu i.

<sup>19</sup> Núu súcuan te na cóndihvī ni yō coyūcu mání yō, návāha jíin yúcuan chindéé ñájnáhan yó ije yó jíin jnúhun ya.

<sup>20</sup> Te ma cuáha ró jnúhun jeē ndeyu yéji rō snāā jniñu ni sāha Yaā Dios jíin jnáhan ró. Chi iyó ndoo ndije ndíhi jeē yéji yō, te vēsú súcuan te tú vāha jeē yéji rō ndeyu jeē sāha jíin jnáhan ró jéé caji de jeē jéni ni de jeē cuéchi cúu.

<sup>21</sup> Vāha ga ma caji rō cūñu, ni ma cóho ró vino, te ni ñn ma sāha ró jéé stívi ánuá jnáhan ró, te quívi de cuéchi, te caca yátá de nuū jnúhun cándíje de.

<sup>22</sup> Te núu cándíje ró jéé tú na vé sāha jeē yéji rō, te súcuan na cándíje máá-ni ró núu Yaā Dios. Te nacā ndetū tēe jeē tu sāha jíin ánuá de jeē cuéchi cúu núu caji de coho de.

<sup>23</sup> Te tēe yéji ñn jeē jéni ni de sanaa te stívi ánuá de, núu súcuan te sāha de cuéchi, chí tu cándíje de jeē iyó váha jeē yéji de. Chi tāca jéé sāha yó, núu tu cándíje yó jéé iyó váha, te cuéchi cúu.

*Jeē na sāha yó jéé cúsní ni jnáhan yó*

## 15

<sup>1</sup> Te yóhó jéé ni íje yó jíin jnúhun ya, cánuú condito yó ñáyuu jeē ná tu ije jíin jnúhun ya, návāha candíje vāha i. Te ma sāha yó jéé maá-ni yó cusñi ni.

<sup>2</sup> Chi ná ñn ná ñn yó na sāha yó jéé cúsní ni jnáhan yó, návāha quendōo vāha i te ije i jíin jnúhun cándíje i.

<sup>3</sup> Chi ni Cristo, tu ní sāha ya jeē cúsní ni máá yá, chí sa suhva jeē cúsní ni Tatá yā. Chi suhva cahán tutu ñi: Tāca jnúhun ndevāha jeē cácahān ndevāha ñáyuu síquī ní, ni ndívi síquī maá ná, áchí Cristo jíin Tatá yā.

<sup>4</sup> Chi tāca jnúhun jeē ni jécósō nuū tútu ñi nde jenahán, chí ni jécósō návāha stéén nuū yō, te nihīn yō jnúhun jeē sāha jeē cuandeyí ni yō te ndusñi ni yō. Te súcuan te cocuhun ni yō tāca jéé váha jeē cóo.

5 Te máá Yaā Dios jeē jéhe jnūhun cuandeyí ni jín jnúhun ndúsí ni, na sáha ya jeē cóo inuú ni rō, nájnūhun cúní Cristo Jesús.

6 Te súcuan te in-ni coo ró te inuú-ni cuu cahān rō jeē yóhoyo vāha Yaā cúu Yaā Dios, Tátá Jitoho yō Jesucristo.

*Jeē ni jítē jnūhun vāha ya nuū ñáyuu tēcá nación*

7 Núu súcuan te cuatáhú ró tēca jnāhan ró, nájnūhun ni jetáhú Cristo yohó, návāha cuni ñayuu jeē luu cújéhnú Yaā Dios.

8 Chi cáhán rī jeē ní quiji Cristo Jesús, ni sáha ya tēcá jniñu jeē quéndōo vāha ñayuu hebreo, návāha cundaā tēca jnúhun jeē ni jéjnūhun Yaā Dios nuū tēca jí i. Te súcuan ni steén Cristo jeē squícu Yaā Dios tēca jéē ni jéjnūhun ya.

9 Te suni ni quiji ya návāha ñayuu tēcá nación jeē tu jíní jnūhun ya, cahān i jeē yóhoyo vāha ni Yaā Dios jeē cundáhú ni yā i. Chi suhva cáhán tutu i:

Núu súcuan te cahān na jéē yóhoyo vāha ni ní, cuni ñayuu tēcá nación, te cata ná yaa jeē chiñúhún ná nihín.

10 Te cáhán tucu tutu i:

Róhó ñáyuu tēcá nación, inuú na cúsí ni rō jíní ñáyuu maá yá.

11 Te cáhán tucu:

Róhó ñáyuu tēcá nación, na cáhán rō jeē yóhoyo vāha ni Jitoho yō Yaā Dios,

te róhó ñáyuu tēcá-ni ñuu, suni na cáhán rō jeē yóhoyo cújéhnú ya.

12 Te suni ni tee Isaías jnūhun yáha:

Nuū yúcūn Isaí quiji in jeē cujéhnú, te ndacu ya jniñu nuū ñáyuu tēcá nación.

Te ñayuu ún chi cocuhun ni i tēca jéē sáha ya.

Achí tutu.

13 Te máá Yaā Dios jeē sáha jeē cáñuhun ni yō tēca jéē vāha jeē coo, na sáha ya jeē cóo sí ndasí ni rō jíní jéē cóo ndeyí ni rō siquí jeē cá candíje nihin ró yá. Te súcuan te cocuhun teyí gá ni rō tēca jéē vāha jeē coo, sáha poder maá Espíritu Santo.

14 Nání mání, cúcáhnú ni rī jeē vāha ndasí cándihví ni rō jíní jniñu vāha, te vāha ndasí cájecūhun ni rō, te cúu stíhví jnāhan ni rō.

15 Te ni jeni ni rī jeē tee ri carta yáha cáhán cají rī jíní ró jijnāhan ró, návāha víhyá gā na cócuhun ni rō tēca jnúhun yáha. Chi súcuan sáha ri siquí jeē vāha ni Yaā Dios te ni jéhe ya jniñu nuū rī

16 jeē jejniñu ri nuū Jesucristo, jeē nácani ri jnūhun nuū ñáyuu tēcá nación jeē tu jíní jnūhun ya. Te nácani ri jnūhun vāha Yaā Dios nuū i jeē jnáma ya i. Súcuan sáha ri návāha ñáyuu tēcá nación, cuu squíví ri i ndaha ya jeē cúu i nájnūhun in jeē socó rī nuū yā jeē cúsí ni yā jíní. Chi ni sáha Espíritu Santo jeē iyó ndoo íyó í i nuū yā.

17 Núu súcuan te siquí jeē candíje ri Cristo Jesús, te cúsí ni rī jeē jejniñu vāha ri nuū Yaā Dios.

18 Chi ma cúu cahān rī siquí jniñu cása ha inga tēe, chi máá-ni siquí ndese ni jejniñu Cristo ruhū jeē sáha ri jeē ñáyuu tēcá nación tu ní jíní jnūhun Yaā Dios, vijna jétáhú i nuū yā. Chi súcuan ni cuu jíní jnúhun ni cahān rī jíní jniñu ni sáha ri.

19 Chi ni sáha ri jniñu jéhnú ndíso poder jeē steén jeē cujéhnú ya, te ni iyo poder Espíritu Santo jíní rí. Te súcuan ni nacani ndihí ri jnūhun ndese jnáma Cristo ñayuu. Te ni nacani ri nde ñuu Jerusalén, jíní ndihí tēcá ñuu, jíní nde ní región Ilírico.

20 Súcuan cúu jeē ní condihví ni rī ni nacani ri jnūhun jeē jnáma ya ñayuu. Te ni jehēn rī nuū ñáyuu jeē ná tu cuni jnūhun Cristo, chi tu ní cúní rī nacani ri nuū ñáyuu jeē jé ni jini i ni canacani inga tēe.

21 Chi sa suhva ni sáha ri nájnūhun cáhán tutu i:

Tēca ñáyuu jeē tu ní quiji jnūhun ya nuū i, vijna chí cuni i jnūhun ya,

te tēca ñáyuu jeē tu ní jíní cuíti jnūhun ya, vijna chí jecūhun ni i.

Achí tutu.

*Jeē ñúhun ni Pablo jeē quihín de Roma*

22 Te jeē yúcuān cúu jeē cuehē jínu ni cujnéñu ri, te tu ní cúu jecondēhe rí rohó jíjnáhan ró.

23 Te vijna chi ni ndihí jniñu ri ní cáhnu tācá región ndañúu yáha. Te je ni cuu cuehē cuiyā jeē cuní rī jeē rī nuū rō.

24 Núu súcuān te ñúhun ni rī jecondēhe rí rohó jíjnáhan ró núu na yáha ri quihín rī España. Te ñúhun ni rī jeē núu je ni cusí ni rī jeē ní jito jnáhan yó, yúcuán na te chindéé ñáhán ró ruhū jeē quihín gā rī.

25 Te xīhna gā na quihín rī ñuu Jerusalén quindēca ri xūhún cuu hermano cáyūcu yúcuān.

26 Chi ñayuu Macedonia jíin Acaya ni cajeni ní i jeē cáquin i xūhun quihín nuū hermano cándoho ndáhú ñuu Jerusalén.

27 Chi súcuān ni cacusí ni i ni casáha i. Te íyó váha jeē súcuān, chi máá i jeē cácuu i ñayuu tāca gá nación, táu i jeē sáha váha i nuū ñayuu hebreo un. Chi ñayuu hebreo ni casáha jeē ní quiji jnūhun Yaā Dios nuū i jeē quéndōo váha ánuá i sáha. Jeē yúcuān cánuú jéē chindéé ñáhán i ñayuu hebreo cácuandíje jíin ndajniñu ñayívi yáha.

28 Núu súcuān te jeē jínu jniñu yáha jéē quindēca ri xūhun yáha nuū i, yúcuán na te jecondēhe rí rohó jíjnáhan ró jéē yáha ri quihín rī España.

29 Te jíni váha ri jeē quiví jinú rī nuū rō, te váha ndasí quendōo ró jéē nacani ga rī jnūhun váha Cristo nuū rō.

30 Hermano jijnáhan ró, cáhán ndahú rí jíin ró jeē chindéé ñáhán ró ruhū cacān tahu rō jehē rī nuū Yaā Dios síquí jniñu ndúcú ndéyí rí. Súcuān sáha ró síquí jeē candíje yó Jítoho yō Jesucristo, jíin síquí jeē cundáhú ni yō jnáhan yó sáha máá Espíritu.

31 Te cacān tahu rō jeē na cácu ri nuū téē región Judea jeē tu cácuandíje, jíin jéē na cusí ni tācá hermano ñuu Jerusalén jeē quindēca ri xūhun yáha cuu de.

32 Te súcuān te núu cuní Yaā Dios te jecondēhe rí rohó jíjnáhan ró, te cusí

ni yō, te nanihín ni rī jeē condee rī jíin ró.

33 Te máá Yaā Dios jeē jéhe jnūhun ndeyí sí ni, na cóo ya jíin ró jíjnáhan ró. Amén.

*Jeē cahán Pablo jeē sándeýí ni i*

## 16

1 Te vijna te cáhán rī jíin ró jíjnáhan ró jéē na chindéé ñáhán ró hermana Febe, chi cúu ña ñahan jéjníñu jeē síquí jnūhun ya nuū ñayuu cácuandíje ñuu Cencrea.

2 Te cuatáhú ró ña nájnūhun cuní maá Jítoho yō, chi súcuān cánuú sáha hermano cácuandíje. Te chindéé ñáhán ró ña na-ni vé cúu jeē jíni ñúhún ña, chi súcuān ni chindéé ñáhán máá ña cuehē ñayuu, te suni nde ruhū.

3 Cahán rō jíin Priscila jíin Aquila jeē sándeýí ni ndíndúú de, áchí rí, chi cáchindéé ñájnañhan de jíin rí síquí jniñu Cristo Jesús.

4 Chi ná ni íyo jnūndóho jeē cuu rī nuú, te ni cachundeyí ni de ni canducú de scácu de ruhū, vésú suni cuu maá de núú. Te nácuatáhú rí nuū ndíndúú de, te nasūu máá-ni ruhū, chi suni tāca grupo ñayuu cácuandíje tācá nación.

5 Te suni cahán rō jíin ñayuu cácuandíje ndútútú vehe de, sándeýí ni i, áchí rí. Te cahán rō jeē sándeýí ni Epeneto, téē maní rī jíin. Chi ñuu Acaya, máá de cúu jeē ní candíje xīhna gā nuū Cristo.

6 Suni cahán rō jeē sándeýí ni María, ñahan jeē ní jejniñu ndasí jeē síquí jnūhun ya mēhñu ró jíjnáhan ró.

7 Te cahán rō jeē sándeýí ni Andrónico jíin Junias, téē cácuu jnáhan ñuu rī jeē ní cahín jíin rí vecāa. Te tācá apóstol chi cájejnúhún de ndíndúú téē jíñá, te xīhna gā de ni cacandíje Cristo vésú maá rí.

8 Cahán rō jeē sándeýí ni Amplias, téē maní rī jíin, chi cándíje de Jítoho yō.

9 Te cahán rō jeē sándeýí ni Urbano, téē chindéé ñájnañhan jíin yó síquí jniñu Cristo Jesús, te suni súcuān Estaquis, téē jeē maní rī jíin.

10 Suni cahān rō jeē sándeýí ni Apeles, tēe jeē ni stéén jeē candíje vāha de Cristo, te suni sūcuan cahān rō jíin ñáyuu vehe Aristóbulo.

11 Cahān rō jeē sándeýí ni Herodión, tēe cúu jnāhan ñuu rī. Te suni sūcuan ñáyuu vehe Narciso jeē cá candíje maá Jítóho yō.

12 Te suni cahān rō jeē sándeýí ni Trifena jíin Trifosa, ñahan cásájniñu siquī jnúhun máá Jítóho yō. Te suni sándeýí ni Pérsida, hermana jeē maní yō jíin, chi suni ni sájniñu ndasí ña siquī jnúhun Jítóho yō.

13 Te cahān rō jeē sándeýí ni Rufo, tēe cájejnúhún ñáyuu jeē vāha cándíje de máá Jítóho yō. Te suni sūcuan cahān rō jíin náná de, te máá ña suni ni jito ña ruhū nájñuhun jeē naná rī cúu ña.

14 Te cahān rō jeē sándeýí ni Asíncrito jíin Flegonte jíin Hermas jíin Patrobas jíin Hermes jíin táca hermano jeē cáyūcu jíin de.

15 Te suni sūcuan Filólogo jíin Julia jíin Nereo jíin cuáha de, jíin Olimpas jíin ndíhi hermano cá candíje cáyūcu jíin de jíināhan de.

16 Te jeē cahán táca ró jíin jnāhan ró, te yíñuhún techūhu ró ndaha i. Te táca grupo ñáyuu cá candíje nuū Cristo, cahán i jeē na sándeýí ni rō.

17 Te cahán ndahú rí jíin ró, hermano jíināhan ró, jéé cóto ró máá ró nuū ñáyuu cútu cu ni te ndúcú stívi jnāhan jíin jnúhun tu quíjnāhan jíin jéé ní cacutúhva ró. Te cujiyo ró núu i jíināhan i.

18 Chi ñáyuu sūcuan, tu jéjníñu i nuū Jítóho yō Jesucristo, chi máni ndíhví ni i siquī jeē cáji i. Te yóhyo ndúxí i jíin jnúhun cácahān i, te sūcuan stáhú i ñáyuu jeē tu jíiní vāha.

19 Te máá ró jíināhan ró, chi je cájini ndíhi ñáyuu ndese vāha cájetáhú ró nuū yā, te jeē yúcu cu sūñ ni rī. Te cúni rī jeē cóo listo vāha ró sáha ró jniñu vāha, te ma sáha ró jniñu néé.

20 Te máá Yaā Dios jeē jéhe jnúhun ndeyí sñ ni, yachí sáha ya jeē cúndeyí ró siquī jexeén jeē cúu Satanás. Te

ñúhun ni rī jeē Jítóho yō Jesucristo na sáha ya jeē vāha róhó jíināhan ró.

21 Sándeýí ni rō jíināhan ró, áchí Timoteo, tēe chíndéé ñáhán jíin rí siquī jnúhun ya. Te suni sūcuan cácahān jnāhan ñuu rī Lucio jíin Jasón jíin Sosípater.

22 Te ruhū jeē naní Tercio, jeē tée ri carta yáha jéé cahán Pablo, suni cáhán rī jeē sándeýí ni rō jeē cá candíje ró Jítóho yō.

23 Te Gayo, tēe ni jéhe núu vehe ndéé rúhú Pablo, cáhán de jeē sándeýí ni rō jíināhan ró. Te suni jéhe núu de vehe nuū táca ñáyuu cá candíje. Te suni sūcuan cáhán Erasto, tēe cúu tesoroero ñuu yáha, te suni sūcuan cáhán hermano Cuarto.

24 Te ñúhun ni rī jeē maá Jítóho yō Jesucristo, na sáha ya jeē vāha róhó jíināhan ró. Amén.

*Jnúhun sándíhi jéé cahán jeē yóhyo cújénu ya*

25 Te vijna na cáhán yō jeē yóhyo cújénu Yaā Dios. Chi máá yá cuu sáha jeē cuñi níhin ga ró jíināhan ró jíin jnúhun jnáma ya rohó jeē nácani rī, jíin jnúhun Jesucristo jeē steén rī. Chi sūcuan ni steén Yaā Dios jnúhun sáhi yá, jeē ní yisáhi ní cáni nde ná tu jecōo ñayíví.

26 Te vijna te je ni nane cájí. Chi jíin tútu íi jeē ní catee tēe ni canacani jnúhun ya, ni jité núu jnúhun sáhi yáha nuū ñáyuu táca nación, návāha candíje i te cuatáhú i. Chi Yaā Dios jeé técu ní cáni, sūcuan ni ndacu ya jniñu.

27 Te ní cáni na cáhán yō jeē yóhyo cújénu Yaā Dios siquī jniñu ní sáha ya jeé jíin Jesucristo. Chi máá ñn-ni ya iyó te yóhyo ndíchí yá. Sūcuan na cóo. Amén.

## CARTA HN JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, te ni cana Yaā Dios ruhū cúu rí apóstol Jesucristo. Chi súcuan ni nujnahan ni yā ni tají yá ruhū nacani ri jñūhun ya. Te ndindúú rí jín hermano yō Sóstenes

<sup>2</sup> cátee ri carta yáha cuájeē nuū rohó ñayuu ñuu Corinto jeē cácanđeje ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jijnáhan ró jeē coo ndoo coo iī ró nuū yā. Te ni cana ya rohó ndé jín táca gá ñayuu jeē ndácunehen i máá Jítoho yō Jesucristo, ndé-ni cúu nuū cáhīyo i. Chi Jítoho táca yó jín i cúu ya.

<sup>3</sup> Te cáñuhun ni rī jeē Tatá yō Yaā Dios jín Jítoho yō Jesucristo na sáha ga yā jeē váha róhó, te sáha ya jeē coo ndeyí coo sī ni rō.

*Cristo sáha ya táca jeē váha yóhó*

<sup>4</sup> Te níní nácuatáhú rí nuū Yaā Dios jeē siquí rohó jijnáhan ró, chi jeē jín Cristo Jesús ni sáha ya jeē váha róhó.

<sup>5</sup> Chi cáyihí ró ndaha Cristo, te jeē yúcuan ní sáha Yaā Dios jeē cáhīyo cúca ró jín táca jñūhun ya, chi cájecūhun vāha ni rō te cúu nácani ró.

<sup>6</sup> Chi súcuan cúu jeē cáhīn nīhin ró jín jñūhun Cristo jeē ní canacani ri nuū rō.

<sup>7</sup> Te súcuan te tu cúmanī ni ññ tahū jeē jéhe ya cuu ánuá rō níní jeē cándetu ró quívī jeē quénda ndijin Jítoho yō Jesucristo.

<sup>8</sup> Te máá yá chi sáha ya jeē cuiñī nīhin ró nde na jínu quívī, návāha ma cóo cuēchi siquí rō quívī ndíji Jítoho yō Jesucristo.

<sup>9</sup> Te squícu Yaā Dios táca jeē ni jéjñūhun ya, te ni cana ya rohó jijnáhan ró návāha cuni jnáhan ró jín Séhe ya, Yaā cúu Jítoho yō Jesucristo.

*Siquí jeē ma cóo sñn ni i jín jnáhan i*

<sup>10</sup> Hermano, nde jín sñvī Jítoho yō Jesucristo cahán ndahú rí jín ró jeē inuú-ni na ndájnūhun ró jijnáhan ró, te ma cóo sñn ni rō. Chi vāha inuú na cóo ni rō jín táca jeē cájeni ni rō.

<sup>11</sup> Súcuan cáhán rī, ñánī mánī, chi ni cacastūhun ñayuu vehe Cloé nuū rī jeē cátejñáhan ró.

<sup>12</sup> Chi táca ññ rō sñn sñn cácahān rō: Ruhū chi jín Pablo índichi rī, cácahān sava ró. Te sava ga rō: Ruhū chi jín Apolos. Ruhū chi jín Pedro. Ruhū chi jín Cristo. Cácahān rō.

<sup>13</sup> Te jeē cácahān rō súcuan ¿te á cájeni ni rō jeē sñn sñn Cristo iyó jeē cánacani ri jñūhun? ¿Te á ruhū Pablo ni jihí jicā cruz jehē rō? ¿Chí jín sñvī ruhū ni cajendute ró, chí naún?

<sup>14</sup> Tú cuíti. Te na cútahū rī nuū Yaā Dios jeē tú cuehē rō ni scuándute ri, chi máá Crispo jín Gayo-ni,

<sup>15</sup> návāha ma cahán ni ññ rō jeē jín sñvī rí ni jendute ró.

<sup>16</sup> Te sá núcūhun ni rī jeē suni ni scuándute ri Estéfanos jín ñayuu vehe de. Te sanaa te súcuan-ni cúu ñayuu ni scuándute ri, jéni ni rī.

<sup>17</sup> Chi tu ní téjñíñu Cristo ruhū jeē scuándute ri, chi sa suhva jeē nácani ri jñūhun jeē jnáma ya ñayuu. Te tu ní ndúcú rí jeē steén rī nuū rō ññ modo ndichí jeē ma jécūhun ni rō, chi núu súcuan te ma cúu jecūhun vāha ni rō jñūhun jeē ni jihí Cristo jicā cruz.

*Jín Cristo ni steén Yaā Dios poder yā jín jñūhun ndíchí yá*

<sup>18</sup> Te jñūhun jeē ni jihí yā jicā cruz jeē jnáma ya ñayuu, chi jñūhun cánée íi cúu nuū ñayuu cuango nuū jnahnú ndetū. Te máá yó jeē cuahán yō nuū cácu yó, chi jíní yō jeē jñūhun Yaā Dios jeē ndíso poder cúu.

<sup>19</sup> Chi suhva yósó núu tútu iī jeē ni cáhān Yaā Dios:

Na snáa rī jñūhun ndíchí cácahān ñayuu ndichí cuenta ñayīvī yáha,

te ma cuatáhú rí jñūhun cácahān ñayuu jeē jéni ni jeē jíní vāha.

Achí yá.

<sup>20</sup> Núu súcuan ¿te ndé cuajñíñu tēe ndíchí cuenta ñayīvī yáha, jín tēe

cástéén tutu, jíín téé cánanducú yúcún síquī jeē steén ñayuu ñayīvī yáha? Chi tāca jnúhun ndíchí cuenta ñayīvī yáha, ni cahān Yaā Dios jeē jnúhun cánéé í cūu.

<sup>21</sup> Te yōhyo ndíchí sáha Yaā Dios. Chi tāca jnúhun ndíchí cájini ñayuu ñayīvī, ni cachi ya jeē tu jéjníñu jeē cūni i ndese Yaā cūu ya. Yūcuán na te ni nujnahan ni yā jeē jíín jnúhun ya jeē cánacani ri te jnama ya ñayuu cácaníje, vésú cájeni ni ñayuu ñayīvī jeē jnúhun cánéé í cūu.

<sup>22</sup> Chi ñayuu hebreo, máni cáculi i jeē sáha Yaā Dios cuehē jniñu jéhnú jeē steén poder yā. Te ñayuu griego chí máni síquī jnúhun ndíchí cándihvī ni i.

<sup>23</sup> Te máá rí chí sa suhva cánacani ri jnúhun jeē ni jíhī Cristo jíca cruz jeē jnama ya ñayuu. Te jnúhun yáha sáha jeē jnánini ni ñayuu hebreo, te ñayuu tāca gá nación chí cájeni ni i jeē jnúhun cánéé í cūu.

<sup>24</sup> Te ñayuu jeē ní cana ya ni quīvicoo ndaha ya, vésú ñayuu hebreo chí ñayuu griego, chí jíni i jeē jíín Cristo ni steén Yaā Dios poder yā jíín jnúhun ndíchí yá.

<sup>25</sup> Chi jnúhun Yaā Dios jeē cácahān ñayuu jeē jnúhun cánéé í cūu, yōhyo ndíchí gá vésú jnúhun ndíchí ñayuu. Te cájeni ni ñayuu jeē tú na poder yā ná ni jíhī Jesús jeē jnama ya yohó, te tuú chí níhin téyí gá poder yā ún vésú poder ñayuu.

<sup>26</sup> Hermano, máá ró cácuu jeē ní cana ya ni quīvicoo ró ndaha ya. Te condēhe ró jeē tú cuehē rō ndíchí jíín jnúhun ñayīvī, ni tú cuehē rō cácuu sēhe ñayuu cújéhnú.

<sup>27</sup> Chí sa suhva ni nacāji Yaā Dios tāca jéé cácahān ñayuu ñayīvī jéé tu ndíchí cuíti, návāha coo jnúhun canu nuū tāca jéé ndíchí. Te ni nacāji ya ñayuu tu téyí ini ñayīvī, návāha coo jnúhun canu nuū ñayuu teyí.

<sup>28</sup> Te suni ni nacāji Yaā Dios tāca jéé tu cújéhnú ini ñayīvī, jíín táca jéé sajéé ni i nuū, nde jíín táca jéé tú jniñu cájeni ni i, návāha snúu ya tāca jéé cújéhnú ini ñayīvī.

<sup>29</sup> Súcuan ni sáha ya návāha ni ñn ñayuu ma cūu sátéyí i máá i nuū yā.

<sup>30</sup> Te máá ró jíjnáhan ró chí ni sáha Yaā Dios jeē nduú ró jíín Cristo Jesús. Chí nde nuū maá yá ni canihīn yō jnúhun ndíchí, te ni ndahva yā cuēchi yó, te ni sáha ya jeē iyó ndoo iyó íi yō nuū yā, chí ni jnama ya yohó.

<sup>31</sup> Te jeē yúcuan na cóo nájñuhun cáhán tutu íi: Núu ñn ñayuu cuní i cutéyí i, te na cutéyí i síquī jeē ni sáha máá Jítoho yō jehē i, áchí.

*Jeē nacani Pablo jnúhun jeē ni jíhī Cristo*

## 2

<sup>1</sup> Te ruhū, hermano, ná ni jeē rī nuū rō jíjnáhan ró jéé nacani ndaā rī jnúhun Yaā Dios, te tu ní nacani ri jnúhun ndíchí jéé ma jécūhun ni rō.

<sup>2</sup> Chí ná ni íyo ri jíín ró te tú na inga jnúhun ní ndúcú rí castūhun rí nuū rō, chí máni máá jnúhun Jesucristo jeē ni jíhī yā jíca cruz jeē jnama ya yohó.

<sup>3</sup> Te ná ni jinū rī nuū rō jíjnáhan ró, chí tú na fuerza rī, te yúhú rí, te quísi i ruhū.

<sup>4</sup> Te ná ni nacani ri jnúhun nuū rō, chí nasūu jíín jnúhun ndíchí ñayuu ñayīvī ní scándíje ri rohó, chí sa suhva jíín máá poder Espíritu yā ni steén rī nuū rō jíjnáhan ró,

<sup>5</sup> návāha ma cuíñi ró síquī jnúhun ndíchí cácahān ñayuu, chí cuíñi ró síquī poder Yaā Dios.

*Jíín Espíritu te steén Yaā Dios ndese Yaā cūu ya*

<sup>6</sup> Te ndaā chí ndíchí cácahān rī jíín ñayuu jeē jé ni ije jíín jnúhun cándíje i ya. Te nasūu jnúhun ndíchí jéé iyó ini ñayīvī yáha, ni nasūu jnúhun ndíchí cácahān téé cácujeñnu ñayīvī yáha, chí téé ún yāha-ni jeē cácujeñnu de.

<sup>7</sup> Chí jnúhun cácahān rī cūu jnúhun ndíchí máá Yaā Dios jeē ní yisāhí. Chí jnúhun ndíchí un jéé ní yisāhí, ni jequin Yaā Dios nde ná tu jecōo ñayīvī, návāha cácu yó jéé cótecu yō ní cáni sáha jnúhun ún.

<sup>8</sup> Chí ni ñn téé cújéhnú nuū ñayīvī yáha, tu ní jécūhun ni de jnúhun ndíchí

un. Chi núu ni jecūhun ni de núú, te ma cáhni cuiti de máá Jítóho yō, Yaā cujéhuu luu.

<sup>9</sup> Chi cúu nájnūhun cáhán tutu:

Tāca jēē ni sātūhva Yaā Dios jeē cúu ñayuu jeē maní jíin yá,  
ni ñn ún tu ní jító jínúū ñayuu, ni tu ní jíni sōho i,

ni tu ní quíji jeē súcuan cani ni i.

Achí tutu.

<sup>10</sup> Te máá yó jijnáhan yó chi ni steén Yaā Dios tācá un núū yō jeē jíin Espíritu yā. Chi máá Espíritu jíni vāha ya te steén yā ndihi, chi nde ndihi jeē ndichí gá máá Yaā Dios.

<sup>11</sup> Chi ni ñn ñayuu ma cúu cuni i ndese jéni ni inga ñayuu, chi máá-ni i jíin ánuá i cúu jeē jíni. Te suni súcuan ni ñn ñayuu tu jíni i ndese jéni ni Yaā Dios, chi máá-ni Espíritu Yaā Dios cúu jeē jíni.

<sup>12</sup> Te máá yó chi ni nihīn yō Espíritu un jēē véji nuū Yaā Dios, te tu cájeni ni yō nájnūhun cájeni ni ñayuu ñayīví. Te jeē yúcuan cúu jeē cájecūhun ni yō ndese ni sáha Yaā Dios jeē váha yóhó síquī jeē váha ni yā.

<sup>13</sup> Te suu síquī tāca jēē yáha cúu jeē cácahān rī, te nasūu jíin jnúhun jeē castéén ñayuu ndichí, chi jíin jnúhun jeē steén máá Espíritu. Chi cástéén rī jnúhun Espíritu nuū ñayuu cánevāha Espíritu.

<sup>14</sup> Te ñayuu ñayīví tu cájetáhú i tāca jnúhun jeē véji nuū Espíritu Yaā Dios, chi cájeni ni i jeē jnúhun cánéé íi cúu. Te ma cúu jecūhun ni i, chi tu cánevāha i máá Espíritu jeē sáha jeē jécūhun ni i.

<sup>15</sup> Te ñayuu cánevāha Espíritu, chi cájecūhun ni i ndese íyó ndihi-ni. Te ñayuu ñayīví ma cúu jecūhun ni i ndese ñayuu cácuu ñayuu ún.

<sup>16</sup> Chi suhva cáhán tutu íi: ¿Ndé ñn cuu cuni ndese jéni ni máá Jítóho yō? ¿Te ndé ñn cuu steén nuū yā? Ni ñn ma cúu. Achí tutu. Te vēsú súcuan te máá yó chi cájeni ni yō nájnūhun jéni ni Cristo.

*Jeē cáchindéé ñájnáhan de cájejnīñu de nuū Yaā Dios*

### 3

<sup>1</sup> Te ruhū, hermano, tu ní cúu cahān rī jíin ró jijnáhan ró nájnūhun cáhán rī jíin ñayuu jíca jíin Espíritu. Chi ni cahān rī jíin ró nájnūhun jíin ñayuu cájica jíin modo máá, chi cácuu ró nájnūhun sūchi lúli jēē ná tu ije ró jíin jnúhun Cristo.

<sup>2</sup> Ni steén rī nuū rō jeē tú yí, chi cácuu ró nájnūhun sūchi lúli jēē jéxin gā. Te tu ní cáhán rī jíin ró jnúhun yí jeē cúu nájnūhun jeē ndáva jeē yéji ñayuu ni ije, chi ná tu canda ró jíin ndé saá. Te ni vijna ná tu canda ró jíin.

<sup>3</sup> Chi cájica ga rō jíin modo neé máá ró. Chi cácuuésún ni rō, te cácajnáhan ró, te cácusín ni rō. Núu súcuan te cácuu ró nájnūhun ñayuu ñayīví jēē cájica jíin modo neé máá.

<sup>4</sup> Chi ñn ró cáhán: Ruhū chi jíin Pablo índichi rī. Te inga rō cahán: Ruhū chi jíin Apolos. Te súcuan cúu jeē cájica ró jíin modo neé máá ró

<sup>5</sup> ¿Te ndé ñn cúu ruhū, te ndé ñn cúu Apolos núu súcuan? Chi máá mozo-ni Yaā Dios cácuu rī, te ni jejnīñu ya ruhū návāha candíje ró máá Jítóho yō. Chi ná ñn ná ñn rī ni sáha jniñu ndese ni jēhe máá Jítóho yō nuū rī.

<sup>6</sup> Ruhū, nájnūhun ni taji rī jnúhun ya ini anuá rō, te Apolos, nájnūhun ni chuhun de ndute cúu jeē ní steén gā de nuū rō. Te máá Yaā Dios cúu jeē ni scuéhnu jnúhun ini anuá rō.

<sup>7</sup> Núu súcuan te tú na vé cúu sáha tēe táji ni tēe chúhun ndute, chi sa suhva máá Yaā Dios cúu jeē scuéhnu.

<sup>8</sup> Te tēe táji jíin tēe chúhun ndute, ñn-ni cácuu de. Te tācá de chi cuāha ya yāhu nuū de ndese jniñu ni casáha ñn ñn de.

<sup>9</sup> Chi ruhū jijnáhan rī chi tēe chindéé ñájnáhan cájejnīñu nuū Yaā Dios cácuu rī. Te máá ró jijnáhan ró cácuu nájnūhun itu Yaā Dios jeē jícu ya jíin.

Te suni nájnūhun ñn vehe jeē sáha Yaā Dios cácuu ró.

<sup>10</sup> Te ruhū chi cúu rī nájnūhun ñn maestro albañil jeē ní jequin rī cimientu vehe ún, cúu jeē ni scándíje rī rohó. Te inga de cásama de síquī, cúu jeē castéén gā de nuū rō. Núu súcuan

te ná ñn ná ñn de na cóo cuidado de ndese sáma de siquĩ.

<sup>11</sup> Te Jesucristo cúu cimientu vehe ún, te ni ñn ma cúu caquin inga cimientu, chi máá yá cúu jeē ní ndahva cuēchi ró.

<sup>12</sup> Te tāca ñáyuu cá candíje, chi sáha i vehe siquĩ cimientu un, núu jíin ndajniñu vāha nájnūhun oro chí plata chí yūu luu, chí jíin jeē yachí naa, nájnūhun yujnu chí ite chí ndayóhō.

<sup>13</sup> Te natūu jniñu un jeē ní sáha ñn ñn i, te suu cúu ndese ní condihvĩ ni i siquĩ maá yá. Chi máá quivĩ juicio jeē sándaā yā jniñu ñayuu, quivĩ ún natūu cájí jniñu i. Chi jíin ñúhūn quiji quivĩ ún, te nájnūhun sáha ñuhūn jeē jéhmū tāca jeē cúu cayū, súcuan coto ndee ya jniñu ñn ñn i.

<sup>14</sup> Te núu tú cayū jniñu ní sáha i siquĩ cimientu un, te nihĩn i tahū i.

<sup>15</sup> Te núu tu ní cóndihvĩ ni i jíin jniñu ya, te ma nihĩn i tahū i, chi nájnūhun cayū jniñu i. Te máá i chi cācu ánuá i, vēsú nájnūhun je yajni cayū i nuū yáñuhūn.

<sup>16</sup> ¿A tu cájini rō jeē cácuu ró nájnūhun templo Yaā Dios, chi ndée Espíritu Yaā Dios ini anuá rō?

<sup>17</sup> Te núu ñn tēe stívĩ de templo Yaā Dios, te snáhnú ndetū yā tēe ún. Chi ndoo ndasí cúu templo yā, te suu cácuu máá ró.

<sup>18</sup> Ni ñn ró ma stahú ró maá ró jíin jeē jéni ni rō. Núu ñn ñayuu jéni ni i jeē ndichí i jíin jnúhun ñayivĩ yáha, vāha ga na siáa i ún, návāha coo ndichí ndije i jíin jnúhun máá yá.

<sup>19</sup> Chi jnúhun ndichí jeē iyó ini ñayivĩ yáha, jnúhun cánée íi cúu nuū Yaā Dios. Chi cáhán nuū tutu íi: Ñayuu ndichí cuenta ñayivĩ, chi nájni ya i siquĩ jnúhun ndichí i jeē jési i jnúhun ya, achí.

<sup>20</sup> Te cáhán tucu tutu: Máá Jítoho yō jiní yā tāca jeē jéni ni ñayuu ndichí, chi máni jeē jéni cāhá ni i, achí.

<sup>21</sup> Núu súcuan te ni ñn ró má cutéyĩ ró jeē siquĩ ni ñn tēe ndichí. Chi cuenta maá ró cúu ndihĩ-ni.

<sup>22</sup> Cúu Pablo, cúu Apolos, cúu Pedro jeē castéén nuū rō. Cúu ndihĩ jeē iyó

ini ñayivĩ, jeē iyó vijna jíin jeē quíji. Te vēsú núu cotecu rō chí cuu rō, te ndihĩ-ni chí cuenta maá ró cúu.

<sup>23</sup> Te máá ró cácuu cuenta Cristo, te Cristo cúu cuenta Yaā Dios.

*Jeē casájniñu apóstol siquĩ jnúhun ya*

## 4

<sup>1</sup> Núu súcuan te na cáni ni rō jijnáhan ró jeē mozo-ni nuū Cristo cácuu ri, jeē ní tejniñu ya ruhū jeē steén rĩ jnúhun Yaā Dios jeē ní yisāhi ndé jenahán.

<sup>2</sup> Te ndaā chí tēe jeē sájniñu siquĩ ún, iyó responsable ná ñn ná ñn de jeē squĩcu vāha de.

<sup>3</sup> Te ruhū tu sáha ri cuenta núu cánanducú ró siquĩ rĩ ndese sáha ri, chí núu cánanducú ñáyuu cácujehmū ini ñayivĩ. Te ni máá rĩ tu chíhi ri cuenta siquĩ maá rĩ.

<sup>4</sup> Chi vēsú jiní rĩ jíin ánuá rĩ jeē tú na cuēchi ri, te nasūu yúcuan cúu jeē quéndōo ndaā rĩ, chí máá Jítoho yō cúu jeē jíto ndee ruhū.

<sup>5</sup> Jeē yúcuan ma nánducú ró siquĩ jniñu jnáhan ró, chí nde na quéē maá quivĩ te cuni rō. Chi nde na ndíji máá Jítoho yō te nastūu ndijin yā tācá jniñu jeē yisāhi núu néē, te steén ndijin yā tāca jeē jéni ni ñayuu jíin ánuá i. Yūcuán na te máá Yaā Dios cuajnúhún yá ná ñn ná ñn i ndese ni casáha i.

<sup>6</sup> Hermano, tāca jnúhun yáha ní cahán rĩ návāha quendōo vāha ró jijnáhan ró. Te ni cachi rĩ jeē maá rĩ jíin Apolos cácuu ri mozo-ni nuū yā, te súcuan cácuu ri ñn ejemplo nuū rō. Te cáhán rĩ jeē súcuan cácuu ri, návāha cutūhva ró cani ni rō maá-ni nájnūhun cáhán tutu íi. Chi ma sandúxí ró jeē cuajnúhún ró ñn tēe steén, te inga de tuú.

<sup>7</sup> ¿Te naun cácutéyĩ ró nuū jnáhan ró núu súcuan? ¿Te na vé cúu jeē iyó núu rō jeē tu ní cacutahū rō nuū yā? Te núu ni cacutahū rō nuū yā, ¿te naun casátéyĩ ró maá ró jeē nájnūhun jeē nasūu jeē ní cacutahū rō cúu?

<sup>8</sup> Va je ni cacucúca ró, chí je cánevāha ró ndihĩ, cájeni ni rō. Te je cándacu máá ró jniñu, te ni tuá cájini ñúhún ró ruhū, cájeni ni rō. Tú



vāha jeē súcuan cácutéyí ró. Te nacā jeē váha núu jeē cándacu ndije nde ró jniñu núu, návāha suni cuāha ró jnúhun jeē ndacu nde ri jniñu jíin ró jijnáhan ri.

<sup>9</sup> Te íyó jéni ni rī jeē ruhū tēe cácuu apóstol, ni sáha Yaā Dios jeē cácuu rī nájnūhun tēe núu ga nuū ñáyuu, nájnūhun tēe jeē jé ni cundaā jeē cúu. Te ní ñáyiví jíin andiví cándēhe váha nuū rī, cúu ndajéhé Yaā Dios jíin ñáyuu.

<sup>10</sup> Chi jeē siquí Cristo te cácahān i jeē tēe cánéé cácuu ri. Te tāca rōhó va ndíchí ró jíin jnúhun Cristo, cájeni ni rō. Te tāca rúhū chi tu fuerza rī, te rōhó va íyó fuerza rō, cájeni ni rō. Te rōhó chi cáhīyo yíñúhún ñáyuu nuū rō, te nuū rī chi cásájéē ni i.

<sup>11</sup> Ní véjicoo rī cájī rī sōco te nde vijna. Te cájichī rī ndute, te cúmanī sahma ri, te tu cásáha vāha ñayuu jíin rī, te ni tu cánevāha ri vehe.

<sup>12</sup> Te nīhin cásájniñu rī jíin ndaha ri. Cácahān neé i nuū rī, te cácahān vāha rī jíin i. Cájito xeēn i ruhū, te cájendeyí ni rī.

<sup>13</sup> Cácahān neé i siquí rī, te sa cácahān manī rī jíin i. Te cácuu rī nájnūhun yācā ini ñayiví, te cásquéhichī i ruhū nde vijna.

<sup>14</sup> Te nasūu jéē tēe ri yāha jéē cúcanu rō, chi sa suhva jeē stíhví ni rī rohó, chi cácuu ró nájnūhun sēhe ri chi manī rī jíin ró.

<sup>15</sup> Chi vēsú na cóo uxī mil tēe stéén jnúhun Cristo nuū rō, te ñn-ni tátá rō iyó. Te máá rí cúu nájnūhun tátá rō, chi ni scandíje ri rohó jéē ní nacani ri jnúhun vāha Cristo Jesús jeē jnáma ya yohó.

<sup>16</sup> Núu súcuan te cáhān ndahú rí jíin ró jeē na ndácu ró rúhū jijnáhan ró.

<sup>17</sup> Te jeē yúcuan cúu jeē tají rí Timoteo cuajeē de nuū rō. Chi cúu de nájnūhun sēhe ri jeē maní rī jíin de, te squícu vāha de nuū máá Jítóho yō. Te máá de nacachi tucu de nuū rō ndese jíca ri jeē candíje ri Cristo, jíin ndese stéén rī nuū tāca grupo ñayuu cácandíje tāca lado.

<sup>18</sup> Te sava ró chi cásátéyí ró maá ró, chi cájeni ni rō jeē ma jéé cuítī gā rī nuū rō.

<sup>19</sup> Te tuú chi yachī jeē rī nuū rō te núu súcuan cúni máá Jítóho yō. Yūcuán na te nanducú rí siquí tēe cácutéyí, te ma sáha ri cuenta jnúhun cácahān-ni de, chi sa coto ndee rī de núu cuu squícu nde de.

<sup>20</sup> Chi jeē ndácu Yaā Dios jniñu nuū yō, nasūu máá jéē cahán iī-ni yó cúu, chi jíni ñúhún condiso poder jnúhun cáhān yō jíin jniñu sáha yó.

<sup>21</sup> Núu súcuan ¿te ndese cácuu rō? ¿A jéé cuxeēn rī nuū rō núu na jéé rī, siquí jeē tu cánacani ni rō, chí nacani ni rō te jeē rī jíin jnúhun cúndáhú ni jíin jnúhun vītá ni?

*Jeē sándaā Pablo siquí ñn cuēchi*

## 5

<sup>1</sup> Te ni nihīn rī jnúhun jeē jíca jnéni ñn tēe jeē íne mēhñu ró, chi ndéca de naná uū de. Te xeēn ndasí sáha tēe ún, chi ni ñayuu jeē tu cájini jnúhun Yaā Dios, tu cásáha i súcuan.

<sup>2</sup> Te vēsú súcuan te cásátéyí ró maá ró jijnáhan ró. Vāha ga jeē na cúcuíhyá ndasí ni rō. Te cánuú jéē na quénehen ró tēe sáha cuēchi ún na quénda de mēhñu ró.

<sup>3</sup> Te ruhū, vēsú tu íyó rí jíin ró, te nájnūhun jeē iyó rí jíin ró cúu jeē ñúhún ni rī rohó. Te je ni sándaā rī siquí tēe ni sáha cuēchi ún, chi nájnūhun jeē iyó rí jíin ró cúu.

<sup>4</sup> Núu súcuan te na ndútútú ró jijnáhan ró, te máá Jítóho yō Jesucristo coo ya jíin ró. Te máá rí chi nájnūhun cone ri jíin ró, chi ñúhún ni rī rohó. Te poder máá Jítóho yō Jesús suni coo jíin ró.

<sup>5</sup> Te na chíhi yó tēe ún ndaha Satanás, návāha na ndóho yiquí cúñu de, te nacani ni de te cācu ánuá de quiví ndiji Jítóho yō Jesús.

<sup>6</sup> Tuú vāha jeē casátéyí ró maá ró. ¿A tu cájini rō jnúhun cáhān suhva? Vēsú jecu-ni levadura te ndáa ní ñujen sáha, áchí.

<sup>7</sup> Núu súcuan te quenehen ró tēe un nájnūhun scáne ró levadura jeē ni tívi.

Te súcuan te cuu ró nájñuhun pan jeē cúvāha jíin ñujen jéé jéé tú na levadura yáhi, jeē cáyeji i vico pascua. Te ndaā jeē súcuan cácuu ró. Chi je ni jihí Cristo jeē ni sócō yā maá yá jehē yō, chí cúu ya nájñuhun londe pascua jeē ni jíhí.

<sup>8</sup> Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájñuhun pan jeē tú na levadura yáhi. Te ma sáha yó jniñu néé jíin jniñu jnéhén, jeē cúu nájñuhun levadura jeē ni tívi.

<sup>9</sup> Nuū inga carta jeē ní tee ri nuū rō jijnáhan ró ni cahān rī jeē ma quívi nduu rō jíin ñayuu cájica jnéni.

<sup>10</sup> Te tu ní cáchi rī jeē ma quíjñahan cuívi rō jíin ñayuu tu cáchandíje jeē cájica jnéni, jeē ndíyo ni, jeē sácuihná, jeē chíñúhún ídolo. Chí núu súcuan te jíni ñúhún jeē quénda ró ini ñayívi núu, chí tuá na inga modo jeē cújiyo ró núu i chí ndéé yó ñayívi jíin i.

<sup>11</sup> Chí sa suhva ni cachi rī jeē ma quívi nduu rō jíin máá ñayuu jeē cácahān i jeē cúu i hermano, te núu jíca jnéni i, chí ndíyo ni i, chí chíñúhún i ídolo, chí chíso jnúhun i síquī jnáhan i, chí nájini i, chí cuíhná i. Te ni ma cáji cuívi rō staā jíin ñayuu casáha súcuan.

<sup>12-13</sup> Chí nasūú jniñu ri cúu jeē sándaā rī síquī ñayuu jeē tu cáhīin jíin yó. Yaā Dios cúu jeē sándaā síquī i. Te ñayuu cáhīin jíin ró chí cánuú jéé sándaā rō síquī i. Núu súcuan te cánuú jéé quénehen ró téé ni sáha cuēchi un jéé íne de mēhñu ró, na quénda de.

*Jeē ma cáquin i cuēchi síquī jnáhan i nuū tohó tu cáchandíje*

## 6

<sup>1</sup> Te núu jnáhan ró jéé candíje ni sáha cuēchi síquī rō, ¿te naun jéngoo ró jíin de nuū tohó jeē tu cáchandíje jíin yó? ¿Te naun tu casándaā rō nuū jnáhan ró cáchandíje Yaā Dios?

<sup>2</sup> ¿A tu cájini rō jeē ñayuu cáchandíje Yaā Dios chí ñn quívi te sándaā i jniñu ñayuu ñayívi? Te núu ñn quívi sándaā rō jniñu ñayuu ñayívi, ¿te á má cúu

sándaā rō vijna síquī tāca cuēchi lúlí casáha jnáhan ró?

<sup>3</sup> ¿A tu cájini rō jeē ñn quívi te sándaā yō nde jniñu tāca ndajéhé andívi? Te nagā ni cuu jniñu ñayívi yáha jeē ma cúu sándaā yō.

<sup>4</sup> Núu súcuan te núu jnáhan ró sáha de ñn cuēchi síquī rō, ¿te naun jéngoo ró sa nuū tāca téé jeē tu cúu de jnáhan ñayuu cáchandíje jeē sándaā de síquī cuēchi ún?

<sup>5</sup> Súcuan cáhán rī návāha na cúcanu rō jijnáhan ró. ¿A tu íyó ni ñn téé jécūhun ni mēhñu ró jeē cuu sándaā de síquī rō?

<sup>6</sup> Tú vāha jeē ñn hermano caquin cuēchi síquī inga hermano nuū tohó jeē tu cáchandíje.

<sup>7</sup> Te jeē cájequin rō cuēchi síquī jnáhan ró, chí jeē castívi íi rō cúu. ¿A tú vāha ga cuandeyí ni rō na sáha i cuēchi síquī rō chí quende i ndajniñu ró?

<sup>8</sup> Te tuú chí sa máá ró casáha cuēchi te cáquende ró ndajniñu, te nuū tāca hermano rō cúu jeē casáha ró.

<sup>9-10</sup> ¿A tu cájini rō jeē ñayuu tu íyó ndáā, ma nihín tahu i quívi i ñuu nuū ndácu Yaā Dios jniñu? Ma stahú ró maá ró caní ni rō jeē nihín tahu rō, chí ni ñayuu jeē jíca jnéni, ni ñayuu chíñúhún ídolo, ni ñayuu casíquí ndéé jnáhan, ni téé sáha ndíyī jíin jnáhan yí, ni ñayuu cuíhná, ni ñayuu ndíyo ni, ni ñayuu nájini, ni ñayuu chíso jnúhun síquī jnáhan, ni ñayuu stahú jnáhan síquī xúhun, ma nihín tahu i quívicoo i ñuu nuū ndácu Yaā Dios jniñu.

<sup>11</sup> Te súcuan ni candāa sava ró núu, te vijna chí je ni nacate ya rohó, te cáhīyo ndoo cáhīyo íi rō nuū yā. Chí je ni ndahva yā cuēchi ró jéé jíin máá Jítoho yō Jesús jíin Espíritu Yaā Dios.

*Jeē íyó ndoo íyó íi yíqui cúñu ñayuu cáchandíje*

<sup>12</sup> Te ndaā cúu jeē cácahān jeē ndíhi-ni jniñu íyó váha sáha yó núu ndese cúní yō. Te vēsú súcuan te nasūú ndíhi sáha jeē quéndōo vāha ánuá yō. Ndíhi chí cuu sáha yó, te vēsú súcuan te tu íyó váha jeē quívi yó núu jniñu jeē stívi ánuá yō.

13 Te ndaā cúu jeē cácahān jeē ndeyu cúu jeē cúhun chīji, te chīji cúu jeē cúhun ndeyu. Te ñn quivī te tuá coo súcuan, chí naa ndindúú un sáha Yaā Dios. Te nasūu síquī jeē cáca jnéni yó cúu jeē iyó yiqui cúñu yō, chí sa suhva jeē sáha yó jēē cuní maá Jítóho yō. Te Jítóho yō chí ndító ya yiqui cúñu yō.

14 Te nájñuhun jeē ní nastécu Yaā Dios Jítóho yō, suni súcuan nastécu yā yohó jíin poder yā.

15 ¿A tu cájini rō jeē yiqui cúñu tāca ñn ñn rō cúu nájñuhun tāca parte yiqui cúñu Cristo? Núu súcuan ¿te á cuu quende yó ñn parte yiqui cúñu Cristo te squijnáhan yó jíin ñn ñahan jícá jnéni? Ma cúu cuiiti súcuan.

16 ¿A tu cájini rō jeē tēe quijnáhan jíin ñahan jícá jnéni, ñn na yiqui cúñu ni nduu de jíin ña? Chí cáhán tutu iī: Jeē ndindúú chí ñn na yiqui cúñu cuu, áchí.

17 Te ñayuu jeē quijnáhan jíin máá Jítóho yō, chí suni súcuan ñn na cúu i jíin yá síquī jeē candíje i ya.

18 Núu súcuan te cunu rō jēē ma quivī rō núu jnúhun jícá jnéni. Chí tāca gá cuēchi jeē sáha ñayuu, chí nasūu yiqui cúñu i stívī i. Te núu jícá jnéni i, te síquī yiqui cúñu i cúu jeē sáha i cuēchi.

19 ¿A tu cájini rō jeē yiqui cúñu rō cúu templo Espíritu Santo jeē ni jéhe Yaā Dios nuū rō, te ndéé yá ini rō? Te nasūu cuenta maá rō cácuu rō.

20 Chí Yaā Dios yahu ni cuu jeē ní nacuaan ya rohó jijnáhan rō. Te jeē yúcuan cánuú jēē cáca yíñuhún rō nuū Yaā Dios jeē sáha rō jniñu váha nde jíin yiqui cúñu rō jíin ini jíin ánuá rō, chí máni cuenta Yaā Dios cúu.

*Jnúhun cástúhun síquī tēe jíin ñasihí*

## 7

1 Vijna te na cáchi rī síquī tāca jnúhun jeē ní cacajñuhun rō ruhū nuū carta. Jendaá jeē vāha ga quendōo ñn tēe núu tú condeca de ñahan.

2 Te síquī jeē iyó jnúhun jnéni, te vāha ga jeē tāca tēe na cóo ñasihí máá de, te suni tāca ñahan coo yí máá ña.

3 Te yí na squícu vāha de nuū ñasihí de jeē cúu de yí ña. Te suni súcuan ñasihí na squícu vāha ña nuū yí ña.

4 Chí ñasihí chí tu cúu sáha ña jeē cuní ña jíin yiqui cúñu ña, chí suni jeē cuní yí ña. Te suni súcuan yí tu cúu sáha de jeē cuní de jíin yiqui cúñu de, chí suni jeē cuní ñasihí de.

5 Te ma sasáhán rō maá rō nuū jnáhan rō. Te núu cácuu rō jeē vihyá gā cacān tahú rō jecu tiempo, te núu cáhīyo conforme ndindúú rō, te cuu sásáhán rō maá rō nuū jnáhan rō. Te yūcuán na te vāha ga naquijnáhan tucu rō, návāha ma cóto ndee Satanás rohó síquī jnúhun jnéni.

6 Te nasūu jēē ndácu ri jniñu jeē cánuú quijnáhan rō, chí jeē jéhe ri jnúhun cúu.

7 Chí nújnahan ni rī jeē tāca tēe na cóo máá ñn-ni de, nájñuhun iyó máá rí. Te sñn sñn ni sáha Yaā Dios jíin ñn ñn de ndese cúu máá de, chí sava de cuu quendōo máá ñn-ni de, te inga de chí tuú chí sñn ni sáha ya jíin de.

8 Núu súcuan te cáhán rī jíin ñayuu cáhīyo máá ñn-ni, jíin ñahan ní caquendōo ndáhú, jeē vāha ga te núu quendōo máá ñn-ni i, nájñuhun iyó máá rí.

9 Te núu jíní i jeē ma cánda i quendōo máá ñn-ni i, te na quijnáhan i núu súcuan. Chí vāha ga jeē quijnáhan i vēsú jeē ndúquīji i.

10 Te nuū ñayuu jeē jé ni quijnáhan chí ndácu ri jniñu jeē ñahan ma ndusñn ña jíin yí ña. Te nasūu ruhū cúu jeē ndácu jniñu, chí máá Jítóho yō.

11 Te núu ñn ñahan ndusñn ña jíin yí ña, te na quendōo máá ñn-ni ña, chí cuu naquijnáhan ña jíin yí ña. Te yí suni ma ndusñn de jíin ñasihí de.

12 Te jíin sava ga ñayuu chí cahān rī yāha jēē jéni ni maá rí, te nasūu jēē ní cachí máá Jítóho yō cúu. Núu ñn hermano ndéca de ñahan jeē tu cándíje, te núu nújnahan ni ña condee ña jíin de, te ma ndusñn de jíin ña.

13 Te núu ñn ñahan ndéca ña tēe jeē tu cándíje, te núu nújnahan ni de condee de jíin ña, te ma ndusñn ña jíin de.

14 Chi tēe tu cándíje, yíhi cuenta de nuū Yaā Dios siquī jeē ní quijnáhan de jíin ñahan cándíje. Te ñahan tu cándíje, yíhi cuenta ña nuū Yaā Dios siquī jeē ní quijnáhan ña jíin tēe cúu hermano candíje. Chi núu tu súcuan te sēhe i ma quíhi cuenta i nuū Yaā Dios, te vijna chi yíhi cuenta i nuū yā.

15 Te yíi chí ñasihí tu cándíje, núu fuerza cuní i ndusín i jíin jnáhan i, te na ndusín i. Chi núu súcuan cuní i, te hermano chí hermana candíje tu cánuú casi i jeē ndusín jnáhan i jeē tu cándíje. Chi ni cana Yaā Dios yohó jéē condee manī yō jíin jnáhan yó.

16 Te rōhó jéē cácuu ñasihí, tu cájini rō, sanaa te candíje yíi rō sáha rō, te cācu de. Te suni súcuan rōhó jéē cácuu yíi, tu cájini rō, sanaa te candíje ñasihí rō sáha rō, te cācu ña.

17 Te ná ñn ná ñn rō na quéndōo rō ndese ni sáha Jitoho yō jeē cúu rō, jíin ndese íyó rō ná ni cana ya rohó ní candíje rō. Te súcuan ndácu ri nuū tāca grupo ñayuu cáncandíje.

18 Núu ni cana ya ñn tēe jeē ní cuu circuncidar, te súcuan na quéndōo de. Núu ni cana ya ñn tēe jeē tu ní cúu circuncidar, te ma cúu de circuncidar.

19 Chi tú na vé sáha núu cúu yó circuncidar chí tuú, chi jeē cánuú gá cúu jeē na squícu vāha yó jniñu cuní Yaā Dios.

20 Ná ñn ná ñn rō na quéndōo rō ndese íyó rō ná ni cana ya rohó ní candíje rō.

21 Núu mozo jeē ní jeen ñayuu cúu rō ná ni cana ya rohó, te ma cóndihvī ni rō jeē quénda rō. Te núu íyó modo jeē quénda rō nduu libre rō, te íyó váha jeē sáha rō.

22 Chi tēe cúu mozo jeē ní jeen ñayuu, te núu ni cana Jitoho yō de, te vijna chi ni nduu libre de nuū cuéchi de, jéjníñu de nuū maá Jitoho yō. Te suni súcuan tēe sájniñu cuenta maá, te núu ni cana ya de, te vijna chi ni nduu de mozo jejníñu nuū Cristo jeē ní nacuaan ya de.

23 Chi yahu ni cuu jeē ní nacuaan Yaā Dios rohó jijnáhan rō, cúu jeē ni jíhi Sēhe ya jehē rō. Núu súcuan te

ma cuajníñu rō núu jniñu cāhá-ni jeē ndácu ñayuu ñayīvī.

24 Núu súcuan hermano, ná ñn ná ñn rō na quéndōo rō núu Yaā Dios ndese íyó rō ná ni cana ya rohó.

25 Te vijna te siquī ñayuu jeē iyó máa-ni, tú na jnūhun ní ndácu Jitoho yō nuū rī. Te na cāhán rī jeē jéni ni maá rí, chi ni cundáhú ni Jitoho yō ruhū, te ni sáha ya jeē cúu cāhán ndaā rī.

26 Jéni ni rī jeē vāha-ni núu quendōo-ni tēe ndese cāhīyo de, jeē siquī jeē iyó jnūndóho tiempo yáha.

27 Núu íyó ñasihí rō, te ma ndusín rō jíin ña. Te núu tu íyó ñasihí rō, te ma nducú rō ña.

28 Te núu quijnáhan rō, te nasūu cuéchi cúu. Te núu quijnáhan sūchi síhi, te suni nasūu cuéchi cúu. Te ñayuu quijnáhan, chi nihín i jnūndóho ñayīvī yáha, te cuní rī jeē ma nihín rō jnūndóho.

29 Hermano jijnáhan rō, jnūhun jeē cāhán rī yáha cúu jeē yachī-ni ndíhi tiempo jeē sáha yó jniñu ya. Núu súcuan te nde vijna te tēe íyó ñasihí, na cóndihvī gā ni de siquī jniñu máa yá vēsú siquī ña.

30 Te ñayuu jeē ni jíhi jnáhan vehe i, na sáha i nájnūhun jeē tu cúcuíhyá ni i. Te ñayuu cúsiñ ni, na sáha i nájnūhun jeē tu cúsiñ ni i. Te ñayuu jéen, na sáha i nájnūhun jeē nasūú ndajníñu i cúu. Ma cuáha i jnūhun jeē cásí tācá un jéē ma cúu condihvī ni i jniñu máa yá.

31 Te ñayuu jeē ní cacondihvī ni siquī ndajníñu ñayīvī yáha, ma cujnéñu ga i jíin. Chi je yajni naa tāca jéē iyó ñayīvī yáha.

32 Cúní rī jeē ma nácani ndasí ni rō siquī tāca jéē iyó ini ñayīvī. Chi tēe cúu soltero, ndíhvī ni de jniñu máa Jitoho yō, ndese cusíñ ni Jitoho yō sáha de.

33 Te tēe íyó ñasihí chí ndíhvī ni de jniñu íyó ñayīvī, ndese cusíñ ni ñasihí de sáha de.

34 Te suni súcuan sín sín jéni ni ñahan íyó yíi jíin ñahan íyó máa. Chi ñahan íyó máa, ndíhvī ni ña jniñu máa Jitoho yō, chí cúní ña jeē coo ndoo coo íi anuá ña jíin yíqui cúñu ña cuajníñu

ña nuū yā. Te ñahan íyó y# chi nd#hv# ni ña jniñu íyó ñay#v#, ndese cus# ni y# ña sáha ña.

<sup>35</sup> Jeē váha máá ró jijnáhan ró cúu jeē ni cáhān rī súcuan. Chi nasūu jéē nducú rí casi rī jeē quijnáhan ró, chi sa suhva cúní rī jeē caca y#ñúhún ró te nune ró cuajniñu cutú ró núu maá Jítóho yō.

<sup>36</sup> Te núu #n tēe íyó sēhe síhí de, te núu cuay# i, te núu jéni ni de jeē vāha ga jeē quijnáhan i, núu súcuan te na sáha de jeē jéni ni de, te cuāha de jnūhun quijnáhan i, chi nasūu cuéchi cúu.

<sup>37</sup> Te núu #n tēe ni cundaā ni de jeē cóndee sēhe síhí de súcuan-ni, jeē ma cuáha de i vésú fuerza jícán ñayuu i, núu súcuan te cuu quendōo i nájñūhun cúní de, chi jeē váha sáha de.

<sup>38</sup> Núu súcuan te tēe jéhe jnūhun quijnáhan i, vāha sáha de. Te tēe tu jéhe jnūhun, chi vāha ga sáha de.

<sup>39</sup> Te ñahan ní quijnáhan, chi y#h# ña ndaha y# ña níni jeē técu de. Te núu je ni jihí y# ña, yūcuán na te je ni cuu libre ña jeē quijnáhan tucu ña jíin na-ni tēe cúu ni ña, te núu tēe cándíje nuū Jítóho yō cúu de.

<sup>40</sup> Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jíin Espíritu Yaā Dios cúu jeē cahán rī.

### *Siqu# cūñu ni sócō nuū ídolo*

## 8

<sup>1</sup> Te vijna te na cáchi rī siqu# cūñu ni sócō nuū ídolo. Ndaā chi tāca yó jéni ni yō jeē maá yó cúu jeē jiní ndese cúu. Te tāca jéē jiní yō ún, chi ndúcú sáha jeē cundúxí yó. Te sa suhva jeē cundáhú ni yō jnáhan yó, sáha un jéē íje i jíin jnúhun ya.

<sup>2</sup> Núu na-ni ñayuu jéni ni i jeē jiní vāha i, te tuú chi ná tu cuni cuiti i nájñūhun cánuú cuni i.

<sup>3</sup> Te sa suhva ñayuu jeē maní i jíin Yaā Dios, máá i cúu jeē jetáhú yá.

<sup>4</sup> Núu súcuan te na cástūhun rí siqu# cūñu jeē ní casocō ñayuu nuū ídolo. Ndaā chi jiní yō jeē tāca ídolo ñay#v#, tú

ndaā cuiti. Te tú na inga yaā iyó, chi máá #n-ni Yaā Dios.

<sup>5</sup> Te ñayuu chi cájeni ni i jeē iyó táca yāā ini andiví jíin ñáy#v#, chi cácahān i jeē iyó ndije cuehē yaā i jíin jítóho i.

<sup>6</sup> Te núu maá yó chi #n-ni Yaā iyó, jeē cúu Tátá yō Yaā Dios. Te máá yá ni sáha tāca jéē iyó, te cuenta maá yá cúu yó jijnáhan yó. Te suni íyó #n-ni Jítóho yō Jesucristo, te nde nuū maá yá vēji tāca jéē iyó, te suni máá yá ni sáha yóhó.

<sup>7</sup> Te ñayuu cácaadíje, chi tú ndi# i jiní jnūhun yáha. Chi sava i ni cacāan i ni chiñúhún i ídolo nde ná tu cándíje i. Te nde vijna núu cáyeji i cūñu ún te sáha i cuenta jeē ni sócō nuū ídolo cúu. Te siqu# jeē ná tu ije i jíin jnúhun Yaā Dios, te jéni ni i jeē cujnéhén ánuá i sáha cūñu jeē ni sócō nuū ídolo ún.

<sup>8</sup> Te ndaā chi nasūu jéē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndōo vāha ga yō nuū Yaā Dios. Te núu tu yéji yō, ni tu sáha jeē quéndōo ndáhú gá yō nuū yā.

<sup>9</sup> Te vésú tú ni #n jés# jeē ma cúu caji rō cūñu ún, te coto ró jnáhan ró jéē ná tu ije jíin jnúhun ya, te ma sáha ró jéē suni caji i jeē jéni ni i jeē cuéchi cúu.

<sup>10</sup> Vāha ga ma cáji rō núu súcuan, chi sanaa te hermano rō jeē ná tu ije jíin jnúhun ya, coto de róhó jéē yéji rō ini vehe ídolo, chi jiní vāha ró jéē tú na vé sáha. Te súcuan te sáha ró jéē cájni ni de jeē suni caji maá de cūñu jeē ni sócō nuū ídolo, vésú jéni ni de jeē cuéchi cúu.

<sup>11</sup> Te súcuan stiví ró anuá hermano rō jeē ná tu ije jíin jnúhun ya, vésú jiní vāha máá ró jeē tú na vé sáha jeē cáji rō. Te tú vāha sáha ró, chi suni jehē maá de ni jihí Cristo.

<sup>12</sup> Te núu súcuan stiví ró anuá hermano rō jeē ná tu ije jíin jnúhun ya, núu súcuan te siqu# Cristo cúu jeē sáha ró cuéchi.

<sup>13</sup> Núu súcuan te núu cūñu un sáha jeē quiví hermano rī cuéchi, te ma cáji cuiti ga rī cūñu ún, návāha ma sáha rī jeē quiví de cuéchi.

*Siqu# jeē iyó derecho tēe cácuu*

## apóstol

## 9

<sup>1</sup> Te máá rí chí jíca libre rī, te íyó derecho rī siquī jeē cúu rī apóstol, tēe ni tají yá scáca jnūhun ya. Chí ni jito rī nuū máá Jítoho yō Jesús, te máá ró jijnáhan ró cácuu jniñu jeē ni sáha rī jeē ni squívi rī rohó ndaha Jítoho yō.

<sup>2</sup> Te núu sava ga ñayuu tu jétáhú i jeē cúu rī apóstol, te nuū máá ró chí suu cúu ndije rī. Chí siquī jeē ní scandíje rī rohó jijnáhan ró, te jeē yúcuan cácuu ró prueba jeē steén jeē ndíso jniñu rī cúu rī apóstol nuū máá Jítoho yō.

<sup>3</sup> Te jnūhun yáha cáhán rī jehē máá rí nuū ñayuu cácahán siquī rī.

<sup>4</sup> Achí rí: Iyó derecho rī caji rī coho rī jeē cájēhe ñayuu núu cúní rī.

<sup>5</sup> Te suni íyó derecho rī núu jeē cuní rī condeca rī ñn hermana candíje cuu ñasihí rí, caca ña jíin rí, nájñūhun íyó ñasihí Pedro jíin táca gá apóstol jíin téca cácuu ñani máá Jítoho yō.

<sup>6</sup> ¿Chí cájeni ni rō jeē máá rúhū-ni jíin Bernabé tú na derecho rī jeē stóo rī jniñu cásáha rī jeē cótecu rī, návāha nune ga rī nacani rī jnūhun vāha ya, chí naún?

<sup>7</sup> ¿A íyó soldado jeē técu de xūhún vehe de? ¿A íyó téca jeē jítu uva te tu yéji de ndehē ún? ¿A íyó téca jeē ndíto lanchi te tu jíhi de leche tí? Tú cuítí. ¿Te á suni tu íyó derecho rī cotecu rī siquī jnūhun ya naún?

<sup>8</sup> Te ma cáni ni rō jeē táca jéca cahán rī yāhá, máni máá jéca cácahán ñayuu ñayívi cúu. Chí nde máá ley yā jeē ni jéhe ya nuū Moisés, cáhán súcuan.

<sup>9</sup> Chí cáhán nuū tútu ley yā: Ma chúhun ró ñunu yuhu stíquī, quítí jéxín trigo, achí. Te ndaā chí nasūu máni siquī stíquī cúu jeē ni cáhán yā súcuan.

<sup>10</sup> Chí suni siquī máá yó ní cahán yā. Chí ley un ní jéhe ya jeē váha máá yó, chí steén jeē tēe jítu jíin téca jéxín trigo cánuú jeē nihín de sava un quívi ndutútú.

<sup>11</sup> Te suni súcuan ruhū jijnáhan rī jeē ní cataji rī jnūhun Espíritu ini anuá rō, ¿te á véyi cúu jíin ró núu nastútú rí jeē cótecu rī nuū rō?

<sup>12</sup> Te núu sava ga tēe cástéén nuū rō, íyó derecho de cacān de nuū rō, te nagā ni cuu ruhū jijnáhan rī jeē ma cóo derecho rī cacān rī.

Te tu ní cájicān rī derecho un, chí sa suhva ni jendeyí ni rī coto máá rí jeē cáji rī, návāha ma cási rī jeē cáca jnūhun vāha Cristo.

<sup>13</sup> Te cájini rō jeē sutū ni cajejniñu ini templo, ni cacotecu de siquī jeē ní casocō ñayuu ini templo. Chí sutū ni cajejniñu nuū altar nuū ní casocō i quítí, suni ni cayeji de sava quítí ún.

<sup>14</sup> Te suni súcuan ni ndacu máá Jítoho yō jniñu jeē téca cácanani jnūhun jeē jnáma ya yohó, siquī jniñu un níhín de jeē cótecu de.

<sup>15</sup> Te ruhū tu ní jícan cuítí rī derecho rī yāhá, te suni nasūu jéca téca rī jnūhun yáha návāha cuāha ró núu rī jijnáhan ró. Chí jéni ni rī jeē vāha ga núu na cúu rī nasūu jéca quíhin rī jeē cuāha ró, chí casí jeē cúsi ni rī scáca rī jnūhun ya súcuan-ni.

<sup>16</sup> Te tú vāha núu sátéyí rí máá rí siquī jeē nácani rī jnūhun jeē jnáma ya yohó. Chí ñn jeē ní tejniñu ya ruhū cúu, te cánuú squícu rī. Chí nacā ndahú cúu rī te núu tú nacani rī jnūhun ya.

<sup>17</sup> Te núu jeē cúu ni máá rí sáha rī nuú, yūcuán na te cuu cacān rī yāhu rī. Te tuú chí cánuú sáha rī, chí máá Yā Dios ni tee ya jniñu siquī rī.

<sup>18</sup> Núu súcuan te yāhu rī cúu jeē cúsi ni rī jeē súcuan-ni nácani rī jnūhun jeē jnáma ya yohó, te tu jícan rī derecho rī jeē cotecu rī siquī jeē nácani rī jnūhun ya.

<sup>19</sup> Chí vésú tú ni ñn ñayuu ndácu jniñu nuū rī, te ni sáha rī máá rí mozo nuū táca i jeē nácani rī jnūhun nuū i, návāha nihín rī cuehē i candíje i Cristo.

<sup>20</sup> Núu íne rī jíin jnáhan rī hebreo te sáha rī nájñūhun cásáha i, návāha cuu scándíje rī i. Chí násáha rī máá rí nájñūhun tēca cáyihí chíji ley Moisés, návāha cuu scándíje rī i jeē cáyihí i chíji ley un, vésú tuá yíhi rī chíji ley un.

<sup>21</sup> Te suni násáha rī máá rí nájñūhun ñayuu tu cáyihí chíji ley Moisés,

návāha cuu scándíje ri ñayuu ún. Te vēsú súcuan te yíhi ri chīji ley Yaā Dios, chi suu cúu ley Cristo jeē squícu ri.

<sup>22</sup> Te núu íne ri jíin ñáyuu jeē ná tu ije jíin jnúhun ya, te sáha ri maá rí nájnūhun jeē ná tu ije ri jíin jnúhun ya, návāha cuu scándíje ga rīi. Núu súcuan te násáha ri maá rí núu ndese cándāa tāca ñáyuu, návāha tācá-ni modo un te cuu scándíje ri sava i.

<sup>23</sup> Tāca yáha sáha ri jeē siquí jnúhun jeē jnáma ya yohó, návāha suni nihīn rī tahū jeē ndíso jnúhun ya.

<sup>24</sup> Je cájini rō jeē tée cájину carrera, jendaá chi ndíhi de cájину, te ñin-ni de cūndeyí nihīn premio. Te suni súcuan nducú ndéyí máá rō squícu rō, návāha nihīn rō premio nuū yā.

<sup>25</sup> Te tāca tée cúní cūndeyí siquí ñin deporte, chi cáscuáha de te cándito de máá de. Súcuan cásaaha de návāha nihīn de ñin premio jeē cúu corona ndaha yújnu jeē náa yachī. Te máá yó chi sa suhva cánducú ndéyí yó návāha nihīn yō ñin premio jeē ma náa cuiti.

<sup>26</sup> Te máá rí suni nducú ndéyí rí nájnūhun tēe cájину, te tu nducú ndéyí cāha rí. Te sáha ri nájnūhun tēe cácajnáhan juego jeē tu jéhe iyú de, chi quée jniñu sáha ri.

<sup>27</sup> Chi sa suhva stóho ri yiqui cúñu rī, te stíhví ni rī maá rí squícu ri. Chi vēsú ni stíhví ni rī inga ñayuu jeē nducú ndéyí i, te núu tu nducú ndéyí máá rí te snāa rī premio rī.

*Siquí jeē ma chiñúhún i ídolo*

## 10

<sup>1</sup> Hermano jijnáhan rō, cúní rī jeē na jécūhun ni rō ndese ni cajica jíi yō jenahán. Chi ndíhi de ni cajica chīji vicō jeē ni stéén ichi nuū de, te ndíhi de ni cayāha mēhñú ndute Mar Rojo jeē ní cusñin, ni nune ichi.

<sup>2</sup> Súcuan cúu jeē ní canduu ñnuú ndíhi i jíin Moisés, chi ni candiquin i de chīji vicō jíin mēhñu mar.

<sup>3</sup> Te ndíhi i chi ñnuú-ni ni cayejí i alimento jeē ni jéhe máá Espíritu.

<sup>4</sup> Te suni ndíhi i ni cajihí ndute jeē ni jéhe Espíritu. Chi ni cajihí i ndute

jeē ní cane jicā cáva nuū ní cajica cuu i. Te Cristo cúu nájnūhun cava un jéē jéhe ya ndute cotecu yō ní cáni.

<sup>5</sup> Te vēsú súcuan te cuehē i ni cunīhni ni i, te tu ní cusñi ni Yaā Dios jíin i, te jeē yúcuan ní cajihí i nuū ñúhun téhé.

<sup>6</sup> Te tāca jéē ní cuu ún, ñin ejemplo cúu nuū yō, návāha ma ndíyo ni yō tāca jéē neé, nájnūhun ni candiyo ni ñayuu ún.

<sup>7</sup> Te ma chiñúhún rō ídolo, nájnūhun ni casáha sava i. Chi súcuan cáhán nuū tútu ñi: Ni cacucōo ñayuu ún, ni cayejí i ni cajihí i vico ídolo, te ni ndocuñi i ni cajita jéhe i, áchí.

<sup>8</sup> Te ni ma cáca jnéni rō nájnūhun ni casáha sava i, te ni cajihí ocō unī mil i jeē ñin quiví-ni.

<sup>9</sup> Te ni ma sáha rō jniñu jeē squití ni rō jitoho yō, nájnūhun ni casáha sava i, te ni cajihí i jeē ní catuu coō i, ni sáha ya.

<sup>10</sup> Te ni ma cahán sōo rō siquí Yaā Dios, nájnūhun ni cacahán sōo sava i, te ni cajihí i jeē ní jehni ndajéhe yā i.

<sup>11</sup> Te tāca jéē ní cuu ún, chi ñin ejemplo cúu nuū yō. Te súcuan yósó núu tútu návāha na chūhun vāha ni maá yó. Chi cácuu yó ñayuu cátecu quiví cuándíhi ñayiví.

<sup>12</sup> Núu súcuan te rōhó jéē cájeni ni rō jeē cáhīn nihīn rō jéē ma sáha rō cuéchi, coto má quiví rō cuéchi.

<sup>13</sup> Chi máni íyó jéē nducú squiví rōhó cuéchi, te ñnuú-ni cándoho rō súcuan nde jíin tāca gā ñayuu. Te cuu cucáhnú ni rō Yaā Dios jeē ma cuáha ya jnúhun jeē vihyá gā coto ndee jexeén rōhó vēsú jeē cúu cūndeyí rō jíin. Chi sa suhva núu vēji jeē nducú squiví rōhó cuéchi, te chindéé ñáhán yá rohó quenda rō te cūndeyí rō siquí.

<sup>14</sup> Ñání mání, ma chiñúhún cuiti rō ídolo núu súcuan.

<sup>15</sup> Cáhán rī jíin rō jéē cúu rō ñáyuu cájecūhun ni, te na sáha rō cuenta núu ndaā jnúhun cáhán rī.

<sup>16</sup> Máá copa ñi jeē cájicān tahu yō jehē, suu cájihí cáhnú yó jéē steén yō jeē ñnuú cúu ndíhi yó, chi ni jeti ñiñi Cristo jeē siquí yō ná ni jihí yā jicā cruz. Te pan jeē sacuéchí yó cáyeji

cáhnú yó, stéén jeē inuú cúu ndihí yó síquī jeē ni jéhe Cristo yiquí cúñu yā ni jihí yā jehē yō.

<sup>17</sup> Te vēsú cuehē yō iyó, te ñn-ni ñayuu cácuu yó, chí ñn-ni pan un cáyeji cáhnú yó síquī jeē cá candíje yó.

<sup>18</sup> Condēhe ró ndese cásáha ñayuu Israel. Tāca tēe jeē yéji quití jeē ni sócō nuū yā, chí inuú-ni cúu ndihí de síquī jeē cáyeji de jeē ni sócō ún.

<sup>19</sup> Núu sūcuan te cáhán rī jeē tu ndé jéjníñu ídolo, ni tu jéjníñu cūñu jeē ni sócō nuū ídolo, chí inuú cúu jíin táca gá cūñu.

<sup>20</sup> Te suni cáhán rī jeē ñayuu tu cájini jnūhun Yaā Dios, núu cásocō i, te nuū tachī cásocō i, nasūu núu Yaā Dios. Te tu cúní rī jeē cuajníñu ró núu tachī.

<sup>21</sup> Ma cúu coho ró copa maá Jítoho yō te núu cájini ró jéē ni sócō nuū tachī. Te ma cúu caji rō nuū mesa Jítoho yō te núu cáyeji rō jeē ni sócō nuū tachī.

<sup>22</sup> Ma quívi nduu yō sūcuan jíin táchī, návāha ma cucuíñi Jítoho yō jíin yó. ¿Chí téyí gá maá yó vēsú maá yá jeē ma cúu stóho ya yohó, cájeni ni rō, chí naún?

*Ndihí chí sáha yó jíin jnūhun cúndáhú ni*

<sup>23</sup> Te ndaā cúu jeē cácahān jeē ndihí-ni jniñu íyó váha sáha yó núu ndese cúní yō. Te tuú chí nasūu ndihí sáha jeē quéndōo vāha ánuá yō. Ndihí chí cuu sáha yó, te vēsú sūcuan te nasūu ndihí sáha jeē ije jnāhan yó jíin jnūhun ya.

<sup>24</sup> Chí cánuú sáha yó jéē váha jnāhan yó, nasūu máni maá jéē váha maá yó.

<sup>25</sup> Cuu caji rō ndihí-ni cūñu cūyāhu nuū yáhu, te ma cájnūhun ró ni ma cáni ni rō núu jeē ni sócō nuū ídolo cúu.

<sup>26</sup> Chí cuenta maá Jítoho yō cúu ñayívi jíin ndivii jeē iyó ini, te cuu cuajníñu yó.

<sup>27</sup> Te núu ñn tēe tu cándíje, cana de róhó caji rō jíin de, te núu cácuu rō quihín rō, núu sūcuan te caji rō táca jéē cáni de nuū rō. Te ma cájnūhun ró ni ma cáni ni rō núu jeē ni sócō nuū ídolo cúu.

<sup>28</sup> Te núu cachi ñn i nuū rō jeē cūñu ni sócō nuū ídolo cúu, yūcuán na te ma cáji rō, chí síquī jeē jéni ni i jeē cuēchi cúu, te tu cúní rō sáha ró jéē quívi i cuēchi.

<sup>29</sup> Te sūcuan cáhán rī síquī jeē inga i cájeni ni i jeē cuēchi cúu, te nasūu jéē sūcuan cájeni ni maá ró.

Te sanaa te cahān ñn ró: ¿A tu íyó libre rī caji rī jeē cúní maá rí, vēsú cájeni ni inga i jeē cuēchi cúu?

<sup>30</sup> ¿Te núu nácuatáhú rí nuū Yaā Dios te yéji rī, te najehē cácahān i síquī rī jeē yéji rī? achi rō.

<sup>31</sup> Tuú chí ndihí jeē sáha ró, vēsú jeē caji rō chí jéē coho ró, chí na-ni jniñu sáha ró, ndihí na sáha yíñuhún ró jíin Yaā Dios, návāha cuni ñayuu jeē luu cújéhnú ya.

<sup>32</sup> Te ma sáha ró jniñu jeē squívi ró ñayuu nuū cuéchi, cúu ñayuu hebreo, cúu ñayuu táca nación jeē tu jíin jnūhun ya, cúu ñayuu cá candíje Yaā Dios.

<sup>33</sup> Te ruhū chí ndúcú rí jeē na cúsí ni táca ñayuu jíin táca jniñu sáha rí. Tu ndúcú rí jeē váha máa-ni rí, chí sa ndúcú rí sáha rí jeē váha cuehē ñayuu, návāha cācu i.

## 11

<sup>1</sup> Te na ndácu ró rúhú jijnáhan ró, nájñūhun ndácu máá rí Cristo.

*Siquí ndese cánuú sáha ñahan cándutútú*

<sup>2</sup> Vāha cásáha ró, hermano, jeē niní cánucūhun ni rō ruhū, te cándihvī ni rō jíin táca jniñu jeē ni steén rī nuū rō.

<sup>3</sup> Te cúní rī jeē na jécūhun ni rō jeē Cristo cúnuú yá nuū táca tēe. Te tēe cúnuú de nuū ñasihí de. Te Yaā Dios cúnuú yá nuū Cristo.

<sup>4</sup> Núu ñn tēe ñūhun de lélú te jícan tahu de chí nácani de jnūhun nuū ndutútú ñayuu cá candíje, núu sūcuan te jéhe de jnūhun canu máá de.

<sup>5</sup> Te sa núu ñn ñahan tu ndési xinī ña te jícan tahu ña chí nácani ña jnūhun, núu sūcuan te jéhe ña jnūhun canu máá ña, chí ñn-ni cúu un núu ní sáte xinī ña.

<sup>6</sup> Chí núu tú casi ña xinī ña, vāha ga na sáte ña ixi ña núu sūcuan. Te núu



cúcanu ña jeē sáte ña ixi ña chí jéē sáte ña ña, te na cási ña núu súcuan.

<sup>7</sup> Te tēe chi ma cási de xinī de, chi máá de cúu muestra jeē steén ndese cúu Yaā Dios jeē kujénu ya. Te ñahan chi stéén ña jeē kujénu tēe.

<sup>8</sup> Chi ná ni sáha ya tēe, te nasūu jíin yiqui ñahan ni sáha ya, chi sa suhva jíin yiqui tēe ni sáha ya ñahan.

<sup>9</sup> Te ñahan chi ni cuvāha ña jeē siquí tēe, nasūu tēe jeē siquí ñahan.

<sup>10</sup> Te jeē yúcuan cánuú jéē cóndesi xinī ñahan, te suu stéén jeē kujénu tēe, chi suni cándehé ndajéhé yā ndese sáha ña.

<sup>11</sup> Te vésú súcuan te yóhó jéē candíje yó, chí jíin yó jeē tu íyó tēe núu jeē tu íyó ñahan, te tu íyó ñahan núu jeē tu íyó tēe.

<sup>12</sup> Chi vésú ni sáha ya ñahan jíin yiqui tēe, te vijna cácu tēe chíji ñahan, te máá Yaā Dios cúu jeē sáha tēcá-ni.

<sup>13</sup> Na sáha máá ró cuenta ¿á íyó váha núu tu ndési xinī ñahan te jícan tahu ña nuū Yaā Dios?

<sup>14</sup> Chi sáha yó cuenta jeē ini ñayiví yáha, núu cáni ixi tēe te cúcanu de sáha.

<sup>15</sup> Te ñahan chí sa váha jíto ña te núu cáni ixi ña, chí suu ni jēhe ya jeē cóndesi xinī ña.

<sup>16</sup> Te núu ndé ñin ñayuu cuní i cahān i siquí jnúhun yáha, te ruhū jíin táca grupo ñayuu cándíje nuū Yaā Dios, tú na inga costumbre jejnúhún rí siquí jnúhun yáha.

### *Jeē castívi i siquí Cena Jitoho yō*

<sup>17</sup> Te íyó inga jnúhun cánuú cahān rí jíin ró, chí tu cúu cahān rí jeē váha cásáha ró. Chí nuū cándutútú ró te tu sáha jeē quéndōo váha ga rō, chí sa jeē castívi ró.

<sup>18</sup> Xihna jnúhun yáha cáhán rí, jeē nihín rí jnúhun jeē nuū cándutútú ró te cácusín ni rō. Te jéni ni rí jeē ndaa cúu.

<sup>19</sup> Chí níni coo sava ró jéē cusín ni, návāha natūu ndé-ni cúu jeē cándíje váha mēhñu ró.

<sup>20</sup> Te jeē cácusín ró súcuan nuū cándutútú ró, te nasūu cena máá Jitoho yō cúu jeē cáyeji rō núu súcuan.

<sup>21</sup> Chí núu cáyeji rō, te tēcá ñin ñin ró cúní caji xihna gā vésú jnáhan ró. Te súcuan te sava ró tu cánihin, te cáji sōco, te sava ró cánejini jeē cájhi cuehē.

<sup>22</sup> ¿A tu cánevāha ró vehe nuū cáji rō coho ró, chí naún? Chí jeē casáha ró súcuan cúu jeē tu íyó yíñuhún ró ini vehe nuū cándutútú ñayuu cándíje Yaā Dios, chí cásáha ró jéē cácucañu ñayuu jeē tú na vé névāha. ¿Ndesse cahān rí jíin ró núu súcuan? ¿A cáhán rí jeē váha cásáha ró? Tuú chí nasūu jéē váha cúu jeē casáha ró súcuan.

*Siquí jeē ní jequin Jitoho yō Cena yā (Mt. 26.26-29; Mr. 14.22-25; Lc. 22.14-20)*

<sup>23</sup> Chí jnúhun yáha jéē ní nastéén rí nuū rō, chí nuū máá Jitoho yō ni nihín rí: Jeē máá jecuáa jeē ní nastúu de Jitoho yō Jesús, te ni quihin ya pan.

<sup>24</sup> Te ni nacuatáhú yá, te ni tahu cuéchí yá, te ni cahān yā jíin tēe cáscuáha jíin yá: Quihin te caji rō jinnáhan ró, chí yáha cúu yiqui cúñu rí jeē ni sócō rí jeē siquí rō. Te níni caji rō súcuan jeē cáñuhun ni rō ruhū jeē ni jíhī rí jehē rō. Achí yá.

<sup>25</sup> Te suni súcuan ni quihin ya copa ná ni cuu ni cuxíni ya jíin de, te ni cahān yā: Jeē ñuhun copa yáha cúu níñi rí jeē sácútu contrato jeē jeē jnáma rí ñayuu. Te táca jínu jeē cájhi ró, te nucūhun ni rō ruhū. Achí yá.

<sup>26</sup> Chí táca jínu jeē cáyeji rō pan un te cájhi ró copa un, súcuan cástéén rō jeē ni jíhī Jitoho yō jehē yō. Te súcuan na sáha ró ndé quiví ndíji ya.

### *Ndesse caji yíñuhún i Cena yā*

<sup>27</sup> Te núu na-ni ñayuu caji i pan un chí coho i copa Jitoho yō ún, te núu tu sáha yíñuhún i nuū Yaā Dios, núu súcuan te sáha i cuēchi jeē tu íyó yíñuhún i siquí yiqui cúñu máá Jitoho yō jíin siquí níñi yā.

<sup>28</sup> Núu súcuan te coto ndee rō máá ró núu íyó ndoo ánuá rō jeē tú cuēchi ró. Te sáa te cuu caji rō pan un te coho ró copa un.

<sup>29</sup> Chí núu ñin ñayuu tu yéji tu jíhi yíñuhún i te tu nucūhun ni i jeē yiqui

cúñu yā cúu, ñayuu ún chi nihīn i castigo núu na cáji i coho i.

<sup>30</sup> Jeē yúcuan cúu jeē iyó cuéhē ñayuu cácuñu jíin jéē ní cacuxií, cáhiyo mēhñu ró. Te sava i je ni cajihī.

<sup>31</sup> Te núu coto ndee yō maá yó nde ná tu caji yō, te Jitoho yō ma cuáha ya castigo yohó.

<sup>32</sup> Te núu Jitoho yō jéhe ya castigo yohó, te súcuan stóho ya yohó návāha ma jnahnú ndetū yō jíin ñáyuu ñayīvī.

<sup>33</sup> Ñánī mánī, núu súcuan te jeē cándutútú ró jeē cáji rō Cena yā, te condetu ró te caji inuú ró.

<sup>34</sup> Te núu ñin ñayuu jíi i sōco, te xīhna gā na cáji i vehe i návāha ma stívī i nuū cándutútú ró. Te súcuan te ma cuáha ya castigo i. Te quivī jécondēhe rí rohó te cachi rī ndese coo sava ga jniñu.

*Siquī tāca táhū jeē jéhe Espírítu*

## 12

<sup>1</sup> Hermano, cúní rī jeē na jécūhun ni rō siquī tāca táhū jeē jéhe Espírítu nuū yō, suu tāca modo jejniñu ñin ñin yó núu Yaā Dios.

<sup>2</sup> Te cájini rō jeē ná ni cuu ró ñáyuu ná tu candíje, te ni cacondihvī ni rō ni cachiñúhún ró ídolo ñihín.

<sup>3</sup> Te vijna te na jécūhun ni rō jeē núu ndé ñáyuu cahán ndevāha i siquī Jesús, te nasūu jíin poder Espírítu Yaā Dios cúu jeē cahán i súcuan. Te ni ñin i ma cúu cahán i jeē Jitoho i cúu Jesús, te núu tu ndéé poder Espírítu Santo ini i.

<sup>4</sup> Te sñn sñn tahū jéhe ya jeē cuajniñu ñin ñin yó núu yā, te ñin-ni máá Espírítu cúu jeē jéhe.

<sup>5</sup> Te sñn sñn jéjniñu yó, te nuū maá ñin-ni Jitoho yō jejniñu yó.

<sup>6</sup> Te sñn sñn modo sáha yó jniñu ya, te ñin-ni Yaā Dios cúu jeē sáha jniñu un jíin yó.

<sup>7</sup> Te nuū ná ñin ná ñin yó ní jéhe Yaā Dios tahū jeē sáha Espírítu yā jíin yó, návāha na sáha yó jéē ije jnāhan yó jíin jnúhun ya.

<sup>8</sup> Chi sava yó ní canihīn tahū jeē ndichí cáhán yō jnúhun ya, sáha máá Espírítu. Te sava ga yō ni canihīn yō

jeē cúu jécūhun vāha ni yō te castūhun yó, te suni máá Espírítu sáha.

<sup>9</sup> Te nuū sava ga yō ni jéhe ya tahū jeē cúu cándíje nihīn yó jéē sáha ya jeē jicán yō, te sava ga yō cúu sáha yó jéē ndúvāha ñayuu cácuñu, te suni máá Espírítu sáha.

<sup>10</sup> Te sava ga yō cúu sáha jniñu jéhu jíin fuerza Yaā Dios. Te sava ga yō cúu nácuni jnúhun ya. Te sava ga yō ni sáha ya jeē nácuni yō tāca jnúhun, núu vēji nuū Espírítu yā chí tuú. Te sava ga yō ni nihīn tahū jeē cahán yō tñjni yuhu jeē tu jécūhun ni yō. Te sava ga yō cúu nacastūhun yó jnúhun ni cahán jnāhan yó jíin inga yuhu ún.

<sup>11</sup> Te tāca táhū yáha, chi ñin-ni máá Espírítu sája, te sñn sñn jéhe ya nuū ñin ñin yó, ndese nújnahan ni maá yá.

*Ndihī yó cúu nájñūhun ñin na yiqui cúñu*

<sup>12</sup> Chi nájñūhun ñin yiqui cúñu iyó cuéhē parte, súcuan cúu yó jíin Cristo jeē cúu yó nájñūhun yiqui cúñu yā, chi ñin na cúu yó jíin yá. Te vēsú cuéhē parte cácuu yó te ñin-ni cúu yó, nájñūhun ñin yiqui cúñu jeē iyó cuéhē parte.

<sup>13</sup> Chi ñin na ni canduu yó jíin yá ni sáha ñin-ni máá Espírítu ná ni cajendute yó. Súcuan cúu vēsú cúu yó ñáyuu hebreo chí ñáyuu griego, vēsú mozo jeē ní jeen ñayuu chí téé sájniñu cuenta maá. Te ndihī yó chí ñin-ni Espírítu ni canihīn yō.

<sup>14</sup> Te ñin yiqui cúñu chí nasūú ñin-ni parte cúu, chí sa cuéhē parte cúu.

<sup>15</sup> Te núu jehē cahán: Nasūu cuenta yiqui cúñu cúu ri, chí nasūú ndaha cúu ri, te tuú chí parte yiqui cúñu cúu nahín.

<sup>16</sup> Te núu sōho cahán: Nasūu cuenta yiqui cúñu cúu ri, chí nasūu tññu cúu ri, te tuú chí parte yiqui cúñu cúu nahín.

<sup>17</sup> Núu ní yiqui cúñu yō cúu tññú, ¿te ndese cuni sōho yó núu súcuan? Te núu ní yiqui cúñu yō cúu sōho, ¿te ndese cuaan yó xicō núu súcuan?

<sup>18</sup> Te Yaā Dios ni chujnāhan ya ñin ñin parte yiqui cúñu, nájñūhun cúní yā jeē coo.

19 Chi núu ñn-ni parte cúu ndihí, te nasúú ñn ní yiquí cúñu cúu núu súcuan.

20 Te tuú chi cuehē parte iyó, te ñn-ni yiquí cúñu cúu.

21 Te ni ma cúu cahān tinūu jíin ndaha: Tu jíini ñúhún rí rohó. Te ni xiní ma cúu cahān jíin jéhē: Tu jíini ñúhún rí rohó.

22 Chi sa suhva tāca parte yiquí cúñu jeē jéni ni yō jeē núu ga fuerza, suu cúu jeē cánuú gá.

23 Te tāca parte yiquí cúñu jeē jéni ni yō jeē tu cáa vāha, suu cúu jeē yucún gá chúhun yó sahma. Te parte jeē tú-ni luu cáa, sa vāha ga jési yō.

24 Chi parte jeē lúu cáa, tu cánuú jéé condihyū. Chi súcuan ni chujnáhan Yaā Dios yiquí cúñu, jeē yucún gá ndító yó jéé tu cáa luu.

25 Súcuan ni sáha ya návāha ma cusñn tāca parte yiquí cúñu, chi sa chindéé ñájnáhan vāha jíin jnáhan.

26 Te núu jétú ñn parte yiquí cúñu, te suni ní cáhnu-ni jétú. Te núu ñn parte ndító yucún yó, te suni ndihí-ni parte quéndōo vāha.

27 Te róhó jíjnáhan ró chi nájnūhun yiquí cúñu Cristo cácuu ró, chí ñn na cúu yó jíin yá. Te ná ñn ná ñn ró cúu ñn ñn parte yā.

28 Núu súcuan te sñn sñn jniñu ni jēhe Yaā Dios nuū tāca ñáyuu cácuandije jeē cácuu i nájnūhun ñn ñn parte yā: Te suu ñn parte yā cúu tācá apóstol jeē ní jeni ya xihna gā jeē scáca de jnūhun ya. Yūcuán na te jeē uú, tēe cánacani jnūhun ya, te jeē uní, tēe cástéén. Yūcuán na te ñáyuu casáha jniñu jéhnu jíin fuerza yā, jíin ñáyuu casáha jeē ndúvāha ñáyuu cácuñu, jíin ñáyuu cachíndéé ñájnáhan, jíin ñáyuu cándiso jniñu, jíin ñáyuu cácahān sñn sñn yuhu jeē tu cájecūhun ni.

29 ¿A ndihí yó cácuu apóstol, chí naún? ¿A ndihí yó cánacani jnūhun? ¿A ndihí yó cástéén? ¿A ndihí yó cuu sáha jniñu jéhnu?

30 ¿A ndihí yó cuu sáha jeē ndúvāha ñáyuu cácuñu? ¿A ndihí yó cuu cahān sñn sñn yuhu? ¿A ndihí yó cuu

nacastūhún yuhu ún, chí naún? Tuú chí sñn sñn tahū ni canihñn yō.

31 Núu súcuan te na cóndihvī ni rō cacān rō jeē cuáha Yaā Dios tahū cánuú gá nuū rō. Te vijna te na stéén rī nuū rō ñn jeē váha ga nuū tāca gá tahū ún, suu jnūhun cundáhú ni jnáhan.

*Jnūhun jeē cundáhú ni jnáhan*

## 13

1 Vēsú núu cuu cahān yō tijni yuhu jeē cácahān ñayuu chí jéé cácahān ndajéhé Yaā Dios, te núu tu cundáhú ni yō jnáhan yó, te jnūhun cahān yō un cúu nájnūhun ñn tambor jeē ndaxín cáján chí ñn platillo jeē ndaxín cáxín sánee sōho ñayuu.

2 Te vēsú cuu nacani vāha yó jnūhun ya, te cuu jecūhun ni yō tāca jnūhun sáhi yá jíin tāca jnūhun ndíchí, te núu tu cundáhú ni yō jnáhan yó, te tu ndé jéjniñu cuiñi yō núu súcuan. Te vēsú cuu candije téyí yó jeē nde cuu cahān yō jeē cújiyo yucu, te núu tu cundáhú ni yō jnáhan yó, te tu ndé jéjniñu cuiñi.

3 Te vēsú na sája yó ndihí jeē névāha yó cuu ñayuu ndahú, te vēsú núu cuáha yó jnūhun cahmu ñayuu yohó jéé siquí jnūhun ya, te núu tu cundáhú ni yō jnáhan yó, te tu ndé jéjniñu cuiñi.

4 Ñayuu cundáhú ni chí íyó paciencia jíin jnáhan, te íyó mání ni, te tu cúcuésún ni. Te tu sándúxí, te tu sátéyí máá.

5 Tu sájéé ni, tu ndúcú jéé cúu máá-ni, tu quítí ni, te tu ñúhun ni jnūhun quítí ni.

6 Tu cúsiñ ni jíto jniñu néé casáha jnáhan, chí sa cúsiñ ni jíin jniñu váha.

7 Ñayuu cundáhú ni chí ndihí jéhnde ni ndoho jehē jnáhan, te tu jécuiñí jeē candije jnáhan, jíin jéé ñúhun ni jeē squícu jnáhan, jíin jéé jéndeýí ni jíin jnáhan.

8 Jnūhun cundáhú ni chí ma náa cuiñi. Te quiñi quiñí jeē tuá nacani i jnūhun, ni tuá cahān i tijni yuhu, ni tuá jíini ñúhún jnūhun ndíchí.

9 Chi tu jíini vāha vāha yó vijna, te jnūhun cánacani yó suni jecu-ni cúu.

10 Te núu na quíji quiv̄i jeē cúni yō ndihi, yūcuán na te tuá coo jeē jiní yō jecu-ni.

11 Ná ni cuu yó súchi lúli te ni cahān yō, ni jeni ni yō, ni jecūhun ni yō nájnūhun sūchi lúli. Te ná ni jehnu yó te ni stóo yó modo sūchi lúli.

12 Te suni súcuan, jecu-ni jécūhun ni yō vijna, nájnūhun jeē jito yó núu ñn espejo jeē tú ndijin vāha. Te cúcuéé gá te jecūhun cáji ni yō ndihi. Te vijna chi jecu-ni jiní yō, te cúcuéé gá te cuni vāha yó ndese Yaā cúu ya, nájnūhun jiní vāha ya yohó ndese ñayuu cúu yó.

13 Núu súcuan te íyó ún̄i jnūhun jeē quéndōo cutú ññ cáni: Jeē candíje ñihin yó jéē squícu ya jeē ni jéjnūhun ya, jeē cócuhun ni yō tāca jéē vāha coo, jíin jéē cundáhú ni yō jnáhan yó. Te jnūhun cundáhú ni chi jéhnu ndasí gá cúu nuū tāca jéē yáha.

### *Siquí jeē cácahān i tijni yuhu*

## 14

1 Na cóndihv̄i ni rō cundáhú ni rō jnáhan ró, te suni condihv̄i ni rō cacān rō tāca táhū jeē jéhe Espíritu. Te tahū jeē cánuú gá cúu jeē nácani ró jnúhun ya.

2 Chi tēe névāha tahū jeē cahán de tijni yuhu jeē tu jécūhun ni de, chi máá-ni Yaā Dios jiní jeē cahán de, nasūu ñayuu. Chi ni ñn i ma jécūhun ni jeē cahán de. Chi sáha Espíritu jeē cahán de tāca jnúhun yísahí.

3 Te sa suhva tēe nácani jnūhun ya, chi jíin ñayuu cahán de návāha ije i jíin jnúhun ya, te stíhv̄i ni de i, te cahán ndeyí ni de jíin i.

4 Te tēe jeē cahán tijni yuhu, chi máá-ni de ije jíin jnúhun ya. Te tēe jeē nácani jnūhun ya, chi sa suhva sáha de jeē ñayuu cácaandíje ije i jíin jnúhun ya.

5 Nújnahan ni rī jeē ndihi ró cuu cahán rō tijni yuhu jeē tu jécūhun ni rō, te jeē cánuú ndasí gá cúu jeē nácani ró jnúhun ya. Chi jéhnu ga jniñu sáha tēe nácani jnūhun ya vēsú tēe cahán tijni yuhu. Chi núu tú tēe castūhun jnúhun cahán de, te ma cuajniñu jeē ije ñayuu cácaandíje.

6 Jeē yúcuan hermano jijnáhan ró, núu na jéé rī nuū rō, te núu cahán rī tijni yuhu jeē tu jécūhun ni rō, ¿te ndé cuajniñu ún? Te núu na cahán rī ñn jeē ni stéén yā, chí ñn jeē cutūhva ró jnúhun ndaā, chí ñn jeē nácani rī jnūhun ya, chí ñn jeē steén rī nuū rō, yúcuan cúu jeē cuajniñu.

7 Sáha yó cuenta jeē nájnūhun instrumento música, vēsú tu técu, te cuu cata, nájnūhun flauta jíin arpa. Te núu tu jíta sñn sñn nota, ¿te ndese cuni yó na yaa jíta?

8 Te núu corneta tu jécú cáji, te ni ñn tēe ma sátūhva de quih̄n de guerra.

9 Te suni súcuan rōhó jijnáhan ró, núu tu cahán cáji ró jnūhun jecūhun ni ñayuu, ¿te ndese cuni i na vé cahán rō? Chi jnūhun cahán rō ndiso tachī cuahān jíin.

10 Te ndaā chi íyó cuéhē yuhu ini ñayiv̄í, te tācá yuhu chi íyó ñayuu jécūhun ni.

11 Te núu tu jécūhun ni yō yuhu cahán ñn tēe, te cúu yó nájnūhun tēe ñuu jicá núu tēe cahán, te suni nájnūhun tēe ñuu jicá cúu de nuū maá yó.

12 Jeē yúcuan rōhó jéē cácu ni ndasí ró ñih̄n rō tahū jeē jéhe Espíritu, na cácan rō tahū jeē sáha jeē ije ñayuu cácaandíje jíin jnúhun ya.

13 Núu súcuan te ñayuu jeē cahán ñnga yuhu jeē tu jécūhun ni i, na cácan tahú i jeē cuu nacastūhún i yuhu ún.

14 Chi núu jicán tahú yó jíin ñnga yuhu, te máá ánuá-ni yó cúu jeē jicán tahú, te tu ndé jéjniñu nuū jeē níjnūní yō.

15 ¿Ndese sáha yó núu súcuan? Na cácan tahú yó jíin ánuá yō, te suni jíin jéē níjnūní yō. Na cáta yó yaa ñi jíin ánuá yō, te suni jíin jéē níjnūní yō.

16 Chi núu nácuatáhú ró máni jnūhun jeē ní quíji nuū anuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíin ró. Chi tu jíni cuiti de na jnūhun cahán rō.

17 Ndaā chi vāha nácuatáhú máá ró, te ñnga de chi tú na vé ñih̄n de jeē ije de jíin jnúhun ya.

18 Na cútahū rī nuū Yaā Dios jeē cahán gā rī jíin tijni yuhu vēsú maá ró jijnáhan ró.

19 Te vēsú súcuan te núu íne ri nuū cáyūcu tūtú ñáyuu cácadíje, te nújnahan gā ni rī cahán rī uhūn-ni jnūhun jeē jécūhun ni i te stéén nuū i, vēsú jeē cahán rī uxī mil jnūhun jíin inga yuhu jeē tu jíiní cuiti i.

20 Hermano jijnáhan ró, ma cáni ni rō nájnūhun sūchi lúli, chi sa suhva na íje ró jéē jecūhun vāha ni rō. Te coo ró nájnūhun sūchi lúli jéē tu jíiní i jniñu néé.

21 Te yósó núu tútu ley yā jenahán: Jíin jnūhun cácahān tēe inga yuhu, jíin jnūhun cácahān tēe ñuu jicá, sáha ri jeē cúni sōho ñayuu yáha jnūhun ri. Te ni jíin súcuan ma sáha i cuenta jnūhun cahán rī, achí máá Jítoho yō.

22 Núu súcuan te tahū jeē cahán yō tijni yuhu, yūcuan cúu ñn jeē steén poder Yaā Dios nuū ñáyuu tu cácadíje, nasūu núu ñáyuu cácadíje. Te jeē nácani yó jnūhun ya, yūcuan cúu jeē steén nuū ñáyuu cácadíje, nasūu núu ñáyuu tu cácadíje.

23 Núu súcuan te núu ndihí ró ñáyuu cácadíje cáhīyo tūtú, te tāca ró cácahān sñn sñn yuhu, te quīvīcoo ñayuu tu jécūhun ni jíin ñáyuu tu cácadíje, ¿te á má cahán i jeē ní canduu loco ró?

24 Te núu tāca ró cánacani jnūhun ya, te núu quīvī ñn tēe tu cácadíje chí ñn tēe tu jécūhun ni, yūcuán na te nacuni de jeē tēe íyó cuéchi cúu de, te coto ndee de máá de jíin jnūhun cánacani ró.

25 Te nucūhun ni de tāca jéē ní jeni yuhu ni de jíin ánuá de. Yūcuán na te jecuiñī yití de te chiñúhún de Yaā Dios. Te cahán de jeē íne ndije Yaā Dios jíin ró jijnáhan ró.

*Siquē jeē yucún yñúhún na cóo nuū ndutútú yó*

26 Núu súcuan hermano jijnáhan ró: Nuū cándutútú ró te tāca ró coo ñn yaa iī cata ró, chí ñn jnūhun stéén ró, chí ñn jnūhun jeē ni sáha Yaā Dios jeē jécūhun ni rō, chí inga yuhu jeē cahán rō, chí jéē nácastūhun ró jnūhun inga yuhu ún. Te ndihí ún na sáha ró

návāha ije ñayuu cácadíje jíin jnūhun ya.

27 Te núu cáhīyo tēe cahán inga yuhu, te na cáhán uū de chí únī-ni de, te ná ñn ná ñn de na cáhán. Te suni jíiní ñúhún jéē nacastūhún ñn tēe jnūhun ún.

28 Te núu tu íyó tēe jeē cúu nacastūhun jnūhun ún, te tēe cácahān inga yuhu, vāha ga ma cahán de nuū cándutútú ró, te na cáhán maá-ni de jíin Yaā Dios.

29 Te suni súcuan tēe cánacani jnūhun, na cáhán uū de chí únī de, te sava ga rō nacani ni rō núu íyó ndāa jeē cácahān tēe ún.

30 Te núu inga tēe néne ni nihīn de ñn jnūhun jeē ni stéén yā nuū de, núu súcuan te tēe cáhán na jécuiñī jeē cahán de, návāha cahán inga tēe ún.

31 Te súcuan te ná ñn ná ñn ró cuu nacani ró jnūhun jeē steén yā nuū ró, návāha cutūhva ró te coo ndeyí ni rō.

32 Te tēe cánacani jnūhun, jíiní ñúhún cuatáhú de jeē nácani inga tēe jnūhun te jecuiñī jeē cahán maá de.

33 Chi Yaā Dios cuní yā jeē coo nayúú méhñu ró, násūu jéē sacā núu cuvaā ró.

Te nájnūhun cásáha tāca grupo hermano cácadíje,

34 suni súcuan tācá ñahan cándutútú jíin ñáyuu cácadíje, na cóo nayúú ña. Chi tú vāha jeē cahán ña, chí sa cuatáhú ña nájnūhun cáhán tutu ley yā.

35 Te núu cúni ña cucáhnu ni ña ñn jnūhun, te nde vehe na cájnūhún ña yñ ña. Chi jnūhun canu cúu jeē cahán ñn ñahan méhñu núu cándutútú ró.

36 Te na sáha ró cuenta jeē tu ní quénda jnūhun Yaā Dios nuū maá ró jijnáhan ró, te nasūu máá ñn máá ró ní cánihīn jnūhun ya.

37 Núu ñn tēe jení ni de jeē tēe nácani jnūhun ya jíin tēe névāha Espíritu cúu de, núu súcuan te na cuájnūhún de jeē jniñu ní ndacu Jítoho yō cúu jeē tēe ri yāhá.

38 Te núu tu jétáhú de jnūhun yáha, suni ma cuatáhú yó de.

39 Núu súcuan, ñánī mánī jijnáhan ró, na cóndihvī ni rō nacani ró jnūhun

ya, te ma cási rō nuū tée cácahān sīn sīn yuhu.

<sup>40</sup> Te yúcūn yíñúhún na sáha ró táca jniñu.

### *Jnūhun jeē ní natecu Cristo*

## 15

<sup>1</sup> Hermano jijnáhan ró, vijna te nucūhun ni rō jnūhun jnáma ya yohó jeē ní nacani ri nuū rō. Te jnūhun ún chi je ni cajetáhú ró, te suni cáhīn nīhin ró jíin.

<sup>2</sup> Te suni jíin jnūhun ún te ni jnama ya rohó, te núu cáhīn nīhin ró jíin jnūhun ni nacani ri nuū rō, te núu tu ní cácaandíje cāha ró.

<sup>3</sup> Chi jnūhun cánuú gá jeē ni níhīn maá rí ni nastéén rī nuū rō: Jeē ni jíhī Cristo síquī cuéchi yó, nájnūhun je cáhān tutu īī nde jenahán.

<sup>4</sup> Te ni quindūji ya, te ni natecu yā nuū uní quivī, nájnūhun cáhān tutu īī.

<sup>5</sup> Te ni nane ya nuū Pedro. Te sáá te ni nane ya nuū ndihúxí gā apóstol.

<sup>6</sup> Te sáá te ni nane ya nuū vihyá gā uhūn ciento hermano jeē cáyūcu tūtú. Te sava i técu gā nde vijna, te sava i je ni jihī.

<sup>7</sup> Te sáá te ni nane ya nuū Jacobo, yūcuán na te nuū ndihī ga apóstol.

<sup>8</sup> Te jeē sándihī na te ni nane ya nuū maá rí. Te nájnūhun ĩn jeē ní cacu yúte, súcuán cúu jeē ĩn sanaa-ni te ni nduu ri apóstol.

<sup>9</sup> Chi tēe núu ga nuū tāca gá apóstol cúu ri, te ni nasūu tēe vāha cúu ri jeē cónaní rí apóstol, chi ni jito xeēn rī ñayuu cácaandíje nuū Yaā Dios.

<sup>10</sup> Te síquī jeē ní sáha Yaā Dios jeē vāha ruhū, jeē yúcuán cúu ri apóstol vijna. Te jeē ní sáha ya jeē vāha ruhū, chi tú cāha ní cúu, chi sa ni scáca ga rī jnūhun ya vēsú tāca gá tēe apóstol. Te nasūu maá rí ní sáha, chi Yaā Dios ni sáha ya jeē vāha un jíin rí.

<sup>11</sup> Núu súcuán te vēsú ruhū chí táca gá tēe ún, súcuán cánacani ri jnūhun, te súcuán ni cacandíje ró.

### *Jnūhun jeē natecu ndīyī*

<sup>12</sup> Te jeē cánacani ri jnūhun Cristo jeē ní natecu yā mēhñu ndīyī, ¿te naun cácahān sava ró jēē ma nátecu ndīyī?

<sup>13</sup> Chi núu jeē tú natecu ndīyī, te suni tu ní nátecu Cristo nuú.

<sup>14</sup> Te núu jeē tu ní nátecu Cristo, te cánacani cāha rí jnūhun ya nuú, te suni cácaandíje cāha ró núu.

<sup>15</sup> Chi núu jeē súcuán cúu núu, te cácuu ri tēe jeē tu cácahān ndaā jnūhun Yaā Dios, chi ni cacachi rī jeē ní nastécu Yaā Dios Cristo. Te núu jeē tú natecu ndije ndīyī, núu súcuán te tú ndaā jeē ní nastécu Yaā Dios Cristo.

<sup>16</sup> Chi núu tú natecu ndīyī, te ni Cristo suni tu ní nátecu yā nuú.

<sup>17</sup> Te núu tu ní nátecu Cristo, te cácaandíje cāha ró te cándiso īī gā rō cuéchi ró núu.

<sup>18</sup> Te núu jeē súcuán cúu núu, te suni je ni cajnahnū ndetū ñayuu ni cacandíje Cristo.

<sup>19</sup> Chi núu tú natecu ndīyī, te núu maá ĩn-ni síquī vida yáha ñúhun ni yō jeē sáha Cristo jeē vāha yóhó, núu súcuán te ndahú ndasí gá cácuu yó vēsú tāca gá ñayuu, chi cácaandíje cāha yó núu.

<sup>20</sup> Te tuú chi íyó ndaā jeē ní natecu Cristo mēhñu ndīyī. Te maá yá cúu jeē xíhna gā ni natecu nuū tāca gá ndīyī jeē natecu.

<sup>21</sup> Chi síquī jeē ní stívi ĩn-ni tēe Adán, te ní quejéé jíhī ñayuu. Te suni súcuán síquī jeē ní sáha ĩn-ni tēe Cristo, te natecu ñayuu.

<sup>22</sup> Chi nájnūhun cájihī ndihī yó síquī jeē cácuu yó yúcūn Adán, suni súcuán natecu ndihī yó síquī jeē yíhī yó ndaha Cristo.

<sup>23</sup> Te ná ĩn ná ĩn ndese ndíquín jnáhan maá: Xíhna gā Cristo ni natecu yā, te sáá te quivī ndíji ya te natecu tāca ñayuu yíhī ndaha ya.

<sup>24</sup> Yūcuán na te jīnu tiempo, te snāā yā poder táca enemigo jeē cujéhnu jíin jēē ndácu jniñu jíin jēē iyó poder. Te ndihī jeē ndácu ya jniñu nuū, nacuāha ya nuū Tatá yā Yaā Dios.

<sup>25</sup> Chi cánuú jēē ndacu Cristo jniñu nde quiji quivī jeē quénde Yaā Dios

poder tāca jéē jíto uhū nuū Cristo, te stóho ya.

<sup>26</sup> Te jeē sándihí na te snāā yā cuehyi jéhni ñayuu.

<sup>27</sup> Chi cáhán tutu ii jeē sáha Yaā Dios jeē cujéhnú Cristo síquī ndihi, te cutáhú núū yā. Te jeē cahán jeē cujéhnú ya nuū ndihi-ni, te jíní vāha yó jéē maá Yaā Dios ma quíhi ya ndaha Cristo, chi Yaā Dios cúu jeē ní chíhi tācá un ndaha Cristo.

<sup>28</sup> Te ná ní quívi ndihi ún ndaha Cristo, yūcuán na te suni máá Cristo jeē cúu ya Sēhe, quívi ya ndaha Tátá yā, Yaā jeē ní chíhi tācá un ndaha ya. Te sūcuan te máá Yaā Dios jni ya ndihi-ni.

<sup>29</sup> Te íyó ñáyuu cájendute jehē ndíyi. Te núu tú natecu cuíti ndíyi, ¿te najehē cájendute i jehē ndíyi núu sūcuan?

<sup>30</sup> Te ruhū jijnáhan ri, ¿najehē cúu jeē ndiquívi cájendeyí ní rí jíto ri jnūndóho cuu rí, te núu tú natecu ndíyi?

<sup>31</sup> Hermano, nájnūhun íyó ndāā jeē cúsi ní rí síquī jeē cácandíje ró Jítoho yō Jesucristo, suni sūcuan íyó ndāā jeē ndiquívi nducú ñáyuu cahni ruhū síquī jniñu ya.

<sup>32</sup> Te jeē ní ndoho ri ni casáha tēe xeēn ñuu Efeso, jeē cácuu de nájnūhun quíti xéén, ¿te na vé nihín rí síquī un núu sūcuan? Chi núu tú natecu ndíyi, te cuu cahán yō nájnūhun áchí ñn jnūhun: Na cúsi ní yō caji yō coho yó, chi sanaa te sajnē te cuu yō, achi yō nuú.

<sup>33</sup> Ma cuáha ró jnúhun stáhú ñáyuu rohó. Chi áchí ñn jnūhun: Núu cájica ró jíin ñáyuu neé, te stívi i róhó jéē tuá caca ndāā rō.

<sup>34</sup> Nachuhun ni rō jijnáhan ró, te sáha ró jniñu ndāā, te ma sáha ga rō cuēchi. Chi sava ró tu cájini cuíti rō ndese Yaā cúu Yaā Dios. Sūcuan cáhán rí návāha na cúcanu rō.

### *Ndese natecu ndíyi*

<sup>35</sup> Te sanaa te cahán ñn ró: ¿Ndese natecu ndíyi? ¿Ndese coo yiqui cúñu i? achi rō.

<sup>36</sup> Tu jécūhun cuíti ní rō núu sūcuan. Chi cúu nájnūhun jeē cátají ró tāca tata chíji ñuhun návāha nane yucū i.

<sup>37</sup> Te tata jeē quívi chíji ñuhun, núu trigo chíinga tata, chi nasūu yucū cúu, chí máá núní-ni cúu.

<sup>38</sup> Te cuéé gá te cane, chí Yaā Dios ní jēhe ya yucū tata ún, ndese ní nujnahán ní maá yá, te ná ñn ná ñn tata chí sín sín cáa yucū ní sáha ya.

<sup>39</sup> Te suni sūcuan tācá yiqui cúñu, chí tú inuú cándāa. Chí sín cáa ñayuu, te sín cáa quíti, te sín cáa saa, te sín cáa chācá.

<sup>40</sup> Te suni sūcuan cúu tāca jéē ín andívi jíin táca jéē iyó ñáyívi. Te sín luu cáa jeē ín andívi, te sín luu cáa jeē iyó ñáyívi.

<sup>41</sup> Te sín ndíndēe níandii, te sín ndíndēe yóo, te sín ndíndēe táca quími. Te tācá ñn ñn quími chí suni sín sín ndíndēe.

<sup>42</sup> Te suni sūcuan coo jíin ndíyi jeē natecu. Ndíyi jeē chíndūji yó chí téhyū, te jeē nastécu yā chí ma cúu gā.

<sup>43</sup> Jeē chíndūji yó chí ndáhú cáa, te jeē nastécu yā chí luu cujéhnú. Jeē chíndūji yó chí tú na fuerza, te jeē nastécu yā chí coo fuerza.

<sup>44</sup> Jeē chíndūji yó chí ñn yiqui cúñu cuenta ñáyívi cúu, te jeē nastécu yā chí ñn yiqui cúñu cuenta Espíritu yā cúu. Chí íyó yiqui cúñu cuenta ñáyívi, te suni íyó yiqui cúñu cuenta Espíritu.

<sup>45</sup> Chí sūcuan yósó núu tútu ii: Adán, tēe xīhna ñúhún, ní cuvāha de jíin vida cuenta ñáyívi, áchí. Te Cristo cúu nájnūhun inga Adán uū, te máá yá cúu Espíritu jeē jēhe vida.

<sup>46</sup> Te nasūú yiqui cúñu cuenta Espíritu cúu jeē ní cuvāha xīhna gā, chí sa suhva yiqui cúñu cuenta ñáyívi, te sáa te nduu cuenta Espíritu.

<sup>47</sup> Te cuenta ñáyívi cúu tēe xīhna ñúhún, chí ní cuvāha de jíin tícachā ñuhun. Te Adán uū jeē cúu máá Jítoho yō, chí nde andívi ní quiji ya.

<sup>48</sup> Te ñayuu ñáyívi yáha, chí cúu i jnáhan Adán jeē ní cuvāha jíin tícachā ñuhun. Te ñayuu jeē quívicoo andívi, chí ndúu i nájnūhun máá Yaā ní quiji nde andívi.

49 Chi jeē cáa yó nájñuhun tēe ni cuvāha jíin tícachā ñuhun, suni súcuan coo yó nájñuhun cáa máá Yaā ní quiji nde andiví.

50 Jñuhun yáha cástuhun rí nuū rō jijnáhan rō, hermano, jeē yiqui cúñu yō cuenta ñayiví yáha, ma cúu quiví ñuu nuū ndácu Yaā Dios jniñu. Chi jeē jihí cúu, te ma cúu quiví nuū cótecu níf cáni.

51 Te cúní rī jeē na jécuhun ni rō jñuhun yáha jeē ní yisāhí: Nasūú ndihí yó cuu, te ndihí yó chi nasāma yiqui cúñu yō.

52 Chi quiví jeē cuécu sandihí na trompeta, te ñn yachī-ni, nájñuhun ñn jeē nácuenī-ni yó, te nasama ya yohó. Chi cuecu trompeta un, te natecu tāca ndíyí jeē ma cúu gā i. Te tāca yó jeē cátecu yō quiví ún, chi nasama ya yiqui cúñu yō.

53 Chi jeē tehyú yāhá, cánuú nucuhun jeē ma téhyú gā. Te jeē jihí cánuú nucuhun jeē ma cúu cuií gā.

54 Chi jeē jihí jeē tehyú, chi quiji quiví jeē nucuhun jeē ma cúu gā ma tehyú gā. Yūcuán na te cundaā jñuhun yósó núu tútu ii: Jíin poder yā ni snáā yā cuehyí jéñi ñayuu.

55 Cuehyí jéñi yóhó ¿ndese ga cuu sáha xeēn jíin yó? Chi natecu yō. ¿Te ndese ga cundeyí jíin yó? Chi snáā yā. Achí tutu.

56 Chi cuēchi cúu jeē sáha jeē cundeyí cuehyí jéñi ñayuu. Te ley yā jenahán sáha jeē náne cuēchi siquī yō.

57 Te na cútahū yō nuū Yaā Dios, chi jíin máá Jítoho yō Jesucristo sáha ya jeē cundeyí yó siquī cuēchi jíin síquī jñuhun cuu yō.

58 Jeē yúcuan, ñánī mánī, cuiñi ñihin rō te ma cáca yátá rō jijnáhan rō. Te níni na sájñiñu vāha rō jíin jniñu máá Jítoho yō. Chi je cájini rō jeē tu cásájñiñu cāha rō jíin máá Jítoho yō.

*Siquī jeē cáquin i xuhún cuu tācá hermano*

## 16

1 Te vijna te cahān rī siquī xuhun jeē cáquin rō cuu hermano cácandíje cándoho ndáhú. Suni na sáha máá

rō jijnáhan rō nájñuhun ni ndacu ri nuū tāca grupo ñayuu cácandíje ichi Galacia.

2 Tācá domingo te ná ñn ná ñn rō chuvāha sñn rō jecu xuhún, núu ndese ni nihñn maá rō, návāha quiví jeē jinú rī nuū rō te je íyó túhva.

3 Te jeē jeé rī, te cuāha ri carta nuū tāca tēe jeē nácāji rō, te tají rí de quingoo de nuū tācá hermano cáyūcú Jerusalén, quisiáha de xuhun jéē ní casocō rō.

4 Te núu íyó váha jeē quihín rī, te suni quihñn rī jíin de jijnáhan de.

*Jeē cahān Pablo siquī jeē quícondēhé de ñayuu cácandíje*

5 Te jeē jeé rī nuū rō jijnáhan rō, te jíni ñuhún jeē xíhna gā jeē rī región Macedonia, yūcuán na te jeē rī ñuu rō Corinto.

6 Te sanaa te quendōo ri jíin rō jijnáhan rō jecu tiempo, chí sanaa te coyūcu yó níf tiempo mñjin. Yūcuán na te cuu chindéé ñáhán rō ruhū, núu ndé chi quihín tucu ri.

7 Chi tu cúní rī jeē rī nuū rō vijna te yāha yachī rī quihñn rī, chi ñuhun ni rī jeē quendōo rī jíin rō jecu tiempo, te núu cuāha Jítoho yō jñuhun.

8 Te cone ri ñuu Efeso yāhá nde na yáha quiví Pentecostés.

9 Chi coo cuehē ñayuu scandíje ri, te vāha quihñn jniñu Jítoho yō. Te suni íyó cuehē ñayuu cácuu contra.

10 Te núu na jéé Timoteo, te sáha rō jéé coo sñn ni de mēhñu rō, te ni ñn ma cáni ni de siquī. Chi suni jniñu máá Jítoho yō sáha de, nájñuhun máá rí.

11 Núu súcuan te ni ñn rō má sajeē ni rō nuū de. Chi sa suhva chindéé ñájñáhan rō jíin de jeē na quihín gā de, te coo ndeyí coo sñn ni de, návāha ndiji de coto jnáhan ri jíin de. Chi ruhū jíin sava ga hermano cándetu ri de.

12 Te hermano Apolos chi ni cahān ndahú rí jíin de jeē na jéé de jíin sava ga hermano, condēhé de rōhó. Te ni jeni ni de jeē ma cúu jeē de vijna. Te núu na núne de te jeē de.

*Saludo jeē sándihí*



<sup>13</sup> Ndito coo ni rō jijnáhan ró, te cuiñi nihin ro jíin jnúhun cá candíje ró. Te téyí na cóo ni rō, te na cóo fuerza ini rō.

<sup>14</sup> Te tāca jē casáha ró, na sáha ró jíin jnúhun cúndáhú ni jnáhan.

<sup>15</sup> Hermano, cájini rō jeē xihna gā ñayuu vehe Estéfanos ni cacandíje ichi Acaya. Te ni cajēhe i máá i nuū jniñu jeē chindéé ñáhán i tācá hermano cá candíje.

<sup>16</sup> Te cúní rī jeē suni máá ró jijnáhan ró, cuatáhú váha ró ñayuu casáha súcuan, jíin táca ñayuu cachindéé ñájnáhan te casájniñu siquī jniñu ya.

<sup>17</sup> Cúsiñi rī jeē ní qui jícoo Estéfanos jíin Fortunato jíin Acaico, chi tēe yáha ni cajejniñu de nuū rī jehē rō jeē tu ní cáhiyo ró jíin rí.

<sup>18</sup> Chi ni ndundeyí ni rī, te suni súcuan máá ró jijnáhan ró, ni casáha de. Te cánuú cuajnúhún ró tāca tēe cándāa súcuan.

<sup>19</sup> Sándeyí ni rō jijnáhan ró, áchí táca grupo ñayuu cá candíje cáyūcu Asia. Aquila jíin Priscila jíin ñayuu cá candíje jeē cándutútú vehe de, cácahán i jeē sándeyí ndasí ni rō jíin jnúhun máá Jítoho yō.

<sup>20</sup> Te tācá hermano cácahán i jeē sándeyí ni rō. Te jeē cahán rō jíin táca jnáhan ró, te yíñuhún techūhu ró ndaha i.

<sup>21</sup> Ruhū Pablo, jíin ndaha máá rí tēe rí jnúhun yáha jeē na sándeyí ni rō jijnáhan ró.

<sup>22</sup> Te núu ndé ñn tu íyó manī jíin Jítoho yō Jesucristo, te na jnáhnú ndetū i núu súcuan. Te na cáhán yō: Jítoho ná, cúní na jēe yachī ndiji ní.

<sup>23</sup> Te ñuhun ni rī jeē maá Jítoho yō Jesucristo na sáha ga yā jeē váha róhó jíjnáhan ró.

<sup>24</sup> Te manī rī jíin ró jijnáhan ró jēe cá candíje ró Cristo Jesús. Súcuan na cóo. Amén.

## CARTA UU JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, apóstol Jesu-  
cristo, chi súcuan ni nujnahan ni Yaā  
Dios ni tají yá ruhū nacani ri jnūhun  
ya. Te ndindúú rí jín hermano yō  
Timoteo cátee ri carta yáha cuájeē  
nuū rohó hermano ñuu Corinto jeē  
cáandíje ró Yaā Dios, jín núū ndíhi  
róhó jéē cáyihí ndaha Yaā Dios jeē  
cáyūcu ní cáhnu Acaya.

<sup>2</sup> Te cáñuhun ni rī jeē Tatá yō Yaā  
Dios jín Jítoho yō Jesucristo na sáha  
ga yā jeē váha róhó te sáha ya jeē coo  
ndeyí coo sī ni rō.

### *Siquī jeē ní ndoho Pablo jnūndóho*

<sup>3</sup> Na cáhán yō jeē yóhyo cújéhnū Yaā  
Dios, Yaā cúu Tátá maá Jítoho yō Je-  
sucristo. Chi máá yá cúu Tátá yō jeē  
cundáhú ni yohó, te níni sáha ya jeē  
ndúsī ni yō.

<sup>4</sup> Chi sáha ya jeē ndúsī ni yō  
siquī tāca jnūndóho ndóho yó, návāha  
suni cuu sáha máá yó jeē ndúsī ni  
jnáhan yó jéē cándoho jnūndóho. Chi  
nájñūhun ni sáha ya jeē ndúsī ni maá  
yó, suni súcuan sáha yó jéē ndúsī ni i.

<sup>5</sup> Chi jeē ndóho yó cuehē jnūndóho  
nájñūhun ni ndoho Cristo, suni súcuan  
nihīn yō cuehē jnūhun ndusī ni, sáha  
Cristo.

<sup>6</sup> Jeē yúcuan núu cándoho ri  
jnūndóho te súcuan te cuu sáha ri jeē  
ndúsī ni rō te quendōo vāha ga anuá  
rō. Te jeē sáha Yaā Dios jeē ndúsī ni rī,  
suu sáha tucu jeē ndúsī ni maá ró, te  
quendōo vāha ga anuá rō. Te súcuan te  
nihīn rō fuerza jeē cuándeýí ni rō jín  
tāca jnūndóho nájñūhun cándoho rī.

<sup>7</sup> Te cáñuhun ndasí ni rī jeē cúu róhó,  
chi cájini rī jeē nájñūhun cándoho ró  
jnūndóho jín rí, suni súcuan ndusī ni  
rō jín rí sáha máá Yaā Dios.

<sup>8</sup> Hermano, cáconi rī jeē na cúni rō  
jijnáhan ró ndese ni candoho ri ichi

Asia. Chi yóhyo xeēn jnūndóho ni ca-  
jito ri, nde je yajni tuá canda ri, te ni  
jeni ni rī jeē cuu rī nuú.

<sup>9</sup> Te siquī jeē ní cajehnde ni rī cuu  
rī, te yúcuan ní sáha jeē ní cajecūhun ni  
rī jeē ma ténuū rī maá rí chi tú jniñu  
ri, chi sa suhva Yaā Dios jeē nastécu  
ndīyí tenuū rī.

<sup>10</sup> Chi máá yá ni scácu ruhū jijnáhan  
ri nuū jnūndóho xeēn jeē jé yajni cuu  
rī nuú, te suni súcuan scácu ya ruhū  
vijna. Te ñúhun ni rī jeē suni scácu  
tucu ya ruhū ichi núú gā.

<sup>11</sup> Te suni na chindéé ñáhán ró rúhū  
jijnáhan ri jeē cacān tahú rō jehē rī.  
Chi núu cuehē ñayuu cacān tahú jehē  
rī, te suni cuehē i cuu nacuatáhú jehē  
rī jeē ni sáha ya jeē váha ruhū.

### *Jeē ní cucuéé Pablo quihīn de ñuu Corinto*

<sup>12</sup> Iyó ñin jeē sáha jeē cácusī ni rī:  
Chi váha iyó ni anuá rī jeē váha ndoo  
te ndaā ni cajica ri nuū ñayuu ñayīví,  
te víhyá gā nuū maá ró jijnáhan ró.  
Chi siquī jeē váha ni Yaā Dios, te ni  
chindéé ñáhán yá ruhū, te nasūu siquī  
jéē ndichí máá rí cúu jeē ní cajica ri  
súcuan.

<sup>13</sup> Te jnūhun cátee ri nuū tāca carta  
rī, chi máni jeē cúu cahu ró te jecūhun  
ni rō cúu. Te ñúhun ni rī jeē jecūhun  
vāha ga ni rō,

<sup>14</sup> nájñūhun je cájecūhun ni rō jecu.  
Te súcuan te cuu cusī ni rō siquī rī  
quívī ndíji Jítoho yō Jesús, nájñūhun  
cácusī ni rī siquī maá ró.

<sup>15</sup> Te siquī jeē súcuan ni cucáhnu ni  
rī, te jeē yúcuan ní jeni ni rī jeē núu  
na quihín rī Macedonia te jeē rī nuū  
maá ró xīhna gā, návāha cusī ni rō jeē  
jécondēhe rí rohó úu jínu núú.

<sup>16</sup> Chi ni jeni ni rī jeē jécondēhe rí  
rohó, te yāha ri quihīn rī Macedonia,  
te jeē nándicó rí Macedonia te ndiji  
tucu ri nuū rō. Yúcuan na te cuu  
chindéé ñáhán ró ruhū jeē quihín rī  
ichi Judea nuú.

<sup>17</sup> Te jeē súcuan ni jeni ni rī, ¿te á tee  
tu nacani vāha ni cúu ri jeē tu ní jéé rī  
nuū rō, chí naún? ¿A cájeni ni rō jeē  
cúu ri nájñūhun ñayuu ñayīví jéé yachī

cahán jeē cuu, yūcuán na te tuú, chí naún?

<sup>18</sup> Tuú chi máá Yaā Dios jíni yā jeē tu cáhán rī jíni ró jeē cuu, te yachī nácahān rī jeē ma cúu.

<sup>19</sup> Chi ruhū jíni Silvano jíni Timoteo ni canacani rī jnūhun Jesucristo Sēhe Yaā Dios nuū rō jíni náhan ró. Te máá yá tu cáhán yā jeē cuu te nacahān tucu ya jeē ma cúu. Chi squícu ya jeē cahán yā.

<sup>20</sup> Chi ndihī jeē ni jéjnūhun Yaā Dios, squícu máá Cristo. Te jeē yúcuán cácahān yō jeē yóhyo luu cújéhnū Yaā Dios, te cácahān yō Amén, chi ndihī squícu Cristo Jesús.

<sup>21</sup> Te Yaā Dios cúu jeē sáha jeē ruhū jíni náhan rī jíni róhó jíni náhan ró, cáhīn nīhin yó jíni Cristo, te ni sándoo ya yohó jēē cuajniñū yó núu yā.

<sup>22</sup> Te suni ni jēhe ya Espíritu yā jeē cóndee ini anuá yō, te cúu ya nájnūhun ñn sello jeē steén jeē cúu yó séhe Yaā Dios. Te sáha Espíritu jeē iyó ndáā ni yō jeē cuāha Yaā Dios tahū yō.

<sup>23</sup> Te jeē ná tu jeē rī nuū rō ñuu Corinto, nájnūhun ni jeni ni rī, suu cúu siquī jeē tu ní cúni rī cuxeēn rī nuū rō jeē tu cásaha vāha ró. Te máá Yaā Dios cúu Yaā jíni jeē cahán ndaā rī. Te iyó vāha jeē na cúu rī te núu tu cáhán ndaā rī.

<sup>24</sup> Te nasūu jēē cácu ni rī ndacu nīhin rī jniñū nuū rō siquī jnūhun cácañíje ró yá, chi je cáhīn nīhin ro jíni jnūhun ún. Chi sa suhva cácu ni rī chindéē ñáhán rī rohó jēē na cúsi gā ni rō.

## 2

<sup>1</sup> Núu súcuán te ni jeni ni rī jeē ma jéē rī inga jínu nuū rō jíni jnūhun cuxeēn rī te cucuíhyá ni rō sáha rī.

<sup>2</sup> Chi núu cucuíhyá ni rō sáha rī, ¿te ndé ñáyuu sáha jeē cusī ni maá rí? Tuá na inga ñáyuu, chi máni máá róhó, te ndese cuu te núu ni sáha rī jeē cucuíhyá ni rō.

<sup>3</sup> Te jeē yúcuán cúu jeē ní tee rī carta un núu rō, návāha nacani ni rō siquī cuéchi ró sáha, te ma cucuíhyá ni rī sáha cuéchi ró quívi jeē rī nuū rō. Chi sa suhva sáha ró jēē cúsi ni rī. Te jíni

vāha rī jeē núu cusī ni rī, te suni ndihī ró jíni náhan ró cusī ni rō.

<sup>4</sup> Te jeē ní tee rī carta un núu rō, te yōhyo ni nacani ni rī siquī rō, te ni jnahuhū ni rī, te nde ndahyú rī ni tee rī. Te tu ní téē rī jeē sáha rī jeē cucuíhyá ni rō, chi sa suhva návāha cuni rō ndese yōhyo manī rī jíni ró.

*Jeē íne cáhnu ni Pablo nuū téē ni sáha cuéchi*

<sup>5</sup> Te jeē ní cucuíhyá ni rī ni sáha téē jeē ni sáha cuéchi ún, te nasūu máa-ni rī, chi suni nde máá ró jíni náhan ró ni sáha de jeē ní cacucuíhyá ni rō jecu. Te cáhán rī jeē jecu-ni, chi tu cúni rī cuxeēn ndasí rí.

<sup>6</sup> Te jíni jēē ní cacuxeēn rō nuū de ná ni candutútú ró, te jíni yúcuán-ni te ni cuu-ni.

<sup>7</sup> Te vijna chi jíni ñúhún jeē cóne cáhnu ni rō nuū de, te sáha ró jēē ndúsī ni de, chi sanaa te caa ga cucuíhyá ni de, te ma ndúsī gā ni de.

<sup>8</sup> Núu súcuán te cáhán ndahú rí jíni ró jíni náhan ró jēē steén tucu ró jēē iyó manī rō jíni de.

<sup>9</sup> Chi jeē siquī jniñū yáha cúu jeē ní tee rī carta un núu rō, návāha coto ndee rī rohó núu cuatáhú vāha ró jniñū ndácu rī nuū rō.

<sup>10</sup> Núu súcuán te núu íne cáhnu ni rō nuū ñáyuu, te suni súcuán ruhū. Chi jeē íne cáhnu ni rī nuū ñáyuu núu ni sáha i cuéchi, te sáha rī súcuán siquī jeē manī rī jíni ró jíto jíniú Cristo.

<sup>11</sup> Chi cánuú cone cáhnu ni yō, chi tu cúni yō jeē nihín Satanás cuéchi siquī yō, chi je jíni vāha yó ndese ndúcú un stáhú yóhó sáha yó cuéchi.

*Jeē tu ní íyo nayúú ni Pablo ini ñuu Troas*

<sup>12</sup> Ná ni jehēn rī ñuu Troas jeē nacani rī jnūhun Jitoho yō Cristo, te vāha ni sáha ya jeē ni íyo modo jeē nacani rī jnūhun ya.

<sup>13</sup> Te vésú súcuán te tu ní íyo nayúú ni anuá rī, chi tu ní jíni náhan rī jíni hermano yō Tito. Yūcuán na te ni nacuatáhú rí nuū ñáyuu yūcuán, te cuananducú rí de ichi Macedonia.

*Jnūhun jeē cujēhnu ndúú yó jín Cristo*

<sup>14</sup>Te na cútahū yō nuū Yaā Dios, chi níní ndéca vāha ya yohó cuángoo yó jín Cristo Jesús, te ndúú yó jín yá jeē cujēhnu ndasí yá snāā yā poder ndihi enemigo yā. Te jéjníñu ya yohó jéē scuité núu yó jnūhun ya tǎcá-ni lugar, nájñūhun jíté núu ñn xicō asīn.

<sup>15</sup>Te cúu yó nájñūhun ñn sūje jeē jeén asīn nuū Yaā Dios sáha Cristo. Te nájñūhun jeē jinú xicō un núu ñáyuu cācu ánuá jín núu ñáyuu jnahnū ndetū.

<sup>16</sup>Nuū ñáyuu jnahnū ndetū chi cúu yó nájñūhun ñn xicō jeē cúu i sáha, te nuū ñáyuu cācu ánuá chi cúu yó nájñūhun ñn xicō vāha jeē cótecu i sáha. Te ni ñn yó ma cánda yó sáha yó jniñu yáha, te núu ma chindéé ñáhán yá yohó.

<sup>17</sup>Te ruhū jijnáhan ri, tu cásáha ri nájñūhun cásáha cuehē tēe jeē cánducú de nihīn de xūhun síquī jnūhun Yaā Dios. Chi sa cánacani ndaā rī jnūhun ya, chi máá Yaā Dios ni tají ruhū, te máá yá jiní jeē cánacani ndaā rī síquī jeē cáncandije ri Cristo.

*Jnūhun síquī contrato jeē*

### 3

<sup>1</sup>Te jeē cácahān rī sūcuan, ¿te á cájeni ni rō jeē cánducú tucu ri cahān rī jeē vāha ga tēe cácuu ri, chí naún? ¿Te chí jini ñúhún jéē steén rī carta recomendación nuū rō, chí jéē cacán rī cuāha ró núu rī jijnáhan ri, nájñūhun cásáha sava i?

<sup>2</sup>Tuú chi máá-ni ró cácuu nájñūhun ñn carta recomendación rī. Te jeē ñúhun ni rī jeē ní cacandije vāha ró ni sáha ri, suu cúu nájñūhun jeē yosó jnūhun carta un ini anuá rī. Te ndihi ñáyuu chi nájñūhun cáhu i, cúu jeē jiní i ndese ni nasāma ró.

<sup>3</sup>Chi máá ró cácuu nájñūhun ñn carta jeē ní tee Cristo te cáscáca ri. Te nasūu jín tinta ni tee ya, chi sa suhva jín Espíritu Yaā Dios, Yaā técu. Te nasūu núu tabla yuū nájñūhun ni tee ya ley yā, chi sa suhva nuū anuá ñáyuu ni tee ya.

<sup>4</sup>Te cácahān rī sūcuan, chi cácucahnu ni rī Yaā Dios síquī jeē ni sáha Cristo.

<sup>5</sup>Te nasūu jéē cájeni ni rī jeē cúu canda máá rí sáha ri jniñu ún. Chi sa suhva máá Yaā Dios sáha jeē cuu síquī ri.

<sup>6</sup>Te máá yá ni sáha jeē cuu cuajniñu vāha ri síquī contrato jeē yá. Te contrato yáha tu cáhán jeē síquī yó ley jeē ní tee jín letra, chi sa suhva jeē caca yó jín vida jeé, suu jeē ni jéhe Espíritu yā. Chi contrato ley jeē yosó jín letra, jnahnū ndetū ñáyuu sáha. Te jeē sáha máá Espíritu cúu jeē cótecu yó ní cáni.

<sup>7</sup>Te ley jenahán jeē ni jéhe ya nuū Moisés, ni yosó letra nuū tabla yuū. Te yōhyo ni cujēhnu, te ni ndindéé ndasí ni sáha, te nde Moisés ndí nuū de ni sáha. Te tu ní cúu coto vāha ñáyuu Israel nuū de ni sáha. Te vēsú sūcuan te cuéé-ni cuéé-ni ni ndahvā jeē ndíndēe núu de. Te núu sūcuan ni cujēhnu ndasí ley jeē sáha jeē cuu ñáyuu te jnahnū ndetū i,

<sup>8</sup>te sa víhyá gā cujēhnu ndasí gá jnūhun cotecu yō jeē jéhe Espíritu nuū yō.

<sup>9</sup>Chi núu yōhyo ni cujēhnu ley un jéē jnahnū ndetū ñáyuu sáha, te sa víhyá gā cujēhnu jnūhun jeē ndáhva Yaā Dios cuēchi yó.

<sup>10</sup>Chi ley un jéē ní cujēhnu nde saá, tuá cujēhnu cuiti, síquī jeē cujēhnu ndasí gá jnūhun Espíritu jeē iyó vijna.

<sup>11</sup>Te núu sūcuan ni cujēhnu ley jeē ni íyo jecu-ni tiempo, te sa cujēhnu ndasí gá jnūhun jeē coo ní cáni.

<sup>12</sup>Te jeē sūcuan cáñuhun ni rī, jeē yúcuán cáhīyo téyí ni rī nácani ri jnūhun yáha.

<sup>13</sup>Chi tu cásáha ri nájñūhun ni sáha Moisés jeē ní jesi de ñn sahma nuū de, návāha tú coto ñáyuu Israel ndese cuandahvā jeē ní ndindēe núu de.

<sup>14</sup>Te ñáyuu ún tu ní cájecūhun ni i. Te nde vijna núu cácahu ñáyuu Israel tutu contrato ley jenahán, suni tu cájecūhun ni i, chi nájñūhun jesi sahma un núu jeē níjnūní i, te tu cújiyo cuiti. Chi nde jeē candije i Cristo, yūcuán na te cujiyo.

15 Te suni súcuan nde vijna núu cácahu i tutu ley Moisés, te nájnūhun jeē jési ñn sahma nuū jeē níjnūnī i.

16 Te jeē násāma ini ñn ñayuu quívi i nuū maá Jítóho yō Cristo, yūcuán na te cújiyo-ni jeē jési ún.

17 Chi Jítóho yō cúu máá Espíritu. Te nuū íne Espíritu maá Jítóho yō, yūcuan cúu nuū iyó libre ñayuu jeē tuá yíhi i chíji ley jenahán.

18 Te jeē yúcuan máá yó jijnáhan yó, tuá jési nuū jeē níjnūnī yō. Chi cácuu yó nájnūhun espejo jeē jéhe nduva, cúu jeē cájica ndaā yō te suu stéén ndese yóhyo luu cújéhnū máá Jítóho yō. Te máá yó tāca quívi cuanasāma yó cuanduu luu ga anuá yō nájnūhun cáa máá yá. Chi máá Jítóho yō jeē cúu ya Espíritu, súcuan sáha ya jíin yó.

#### 4

1 Núu súcuan te tu ndínuu ni rī cánacani ri jnūhun ya. Chi síquī jeē ní cundáhú ni yā ruhū jijnáhan ri te ni jéhe ya jniñu yáha nuū rī.

2 Te tu cásáha ri jniñu néé jéé cúcanu yō sáha, ni tu cájica cuu ri jíin jnūhun ndíchí stáhú, ni tu cásama ri jnūhun Yaā Dios. Chi sa suhva cácahān rī máni jnūhun ndaā. Te súcuan te cuu cuni tāca ñayuu ini anuá i jeē cácahān ndaā rī jító jíinúu Yaā Dios.

3 Te núu iyó ñayuu tu jécūhun ni jnūhun jnama ya yohó jéé cánacani ri, te súcuan cúu nuū máni máá ñayuu jnahnū ndetū.

4 Te jeē tu cácañdije i, te máá jéxeén jeē ndácu jniñu ini ñayívi yáha, ní jesi nuū jeē níjnūnī i, návāha ma ndíndēe jnūhun Cristo ini anuá i, te ma cúni i jeē yóhyo luu cújéhnū Cristo, Yaā jeē ínuú cáa jíin Yaā Dios.

5 Te jeē cánacani ri jnūhun, te nasūu jnūhun máá rí, chi sa suhva jnūhun Jítóho yō Jesucristo cánacani ri. Te máá rí chi cácuu ri mozo-ni nuū rō jijnáhan rō jéé síquī jeē maní rī jíin Jesús.

6 Chi ná ni sáha Yaā Dios ñayívi te ni cahān yā jeē na cundijin nuū néē. Te suni súcuan ni sáha ya jeē ní cundijin nuū anuá yō jeē cájecūhun ni yō síquī

Jesucristo, ndese ndíndēe núu yā, cúu jeē yóhyo luu cújéhnū ya nájnūhun cúu Yaā Dios.

*Jeē cándiquīn yō jnūhun cácañdije yó yá*

7 Te tāca jnūhun yáha jeē yóhyo luu cújéhnū, chí nájnūhun jeē ñūhun ini ñn quísi ñūhun. Chi cácuu yó nájnūhun quísi ñūhun, chí tú na fuerza yō. Te jeē yúcuan cájini vāha ri jeē maá Yaā Dios cúu jeē jéhe poder síquī jnūhun yáha jeē yóhyo luu cújéhnū, te nasūu fuerza máá rí cúu.

8 Te jeē yúcuan, vésú tāca lado cájito ri jnūndóho, te tu sáha jeē ma ndúsíi gā ni rī. Te vésú cácuuhyá ni rī síquī jnūndóho, te cáñuhun ni rī jeē quee vāha jniñu ri.

9 Te vésú cájito xeēn ñayuu ruhū, te máá yá tu stóo ya ruhū jijnáhan ri. Te vésú cánducú i snāā i ruhū jíin jniñu sáha ri, te ma cúu.

10 Te ndé-ni cúu nuū cuángoo ri, te nájnūhun ni ndoho Jesús jeē ni jíhi yā, suni súcuan cándoho ri jeē jé yajni cuu rī, návāha suni cuu stéén rī fuerza Jesús jeē técu yā ini yíqui cúñu rī.

11 Chi jeē níni cátecu rī, te tāca quívi je yajni cahni ñayuu ruhū jeē síquī Jesús. Te súcuan te cájito ñayuu jeē técu Jesús ini yíqui cúñu rī jeē cúu.

12 Núu súcuan te ruhū jijnáhan ri, níni cúu jeē jé yajni cuu rī síquī jnūhun ya, te yūcuan sáha jeē cotecu máá rō ní cáni jijnáhan rō.

13 Te yósó núu tútu íi: Ni candije ri te jeē yúcuan ní cahān rī, achí. Te suni jeē cácañdije máá rí cúu jeē cánacani ri jnūhun ya.

14 Chi cájini rī jeē maá Yaā jeē ní nastécu Jítóho yō Jesús, suni súcuan nastécu yā ruhū, te sáha ya jeē ñn cáhnu ni cuíñi ndíhi yó núu yā.

15 Chi tāca jnūndóho yáha cándoho ri návāha coo vāha rō jíináhan rō. Te súcuan te cayā cuehē gā ñayuu jeē sáha ya jeē vāha i. Yūcuán na te suni yóhyo cuehē i nacuatáhú i nuū Yaā Dios, te cújéhnū ga yā sáha.

16 Jeē yúcuan cúu jeē tu ndínuu ni rī, te vésú cuandíhi fuerza yíqui cúñu rī,

te sa suhva cuanduu fuerza gā anuá rī tāca quívi.

17 Chi jnūndóho jeē ndóho yó ñayívi yáha, tú-ni xeēn cúu, te yachī yáha. Te sáha jeē nihín yō ñn tahū jeē cujéhu yó ní cáni jeē cáa ndasí gá vēsú jnūndóho ún.

18 Te tu táñúhún yó nuū tāca jnūndóho jíto yó núu vijna, chi sa suhva táñúhún yó nuū tāca jéē váha jeē tu jíto yó núu vijna. Chi tāca jéē jíto yó núu vijna, chi yachī ndíhi, te tāca jéē tu jíto yó núu, chi coo ní cáni.

## 5

1 Chi yiqui cúñu yō jeē ndeé yó ñáyívi yáha, cúu nájñuhun ñn vehe jeē náā. Te cájini yō jeē núu na náā, te cuāha Yaā Dios ñn yiqui cúñu jeé, te suu cúu nájñuhun ñn vehe jeē coo ní cáni ichi ándívi. Te nasūú ñn vehe jeē sáha ñayuu cúu, chi jeē sáha Yaā Dios cúu.

2 Te níni jéē ndeé yó vehe yáha jeē cúu yiqui cúñu yō, te cájitū ni yō sáha, chi yōhyo cúní yō jeē núcūhun yó yiqui cúñu jeé yó nde andívi.

3 Chi jeē núcūhun yó un, te ma cóo máa na anuá yō jeē náā yiqui cúñu yō yáha.

4 Chi níni jéē iyó gá yō ini vehe yiqui cúñu yō yáha, te jítú ni yō te cúcuíhyá ni yō. Te nasūu jéē cuní yō jeē stóo yó yiqui cúñu yō te coo máa-ni ánuá yō. Chi sa suhva cúní yō núcūhun yó jéē jeé, návāha ndahvā yiqui cúñu yō jeē náā, te coo máa jéē cótecu ní cáni.

5 Te Yaā Dios cúu jeē ni sáha ya jeē súcuan coo yó. Te ni jēhe ya Espíritu yā jeē cóndee ini anuá yō, te sáha Espíritu jeē iyó ndāā ni yō jeē cuāha Yaā Dios tahū yō.

6 Núu súcuan te níni cúu jeē cácuáhnu ni rī. Chi cájini rī jeē níni ndeé gá rī chíji yiqui cúñu yáha, te jíca cúu rī jíin núu ndeé máa Jítoho yō.

7 Chi vijna chi cácuáhnu rī jeē iyó yá jíin rī, vēsú ná tu coto rī nuū yā.

8 Te cácuáhnu ni rī, chi sáha ri cuenta jeē váha ga núu na quénda rī chíji yiqui cúñu yáha te quihín rī condee rī jíin máa Jítoho yō.

9 Jeē yúcuan cúu jeē cánducú ndéyí rí sáha ri jeē cusí ni yā jíin rí, vēsú núu ndeé gá rī yiqui cúñu rī chí vēsú núu condee rī jíin yá.

10 Chi cánuú jéē ndíhi yó cuiñi yuhu mesa Cristo jeē sándaā yā jniñu yó. Te ná ñn ná ñn yó níhín yō síquī ndese ni casáha yó, á jéē váha chí jéē neé, ná ni condee yó chíji yiqui cúñu yō.

*Siqui jeē ndávicoo yó núu jnūhun manī Yaā Dios jíin yó*

11 Núu súcuan te cándiso íyo rī nuū maá Jítoho yō, te jeē yúcuan ndúcú ndéyí rí scandíje rī ñayuu. Te jíni Yaā Dios jeē cáhíyo ndaā rī, te ñūhun ni rī jeē suni súcuan cájini maá ró.

12 Te nasūu jéē cánducú tucu rī cahān rī jeē váha ga tēe cácuu rī, chi sa suhva cástūhun rí jeē cuu cusí ni rō jeē síquí rī jíin rī. Te súcuan te cuu stío cuíñi rō nuū ñayuu jeē cutéyí i síquī ndese cáa ñayuu, te tu sáha i cuenta ndese cáa ini anuá ñayuu.

13 Te va sanaa te cájeni ni rō jeē tēe loco cácuu rī jeē cácahān rī súcuan. Te síquí jeē cándíhvī ni rī jehē Yaā Dios cúu. Te tuú chi cáhíyo vāha xinī rī, te jeē yúcuan cájejniñu rī jeē quéndō vāha ró.

14 Chi síquí jeē ní cundáhú ni Cristo ruhū jíin rī cúu jeē cánuú nacani rī jnūhun ya. Chi cájini vāha rī jeē ni jíhī mañúhún-ni ya jeē síquí ndíhi yó, te jeē yúcuan nájñuhun ni jíhī ndíhi yó jíin yá.

15 Chi ni jíhī yā jeē síquí ndíhi yó návāha tāca yó jéē técu, ma cótecu ga yō jeē sáha yó jéē cuní maá yó, chi sa suhva jeē cuní maá yá jeē ni jíhī yā te ni natecu yā jeē síquí yō.

16 Jeē yúcuan tuá casáha ri cuenta ndese-ni cándāa ñayuu, nájñuhun casáha ñayuu ñayívi. Te vēsú súcuan ni casáha ri cuenta síquí Cristo nde saá, jeē ñn tēe-ni cúu ya, te vijna chi cájini rī jeē cúu ya Sēhe Yaā Dios.

17 Chi núu ñn ñayuu yíhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndíhi.

18 Te Yaā Dios cúu jeē sāha ndihi jeē yáha, chi jíin Cristo ni sāha ya jeē ní ndivicoo yó núu jnúhun manī yā jíin yó. Te ni tejníñu ya ruhū jeē cánacani ri jnúhun jeē ndivicoo ñayuu nuū jnúhun manī yā jíin i.

19 Chi jíin Cristo te ni sāha Yaā Dios jeē ñáyuu ñayiví ndivicoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejníñu ya ruhū jeē cánacani ri jnúhun yáha ndese ndivicoo i nuū jnúhun manī yā jíin i.

20 Núu súcuan te cácuu ri tēe cájica jniñu máa Cristo. Te jeē cahán rī, te nájnūhun jeē maá Yaā Dios cahán ndahú yá jíin ró. Núu súcuan te cácahān ndahú rī jíin ró jeē cahán Cristo, jeē na ndivicoo ró núu jnúhun manī Yaā Dios jíin ró.

21 Te Cristo, vēsú tú ni ñn cuēchi ya, te ni sāha Yaā Dios jeē ní nucondee cuēchi yó siquī yā. Te súcuan te yóhó jéē yíhi ndaha Cristo, ni nucondee siquī yó jeē iyó ndāā yó nájnūhun iyó ndāā Yaā Dios.

## 6

1 Núu súcuan te siquī jeē cácuu ri tēe casájniñu jíin yá, te cácahān ndahú rī jíin ró jeē ma stóo uun ró jnúhun jeē ni sāha Yaā Dios jeē váha róhó.

2 Chi áchí yá nuū tútu iī:  
Máa tiempo cuní maá rī te cuní sōho rī jnúhun cáhān ndahú ró jíin rī.  
Te máa tiempo jnáma ri ñayuu, te jnama ri rohó.

Achí yá. Te vijna-ni cúu máa tiempo jeē cuní yā, chí vijna-ni cúu tiempo ni quiiji Yaā jnáma yóhó.

3 Te cánducú rī jeē ma sāha ri ni ñn jniñu jeē casi jeē candíje ñayuu, návāha ma cahán i siquī jniñu ndiso rī.

4 Chi sa suhva cánducú rī jeē ndihi jeē sāha ri, steén jeē cácuu ri tēe cájegniñu nuū Yaā Dios. Jeē yúcuan cájendeyí ni rī jíin jéē ndóho ri jnúndóho, jíin jéē cúmanī nuū rī, jíin jéē yí sāha jíin rī.

5 Chi ni iyo tijni jínu jeē ní cacani i ruhū, jeē ní cachune i ruhū vecāa, jeē ní candonda i siquī rī, jeē ní casájniñu

nīhin ri, jeē ní cajehni rī māhna máa rī, jeē ní cahīyo ndite ni rī.

6 Te suni cánducú rī jeē cuajnúhún i ruhū siquī jeē ndoo cájica ri, te cájecūhun vāha ni rī jnúhun ndaā, te cáhīyo paciencia ni rī, te vāha ni rī, te ndéé Espíritu Santo ini rī, te cákundáhú ndije ni rī jnáhan ri.

7 Te cánacani ndaā rī jnúhun, te poder Yaā Dios íne jíin rī. Te jíin jnúhun ndaā cándahva rī tēcá jniñu néé, chí nájnūhun jeē cájegniñan ri siquī. Chi nájnūhun jeē ndónnda un siquī rī te ndónnda ri siquī.

8 Iyó jínu yíñúhún ñáyuu jíin rī, te iyó jínu tuú. Iyó jínu jéjnúhún i ruhū, te iyó jínu cácahān i siquī rī. Iyó jínu cácahān i jeē tēe stáhú cácuu ri, te iyó jínu cácahān i jeē tēe ndaā cácuu ri.

9 Iyó jínu casáha i nájnūhun jeē tu jíin i ruhū jijnáhan ri, te iyó jínu jeē jiní vāha i ruhū. Iyó jínu jeē cuní ñayuu cahni i ruhū, te cátecu nahín rī. Te vēsú cástóho i ruhū, te tu cájihī rī sāha.

10 Te vēsú iyó jéē cácuuñhā ni rī, te níní cácusī ni rī. Te vēsú tēe ndáhú cácuu ri, te sácúca rī cuehē ñayuu jíin jnúhun ya. Te vēsú tú na vé cánevāha ri, te jíin máa yá te ndihi-ni cúu jeē cánevāha ri.

11 Hermano ñuu Corinto, súcuan cúu jeē cácahān cají rī jíin ró jijnáhan ró, chí siquī jeē maní rī jíin ró, jeē yúcuan cáchí ndihi ri ndese cándoho rī.

12 Máa rī jijnáhan ri cácahān cají rī siquī jeē maní ndasí rī jíin ró, te máa ró jijnáhan ró sanaa te tu súcuan cúu.

13 Nájnūhun cáhān tatá jíin séhe, súcuan cáhān ndahú rī jíin ró jeē nájnūhun iyó mánī rī jíin ró, súcuan na cóo manī tucu ró jíin rī.

### *Siquī jeē cúu yó templo Yaā Dios*

14 Ma quívi nduu rō jíin jniñu néé casáha ñayuu tu cácandíje, chí ma cúu coo inuú ró jíin i. ¿Chi ndese cuu qui-jnáhan jniñu casáha ñayuu ndaā jíin jniñu casáha ñayuu tú ndaā? ¿Te ndese cuu coyūcú inuú ñáyuu cájica jíin luz yā jíin ñáyuu cájica nájnūhun nuū néé?

15 ¿Ndese cuu coo inuú ni Cristo jíin Satanás? ¿Te ndese cuu cuiñi cáhnu ñayuu cácandíje jíin ñáyuu tu cácandíje?

16 ¿Te ndese cuu quijnáhan templo Yaā Dios jíin ídolo? Chí máá ró cácuu templo Yaā Dios, Yaā técu, chi ndéé yá ini anuá rō, nájnūhun ni cahān yā: Condee rī ini i te caca cuu ri mēhñú i, te cuu ri Yaā Dios maá i, te cuu i ñayuu maá rí.

17 Te jeē yúcuan ní cahān gā yā:

Ma quiví nduu rō jíin jniñu néé cásáha i,

te cusñn ró jijnáhan ró, áchí Jítóho yō.

Te ma jnñí ró tāca jéé tú ndaā.

Yūcuán na te naquihin ri rohó,

18 te cuu ri Tatá rō jijnáhan ró, te cuu ró séhe yí rí jíin séhe síhí rí, áchí Jítóho yō, Yaā jnñí ndihí poder. Achí tutu.

## 7

1 Núu súcuan, ñánī mánī, cánevāha yó tāca jnúhun yáha jéé ni jéjnūhun ya. Jeē yúcuan na sándoo yó máá yó tāca jéé sajnéhén yiquí cúñu yō jíin ánuá yō. Te na cónso íyo yó núu Yaā Dios, te coo ndoo coo ií yō nuū yā jíin ndihí jniñu cúní yā.

*Jeē ní canacani ni ñayuu Corinto siquí cuéchi i*

2 Coó manī rō jíin rí jijnáhan ró víí. Chí tu ní sáha ri falta nuū ní ñn ró, te tu ní stíví rí anuá ni ñn ró, te ni ñn ró tu ní stáhú rí.

3 Te nasūu jéé nducú rí cahān rī nuū rō cúu jeē cahān rī súcuan, chí je ni cahān rī jeē yóhoyo manī rī jíin ró. Te níiní ñúhun ni rī rohó, vésú cuu yō chí cotecu yō.

4 Te cúcáhnū ndasí ni rī rohó jíjnáhan ró, te cúsiñ teyí ni rī jeē siquí rō. Te vésú cájito rí tāca jnúndóho yáha, te íyó ndeyí ni rī te cúsiñ ndasí ni rī jeē siquí rō.

5 Ná ni jengoo rí Macedonia te tu ní íyo nayúú ni anuá rī, chí sa suhva yí ní íyo jnúndóho jíin rí tāca lado. Chí ni íyo jeē ní castáhān jnáhan jíin rí, te ni cayūhu rí sanaa te caca yátá ñayuu cácandíje.

6 Te Yaā Dios jeē sáha jeē ndúndeyí ni ñayuu cácuquíhyá ni, ni sáha ya jeē ní candundeyí ni rī, chí ni quiji Tito ni sáha ya.

7 Te ni candusiñ ni rī, nasūu máá ñn-ni siquí jeē ní quiji de, chí suni jeē ní ndundeyí ni de ni casáha ró. Chí ni castūhún de jeē cáñuhun ni rō coto tucu ró rúhū, jíin jéé cácuquíhyá ni rō jeē siquí cuéchi ró, jíin jéé canacani ni rō jehē rī. Te jeē yúcuan ní cusñn gā ni rī.

8 Te carta jeē ní tají rí nuū rō, vésú ni sáha jeē ní cacucuquíhyá ni rō, te tuá nácani cuquíhyá ni rī jeē ni sáha súcuan. Chí vésú ni cacucuquíhyá ni rī saá, te vijna te tuá, chí jíin rī jeē jecu-ni quiví ni cacucuquíhyá ni rō ni sáha.

9 Te vijna te cúsiñ ni rī, te nasūu siquí maá jéé ní cacucuquíhyá ni rō. Chí cúsiñ ni rī jeē ní jejniñu jeē ní cacucuquíhyá ni rō, chí ni sáha jeē ní canacani ni rō siquí cuéchi ró. Chí ni cacucuquíhyá ni rō nájnūhun cúní maá Yaā Dios, te nasūu jéé ni sáhuhū rī rohó.

10 Chí núu cúcuquíhyá ni yō nájnūhun cúní Yaā Dios, te suu sáha jeē nácani ni yō siquí cuéchi yó te jnama ya yohó, te ma cóo ga jeē nácani cuquíhyá ni yō. Te jeē cácuquíhyá ni ñayuu tu cácandíje, tu jéjniñu jeē nácani ni i, chí sa jnahnū ndetū i.

11 Te ni cacucuquíhyá ni rō nájnūhun cúní Yaā Dios, te vijna te cájito ró náa vāha ni jejniñu. Chí ni canacani ndasí ni rō ni sáha, te ni canducú ró jeē quéndoo ndaā rō, te ni cacuxeēn rō nuū téé ni sáha cuéchi, te ni cayūhu ró jeē ní castíví ró núu yā. Yūcuán na te yóhoyo ni cacuni rō coto tucu ró núu rī, te yóhoyo ni candihví ni rō ni cacuxeēn rō nuū téé ni sáha cuéchi ún. Te súcuan ni castéén rō jeē tú cuéchi ró, chí tu ní cájejnúhún ró cuéchi ni sáha téé ún.

12 Te jeē ní tee ri carta un, nasūu máá-ni jeē cúxeēn rī nuū téé ni sáha cuéchi ún, ni nasūu máá-ni jeē cahān rī jehē téé ni ndoho ni sáha de. Chí sa suhva ni tee ri návāha nucūhun ni rō ndese yóhoyo ni canacani ni rō jehē rí jito jíinúu Yaā Dios.

13 Jeē yúcuan ní candusiñ ni rī jeē siquí rō.

Te víhyá gā ni cacusiñ ni rī jeē ní jini rī jeē cúsiñ ni Tito, chí ni nduu nayúú ini de ni casáha ró.



14 Chi je ni cahān rī jīn de jeē cūsī ni rī jeē vāha ñayuu cácuu ró, te vijna te tu ní quéndō rī jnūhun canu jeē siquī rō. Chi nájnūhun ni cajini rō jeē iyó ndāā tāca jnūhun ni cacahān rī jīn ró, suni súcuan ni cundaā jnūhun ni cacahān rī jīn Tito jeē cūsī ni rī siquī rō jeē vāha cásquīcu ró.

15 Te víhyá gā manī de jīn ró vijna jeē ñūhun ni de jeē vāha ni cajetáhú ró jeē cahán de, te ni cahīyo yíñúhún ró ni candiso īyo ró núū de.

16 Núu súcuan te cūsī ni rī siquī jeē cucáhnu ndasí ni rī rohó jijnáhan ró.

### *Jeē na cūsī ni i socō i cuehē*

## 8

1 Hermano, vijna te suni cácuu rī castūhun rī nuū rō jijnáhan ró ndese cuehē jeē vāha ni sáha Yaā Dios jīn ñayuu cácuu ndasí yácuu Macedonia.

2 Chi vēsú yōhyo ni jito ndee jnūndóho i, te suni yōhyo ni cacusī ni i jīn jnūhun ya. Te vēsú ñayuu ndahú ndasí cácuu i, te yōhyo vāha ni cajequin i cuehē xūhun jéé cúu ñayuu ndahú cácuu ndasí.

3 Chi cúu rī testigo jeē ní cacusī ni maá i ni cajēhe i ndésaa ni canda i, te nde vihyá gā ni cajēhe i.

4 Chi ni cacahān ndahú ndasí i jīn rī jeē na cuāha rī jnūhun chindéé ñáhán i jīn yó cuāha i xūhún cuu hermano cándoho ndahú.

5 Te víhyá gā ni casáha i vēsú jeē ní cajeni ni rī, chi xīhna gā ni casocō i maá i nuū Jítoho yō, te sáa te ni cajēhe i maá i sáha i tāca jéé cácuu rī, ndihī ndese nújnahan ni Yaā Dios.

6 Te jeē súcuan ni casáha ñayuu Macedonia, te ni castūhvī ni rī Tito jeē na jéé tucu de nuū maá ró, sáha de jeē jīnu jniñu jeē ni squéjéé de jīn ró jeē suni caquin rō cuehē xūhún cuu ñayuu ndahú.

7 Chi maá ró yōhyo vāha casáha ró tāca-ni, chi vāha cácuu ndasí ró, vāha cácuu ró jnūhun, vāha cácuu ndasí ni rō, vāha cácuu ndasí ni rō, vāha manī rō jīn rī jijnáhan rī. Núu súcuan te

suni cácuu sáha vāha ró jniñu yáha jéé cuāha ró jéé cúu ñayuu ndahú.

8 Te nasūu jéé cuní rī ndacu rī jniñu nuū rō, chi sa cástūhun rī nuū rō ndese yōhyo cácuu ni sava ga ñayuu jéhe i xūhún, te súcuan te cuni rī jeē suni maá ró cácuu ndasí ndije ni rō ñayuu ndahú.

9 Chi je cájini rō ndese yōhyo vāha ni Jítoho yō Jesucristo jīn yó. Chi siquī jeē ní cundáhú ni yā rohó te ni nasáha ndahú yá maá yá, vēsú cucá ndasí yá nde andiví núú. Te súcuan ni sáha ya jeē cácuu ró ndihī jeē ndiso jnūhun ya, siquī jeē ní nasáha ndahú yá maá yá.

10 Te jeē vāha maá ró cúu jeē na cáchi rī ndese jéni ni rī siquī jniñu yáha. Vāha ni caquejéé ró nde jendujin, chi nasūu maá-ni jeē ní cajequin rō xūhún, chi suni yōhyo ni cacusī ni rō sáha ró.

11 Núu súcuan te vijna te sínu ró. Te nájnūhun ni cacusī ni rō ni caquejéé ró jīn, suni súcuan na cūsī ni rō sínu ró, chi cuāha ró núu ndese cánevāha ró.

12 Chi núu cūsī ni yō cuāha yó, te jétáhú yá núu ndese névāha yó, chi tu jícán yā jeē cuāha yó jéé tu névāha yó.

13 Te nasūu jéé cahán rī jeē cáhni ndahú ró maá ró jeē cáca ga nihīn i vēsú jeē ndóo nuū maá ró.

14 Chi sa suhva jeē ñn cūhva-ni conevehāha ró jīn i. Chi cánevāha cuehē rō vijna, te cuu cuāha ró jéé cúmanī nuū i. Yūcuán na te núu ndé ñn quivī conevehāha i, te suni cuu cuāha i te núu ni cúmanī nuū rō. Te súcuan te ñn cūhva-ni conevehāha ró jijnáhan ró,

15 nájnūhun cáhán tutu ñn siquī ñayuu jeē ní canastútú maná nde jenahán: Tēe jeē ní nastútú cuehē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

### *Jnūhun Tito jīn úu gā jnāhan de*

16 Te na cútahū rī nuū Yaā Dios jeē ni sáha ya jeē ndihví ni Tito jehē rō nájnūhun cándihví ni maá rí.

17 Chi ni jetáhú de jeē ní cacahān rī jīn de jeē jeé de nuū rō. Te siquī jeē

ndihví ni de jehē rō, jeē yúcuan cuájeē de, chi súcuan cúu ni maá de.

<sup>18</sup> Te suni cátají rí ñn hermano cua-jeē jíin Tito nuū rō. Te tāca grupo ñayuu cácadíje cájejnúhún i tēe un jéē váha jéjníñu de siquī jnúhun jeē jnáma ya yohó.

<sup>19</sup> Te tāca grupo ñayuu cácadíje suni ni catee i jniñu siquī de jeē cáca de jíin rí chindéé ñáhán de quindēca de xúhun jíin rí jeē ní cajēhe ñayuu. Te jniñu yáha cásáha ri návāha cahān ñayuu jeē yóhyo vāha Yaā cúu máá Jítóho yō, chi cuni i ndese yóhyo cácusñ ni rō cásocō rō xúhún.

<sup>20</sup> Te quingoo ndindúú rí návāha ni ñn ñayuu ma tēe i cuēchi siquī rí siquī xúhun cásocō ñayuu.

<sup>21</sup> Chi ndúcú rí jeē squícu ndaā rí tācá jniñu, nasūu máá ñn-ni nuū Yaā Dios, chi suni nuū ñáyuu.

<sup>22</sup> Te suni cátají rí ñnga hermano yō cuajeē de jíin ndindúú tēe yáha. Te tijni jínu ni steén de jeē yóhyo cúsiñ ni de ndihví ni de tācá jniñu. Te vijna chi ndihví gā ni de jehē rō, chi cúcáhnú ndasí ni de jeē cásquícu rō.

<sup>23</sup> Te núu cácajnúhún ñayuu siquī Tito, te achi rō jeē cúu de tēe chindéé ñáhán jéjníñu jíin rí nuū rō siquī jnúhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cácadíje, te cáhiyo yíñúhún de nuū Cristo.

<sup>24</sup> Núu súcuan te stéén rō nuū de jeē cáhiyo manī ndije rō jíin de, návāha na cuni tāca grupo ñayuu cácadíje. Te súcuan cuni i jeē tu ní cácusñ cāhá ni rí siquī rō.

*Siquī jeē cájequin i xúhún cuu tācá hermano*

## 9

<sup>1</sup> Te vijna te tuá jíni ñúhún tee ri nuū rō siquī xúhun jeē cájequin rō cuu tācá hermano cándoho ndáhú.

<sup>2</sup> Chi je jíni rí jeē cánujnahan ni rō cuāha rō. Te jeē yúcuan máni cúsiñ ni rí cahán rí jíin ñáyuu Macedonia jeē rohó ñáyuu Acaya, je ni casátúhva rō xúhun ndé jendujin. Te jeē súcuan ni cacusiñ ni maá rō, te jeē yúcuan cuehē

ñayuu Macedonia ni cacondihví ni i ni cajēhe máá i.

<sup>3</sup> Te tájí rí ndinúni hermano yáha cuájeē maá de nuū rō xíhna gā, návāha jeē jinú maá rí te ma quéndōo néé rí siquī jnúhun ni cahān rí jeē squícu vāha rō jíin jniñu ún. Chi coo tūhva ndije rō jíin xúhun nájñuhun ni cahān rí jíin i.

<sup>4</sup> Chi sanaa te jecoo jecu tēe Macedonia jíin rí, te núu cuni de jeē tu cáhiyo tūhva rō, te coo jnúhun canu nuū rí, te suni nuū maá rō jijnáhan rō, chi ni cahān teyí rí jeē cáhiyo tūhva ndije rō.

<sup>5</sup> Jeē yúcuan ní jeni ni rí jeē cánuú cahān rí jíin táca hermano yáha jecoo de xíhna gā, te sáa te jinū rí, návāha stíhví ni de rohó jéé yáchí na cóo tūhva xúhun jéé ní cacahān rō jeē cuāha rō. Te súcuan te coo tūhva siquī jeē váha ni rō, te nasūu jéé safuerza rí rohó.

<sup>6</sup> Cocuhun ni rō jnúhun yáha, jeē núu jecu-ni cuāha rō te suni jecu-ni nanihñ rō: Chi tēe jeē tihlí-ni táji, suni tihlí-ni nastútú. Te tēe jeē táji cuehē, suni cuehē nastútú. Achí tutu.

<sup>7</sup> Tācá ñn ñn rō cuāha rō ndésaa ni tee ni rō. Ma cúxi ni rō cuāha rō, chi nasūu fuerza cúu. Chi Yaā Dios manī yā jíin ñáyuu jeē cúsiñ ni cuāha.

<sup>8</sup> Te máá Yaā Dios cuu sáha ya jeē nducuehē ndinuū jeē váha cuu rō jijnáhan rō, návāha níni coneváha rō ndíhi tācá jeē jíni ñúhún rō, te coo sobra gā jeē cuāha rō jéé cúu tācá jniñu váha.

<sup>9</sup> Chi súcuan cáhán tutu ñi siquī tāca ñáyuu jéhe:

Ni scáa i ni jēhe i nuū ñáyuu ndahú.

Te tācá jniñu váha sáha i, chi quendōo ní cáni.

Achí tutu.

<sup>10</sup> Te Yaā Dios jéhe ya tata nuū tēe táji, te nihñ de staā jeē cáji de. Te suni súcuan cuāha ya ndinuū jeē váha cuu rō, te sáha ya jeē cáyā te nducuehē jniñu váha cásáha rō.

<sup>11</sup> Súcuan cucúca rō jíin táca-ni, návāha cuu cuāha cuehē rō. Te xúhun jéé cuāha rō quíhñ nuū hermano cándoho ndáhú, suu sáha jeē

nácuatáhú i nuū Yaā Dios.

<sup>12</sup> Chi xūhun jéē cuáha ró núū i, nasūu máá ñn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios.

<sup>13</sup> Te cahān i jeē yóhoyo vāha Yaā cúu Yaā Dios, chi xūhun jéē ní cajēhe ró stéén jeē váha cá candíje ró jnúhun Cristo. Te suni sáha jeē cahān i jeē yóhoyo cújēhnu Yaā Dios siquī jeē ní cajēhe cuehē rō nuū i jíin núū sava ga ñayuu.

<sup>14</sup> Te suni cacān tahu i jehē rō, chi coo manī ndasí i jíin ró siquī jeē yóhoyo vāha ni sáha Yaā Dios jíin ró.

<sup>15</sup> Te na cútahū yō nuū Yaā Dios, chi ni jēhe ya Sēhe ya nuū yō, jeē cúu ñn tahu cáhnu ndasí jéē ma cánda cuiti yō castūhún ndihi yó.

*Jeē ndíso jníñu Pablo cúu de apóstol*

## 10

<sup>1</sup> Te ruhū Pablo, cáhán ndahú rí jíin ró jijnáhan ró jíin modo maá Cristo jeē vítá ni yā te vāha ni yā. Ruhū, chi cácahān rō jeē iyó suchí ni rī núu ndéé rí jíin ró, te núu ndéé jíca rí te tu yúhú cuiti rī cahān nihin rí jíin ró, cácahān rō.

<sup>2</sup> Núu súcuan te cáhán ndahú rí jíin ró jeē núu na jéé rī te ma cahān rō jnūhun jeē sáha jeē cuxeēn rī nuū rō. Chi sava ró cácahān jeē casáha rí jniñu ya siquī jeē máni jeē na níhín rī siquī ún. Núu súcuan te iyó túhva rí cuxeēn rī nuū ñayuu cácahān súcuan.

<sup>3</sup> Chi vésú cácuu rí ñayuu cáyūcú ini ñayīví, te tu cájejnáhan rí modo cájejnáhan ñayuu ñayīví. Chi nájnūhun jeē cájejnáhan rí siquī táca jniñu neé.

<sup>4</sup> Chi nasūú ndajníñu ñayīví jéjníñu rí cájejnáhan rí, chi jíin poder Yaā Dios cájejnáhan rí snāā rī táca fuerza jeē cúu contra siquī yā.

<sup>5</sup> Súcuan cásnāā rī táca jnúhun ndúxí jíin jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi rí nuū ndihi jeē tú vāha jeē cájeni ni ñayuu, návāha cuandetū i nuū Cristo.

<sup>6</sup> Te jeē jínu cuandetū vāha máá ró, yūcuán na te coo túhva rí cuāha rí castigo nuū táca gá ñayuu jeē tu cájendetū.

<sup>7</sup> Máá ró jijnáhan ró máni cájeni ni rō modo ñayuu tu cájecūhun ní. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí.

<sup>8</sup> Te núu ni cahān teyí rí jíin ró jeē ndíso jníñu rí, te tu cúcanu rī sáha. Chi máá Jítóho yō ni tejníñu ya ruhū jijnáhan rí, návāha sáha rí jeē ije ánuá rō jíin jnúhun ya, nasūu jéé snāā rī.

<sup>9</sup> Núu súcuan te tu cúni rī jeē cáni ni rō jeē nducú rí siúhú rí rohó jíin carta rī.

<sup>10</sup> Chi cácahān sava ró jéé táca carta rī yóhoyo stíhví ni te níhin ndácu jniñu, te sa suhva núu ndéé rí jíin ró te tu cúndeyí ni rī ndacu níhin rí jniñu, te suni tu cúu cahān vāvíhí rí, achí ró.

<sup>11</sup> Te ñayuu cácahān súcuan na sáha i cuenta jeē nájnūhun níhin cáhán carta rī jeē íne jíca rí, suni súcuan níhin ndacu rí jniñu nuū rō jeē cóndee rí jíin ró.

<sup>12</sup> Te va ma chúndeyí cuiti ni nde rí jeē sajeñnu rí maá rí, nájnūhun casáha sava tēe un jéé cájejnúhún nde de máá de. Táca tée ún chi cáacunéé de jeē cájeni ni de jeē cújēhnu ga de vésú jnáhan de, te tu casáha de cuenta ndese cúni Yaā Dios jeē caca de.

<sup>13</sup> Te ruhū jijnáhan rí, chi cutéyí nde rí maá cúhva-ni jniñu jeē ni jēhe Yaā Dios nuū rī, te ma yáha ga rī. Máá Yaā Dios ni tee cúhva yá ndésaa cúu jeē sáha rí, te máá yá ni jēhe jnūhun jeē ni jíinū rī nuū rohó ñayuu ñuu Corinto.

<sup>14</sup> Jeē yúcuan ná ni jinūcoo rí nuū rō jeē xíhna ñúhún te nasūu jéé ni yáha rí nuū cúhva jniñu ní jēhe ya nuū rī. Chi xíhna gā maá rí ni jinūcoo nuū rō ni canacani rí jnūhun vāha Cristo.

<sup>15</sup> Te tu cácutéyí rí siquī jniñu ní casáha inga tēe, nájnūhun jeē jniñu máá rí cúu. Chi sa suhva cáñuhun ní rí jeē cuehē gā candíje ró, te súcuan te cuu sáha rí cuehē gā jniñu ya mēhñu ró, te níni máá cúhva jeē ni jēhe ya nuū rī.

<sup>16</sup> Yūcuán na te cácu ni rí scuité núu ga rí jnūhun jnáma ya yohó núu táca gá

ñuu yúcu ndé yūcuan gá. Te sūcuan te ma quívi nduu rī cutéyí rí nuū jeē jé ni canacani inga tēe jnūhun.

<sup>17</sup> Te núu ndé tēe cúní de cutéyí de, na cutéyí de síquī jeē sáha máá Jítóho yō, nasūu síquī jeē sáha máá de.

<sup>18</sup> Chi nasūu tēe jeē jejnūhún máá cúu jeē quéndōo yíñuhún, chi sa suhva tēe jeē jejnūhún máá yá.

*Jeē cahán Pablo síquī tēe cánacani jnūhun stáhú*

## 11

<sup>1</sup> Cone cáhnu ni rō jijnáhan ró jeē cahán rī jecu jnūhun modo nájnūhun cácahān ñayuu canéé. Núu sūcuan te cáhnu coo ni rō víi.

<sup>2</sup> Chi cúcuíñí rí jehē rō jijnáhan ró, nájnūhun cúcuíñí Yaā Dios. Chi cácuu ró nájnūhun ñn sūchi síhí íyó ndoo, te ni sáha ri jeē quijnáhan ró jíin Cristo, nájnūhun quijnáhan ñn sūchi síhí jíin máñuhún-ni yñi.

<sup>3</sup> Te yúhú rí sanaa te cuāha ro jnúhun stáhú táca tēe un rōhó, te siáá rō jnūhun jeē chiñuhún ndáá rō Cristo nde jíin ini jíin ánuá rō. Chi suni sūcuan ni sáha Satanás jíin Eva, chi ni quívi ini ñn coō, te ni stahú un ña jíin jnúhun ndíchí stáhú.

<sup>4</sup> Chi núu quíjicoo tēe nuū rō jeē tu cánacani ndaā de jnūhun Jesús nájnūhun ni canacani ri nuū rō, te va yōhyo vāha cájetáhú nde ró de. Te suni sūcuan vāha cájetáhú nde ró núu inga espíritu jíin núu inga jnūhun jeē tu quijnáhan jíin Espíritu jíin jnúhun jeē ní cacandíje ró jéé jnáma ya rohó.

<sup>5</sup> Te táca tēe cácaandíje ró un jéé cácahān jeē apóstol cujéhnu ga cácuu, tú cuíti jeē cujéhnu ga nde de nuū rī.

<sup>6</sup> Chi vēsú tu níhín vāha nde ri modo cahán rī, te jécūhun vāha ni rī. Chi jíin ndíhi jniñu ni casáha ri mēhñu ró ni castéén cají rí nuū rō jeē sūcuan cúu.

<sup>7</sup> Tu ní jícan rī xūhun núu rō síquī jeē ní nacani ri jnūhun jnáma ya yohó. Te sūcuan ni cotecu ndahú rí návāha quéndōo vāha ga maá ró jíin jnúhun ya. ¿Te va cuēchi ni sáha ri jeē ni sáha ri sūcuan, chí naún?

<sup>8</sup> Chi sava ga grupo ñayuu cácaandíje ni quihin ri xūhun jéé ní cajēhe i nuū rī, návāha sūcuan-ni nacani ri jnūhun ya nuū rō jijnáhan ró.

<sup>9</sup> Te ná ni condee rī jíin ró te ni ndíhi xūhun rí, te tu ní jícan cuíti rī nuū ní ñn ró. Chi hermano jeē ní quíjicoo ichi Macedonia ni cajēhe de nuū rī jeē cúmanī. Te jeē sūcuan tu ní stáhān rī rohó, te ni ma sáha cuíti rī.

<sup>10</sup> Te nájnūhun cúcáhnu vāha ni rī jeē jíin rī jnūhun ndaā Cristo, suni sūcuan jíin rī jeē ma quíhin ri xūhún nuū ni ñn ñayuu ní ndáñúu Acaya, návāha ma cási i jeē cúsiñi rī jeē sūcuan-ni nacani ri jnūhun ya.

<sup>11</sup> ¿Te á síquī jeē tú manī rī jíin ró cúu jeē cahán rī sūcuan, jéni ni rō, chí naún? Tuú chi máá Yaā Dios jíin yā jeē manī rī jíin ró jijnáhan ró.

<sup>12</sup> Te sáha ri ná-ni sáha ri, chi ma quíhin ri xūhun ró, návāha casi rī nuū jeē casátéyí tēe un máá de jeē cácahān de jeē inuú casáha de jniñu ya jíin rí.

<sup>13</sup> Te tēe ún chi nasūu apóstol ndaā cácuu de, chi máni máá jnúhun stáhú cácahān de, te casáha de máá de jeē cácuu de apóstol Cristo.

<sup>14</sup> Te tu náa ni yō jító yó jéé casáha de sūcuan, chi je jíin yō jeē suni Satanás násama máá te stáhú jéé sáha máá nájnūhun ñn ndajéhé Yaā Dios jeē jíca jíin luz yā.

<sup>15</sup> Te jeē yúcuan suni tu náa ni yō jító yó jéé tēe cájejniñu nuū Satanás, casáha de máá de jeē tēe ndaā cácuu de. Te ñn quívi te nanihín de síquī jniñu néé casáha de.

*Jnūndóho ni ndoho Pablo síquī jeē cúu de apóstol*

<sup>16</sup> Inga jínu cáhán rī jíin ró jeē ni ñn ró ma cáni ni rō jeē tēe canéé cúu rí. Te núu sūcuan cájeni ni rō, te va cuatáhú nde ró jéé cahán rī nájnūhun tēe canéé, návāha suni cuu cutéyí nde ri jecu nájnūhun casáha tēe ún.

<sup>17</sup> Jeē cahán rī vijna chi nasūu jéé ní ndacu máá Jítóho yō cúu, chi sa nájnūhun tēe canéé cáhán rī jeē cutéyí nde ri.

18 Chi cuehē de cásátéyí de máá de modo jeē iyó ini ñayíví, te suni súcuan na sátéyí nde ri maá rí núu súcuan.

19 Te va tēe cáhiyo cájí xíní cácuu nde ró, te jeē yúcuan cúu vāha ni nde ró cuatáhú ró ñn tēe cánéé núu súcuan.

20 Chi va vāha-ni cájendeyí ni rō nuū tēe un jēe casáfuerza de róhó cuajníñu ró núu de, chí cásáha de jeē ndundáhú ró, chí cáquende de ndajníñu ró, chí cásájéhnú de máá de nuū rō, chí ndé cácatu de nuū rō.

21 Te vēsú cúcanu nde ri cahān rī, te na cáhān rī jeē tu ní cúndeyí ni nde ri satéyí rí maá rí nájñuhun casáha tēe ún.

Te vijna te núu iyó sava tēe chúndeyí ni de sátéyí de máá de, te va suni chundeyí ni nde máá rí núu súcuan. Te va cáhān rī nájñuhun cáhān ñn tēe cánéé.

22 Núu cácutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū.

23 Núu tēe cájejniñu nuū jnúhun Cristo cácuu de, te víhyá gā ruhū. Te va cáhān rī nájñuhun tēe cánéé jēe cutéyí rí súcuan. Chi ni caa ga ni sájniñu ri vēsú maá de jínáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacuni ñayuu cahni i ruhū.

24 Te jnáhan ri hebreo, uhūn jínu ni cacani xeēn de ruhū jíin cuarta ññ, ñn cūhva jeē jé yajni cuu rī sáha.

25 Unī jínu ni cacani de ruhū jíin yujnu xíi, te ñn jínu ni cajēhe de yuū xíní rī. Unī jínu ni quēe barco jeē ní jica ri siquī jnúhun ya. Te ñn jecuáa jíin ñn ndiáca ni yosō candá rí nuū cunú ndute mar.

26 Cuehē jínu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñácuñhná. Ni cācu ri nuū ñáyuu nación rī jíin núu ñáyuu ñuu jícá. Ni cācu ri cháha chúcuan ná ni iyo ri ñuu jíin rancho jíin mar. Ni cācu ri nuū táca jnáhan ri jeē tu iyó ndáa.

27 Ni sájniñu nīhin ri te yí ní ndoho ri. Cuehē jínu ni jehni rī maá rí

māhná. Ni jíi rī sōco, ni jichī rī ndute. Cuehē jínu ni iyo ndite ni rī, ni cuijnu rī, ni cumanī sahma ri

28 Te siquī táca jēe yáha chi iyó gá. Chi ndiquíví ndóho ri jeē nácani ndasí ni rī jehē táca grupo ñayuu cácadíje.

29 Núu ñn ñayuu tu fuerza ini i, te suni ndóho ri jehē i. Te núu ñn ñayuu quíví i cuēchi sáha jnáhan i, te ndóho ri jñuhun cúcanu jíin jnúhun náxeēn ni.

30 Núu súcuan te núu cánuú cutéyí nde ri, te va cutéyí rí siquī táca jēe steén jeē tú na fuerza ini rī.

31 Te Yaā Dios, Yaā cúu Tátá maá Jítóho yō Jesucristo, jíin yā jeē cahān ndaā rī. Te ní cáni na cáhān ñayuu jeē vāha ndasí Yaā cúu ya.

32 Ná ni iyo ri ñuu Damasco, te gobernador jeē ndácu jniñu ndañúu jeē jñí rey Aretas, ni jeni de soldado ni cacondito táca yéhyí jeē ní condúu ndihyú ñuu ún, chí jñí de ruhū quihñ rī vecāa ni cuni de núu.

33 Te ni quíví rí chíji ñn jica, te ñayuu cácadíje ni cascúun i ruhū ventana ñn vehe jeē néne jicā jeē ndihyú ñuu ún. Te súcuan ni cācu ri nuū tēe ún.

*Jeē ní jito ndijin Pablo jeē ni stúu ya nuū de*

## 12

1 Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítóho yō nuū rī te ni steén ndijin yā nuū rī.

2 Jíní rī ñn tēe cándíje Cristo, te je ni cuu uxí cuūn cuiyā jeē ní sáha ya jeē ní caa tēe un ní jehēn de nde andíví úní. Te tu jíní rī núu ni jehēn rī jíin yiquí cúñu rī, chí ní jehēn anuá-ni ri. Máá Yaā Dios cúu jeē jíní.

3 Te jíní rī jeē ní ndonehen ya ruhū. Te á ní jehēn rī jíin yiquí cúñu rī, chí ní ndōo, tu jíní rī, chí máá-ni Yaā Dios cúu jeē jíní.

4 Chi ni sáha ya jeē ní caa ri ni jehēn rī nde jardín andíví. Te yúcuan ní jini sōho ri táca jnúhun sáhi ndasí jēe ma cúu castūhun yóhó ñáyuu.

5 Te siquī jeē ni sáha ya súcuan jíin rí cúu jeē cutéyí rí, te ma cutéyí rí siquī

ndese cúu máá rí. Chi cutéyí rí máni jeē tú na fuerza ini rī.

<sup>6</sup> Te núu cúní rī cutéyí rí siquī maá rí nuú, te nasūu jée canéé rí núu sáha ri súcuan núu, chi ndaā cúu jeē iyó jeē cutéyí rí. Te ni ma sáha ri, chi tu cúní rī jeē cani ni ñayuu jeē kujénu ga rī vésú jeē ní jito i chí jée ní jini i jnūhun ri.

<sup>7</sup> Te tu cúní yā jeē yáha ri cutéyí rí siquī jeē ni stéén ndijin yā jniñu jénu ndasí un núu rī, te jeē yúcuan ni quiji ñn jnūndóho jeē ndiquín ruhū te stóho ruhū. Te ñn jeē ni jéhe ya jnūhun ni tají Satanás cúu, ñn jeē stóho ruhū, návāha ma yáha ri cutéyí rí.

<sup>8</sup> Te unī jínu ni cahān ndahú rí jín máá Jítoho yō jeē na téjiyo ya quihīn.

<sup>9</sup> Te ni cahān yā jín rí: Tuú chi tu cúmanī jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu súcuan te cúsiñ ni rī jeē tú na fuerza ini rī, chi súcuan te nducuehē gā fuerza Cristo ini rī.

<sup>10</sup> Jeē yúcuan cúu jeē cúsiñ ni rī jeē tú na fuerza rī, jín jée cácahān ndevāha ñayuu jín rí, jín jée cúmanī nuū rī, jín jée cájito xeēn i ruhū, jín jée ndóho ri jnūndóho siquī Cristo. Chi jeē tú na fuerza maá rí, yúcuan sáha jeē nihín rī fuerza maá yá.

*Jeē nácani ni Pablo siquī ñayuu cácadíje ñuu Corinto*

<sup>11</sup> Te va tēe cánéé cúu ri jeē ni sátéyí nde ri maá rí. Te siquī jeē tu cácadíje ró rúhū, jeē yúcuan ní satéyí rí maá rí. Chi cánuú jée máá ró cuajnúhún ró ruhū nuú. Chi vésú tú jniñu ri jeē maá rí, te va tu núu cuiñi nde ri nuū tāca tēe un jée cácahān rō jeē apóstol kujénu cácuu de.

<sup>12</sup> Chi mēhñu ró ní sáha ri tācá jniñu jeē steén jeē cúu ndije ri apóstol. Chi jín cuéhē paciencia ni sáha ri tācá jniñu jénu jeē steén poder Yaā Dios, jín tāca jniñu jeē nahán ní canaa ni rō ni cajito ró.

<sup>13</sup> Te tu ní sáha ri jeē núu ga cácuu ró núu tāca gá grupo ñayuu cácadíje, chi máá ñn-ni jeē tu ní stáhān rī rohó jée cuáha ro jée jini ñúhún rí. Cone cáhnu

ni rō núu súcuan ni sáha nde ri falta nuū rō víi.

<sup>14</sup> Te vijna je iyó túhva ri jecondēhe rí rohó vuelta unī. Te suni tú na vé cacán rī nuū rō, chi nasūu ndajniñu ró cúu jeē cuní rī, chi sa suhva jeē quendōo vāha ró jín jnūhun ya. Chi nájnūhun sēhe ri cácuu ró, te sēhe chi tu cánuú caya i jeē cúu tátá i, chi sa tátá cánuú cuāha de jeē quendōo vāha sēhe de.

<sup>15</sup> Jeē yúcuan cúsiñ ni rī stáhi ri jeē névāha ri, te nde stáhi ri fuerza maá rí, návāha sáha ri jeē quendōo vāha ánuá rō jijnáhan ró. Te manī gā coo ri jín ró, vésú sanaa te jecu-ni cáhiyo manī rō jín rí.

<sup>16</sup> Te iyó jecu rō cácahān jeē vésú tú na vé ní jícán rī nuū rō, te tēe stáhú cúu ri, chi ni nducú rí modo ndichí nihín rī xūhun ró, cácahān rō.

<sup>17</sup> ¿A táca tēe ní tají rí nuū rō, á ñn máá de ni stahú de rohó jée nihín de xūhun ró cuu máá rí, chí naún? Tú cuiñi.

<sup>18</sup> Ni cahān ndahú rí jín Tito jeē jecondēhé de rohó, te ni tají rí ñn hermano ni jeē jín de. ¿Te chí ní stahú Tito rohó ní quihín de xūhun núu rō jeē cuu máá de, chí naún? Tuú chi inuú-ni casáha ndindúú rí, te ñn-ni ánuá ndindúú rí.

<sup>19</sup> ¿Sanaa te cájeni ni rō jeē cahán rī jnūhun yáha návāha quendōo vāha ri jín ró, chí naún? Nasūu súcuan cúu, chi Yaā Dios jiní yā jeē cahán rī maá-ni jnūhun jeē cuní Cristo. Te ndíhi jeē cahán rī chi nducú rí jeē ije ró jín jnūhun ya, ñánī mánī.

<sup>20</sup> Chi yúhú rí jeē núu na jée rī, te sanaa te cuni rī jeē tu casáha ró jniñu nújnahan ni rī. Te máá ró jijnáhan ró, suni ma nújnahan ni rō ruhū. Chi sanaa te cátejnáhan ró, cácuuésún ni rō, cáquitī ni rō, cáсандúxí ró, cásjnúhún ró, cácahān rō siquī jnáhan ró, cácutéyí ró, cájica néé ró.

<sup>21</sup> Te yúhú rí jeē núu na jée tucu ri te cuāha Yaā Dios jnūhun canu nuū rī jeē súcuan casáha ró. Te sanaa te cucuíhyá ni rī núu iyó cuéhē rō jeē ní casáha cuēchi ichi yátá, te tu nácani ni

rō stóo ró jniñu jnéhén jniñu jíca jnéni jíin jniñu néé ndasí ní casáha ró.

*Saludo jíin jnúhun cástūhun Pablo jeē sándīhí*

### 13

<sup>1</sup> Yāha cúu vuelta unī jeē jécondēhe rí rohó. Te sándaā yō jniñu nájnūhun cáhán tutu: Jíin jnúhun jeē cahán uū chí únī testigo te cundaā tācá jniñu, áchí.

<sup>2</sup> Te vijna jeē íne jíca rí te cáhán tucu ri nájnūhun ní cahān rī ná ní ine ri jíin ró. Cáhán rī nuū ñáyuu ní casáha cuēchi un jíin núu ndíhi ró, jeē núu na jée tucu ri te ma cóo vítá ní rī jíin ró.

<sup>3</sup> Te yūcuán cuu prueba jeē cánducú ró, suu núu jendaá jeē cahán rī jíin fuerza Cristo. Chi Cristo tu cúmanī fuerza yā jeē sándaā yā jíin ró, chí stéén yā poder yā mēhñu ró.

<sup>4</sup> Te vésú tu ní stéén yā fuerza yā ná ní jihī yā jíca cruz, te vijna chí técu yā jíin poder Yaā Dios. Te nájnūhun ní ndoho máá yá, suni sūcuan cándoho ri vijna jeē tu fuerza rī. Te vésú sūcuan te jíin poder Yaā Dios cátecu rī jíin yá jeē cuajníñu ri nuū rō jeē síquí jnúhun ya.

<sup>5</sup> Coto ndee rō maá ró núu cáhīn nīhin ró jíin jnúhun cácandíje ró yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije ró?

<sup>6</sup> Te ñúhun ní rī jeē suni cácuáhnu ní rō jeē maá rí cácandíje ndije ri.

<sup>7</sup> Te cájicān tahu rī nuū Yaā Dios jeē ma sáha ró ní ñn jniñu néé. Te vésú núu cuajnúhún ró jeē váha ndácu ri jniñu nuū rō, chí vésú núu ma cuajnúhún ró, te tú na vé sáha, chí máni jeē na sáha ró jniñu ndaā cúu jeē cánducú rí.

<sup>8</sup> Chí tu jési ri nuū jníñu ndaā, chí sa suhva scáca rí.

<sup>9</sup> Núu sūcuan te cácusī ní rī núu tú na fuerza maá rí, te núu íyó fuerza maá ró. Te níní cácān tahu rī jeē na íje ga ní rō jijnáhan ró jíin jnúhun ya.

<sup>10</sup> Te téé ri carta yáha nuū rō nde ná tu jeē rī, návāha núu na jée rī te tuá jíni ñúhún cuxeēn rī nuū rō. Chí ní jēhe

Jitoho yō jniñu ndíso ri yāha jéé sáha ri jeē íje ánuá rō jíin jnúhun ya, nasūu jéé snāā rī.

<sup>11</sup> Je ní cahān yō núu sūcuan hermano, te na cóo jeē váha jíin ró jijnáhan ró. Te na cóndihvī ní rō íje ró jíin jnúhun ya, te coo ndeyí ní rō. Te na cóo ínuú ní rō te coyūcu máni rō jíin jnáhan ró. Te Yaā ndíso jnúhun ndeyí sī ní jíin jnúhun cúndáhú ní, coo ya jíin ró jijnáhan ró.

<sup>12</sup> Te jeē cahán rō jíin táca jnáhan ró, te yíñúhún techūhu ró ndaha í.

<sup>13</sup> Sándeyí ní rō jijnáhan ró, áchí hermano cácandíje jeē cáyūcu yáha.

<sup>14</sup> Te ñúhun ní rī jeē Jitoho yō Jesucristo na sáha ga yā jeē váha rohó jijnáhan ró, te Yaā Dios cundáhú ní yā rohó, te Espíritu Santo condee cáhnu ya jíin ró. Sūcuan na cóo. Amén.

## CARTA JEE NI TEE SAN PABLO APOSTOL NUU ÑAYUU GALACIA

<sup>1</sup> Máá rí cúu Pablo apóstol. Te nasūu ñáyuu ni jéni ruhū ni nasūu ñáyuu ni tájí ruhū jeē nácani ri jnūhun, chi sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndíyí.

<sup>2</sup> Te ruhū jíin táca hermano cáyūcu jíin rí yāhá, cátee ri carta yáha cuájeē nuū rohó ñáyuu cácandíje ní región Galacia.

<sup>3</sup> Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sīi ni rō.

<sup>4</sup> Chi Jesús ni socō yā maá yá jeē ni jíhī yā jeē síquī cuéchi yó, návāha jnama ya yohó nuū táca jéē neé íyó ñayívi yáha, chi sūcuan ni nujnahan ni maá Tátá yō Yaā Dios.

<sup>5</sup> Jeē yúcuán na cáhán yō jeē yóhoyo luu cújéhnua ya ní cáni. Sūcuan na cóo. Amén.

*Siquí jeē tuá na inga jnūhun cācu ñayuu*

<sup>6</sup> Te náhán náā ni rí jíto ri jeē yóhoyo yachí cánducú ró stóo ró Yaā Dios, Yaā ní cana róhó jéē quívi ró ndaha ya síquí jeē cundáhú ni Cristo yohó. Chi ni candiquín rō inga jnūhun jeē sín cáhán.

<sup>7</sup> Te tú cuítí na inga jnūhun jnama yóhó íyó. Te cáhīyo jecu ñayuu castáhán i róhó, te cácuni i nasama i jnūhun ndese jnáma Cristo yohó.

<sup>8</sup> Te núu ñn ñayuu nacani inga jnūhun nuū rō ndese jnáma ya rohó, te núu tu quíjnahán jíin jnūhun ni canacani ri nuū rō xīhna gā, na jnáhnú ndetū ñayuu ún. Te vésú maá rí chí ñn ndajéhé jeē quíji nde andívi nacani inga jnūhun núú, na jnáhnú ndetū.

<sup>9</sup> Je ni cahán rí jíin ró, te suni sūcuan cáhán tucu ri vijna: Na-ni tēe nacani inga jnūhun nuū rō, te núu tu

quíjnahán jíin jnūhun jeē ní cajetáhú ró, na jnáhnú ndetū tēe ún.

<sup>10</sup> Te jeē cahán rí sūcuan, ¿á ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsi ni ñayuu jíin rí, cájeni ni rō? Núu ndúcú gá rí jeē cúsi ni ñayuu jíin rí, te nasūu mozo Cristo cúu ri núu sūcuan.

*Ndese ni jinū Pablo cúu de apóstol*

<sup>11</sup> Te cástūhun rí nuū rō, hermano jíjnahán ró, jéē jnūhun jnáma ya yohó jéē nácani ri, nasūu jéē ní jeni ni maá rí jíin ñáyuu cúu.

<sup>12</sup> Chi nasūu ñáyuu ni stéén nuū rí, ni nasūu ñáyuu ni sáha jeē ní cutūhva ri, chi sa suhva máá Jesucristo ni steén nuū rí.

<sup>13</sup> Chi je ni cajini jnūhun ró ndese ni sáha ri nde saá, ná ni chíñúhún rí sahán jnáhan ri ñayuu hebreo. Te cájini rō jeē yóhoyo ni jito xeén rí ñayuu cácandíje nuū Yaā Dios, te ni condíhvī ni rí snáā rí i núú.

<sup>14</sup> Te vāha ga ni cutūhva ri sahán ún vésú cuehē gā tēe nación rí jeē ní cajehnu jíin rí, chi ni condíhvī gā ni rí síquí táca jéē ní cajequin jíi rí.

<sup>15</sup> Te vésú sūcuan te Yaā Dios je ni nacāji ya ruhū nde ná tu cacu ri, te ñn quívi te ni cúsi ni yā ni cana ya ruhū jeē quívi ri ndaha ya, síquí jeē yóhoyo ni cundáhú ni yā ruhū.

<sup>16</sup> Te ni steén yā Sēhe ya nuū rí, návāha nacani ri jnūhun ndese jnáma ya ñayuu táca nación jeē tu jíin jnūhun ya. Yūcuán na te tu ní cájnūhun rí ni ñn ñayuu,

<sup>17</sup> ni tu ní jéhén rí ñnuu Jerusalén nuū tēe cácuu apóstol xīhna gā vésú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñnuu Damasco.

<sup>18</sup> Yūcuán na te nde ni yāha unī cuiyā, te ni jehēn rí Jerusalén. Te ni jíin jnáhan rí jíin Pedro, te ni condee rí jíin de xahūn-ni quívi.

<sup>19</sup> Te tu ní jíto ri nuū táca gá apóstol, chí máá ñn-ni nuū Jacobo ñani maá Jítóho yō.

<sup>20</sup> Jnūhun yáha jéē tēe ri cuajeē nuū rō, chí jíin Yaā Dios jeē ndaā cúu.



21 Yūcuán na te ni jehēn rī ní región Siria jíin Cilicia.

22 Te ñayuu cá candíje jeē yíhi ndaha Cristo, jeē cáyūcú región Judea, ná tu coto cuiṭi i nuū rī saá.

23 Chi máni jnūhun-ni ni cajini i cácahān ñayuu: Tēe ni jito xeēn yohó ndé saá, vijna chi nácani de jnūhun cándíje yó jéē ní nducú de snāā de nde saá, áchí i.

24 Te ni cacahān i jeē yóhyo cújéhu Yaā Dios jeē súcuan ni sáha ya jíin rī.

*Jeē ní cajetáhú táca gá apóstol un Pablo*

## 2

1 Yūcuán na te nde nuū uxí cuñ cuiyā, te ni jehēn tucu ri Jerusalén jíin Bernabé, te suni ni jeca ri Tito ni jehēn de jíin rī.

2 Te ni jehēn rī chi máá Yaā Dios ni steén yā jeē jíni ñúhún quíhīn rī. Te ni candutútú sīn nene tēe cácujeḥnu nuū ñayuu cá candíje ún. Te ni castūhun rí nuū de siquī jnūhun jnáma ya yohó jéē nácani ri nuū ñayuu táca nación tu jíni jnūhun ya. Te súcuan ni sáha ri návāha cuajnúhún de jniñu ri, te ma quéndōo cāhá jniñu sáha ri jíin jéē ni sáha ri.

3 Te ni tu ní cásáha fuerza de Tito, tēe ni jica jíin rī, jeē cóndee jnunī circuncidar de, vēsú nasūu tēe hebreo cúu de.

4 Te súcuan ni cundaā, vēsú ni quívicoo jecu tēe stáhú jéē sáha de jeē hermano cácuu de. Te tēe un ní quívicoo de návāha yuhu-ni coto de ndese ni ndulibre yō nuū ley circuncidar siquī jeē yíhi yó ndaha Cristo Jesús. Chi cácuu de jeē squícu tucu yó ley un, nduu tucu yó mozo nuū ley un.

5 Te tu ní cájetáhú cuiṭi rī nuū tēe ún, chi cúni rī jeē quéndōo níhin ró jíin náhan ró jíin jnūhun jnáma ya yohó.

6 Te máá tēe cácujeḥnu nuū ñayuu cá candíje ún, tuá na inga jniñu jéē ní cándacu de nuū rī. Te máá rí chi tu ní chíhi ri cuenta siquī jeē cácujeḥnu de, chi suni Yaā Dios tu sáha ya cuenta, chi inuú-ni cúu ndivii tēe nuū yā.

7 Chi sa suhva ni cajini de jeē jnūhun jnáma ya yohó, ndíso jniñu ri nacani ri nuū ñayuu táca nación jeē tu cásáha circuncidar, nájnūhun nácani Pedro jnūhun un nuū ñayuu hebreo jeē casáha circuncidar.

8 Chi Yaā Dios jeē ní tají Pedro jeē nácani de jnūhun nuū ñayuu hebreo, suni máá yá ni tají rúhū jeē nácani ri jnūhun nuū ñayuu táca nación tu jíni jnūhun ya.

9 Jeē yúcuan, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cácahān ñayuu cá candíje jeē máá de cácujeḥnu ga. Te ni cajni de ndaha ri jíin ndaha Bernabé, jeē ní castéén de jeē cáhīyo manī de jíin rī, jíin jéē ní cacundaā ni de jeē máá rí quingōo nacani jnūhun nuū ñayuu táca gá nación, te máá de jíin náhan de nuū ñayuu hebreo.

10 Te máá ñn-ni jeē ní cajicān de cúu jeē cónahán rí chindéé ñáhán rí ñayuu cándoho ndáhú, te jniñu ún je ni condihvī ni rī ni sáha ri.

*Jeē ni cáhān Pablo nuū Pedro*

11 Te ná ni quiji Pedro ñuu Antioquía, te ni cahān cají rí nuū de, chi ni stívī de jniñu.

12 Chi nde ná tu quecoo sava jnáhan de hebreo jeē ní tají Jacobo, te yéji de staā jíin ñayuu jeē násūu hebreo cácuu. Yūcuán na te nuū ní quecoo tēe ún, te ni cusín de jeē tuá yéji de jíin i, chi yúhú de jeē cúni táca tēe un jéē tuá squícu de ley jnáhan de hebreo. Chi áchí ley jeē ma cúu caji de staā jíin ñayuu jeē tu cásáha circuncidar.

13 Te sava ga tēe hebreo jeē cá candíje, suni ni cacujiyo de nuū i, nájnūhun ni sáha Pedro, chi cáyūhú de jeē cúni tēe ún. Te nde máá Bernabé ni cascáhán de ni cujiyo.

14 Yūcuán na te ni jini rī jeē ní canayūhú de caji de staā jíin ñayuu ún, cúu jeē tuá jíca de jíin modo jeē cahán jnūhun jnáma ya yohó. Te ni cahān rī nuū Pedro, jíto jíinúu táca de: Róhó jéē cúu tēe nación yō hebreo, tuá squícu ró ley jnáhan yó hebreo, chi yéji rō

jiín ñáyuu ún. ¿Te najehē safuerza rō i jeē squícu i ley jnáhan yo hebreo núu súcuan? ni achí rī.

*Ĥn-ni modo jnáma ya ñáyuu hebreo jiín táca gá nación*

<sup>15</sup> Te yóhó chi cúu yó ñáyuu hebreo, te cácahān yō jeē násūu ñáyuu táca gá nación casáha cuēchi cácuu yó.

<sup>16</sup> Te vēsú súcuan te jíní yō jeē ní ĥn yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahán, chi máá jēē candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návāha ndahva yā cuēchi yó síquī jeē candíje yó, nasūu jíin jēē nducú yó squícu yó ley un. Chi áchí tutu ĩi: Ni ĥn ñáyuu ma quéndōo ndaā i nuū Yaā Dios jíin jēē nducú i squícu i jniñu jeē ndácu ley, achí.

<sup>17</sup> Te máá yó ñáyuu hebreo, núu cúní yō jeē ndahva Yaā Dios cuēchi yó síquī jeē ni jíhī Cristo jehē yō, suu cúu jeē jécūhun ni yō jeē suni ñáyuu casáha cuēchi cúu yó, nájnūhun táca gá ñáyuu. Núu súcuan ¿te á cuēchi ni sáha yó jeē ni stóo yó ley jenahán ná ni candíje yó Cristo? Tú cuiti jeē súcuan.

<sup>18</sup> Chi sa núu naquihin tucu yó ley jeē ni stóo yó un, te súcuan téē yó cuēchi síquī maá yó.

<sup>19</sup> Chi ruhū, nájnūhun ni jíhī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha ri jeē cuní Yaā Dios.

<sup>20</sup> Chi nájnūhun je ni jíhī rī jicā cruz jíin Cristo, te vijna chi tuá técu rī jeē maá rí, chi máá Cristo cúu jeē técu ĩni rī. Te jeē técu rī ĩni ñayīvi yáha vijna cúu jeē candíje ri jeē Sēhe Yaā Dios chindéē ñáhán yá ruhū. Chi ni cundáhú ni yā ruhū te ni socō yā maá yá jehē rī.

<sup>21</sup> Núu súcuan te tu cúní rī casí rī nuū jnúhun jeē ndáhva Yaā Dios cuēchi yó síquī jeē yóhyo vāha ni yā jíin yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjníñu jeē ni jíhī Cristo nuú.

*Jnúhun ley jíin jnúhun cándíje*

### 3

<sup>1</sup> Róhó hermano ñuu Galacia, ¿naun tu cájecūhun ni rō? ¿Ndé téē ni saca núu xinī rō jeē tuá cájetáhú ró jnúhun ndaā? Chi ná ni canacani ri jnúhun ya nuū rō, te cájí ndasí ni cajecūhun ni rō jeē ni jíhī Jesucristo jicā cruz jehē rō.

<sup>2</sup> Ĥn-ni jnúhun yáha cájnūhun rí rohó: ¿Ndese ni canihīn rō Espíritu Santo? ¿A jēē ní cacundeyí ró squícu ró jniñu ndácu ley Moisés? Tú cuiti, chi jeē ní cacandíje ró jnúhun jnáma ya rohó jēē ní cajini sōho ró.

<sup>3</sup> ¿Ndese cúu jeē tu cájecūhun cuiti ni rō? Chi xīhna gā ni cacandíje ró jēē ni jíhī Cristo jeē jnama ya rohó, te ni canihīn rō Espíritu. Te vijna ¿á cájeni ni rō jeē stóo ró jnúhun ún te fuerza maá ró squícu ró ley un, te cācu ró naún?

<sup>4</sup> Núu súcuan te tu ndé ní jéjníñu cuiti jeē ní castóho ñáyuu rohó síquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē váha te núu jeē tu ní castóo ró, chi sa cácañdíje ndije ró yá.

<sup>5</sup> ¿Te na síquī cúu jeē jéhe Yaā Dios Espíritu yā nuū rō te sáha ya jniñu jéhnū mēhñu ró? Tu sáha ya síquī jeē cánducú ró squícu ró ley un, chi síquī jeē ní cacandíje ró jnúhun jnáma ya rohó jēē ní cajini sōho ró.

<sup>6</sup> Abraham ni candíje de jeē sáha Yaā Dios jeē ni jéjnūhun ya, te jeē yúcuan ní ndahva yā cuēchi de.

<sup>7</sup> Núu súcuan te na jécūhun ni rō jijnáhan ró jēē ñáyuu cácañdíje jeē sáha Yaā Dios jehē i, ndávi i yucūn Abraham síquī jeē súcuan cácañdíje i.

<sup>8</sup> Chi nde jenahán je cáhán tutu ĩi jeē ñáyuu táca nación tu jíin jnúhun Yaā Dios, ndahva yā cuēchi i núu candíje i ún. Te nde ná tu cuu táca jēē yáha te je ni jéjnūhun ya jnúhun vāha yáha nuū Abraham: Jeē rohó cúu jeē quéndōo ndetū ñáyuu táca nación.

<sup>9</sup> Núu súcuan te ñáyuu cácañdíje, quéndōo ndetū i jíin Abraham, téē ni candíje jeē ni jéjnūhun ya.

<sup>10</sup> Te sa jnahnū ndetū ñáyuu jeē cánducú i quéndōo ndaā i jeē jíin ley Moisés. Chi súcuan yósó núu tútu ĩi:

Jnahnū ndetū tāca ñáyuu jeē tu squícu ndihí cuiṭi jnūhun yósó núū tútu ley, achí.

<sup>11</sup> Núu súcuan te cáji cúu jeē ni ññ ñáyuu ma quéndōo ndaā i nuū Yaā Dios siquī jeē nducú i squícu i ley un. Chi cáhán tutu: Ñáyuu jeē ní ndahva yā cuēchi i, técu i jeē candíje i jeē sáha ya jehē i, achí.

<sup>12</sup> Te ley Moisés tu cáhán jeē cótecu yō ní cáni siquī jeē candíje yó, chi sa suhva cáhán: Núu ndé ñáyuu squícu jniñu yáha, te cotecu i sáha, achí.

<sup>13</sup> Te Cristo ni jnama ya yohó núū jnúhun cáhán ley jeē jnahnú ndetū yō siquī cuēchi yó, chi máá yá ni ndoho siquī jnúhun jeē jnahnú ndetū yō. Chi yósó núū tutu iī: Tāca ñáyuu condita caa jicā yújnu, jnahnū ndetū i, achí.

<sup>14</sup> Te Cristo Jesús ni jihí yā jicā yújnu cruz návāha quendōo ndetū ñáyuu tācá nación sáha ya. Chi jnūhun jeē ni jéjnūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihīn yō Espíritu jeē ni jéjnūhun ya quiiji.

### *Siquī ley jín siquī contrato jeē ni jéjnūhun ya*

<sup>15</sup> Hermano, na cáhán rī ññ jnūhun ndese cásáha ñáyuu ñayiví: Núu ññ tēe sáha de ññ contrato chí ññ acta, te núu je ni cucutú ni sáha de firmar, te ma cúu ga najnanū, ni ma cúu jecosō gā.

<sup>16</sup> Te suni súcuan ni sáha Yaā Dios ññ contrato jeē ni jéjnūhun ya nuū Abraham jín yúcūn de jeē quíji. Te tu cáhán tutu iī siquī cuehé yucūn de, chi sa cáhán siquī ññ-ni yucūn de, te suu cúu Cristo.

<sup>17</sup> Núu súcuan te jnūhun jeē cahán rī yāha cúu jeē xīhna gā ni sáha Yaā Dios ññ contrato jín Abraham, jeē quiiji Cristo jnama ya yohó, te ni sácutú yá. Yūcuán na te ni yāha cuūn ciento ocō uxī cuiyā, te sáá te ni jēhe ya ley nuū Moisés. Te ley un jēē ní quee cueé gá, ma cúu nacanū contrato un, ni ma cúu casí nuū jnúhun jeē ni jéjnūhun ya jeē jnama ya yohó.

<sup>18</sup> Chi núu jeē jín ley Moisés jnama Yaā Dios ñáyuu, yūcuán na te nasūu

siquī contrato jeē ni jéjnūhun ya cúu. Chi sa suhva siquī maá jēē ni jéjnūhun Yaā Dios nuū Abraham cúu jeē ní jnama ya de.

<sup>19</sup> Núu súcuan ¿te ndese jéjníñu ley Moisés? Jéjníñu chi ni jēhe ya un cueé gá návāha nastúu cuēchi i. Te ni ndacu jniñu máá-ni nde ná tu quiiji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jēhe Yaā Dios ley un núu ñáyuu, te ni tají yá tācá ndajéhé yā ni cacastūhun núu Moisés, te Moisés ni nacachī nuū i.

<sup>20</sup> Te sññ cúu jnūhun jeē ni jéjnūhun ya nuū Abraham jeē quíji Cristo, chi máñúhún-ni ya ni jéjnūhun, te tu ní jini ñúhún ni ññ jeē nacachī nuū Abraham.

### *Siquī ndese jéjníñu ley jenahán*

<sup>21</sup> Núu súcuan ¿te á cúní cahán jeē ley jeē ni jēhe Yaā Dios nuū Moisés, téjiyo jeē ni jéjnūhun ya ún? Tú cuiṭi jeē súcuan. Chi núu jeē ni jēhe Yaā Dios ññ ley jeē cótecu ñáyuu ní cáni sáha, yūcuán na te quendōo ndaā i nuū yā siquī jeē squícu i jniñu ndácu ley un núu.

<sup>22</sup> Te tuú chi yósó núu tútu iī jeē ndihí ñáyuu ñayiví, nájñūhun yíndihyū i vecāa chi cáyihí i chíji cuēchi. Te súcuan cúu návāha tācá i jeē candíje i jeē ni jíhí Jesucristo jehē i, nihīn i máá jēē ni jéjnūhun ya nuū i siquī jeē candíje i ún.

<sup>23</sup> Chi nde ná tu quee jnūhun candíje yó Cristo, te nájñūhun ni yíndihyū yō ni sáha ley jenahán, návāha condetu yó quíví quiiji Cristo, Yaā candíje yó.

<sup>24</sup> Núu súcuan te ley ni cuu ññ jeē ndíto yóhó nájñūhun ññ mozo ndíto sūchi lúlí, te ni jéjníñu nde quiví ní quiiji Cristo, návāha candíje yó jēē ni jíhí yā jehē yō, te ndahva Yaā Dios cuēchi yó.

<sup>25</sup> Te vijna jeē ní quee Cristo, Yaā candíje yó, te tuá yíhí yó ndaha ley jeē cúu nájñūhun mozo ndíto yóhó.

<sup>26</sup> Chi ndivíi rō cácuu sēhe Yaā Dios siquī jeē ní cacandíje ró Cristo Jesús.

<sup>27</sup> Chi tāca ró jeē ní jendute ró siquī jeē ni quíví ró ndaha Cristo, ni sáha ya jeē ní nduu ró nájñūhun cúu máá yá.

28 Te vijna chi tuá cúu ró ni ñayuu hebreo ni ñayuu griego, ni mozo jeē ní jeen ñayuu, ni ñayuu sájniñu cuenta maá, ni tēe ni ñahan. Chi ñin na cúu ró núu yā jeē cáyihí ró ndaha Cristo Jesús.

29 Te núu cáyihí ró ndaha Cristo, núu súcuan te yucūn Abraham cácuu ndije ró, te nihīn rō maá táhū jeē ni jéjnūhun ya.

#### 4

1 Jeē cahán rī jīn ró jijnáhan ró cúu jeē yáha: ñin sūchi chíi táhū, vēsú maá i naquihin ndihí jeē névāha tátá i, te núu lúli i chí inuú cúu i jīn mozo.

2 Chi yāhi i ndaha tāca jéē ndíto i jīn jéē ndíto ndajniñu i, nde quee quiṽi jeē ní jeni tátá i, te sáá te nihīn i.

3 Te suni súcuan yóhó, chí nde ná tu jecūhun ni yō siquī Cristo te ni cuu yó nájñūhun sūchi lúli, te ni yāhi yó chíji tācá costumbre jeē ní cajequin ñayuu ñayīví.

4 Te nde ná ni quee quiṽi jeē ní jeni Yaā Dios, te ni tají yá Sēhe ya, ni cacu ya chíji ñin ñahan, te ni cacu ya yucūn ñayuu nación hebreo jeē cáyihí chíji ley Moisés.

5 Súcuan ni cacu ya návāha jnama ya yohó jéē tuá quihi yó chíji ley un, te návāha naquihin Yaā Dios yohó cuu yó séhe ya.

6 Te siquī jeē cácuu ró séhe ya, te ni tají Yaā Dios Espíritu Sēhe ya ni quiṽi ini anuá rō, te sáha ya jeē cácahān jee ró: Tátá maá ná.

7 Núu súcuan te tuá cácuu ró nájñūhun mozo, chí séhe ya cácuu ró. Te jeē cácuu ró séhe Yaā Dios, te suni nihīn rō maá táhū jeē ni jéjnūhun ya jeē jīn Cristo.

*Jeē nacani ni Pablo siquī ñáyuu cácañdije*

8 Chí nde saá, nde ná tu jecūhun ni rō ndese Yaā cúu Yaā Dios, te ni cacu ró mozo nuū tāca jéē násūu yāā ndaā cúu.

9 Te vijna chi je cájini rō ndese Yaā cúu ya, te vāha ga na cahán rī jeē maá yá je jíní yā rohó. Núu súcuan ¿te najehē cácuu rō nandió cóo ró nduu

tucu ró mozo nuū tācá costumbre ñayuu ñayīví jéē tu níhín jniñu cuiṽi?

10 Chi máni jeē cánēe iī rō quiṽi jīn yóō jīn vico jīn cuiyā.

11 Te yúhú rí sanaa te tu ní jéjnīñu cuiṽi jeē ní nacani ri jñūhun nuū rō.

12 Cáhán ndahú rí jīn ró hermano, jeē na cáni ni rō nájñūhun jéni ni maá rí jeē tuá squícu rí costumbre ñayuu hebreo. Chí ruhū ni nasáha ri maá rí nájñūhun máá ró jeē tu ní cáyihí ró núu ley costumbre ñayuu hebreo. Te tú na vé ni casáha ró jéē cucuíhyá ni rī nde saá.

13 Chí cájini rō ndese ni cuu ná ni nacani núu rí jñūhun nuū rō ndese jnáma ya yohó. Chí siquī jeē cuhú rī te ni jecuíñi rī ñuu rō ni nacani ri jñūhun.

14 Te vēsú jñūndóho ni cuu jeē ní cocuhū rī, te tu ní casájéē ni rō nuū rī, ni tu ní casquéhichī ni rō ruhū. Chí sa ni cajetáhú ró ruhū nájñūhun jeē cúu ri ñin ndajéhé Yaā Dios, chí nájñūhun jeē cúu ri maá Cristo Jesús.

15 Núu súcuan ¿te najehē cúu jeē tuá cácusī ni rō jīn rí vijna? Chí náhán rí jeē vāha ni casáha ró jéē ní cajnahuhū ni rō núu jeē cúu te tava rō tinūu vāha máá ró, cuāha ró nduu tinūu rí nuú.

16 Te vijna ¿á ní nduu ri enemigo rō siquī jeē cachí rí máni jñūhun ndaā nuū rō, chí naún?

17 Te cáhīyo tēe jeē cándihvī ni siquī rō jijnáhan ró, te nasūu jéē quéndōo vāha ánuá rō, chí sa jeē cácuu de nasásīn de rōhó jīn rúhū, návāha condihvī ni rō jeē cúu máá de.

18 Te íyó vāha jeē cándihvī ni de jehē rō, te núu jeē quéndōo vāha ánuá rō cúu núu. Chí níni jīni ñúhún sáha de jeē vāha rōhó, vēsú núu íne ri jīn ró chí núu tú ri íne.

19 Séhē mání jijnáhan ró, jeē siquí rohó cúu jeē inga jīnu jnáhuhū ni rī, chí nájñūhun ñin ñahan scácu séhe, súcuan ndóho ri jehē rō. Te suu cúu jeē jnáhuhū ni rī ndéu ri jeē na ndúndaā anuá rō ndacu ró Cristo.

20 Nacā jeē vāha núu jeē ndeé rí jīn ró vijna ñúhún, návāha cuu cahán manī rī jīn ró. Te tu cújnúní cuiṽi ni rī ndese ga cúu jeē cáni ni rī siquī rō.

*Jnūhun yátá síquī Agar jín Sara*

21 Róhó jijnáhan ró jéē cácu ni ró quihi ró chíji ley Moisés, cachi nuū rī: ¿A tu ní cájini sōho ró ndese cáhán ley un?

22 Chi cáhán tutu īi jeē Abraham ni iyo uū sēhe yí de. Te ĩn i cúu sēhe Agar, ñahan cúu mozo vehe de. Te inga i cúu sēhe ñahan íyó libre, suu ñasihí de Sara jeē ní cuu ña ñahan numá.

23 Te sēhe ñahan cúu mozo, ni cacu i nájnūhun cácu táca gá sūchi lúli. Te sēhe ñahan cúu libre, ni cacu i máá síquī jeē súcuan ni jejnūhun Yaā Dios.

24 Te yāha cúu ĩn jnūhun yátá, chi ndindúú ñahan un cúu ña nájnūhun ndindúú contrato jeē ni sáha Yaā Dios jín ñáyuu. Máá ñahan nání Agar, cúu ña nájnūhun contrato ley jeē véji nde yucu Sinaí. Te ñayuu cáyihí chíji contrato ley, cácu i mozo nuū ley un.

25 Chi Agar cúu nájnūhun ley jeē ni jéhe Yaā Dios xinī yucu Sinaí jeē ĩn nde Arabia. Te cúu ña nájnūhun Jerusalén, ñuu ñayuu hebreo, jeē iyó vijna, chi táca sēhe ñuu Jerusalén, cácu i nájnūhun mozo nuū ley un.

26 Te Jerusalén jeē iyó andiví, chi sa suhva íyó libre nájnūhun Sara. Te yóhó ñáyuu cácdíje, nájnūhun sēhe un cácu yó, chí íyó libre yō nuū contrato ley.

27 Chi suhva yósó núu tútu īi: Róhó jeē ní cuu ró ñahan numá jéē tú sēhe ró, na cúsi ni rō.

Róhó jéē tu ní jéhnde chíji ró jéē scácu ró, na cána jee ró jéē cúsi ni rō.

Chi coo cuehē gá sēhe róhó jéē ní cuu ró ñahan numá vēsú ñahan jeē jé ni scácu sēhe.

Achí tutu.

28 Hermano, sēhe Yaā Dios cácu yó, chí súcuan ni jejnūhun ya nuū yō, nájnūhun ni jejnūhun ya nuū Abraham jeē cacu sēhe de Isaac.

29 Te nde saá te inga sūchi ní cacu nájnūhun cácu táca gá ñayuu, ni jito xeēn i Isaac, sūchi ní cacu ni sáha Espíritu. Te nájnūhun ni iyo saá, suni súcuan cájito xeēn ñayuu táca sēhe Yaā Dios nde vijna.

30 ¿Te ndese cáhán tutu īi? Achí: Quenehen ró ñahan cúu mozo na quíhín ña jín sēhe ña. Chi sēhe ñahan cúu mozo, ma nihín i tahū jín sēhe ñahan libre, achí yá jín Abraham.

31 Núu súcuan hermano, tu cúu yó nájnūhun sēhe ñahan cúu mozo, chí nájnūhun sēhe ñahan libre cúu yó.

*Na cuíñi nīhin yó jín jnūhun jeē ni sáha libre yohó*

## 5

1 Te Cristo ni sáha libre yā yohó jéē tuá yíhi yó chíji ley Moisés. Núu súcuan te cuíñi nīhin ró jín jnūhun jeē ni sáha libre yā yohó, te ma ndívicoo tucu ró cuu ró mozo nuū ley un.

2 Sáha ró cuenta jijnáhan ró, chí ruhū Pablo cahán rī jín ró jeē núu squícu ró ley circuncidar, yūcuán na te tu níhín jníñu cuíti jeē ní candíje ró jéē ni jíhi Cristo jehē rō.

3 Te inga jínu cáhán nīhin ri jín táca tée cánducú cuu circuncidar, jeē núu súcuan te suni cánuú jéē squícu de ndívii cuíti gá jnūhun cáhán ley Moisés.

4 Róhó jéē cánducú ró quendōo ndaā rō jeē squícu ró ley un, je ni casiáá rō Cristo núu súcuan. Je ni castóo ró jnūhun jeē ndahva yā cuēchi ró síquī jeē cundáhú ni Yaā Dios rohó.

5 Te máá yó chí cájica yó jín Espíritu, te cácdíje yó jéē ní ndahva yā cuēchi yó, te jeē yúcuan ñūhun ni yō jeē quendōo ndaā yō quiví cuíñi yó núu Yaā Dios.

6 Chi yóhó jéē cáyihí ndaha Cristo Jesús, vēsú núu jeē cúu yó circuncidar chí tu cúu yó, tú na vé níhín jníñu. Jeē nihín jníñu cúu jeē candíje yó jeē sáha ya jehē yō. Te yūcuan sáha jeē cundáhú ni yō jnáhan yó.

7 Vāha ni cacandíje ró núu. ¿Te nde ĩn ni jesi jeē tuá cájetáhú ró jnūhun ndaā núu súcuan?

8 Jnūhun jeē ní cascáhán de róhó, chí tú véji nuū maá Yaā ní cana róhó ní quívicoo ró ndaha ya.

9 Te ma náā ni rō jeē tée cástáhú róhó, jnūhun cástéén de cúu nájnūhun

levadura, chi vēsú jecu-ni levadura, te ndáa ndihi ñujen sáha.

<sup>10</sup> Te cúcáhnū ni rī jeē maá Jítóho yō sáha ya jeē ma cándije ró jijnáhan ró inga jnūhun jeē sñn cáhán. Te máá Yaā Dios cuāha ya castigo tēe jeē sáca núu xinī rō, núu na-ni tēe cúu de.

<sup>11</sup> Te ruhū, hermano, núu jeē nácani ga rī jnūhun ley circuncidar nde vijna, te jnáhan ri ñayuu hebreo ma cóto xeēn i ruhū nuú. Chi ma quití ni i jeē nácani ri jnūhun jeē ni jíhī Cristo jicā cruz, núu jeē súni nácani ri jnūhun circuncidar nuú.

<sup>12</sup> Te tāca tēe jeē sáca núu xinī rō siquī jnūhun ún, vāha ga na cáhnde gā de máá de núu súcuan.

<sup>13</sup> Chi máá ró jijnáhan ró hermano, ni cana ya rohó návāha coo libre rō nuū ley un. Te vēsú iyó libre rō, te ma cáni ni rō jeē cúu quivícoo ró táca cuéchi jeē cúu modo neé cúní maá ró, chi sa suhva na sáha ró máá ró mozo jeē chindéé ñáhán ró jnáhan ró siquī jeē cundáhú ni rō i.

<sup>14</sup> Chi je ni squícu ró ndihi ley núu squícu ró ñn-ni jnūhun ndácu jniñu yáha: Cundáhú ni rō jnáhan ró nájnūhun cundáhú ni rō maá ró, achí.

<sup>15</sup> Te núu máni jeē ndóna xeēn rō siquī jnáhan ró jéē cuajnáhan ró, te coto ma snáa rō jniñu jeē ni sáha ya mēhñu ró jijnáhan ró.

*Modo cuní ñayuu tu cándije jíin modo sáha Espíritu*

<sup>16</sup> Súcuan cáhán rī jíin ró jijnáhan ró: Caca ró nájnūhun cúní maá Espíritu, te yūcuán na te ma sáha ga rō modo jeē cuní maá ró.

<sup>17</sup> Chi tāca jéē cuní maá yó, yūcuan jési nuū jeē cuní maá Espíritu. Te jeē cuní Espíritu, jési nuū modo neé jéē cuní maá yó. Te jeē ndindúú yáha chi cájesi nuū jnáhan, te jeē yūcuan tu cúu sáha ró jniñu vāha jeē cuní rō sáha ró.

<sup>18</sup> Te núu máá Espíritu steén nuū rō, núu súcuan te tuá cáyihī ró chíji ley jenahán.

<sup>19</sup> Te iyó ndijin tāca jniñu cásáha ñayuu cájica jíin modo neé máá, te yáha cúu: Cásiquí ndéē jnáhan i, cásáha i jniñu jnéhén, cásáha neé ndasí i.

<sup>20</sup> Cáchiñúhún i ídolo, cásáha tásí i, cájito uhū jnáhan i, cájejnáhan i, cáccucuñí ni i. Te yachī cáquití ni i, te cándihvī ni i jeē cúu máá-ni i, te cátejnáhan i cásásñn i máá i.

<sup>21</sup> Te cáccuésún ni i, cájehni i ndīyī, cánajīni i, cásáha i vico neé, jíin táca gá jeē súcuan. Te cáhán nihin ri jíin ró, nájnūhun je ni cahán rī jíin ró saá, jeē ñayuu casáha súcuan, ma nihín tahú i quivícoo i ñuu nuū ndácu Yaā Dios jniñu.

<sup>22</sup> Te ñayuu jeē nduú i jíin Espíritu, tāca jniñu yáha sáha ya jíin i: Jeē cundáhú ni jnáhan, jeē cúsiñ ni, jeē iyó ndeyí sñ ni, jeē iyó paciencia, jeē maní ni, jeē vāha ni, jeē squícu vāha,

<sup>23</sup> jeē tu sáha jeē cujéhnū, jíin jéē jési modo jeē cuní maá. Te tú na ley cacān cuéchi siquī rō núu sáha ró táca jniñu yáha.

<sup>24</sup> Te ñayuu cáyihī ndaha Cristo, nájnūhun je ni cajehni i modo neé máá i jicā cruz, nde jíin táca jéē ndíyo neé ni i te cútíndí i.

<sup>25</sup> Te jeē súcuan ni jéhe máá Espíritu ñn vida jeé núu yō, te suni na cáca yó jíin modo steén Espíritu.

<sup>26</sup> Te ma sandúxí yó jéē squití ni yō jnáhan yó, te ni ma cucuésún ni yō siquī jnáhan yó.

*Jnūhun jeē chindéé ñáhán yó jnáhan yó*

## 6

<sup>1</sup> Hermano, núu ñn jnáhan ró ni sáha cuéchi, te rōhó jéē cájica jíin Espíritu, na náchuhun ichí ró í. Te jíin jnūhun vītá cahán rō jíin i, te suni condito ró máá ró jeē ma cacán ini rō sáha ró táca cuéchi.

<sup>2</sup> Te chindéé ñáhán ró jnáhan ró núu na vé cúu jeē ndóho i, chi súcuan cúu jeē squícu ró ley Cristo.

<sup>3</sup> Chi núu ñn ñayuu jéni ni i jeē ñayuu teyí cúu i, vēsú nasūu súcuan cúu, te stáhú i máá i núu súcuan.

<sup>4</sup> Te tāca ñn ñn ró na cóto ndee rō ndese cáca jniñu sáha ró. Te núu vāha sáha ró, yūcuán na te cuu cusñ ni rō jíin jéē sáha máá ró, te tu níní jéē scáni jnáhan ró máá ró jíin jnáhan ró.

<sup>5</sup> Chi tācá ñn ñn yó cánuú squícu yó jíin jniñu ní jéhe ya nuū maá yó.

<sup>6</sup> Te róhó jeē cascuáha jñūhun vāha ya, na chindéé ñáhán ró tēe cástéén nuū rō jíin táca jeē váha cánevāha ró.

<sup>7</sup> Ma stívī ró cani ni rō jeē cuu sáha ró cuéchi. Chi ma cúu sácata rō nuū Yaā Dios cani ni rō jeē tu sáha ya cuenta. Chi tāca núu ndese sáha ñayuu, suu yūcuán nanihīn i.

<sup>8</sup> Chi ñayuu jeē sáha i jeē cuní modo neé máá i, nihīn i jeē jnahnú ndetū i sáha modo jeē cuní maá i ún. Te ñayuu jeē sáha jeē cuní maá Espíritu, chi nihīn i jeē cótecu i níí cáni andiví sáha Espíritu.

<sup>9</sup> Te ma cuíta yó jeē sáha yó jniñu váha núu súcuan, chi jeē quée maá quívī te nanihīn yō, te núu ma cuíta yó.

<sup>10</sup> Núu súcuan te tāca jínu jeē cúu sáha yó, te na sáha vāha yó jíin táca ñáyuu, te hermano yō jeē cá candíje cúu jeē cánuú gá.

*Saludo jíin jñūhun cástūhun Pablo jeē sándīhí*

<sup>11</sup> Condēhe ró jeē náhnu letra tēe ri cuajeē nuū rō jíin náhan ró, chi ndaha máá rí tēe ri yāhá.

<sup>12</sup> Te tēe jeē casáfuerza de róhó cuu ró circuncidar, cásáha de síquī jeē cá cuni de cuajnúhún ñáyuu de. Te cásáha de návāha ma cóto xeēn ñayuu de jeē cá nacani de jñūhun jeē ni jíhī Cristo jehē yō.

<sup>13</sup> Te ni máá de jeē casáha de circuncidar, suni tu squícu vāha de ndihī ga ley jenahán. Te cá cuni de jeē cuu ró circuncidar, návāha cuu sátéyí de máá de núu quihin ró jnúnī circuncidar sáha de.

<sup>14</sup> Te ruhū tu cuní rī satéyí rí maá rí síquī ní ñn jeē yúcuan, chi máá ñn-ní síquī jeē ni jíhī Jitoho yō Jesucristo jicā cruz. Chi síquī yúcuan cúu nájñūhun ni jíhī rī, chi ni siaá rī táca jéé iyó ini ñayíví, te suni nájñūhun ñn ndiyí cúu ri nuū ñayíví.

<sup>15</sup> Chi núu yíhī yó ndaha Cristo Jesus, te tu níhín jniñu núu cúu yó circuncidar chí tuú. Chi jeē níhín jniñu cúu jeē ní nasájeé yá anuá yō.

<sup>16</sup> Te ñúhun ni rī jeē tāca ró jeē jíca ró jíin modo yáha, na sáha ga yā jeē coo ndeyí coo sí ni rō, te cundáhú ni yā rohó. Te suni ñúhun ni rī jeē súcuan sáha ya jíin táca gá i jeē cúu ndije i ñayuu cá candíje Yaā Dios.

<sup>17</sup> Te vijna jíin níí gá cuahān yō, cuní rī jeē ma stáhān gā ni ñn ñayuu ruhū. Chi yíqui cúñu rī ndíso seña jeē ni tújī rī ni ndoho ri jeē cúu ri mozo maá Jítoho yō Jesús.

<sup>18</sup> Hermano, ñúhun ni rī jeē na sáha ga Jitoho yō Jesucristo jeē váha róhó jíin náhan ró. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU EFESO

<sup>1</sup> Máá rí cúu Pablo, apóstol Jesu-cristo, chi súcuan ni nujnahan ni Yaā Dios ni tají yá ruhū. Te téé ri carta yáha cuájeē nuū rohó ñáyuu ñuu Efeso, jeē cácuu ró ñáyuu maá yá jeē cacandíje ró Cristo Jesús.

<sup>2</sup> Te ñúhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha róhó, te sáha ya jeē coo ndeyí coo sī ni rō.

*Jeē sáha Cristo jeē quéndōo vāha ánuá yō*

<sup>3</sup> Na cáhán yō jeē yóhyo cújéhnū Yaā Dios, Yaā cúu Tatá Jítoho yō Jesu-cristo. Chi ni jēhe ya táca jéē váha íyó andiví jéē quéndōo vāha ánuá yō, chi yáhi yó ndaha Cristo.

<sup>4</sup> Chi nde ná tu jecōo ñayiví te ni nacāji ya yohó jéē quívi yó ndaha Cristo, návāha coo ndoo ánuá yō te caca ndaā yō nuū yā.

<sup>5</sup> Je ni cundáhú ni yā yohó nde saá, te ni tana ya yohó jéē náquihin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya.

<sup>6</sup> Te jeē yúcuan níni na cáhán yō jeē yóhyo cújéhnū ya, chi yóhyo vāha ni sáha ya yohó jíin táca jéē váha ni yā, siquī jeē yáhi yó ndaha Cristo, Sēhe ya jeē maní yā jíin.

<sup>7</sup> Te siquī jeē yóhyo vāha ni yā jíin yó, te Sēhe ya un ní jnama ya yohó jéē ni jíhī yā jehē yō, te ni ine cáhnu ni yā nuū cuéchi yó.

<sup>8</sup> Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchí yó jíin jnúhun ya.

<sup>9</sup> Te ni sáha ya jeē cuni yō in jnúhun ya jeē ní yisáhi, jeē tu ní sáha ya jeē cuni ñayuu jenahán. Chi súcuan ni tee ni yā nde saá, te nujnahan ni yā sáha ya.

<sup>10</sup> Te yāha cúu jnúhun ún: Nde na quée tiempo te sáha ya jeē ndíhi

jeē yúcu andiví jíin jéē yúcu ñayiví, inuú-ni nduu, quíhi ndaha Cristo.

<sup>11</sup> Te siquī jeē yáhi yó ndaha Cristo, te nihīn yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya táca-ni jeē jé ni cundaā ni yā jeē nujnahan ni yā sáha ya.

<sup>12</sup> Súcuan ni sáha ya návāha máá rí jeē xíhna gā ni cacandíje ri Cristo, caca ndaā rī te súcuan sájéhnū ri yā jeē yóhyo luu cújéhnū ya.

<sup>13</sup> Te suni máá ró jíjnahan ró, ni cajini ró jnúhun ndaā jnúhun vāha jeē jnáma ya rohó, te ni cacandíje ró Cristo. Te ni canihīn rō Espíritu Santo jeē ni jéjnūhun ya jeē cuáha ya. Te ndéé Espíritu yā ún ini anuá yō, te cúu ya nájnúhun sello jeē steén jeē cúu yó séhe Yaā Dios.

<sup>14</sup> Te sáha ya jeē jini ndije yó jéē cucuéé gá te cuáha Yaā Dios tahū yō, nde na sínu ya jniñu jeē jnáma ya ñayuu yā. Te quívi ún cahān yō jeē cújéhnū ya, chi yóhyo luu cújéhnū ya.

*Jeē jíicán tahu Pablo jehē ñáyuu cacandíje*

<sup>15</sup> Te ruhū ni jini jnúhun ri ndese cacandíje ró jéē ni sáha Jítoho yō Jesús jehē rō, jíin ndese cacundáhú ni rō ndíhi ñayuu cáyíhi ndaha Yaā Dios.

<sup>16</sup> Te jeē yúcuan tu jécuiñī rī jeē nácuatáhú rí jehē rō, te jeē jíicán tahu rī te tu náa ni rī cacān tahu rī jehē rō.

<sup>17</sup> Chi jíicán tahu rī jeē na sáha Yaā Dios jeē jécūhun vāha ni rō te ndundíchí ró jíin jnúhun ya, te cuni gā rō ndese Yaā cúu ya. Chi máá yá cúu Yaā Dios Jítoho yō Jesucristo, te cúu ya Tatá yō jeē lúu ndasí cújéhnū.

<sup>18</sup> Te jíicán tahu rī jeē na sándijin gā yā nuū jeē níjnūní rō, návāha jecūhun ni rō ndese cáa ndíhi jeē cáñuhun ni rō nihīn rō siquī jeē ní cana ya rohó. Te jecūhun ni rō ndese cúca cácuu ró jíin táca jnúhun jéhnū luu ndíso jnúhun ya jeē cúu ñayuu maá yá.

<sup>19</sup> Te jíicán tahu rī jeē na jécūhun ni rō ndese yóhyo jéhnū poder yā jeē sájniñu ya ini anuá yohó jéē cúu yó



ñáyuu cá candíje. Chi tu ndíhi cuiti poder yā.

<sup>20</sup> Te suu poder un cúu jeē ni stéén yā ná ni sáha ya ñn jniñu jéhnú ga jeē ní nastécu yā Cristo mēhñu ndíyí te ni scúcōo ya lado váha ya nde andiví.

<sup>21</sup> Te ni jeni ya Cristo síquī tāca jéē cujéhnú, jíin jéē ndíso jniñu, jíin jéē jnñi poder, jíin jéē ndácu jniñu, jíin síquī tāca jeē cácahān ñayuu jeē cujéhnú, cúu tiempo yáha, cúu tiempo quiiji.

<sup>22</sup> Te ni jēhe ya jeē cujéhnú Cristo síquī ndivíi. Te ni sáha ya jeē cúnuú yá cujéhnú ya nuū ñáyuu cá candíje.

<sup>23</sup> Te ñayuu cá candíje un cácuu i nájñuhun yíqui cúñu ya, chi ñn na cúu i jíin yá te ñúhun chitú yá ini anuá i, chi Yaā jeē ñúhun chitú ñí cáhnu-ni cúu ya.

*Ni cácu yó síquī jeē ní cundáhú ni yā yohó*

## 2

<sup>1</sup> Te ni sáha ya jeē cotecu rō ñí cáni jíin Cristo. Chi je ni cacuu ró nájñuhun ndíyí nuū yā, ni sáha cuēchi ró jíin jniñu néé ní casáha ró.

<sup>2</sup> Chi ni cajica ró jíin jniñu yúcuan nde saá, ná ni cacondiquñ rō jniñu ñayuu ñayiví, ná ni cajetáhú ró núu jexeén jeē ndácu jniñu nuū tāca táchí xeén, te jica nuū tachí. Te suu cúu jeē scánda ini ñayuu ñihni ni nuū Yaā Dios.

<sup>3</sup> Te máá rí jijnáhan ri, suni súcuan ni cajica ri, chi ni casáha ri jniñu néé jéē cuní maá rí, jíin táca jéē jicán yíqui cúñu rí, jíin jéē cájeni néé ni rí nde saá. Jeē yúcuan suni ni cacuu ri ñayuu jeē ñihñ castigo xeēn jeē cuáha ya nuú, chi ñnuú-ni ni casáha ri nájñuhun casáha máá i.

<sup>4</sup> Te Yaā Dios chi yōhyo cuehē ni cundáhú ni yā yohó, te váha ndasí ni yā jíin yó.

<sup>5</sup> Te náa cúu yó nájñuhun ndíyí nuū yā ni sáha cuēchi yó, te ni nastécu yā yohó jéē cótecu yō ñí cáni jíin Cristo. Chi síquī jeē yōhyo váha ni yā cúu jeē ní jnama ya yohó.

<sup>6</sup> Te ni nastécu yā yohó jéē cótecu ñnuú yó jíin Cristo Jesús, te scúcōo ya yohó jíin yá nde andiví.

<sup>7</sup> Súcuan ni sáha ya návāha ñí gá tiempo jeē quiiji, te stéén yā ndese yōhyo maní yā jíin yó, jíin ndese váha ni yā jíin yó jeē síquī Cristo Jesús.

<sup>8</sup> Chi síquī jeē yōhyo maní yā jíin ró cúu jeē ní jnama ya rohó, chi ni cá candíje ró jéē sáha ya jehē rō. Te nasūu síquī jeē ní casáha máá ró cúu, chi tahū jeē ni jēhe ya nuū rō cúu.

<sup>9</sup> Chi tú na jniñu váha ní casáha yó jéē jnáma ya yohó, te jeē yúcuan ni ñn yó ma cúu sátéyí yó maá yó.

<sup>10</sup> Chi cúu yó ñn jniñu luu jeē ní nasáha máá yá, chi ni nasáha ya yohó jéē cundúú yó jíin Cristo Jesús, návāha sáha yó táca jniñu váha jeē jé ni sátühva Yaā Dios jeē sáha yó.

*Jeē sáha Cristo jeē ndívi yó núu jñuhun maní Yaā Dios jíin yó*

<sup>11</sup> Núu súcuan te na núcūhun ni rō ndese ñayuu ni cacuu ró ndé saá. Chi tu ní cácuu ró ñáyuu hebreo, chi sa suhva ni cacuu ró ñáyuu tāca nación jeē tu jíní jñuhun ya. Te ñayuu hebreo jeē casáha circuncidar yíqui cúñu, ni cácahān i jeē cácuu ró ñáyuu tu sáha circuncidar.

<sup>12</sup> Na núcūhun ni rō jeē ndé saá tu ní cáhñ rō jíin Cristo, te ni cacuu ró ñáyuu ñuu jicá núu nación Israel. Te tu ní cájini rō tāca jñuhun contrato jeē ni jéjñuhun Yaā Dios. Te tu ní íne Yaā Dios jíin ró ñayiví yáha, te tú na vé jeē váha ní cáñuhun ni rō jeē cóo.

<sup>13</sup> Te vijna chi ni ndívicoo ró núu Yaā Dios jeē tu ní cájini rō jñuhun ya nde saá, chi ni quívicoo ró ndaha Cristo síquī jeē ni jíhí yā jehē rō.

<sup>14</sup> Chi Cristo cúu Yaā sáha jeē ndúmaní jnáhan yó. Chi ni sáha ya jeē ñáyuu hebreo jíin ñáyuu tāca gá nación, ni nduu yó ñn na nuū yā. Chi ni sáha ya jeē tuá jíto uhū jnáhan yó, te suu cúu nájñuhun jeē ní jenu ya ñn jeē ndihyú sava mēhñu yó jeē sásñ yóhó.

<sup>15</sup> Chi ni socō yā maá yá ni jíhí yā, te súcuan ni ndahva yā ley jenahán

jíin jnúhun ndácu jniñu jíin jéē tajnúni ndíso máá. Chi ley un ní sásin ñayuu hebreo jíin táca nación jeē tu ní jíní i ley un. Te ni nasquíjnáhan ya ndihi yó jéē ní nduu yó in na nación jeé, yíhi yó ndaha ya. Te súcuan ni sáha ya jeē ní ndumaní jnáhan yó.

<sup>16</sup> Te jíin jéē ni jíhí yā jicā cruz, te ni snáā yā jnúhun cájito uhū jnáhan ñayuu hebreo jíin táca gá nación. Te ni sáha ya jeē ndívicoo yó núu jnúhun maní Yaā Dios jíin yó, te ni nduu yó in na ñayuu maá yá.

<sup>17</sup> Chi ni quiji Cristo ni nacani ya jnúhun vāha nuū tāca ñayuu jeē na ndívi i nuū jnúhun maní yā jíin i, cúu rohó ñayuu tu ní cájini jnúhun ya, te suni ñayuu jnáhan ri hebreo jeē cájini jnúhun ya.

<sup>18</sup> Te vijna te siquī jeē ni jíhí Cristo, te ndihi yó, cúu ñayuu hebreo chí ñayuu tāca gá nación, cuu quívicoo yó núu Tatá yō Yaā Dios, te in-ni Espiritu yā sáha.

<sup>19</sup> Núu súcuan te tuá cúu ró nájnūhun ñayuu ñuu jicá ni ñayuu tatú, chí in na ni nduu ró jíin ñayuu ñuu maá yá. Te jnáhan ñayuu vehe Yaā Dios cácuu ró.

<sup>20</sup> Te cácuu ró nájnūhun in in parte in vehe cáhnu jeē cúvāha siquī cimientu, te cimientu un cúu jnúhun Cristo jeē ní canacani tāca apóstol jíin téē ni canacani jnúhun ya jenahán. Te máá Jesucristo cúu nájnūhun yuū cánuú gá jeē yítuu vehe.

<sup>21</sup> Te ní vehe cúvāha vāha siquī maá yá, cúsucún cuáhān, cúu in templo i jeē ndeé maá Jítoho yō.

<sup>22</sup> Te suu cúu máá ró jijnáhan ró, chí ndúú ró jíin Cristo, te inuú-ni sáma ya rohó jíin táca ñayuu cácandíje, cácuu ró nájnūhun in in yuū templo. Te suu cúu jeē ndeé Espiritu Yaā Dios ini ró nájnūhun ini in templo.

*Jeē ndíso jniñu Pablo nacani de jnúhun nuū ñayuu tu jíní jnúhun Yaā Dios*

### 3

<sup>1</sup> Te jeē yúcuan ruhū Pablo, jícán tahú rī nuū yā. Te íne ri vecāa siquī jeē

ní nacani ri jnúhun Cristo Jesús nuū rohó ñayuu tāca nación jeē tu ní jíní jnúhun ya nuú.

<sup>2</sup> Te jíní rī jeē ní cajini ró jnúhun ndese yōhyo vāha ni sáha Yaā Dios jíin rí, chí ni jēhe ya jniñu nuū rī jeē nacani ri jnúhun vāha ya nuū rō.

<sup>3</sup> Te jnúhun ya jeē ní yisāhí, ni nastúu ya nuū rī, nájnūhun je ni tee ri jecu siquī un núu rō.

<sup>4</sup> Te núu na cáhu ró te cuu jecūhun ni rō jeē ní jini vāha ri jnúhun Cristo jeē ní yisāhí un.

<sup>5</sup> Te tu ní stéén yā jnúhun sāhí un núu ní in ñayuu tāca cuíyā ní quiji ichi yátá. Te vijna cúu jeē steén ndíjin yā jíin Espiritu yā nuū tāca apóstol jeē ní jeni ndoo ya, jíin núu téē canacani jnúhun ya.

<sup>6</sup> Te súcuan cáhán jnúhun ní yisāhí un: Ñayuu tāca gá nación, in cáhnu-ni nihīn i tahū i jíin ñayuu hebreo, chí ni cacandíje i jnúhun jeē jnáma ya i. Te inuú-ni ni nduu ndihi i, te in cáhnu-ni quéndōo ndetū anuá i sáha Cristo, nájnūhun ni jejnūhun Yaā Dios.

<sup>7</sup> Te jeē siquī jnúhun yáha cúu jeē ní jeni ya ruhū jeē nacani ri jnúhun nuū rō. Chí ni cutahū rī jniñu luu yáha jeē ni jēhe ya nuū rī. Te jíin poder yā ni sáha ya un jíin rí.

<sup>8</sup> Te ruhū chí cúu ri téē núu ga nuū tāca ñayuu núu ga jeē yíhi ndaha ya. Te vésú súcuan te nuū maá rí ni jēhe ya jniñu luu yáha jéē nacani ri jnúhun vāha ya nuū ñayuu tāca nación jeē tu jíní, ndese yōhyo cúca yó ndihi jeē ndíso jnúhun Cristo, jeē ma cánda cuíti yō jecūhun ni yō.

<sup>9</sup> Chí ni jeni ya ruhū jeē steén cají rí jeē suni máá i jnama ya i. Te yūcuan cúu jnúhun Yaā Dios jeē ni yisāhi ndé jenahán ndasí, chí máá yá ni sáha ndihi-ni.

<sup>10</sup> Te súcuan ni sáha ya jíin ñayuu, návāha vijna te tāca jéē cácujeñnu jíin jéē ndíso jniñu nuū sucún, na cúni ndese ndíchí ndasí Yaā Dios. Chí ndíchí ndasí ni sáha ya jíin ñayuu cácandíje.

<sup>11</sup> Chí súcuan ni tee ni yā nde ní cáni, te ni sáha ya jeē Jítoho yō Cristo Jesús

ni squícu ya ún.

<sup>12</sup> Te siquī jeē ni sáha Cristo, te vijna te jíní ndije yó jéē cúu quívi yó cáhān yō jíin Yaā Dios siquī jeē candíje yó Cristo.

<sup>13</sup> Núu súcuan te cáhān ndahú rí jíin ró jeē ma cucuíhyá ni rō siquī jnūndóho jeē ndóho rí jehē rō. Chi suu sáha jeē quéndōo ndetū anuá rō jijnáhan ró.

### *Cristo yōhyo cundáhú ni yā yohó*

<sup>14</sup> Te jeē yúcuan cúu jeē jécuiñi yiti rí nuū maá Yaā cúu Tátá Jitoho yō Jesucristo.

<sup>15</sup> Te máá yá cúu Tátá nuū ndihi ñayuu yā jeē yúcu andiví jíin ñáyivi.

<sup>16</sup> Te jícán tahu rí jeē jíin poder yā jeē kujéhu ndasí yá, na sáha ya jeē íje vāha ni rō jíin jnúhun ya, te coo fuerza ini anuá rō, sáha Espíritu yā.

<sup>17</sup> Te jícán rí jeē candíje nihin ró Cristo, návāha condee yā ini anuá rō, te jñi vāha ró jnúhun jeē cundáhú ni yā rohó, te cuiñi nihin ró jíin.

<sup>18</sup> Te súcuan te cuu jecūhun vāha ni rō jíin táca ñayuu candíje, ndese cáa jnúhun cundáhú ni Cristo yohó. Chi yōhyo jíté, cáni, cúnú, súcún jnúhun ún, chi yōhyo cuehē sáha.

<sup>19</sup> Te jícán rí jeē na cúni vāha ró ndese cundáhú ni yā yohó, vēsú tu cúu cuiñi jecūhun ni yō ndihi ndihi. Te súcuan te cundúú ró jíin Yaā Dios jeē cunuú yá ini anuá rō.

<sup>20</sup> Núu súcuan te na cáhān yō jeē yóhyo luu cújéhu ya, chi máá yá cúu Yaā iyó poder jeē sáha ya jeē vāha ndasí gá vēsú ndihi jeē jícán yō chí jéē jeni ni yō. Te sáha ya un jíin poder yā jeē sájniñu ini anuá yō.

<sup>21</sup> Te na cáhān yō jeē yóhyo luu cújéhu ya jeē siquí jeē ni sáha ya jehē ñayuu cácandíje jíin jéē siquí Cristo Jesús. Te súcuan na cóo nde ní cáni cuiñi tiempo jeē quíji. Amén.

*Inuú-ni cácuu ñayuu cácandíje sáha Espíritu*

## 4

<sup>1</sup> Te ruhū jeē íne rí vecāa siquī jnúhun maá Jitoho yō, cáhān ndahú rí

jíin ró jeē na cáca ndaā rō nájñuhun cánuú caca ró jéē cácuu ró ñáyuu ni cana ya.

<sup>2</sup> Te níni na cóo suchí ni rō, te coo vitá ni rō. Te na cóo paciencia rō, te cuandeyí ni rō jíin jnáhan ró jéē cundáhú ni rō i.

<sup>3</sup> Te na cóndihvī ni rō coyūcu manī inuú ró, sáha máá Espíritu nuū véji jnúhun manī ni.

<sup>4</sup> Chi ñn-ni cácuu ñayuu maá yá, te íyó ñn-ni Espíritu, te inuú cáñuhun ni yō jeē cóo jeē vāha siquī jeē ní cana ya yohó.

<sup>5</sup> Te íyó ñn-ni Jitoho yō, jíin ñn-ni jnúhun cándíje yó, jíin ñn-ni jnúhun jéndute yó.

<sup>6</sup> Te íyó ñn-ni Yaā Dios jeē cúu Tátá yō jijnáhan yó. Te máá yá kujéhu siquī ndihi yó, te sájniñu ya jíin ndihi yó, te ndéé yá ini ndihi yó.

<sup>7</sup> Te tǎcá ñn ñn yó ní cacutahū yō sín sín jniñu sáha yó, núu ndese ni tana Cristo cūhva tahū un núu yō.

<sup>8</sup> Jeē yúcuan cáhān tutu iñ:

Ná ni ndaa ya cuanuhun yā andiví, te ni stutú yá cuehē jeē yíndihyū, cuahān yā jíin.

Te ni saja ya tahū nuū táca ñáyuu.

<sup>9</sup> Te jeē cahán tutu jeē ní ndaa ya, suni cúni cahān jeē xihna gā nde andiví ni cuun ya nde nuū cunú gá ñayivi yáha.

<sup>10</sup> Te Yaā ní cuun, suni máá yá cúu jeē ní ndaa nde nuū sucún gá andiví, návāha cuhun chitú yá ní cáhnu-ni.

<sup>11</sup> Te ni tana ya sín sín jniñu sáha ñayuu. Chi ni jeni ya sava ñayuu cuu apóstol, te sava ga nacani jnúhun ya, te sava ga scándíje ñayuu jnúhun jeē jnáma ya i, te sava ga coo pastor condito ñayuu cácandíje, te sava ga steén.

<sup>12</sup> Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jíin jnúhun ya.

<sup>13</sup> Te súcuan coo nde nduu inuú-ni ndihi yó jíin jnúhun cándíje yó, te cuni vāha yó ndese Yaā cúu Sēhe Yaā Dios. Te súcuan ije vāha yó ndé na cúchitú yó jíin ndihi jnúhun jeē ñuhun chitú ini Cristo.

14 Te súcuan te ma cóo ga yō nájñuhun sūchi lúli jéē yachi jéni yāha jéni yūcuán ni i, ni ma quívi nduu yō cháha chúcuan jíin sñn sñn jñuhun jeé cástéén tēe stáhú jéē yóhyo ndito de squívi de yóhó nuū jñuhun stáhú.

15 Chi sa suhva na cóndiquīn yō jñuhun ndaā jíin jñuhun cundáhú ni. Te súcuan cuehnu yó jíin táca jniñu cúní Cristo, Yaā cujéhnu nuū ñáyuu cácuu nájñuhun yiqui cúñu yā, chi ñn na cúu i jíin yá.

16 Te sáha ya jeē nduu ñnuú ni tāca i jeē cáhije i cuahān i, chi cácuu i nájñuhun ñn na yiqui cúñu jíin yá. Te jéjñiñu vāha tāca ñn ñn i ndese ni nihīn jñiñu i, návāha scuéhnu jnáhan te ije jíjnáhan jíin jñuhun cundáhú ni.

### *Jeē ndújeé yó sáha Cristo*

17 Núu súcuan te yāha cúu jñuhun cáhán rī jíin ró, te jeē achí Jítóho yō cúu jeē cahán nihīn rī jíin ró: jeē ma cáca ga rō nájñuhun cájica sava ga ñayuu jeē tu jíin i ndese Yaā cúu Yaā Dios, chi cájica i jíin jñuhun jeē jéni sáa-ni máa i.

18 Te íyó nee nuū jeē níjnūnī i, te tu névāha i Espíritu jeē véji nuū Yaā Dios, chi tu jíin i jñuhun ya, siquī jeē níhni ni i.

19 Te tuá cúcanu i, chi ni quívi coo i jíin jniñu néé ndasí, te ndíhví ni i sáha i tāca jniñu jnéhén.

20 Te róhó jíjnáhan ró, nasūu súcuan ní cácuáha ró jñuhun Cristo,

21 te núu ndaā jeē ní cajini ró jñuhun ya jíin jéé ní cacutūhva ró jíin jñuhun ndaā Jesús.

22 Núu súcuan te na stóo ró táca jniñu ní casáha ró ichi yátá, ná ni casáha ró modo cuní maá ró jeē ní cujnéhén ánuá rō ni sáha jniñu néé stáhú jéé ní ndiyo ni rō.

23 Te na ndújeé ánuá rō jíin jéé níjnūnī rō.

24 Te na cuáha ró jñuhun ndujeé ró, chi nasáha Yaā Dios rohó nájñuhun cúní maá yá jeé cáca ndaā rō jíin jniñu vāha jniñu ndoo.

25 Núu súcuan te ma cahán gā rō jñuhun stáhú, te na cáhán ndaā rō jíin

táca jnáhan ró, chi ñn-ni cácuu ndihí yó.

26 Núu véji ñn jeē squití ni rohó, te ma quití neé ni rō. Te ma quití ni rō nde quēe niāndii.

27 Ma cuáha ró jñuhun jeē sáha jexeén jeē quívi ró cuéchi.

28 Ñayuu ní sacuíhná, ma sacuíhná gá i, chi sa suhva na sájniñu i, te na cócuu i jíin jniñu vāha, návāha nihīn i jeē cuáha i nuū ñáyuu cúmanī nuū.

29 Ni ñn jñuhun néé ma cahán rō, chi sa suhva na cáhán rō jñuhun vāha jeē scuéhnu jnáhan jíin jñuhun ya, te sáha jeē quéndōo vāha ñayuu jíin sōho.

30 Ma sáha ró cuéchi návāha ma cucuíhyá ní Espíritu Santo Yaā Dios. Chi Espíritu yā cúu nájñuhun sello jeē steén jeē cúu yó séhe Yaā Dios, nde quiji quívi jíin jniñu jeē jnáma ya rohó.

31 Te na siáá rō táca jñuhun cútucu ni, jíin jñuhun xeén ni, jíin jñuhun quití ni, jíin jñuhun cáhán ndevāha, jíin táca jñuhun néé.

32 Chi sa suhva na cóo vāha ni rō jíin jnáhan ró, te cundáhú ni rō i. Na cóne cáhnu ni rō nuū jnáhan ró, nájñuhun ni ine cáhnu ni Yaā Dios nuū rō siquī Cristo.

### *Ndese cánuú caca ndaā séhe Yaā Dios*

## 5

1 Núu súcuan te na ndácu ró Yaā Dios, chi cácuu ró séhe ya jeé maní yá jíin.

2 Te níni cundáhú ni rō jnáhan ró, nájñuhun ni cundáhú ni Cristo yohó, te ni socō yā maá yá jehē yō, ni cuu ya nájñuhun ñn londe jeē jeén asñ nuū Yaā Dios jeé ni sócō yā maá yá.

3 Te vijna jeé cácuu ró séhe Yaā Dios, te ni ma sáha ró ni ma ndájñuhun ró siquī jñuhun jíca jnéni, ni tāca jniñu jnéhén, ni jñuhun ndiyo ni ndajniñu.

4 Te ni ma cahán rō táca jñuhun sáha jeé cúcanu jnáhan, ni jñuhun cánéé íi, ni jñuhun jeé tu ndé jéjñiñu cuítí. Chi tāca un tu níhín jniñu. Chi sa suhva na nácuatáhú ró nuū Yaā Dios.

5 Chi je cájini rō jeē ní ñn ñayuu cájica jnéni, ni jeē sáha jniñu jnéhén, ni jeē ndíyo ni tācá ndajniñu, ma nihín tahu i quívi i ndaha Cristo jín Yaā Dios jeē ndacu ya jniñu nuū i. Chi tāca jeē ndíyo ni i cúu nájñuhun ídolo i jeē cáchiñuhún i.

6 Te coto rō jeē ma stahú ni ñn i rōhó jín tāca jñuhun cáhán saá ni i, chi síquī tāca jñuhun néé yáha cúu jeē quíji castigo xeēn Yaā Dios nuū tāca ñayuu níhni ni.

7 Ma quívi nduu rō jín i núu súcuan.

8 Chi tāca quívi saá ni coyūcu rō nájñuhun nuū néē, te vijna chi cáyūcu rō jín luz maá Jítóho yō, cúu jeē cájecūhun ni rō síquī yā. Te na cáca rō nájñuhun cájica ñayuu jeē steén luz yā ini anuá i.

9 Chi jniñu sáha luz yā jín yó cúu tācá jniñu manī ni, jniñu ndaā, jín jniñu váha.

10 Scuáha rō sáha rō tāca jniñu jeē núnahan ni maá Jítóho yō.

11 Te ma quívi nduu rō jín tāca jeē tu níhín jniñu jeē casáha ñayuu cáyūcu nájñuhun nuū néē. Chi sa suhva steén rō nuū i jeē tú vāha casáha i.

12 Chi cúcanu yō cahān yō síquī jniñu casáha yuhu maá i.

13 Te luz yā sáha jeē nátūu tācá jniñu néé casáha i. Te núu cuatáhú i luz yā te caca i jín luz ún.

14 Jeē yúcuan cáhán tutu:

Róhó jeē cúhuun ni, jeē nájñuhun quíxi, natahū ni,

te quenda rō méhñu ñayuu jeē cácuu nájñuhun ndīyi.

Te Cristo steén yā luz yā ini anuá rō. Achí tutu.

15 Núu súcuan te coto vāha rō ndese caca yúcún rō. Te ma cáca rō nájñuhun cájica ñayuu canéé, chi caca rō nájñuhun cájica tēe ndíchí.

16 Ma snāā rō tiempo, chi condihvī ni rō jín jniñu ya, chi íyó cuéhē cuēchi quivī yáha.

17 Núu súcuan te ma cóo néé xínī rō, chi sa suhva na jécūhun vāha ni rō na jniñu núnahan ni maá Jítóho yō.

18 Te ma nájini rō, chi tīvi rō sáha. Chi sa suhva na ndúcú rō jeē cúnuu Espíritu Santo ini anuá rō.

19 Te cahān rō jín jnáhan rō jín salmo jín himno, yaa íi jeē cahān jñuhun ya. Te ini anuá rō cahān rō jín yá jín tāca yaa, chi yūcuan cúu jeē jíta ánuá rō nuū yā chíñuhún rō yā.

20 Te níni nacuatáhú rō síquī tācá-ni nuū Tatá yō Yaā Dios te ndacunehen rō síhvī máá Jítóho yō Jesucristo.

*Ndese squícu vāha ñayuu cácadíje nuū jnáhan i*

21 Te cuatáhú rō nuū jnáhan rō síquī jeē cáhīyo yíñuhún rō nuū Cristo.

22 Róhó ñahan cácuu ñasihí, cuatáhú rō nuū yíi rō, nájñuhun jétáhú rō nuū Jítóho yō.

23 Chi yíi cújéhnú nuū ñasihí, nájñuhun cújéhnú Cristo nuū yohó ñayuu cácadíje, jeē cácuu yó nájñuhun yíqui cúñu yā, chi ñn na cúu yó jín yá. Te máá yá jnáma ya yohó.

24 Chi nájñuhun ñayuu cácadíje cájetáhú i nuū Cristo, suni súcuan ñasihí cuatáhú ña ndihí jeē cahān yíi ña.

25 Te róhó tēe cácuu yíi, cundáhú ni rō ñasihí rō, nájñuhun ni cundáhú ni Cristo yohó ñayuu cácadíje, te ni socō yā maá yá jehē yō.

26 Súcuan ni sáha ya jeē cóo ndoo coo íi yō nuū yā, te ni nacate ya anuá yō jín jñuhun ya jín jéē ní jendute yó.

27 Te yóhó ñayuu cácadíje chi cuiñi yó núu yā, te luu cújéhnú yó. Te ma cóndee cuēchi ánuá yō, ni jeē tú luu, ni ñn jeē súcuan, chi sa suhva coo ndoo coo íi yō nuū yā, te tú na vé cumani gā.

28 Te nájñuhun Cristo ni cundáhú ni yā ñayuu cácadíje, suni súcuan cánuu jéē cundáhú ni yíi ñasihí de, nájñuhun cundáhú ni de máá de. Chi tēe cundáhú ni de ñasihí de, máá de cundáhú ni de.

29 Chi ni ñn tēe tu jító uhū de máá de, chi sa suhva yéji de te ndíto yúcún de máá de. Te suni súcuan sáha Cristo jín yóhó ñayuu cácadíje nuū yā.

30 Chi cácuu yó nájñūhun yiqui cúñu yā, te ññ yó cácuu nájñūhun ññ ññ parte yiqui cúñu yā.

31 Te suu cúu nájñūhun tēe jeē stóo de tátá de náná de, te quijnáhan de jíin ññasíhí de, te ññ na cúu ndíndúú de.

32 Yōhyo jéñu jñūhun sāhi yāha, te cáhán rī jeē ññayuu cácadíje suni súcuan quijnáhan i jíin Cristo.

33 Te suni súcuan ná ññ ná ññ ró cundáhú ññ ró ññasíhí ró, nájñūhun cundáhú ññ ró maá ró. Te ññasíhí na cúu yññuhún ññ jíin yññ ññ.

## 6

1 Te róhó séhe jíináhan ró, cuandije ró núu tátá ró nuu naná ró, chi yūcuan cúu jeē váha sáha ró jéē candíje ró Jítoho yō.

2 Chi yāha cúu ññ jnáhan jeē uxí jñūhun ndácu jñññu jeē ññ jéhe ya, te xīhna gā jñūhun yāha ndíso tahū: Cooyññuhún ró nuu tátá ró nuu naná ró,

3 návāha quendōo ndetū ró, te náhán cotecu ró ññayññi yāha. Achí.

4 Te róhó tátá jíináhan ró, ma squití ññ ró séhe ró, chi sa suhva scuéñu ró i jíin jñūhun cuandije i, te stéén ró nuu i jeē candíje i maá Jítoho yō.

5 Te róhó mozo jíináhan ró, cuandije ró núu patrón ró ññayññi yāha, te cooyññuhún ró te conso iyo ró núu de. Te na sájñññu ndaā sájñññu ndije ró, caní ññ ró jeē nuu Cristo cájeñññu ró.

6 Ma sájñññu ndúxí ró jeē maá jéē coto de te cuajññuhún de róhó. Chi sa suhva sáha ró cuenta jeē mozo Cristo cácuu ró. Te sáha ró jéē nújnahan ññ Yaā Dios nde jíin ññ ini jíin ánuá ró.

7 Te na cúññ ññ ró sájñññu ró, te na cáñi ññ ró jeē nuu maá Jítoho yō cájeñññu ró, nasūu núu ññayuu.

8 Chi je cáñi ró jeē jñññu váha sáha ññ ññ ró, te ññññ ró yāhu jñññu yūcuan núu maá Jítoho yō, vēsú cúu ró mozo chí tēe sájñññu maá.

9 Te róhó patrón jíináhan ró, suni súcuan sáha ró jíin mozo ró, te ma cahán xeēn ró jíin i. Chi na cócuhun ññ ró jeē suni maá ró jíin maá i yññi ró ndaha Jítoho yō, Yaā ndeé andññi.

Te tu sáha ya cuenta ndese cúu ññ ññ ññayuu, chí ññuú sáha ya jíin i.

### *Na cúcutú yó jíin táca fuerza Yaā Dios*

10 Te íyó ññga jñūhun, hermano jíináhan ró. Nducú ró jeē na cóo fuerza ññi ró jíin fuerza maá Jítoho yō jeē nduú yá jíin ró, chí íyó téyí poder yā.

11 Na cúcutú ró jíin táca fuerza Yaā Dios, návāha cuu cuññi ññññ ró jéē ma stahú jexeén róhó.

12 Chi nájñūhun jeē cájeññáhan yó jíin táca jéē neé. Te nasūu ññayuu cúu jeē cájeññáhan yó jíin, chí sa suhva jíin táca táchí cájica nuu sucún. Te yūcuan cúu jeē cácujeññu, jíin jéē cándiso jñññu, jíin jéē cándacu jñññu nuu ññayuu ññayññi yāha jeē nájñūhun cájica i nuu neé.

13 Núu súcuan te na cúcutú ró jíin ndññi fuerza Yaā Dios, návāha cuu cuññi ññññ ró quíññi jíto ndee jexeén rohó. Te súcuan coo tñhva ró jíin táca ndññi jeē cuññi ññññ ró jíin.

14 Núu súcuan te cuññi ññññ ró jíin jñūhun ndaā jeē cúu nájñūhun jeē yññi ññññ sanchíi chíji ró. Te sácutú ró maá ró jíin jñūhun caca ndaā ró, te suu cúu nájñūhun jeē cúcutú soldado jíin sahma cáa jeē ndihyú de.

15 Te níñi cotñhva ró nacani ró jñūhun ndeyí jñūhun sññ ññ jeē véji nuu Yaā Dios. Te suu cúu nájñūhun jeē chíhi soldado ndijēn jehē de.

16 Te jeē cánuú gá cúu jeē candíje ró jeē iyó yá jíin ró. Te yūcuan cúu nájñūhun jeē tñhva ró maá ró yatā ññ escudo. Chi jíin jñūhun cándíje ró un te cuu ndahva ró ndññi jeē tají maá jexeén, jeē cúu nájñūhun nduva jeē cayú yáññuhún punta.

17 Te cuññi ró jíin jñūhun ññ jnama ya rohó, jeē cúu nájñūhun ññ lélú cáa. Te cuajñññu ró jñūhun jeē yosó núu tútu Yaā Dios jeē ññ jéhe Espíritu Santo nuu ró. Chi yūcuan cúu nájñūhun jéñññu soldado espada de.

18 Te níñi cácnñ tahú ró nuu Yaā Dios sññquí ndññi-ññ, te cahán ndahú ró jíin yá jíin fuerza Espíritu. Núu súcuan te ndito na cóo ññ ró, te ma jécñññi ró

jeē cacán tahu rō jehē tāca ñáyuu maá yá.

<sup>19</sup> Te suni cahān rō jehē rī, návāha nihīn rī jnūhun cahān rī, te coo téyí ni rī nacani cájí rí jnūhun jeē jnáma ya yohó, suu jnūhun jeē ní yisāhí un.

<sup>20</sup> Chi ni tají yá ruhū jeē jíca ri nácani ri jnūhun ya ún, te jeē siquí un cúu jeē íne ri vecāa. Te na cacán tahu rō jeē coo téyí ni rī cahān rī jnūhun ya, nájnūhun cánuú cahān rī.

*Saludo jeē sándhí*

<sup>21</sup> Tíquico cúu ñn hermano jeē maní yō jíin, te cúu de tē squícu vāha chindéé ñájnáhan jíin rí nuū jniñu máa Jítóho yō. Te máa de castūhún ndihi ndese cuahān jniñu ri te ndese íyó rí.

<sup>22</sup> Jeē yúcuan ní tají rí de cuajeē de nuū rō, návāha cachi de ndese cáhīyo ri, te coo ndeyí ni rō jíjnáhan ró sáha de.

<sup>23</sup> Te ñúhun ni rī jeē Tatá yō Yaā Dios jíin Jítóho yō Jesucristo, na sáha ya jeē coo ndeyí coo sñ ni tāca rōhó jéē cácuu hermano, te coo maní gā rō jíin yá, te candíje vāha ró.

<sup>24</sup> Te ñúhun ni rī jeē na sáha ga yā jeē vāha rōhó jíjnáhan ró jéē maní ndije ró jíin Jítóho yō Jesucristo. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU FILIPOS

<sup>1</sup> Máá rí cúu Pablo jín Timoteo, mozo Jesucristo. Te cátee rí carta yáha cuájeē nuū tāca róhó hermano cáyūcú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee rí nuū tée cándiso jníñu cándito róhó, jín nuū tēe cájejníñu mēhñu ró.

<sup>2</sup> Te cáñuhun ni rī jeē Tatá yō Yaā Dios jín Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sī ni rō.

*Jeē jicán tahu Pablo jehē ñáyuu cácandíje*

<sup>3</sup> Tāca jínu jeē núcūhun ni rī rohó jijnáhan ró, te nácuatáhú rí nuū Yaā Dios.

<sup>4</sup> Te náa jicán tahu rī, te níní cúsi ni rī jicán tahu rī jehē rō.

<sup>5</sup> Chi ni chindéé ñájnáhan ró jín rí jeē scáca yó jnúhun vāha ya, nde quivī ní cacandíje ró te nde vijna.

<sup>6</sup> Te jíní ndije rí jeē maá Yaā ní squéjéé jniñu váha jín ró, cocu ya jín ndé quivī ndíji Jesucristo, te sínu ndíhi ya.

<sup>7</sup> Te íyó váha jeē súcuan jéni ni rī siquī tāca róhó, chí yōhyo manī rī jín ró, te inuú-ni ni sáha ya jeē váha yóhó. Te súcuan cúu vēsú íne rí vecāa chí vēsú cuiñi rí nuū tāca tēe cújéñu, cahān rī jehē jnúhun jeē jnáma ya yohó jéé jnúhun ndaā cúu.

<sup>8</sup> Chi Yaā Dios jíní yā ndese yōhyo manī rī jín ró jijnáhan ró, nájnūhun yōhyo manī Jesucristo jín yó.

<sup>9</sup> Te jicán tahu rī jeē na cáa ga jeē cundáhú ni rō jnáhan ró, jín jéé na jécūhun ga ni rō te cundíchi ró jín táca jnúhun ya.

<sup>10</sup> Te súcuan te cuu nacāji ró táca jéé váha condiquīn rō, te caca ndaā rō, te ma cóo ni ñn cuēchi siquī rō quivī ndíji Cristo.

<sup>11</sup> Te súcuan te cayā cuehē jniñu váha jeē sáha Jesucristo jín ró. Te sáha jeē coo yíñúhún ñáyuu jín Yaā Dios te cahān i jeē yóhyo luu cújéñu ya.

*Jnúhun jeē técu nduú yó jín Cristo*

<sup>12</sup> Hermano, cúní rī jeē na cúcáñu ni rō jijnáhan ró ndese ni sáha jnúndóho ni ndoho rí. Chi ni sáha jeē ni jítē núu ga jnúhun jeē jnáma ya yohó.

<sup>13</sup> Chi tācá soldado cáyūcú ini palacio, jín táca gá ñáyuu, cájini i jeē íne rí vecāa jeē siquī Cristo.

<sup>14</sup> Te siquī jeē íne rí vecāa, jeē yúcuan cúu jeē vihyá gā nihín ndeyí ni cuehē tācá hermano cácandíje nuū Jítóho yō. Te cáhīyo téyí gá ni de nácani de jnúhun ya, te tu ndé ndínuu ni de.

<sup>15</sup> Te ndaā chí sava tēe cánacani de jnúhun Cristo siquī jeē cuesún ni de jín jéé nduxí de. Te sava ga de chí sa suhva cánacani de jnúhun ya siquī jeē váha ni de.

<sup>16</sup> Sava de cánacani jnúhun Cristo siquī jeē nducú de jeē váha máa-ni de, te tú ndije de, chí cácu ni de jeē nihín gā rí jnúndóho jeē íne rí vecāa.

<sup>17</sup> Te sava ga de chí cánacani de jnúhun siquī jeē cundáhú ni de ruhū, chí cájini de jeē íne rí vecāa siquī jeē cahān rī jehē jnúhun jeē jnáma ya yohó.

<sup>18</sup> Tú na vé sáha núu súcuan, chí táca-ni modo cascuíté núu de jnúhun Cristo, vēsú núu ndije de chí tuú. Te yāha cúu jeē cúsi ni rī sáha.

Te suni cusī gā ni rī,

<sup>19</sup> chí jíní rī jeē tāca jéé yáha sáha jeē váha ga coo jín rí, chí cájicān tahu rō jehē rī, te Espíritu Jesucristo chindéé ñáhán yá ruhū.

<sup>20</sup> Chí ñúhun ni rī te cúu ndasí ni rī jeē ma sáha rí ni ñn jeē sáha jeē cucanu rí nuū yā. Chí sa suhva coo téyí ni rí cahān rí jnúhun ya, návāha ndujéñu ga Cristo sáha máa rí vijna, nájnūhun je ni sáha rí ñí véji rí, te vēsú na cótecu rí chí vēsú na cúu rī.

<sup>21</sup> Chí jeē técu rí cúu jeē nduú rí jín Cristo, te jeē cúu rí cúu jeē vihyá gā váha coo jín rí.



22 Te núu cotecu gā rī, te cuu scáca ga rī jniñu máá Jítóho yō. Núu súcuan te tu cúcáhu ni rī ndé ñn cúu jeē váha ga, núu jeē cótecu rī chí jéē cúu rī.

23 Chi mēhñú ndindúú jnúhun yáha íne ñhin rī. Chi ñn cúu jeē cuní rī quihñ rī condee rī jiín Cristo, chi yúcuan cúu jeē vihyá gā váha coo jiín rī.

24 Te suni cánuú gá jeē cótecu gā rī jeē siquí rohó jíjnáhan ró.

25 Núu súcuan te íyó ndáā ni rī jeē quéndōo rī condee gā rī jiín ró, návāha stéén gā rī nuū rō ndese caca váha ga rō jiín yá, te cusñ gā ni rō jiín jnúhun cácandíje ró.

26 Núu súcuan te condee tucu rī jiín ró, te cusñ teyí ni rō jeē siquí ruhū, sáha máá Cristo Jesús.

27 Te máá ñn-ni jeē condihvī ni rō caca ndaā rō, nájnūhun cánuú caca ró síquī jeē cácandíje ró jnúhun Cristo. Yūcuán na te vēsú na jínú rī coto jnáhan yó, chí condee jicá rí, te nihñ rī jnúhun ro jéē cáhñ ñhin ró jiín jnúhun ya, te cáhiyo ñnuú ni rō, te ñnuú-ni cánducú ndeyí ró síquī jnúhun jeē cácandíje yó jéē jnáma ya yohó.

28 Te ma yūhú cuiti rō sáha jeē cájito uhū rohó. Chi jeē jító uhū i ríhó, yúcuan stéén jeē jnahnú ndetū i, te suni stéén jeē cácu ánuá máá ró jijnáhan ró sáha Yaā Dios.

29 Chi ni jēhe Cristo uū jeē váha nuū rō: nasūu máá ñn-ni jeē candíje ró yá, chí suni jeē na ndóho ró jéē siquí yā.

30 Chi máá rí jiín ríhó jijnáhan ró, nájnūhun jeē cájejnáhan yó jiín táca jéē neé. Chi ni cajito ró jéē súcuan ni sáha máá rí, te cánihñ rō jnúhun jeē sáha ga rī nde vijna.

*Jeē ni sáha suchí yá maá yá te ni ndujéhu ya*

## 2

1 Núu súcuan te sáha Cristo jeē cáhiyo ndeyí ni rō, jiín jéē cúsn ni rō síquī jeē váha ni yā jiín ró. Te ndéé Espíritu yā jiín ró, te manī rō jiín jnáhan ró, te cájito ndáhú ró i.

2 Núu súcuan te na cócu ga rō jiín táca jnúhun yáha, návāha cusñ teyí ni rī. Te ñnuú-ni na cóo ni rō, te coyūcu manī rō, te ñnuú na cóo ánuá rō, te ñnuú cani ni rō.

3 Te ni ñn jniñu ma sáha ró jéē nducú ró jeē váha máá-ni ró, ni jeē sateyí ró maá ró. Chi sa suhva sáha suchí ró maá ró, te sáha ró cuenta jeē váha ga jnáhan ró vēsú maá ró.

4 Te ma cóndihvī ni rō maá-ni jniñu jeē quéndōo váha máá-ni ró, chí suni na cóndihvī ni rō jniñu jeē quéndōo váha jnáhan ró.

5 Te na cáni ni rō jijnáhan ró nájnūhun ni jeni ni Cristo Jesús.

6 Chi máá yá kujéhu ñnuú yá jiín Yaā Dios, te vēsú súcuan te tu ní jeni ni yā jeē kujéhu ñnuú yá jiín Yaā Dios.

7 Chi ni siaá yā jeē kujéhu ya, te ni nduu ya nájnūhun índāa mozo, te ni cacu ya ni nduu ya tēe.

8 Te ná ni nduu ñnuú yá jiín tēe, te ni sáha suchí yá maá yá. Te ni jendije ya nde jiín jnúhun jeē cúu yā, te nde jiín jnúhun canu jeē cúu yā jicá cruz.

9 Jeē yúcuan ní sáha Yaā Dios jeē yóhyo ni ndujéhu luu ya, te síhví yá kujéhu ndasí gá nuū táca gá síhví.

10 Te táca jéē cáhñ andiví jiín ñayiví jiín chíji ñayiví, núu na cuní i síhví Jesús te jecuiñ yití i.

11 Te cahān ndaā ndivii i jeē Jesu-cristo cúu máá Jítóho. Te súcuan stéén i jeē yóhyo kujéhu máá Tátá yā Yaā Dios.

*Ñayuu cácandíje cúu i nájnūhun quimi jeē ndíndéé*

12 Núu súcuan hermano jijnáhan ró, nájnūhun níni ní cajendije ró jnúhun ni cahān rī ná ni condee rī jiín ró, suni súcuan víhyá gā cuandije ró vijna jeē ndeé jicá rí jiín ró. Te condihvī ni rō jeē caca ndaā rō jiín jnúhun ní jnama ya rohó, te caca yíñuhún ró conso íyo ró núu yā.

13 Chi Yaā Dios jícu ya jiín ró jeē cúu ni rō sáha ró jniñu váha, te chíndéé ñáhán yá rohó jéē squícu ró jniñu nújnahan ni yā.

14 Ndihi jeē sāha ró, ma cahán sōo ró, ni ma tejnáhan ró,

15 návāha cuu ró séhe Yaā Dios jeē tú na cuēchi coo siquī rō te coo ndaā rō. Te caca ndoo ró méhñu ñáyuu nihni ni jeē casáha néé. Chi méhñu ñáyuu un stéén rō jniñu váha ró, te súcuan cácuu ró nájnūhun quimi jeē ndíndēe núu néé ñayíví.

16 Te stéén rō jnūhun ya nuū i jeē cótecu i ní cáni sāha. Te súcuan te cusī teyí ni rī quiví ndíji Cristo, chi cuni rī jeē tu ní jíca cāhá rí, ni tu ní sájniñu cāhá rí.

17 Te vésú na cúu rī jeē socō rī maá rí nuū yā jeē siquí rohó, te yūcuan cúu jeē nducú rí scandíje ga rī rohó, návāha socō rō maá ró sāha ró jniñu váha jeē cácondíje ró yá. Jeē yūcuan cúsi ni rī, te cúní rī jeē suni cusī ni rō jíin rí jijnáhan ró.

18 Núu súcuan te na cúsi ni maá ró jíin rí, te inuú na cúsi ni yō jijnáhan yó.

#### *Jnūhun Timoteo jíin Epafrodito*

19 Te ñūhun ni rī jeē cuáha máa Jítoho yō Jesús jnūhun jeē tají yáchī rī Timoteo jeē de nuū rō, návāha ndusi ni rī núu na níhín rī jnūhun ndese cáhīyo ró.

20 Chi tuá na inga tēe íyo yáha jé inuú jéni ni jíin rí, nájnūhun máa de jeē ndihví ndije ni de jehē rō.

21 Chi taca de cánducú de jeē cúu máa de, te nasūu jé cuni Cristo Jesús.

22 Te je cájini rō jeē tēe vāha cúu Timoteo. Chi nájnūhun séhe jíin tátá, súcuan ni jejniñu de jeē nácani de jnūhun vāha ya jíin rí.

23 Núu súcuan te ñūhun ni rī tají rí de jeē de nuū rō, te núu je ni cucáhu ni rī ndese coo jíin rí.

24 Te jéni ndije ni rī jeē cuāha Jítoho yō jnūhun jeē suni máa rí jinū yachī rī nuū rō jijnáhan ró.

25 Te suni jéni ni rī jeē cánuú tají rí hermano yō Epafrodito jeē de, chi tēe sájniñu jíin rí siquí jnūhun ya cúu de te chindéé ñájnáhan de jíin rí. Chi máa ró ni catají ró de jeē cuajniñu de nuū rī taca jéé cúmanī nuū rī.

26 Chi yōhyo cúu ni de ndacoto tucu de nuū rō jijnáhan ró. Te ni cucuíhyá ndasí ni de, chi ni canihín rō jnūhun jeē ní cocuhū de.

27 Chi jendaá ni cocuhū de, te je yajni cuu de núu. Te Yaā Dios ni cundáhú ni yā de, te nasūu máñuhún-ni de, chi suni ruhū, návāha tú caa ga cucuíhyá ni rī jehē de núu.

28 Jeē yūcuan cúu jeē ndihví gā ni rī tají rí de nuū rō, návāha ndusi ni rō jeē ndacoto tucu ró núu de. Te suni ruhū ma cucuíhyá ndasí gā ni rī.

29 Núu súcuan te na cúsi ni rō jeē nájinū de nuū rō, chi cúu de hermano yō jeē candíje de maá Jítoho yō. Te coo yíñuhún ró jíin taca tēe índāa nájnūhun cáa de.

30 Chi jeē siquí jniñu Cristo cúu jeē jé yajni cuu de núu. Chi ni chundeyí ni de jeē cúu de siquí jeē chindéé ñáhán de ruhū jíin jniñu jeē tu ní íyo modo sāha máa ró jijnáhan ró.

#### *Jnūhun jeē cáca ndaā vāha yó*

### 3

1 Te vijna, hermano jijnáhan ró, na cúsi ni rō jíin máa Jítoho yō. Ruhū chi tu jnánini ni rī jeē tēe tucu ri jnūhun yáha núu rō, chi cuajniñu jeē quéndōo vāha ga rō.

2 Condito ró máa ró nuū tēe casáha jniñu néé, jeē cándāa ná cándāa ina. Chi cánducú de stújí de róhó jé casáha de circuncidar, te tu casáha de jniñu ndaā.

3 Te máa yó cácuu ñayuu ni cuu circuncidar ndije, chi cáchiñuhún yó nuū Yaā Dios nde jíin ini jíin ánuá yō, te cácusī ni yō jeē yíhí yó ndaha Cristo Jesús, te tu tēnuū yō jeē quéndōo ndaā yō jíin jniñu jeē sāha máa-ni yó.

4 Núu jeē súcuan cúu te ruhū chi suni cuu tenuū rī jniñu jeē sāha máa-ni ri nuú. Chi núu ndé tēe jéni ni de jeē cuu tenuū de máa de, te ruhū chí víhyá gā cuu tenuū rī maá rí.

5 Chi ni casáha circuncidar ruhū nuū uná quiví ná ni cacu ri. Te yucūn Israel cúu ri, te suni jnáhan yucūn Benjamín, te in hebreo séhe hebreo

cúu ri. Te suni ni cuu ri tēe grupo fariseo jeē ni squícu ri tāca ley jnáhan ñuu rī hebreo.

<sup>6</sup> Te ni jito xeēn rī ñayuu cácanđije, chi yōhyo ni condihvī ni rī jeē ma sáma i modo ley jenahán. Te ni ñn tu ní cúu cahán jeē tu squícu ri ley un, chi ni squícu vāha ri.

<sup>7</sup> Te tāca jēē ní tenuū rī ún, chi sáha ri cuenta jeē tu ndé níhín jniñu cuiṭi, chi vijna te ni candíje ri Cristo.

<sup>8</sup> Te suni chíhi ri cuenta jeē vāha ga na náā ndihī jeē ní tenuū rī ún, chi vāha ndasí gá cúu jeē ni quívi ri ndaha máá Jítoho rī Cristo Jesús. Te jeē siquí maá yá te ni siaá rī ndihī ún, te sáha ri cuenta jeē nájnūhun yācá-ni cúu. Chi ni quívi ri ndaha Cristo,

<sup>9</sup> te ndúú yá jíin rí. Te tuá nducú rí quendōo ndaā rī jeē jíin ley un, chi sa suhva Yaā Dios ni ndahva yā cuēchi ri jeē ní candíje ri Cristo. Chi súcuan squéndōo ndaā yā ñayuu cácanđije.

<sup>10</sup> Te vijna te cúní rī jecūhun vāha ni rī ndese Yaā cúu ya. Te cúní rī jeē poder jeē ní natecu yā cone jíin rí. Te cúní rī ndoho ri jíin yá, te nde jinū rī ndoho ri nájnūhun ni ndoho máá yá jeē ni jíhī yā.

<sup>11</sup> Chi yōhyo ñūhun ni rī natecu rī nájnūhun ni natecu yā.

#### *Jeē nducú ndéyí Pablo sínu de carrera de*

<sup>12</sup> Te ná tu nihīn rī ndihī jeē ni cáhán rī ún, ni ná tu ije ri jíin. Te nducú ndéyí rí siquī ún, chí ñūhun ni rī jeē nihín rī tācá un, chí jeē yúcuan cúu jeē ni nihīn Cristo Jesús ruhū xīhna gā.

<sup>13</sup> Hermano jijnáhan ró, tu sáha ri cuenta jeē jé ni nihīn rī ndihī ún. Te íyó ñn jeē sáha ri, cúu jeē squéndōo rī tāca jēē ní cuu ichi yátá, te nducú ndéyí rí nihīn rī tāca jēē iyó ichi núú.

<sup>14</sup> Chi cúu un nájnūhun jeē jínu ri ñn carrera cuahán rī nde jinū rī andiví, te nihīn rī premio jeē cuáha Yaā Dios. Chi ni cana ya yohó jēē quihín yō nuū yā andiví siquī jeē yáhi yó ndaha Cristo Jesús.

<sup>15</sup> Te tāca yó jeē jé ni ije vāha yó jíin jnúhun cándíje yó, súcuan na cáni ni yō.

Te núu ndé ñn ró sñn jéni ni rō, te Yaā Dios suni stéén yā nuū rō jeē násūu súcuan cúu.

<sup>16</sup> Te jíni ñúhún cani ni yō te caca yó modo jeē quijnáhan jíin jēē jé ni nihīn yō.

<sup>17</sup> Hermano, na ndácu ró rúhū jijnáhan ró. Te condēhe vāha ró ndese cájica ñayuu ndaā, chí cájica i nájnūhun ni castéén rī nuū rō.

<sup>18</sup> Te je ni cuu tijni jínu ni cahán rī jíin ró, te nde ndahyú rī cahán tucu ri vijna, jeē iyó cuéhē ñayuu cájica i ñn modo jeē steén jeē jíto uhū i jnúhun jeē ni jíhī Cristo jicā cruz.

<sup>19</sup> Te ñn quivī te jnahnū ndetū ñayuu ún. Chi máni jeē cáji vāha i cúu jeē cáchiñúhún i. Te sátéyí i máá i jíin jniñu néé jeē jéhe jnúhun canu. Te máni máá jēē iyó ini ñayiví cúu jeē ndihvī ni i.

<sup>20</sup> Te máá yó chí ñayuu coyūcú andiví cúu yó, te cándetu yó jēē nde yūcuán ndiji Jítoho yō Jesucristo, Yaā jnáma yóhó.

<sup>21</sup> Te máá yá nasama ya yiquí cúñu ndahú yó, návāha nduu yó nájnūhun cáa máá yá jeē lúu cújéñnu ya. Te súcuan sáha ya jíin poder yā jeē cújéñnu ya siquī ndihī-ni.

#### *Níní na cúsiñ ni yō jíin Jítoho yō*

## 4

<sup>1</sup> Núu súcuan hermano jijnáhan ró, cuiñi nihin ró jíin jnúhun máá Jítoho yō. Chi yōhyo manī rī jíin ró, te cúní rī jeē coto jnáhan yó, te cúsiñ ni rī jíin ró, te nájnūhun premio rī cácuu ró.

<sup>2</sup> Te cáhán ndahú rí jíin róhó Evidia jíin Síntique jeē inuú na cóo ni rō, chí cácuu ró hermana jeē cácanđije ró máá Jítoho yō.

<sup>3</sup> Te suni cáhán ndahú rí jíin róhó, téé jeē ní chindéé ñájnáhan vāha jíin rí, jeē na chindéé ñáhán ró hermana un, chí ni casájniñu nihin ña jíin rí siquī jnúhun jeē jnáma ya yohó. Te suni súcuan ni sáha Clemente jíin sava ga ñayuu ni sájniñu jíin rí. Te ni jecosō sihví i nuū libro jeē yosó síhví ñayuu cotecu ní cáni.

<sup>4</sup> Te níní na cúsí ni rō jijnáhan ró jín máá Jítóho yō. Te inga jínu cáhán rī jeē na cúsí ni rō.

<sup>5</sup> Sáha vāha ró jín táca ñáyuu, návāha cuni i jeē súcuan vāha ni rō. Chi máá Jítóho yō, yajni-ni cúu ya jín ró.

<sup>6</sup> Ma nácani ndasí ni rō siquī ni ñn. Chi sa cahān rō jín Yaā Dios siquī táca jéē nácani ni rō. Chi cacān tahú rō, te cahān ndahú ró, te suni nacuatáhú ró nuū yā.

<sup>7</sup> Yūcuán na te sáha Yaā Dios jeē cóo ndeyí coo sī ndasí ni rō, te súcuan coo jín ró nde cūhva jeē ma jécūhun ni rō ndese cúu jeē sáha ya ún. Te condito vāha ya anuá rō jín jéē níjnūní rō, coo cuehē jnūhun ndeyí jnūhun sī ni jín ró, siquī jeē yíhi ró ndaha Cristo Jesús.

#### *Jeē na cáni ni yō siquī táca jéē vāha*

<sup>8</sup> Te ñn na jnūhun íyó, hermano jijnáhan ró. Na cáni ni rō siquī táca jéē iyó ndáa, jín jéē sáha yíñúhún, jín táca jniñu sáha vāha, jín jniñu íyó ndoo, jín táca jéē iyó mání ni, jín jéē lúu sáha. Te mání na núcūhun ni rō táca jéē vāha jeē sáha jeē nacuatáhú ró nuū yā.

<sup>9</sup> Táca jéē ni stéén rī nuū rō, jeē ní cacutūhva ró núu rī, jín jéē ní cajini ró ní cahān rī, jín jéē ní cajito ró ni sáha rī, táca yúcuan suni na sáha máá ró. Yūcuán na te máá Yaā jeē jéhe jnūhun ndeyí sī ni, coo ya jín ró.

#### *Jeē ní casocō ñayuu Filipos nuū Pablo*

<sup>10</sup> Te yóhyo cúsí ni rī sáha máá Jítóho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jéē ní naa ni rō sáha ró súcuan, chi siquī jeē tu ní íyo modo.

<sup>11</sup> Te nasūu jéē cahān rī siquī jeē ndóho ndáhú rí, chi je ni cutūhva rī cusí ni rī jín jéē névāha rī.

<sup>12</sup> Jíní rī cotecu ndahú rí, te jíní rī cotecu cucá rí. Chi ni cāan rī jín táca-ni, núu jeē ndutú chíji rī chí jéē ndóho rī sōco, núu jeē cónevāha cuehē rī chí jéē cúmaní nuū rī.

<sup>13</sup> Ndihi-ni cúu sáha rī, chi máá Cristo jéhe ya fuerza ini rī.

<sup>14</sup> Te vésú súcuan te vāha ni casáha ró jéē ní chindéé ñáhán ró ruhū jín jnúndóho jeē ndóho rī.

<sup>15</sup> Te róhó ñáyuu ñuu Filipos, je cájini rō ndese ni cuu. Chi nde quiví ní quejéé rí nácani rī jnūhun jeē jnáma ya yohó, ná ni quenda rī Macedonia vēji rī, te ni casocō rō xūhun núu rī siquī jeē ní canihīn rō jnūhun ya ni nacani rī. Te ni ñn grupo ñayuu cácanđije tu ní sáha súcuan, chi máá-ni róhó jijnáhan ró.

<sup>16</sup> Te ná íne rī ñuu Tesalónica, te ni catají ró jecu jeē jíní ñúhún rí, ni jinū ñn uū jínu.

<sup>17</sup> Te nasūu jéē nducú rí jeē cuáha ró núu rī, chi sa nducú rí jeē na cáyá gā jniñu vāha ró, návāha cayā tahū rō nuū Yaā Dios.

<sup>18</sup> Chi jeni nihīn rī ndihí jeē jíní ñúhún rí, te ndóo ga. Te íyó cuehē nuū rī, chi ni nihīn rī jeē ní catají ró vēji jín Epafródito. Te jeē ní catají ró cúu nájnūhun ñn ofrenda jeē asín jeén, ni casocō rō nuū Yaā Dios, te cúsí ni yā jín.

<sup>19</sup> Te Yaā Dios chi cuāha ya nuū rō táca jéē cúmaní nuū rō, chi cucá ndasí yá jín táca jéē vāha jeē lúu íyó núu Cristo Jesús.

<sup>20</sup> Te na cáhán yō jeē yóhyo luu cújéhnu Tátá yō Yaā Dios ní cáni. Amén.

#### *Saludo jeē sándihí*

<sup>21</sup> Cachi rō nuū táca ñáyuu maá yá jeē sándeyí ni i, áchí rí, chi cácanđije i Jesucristo. Te hermano yō cáyūcu jín rí yáha, cácahān de jeē sándeyí ni rō jijnáhan ró.

<sup>22</sup> Te táca ñáyuu maá yá jeē cáhīyo yáha, suni cácahān i jeē sándeyí ni rō. Te ñayuu cáyūcú vehe rey cújéhnu ñuu Roma yáha, máá i cácahān gā súcuan.

<sup>23</sup> Te ñúhún ni rī jeē maá Jítóho yō Jesucristo, na sáha ga yā jeē vāha róhó jijnáhan ró. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU COLOSAS

1 Máá rí cúu Pablo, apóstol Jesu-cristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo

2 cátee rí carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cávandíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē váha rōhó, te sáha ya jeē coo ndeyí coo sī ni rō.

*Jeē jicān tahu Pablo jehē ñáyuu cávandíje*

3 Te jeē cájicān tahu rī nuū Yaā Dios, Yaā cúu Tatá maá Jítóho yō Jesucristo, te níni cánacuatáhu rí nuū yā jeē siquí rohó jíjnáhan ró.

4 Chi ni cajini jñuhun ri ndese vāha cávandíje ró Cristo Jesús, jíin ndese cávandáhu ni rō táca ñáyuu maá yá.

5 Chi cáñuhun ni rō nihīn rō jeē ñuhun vāha nde andiví cuu ró. Chi ná ni cajini ró jñuhun ndaā jeē jnama ya rohó, te ni caquejéé ró ñuhun ni rō.

6 Te jñuhun un jéē ní canacani nuū rō, chi ndúcuehē cuahān te níhín jñíñu ní cáhnu ñayiví. Te suni súcuan ni sáha jíin rōhó jíjnáhan ró ndé quiví ní cajini ró te ni cajecūhun ni rō jeē ndaá cúu jeē yóhoy vāha ni Yaā Dios jíin ró.

7 Te jñuhun un cúu jeē ni stéen Epafras nuū rō, tēe sájñíñu jíin rí jeē maní rī jíin. Chi cúu de tēe jéjñíñu squícu vāha nuū Cristo jeē ndíto de rōhó.

8 Te máá de ni castūhun núu rī siquí rohó, ndese cávandáhu ni rō jñáhan ró sáha máá yá.

9 Jeē yúcuan suni tu cájecuñí rī jeē cájicān tahu rī jehē rō, nde quiví ni níhín rī jñuhun ún te nde vijna. Te cájicān rī nuū yā jeē na jécūhun vāha ni rō te coo ndíchí ró jíin jñuhun ya, sáha máá Espíritu, návāha cuni rō ndíhi ndese nújnahan ni maá yá.

10 Te cájicān rī jeē caca ndaā rō nájnūhun cánuú caca ró jéē cácuu ró ñáyuu maá Jítóho yō. Te súcuan te sáha ró ndíhi jeē nújnahan ni yā, te nihīn jñíñu ró jíin táca jñíñu váha, te jecūhun ga ni rō ndese Yaā cúu Yaā Dios.

11 Te cájicān rī jeē cuáha ya fuerza ini rō, nájnūhun íyó fuerza maá yá jeē cujéñnu luu ya. Te súcuan te cuu cuandeyí ni rō jíin táca-ni jñūndóho, te cusī teyí ni rō.

12 Te cuu nacuatáhu ró nuū Tatá yō, chi máá yá ni chihi fuerza yohó jéē ñn cáhnu-ni jíin táca ñáyuu maá yá nihīn yō tahū yō. Chi cájica yó jíin luz yā jeē yíhi yó ndaha ya.

13 Chi ni jnama ya yohó jéē ni yíhi yó ndaha máá jéē jñí poder nuū néē, te ni squíví ya yohó ndaha Séhe ya jeē maní yā jíin, ndácu ya jñíñu nuū yō.

14 Chi Séhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuéchi yó.

*Jeē ni sáha Cristo jeē ní ndiví yó núu jñuhun maní Yaā Dios jíin yó*

15 Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je íyó yá nde ná tu jecōo táca jéē iyó.

16 Chi jíin Séhe ya ni sáha Yaā Dios ndíhi jeē ni jécōo, ndíhi jeē iyó andiví jíin jéē iyó ñayiví, jeē jini yō nuū jíin jéē tu jíin yō nuū. Te suni ni sáha ya táca ndajéhé jeē cándacu jñíñu, jíin jéē cándiso jñíñu, jíin jéē cácujeñnu, jíin jéē cájñí poder. Jíin Cristo ni sáha Yaā Dios jeē ni jécōo ndíhi, te jeē cúu Cristo cúu.

17 Te je íyó Cristo nde ná tu coo ndíhi jeē iyó. Te ndaha máá yá yíhi vāha ndíhi-ni.

18 Te máá yá cújéñnu nuū ñáyuu cávandíje, nájnūhun cújéñnu xinī nuū yiqui cúñu, chi nájnūhun yiqui cúñu yā cácuu i, cúu jeē ñn na cúu i jíin yá. Te máá yá sáha jeē cotecu i ní cáni, te xīhna gā maá yá ni natecu mēhñu ndíyi, návāha cujéñnu ya nuū táca-ni.

19 Chi ni cusī ni Yaā Dios jeē ndíhi ndese cúu máá yá, suni súcuan cúu Cristo.

20 Te siquī jeē ni jīhī Cristo, te ni cusī ni Yaā Dios sáha ya jeē ndívicoo tácá-ni nuū jnúhun manī yā jín, taca jéē yúcu ñayīvi jín jéē yúcu andiví. Chi jín jéē ni jīhī Cristo jicā cruz, te ni sáha Yaā Dios jeē ndívicoo tácá-ni nuū jnúhun manī yā jín.

21 Te máá ró jijnáhan ró, chi sín siquī ni cahīn ró ndé saá, te ni cajito uhū rō yā ini anuá rō, chi máni jniñu néé ní casáha ró. Te vijna chi je ni sáha Yaā Dios jeē ní ndívicoo ró núū jnúhun manī yā jín ró.

22 Súcuan ni sáha ya siquī jeē ni sócō Cristo maá yá ni jīhī yā, návāha coo ndoo coo ī rō cuiñi ró núū yā, te ma cóo jnéhén ró, te tú na cuēchi coo siquī rō.

23 Te súcuan sáha ya núu cuiñi nīhin ró jéē candíje vāha ró, te núu quendōo nīhin ró jín jnúhun vāha jeē cáñuhun ni rō jeē jnáma ya rohó, te ma siaá cuiñi rō. Chi jnúhun un ní cajini ró, te ni jite núu ní cáhnu ñayīvi. Te ruhū Pablo suni jéjníñu ri jeē nácani ri jnúhun ún.

### *Jeē jejniñu Pablo siquī ñáyuu cá candíje*

24 Te vijna te cúsi ni rī jeē ndóho ri jehē rō jijnáhan ró. Chi jín yiqui cúñu rī ndóho ri jeē cúmanī gā ndoho ri jín Cristo jehē ñáyuu cá candíje, suu ñayuu cúu nájñuhun yiqui cúñu yā.

25 Te cúu ri tēe jéjníñu siquī ñáyuu cá candíje, chi súcuan ni tejníñu Yaā Dios ruhū, návāha nacani ndíhi ri jnúhun ya nuū rō te quendōo vāha ró.

26 Te nácani ri jnúhun ya jeē ní yisāhí, jeē tu ní cájini ñayuu nde jehán ndasí te nde ní cáni vēji. Te vijna te je ni steén cají yá jnúhun un núū ñáyuu maá yá.

27 Chi ni cusī ni yā jeē steén yā nuū i ndese cúcúca ndasí i jín ndíhi jeē ndíso jnúhun sāhi yáha jéē lúu cújéhnu, te cuiñi núu quihīn nuū taca nación jeē tu jín. Te jnúhun sāhi yáha cúu jeē ndeé Cristo ini anuá rō, ndúu yá jín ró, te jeē yúcuan cáñuhun ni rō taca jéē lúu jéhnu jeē coo.

28 Te jnúhun Cristo un cúu jeē cánacani ri, te cástíhví ni rī taca ñáyuu, te cástéén rī jnúhun ya návāha jecūhun vāha ni i. Te súcuan te ije vāha ni ndiví i jeē yíhi i ndaha Cristo Jesús.

29 Te siquī yúcuan cúu jeē sájñiñu ri, chi ndíhví ni rī nácani ri jnúhun jín taca fuerza Cristo jeē chindéé ñájñahan ya jín rí.

## 2

1 Chi cúni rī jeē na jécūhun ni rō ndese yōhyo ndúcú ndeyí rí jehē rō, jín jehē ñayuu ñuu Laodicea, jín ndé taca ñáyuu jeē tu ní cájini cuiñi nuū rī.

2 Chi cúni rī jeē coo ndeyí ni anuá i, te inuú-ni coyūcu máni i, te jecūhun ndíhi ni i ndese yōhyo cúca i jín jnúhun jeē candíje nīhin i. Chi cuni i ndese Yaā cúu Cristo, chi máá yá cúu jnúhun Yaā Dios jeē ni yisāhí un.

3 Te ini Cristo yisāhí taca jnúhun jeē cucúca ró jín, suu jnúhun ndíchí jín jnúhun jécūhun ni.

4 Te jnúhun yáha cáhán rī jín ró jijnáhan ró, návāha ma stahú ni ñn i rohó jín taca jnúhun stahú jéē lúu cáhán.

5 Chi vēsú ndeé jícá rí jín ró, te ñuhun ni rī rohó, te cúsi ni rī jeē jiní rī ndese cájica ndaā rō te cá candíje nīhin ró Cristo.

6 Núu súcuan te nájñuhun ni cajetáhú ró jeē Jítoho rō cúu Jesucristo, suni súcuan na cáca ndaā rō jín yá.

7 Te na jñí vāha jnúhun ya ini rō, te na ije vāha ró jín jnúhun cá candíje ró yá, nájñuhun je ni cajini rō. Te níni nacuatáhú ró nuū Yaā Dios.

### *Jeē ndújeé yó sáha Cristo*

8 Coto má cuāha ró jnúhun jeē stahú ni ñn ñayuu rohó jín jnúhun ndíchí jéē tu jéjníñu, jín jnúhun ndúxí stahú. Chi tu cá candíje i jnúhun Cristo, chi sa cá candíje i taca jéē tajnúni ñayuu, modo jeē castéén ini ñayīvi yáha.

9 Chi ndíhi ndese cúu máá Yaā Dios, suni súcuan cúu Cristo.

10 Te ndíhi ndese cúu Cristo, suni súcuan cúu ró jijnáhan ró, chi cáyhi ró ndaha ya. Te máá yá cújéhnu nuū taca jéē cujéhnu jín jéē ndíso jníñu andiví.

11 Te siquī jeē cáyihī ró ndaha ya, suu cúu jeē nájnūhun ni cuu ró circuncidar. Te jeē súcuan ni sáha ya circuncidar rohó, chi nasūú ñn jnuni jeē yíhi yiqui cúñu rō cúu, chi sa suhva jeē ní sándoo ya tāca cuēchi ni casáha ró jíin modo neé máá ró. Chi súcuan cúu jeē sáha Cristo circuncidar rohó.

12 Te jeē ní cajendute ró cúu nájnūhun jeē ní quindūji ró jíin Cristo, te suni nájnūhun jeē ní natecu rō jíin yá. Chi ní cacandíje ró jéē jíin poder Yaā Dios ni nastécu yā Cristo mēhñu ndíyí.

13 Chi ni cacuu ró nájnūhun ndíyí nuū yā siquī cuēchi ró, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cáni jíin Cristo, chi ni ine cáhnu ni yā nuū tāca cuēchi ró.

14 Te nájnūhun jeē iyó ñn acta jeē jicán cuēchi siquī yō jeē ni stíví yó ley yā. Te ni ndahva yā acta un, chi ni chunaa Cristo cuēchi yó jéē ni jíihī yā jicā cruz.

15 Chi ná ni jihī yā jicā cruz, te ni quende yā ndíhi poder tāca jéneé jéē cácujuhnu jíin jéē cájni poder. Te ni quende yā jeē tuá cujéhu, chi ni sáha ya jeē cuángoo nuū quíndihyū, te súcuan ni steén yā poder yā.

*Na ndúcú yó jeē quéndōo vāha yó ndé andíví*

16 Núu súcuan te ma cuatáhú ró núu cácahān ñayuu cuēchi siquī rō, siquī ñn jeē yéji rō chí siquī ñn jeē jíhi ró, chí jéē tu nées ñ rō quiví víco jíin quíví núcósō yoō jíin quíví ndétátú.

17 Chi tāca ley siquī un ní jejniñu máá ndé ná tu quiji Cristo. Te vijna te ni quiji ya te tuá jíini ñúhún táca ún.

18 Ma cuáha ro jnúhun jeē cási ni ñn ñayuu jeē nihín rō tahū rō. Chi cáchiñúhún i tāca ndajéhé yā, te cácahān i jeē súcuan casáha suchí i máá i. Te cácahān i jeē cájini ndije i jeē iyó ndáa jnúhun cánacani i, te tuú. Te súcuan casáha téyí sáa-ni i máá i, chí cájeni néé ni i.

19 Te tu cáhiin i jíin Cristo, Yaā cujéhu nuū ñayuu cacuu nájnūhun

yiqui cúñu yā chí ñn na cúu i jíin yá. Chí máá yá scuéhnu ya i jíin jnúhun ya, te nduu inuú ni tācá i jeē cáhije i cuahān i, nájnūhun ni jeni ni Yaā Dios.

20 Núu súcuan te nájnūhun jeē je ni cajihī rō jíin Cristo, cúu jeē ní casiáá rō tāca jéē tajnúni jeē castéén ini ñayíví. Núu súcuan ¿te naun casáha ga rō nájnūhun casáha ñayuu ñayíví jéē jéndije ró táca jéē tajnúni i?

21 Chi cácahān i: Ma quehé ró ma cáji rō jeē yáha chí jéē yúcuan, ni ma jní ró, áchí i.

22 Te máni jeē tajnúni ñayuu jíin costumbre maá i cúu te tu níhin jníñu jeē quéndōo ndaā ñayuu.

23 Te ndaā chí cájeni ni i jeē jnúhun ndíchí cúu ún, chí sáha jíin i jeē chiñúhún níhin i, jíin jéē sáha suchí i máá i, jíin jéē stóho i yiqui cúñu i. Te tu níhin jníñu cuítí jeē casi tācá jniñu néé jéē cuní i sáha i.

### 3

1 Núu súcuan te nájnūhun ni natecu Cristo, suni súcuan ni canatecu rō jeē ní cuu ró nájnūhun ndíyí ni sáha cuēchi ró. Te na cóndihví ni rō siquī tāca jéē iyó andíví núu ndeé Cristo lado váha Yaā Dios nuū cujéhu ya.

2 Te na cáni ni rō siquī tāca jéē iyó andíví, nasūu siquī jeē iyó ini ñayíví.

3 Chi nájnūhun je ni cajihī rō jíin Cristo, te vijna chí nájnūhun cátecu rō jíin yá andíví, chí cáyihī ró ini ndaha Yaā Dios.

4 Te quiví ndíji Cristo, Yaā sáha jeē cótecu yō ní cáni, yūcuán na te suni quendacoo ndijin maá ró jíin yá, te cujéhu luu ró jíin yá.

*Ñayuu jíca jíin modo cuní maá, jíin ñayuu ní ndujéé*

5 Núu súcuan te casi rō tāca modo cuní maá ró jeē cáhiyo ró ini ñayíví yáha. Chi ma cáca jnéni ró, ma sáha ró jniñu jnéhén, ma ndíyo ni rō sáha ró táca jniñu néé, ma cutóó ró, ma ndíyo ni rō ndajníñu. Chí tācá ndajníñu jeē ndíyo ni yō cúu nájnūhun ídolo yō jeē chiñúhún yó.

6 Chi siquī tācá jniñu yáha cúu jeē cuāha Yaā Dios castigo xeēn nuū ñáyuu nīhni ni nuū yā.

7 Te suni jíin jniñu yáha ní cajica ró ndé saá, ná ni casáha ró súcuan.

8 Te vijna te na stóo ró táca jéē yáha: jeē quití ni, jeē xeēn ni, jeē sáha jniñu néé, jeē cahán ndevāha nuū jnáhan, jíin jéē cahán tāca jnúhun tú vāha.

9 Ma stahú ró jnáhan ró, chi yūcuan cúu modo maá ró jeē ní cajica ró jíin ndé saá, te je ni castóo ró.

10 Te ni canduu ró ñáyuu jeé, cuandacu ró maá Yaā ni sáha róhó, te cuajecūhun vāha ni rō ndese Yaā cúu ya.

11 Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájniñu cuenta maá, chi inuú cúu ndihí i nuū yā. Chi Cristo cúu Jitoho ndihí i, te ndéé yá ini anuá ndihí i, ndúú yá jíin i.

12 Chi ni nacāji Yaā Dios rohó jíjnáhan ró jeē cúu ró ñáyuu maá yá jeē maní yā jíin. Núu súcuan te níiní cundáhú ni rō jnáhan ró, te coo vāha ni rō jíin jnáhan ró. Te coo suchí ni rō, te coo vítá ni rō, te coo paciencia ni rō.

13 Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha maá ró.

14 Te jeē cánuú gá cúu jeē cundáhú ndasí ni rō jnáhan ró. Chi yūcuan sáha jeē ndúu inuú ni rō te íje vāha ni rō jíin jniñu vāha.

15 Te jnūhun coyūcu mánī na cúnuú ini anuá ró sáha Yaā Dios. Chi ni cana ya rohó jéē nduu ró in na ñayuu jéē cóyūcu mánī rō. Te níiní na nácuatáhú ró núu yā.

16 Te scuáha vāha ró jnúhun Cristo návāha cunuú jnúhun ún ini anuá ró. Te stéén rō nuū jnáhan ró, te stíhví ni rō i jíin táca jnúhun ndíchí yá. Te jíin salmo jíin himno, yaa ií jeē cahán jnūhun ya, na cáta luu ró

jeē nácuatáhú ró ini anuá ró nuū Yaā Dios.

17 Te tācá jniñu sáha ró, núu jeē cahán rō chí jéē sáha ró cúu, ndihí na sáha ró jéē ndujéhnu síhví máá Jítoho yō Jesús, te nacuatáhú ró núu Tatá yō Yaā Dios sáha ya.

*Ndese cánuú squícu ñayuu cácandíje nuū jnáhan i*

18 Róhó ñahan cácuu ñasihí, cuatáhú ró nuū yí ró, chi súcuan cánuú sáha ró síquí jeē candíje ró Jítoho yō.

19 Te róhó téé cácuu yí, cundáhú ni rō ñasihí ró, te ma cútucu ni rō jíin ña.

20 Róhó séhe jíjnáhan ró, tācá-ni jniñu cuandíje ró núu tatá ró nuū naná rō, chi súcuan cúsi ni maá Jítoho yō.

21 Te róhó tátá jíjnáhan ró, ma squítí ni rō séhe ró, návāha ma cucuíhyá ni i.

22 Róhó mozo jíjnáhan ró, tācá-ni jniñu cuandíje ró núu patrón rō ñayívi yáha. Ma sájniñu ndúxí ró jeē maá jéē coto de te cuajnúhún de róhó. Chi na sájniñu ndaā sájniñu ndíje ró, te conso íyo ró núu Yaā Dios.

23 Te tācá jniñu sáha ró, na cúsi ni rō sáha ró, te na cáni ni rō jeē nuū Jítoho yō cájejniñu ró, nasūu núu ñáyuu.

24 Chi je cájini rō jeē maá Jítoho yō cuāha ya cuehē tahū cuu ró ní cáni. Chi nuū maá Cristo cájejniñu ró, chí maá yá cúu Jitoho rō.

25 Te ñayuu casáha jniñu néé, chí sa suhva ndutahū i siquí jeē ni sáha i. Chí tu sáha Yaā Dios cuenta ndese cúu in in ñayuu, chí inuú sáha ya jíin i.

## 4

1 Róhó patrón jíjnáhan ró, vāha ndaā na sáha ró jíin mozo rō. Te na núcūhun ni rō jeē suni íyó Jítoho maá ró, Yaā ndeé andiví.

2 Te ndiví rō ma jécuiñí rō jeē jicán tahú rō, chí coo ndito ni rō jíin, te nacuatáhú ró núu Yaā Dios.

3 Te suni cacān tahú rō jehē rí jíjnáhan rí, jeē na sáha Yaā Dios jeē cóo ga modo nacani rí jnūhun, návāha cuu cahán rí jnūhun Cristo jeē ní yisāhí, jeē tu ní cájini ñayuu jenahán. Te siquí jnúhun un cúu jeē íne rí vecāa.



<sup>4</sup>Te cacān tahu rō jeē cuu cahān caji rí ndese cánuú cáhān rī.

<sup>5</sup>Sáha yúcun váha ró jíin ñáyuu tu cá candíje. Ma cúhuun ni rō siquī i, chi condihvī ni rō scandíje ró i.

<sup>6</sup>Te máni cahān váha ró jíin ñáyuu, te cahān rō jnūhun cuajníñu jeē quéndōo váha i sáha. Te cani ni rō ndese váha nastió cuíñi rō jnūhun nuū ñin ñin i.

### *Saludo jeē sándihí*

<sup>7</sup>Tíquico cúu ñin hermano jeē maní yō jíin, te tēe squícu váha chindéé ñájnáhan jíin rí cúu de, te jéjníñu de jíin rí nuū maá Jítoho yō. Te maá de castūhún ndihí nuū rō ndese cuahān jniñu rí.

<sup>8</sup>Jeē yúcuan ní taji rí de cuajeē de nuū rō jijnáhan ró, návāha cuni rō ndese cáhīyo rí jíin jniñu, te coo ndeyí ni rō sáha de.

<sup>9</sup>Te suni cuajeē Onésimo jíin de, tēe cúu jnáhan maá ró jijnáhan ró. Te cúu de hermano jeē squícu váha jeē maní yō jíin. Te ndíndúú de castūhun núu rō ndese cuahān táca jniñu ichi cháha.

<sup>10</sup>Sándeyí ni rō jijnáhan ró, áchí Aristarco, tēe íne jíin rí vecāa. Te suni súcuan cáhān Marcos, ñani primo Bernabé. Te je ni ndacu rí jniñu nuū rō siquī Marcos, te núu ni jecondéhé de rōhó te sáha váha ró jíin de.

<sup>11</sup>Te suni súcuan cáhān Jesús, tēe jeē suni nání Justo, jeē sándeyí ni rō. Te maá-ni de cácuu tēe hebreo cá candíje jeē chindéé ñáhān cá nacani jnūhun jíin rí siquī ndese ndácu Yaā Dios jniñu. Te yōhyo ndeyí íyó ni rí casáha de.

<sup>12</sup>Sándeyí ni rō jijnáhan ró, áchí Epafra, tēe cúu jnáhan maá ró, te mozo Cristo cúu de. Te níni jíicán tahu ndasí de jehē rō, jeē na cuíñi níhin ró, te ije váha ni rō jeē squícu váha ró ndihí jniñu cúni Yaā Dios.

<sup>13</sup>Chi cáhān ndaā rí jeē yóhyo ndíhví ni de jehē rō jijnáhan ró, jíin jehē ñáyuu ñuu Laodicea jíin Hierápolis.

<sup>14</sup>Lucas, tēe cúu médico jeē maní yō jíin, suni cáhān de jeē sándeyí ni rō, te suni súcuan cáhān Demas.

<sup>15</sup>Cachi rō nuū táca hermano ñuu Laodicea jeē sándeyí ni i, áchí rí. Te suni súcuan cahān rō jíin Ninfas, jíin táca ñáyuu cá candíje cándutútú vehe ña.

<sup>16</sup>Te ná ni jíinu ni cacahu ró carta yáha, te suni taji ró na cáhu ñayuu cá candíje ñuu Laodicea. Te suni cahu maá ró carta jeē cuahān nuū ñáyuu Laodicea te ndiji nuū rō.

<sup>17</sup>Te cachi rō nuū Arquipo jeē na ndúcú ndeyí de squícu de jniñu ní tee Jítoho yō siquī de, áchí rí.

<sup>18</sup>Ruhū Pablo, yāhá-ni cúu jeē tēe rí jíin ndaha maá rí, jeē sándeyí ni rō. Te nucūhun ni rō ruhū jeē íne rí vecāa. Te ñūhun ni rí jeē na sáha ga Yaā Dios jeē váha rōhó jijnáhan ró. Súcuan na cóo. Amén.

## CARTA HN JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñayuu cácan díje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sñi ni rō jijnáhan ró.

*Ñayuu Tesalónica cúu i ñn ejemplo vāha*

<sup>2</sup> Níní cáncuatáhú rí nuū Yaā Dios jeē siquí rohó jijnáhan ró, te tu náā ni rí cacān tahú rí jehē rō jeē cájicān tahú rí.

<sup>3</sup> Te níní ndácunehen rí rohó núū Tátá yō Yaā Dios, jeē váha cásáha ró táca jniñu chi cácan díje ró, jíin jéē váha cájejniñu ró núū yā chi maní rō jíin yá, jíin jéē cájendeyí ni rō chi cáñuhun ni rō jeē coo jeē váha sáha Jítóho yō Jesucristo.

<sup>4</sup> Chi maní Yaā Dios jíin ró jijnáhan ró hermano, te cájini rí jeē ní nacāji ya rohó.

<sup>5</sup> Chi ná ni canacani rí jnūhun nuū rō jeē jnáma ya rohó, te nasūu jéē ni cáhān rí súcuan-ni, chi ni nacani rí jíin poder Espíritu Santo, te ni cacucáhu vāha ni rí jeē jnūhun ndaā cúu. Te cájini rō ndese ni casáha vāha rí ná ni coyūcu rí jíin ró, chi ni nducú rí jeē quéndōo vāha ró.

<sup>6</sup> Te róhó jijnáhan ró chi ni candacu ró rúhū, te suni ni candacu ró máá Jítóho yō. Chi ni cajetáhú ró jnūhun ya, te ni cacusñi ni rō ni sáha Espíritu Santo, vēsú ni cajito ró cuehē jnūndóho siquí ún.

<sup>7</sup> Te súcuan cácuu ró ñn ejemplo nuū ndihí ñayuu cácan díje jeē cáyūcú región Macedonia jíin Acaya jiñā.

<sup>8</sup> Chi jeē siquí rohó jijnáhan ró cúu jeē ní jite núu jnūhun Jítóho yō, te

nasūu máni Macedonia jíin Acaya, chi suni ní cáhnu-ni ni jité núu jnūhun ndese cácan díje ró Yaā Dios. Te jeē yúcuan tuá jíni ñúhún jeē nácani máá rí jnūhun nuū i.

<sup>9</sup> Chi sa máá i cácanani ndese ni cajetáhú váha ró rúhū ná ni jecoo rí nuū rō, jíin ndese ni castóo ro ídolo te ni quivicoo ró ndaha Yaā Dios, Yaā ndaā Yaā técu, jeē cuajniñu ró núu yā.

<sup>10</sup> Te cácanani i jeē cándetu ró jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núu castigo xeēn jeē quíji.

*Jniñu jeē ni sáha Pablo ñuu Tesalónica*

## 2

<sup>1</sup> Chi cájini rō hermano, jeē tu ní jecoo cáhá-ni rí nuū rō.

<sup>2</sup> Te cájini rō jeē ní castóho i ruhū te ni cacahān ndevāha i nuū rí ini ñuu Filipos. Te vēsú súcuan te máá Yaā Dios ni chindéé ñáhán yá ruhū, ni sáha ya jeē ni íyo ndeyí ni rí, te ni jecoo rí ñuu rō ni canacani rí jnūhun jeē jnáma ya rohó. Súcuan ni casáha rí vēsú xeēn ni íyo jnūndóho.

<sup>3</sup> Te jnūhun ni canacani rí, nasūu jnūhun ni castíví rí cúu, ni nasūu jéē nihín rí siquí rō, ni nasūu jéē ní castáhú rí rohó.

<sup>4</sup> Chi máá Yaā Dios ni jito ndee yā ruhū, te ni tejniñu ya ruhū jeē nácani rí jnūhun jeē jnáma ya rohó. Te jeē yúcuan cúu jeē cácahān rí. Te tu cácahān rí jnūhun jeē nújnahan ni ñayuu, chi sa jeē nújnahan ni Yaā Dios, chi máá yá jito ndee anuá rí.

<sup>5</sup> Te cájini rō jeē tu ní cánducú rí cuajnúhún rí rohó ñn modo stahú, ni tu ní cácahān rí jeē cúsiñi ni rí jíin ró návāha nihín rí xūhun ró. Te jíni Yaā Dios jeē súcuan cúu.

<sup>6</sup> Te ni tu ní cánducú rí jeē cuajnúhún ró ruhū, ni jeē cuajnúhún inga ñayuu ruhū, vēsú súcuan cánuú coo núú, chi apóstol Cristo cácuu rí.

<sup>7</sup> Chi sa suhva vīta ní cacahān rí jíin ró, nájnūhun sáha ñahan ndéca yiquín jéē yucún ndíto ña sēhe ña.

<sup>8</sup> Te siquī jeē cācundáhú ndasí ni rī rohó, jeē yúcuan ní cacondihvī ni rī nacani ri jnūhun vāha Yaā Dios nuū rō. Te nasūu máá yúcuan-ni, chi suni nde vida rī cuāha ri jeē siquī rō nuú, chi yōhyo manī rī jín rō.

<sup>9</sup> Te cánahan rō hermano, jeē tú ni ñn rō ní stáhān rī jeē cacān rī nuū rō ná ni canacani ri jnūhun vāha Yaā Dios nuū rō. Chi ni canducú ndeyí rí ni casájniñu ndasí rí siquī jeē cótecu rī. Te nduú ñuú ni casájniñu ri.

<sup>10</sup> Máá rō cājini rō, te suni Yaā Dios jiní yā ndese ndaā ndoo ni cajica ri nuū rohó ñayuu cācandíje. Te ni ñn tu cúu cahān cuēchi siquī rī.

<sup>11</sup> Te suni cājini rō ndese ni castíhvī ni rī ná ñn ná ñn rō, te ni cacahān rī jnūhun ndeyí ni jín rō, nájñūhun sáha ñn tátá jín séhe de.

<sup>12</sup> Te ni cacahān nīhin ri jín rō jeē na cáca ndaā rō nuū Yaā Dios nájñūhun cánuú caca rō. Chi ni cana ya rohó jéé quíngoo rō núū ndácu ya jniñu, nuū luu cujéhu rō jín yá.

<sup>13</sup> Te jeē yúcuan ní níní nácuatáhú rí nuū Yaā Dios, chi ni cajetáhú rō jnūhun ya jeē ní canacani ri. Chi ni cajini rō jeē násūu jnūhun ñn tēe cúu, chi jnūhun Yaā Dios cúu. Te máá jéndaá jeē jnūhun un sájniñu ini anuá rohó ñayuu cācandíje nde ndacu rō yá.

<sup>14</sup> Hermano, ñayuu ñuu rō ni cajito xeēn i rōhó, te súcuan ni candoho rō nájñūhun ni candoho ñayuu cācandíje cáyūcú región Judea jeē cáyihī ndaha Yaā Dios jín Cristo Jesús. Chi nájñūhun ni candoho i ní sáha jnāhan i ñayuu hebreo, suni súcuan ni candoho rō.

<sup>15</sup> Chi suu ñayuu hebreo ni cajehni de máá Jítoho yō Jesús, nájñūhun ni cajehni de tāca tēe ñuu de jeē ní canacani jnūhun ya nde jenahán. Te suni nde ruhū jijnáhan ri ni cascúnu de. Te casáha de jniñu jeē tu nújnahan ni Yaā Dios, te cúu de contra siquī tāca ñayuu.

<sup>16</sup> Chi jésicoo de jeē ma nácani ri jnūhun nuū ñayuu tācá nación jeē tu jíní, návāha tú cācu i. Te súcuan sáha de jeē nducuehē gā cuēchi siquī de. Te

vijna te yachī quiji quivī jeē cuāha Yaā Dios castigo xeēn nuū de.

*Jeē cuní Pablo quicōndēhé tucu de ñayuu Tesalónica*

<sup>17</sup> Hermano, ni cacujiyo ri ñn núnúu-ni nuū rō jijnáhan rō. Te vēsú tu cājito jnāhan yó, te ní níní cáñuhun ni rī rohó. Te yōhyo ni cacuu ni rī ndacoto ri nuū rō jijnáhan rō.

<sup>18</sup> Te jeē yúcuan ní cajeni ni rī jecoo ri nuū rō nuú. Te ruhū Pablo, tijni jínu ni nducú rí modo jeē rī, te Satanás ni jesi ichi ri jijnáhan ri.

<sup>19</sup> Chi tuá na inga cáñuhun ni rī, te tuá na inga cácusī ni rī, chi suu máá rō jijnáhan rō. Te jeē siquī maá rō cúu jeē nihín rī premio rī te cusī teyí ni rī cuiñi yó núu maá Jítoho yō Jesucristo quivī ndíji ya.

<sup>20</sup> Suu jeē siquī rohó cúu jeē cácusī teyí ni rī.

### 3

<sup>1</sup> Te jeē yúcuan tuá ni cácanda ri condetu ri nde nihín rī jnūhun ndese cáhīyo rō. Te ni casándaā rī jeē quéndōo máá-ni ri ñuu Atenas.

<sup>2</sup> Te ni catají rí hermano yō Timoteo, tēe jéjníñu jín rí nuū Yaā Dios siquī jnūhun jeē jnáma Cristo yohó. Te ni jecōndēhé de rōhó návāha sáha de jeē cuiñi nīhin rō te coo ndeyí ni rō jín jnūhun cācandíje rō.

<sup>3</sup> Te ni jeē de návāha ma náyūhú ni ñn rō siquī tāca jnūndóho jeē sáha ñayuu. Chi je cājini rō jeē súcuan cánuú ndoho yó.

<sup>4</sup> Chi nde ná ni coyūcu rí jín rō, te ni cacastūhun rí nuū rō jeē nihín nahín yó jnūndóho. Te je cājini rō jeē súcuan ni cuu, nájñūhun ni cacahān rī.

<sup>5</sup> Te jeē yúcuan, náa tuá ni cánda ri condetu ri jeē nihín rī jnūhun ndese cáhīyo rō, te ni tají rí de ni jeē de, návāha cuni rī núu cācandíje nahín rō. Chi ni jeni ni rī á sanaa te jexeén jeē jíto ndee yohó ní cundeyí jín rō, te naa cāhá-ni jniñu jeē ní casáha ri jín rō.

<sup>6</sup> Te vijna chi je ni ndee Timoteo nuū rī jijnáhan ri jeē ni jéē de ñuu

rō Tesalónica. Te ni nacani de jeē cācandíje vāha ró, te cācundáhú ni rō jnáhan ró. Te ni cachi de jeē cáñuhun ni rō ruhū, chi cáhīyo manī rō jíin rí. Te cācuni rō ndacoto ró núū rī, nájnūhun cācuni rī ndacoto ri nuū rō.

<sup>7</sup> Te jeē yúcuan ní candusiñ ni rī siquī jeē cācandíje vāha ró, hermano, vēsú xeēn iyó jnūndóho siquī rī.

<sup>8</sup> Te vijna je ni cananihīn ni rī, chi cáhīn nīhin ró jíin máá Jítóho yō.

<sup>9</sup> Núu sūcuan te tu jínu cuiñi nacuatáhú rí nuū Yaā Dios jeē siquī rohó jijnáhan ró. Chi jíto ya jeē cācusiñ ndasí ni rī jeē sūcuan cáhīyo ró.

<sup>10</sup> Te nduú ñuú cájicān tahu ndasí rí jeē ndácoto tucu ri nuū rō, te stéén gā rī na-ni jnūhun cúmanī jecūhun ni rō siquī jnūhun cācandíje yó.

<sup>11</sup> Te cācuni rī jeē maá Tátá yō Yaā Dios jíin Jítóho yō Jesucristo, na núne ya ichi jeē cuu jecoo tucu ri nuū rō.

<sup>12</sup> Te na sáha máá Jítóho yō jeē cuehē ndasí gā cundáhú ni rō jnáhan ró jíin táca gā ñayuu, nájnūhun cācundáhú ni rī rohó jíjnáhan ró.

<sup>13</sup> Te na sáha ya jeē íje ánuá rō jeē cuiñi nīhin ró, návāha coo ndoo ró jéē ma cóo cuēchi ró núū maá Tátá yō Yaā Dios, quiñi ndíji Jítóho yō Jesucristo jíin táca ñayuu yñi ndaha ya.

*Siquī jeē caca ndaā yō modo jeē cúsiñ ni yā*

#### 4

<sup>1</sup> Te vijna hermano, íyó inga jnūhun jeē cacahān ndahú rí jíin ró te cáhān nīhin ri jíin ró, chi sūcuan cúni máá Jítóho yō Jesús. Je ni castéén rī nuū rō ndese cánuú caca ndaā rō návāha cusīñ ni Yaā Dios. Te cacahān ndahú rí jíin ró jeē sa víhyá gā na cáca ró sūcuan.

<sup>2</sup> Chi je cájini rō na jniñu ni candacu ri nuū rō jeē ní ndacu máá Jítóho yō Jesús.

<sup>3</sup> Te cúni Yaā Dios jeē na cóo ndoo coo ñi rō nuū yā, te ma cáca jnéni ró.

<sup>4</sup> Te ná ñi ná ñi ró na cóndeca yñiñuhún ró ñasihí máá ró, te sūcuan caca ndoo ró.

<sup>5</sup> Te ma sáha ró jniñu néé jéē ndíyo ni rō jesihí, nájnūhun cásáha ñayuu táca nación jeē tu cájini i jnūhun Yaā Dios.

<sup>6</sup> Ni ñi ró ma sáha ró cuēchi jeē quénde rō ñasihí jnáhan ró. Chi máá Jítóho yō cuāha ya castigo xeēn nuū ñayuu casáha táca jniñu sūcuan, nájnūhun je ni cacahān nīhin ri ni castūhun rí nuū rō.

<sup>7</sup> Chi tu ní cána Yaā Dios yohó jéē sáha yó jniñu jnéhén, chi sa jeē caca ndoo yó.

<sup>8</sup> Núu sūcuan te ñayuu jeē squéhichī jnūhun yáha, nasūu jnūhun ñi tēe squéhichī i, chi sa jnūhun Yaā Dios, Yaā ni jéhe Espiritu Santo nuū yō.

<sup>9</sup> Te tu jíni ñiñuhún jéē tēe ri nuū carta yáha jéē coo manī rō jíin táca hermano, chi je ni steén Yaā Dios nuū rō jeē coo manī rō jíin jnáhan ró.

<sup>10</sup> Te je cáhīyo manī rō sūcuan jíin táca hermano cáyūcu ní cáhnu Macedonia jíñā. Te cáhān ndahú rí jíin ró hermano, jeē sa víhyá gā na cóo manī rō jíin i.

<sup>11</sup> Te na cóndihvī ni rō coyūcú nayúú ró, te ma cóndihvī ni rō siquī ndese cásáha jnáhan ró, chi condihvī ni rō sáha ró jniñu máá ró, nájnūhun ni candacu ri nuū rō.

<sup>12</sup> Sūcuan na sáha ró návāha ñayuu tu cāndíje, cuatáhú i róhó, te suni ma cúmanī jeē cotecu rō.

#### *Siquī jeē ndíji Jítóho yō*

<sup>13</sup> Suni cācuni rī, hermano, jeē na jecūhun ni rō jijnáhan ró siquī ñayuu cájihī, návāha ma cucuíhyá ni rō nájnūhun sava ga ñayuu jeē tu cáñuhun ni i jeē nátecu ndíyi.

<sup>14</sup> Chi nájnūhun cācandíje yó jéē ni jíhī Jesús te ni natecu yā, suni sūcuan cācandíje yó jéē nastecu Yaā Dios táca ñayuu ni cacandíje nuū Jesús te ni cajihī.

<sup>15</sup> Jeē yúcuan cácastūhun rí ñi jnūhun jeē ní castūhun máá Jítóho yō nuū rī: Jeē yohó jéē cátecu gā quiñi ndíji máá Jítóho yō, nasūu máá yó cosnūu jéē ndaa yó quíhīn yō. Chi

xīhna gā ñayuu je ni cajihī ndaa i quihīn i.

<sup>16</sup> Chi máá Jítóho yō nuu ya quiji ya ichi ándiví, te cana jee ya jeē maá yá ndácu jniñu, te cana jee ndajéhé cujéhnú ga, te cuecu trompeta Yaā Dios. Te xīhna gā natecu tāca ndíyí jeē ní cacandíje Cristo.

<sup>17</sup> Yūcuán na te yóhó jeē cátecu gā yō quiví ndíji ya, suni ndonehen ya yohó jíin i, quihīn yō mēhñu vícō. Te naquijnáhan yó jíin máá Jítóho yō sava andiví. Te súcuan condee yō ní cáni jíin máá Jítóho yō.

<sup>18</sup> Núu súcuan te jíin jnúhun yáha cahān ndeyí ni rō jíin táca jnáhan rō.

## 5

<sup>1</sup> Te tu jíni ñúhún jeē tée ri nuū carta yáha síquī cuiyā chí quiví jeē coo tāca un, hermano.

<sup>2</sup> Chi je cájini vāha rō jeē ñn sanaa ni yō te quee quiví ndíji máá Jítóho yō, nájnūhun ñn sanaa ni yō te quíji ñacuñhá jecuáa.

<sup>3</sup> Chi ná-ni cácahān ñayuu jeē nayúu-ni ín te tú na jnúndóho coo, te ná-ni cácahān i súcuan te ñn sanaa ni i te quíji jnúndóho síquī i jeē náa i, te ma cácu cuítí i. Chi quiji quiví un nájnūhun ñn sanaa-ni te quéjéé jéhdē chíji ñn ñahan scácu sēhe.

<sup>4</sup> Te róhó hermano, tu cácuu rō ñayuu cájica nájnūhun nuū néē jeē ñn sanaa-ni te quiji quiví un síquī rō nájnūhun quíji ñacuñhá.

<sup>5</sup> Chi ndíhi rō cácuu ñayuu jeē nájnūhun cájica rō nduú, chí stéén luz yā ini anuá rō. Chi tu cácuu yó nájnūhun ñayuu jeē tu jécūhun ni síquī Yaā Dios, jeē nájnūhun cájica i nuū néē.

<sup>6</sup> Núu súcuan te ma cúhuun ni yō nájnūhun ñayuu cáquixī, chí sa ndito na cóo ni yō te coo cájí xíní yō.

<sup>7</sup> Chi jecuáa cúu jeē cáquixī ñayuu, te suni jecuáa cúu jeē nájini i.

<sup>8</sup> Te máá yó chí nájnūhun jeē cájica yó nduú, te na cóo cájí xíní yō. Te na cúcutú yó jíin jnúhun cándíje ñihin yó jíin jnúhun cúndáhú ni yō jnáhan yó, nájnūhun cúcutú soldado jíin sahna cáa. Te na cúcutú yó jíin jnúhun jeē

cañuhun ni yō jeē cācu yó, nájnūhun cúcutú soldado jeē ñúhun lélú cāa xíní de.

<sup>9</sup> Chi Yaā Dios tu ní jéni ya yohó jeē cuáha ya castigo yohó, chí sa suhva jeē jnama ya yohó sáha máá Jítóho yō Jesucristo.

<sup>10</sup> Te máá yá ni jihī yā jehē yō, návāha cotecu ñnuú yó jíin yá, vēsú núu cotecu gā yō ñayívi yáha chí cúu yō.

<sup>11</sup> Núu súcuan te cahān rō jnúhun ndeyí ni jíin táca jnáhan rō, te scuéhnú jnáhan rō jíin jnúhun ya, nájnūhun je casáha rō.

### *Jeē jéni ichí Pablo tāca hermano*

<sup>12</sup> Te cácahān ndahú rí jíin rō hermano, jeē cuatáhú rō tée cájejniñu cándito róhó, jeē cácujehnú de nuū rō jíin jniñu máá Jítóho yō, te cájeni ichí de róhó.

<sup>13</sup> Te coo yíñúhún ndasí rō nuū de, te coo maní rō jíin de síquījniñu ya jeē casáha de. Te na cóyūcu mání rō jíin táca jnáhan rō.

<sup>14</sup> Te suni cácahān ndahú rí jíin rō hermano, jeē na stíhví ni rō ñayuu cájica cúxí. Te cahān rō jnúhun ndeyí ni jíin ñayuu jeē yachí ndínuu ni i. Te chindéé ñáhán rō ñayuu jeē tu fuerza ini. Te cuandeyí ni rō jíin ndíhi ñayuu.

<sup>15</sup> Te coto má nasáha ndevāha ro jíin ni ñn ñayuu te núu sáha ndevāha i jíin rō. Chi máni jeē váha nducú rō sáha rō jíin táca jnáhan rō jíin ndíhi-ni ñayuu.

<sup>16</sup> Níní na cóo sī ni rō jijnáhan rō.

<sup>17</sup> Te níní na cácan tahu rō.

<sup>18</sup> Te nacuatáhú rō jeē síquí tāca-ni. Chi súcuan cúni Yaā Dios jeē sáha rō jéé cacandíje rō Cristo Jesús.

<sup>19</sup> Te ma cási rō nuū jniñu jeē sáha Espíritu Santo jíin rō.

<sup>20</sup> Te ni ma cujéé ni rō nuū jnúhun cácahān tée canacani jnúhun Yaā Dios.

<sup>21</sup> Chi coto ndee rō tāca jnúhun, te núu jeē váha cúu, te cuatáhú rō.

<sup>22</sup> Te ma quiví nduu rō jíin ni ñn jniñu néé.

<sup>23</sup> Te máá Yaā Dios jeē jéhe jnúhun ndeyí sī ni, ñúhun ni rī jeē sáha ndíhi ya jeē cóo ndoo coo ñi rō nuū yā. Te ñúhun ni rī jeē cóndito vāha ya anuá

rō jín jéē níjnūnī rō, jín yiqui cúñu rō,  
návāha tú na cuēchi coo siquī rō quiivī  
ndíji maá Jítoho yō Jesucristo.

<sup>24</sup> Chi Yaā jeē ní cana róhó, sáha ya  
ndihī un jín ró, chi squícu ya jeē ní  
jéjnūhun ya.

*Saludo jín bendición jeē sándihí*

<sup>25</sup> Hermano jijnáhan ró, cacān tahu  
rō jehē rī jijnáhan rī.

<sup>26</sup> Te núu na cáhán rō jín táca her-  
mano, te techūhu yíñúhún ró ndaha i.

<sup>27</sup> Te cáhán nihin rī jín ró, chi súcuan  
cúní maá Jítoho yō, jeē na cáhu ró  
carta yáha núu tǎcá hermano.

<sup>28</sup> Te ñúhun ní rī jeē maá Jítoho yō  
Jesucristo na sáha ga yā jeē váha róhó.  
Súcuan na cóo. Amén.

## CARTA UU JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñayuu cávandíje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo.

<sup>2</sup> Te cáñuhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sī ni rō jijnáhan ró.

*Jeē sándaā yā cuēchi quivī ndíji Cristo*

<sup>3</sup> Cánúú jéē niní nacuatáhú rí nuū Yaā Dios jeē síquí rohó jijnáhan ró hermano. Chi súcuan íyó váha, chi yōhyo váha cuahije ró jíin jnúhun jeē cávandíje ró yá, te yōhyo cuanducuehé jeē cávandáhú ni rō táca jnáhan ró.

<sup>4</sup> Te jeē yúcuan cúu jeē cácusī teyí ni rí cáncani ri jnúhun ró núú táca grupo ñayuu cávandíje nuū Yaā Dios. Chi váha cávandíje ró, te váha cájendeyí ni rō jeē cájito xeēn ñayuu rohó jíin jéē cándoho ró táca gá jnúndóho.

<sup>5</sup> Te jíin táca jéē yáha chíhi ya cuenta jeē cácuu ró ñayuu váha jeē quivícoo ró ñuu nuū ndácu ya jniñu. Chi síquí ñuu un cúu jeē cándoho ró. Te jeē súcuan chíhi ya cuenta síquí rō, yáha stéén nuū yō jeē váha Yaā cúu ya.

<sup>6</sup> Te suni íyó váha jeē nastóho ya ñayuu castóho rōhó.

<sup>7</sup> Te quiví ndíji Jítóho yō Jesús, quiví un sáha Yaā Dios jeē ndétātu rōhó jéē cándoho, te suni ruhū jijnáhan ri. Chi jíin yáñuhūn quiiji Jesús ichi ándiví jíin táca ndajéhé yā jeē ndíso poder.

<sup>8</sup> Te cuáha ya castigo nuū ñayuu jeē tu ní cájehe i jnúhun cuni i ndese Yaā cúu Yaā Dios, te tu ní cájetáhú i jnúhun máá Jítóho yō Jesucristo jeē jnáma ya i.

<sup>9</sup> Te ñayuu ún chi ndoho i ní cáni, chi cujiyo i nuū máá Jítóho yō, te ma

cúu quivícoo i nuū lúu ndasí cújéhu ya jíin poder yā.

<sup>10</sup> Súcuan sáha ya quiví ndíji ya jeē lúu cújéhu ya sáha ñayuu cávandíje jeē yíhi ndaha ya. Te nahán naa ni i coto i nuū yā. Te suni súcuan rōhó jijnáhan ró, chi ni cávandíje ró jnúhun jeē ní canacani ri nuū rō.

<sup>11</sup> Te jeē yúcuan cúu jeē niní cájicān tahu rí jehē rō, jeē na cúu ró ñayuu váha jeē ní cana ya rohó. Te jíin fuerza yā na sáha ya jíin ró jeē síquí ró táca jniñu váha jeē ní catee ni rō sáha ró síquí jeē cávandíje ró.

<sup>12</sup> Te súcuan te cújéhu máá Jítóho yō Jesucristo sáha ró, te suni cújéhu máá ró jijnáhan ró sáha ya. Chi Yaā Dios yō jíin Jítóho yō Jesucristo, súcuan cúu jeē sáha ya jeē váha yóhó.

*Jnúhun síquí maá té sáha xeēn cuēchi*

## 2

<sup>1</sup> Vijna te cahān rí síquí jeē ndíji máá Jítóho yō Jesucristo jíin jéē ndutútú yó núú yā. Cácahān ndahú rí jíin ró jijnáhan ró hermano,

<sup>2</sup> jeē ma cuáha ró jnúhun sacā nuu caní ni rō, ni ma cunéé ni rō núú cácahān ñayuu jeē jé ni quee quiví ndíji máá Jítóho yō. Ma cávandíje cuítí rō vésú núú cahān i jeē ni níhīn i ñn jnúhun síquí un núú Espíritu, chí ñn jnúhun jeē ni cáhān ñnga, chí núú cachi i jeē ruhú jijnáhan ri ni tají ñn carta jeē cahān súcuan.

<sup>3</sup> Ma cuáha cuítí rō jnúhun jeē stahú ni ñn i rōhó. Chi nde ná tu quiiji quiví ún te xīhna gā ndunīhni ni cuehé ñayuu nuū yā, te quenda ndijin máá té sáha xeēn cuēchi, te té jnáhnū ndetū cúu máá té ún.

<sup>4</sup> Chi té jító uhū Yaā Dios cúu de, te ndonda de contra síquí táca jéē casnání i yaā i jíin táca jeē cáchiñhún i. Te xeēn gā sáha de, chí nde cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

<sup>5</sup> ¿A cánahán ró jnúhun yáha? Chi súcuan ni cahān rí jíin ró ná ni íyo ri jíin ró.

<sup>6</sup> Te je cájini rō ndé vé cúu jeē jési jeē ná tu quenda ndijin tēe ún, chi nde na quée quivī maá de.

<sup>7</sup> Chi je jícu sāhi táca cuēchi xeēn ini ñayīví, te vijna chi íyó jēe jési nuū, návāha ma cáa ndasí gá cuēchi, chi nde na cújiyo máá jēe jési nuū.

<sup>8</sup> Te sáá te quenda ndijin maá tēe xeēn ún. Te máá Jítóho yō Jesús cahni ya tēe un jíin táchī yuhu-ni ya, te jíin jēe ndíndēe yá ndiji ya te snáhnú ndetū yā de.

<sup>9</sup> Te jeē quíji tēe xeēn ún chi máá Satanás sáha. Te quiji de jíin cuéhē poder, te sáha de táca jniñu jéhnú jeē stahú de, jeē nahán naa ni ñayuu coto i.

<sup>10</sup> Te jíin táca jniñu née te stáhú ndasí de ñayuu jeē jnahnú ndetū, chi tu ní cúní i cuatáhú i jnūhun ndaā jeē cácu i núú.

<sup>11</sup> Te jeē yúcuan cuāha Yaā Dios jnūhun jeē cuatáhú i jnūhun jeē tú ndaā cuiṭi, te candíje i jnūhun stáhú un.

<sup>12</sup> Te súcuan te jecondee cuēchi siquī ndihí i jeē tu ní cá candíje i jnūhun ndaā, chi sa jniñu née ni cacusī ni i jíin.

### *Ñayuu jeē ní nacāji ya jeē cācu i*

<sup>13</sup> Te cánuú jēe niní nacuatáhú rí jijnáhan rí nuū Yaā Dios jeē siquí rohó jēe cácuu ró hermano jeē maní Jítóho yō jíin. Chi nde ná ni jecōo ñayīví, te je ni nacāji Yaā Dios rohó jēe jnáma ya rohó. Chi sáha Espíritu yā jeē cáhīyo ndoo cáhīyo i rō nuū yā te cá candíje ró jnūhun ndaā.

<sup>14</sup> Chi jeē yúcuan ní cana ya rohó jíin jnūhun jeē jnáma ya yohó jeē ní canacani rí, návāha quivīcoo ró núú cujéhnú luu ró jíin máá Jítóho yō Jesucristo.

<sup>15</sup> Núú súcuan te cuiñi nīhin ró hermano, te conahán váha ró jnūhun jeē ní cacutūhva ró núú rī, núú jeē ní cacahán rí chí jēe ní tee rí nuū carta.

<sup>16</sup> Máá Jítóho yō Jesucristo jíin Tátá yō Yaā Dios ni cundáhú ni yā yohó, te ni sáha ya jeē coo sī ni yō ní cáni, jíin jēe ñūhun ni yō táca jēe váha jeē coo siquī jeē váha ni yā jíin yó.

<sup>17</sup> Te na sáha ga yā jeē cóo ndeyí ni anuá rō jijnáhan ró, te na sáha ya jeē íje ró cáhān rō táca jnūhun váha ya, te sáha ró táca jniñu váha.

### *Jeē na cácan tahú i jehē de*

## 3

<sup>1</sup> Te íyó inga jnūhun cánuú, hermano. Na cácan tahú rō jehē rī jijnáhan rí, návāha yachí cuitē núú jnūhun máá Jítóho yō, te cuatáhú váha ñayuu, nájnūhun ni cajetáhú máá ró.

<sup>2</sup> Te suni cacān tahú rō jeē na cácu rí nuū táca tēe cása ha née jēe cátej náhan jíin rí. Chi tú ndihí tēe cá candíje jnūhun ya.

<sup>3</sup> Te máá Jítóho yō chi váha squícu ya jeē ni jéjnūhun ya, te sáha ya jeē íje ni táca ró jíin jnūhun ya, te coto ya rohó núú jenee.

<sup>4</sup> Te cá cucáhnu ni rī sáha máá Jítóho yō, jeē cócuu ró jíin jniñu jeē ní candacu rí nuū rō, te suni cocuu ga ró jíin.

<sup>5</sup> Te ñūhun ni rī jeē maá Jítóho yō steén gā yā ndese coo maní gā ró jíin Yaā Dios nde jíin ini jíin ánuá rō, jíin jēe cuándeyí ni rō nájnūhun ni sáha Cristo.

### *Jeē cánuú sájniñu yó*

<sup>6</sup> Te cándacu rí jniñu nuū rō hermano, chi súcuan ni ndacu máá Jítóho yō Jesucristo, jeē na cújiyo ró núú táca hermano cájica cúxí te tu cájica váha de nájnūhun ni castéén rī nuū rō.

<sup>7</sup> Chi je cájini rō ndese cánuú ndacu ró rúhū jijnáhan rí, chi tu ní cájica cúxí rí ná ni cahīyo rí jíin ró.

<sup>8</sup> Ni tu ní cáyeji rī staā ni ñn ró súcuan-ni, chi ni cachunaa rī. Chi sa ni canducú ndeyí rí ni casájniñu téyí rí nduú ñuú, návāha ma stáhān rī ni ñn ró.

<sup>9</sup> Te vēsú íyó derecho rī jeē cacān rī nuū rō nuú, te tu ní cájicān rī, chi súcuan ni casáha rí návāha cuu rí ñn ejemplo nuū rō ndese sáha ró jijnáhan ró.

<sup>10</sup> Chi ná ni coyūcu rí jíin ró, te ni candacu rí jniñu yáha nuū rō: Núú ndé ñn ñayuu tu cúní i sájniñu i, te suni ma cáji i núú súcuan.



<sup>11</sup> Chi ni canihīn rī jnūhun jeē cájica cúxí sava ró, te tu cásájniñu ró, chi yāha yúcuan-ni sáha ró.

<sup>12</sup> Te cándacu ri jniñu nuū rohó jéē casáha súcuan, te cástíhví ni rī rohó jeē na cóo nayúú ró te sájniñu ró, návāha nihīn rō jeē cáji rō siquī jniñu sáha máá ró. Chi súcuan ndácu máá Jítóho yō Jesucristo jniñu.

<sup>13</sup> Hermano, ma ndínuu ni rō jijnáhan ró sáha ró táca jniñu váha.

<sup>14</sup> Te núu ndé ñn i tu jétáhú i jnūhun jeē cahán rī nuū carta yáha, te condēhe váha ro ndé-ni i cúu, te ma quiijnáhan ga rō jíin i, návāha na cúcanu i te nacani ni i.

<sup>15</sup> Te nasūu jéē cóto uhū rō i, chi sa cahán rō jíin i nájñūhun jíin ñani rō jeē na sájniñu váha i.

*Bendición jeē sándihí*

<sup>16</sup> Te ñúhun ni rī jeē máá Jítóho yō, Yaā jeē jéhe jnūhun ndeyí sñ ni, níni na sáha ya jeē coo ndeyí coo sñ ni rō siquī tácá-ni, te coo ya jíin ró jijnáhan ró.

<sup>17</sup> Ruhū Pablo, yāhá-ni cúu jeē téé ri jíin ndaha máá rí jeē cahán rī jeē sándeyí ni rō jijnáhan ró. Te súcuan jéhe ri firma nuū tāca carta rī, návāha cuni rō jeē carta máá rí cúu. Súcuan cáa letra rī.

<sup>18</sup> Te ñúhun ni rī jeē máá Jítóho yō Jesucristo, na sáha ga yā jeē váha ró jijnáhan ró. Súcuan na cóo. Amén.

## CARTA HN JEE NI TEE SAN PABLO APOSTOL NUU TIMOTEO

<sup>1</sup> Máá rí cúu Pablo, apóstol Jesu-cristo, chi Yaā Dios jeē jnáma yóhó, jíin Jítóho yō Jesucristo jeē ñúhun ni yō coto yó, ni catají yá ruhū jeē nácani ri jnūhun ya.

<sup>2</sup> Te tée ri carta yáha cuájeē nuū rō Timoteo, chi cúu ndije rō nájnūhun sēhe ri siquī jeē ni scándíje ri rohó. Te ñúhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

### *Jeē ma candíje i tāca jnúhun stáhú*

<sup>3</sup> Ná ni quihin ri ichi jeē quihín rī Macedonia, te ni cahān ndahú rí jíin ró jeē quéndōo ró ñuu Efeso. Te suni súcuan cáhán rī jíin ró vijna, návāha cahān nihin ró jíin sava ñayuu yúcuan jeē ma stéén i inga jnūhun jeē tú ndaā.

<sup>4</sup> Te ma cuatáhú i tāca jnúhun jeē cúu máá cuento-ni, jíin jnúhun jeē cahán siquī ndese vēji yucūn tāca jíi yō. Chi tāca jéē yúcuan sáha jeē nahán cándajnūhún i siquī, te tu ndé jéjníñu, te tu sáha jeē íje i squícu i nuū Yaā Dios siquī jnūhun cáncandíje yó.

<sup>5</sup> Te ndácu ri jniñu yáha chi cúní rī jeē na cundáhú ni i jnáhan i siquī jeē iyó ndoo iyó ndáā anuá i, te cáncandíje ndije i ya.

<sup>6</sup> Te sava ñayuu chi ni cajica yátá i, te ni cascuíta i jnūhun ya, ni quívicoo i nuū tāca jnúhun jeē tu ndé jéjníñu.

<sup>7</sup> Chi cáncuni i cuu i maestro ley yā, te ni tu cájecūhun ni i na jnūhun cúu jeē cácahān i, jíin na vé cúu jeē castéén nihin i.

<sup>8</sup> Te jíin yō jeē iyó váha ley un, te núu jecūhun ni yō ndese jéjníñu.

<sup>9</sup> Chi cánuú sáha yó cuenta jeē tu ní jécōo ni ñn ley jeē siquí ñayuu ndaā, chi sa suhva siquī ñayuu jeē tu cájetáhú, jeē níhni ni, jeē casáha jniñu néé, jeē casáha cuēchi, jeē tu cáchiñúhún Yaā Dios ni tu cáncandíje

ley yā, jeē cájehni tatá jíin náná, jíin jéē cájehni ndīyi.

<sup>10</sup> Te suni ni jecōo siquī ñayuu cájica jnéni, jíin tée casáha ndiyí jíin jnáhan yí, jíin ñayuu casácuíhna inga ñayuu, jíin ñayuu castáhú, jíin ñayuu cácahān nihin jnūhun yáá. Te ni jecōo siquī tāca gá ñayuu jeē casáha jniñu tu quíjnáhan jíin jnúhun ya jeē steén ndaā váha.

<sup>11</sup> Te jnūhun ya un cúu jnūhun yōhyo jénu jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani ri jnūhun ya.

### *Jeē nácuatáhú Pablo siquī jeē ní cundáhú ni yā de*

<sup>12</sup> Te nácuatáhú rí nuū Jítóho yō Jesucristo, Yaā ni jēhe fuerza ini rī, chi ni quihin ya ruhū ni sáha ya jeē cuu squícu ri, te ni tejníñu ya ruhū nácani ri jnūhun ya.

<sup>13</sup> Te súcuan ni sáha ya jíin rí vésú ni cahān ndevāha ri siquī yā nde saá, te ni sáha ndevāha ri jíin ñayuu cáncandíje, te xeēn ni sáha ri. Te vésú súcuan te ni cundáhú ni yā ruhū, chi ná tu candíje ri yā nde saá, te tu ní jécūhun ni rī na vé cúu jeē sáha ri.

<sup>14</sup> Súcuan ni sáha Jítóho yō jeē váha ndasí jíin rí. Te ni sáha ya jeē candíje ri jíin jéē cundáhú ni rī jnáhan ri siquī jeē ni quívi ri ndaha Cristo Jesús.

<sup>15</sup> Te ndaā ndije cúu jnūhun yáha, te jeē cánuú candíje ndíhi ñayuu cúu: jeē ní quiji Cristo Jesús ini ñayívi návāha jnama ya ñayuu iyó cuéchi. Te ruhū cúu tēe jeē vihyá gā ni sáha cuéchi.

<sup>16</sup> Te ni cundáhú ni Yaā Dios ruhū, návāha jíin rúhū jeē vihyá gā ni sáha cuéchi te stéén Jesucristo ndese yōhyo íne cáhnu ni yā. Te súcuan ni sáha ya jeē cúu ri ñn ejemplo nuū tāca ñayuu candíje ní cuáhān yō, návāha nihin tahu i cotecu i ní cáni.

<sup>17</sup> Núu súcuan te ní cáni na cáhán yíñúhún yó jeē yóhyo luu cújénu máá Yaā jeē cúu Rey siquī ndíhi, jeē técu ní cáni, jeē tu náā cuíti. Te tu cúu coto yó núu yā vijna, te máá ñn-ni ya iyó, te ndíchí yá. Amén.

<sup>18</sup> Nájnūhun sēhe ri cúu ró Timoteo, te jniñu yáha téjníñu ri rohó, jéē na

ndúcú ndéyí ró síquī jniñu váha. Te na cándije váha ró, te na cóo ndaā anuá rō. Chi nde saá je ni cacahān tācá hermano jíin jnúhun Yaā Dios jeē súcuan condiso jniñu ró.

<sup>19</sup> Chi sava ñayuu tuá iyó ndáā anuá i nuū yā, te ni casnáā i jnúhun cácandije i.

<sup>20</sup> Himeneo jíin Alejandro cúu uū tēe ni casáha súcuan. Te je ni siaá rī de nuū Satanás, jeē stóho ún de, návāha jíin jnúndóho ún te cutūhva de jeē ma cáhán ndevāha ga de síquī Yaā Dios.

### *Siquī ndese cacān tahu yō*

## 2

<sup>1</sup> Núu súcuan te xīhna gā ndácu ri jeē cacān tahu rō jehē tāca ñáyuu. Te cahān ndahú ró jehē i, te cacān rō na-ni na vé jíni ñúhún i, te nacuatáhú ró nuū yā jeē síquī i.

<sup>2</sup> Te cacān tahu rō jehē tāca tée cácujuhnu jíin jéē ndácu jniñu, návāha sáha de jeē cuu coyūcu váha yó te tú na jnúndóho coo síquī yō, te cuu chiñúhún váha yó Yaā Dios te sáha yíñúhún yó jíin táca-ni.

<sup>3</sup> Chi yāha cúu jeē váha jeē nújnahan ni Yaā Dios, Yaā jnáma yóhó.

<sup>4</sup> Chi máá yá cuní yā jnama ya tāca ñáyuu te cuní i ndese íyó jnúhun ndaā yā.

<sup>5</sup> Chi íyó ñn-ni Yaā Dios, te suni íyó ñn-ni Yaā jeē cahán jíin Yaā Dios jehē ñáyuu. Te Yaā un cúu máá Jesucristo jeē ní nduu tēe.

<sup>6</sup> Te ni socō yā maá yá ni jihī yā jeē ní chunaa yā cuēchi ndihī yó. Te ná ni quiiji máá quívī ún, te ni quejéé ní canacani jnúhun ún.

<sup>7</sup> Te jeē síquī yúcuan ní jeni ya ruhū cúu ri apóstol jeē nácani ri jnúhun ya, návāha stéén rī nuū ñáyuu tācá nación jeē tu jíni jnúhun ya, jeē na cándije i jnúhun ún te sáha i jniñu ndaā. Te síquī jeē candije ri Cristo te ndaā cúu jeē cahán rī.

<sup>8</sup> Núu súcuan te cuní rī jeē ndihī-ni lugar na cacān tahu tāca tée. Te na cóo ndoo ánuá de jeē ma quití ni de ni ma tejnáhan de.

<sup>9</sup> Te suni súcuan tācá ñahan, na cási váha ña máá ña nájnūhun cánuú, návāha ma cóo jnúhun canu. Te ma cóndihvī ni ña jeē sáha luu ndasí ña xinī ña, chí jéē cuhun ña síquī oro chí perla chí sahma váha ga.

<sup>10</sup> Chi sa suhva na quéndōo luu ánuá ña jíin jniñu váha sáha ña, nájnūhun cánuú sáha ñahan ndoo ánuá jeē cácejniñu nuū Yaā Dios.

<sup>11</sup> Te núu cáhīn ña jíin ñáyuu cascuáha jnúhun ya, te na cúni nahín ña te cuatáhú ña.

<sup>12</sup> Chi tu jéhe ri jnúhun jeē steén ñahan nuū ñáyuu ndutútú, ni jeē ndácu ña jniñu nuū tēe. Chi sa suhva na cúni nahín ña.

<sup>13</sup> Chi xīhna gā Adán ni sáha ya, te saá te ni sáha ya Eva.

<sup>14</sup> Te tu ní stáhú jexeén Adán, chi sa suhva ni stahú un ñasihí de, te ni sáha ña cuēchi.

<sup>15</sup> Te jeē scácu tācá ña sēhe te coo váha ña, te núu na quéndōo ña jíin jnúhun cándije ña ya, jíin jéē cundáhú ni ña jnáhan ña, jíin jéē cóo ndoo ánuá ña, jíin jéē sáha yíñúhún ña.

### *Ndese cánuú coo tēe cándiso jniñu nuū ñáyuu cácandije*

## 3

<sup>1</sup> Ndaā cúu jnúhun yáha: Núu ñn tēe cuní de condiso jniñu de condito de ñayuu cácandije, te váha jniñu ndúcú de sáha de.

<sup>2</sup> Núu súcuan te tēe ndíso jniñu nuū ñáyuu cácandije, cánuú jeē ma cóo ni ñn jeē nihín ñayuu cuēchi síquī de. Te na cóo ñn-ni ñasihí de, te cájī coo ni de, te ndito coo xinī de, te sáha yíñúhún de. Te cánuú jeē niní cuanúu de vehe nuū ñáyuu cájica, te níní stéén váha de jnúhun ya.

<sup>3</sup> Te ma cúu de tēe nájīni, te ma tejnáhan de, te ma ndíyo ni de xūhún. Chi sa suhva coo váha ni de, te coo vītá ni de, te ma cutóo ni de síquī xúhun.

<sup>4</sup> Te cánuú jéē na ndácu váha de jniñu ini vehe de, te sáha de jeē squícu váha sēhe de te coo yíñúhún i nuū de.

<sup>5</sup> Chi núu ñn tēe tu jíni de ndacu váha de jniñu ini vehe de, ¿te ndese

cuu condiso jniñu de nuū ñáyuu cá candíje nuū Yaā Dios?

<sup>6</sup> Núu súcuan te tē ndíso jniñu nuū ñáyuu cá candíje, ma cúu de tē jeē saá ní candíje, chi núu súcuan te sanaa te sándúxí de máá de, te inuú-ni cuēchi jecondee siquī de jíin jéxeén.

<sup>7</sup> Te cánuú cuu de tē jeē suni nde ñáyuu tu cá candíje, cuajnúhún i de, návāha ma nihín i cuēchi siquī de, te ma cúndeyí jéxeén jíin de.

*Ndese cánuú coo tē cájejniñu mēhñu ñáyuu cá candíje*

<sup>8</sup> Te suni súcuan tē cájejniñu mēhñu ñáyuu cá candíje, cánuú jéē na cóo yíñúhún de, te na squícu de jíin jnúhun cáhán de. Te ma cúu de tē nájini, te ni ma ndíyo ni de xúhún.

<sup>9</sup> Te na cuñi nihin de jíin jnúhun cándíje yó jéē ní yisāhi ndé jenahán, te na cóo ndoo anuá de.

<sup>10</sup> Te cánuú jéē xihna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cá candíje.

<sup>11</sup> Te suni súcuan ñasihí de jíin náhan ña, cánuú coo yíñúhún ña, te ma sajnúhún ña, te cájí coo ni ña, te squícu vāha ña tācá-ni jniñu.

<sup>12</sup> Te tē cájejniñu mēhñu ñáyuu cá candíje, na cóo in-ni ñasihí de, te na ndácu vāha de jniñu nuū séhe de jíin núu ñáyuu vehe de.

<sup>13</sup> Chi tāca tē cájejniñu vāha mēhñu ñáyuu cá candíje, chi vāha quéndōo yíñúhún de, te nihín de modo jeē cají gá nácani de jnúhun Cristo Jesús jeē cá candíje yó.

*Jnúhun sāhi yá jeē cá candíje yó*

<sup>14</sup> Te vēsú ñúhun ni rī cuajeē yachī rī coto jnáhan yó, te tē ri jnúhun yáha cuájeē nuū rō,

<sup>15</sup> návāha núu cucuéé rí, te je jíin rō ndese cánuú sáha vāha ñáyuu cá cuu séhe Yaā Dios. Chi máá i cá cuu ñáyuu cá candíje nuū Yaā Dios, Yaā técu. Te máá i cásáha jeē iyó cutú jnúhun ndaā, chi cáhlin nihin i jíin.

<sup>16</sup> Te jendaá ndije chi jéhnú ndasí cúu jnúhun yáha jeē cá candíje yó, jeē ní yisāhi ndé jenahán:

Yaā Dios ni steén yā maá yá, chi ni nduu ya tē,

te Espíritu ni steén jeē iyó ndaā jniñu ni sáha ya,

te tācá ndajéhé andiví ní cajito jniñu ní sáha ya.

Te ni jitē núu jnúhun ya nuū ñáyuu tācá nación,

te ni cacandíje ñáyuu ní ñáyiví núu yā, te ni ndaa ya cuanuhun yā andiví.

*Siquī ñáyuu cájica yátá nuū jnúhun cá candíje yó*

## 4

<sup>1</sup> Te cájí steén Espíritu Yaā Dios jeē quiví cuándihi te coo sava ñáyuu caca yátá i nuū jnúhun cá candíje yó. Te cuatáhú i tāca jéē cácahán jnúhun stáhú jíin jnúhun ní castéén tachī.

<sup>2</sup> Chi cuni nahín i jnúhun cástéén tē cástáhú-ni, jeē tu cácahán ndaā de. Chi tē un ní cahije ndasí ni de jíin jnúhun stáhú, te tuá sáha jíin ánuá de jeē nácani ni de.

<sup>3</sup> Te cahán de jeē cuēchi cúu jeē coo ñasihí tē, te suni súcuan núu caji ñáyuu sava ndeyu. Te ndeyu ún chi ni sáha Yaā Dios jeē cúu ñáyuu cá candíje jeē jiní jnúhun ndaā, návāha caji i te nacuatáhú i nuū yā.

<sup>4</sup> Chi ndihi jeē ni sáha Yaā Dios, íyó vāha, te ma squexícó yō ni in, chi sa nacuatáhú yó te caji yō.

<sup>5</sup> Chi jíin jéē cáhu yó jnúhun Yaā Dios jíin jéē nácuatáhú yó nuū yā, te íyó ndoo ndihi-ni.

*Tē jéjniñu vāha nuū Jesucristo*

<sup>6</sup> Te núu steén rō jnúhun yáha núu tācá hermano, núu súcuan te cuu ró tē jéjniñu vāha nuū Jesucristo, te ije ró jíin jnúhun vāha ya jeē candíje ró, chi ni cutúhva ró te ndíquín rō.

<sup>7</sup> Te ma quiví nduu rō jíin táca jnúhun jeē cúu cuento-ni jeē cájeni cáhá ni ñáyuu. Chi níni na scuáha ró ndese chiñúhún vāha ró Yaā Dios.

<sup>8</sup> Chi jeē scuáha yó ejercicio jeē cóo ndacuī yiqui cúñu yō, jecu-ni nihín jniñu. Te jeē scuáha yó chiñúhún vāha yó yá, suu yūcuan cúu jeē vāha nihín

jñiñu siquī tācá-ni, jeē cúu vida yáha jíin vida quiiji.

<sup>9</sup> Te ndaā ndije cúu jñūhun yáha, te jeē cánuú candíje ndihī ñayuu cúu.

<sup>10</sup> Te jeē siquī yáha cúu jeē sájniñu nīhin yó síquī jñūhun ya te ndóho yó jéē cácahān ndevāha i nuū yō. Chi ñúhún ni yō jeē coto yó núu maá Yaā Dios, Yaā técu. Te máá yá cúu Yaā jnáma tāca ñáyuu, te ñayuu cácaandíje jñūhun cúndáhú ni yā i, máá i cúu jeē jnáma ya.

<sup>11</sup> Tāca jñūhun yáha cánuú jéē ndacu ró núu i te stéén rō.

<sup>12</sup> Ma cuáha rō jñūhun jeē kujéē ni ni ñn i nuū rō síquī jeē suchí ró. Chi sa coo ró ñn ejemplo nuū ñáyuu cácaandíje, jeē cúni i ndese vāha cáhán rō, ndese vāha sáha ró, ndese cúndáhú ni rō jnáhan ró, ndese cándíje ró, ndese íyó ndoo ánuá rō.

<sup>13</sup> Te níni ndé ná tu jinū rī nuū rō, te condihvī ni rō jeē cáhu ró tutu i nuū hermano cándutútú, jíin jéē stihvī ni rō i, jíin jéē steén rō nuū i.

<sup>14</sup> Ma cúhuun ni rō jíin táhū jeē ni jéhe Yaā Dios nuū rō jeē nácani ró jñūhun ya. Chi tāca téé jéhnu cándiso jñiñu nuū ñáyuu cácaandíje, ni casóo de ndaha de xinī rō, te ni sáha Yaā Dios jeē ní cacahān de jeē súcuan condiso jñiñu ró.

<sup>15</sup> Núu súcuan te cocuu ró jíin táca jñiñu yáha, te condihvī ni rō jíin, návāha cuni tāca ñáyuu jeē váha íje ró cuáhān rō jíin.

<sup>16</sup> Coo cuidado rō jeē caca ndaā rō jíin jéē steén vāha ró jñūhun ya, te cuiñi nīhin ró jíin ndihī. Chi núu súcuan sáha ró te quendōo vāha ánuá maá ró jíin ñáyuu chuhun ni jñūhun cáhán rō.

*Ndese sáha vāha yó jíin ñáyuu cácaandíje*

## 5

<sup>1</sup> Ma cúxeēn rō nuū tāca téé jéhnu, chi sa cahān vāha ró jíin de jeē ma stívī de, nájnūhun cáhán rō jíin tátá rō. Te tāca téé suchí, suni cahān vāha ró jíin de nájnūhun jíin ñani rō.

<sup>2</sup> Te suni súcuan cahān rō jíin táca ñahan jéhnu, nájnūhun jíin náná rō. Te suni súcuan jíin táca ñahan súchí, nájnūhun jíin cuáha ró, te yíñúhún ndajnūhun ró jíin ña.

<sup>3</sup> Te ñayuu cácaandíje na cuáha i jeē jíni ñúhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña.

<sup>4</sup> Chi ñn ñahan ní quendōo ndáhú, núu íyó séhe ña chí séhe chání ña jeē jévāha, te na cóto máá i ña. Chi cánuú cutūhva i jeē xíhna gā nuū ñáyuu vehe i squícu i coto i. Te na nácto i náná i tátá i síquī jeē ní cacondito ña i. Chi yáha cúu jñiñu váha jeē nújnahan ni Yaā Dios.

<sup>5</sup> Te ñn ñahan ní quendōo ndáhú ndije jeē máá ñn na ña, ñúhún ni ña jeē maá Yaā Dios condito ya ña, te tu jécuiñī ña jeē jicán tahu ña nduú ñuú.

<sup>6</sup> Te sa suhva núu máni ndihvī ni ña síquī tāca jéē cúsiñi ni maá-ni ña, yūcuán na te vésú técu ña, te nájnūhun je ni jihī ña.

<sup>7</sup> Jñiñu yáha ndacu ró núu ñáyuu, návāha ma cóo cuēchi síquī i.

<sup>8</sup> Te núu ñn ñayuu tu ndíto i jnáhan vehe i, te víhyá gā ñayuu ini vehe i, núu súcuan te sáha i jñiñu jeē tu quíjnahan jíin jñūhun cándíje yó, te cúu i ñn jeē neé gá vésú ñáyuu tu cácaandíje.

<sup>9</sup> Te ñahan viuda cuu quivī síhvī ña nuū lista ñayuu jeē cáchindéé ñáhán ró jíin xúhun, te núu je ni jñu ña unī xico cuiyā, te núu ni íyo ñn-ni yñi ña.

<sup>10</sup> Te suni cánuú jéē cuajnúhún ñáyuu ña jeē váha jñiñu ni sáha ña, núu jeē ni scuéhnu vāha ña sēhe ña, jíin jéē ní jéhe núu ña vehe nuū ñáyuu cájica, jíin jéē ní jejniñu ña nuū hermano cácaandíje, jíin jéē ní chindéé ñáhán ña ñayuu cándoho jñūndóho, jíin jéē ni sáha ña tāca gá jñiñu váha.

<sup>11</sup> Te tācá ñahan viuda jeē iyó suchí gá, chi ma soó ró síhvī ña nuū lista. Chi sanaa te nducú ña jeē cúsiñi ni maá-ni ña, te ma cóndihvī ni ña síquī Cristo, chi cuu ni ña condeca tucu ña téé.

<sup>12</sup> Te súcuan jecondée cuēchi síquī ña, chi tu ní squícu ña jeē ni jéjnūhun

ña ná ni jecosō sihví ña nuū lista.

<sup>13</sup> Te suni caca cuu ña tǎcá-ni vehe te quee cúxí ña. Te nasūu máni jeē caca cúxí ña, chi suni siquī jeē sajnúhún ña, te quívi nduu ña cahān ña jnūhun jeē tu íyó váha jeē cahān ña.

<sup>14</sup> Jeē yúcuan cúní rī jeē tǎcá ñahan viuda jeē íyó suchí, na nándāha ña, te scuéhnu ña sēhe, te coto vāha ña vehe ña, návāha ñayuu cácuu contra ma cúu cahān i siquī ña.

<sup>15</sup> Chi sava ñahan viuda je ni cajica yátá ña te sáha ña jniñu jeē cuní Satañás.

<sup>16</sup> Te núu ñn tēe chí ñn ñahan cándíje, núu íyó ñahan viuda vehe i, te na cóto máa i ña. Te ma cóndee gasto ña siquī grupo ñayuu cácañíje, návāha cuu cuāha vāha i nuū ñahan viuda jeē tu ndé ñn coto ña.

<sup>17</sup> Te tǎca tēe jéhnú cándito ñayuu cácañíje, na jécunaā doble yāhu de, te núu cándíhvī ni de cástéén de cáncani vāha de jnūhun ya.

<sup>18</sup> Chi cúu nájnūhun cáhán tutu ñ: Ma cánda stiquī caxīn tī trigo, núu ma cuāha ró jéē cáji tī. Te suni cáhán: Tēe jeē sájniñu tátú, jíni ñúhún quiyāhu de, áhí.

<sup>19</sup> Ma cuajnúhún ró te núu jéquin ñayuu cuēchi siquī ñn tēe jéhnú cándito ñayuu cácañíje te núu tu íyó úu chí úní testigo.

<sup>20</sup> Te núu cásáha ñayuu cuēchi, te cánuú cuxeēn rō nuū i, jíto jínúu ndíhi ñayuu, návāha na cónso íyo sava ga i.

<sup>21</sup> Te cáhán ñhin rī jíin ró, jíto máa Yaā Dios jíin Jítoho yō Jesucristo jíin tǎca ndajéhé yā jeē ní nacāji ya: Squícu vāha ró jniñu yáha, te ma sáha ró cuenta ndese cúu ñn ñn i, chí ñnuú-ni sándaā rō siquī ndíhi-ni i.

<sup>22</sup> Ma cáni yachī rō ñn tēe jeē condiso jniñu de nuū ñayuu cácañíje, chí xīhna gā coto ndee rō de. Chí sanaa te stívi de, te cuēchi de suni condee siquī rō jíin de. Te coto ró máa ró jeē ma quívi ró jíin jniñu néé.

<sup>23</sup> Te siquī jeē núu-ni núu-ni cúhú chíji ró, te ma cóho ga rō máni ndute, chí suni coho ró jecu vino.

<sup>24</sup> Cuēchi sava ñayuu chí je íyó ndijin nde ná tu quívi i nuū cúndaā cuēchi i. Te cuēchi sava ga i chí cúcuéé te natūu nahín.

<sup>25</sup> Te suni súcuan tǎcá jniñu vāha, chí íyó ndijin. Te vēsú ná tu natūu jniñu vāha ún, te ma cúu quisāhi ní cáni, chí natūu nahín.

## 6

<sup>1</sup> Tǎca ñayuu cácuu mozo, na cóo yíñúhún vāha i nuū patrón i, návāha ma cahān neé ñayuu siquī Yaā Dios jíin siquī jnūhun ya jeē castéén yō.

<sup>2</sup> Te mozo jeē yáhi nuū patrón cácañíje, ma cáni ni i jeē cūhva-ni sáha yíñúhún i nuū de siquī jeē hermano cácañíje cácuu de. Chí sa cuajniñu vāha ga i nuū de, chí tēe cándíje tēe manī i jíin cúu tǎca tēe un jéē sájniñu i nuū. Jnūhun yáha stéén rō te stíhvī ni rō i.

*Siquī jeē chíñúhún vāha yó yá te cusī ni yō jíin cūhva jeē névāha-ni yó*

<sup>3</sup> Te núu ndé tēe stéén de jnūhun tú ndaā jeē tu quíjnáhan jíin jnúhun vāha ndaā maá Jítoho yō Jesucristo, jíin jnúhun ni steén Yaā Dios jeē cácañíje yó,

<sup>4</sup> núu súcuan te máni tēe ndúxí tēe tu jécūhun cuiti ni cúu de. Chí cánéé xíní de, chí máni cúní de tejnáhan de siquī tǎca jnúhun stéén de. Te tǎcá un sáha jeē cácuuésún ni, jíin jéē cátejnáhan, jíin jéē cácahān ndevāha, jíin jéē cájeni néé ni siquī jnáhan,

<sup>5</sup> jíin jéē máni cástáhān jnáhan. Súcuan cásáha tēe jeē ní ndunéé xíní, jeē tu cájini jnūhun ndaā. Te cájeni ni de jeē nihín de cuehē xūhun siquī jnúhun cácañíje de stéén de. Na cújiyo ró núu ñayuu cándaā súcuan.

<sup>6</sup> Te jendaá jeē yóhoyo vāha quéndōo yó te núu chíñúhún vāha yó yá, te núu cusī ni yō jíin cūhva jeē névāha-ni yó.

<sup>7</sup> Chí tú na vé ni cácu yó jíin ñayívi yáha, ni tú na vé condiso yó quíhín yō jíin núu na cúu yō.

<sup>8</sup> Te núu íyó jéē cáji yō jeē cusúcún yó, te na cusī ni yō jíin yúcuan-ni.

<sup>9</sup> Chí ñayuu jeē cuní cucúca, chí yachī quívi i cuēchi jeē jíto ndee

jexeén i. Te quívi i jíin cuéhē jniñu cánéé jniñu stívi jéē ndíyo ni i. Te tāca un sáha jeē tívi ñáyuu te jnahnū ndetū i.

<sup>10</sup> Chi jeē ndíyo ni yō xūhún, yūcuan sáha jeē quejéé táca jniñu néé. Te sava ñayuu jeē ndíyo ni xūhún, ni castóo i jnūhun cácanđje i, te ni canihīn i cuehē ndasí jnūndóho.

*Jeē na ndúcú ndéyí yó siquī jnūhun cándje yó*

<sup>11</sup> Te róhó chi tēe jéjníñu nuū Yaā Dios cúu ró, te cunu ró coto ró táca cuéchi yáha. Te condiquīn rō jniñu ndaā, te chiñúhún váha ró Yaā Dios, te candíje váha ró, te cundáhú ni rō jnáhan ró, te cuandeyí ni rō, te coo vítá ni rō.

<sup>12</sup> Te nducú ndéyí ró siquī jnūhun cándje yó yá. Te cuiñi nīhin ró jíin jnūhun jeē ni níhīn tahú yō cotecu yō ní cáni. Chi jeē yūcuan cúu jeē ní cana ya rohó, te cáji ní cahān rō jeē váha cándje ró yá, jíto jíinúu cuehē ñayuu.

<sup>13</sup> Te cáhān nīhin ri jíin ró, jíto máa Yaā Dios, Yaā jeē sáha jeē técu tāca-ni, jíin Jesucristo, Yaā jeē cají ní cahān yā ni nacani ya jnūhun váha nuū Poncio Pilato.

<sup>14</sup> Squícu váha ró jniñu ndácu ya nuū rō, te ma stívi ró sáha ró, návāha ma cahān ñayuu cuéchi siquī rō. Te súcuan sáha ró ní ndé quívi ndíji Jítoho yō Jesucristo.

<sup>15</sup> Chi quiji ndijin yā maá quívi jeē ní jeni Yaā Dios. Te Yaā Dios chi máa ĩn-ni ya cúu Yaā yōhyo ndetū, te jnī ya ndíhi poder. Te cúu ya Rey nuū tāca rey, jíin Jítoho nuū tāca jítoho.

<sup>16</sup> Te máñúhún-ni ya cúu jeē iyó ní cáni. Te ndéé yá ĩn lugar nuū ndíi ndaxín, nuū ma cúu quívi yó. Te ni ĩn ñayuu ñayívi yáha tu ní jíto cuiñi i nuū yā, te ni ma cúu coto i nuū yā. Te ní cáni na cóo yíñúhún yó nuū yā, chi jnī máa yá poder ní cáni. Amén.

<sup>17</sup> Te cahān rō jíin ñayuu cucá nda-jniñu ñayívi yáha, jéē ma cúndúxí i. Te ma ténuū i xūhún i, chi yachī naa ún. Chi sa suhva na ténuū i jeē coo váha i sáha Yaā Dios, Yaā técu, chi máa yá

jéhe cuehē yā tāca-ni jeē cúsi ni yō jíin.

<sup>18</sup> Te ndacu ró jniñu nuū i jeē na sáha váha i, chi jeē sacúcá ndije i máa i cúu jeē sáha i tāca jniñu váha. Te na cúu i ñayuu váha ni jeē cuáha i jeē cúu jnáhan i.

<sup>19</sup> Te súcuan caya i cuehē jniñu váha jeē coo cúca i nuū yā ní tiempo jeē quíji. Te nihīn tahú i cotecu i ní cáni.

*Jniñu sándīhi ndácu Pablo nuū Timoteo*

<sup>20</sup> Te róhó Timoteo, condito ró táca jniñu ní chihi ya ndaha ró. Te ma quívi nduu rō jíin táca jnūhun cáhá-ni, cuenta ñayívi yáha, jíin táca jnūhun stáhú jéē cácahān i jeē jnūhun ndíhí ndáa cúu.

<sup>21</sup> Chi sava ñayuu cándiquīn tāca jnūhun yáha, ni cajica yátá i ni castóo i jnūhun cácanđje i ya.

Te ñūhun ni rī jeē Yaā Dios na sáha ga yā jeē váha róhó. Súcuan na cóo. Amén.

## CARTA UU JEE NI TEE SAN PABLO APOSTOL NUU TIMOTEO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō ní cáni siquī jeē yíhi yó ndaha Cristo Jesús.

<sup>2</sup> Te tée ri carta yáha cuájeē nuū rō Timoteo, chi cúu ro nájnūhun sēhe ri jeē maní rī jín. Te ñúhun ni rī jeē Tatá yō Yaā Dios jín Jítoho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sīi ni rō.

### *Jeē nácani de jnūhun Cristo*

<sup>3</sup> Níní tu náā ni rī cacān tahu rī jehē rō nuū Yaā Dios nduú ñuú, te nácuatáhú rí nuū yā jeē siquí rō. Chi nuū maá yá jejniñu ri, nájnūhun ni casáha táca jí rī, te íyó ndoo ánuá rī nuū yā.

<sup>4</sup> Te núcūhun ni rī jeē ni ndáhyū rō ná ni quenda ri cuahān rī. Te cúu ni rī ndacoto jnáhan yó, návāha cusīi ndasí ni rī.

<sup>5</sup> Te núcūhun ni rī jeē váha ndije cándije ró Cristo, nájnūhun ni cándije náná jéhu ró Loida, jín náná rō Eunice xihna gā. Te cúcāhnu ni rī jeē suni súcuan cándije máá ró vijna.

<sup>6</sup> Te jeē yúcuan nástíhví ni rī rohó jéē na cóndíhví gā ni rō jín táhū jeē ni jéhe Yaā Dios nuū rō jeē nácani ró jnūhun ya. Te tahu un ní nihīn rō ná ni tee ri ndaha ri xinī rō.

<sup>7</sup> Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnūhun, chi sa sáha jeē iyó fuerza ini yō, jín jéē cundáhú ni yō jnáhan yó, jín jéē ndíto íyó xinī yō.

<sup>8</sup> Núu súcuan te ma cúcanu rō nacani ndaā rō jnūhun máá Jítoho yō. Te suni ma cúcanu rō jeē siquí máá rí jeē íne ri vecāa siquī jnūhun ya. Chi sa cuāha ró jnūhun ndoho ró jín rí siquī jeē cánacani yó jnūhun jnáma ya yohó,

núu ndese ni jéhe Yaā Dios fuerza ini yō.

<sup>9</sup> Chi ni jnama ya yohó, te ni cana ya yohó jéē coo ndoo ánuá yō cuajniñu yó núu yā. Te tu ní cána ya yohó siquī jeē váha ni sáha yó, chi siquī jeē ní tee ni maá yá jeē cundáhú ni yā yohó jéē yíhi yó ndaha Cristo Jesús. Chi nde ná tu jecōo ñayíví, te je cundáhú ni yā yohó.

<sup>10</sup> Te vijna jeē ní quenda ndijin Jesucristo, Yaā jnáma yohó, te ni steén cají Yaā Dios jeē cundáhú ni yā yohó. Chi máá Cristo ni snāa yā poder cuehyí jéhu yohó, chi jín jnūhun jnáma ya yohó ni steén cají yá nuū yō jeē cótecu yō ní cáni chí ma jnahnú ndetū yō.

<sup>11</sup> Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rī nuū ñayuu táca nación jeē tu jíní jnūhun ya.

<sup>12</sup> Te siquī un cúu jeē ndóho ri táca jnúndóho yáha íne ri vecāa. Te tu cúcanu rī, chí jíní rī ndese Yaā cúu Yaā cándije ri, te cúcāhnu ni rī jeē cúu coto ya jniñu jeē ní chíhi ya ndaha ri nde vijna te nde quiví ndíji ya.

<sup>13</sup> Te cuiñi níhin ró jín táca jnūhun ya jeē steén ndaā, suu jnūhun jeē ni steén rī nuū rō. Te caca ró jín jnúhun cándije yó, te cundáhú ni rō jnáhan ró siquī jeē yíhi ró ndaha Cristo Jesús.

<sup>14</sup> Te condito ró táca jniñu váha jeē ní chíhi ya ndaha ró, sáha poder máá Espíritu Santo jeē ndeé ini yō.

<sup>15</sup> Je jíní rō jeē táca ñayuu cáyūcu Asia ni castóo i ruhū. Te uū i cúu Figelo jín Hermógenes.

<sup>16</sup> Te jícán tahu rī jeē cundáhú ni Jítoho yō ñayuu vehe Onesíforo, chí cuehé jínu ni nanihīn ni rī ni sáha de, te tu ní cúcanu de siquī rī jeē ní ine ri vecāa.

<sup>17</sup> Chi sa suhva ná ni quiji de ñuu Roma, te ni nanducú yúcún de ruhū nde ni nanihīn de ruhū.

<sup>18</sup> Te jícán tahu rī jeē máá Jítoho yō cundáhú ni yā de quiví ndíji ya. Te je jíní váha máá ró ndese yóhyo ni chindéé ñáhán de ruhū ná ni cahīyo ri ñuu Efeso.



*Jeē cúu yó nájñuhun soldado vāha nuū Jesucristo*

## 2

<sup>1</sup> Núu súcuan te róhó, séhē mánī, na cóo fuerza ni rō síquī jeē yíhi ró ndaha Cristo Jesús te sáha ya jeē vāha róhó.

<sup>2</sup> Te tāca jñuhun jeē ní jini ró ní cahān rī, jító jínúū ñayuu cuehē, jñuhun ún na nástéén rō nuū tēe cásquícu vāha, návāha suni cuu stéén tucu máá de nuū sáva ga i.

<sup>3</sup> Te róhó na cuándeýí ni rō coto ró jnúndóho, chí cúu ró nájñuhun ñn soldado vāha nuū Jesucristo.

<sup>4</sup> Ni ñn soldado jeē ín nuū guerra, tu sájñéñu de máá de jín jniñu máá de, chí cánuú jeē sáha de mání máá jéé ndácu tēe ní tejniñu de.

<sup>5</sup> Te suni súcuan tēe cásiquí de-  
porte, ma nihín de premio te núu tú  
condihví ni de cósiquí vāha de máá  
modo chíjñiñu.

<sup>6</sup> Te tēe sájñiñu ñihin ñuhun, máá de  
cúu jeē nihín xīhna gā jeē cuáha itu.

<sup>7</sup> Nacani ni rō síquī jeē cahán rī, te  
máá Jítóho yō sáha ya jeē jécūhun ni rō  
síquī ndíhi.

<sup>8</sup> Te cocuhun ndasí ni rō Jesucristo,  
Yaā ní quiji yucūn rey David, te  
ni natecu yā mēhñu ndíyí, nájñuhun  
cáhán jñuhun jnáma ya yohó jéé nacani  
rī.

<sup>9</sup> Te jeē síquí jñuhun un ndóho ri  
jñúndóho, te nde ni cajihni i ruhū íne  
ri vecāa nájñuhun ñn tēe ni sáha cuēchi  
xeēn. Te jñuhun Yaā Dios chí ma cúu  
cuhni i jeē ma cuité núu.

<sup>10</sup> Núu súcuan te jéndeýí ni rī jító ri  
tāca jnúndóho yáha síquī jeē cundáhú  
ni rī ñayuu jeē ní nacāji ya, návāha  
suni cācu máá i jeē quívi i ndaha  
Cristo Jesús, te quihín i nuū cujéñu i  
nífí cáni.

<sup>11</sup> Chí ndaā cahán jñuhun yáha:  
Núu vēsú na cúu yō jeē síquí yā, te suni  
cotecu yō jín yá,

<sup>12</sup> te núu cuandeýí ni yō ndoho yó, te  
suni ndacu yó jniñu jín yá.

Te núu ma cuajnúhún yó yā, te suni  
ma cuajnúhún yá yohó.

<sup>13</sup> Te vēsú tu squícu vāha yó, te máá yá  
chí mání squícu ya,  
chí tu cúu sáfalta yā, chí squícu ya jeē  
ní cáhān yā.

*Tēe sájñiñu squícu vāha jín jñuhun ya*

<sup>14</sup> Jñuhun yáha na nástíhví ni rō  
ñayuu, te cahān ñihin ro jín i, jító máá  
Jítóho yō, jeē ma téjñahan i síquī tāca  
jñuhun sáá-ni. Chí tu ndé jéjñiñu cuiti,  
chí sa stívi ñayuu jini sōho.

<sup>15</sup> Te nducú ndéyí ró jeē cuajnúhún  
Yaā Dios rohó, jéé cúu ró tēe sájñiñu  
squícu vāha jín jñuhun ya, návāha ma  
cúcanu rō nuū yā síquī ní ñn, chí vāha  
nacani ró jñuhun ndaā yā.

<sup>16</sup> Te ma quívi nduu rō jín táca  
jñuhun sáá-ni ñayívi yáha, chí suu sáha  
jeē ndúcuehē gā jniñu néé quívicoo  
ñayuu cácahān.

<sup>17</sup> Te tāca jñuhun cástéén i chí cúu  
nájñuhun ñn ndíhyi xeēn jeē sacáhú gá  
cuahān. Te Himeneo jín Fileto cúu uū  
tēe jeē casáha súcuan.

<sup>18</sup> Chí tēe un ní cajica yátá de  
nuū jñuhun ndaā, te cácahān de jeē  
jé ni cuu ni canatecu ndíyí. Te  
súcuan cásaca nuu de xinī sava ñayuu  
cácañdije.

<sup>19</sup> Te Yaā Dios ni jeni ya ñayuu maá  
yá, te íyó cutú ndaā i jeē ma cáca yátá i,  
nájñuhun yósó núu tútu íi: Je jíní Jítóho  
yō Yaā Dios tāca ñayuu jeē yíhi ndaha  
máá yá. Te suni cáhán: Tāca ñayuu  
jeē ndácunehen síhví Cristo, na cújiyo  
i nuū jniñu néé, áchí.

<sup>20</sup> Te ini ñn vehe cáhnu íyó cuéhē  
cohō, nasūu mání cohō oro cohō  
plata, chí suni cohō yujnu cohō  
ñuhun. Te íyó jéé fino te íyó jéé  
corriente.

<sup>21</sup> Te núu ñn ñayuu sándoo i máá i jeē  
quéndá i nuū tācá jniñu néé, te cuu i  
nájñuhun ñn cohō fino. Te coo ndoo  
coo íi i nuū Jítóho yō, te nihín jniñu i  
ndese cúní máá yá. Te coo tūhva i jeē  
sáha i tācá jniñu vāha.

<sup>22</sup> Núu súcuan te cunu ró coto ró táca  
jéé tú vāha jeē cándiyo ni tēe suchí. Te  
condiquín rō jniñu ndaā, jín jñuhun  
cándije ró yá, jín jñuhun cundáhú ni,  
jín jñuhun coyūcu mání jín jñahan.

Te súcuan sáha ró ndé jíin táca ñáyuu ndoo ánuá jeē ndácunehen s̄hví máá Jítóho yō.

<sup>23</sup> Te ma quíví nduu rō jíin táca jnúhun cánée íi jeē tu íyó cájí, chi je jíin rō jeē sáha jeē tejnahan ñayuu.

<sup>24</sup> Te mozo maá Jítóho yō, tú vāha jeē tejnahan de, chi sa suhva cánuú jéē coo vāha ni de jíin táca ñáyuu. Te coo vāha ni de stéen de, te cuandeyí ni de jíin i.

<sup>25</sup> Te jíin jéē víta ni de te caní ichí de ñayuu nīhni ni. Chi sanaa te nacani ni i sáha Yaā Dios, te jecūhun ni i ndese íyó jnúhun ndaā.

<sup>26</sup> Te nducájí ni i te cācu i nuū jexeén jeē ní jñi ún i, chi ni cundeyí jíin i jeē sáha i jeē cuní maá.

*Siquí ndese coo ñayuu sáha née quíví cuándihí*

### 3

<sup>1</sup> Te suni na jécūhun ni rō jeē quíví cuándihí te quee quíví coo jnúndóho.

<sup>2</sup> Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá i. Te cahān neé i siquí Yaā Dios, te cunīhni ni i nuū tatá i nuū naná i, te ma nácuatáhú i, te ma chiñúhún i Yaā Dios.

<sup>3</sup> Te ma cóo maní i jíin jnahan i ni ma cundáhú ni i. Te sájnúhún i, te ma cúu casi i tāca jéē ndíyo neé ni i, te yōhyo xeēn coo i, te quítí ni i coto i tācá jniñu váha.

<sup>4</sup> Te suni nastúu i jnahan i, te ma yūhú i sáha i cuēchi, te coo ndúxí ndasí i, te nducú i jeē cúsi ni maá-ni i, te ma nducú i quíví i nuū Yaā Dios.

<sup>5</sup> Te sáha-ni i jeē chiñúhún i ya, te casi i nuū poder yā jeē ma sama modo i.

Ma quíví nduu rō jíin ñáyuu casáha súcuan.

<sup>6</sup> Chi sava tēe ún quíví de vehe te stáhú de tācá ñahan cánée jéē iyó ndasí cuéchi. Te yachí quívícoo ña jíin táca jnúhun tú ndaā jeē cúsi ni ña jíin.

<sup>7</sup> Te vésú niní scuáha ña na-ni jnúhun, te tu cúu cuítí jecūhun ni ña jnúhun ndaā yā.

<sup>8</sup> Te nájnūhun ni casáha tēe tásí Janes jíin Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeē níjnūní de, chi ma candíje ndije de jnúhun candíje yó.

<sup>9</sup> Te ma quée jniñu sáha de, chi cuni tāca ñáyuu jeē tēe cánée xíní cácu de, nájnūhun ni cajini ñayuu jeē ni íyo neé xíní ndíndúú tēe jeē ní nducú casi nuū Moisés.

*Jniñu sándihí ndácu Pablo nuū Timoteo*

<sup>10</sup> Te róhó chi je ni cutūhva vāha ró ndese stéen rī, ndese jíca ndaā rī, ndese tēe ni rī sáha rī, ndese candíje rī yā, ndese nee rī paciencia, ndese cúndáhú ni rī jnahan rī, jíin ndese jéndeýí ni rī.

<sup>11</sup> Chi ni cajito xeēn ñayuu ruhū, te ni ndoho rī jnúndóho. Te jíin rō tāca jéē ní ndoho rī ñuu Antioquía, ñuu Iconio, jíin ñuu Listra. Te jíin rō ndese ni cajito xeēn i ruhū. Te máá Jítóho yō ni jnama ya ruhū nuū ndihí ún.

<sup>12</sup> Chi ndaā cúu jeē tāca ñáyuu jeē ndihví ni cuajniñu vāha nuū Cristo Jesús, ndoho i jeē coto xeēn ñayuu i.

<sup>13</sup> Te ñayuu casáha jniñu neé jíin ñáyuu castáhú, chi sa víhyá gā cocuu i jíin jniñu neé, chi stáhú i ñayuu, te suni candíje máá i jnúhun stáhú.

<sup>14</sup> Te róhó chi sa cuiñi nīhin ró jíin jéē ní cutūhva ró jíin jéē ní cucáhnv vāha ni rō. Chi jíin rō ndese ñayuu cúu jeē ní castéén nuū rō.

<sup>15</sup> Chi nde ná lulí ró, te je jíin rō ndese cáhán tutu íi jeē steén nuū rō ndese candíje ró jeē ní jíhí Cristo Jesús jehē rō návāha cācu ró.

<sup>16</sup> Te ní tutu íi cúu jnúhun jeē ni cáhān Yaā Dios, te vāha níhín jniñu jeē steén nuū yō, jeē cahán nuū yō, jeē náchuhun ichí yóhó, jíin jéē scuéhnv yóhó jíin jniñu ndaā,

<sup>17</sup> návāha tēe cájejniñu nuū Yaā Dios, ije ni de te coo tūhva vāha de sáha de tācá jniñu váha.

## 4

<sup>1</sup> Te cáhán rī jín ró, jito Yaā Dios jín Jítoho yō Jesucristo, Yaā quiji ndacu jniñu, te sándaā yā jniñu ñayuu cátecu jín ñáyuu ní cajihī.

<sup>2</sup> Cáhán nihin ri jeē na nácani ró jnúhun ya, te stíhvī ni rō i candíje i. Te níní sáha ró súcuan núu núne i chí vēsú tu núne i. Te sáha ró jēē na jécūhun ni i, te cahān rō nuū i, te canī ichí váha ró i, te jín cuéhē paciencia steén rō nuū i.

<sup>3</sup> Chi quee tiempo jeē ma cuájnúhún cuítī ñayuu jnúhun ya jeē steén ndaā váha, chí sa cuajnúhún i jnúhun cúsi ni máa i, te nducú i cuehē maestro jeē steén nuū i máni jnúhun jeē nújnahan ni i cuni nahín i.

<sup>4</sup> Te cujiyo i nuū jnúhun ndaā, te condíhvī ni i táca jnúhun jeē máa cuento-ni cúu.

<sup>5</sup> Te rōhó chí níní coo ndito ni rō, te cuandeyí ni rō jín jnúndóho, te condíhvī ni rō nacani ró jnúhun jnáma ya yohó, te squícu váha ró jín jniñu ya jeē sáha ró.

<sup>6</sup> Te ruhū chí je ni socō rī máa rí jeē cúu rī, te je cuacuyajni quívi cuu rī.

<sup>7</sup> Te je ni cundeyí rí jeē ní nducú ndeyí rí siquī jniñu váha, te je ni jinu ni jica ri ñayívi yáha, te tu ní siáá rī jnúhun cándíje ri yā.

<sup>8</sup> Te vijna je íyó túhva premio jeē nihín rī siquī jeē ní jica ndaā rī. Chí Jitoho yō cuāha ya un núu rī máa quívi sándaā yā jniñu, chí máa yá cúu juez ndaā. Te nasūu núu máa ñn ruhū cuāha ya, chí suni cuāha ya nuū táca ñáyuu jeē cúu ni i jeē ndíji ya chí manī i jín yá.

*Jeē cána Pablo quiji Timoteo nuū de*

<sup>9</sup> Nducú ndeyí ró quiji yachī rō nuū rī.

<sup>10</sup> Chí Demas ni stóo de ruhū, chí ndíyo ni de ndajniñu ñayívi yáha, te cuahān de ñuu Tesalónica. Te Crescente chí cuahān de Galacia, te Tito cuahān de Dalmacia.

<sup>11</sup> Te máa ñn na Lucas íne jín rí. Te jeē quíji ró, te condeca ró Marcos quiji ró jín de, chí váha cuajniñu de jeē chindéé ñáhán de ruhū jín jniñu ya.

<sup>12</sup> Tíquico ni taji rí de cuahān de ñuu Efeso.

<sup>13</sup> Te jeē quíji ró, te condaha ró cotón jeē ni stóo ri vehe Carpo ñuu Troas. Te suni condaha ró táca libro, te jeē cánuú gá cúu táca tutu ní tee máa rí.

<sup>14</sup> Alejandro, tēe cúu herrero, yōhyo xeēn ni sáha de jín rí. Te máa Jítoho yō cuāha ya yāhu de jeē súcuan ní sáha de.

<sup>15</sup> Te condito ró máa ró nuū de, chí yōhyo ni cuu de contra siquī jnúhun cásteén yó.

<sup>16</sup> Te ná ni ine ri jeē xíhna ñúhún núu táca tóhō, te tú ni ñn tēe ní índichi jín rí, chí ndíhi de ni castóo de ruhū. Te ñúhun ni rī jeē Yaā Dios cone cáhnu ni yā nuū de.

<sup>17</sup> Te vēsú súcuan te máa Jítoho yō ni chindéé ñáhán yá ruhū, te ni jēhe ya fuerza ini rī, te súcuan ni sínu ri ni nacani ndíhi ri jnúhun jnáma ya yohó, ni cajini nahín ñáyuu táca nación tu jín jnúhun ya. Súcuan ni jnama Jitoho yō ruhū nuū táca tēe xeēn.

<sup>18</sup> Te jnama ga yā ruhū nuū táca jniñu néé, te condito ya ruhū nde quívi ri andívi núu ndácu ya jniñu. Te na cáhán yō jeē yóhyo luu cújéhnu ya ní cáni. Amén.

*Saludo jín bendición jeē sándíhí*

<sup>19</sup> Te cahān rō jeē sándeeyí ni Prisca jín Aquila, jín ñáyuu vehe Onesíforo, achí rí.

<sup>20</sup> Erasto ni quendōo de ñuu Corinto. Te ni quendōo Trófimo ñuu Mileto, te cúhú de.

<sup>21</sup> Te condíhvī ni rō quiji ró nde ná tu quejéé vico míjin. Sándeeyí ni rō, achí Eubulo jín Pudente jín Lino jín Claudia jín táca gá hermano.

<sup>22</sup> Te ñúhun ni rī jeē máa Jítoho yō Jesucristo na cóo ya jín ró, te Yaā Dios sáha ga yā jeē váha rōhó jínáhan ró. Súcuan na cóo. Amén.

## CARTA JEE NI TEE SAN PABLO APOSTOL NUU TITO

<sup>1</sup> Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándíje ri ñayuu ní nacāji ya, návāha jecūhun ni i jnūhun ndaā yā jeē candíje yó,

<sup>2</sup> te cocuhun ni i jeē cótecu i ní cáni. Chi nde ná tu jecōo ñayívi te ni jejnūhun Yaā Dios jeē cótecu yō, te íyó ndaā jnūhun ni cahān yā.

<sup>3</sup> Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya.

<sup>4</sup> Te tée ri carta yáha cuájeē nuū rō Tito, chi nájñūhun sēhe ri cúu ndije ró síquī jeē ínuú-ni cándíje yó yá. Te ñūhun ni rī jeē Tatá yō Yaā Dios jíin Jítóho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo síi ni rō.

### *Jniñu ya jeē ni sáha Tito nde isla Creta*

<sup>5</sup> Te ni stóo ri rohó ndé isla Creta, návāha sándaā rō síquī jniñu jeē cúmanī gā cundaā, te caní ró táca tée jéhnū condito ñayuu cáncandíje táca ñuu, nájñūhun ni ndacu ri jniñu nuū rō.

<sup>6</sup> Te tée jéhnū un cánuú jeē ma cóo ni ñin jeē nihín ñayuu cuēchi síquī de. Te cánuú coo ñin-ni ñasihí de. Te sēhe de cánuú cuu i sūchi cáncandíje jeē ma nihín ñayuu cuēchi síquī i jeē tu sáha váha i chí jéē níñni ni i nuū de.

<sup>7</sup> Chi tée cáncujéhnū cáncandíje jniñu nuū ñayuu cáncandíje, cánuú caca ndaā de chí cáncandíje jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de tée nájñni, ma cuajnáhan de, te ma ndíyo ní de xūhún.

<sup>8</sup> Chi sa cánuú jéē niní cuāha núu de vehe nuū ñayuu cájica, te níní sáha de jniñu váha, te ndito coo xiní de, te coo

de tée ndaā, te coo ndoo ánuá de, te casi de modo jeē cuní maá de.

<sup>9</sup> Te cánuú cuiñi níhin de jíin jnūhun ndaā jeē ni scuáha de, návāha cuu stíhví ni de ñayuu jíin táca jnūhun ndaā váha, te suni cuu sáha de jeē jécūhun ni ñayuu cácuu contra, te casi i yuhu i.

<sup>10</sup> Chi íyó cuéhē ñayuu níñni ni, te cástéén i inga modo jéni ni maá i jeē súcuan cácu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan.

<sup>11</sup> Te cánuú jéē casi rō yuhu táca téé ún, chi cástéén de jnūhun jeē tu íyó váha stéén de, chi cuní de nihín de xūhun síquī ún. Te súcuan sáca nuu de xiní ndíhi ñayuu táca vehe.

<sup>12</sup> Te ñin tée isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chí máni ñayuu stahú cácuu i, te nájñūhun quití xéén casáha i, te máni ndíhví ni i cají cuéhē i, te cúxí i, áchí de.

<sup>13</sup> Te ndaā cúu jnūhun ni cahān téé ún. Jeē yúcuan na cúxeén rō nuū i, návāha ndaā váha na cándíje i.

<sup>14</sup> Te ma sáha i cuenta táca jnūhun ni catava jnáhan yó hebreo, jeē maá cuento-ni cúu, ní ma squícu i jniñu cáncandíje téé ni quendacoo nuū jnūhun ndaā.

<sup>15</sup> Te ñayuu jeē ní ndundoo jeē níjnūní, máni modo iyó ndoo íyó váha jéni ni i jíto i táca-ni. Te ñayuu tu cáncandíje jeē tu ní ndúndoo jeē níjnūní, máni jéni ni i ñin modo tú ndoo tú váha síquī táca jéé jíto i. Chi nde jeē níjnūní i jíin ánuá i íyó jnéhén.

<sup>16</sup> Te vésú cácahān i jeē jiní i Yaā Dios, te jíin jniñu casáha i te jiní yō jeē tú ndije i. Chi ñayuu ndevāha ñayuu níñni ni cácuu i, te tu cúu sáha i ní ñin jniñu váha.

### *Jnūhun ya jeē steén ndaā váha*

## 2

<sup>1</sup> Te máá ró chí niní na cáhán rō táca jnūhun jeē quijnáhan jíin jnūhun ya jeē steén ndaā váha.

<sup>2</sup> Te cahān rō jíin táca téé jéhnū jeē na cóo cájicá ni de, te sáha yíñhún de, te ndito coo xiní de, te candíje níhin de

jnūhun cundáhú ni yā de, te cundáhú ni de jnāhan de, te cuandeyí ni de.

<sup>3</sup> Te suni súcuan tǎcǎ ñahan jéhnú, na sáha yíñúhún ña, te ma sajnúhún ña, te ma nájini ña. Te na stéén ña tǎca jéé váha.

<sup>4</sup> Te na stéén ña nuū tǎcǎ ñahan súchí jéé coo manī ña jíin yí ña jíin séhe ña.

<sup>5</sup> Te ndito coo xinī ña, te coo ndoo ánuá ña, te coto vǎha ña jniñu vehe ña, te coo vǎha ni ña, te cuatáhú ña nuū yí ña, návaha ma cahán neé ñáyuu siquí jnūhun Yaā Dios.

<sup>6</sup> Te suni súcuan stíhví ni rō tǎca té suchí jeé ndito na cóo xinī de.

<sup>7</sup> Te rǎhó, cuu rǎ ñn ejemplo nuū de jeé sáha rǎ tǎca jniñu váha. Te jeé steén rō nuū de te ndaā steén rō te coo ndije ni rō.

<sup>8</sup> Te ndaā vǎha stéén rō, návaha ma cúu cahán ñayuu siquí. Te súcuan te cucanu ñayuu cácuu contra, chí ma cúu cahán i ni ñn cuēchi siquí rō.

<sup>9</sup> Te cahán rō jíin ñáyuu cácuu mozo jeé na cuatáhú i nuū patrón i, te na sáha i tǎcǎ jniñu jeé nújnahan ni de, te ma cahán maá i núu ndácu de jniñu nuū i.

<sup>10</sup> Te ma sacuíhná i ndajniñu de, chí na cúu i ñayuu ndaā ndije, návaha jíin tǎca jniñu jeé sáha i, te cuni tǎca ñáyuu jeé yóho luu cúu jnūhun jeé steén siquí Yaā Dios, Yaā jnáma yóhó.

<sup>11</sup> Chí vijna je ni steén Yaā Dios ndese sáha ya jeé váha ñayuu, chí cúní yā jnama ya ndíhi ñayuu ñayíví.

<sup>12</sup> Te jnūhun jeé váha ni yā jíin yó, suu stéén nuū yō jeé na siáá yō jniñu neé jíin tǎca jéé ndíyo neé ni yō. Te ndito na cóo xinī yō ini ñayíví yáha, te caca ndaā yō, te chíñúhún váha yó Yaā Dios.

<sup>13</sup> Te suni stéén nuū yō jeé cocuhun ni yō jeé quéndōo ndetū yō jeé quíji máá quíví jéhnú jeé quénda ndijin Yaā Dios, Yaā kujéhnú ndasí, suu Jesucristo, Yaā jnáma yóhó.

<sup>14</sup> Chí ni socō yā maá yá jehē yō, návaha jnama ya yohó núu tǎca jniñu neé, te sándoo ndíhi ya anuá yō jeé cuu yó ñáyuu maá yá, te condíhví ni yō sáha yó jniñu váha.

<sup>15</sup> Tǎca jnūhun yáha cánuú stéén rō, te stíhví ni rō i, te cahán rō nuū i, chí súcuan ndíso jniñu rǎ. Te ma cuáha ro jnūhun jeé sajeé ni ni ñn i nuū rō.

### *Ndese cánuú sáha ñayuu cácuandíje*

## 3

<sup>1</sup> Te na nástíhví ni rō i jeé cuatáhú váha i nuū tēe cácujehnú jíin tée cándiso jniñu ñuu. Te na squícu i jniñu cándacu de, te coo ñamā ni i sáha i tǎcǎ jniñu váha.

<sup>2</sup> Te ma cahán neé i siquí ni ñn ñayuu, te coyūcu manī i jíin ñáyuu, te coo vǎha ni i, te coo víta ni i jíin ndíhi ñayuu.

<sup>3</sup> Chí máá yó suni ni cuu yó ñáyuu canéé jeé tu jécūhun ni nde saá, te ni cacuníhni ni yō nuū Yaā Dios. Te ni cacandíje yó tǎca jnūhun tú ndaā, te ni cajejniñu sáa-ni yó núu tǎca jéé ní ndíyo neé ni yō jíin na-ni jniñu ni cusí ni yō. Te ni cajica yó jíin jniñu neé jíin jnūhun cuésún ni. Chí ni cajito uhū ñayuu yohó, te ni cajito uhū yō i.

<sup>4</sup> Yūcuán na te Yaā Dios, Yaā jnáma yóhó, ní steén yā jeé váha ni yā te cundáhú ni yā ndíhi ñayuu ñayíví.

<sup>5</sup> Te ni jnama ya yohó, te tú na jniñu váha ní cásáha yó jéé jnáma ya yohó, chí sa siquí jeé ní cundáhú ni yā yohó. Chí ni nacate ya anuá yō, te súcuan ni nacacu jeé yó, te ni ndujeé yó ni sáha ya jíin máá Espíritu Santo.

<sup>6</sup> Te yóho ni cunuú Espíritu Santo ini anuá yō, jeé ni sáha Yaā Dios jeé jíin Jesucristo, Yaā jnáma yóhó.

<sup>7</sup> Te súcuan te ni ndahva yā cuēchi yó siquí jeé váha ni yā, te nihín tahú yō cotecu yō ní cáni, nájñūhun ñūhun ni yō.

<sup>8</sup> Ndaā cúu jnūhun yáha, te cúní rí jeé niní cáhán níhin ro tǎca jnūhun yáha, návaha ñayuu cácuandíje Yaā Dios, na cóndíhví ni i cocuu i jíin jniñu váha. Chí íyó váha tǎca jéé yáha, te níhín jniñu jeé quéndōo vǎha ánuá ndíhi ñayuu.

<sup>9</sup> Te ma quíví nduu rō jíin tǎca jnūhun cánéé íi, jíin jnūhun siquí ndese vēji tǎca jíi yō, jíin tǎca jnūhun

sáha jeē cátejnáhan i cácahān i jeē cánuú squícu yó ley Moisés. Chi máni jnūhun cāhá-ni jeē tu níhín jníñu cúu.

<sup>10</sup> Te núu íyó ñáyuu jeē sáha jeē ndusín ini ñayuu cácañdije, te cahān rō nuū i ñn uū jínu, te núu ma chúhun ni i, te quenehen ró i.

<sup>11</sup> Chi jíní rō jeē ñn ñayuu sáha súcuan, stíví ndasí i chi jíní i jeē tú vāha sáha i, te jeē yúcuan jécondee cuēchi síquī i.

*Jeē cána Pablo quiji Tito nuū de*

<sup>12</sup> Te jeē tají rí Artemas chí Tíquico cuajeē de, yūcuán na te nducú ndéyí ró quiji ró núu rī ñuu Nicópolis, chi je ni cundaā ni rī jeē yúcuan condee rī tiempo mījin.

<sup>13</sup> Te condíhvī ni rō chindéé ñáhán ró Zenas, tēe cúu abogado, te suní súcuan Apolos. Chi cuāha ró jéē jíní ñúhún de jeē quíngoo ga de ichi nuū quihín de. Te coto ró jéē ma cúmanī ni ñn nuū de.

<sup>14</sup> Te ñayuu cáhīn jín yó, cánuú cutūhva i sáha i tācá jniñu vāha, te chindéé ñáhán i ñayuu cúmanī nuū, návāha ma cótecu saá-ni i.

*Saludo jín bendición jeē sándíhí*

<sup>15</sup> Tāca ñáyuu cáyūcu jín rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñayuu jñā jeē maní yō jín síquī jeē cácañdije yó. Te ñúhun ni rī jeē na sáha ga Yaā Díos jeē vāha róhó jíjnáhan ró. Súcuan na cóo. Amén.

## CARTA JEE NI TEE SAN PABLO APOSTOL NUU FILEMON

<sup>1</sup> Máá rí cúu Pablo, te íne ri vecāa jeē siquī jnúhun Cristo Jesús. Te jíin hermano yō Timoteo cátee ri carta yáha cuájeē nuū rō Filemón. Chi cúu ró téee jeē cáhīyo manī rī jíin, chi chindéé ñájnaahan ró jíin rí siquī jníñu Yaā Dios.

<sup>2</sup> Te suni cátee ri carta yáha nuū ñáyuu cácdíje cándutútú ini vehe ró, te suni nuū hermana yō Apia, jíin núu Arquipo, téee chindéé ñájnaahan jíin yó siquī jníñu cánducú ndeyí yó jíin.

<sup>3</sup> Te cáñuhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha róhó jíjnaahan ró, te sáha ya jeē coo ndeyí coo sī ni rō.

*Tēe cúndáhú ni te cándíje váha cúu Filemón*

<sup>4</sup> Te jeē jíicán tahu rī nuū Yaā Dios te tu náa ni rī cacān tahu rī jehē rō, te níní nácuatáhú rí nuū yā jeē siquī rō.

<sup>5</sup> Chi níhín rī jnúhun jeē váha cándíje ró jnúhun cúndáhú ni Jítoho yō Jesús rohó, te cúndáhú ni rō tāca ñáyuu yíhi ndaha Yaā Dios.

<sup>6</sup> Te jíicán tahu rī jeē ñáyuu ni cácdíje siquī jeē cándíje máá ró, na jécūhun váha ga ni i siquī tāca jéē váha jeē sáha ya yohó jeē jíin Cristo Jesús.

<sup>7</sup> Chi cúsi ndasí ni rī te íyó ndeyí ni rī, hermano, siquī jeē cundáhú ni rō ñáyuu cácdíje. Chi máá ró ni sáha jeē ní ndusi ni i.

*Jeē jíicán Pablo ñn favor jehē Onésimo*

<sup>8</sup> Núu súcuan te cáhán ndahú rí jíin ró, vésú cuu ndacu ri nuū rō ndese cánuú sáha ró, chi cúu ri apóstol Cristo.

<sup>9</sup> Te tuú chi sa cáhán ndahú rí jíin ró siquī jeē cáhīyo manī yō. Te cundáhú ni rō ruhū sáha ró jéē cuní ruhū Pablo, chi je jénu ri, te íne ri vecāa jeē siquī jnúhun Cristo Jesús.

<sup>10</sup> Te cáhán ndahú rí jíin ró jehē mozo rō Onésimo jeē ní jeen ró te ni

jinu. Te vijna te cúu i nájnūhun sēhe ri, chi ni scándíje ri i ini vecāa yāhá.

<sup>11</sup> Te nde saá chi tu ní cúu i mozo squícu nuū rō, chi ni jinu i. Te nde vijna chi váha cuajníñu i nuū rō jíin nuū rī.

<sup>12</sup> Te nátají rí i najeē i nuū rō. Núu súcuan te cahān váha ró jíin i, te sáha ró cuenta jeē nájnūhun máá rí ni najinū, chi yōhyo manī rī jíin i.

<sup>13</sup> Te cusī ni rī núu jeē na cúu quendōo i jíin rí yāhá, návāha cuajníñu i nuū rī lugar maá ró níní jéē íne ri vecāa jeē siquī jnúhun váha ya.

<sup>14</sup> Te tu ní cúní rī sáha ri súcuan, chi nde cuāha máá ró jnúhun. Chi nasūu jéē safuerza rī rohó, chi jeē váha ni rō te sáha ró favor jíin rí, nájnūhun cúsi ni maá ró.

<sup>15</sup> Chi sanaa te jeē siquī yáha cúu jeē ní jinu i ni cujiyo i nuū rō jecu-ni tiempo, suu návāha ví quendōo i jíin ró sáha Yaā Dios.

<sup>16</sup> Te vijna tuá cúu i ñn mozo jeē ní jeen ró, chi ni nduu i ñn jeē váha ga, suu ñn hermano jeē maní rō jíin. Te ruhū chi yōhyo manī rī jíin i, te nagā ni cuu máá ró jeē ma coo manī rō jíin i. Te nasūu jéē maní rō jíin ñn téee súcuan-ni, chi siquī jeē cúu i ñn hermano jeē cándíje nuū Jítoho yō.

<sup>17</sup> Te núu sáha ró cuenta jeē ruhū cúu jnáhan ró cándíje, núu súcuan te cahān váha ró jíin i jeē jinú i nuū rō, nájnūhun jeē ruhū cahān ró jíin.

<sup>18</sup> Núu na-ni falta ni sáha i nuū rō, chí núu táu i nuū rō, te cacān rō chunaa maá rí.

<sup>19</sup> Ruhū Pablo, jíin ndaha máá rí téee ri yáha jéē maá rí nachunaa. Súcuan cáhán rī vésú cuu cahān rī jeē sa máá ró taú nuū rī sáha ró jéē cúsi ni rī siquī jeē ni scándíje ri rohó te ni cācu ánuá rō.

<sup>20</sup> Núu súcuan, hermano, sáha ró favor yáha jíin rí siquī jeē cándíje ró Jítoho yō. Sáha ró jéē ndusi ni rī, siquī jeē cúu ró hermano cándíje Cristo.

<sup>21</sup> Te téee ri yáha núu rō, chi cúcáhnú váha ni rī jeē cuatáhú ró, te nde vihyá gā sáha ró vésú jeē ni jíicán rī.

<sup>22</sup> Te suni jíicán rī jeē sátūhva ró núu cóndee rī, chi ñúhun ni rī jeē quénda

ri yāhá te jeē rī nuū rō sáha Yaā Dios  
siquī jeē cájicān tahu rō jehē rī.

*Saludo jiín bendición jeē sándihí*

<sup>23</sup> Epafras, tēe íne jíin rí vecāa jeē  
siquī jnúhun Cristo Jesús, cáhán de jeē  
sándeýí ni rō.

<sup>24</sup> Te suni súcuan cácahān Marcos,  
jíin Aristarco, jíin Demas, jíin Lucas,  
tēe cáchindéé ñájnáhan jíin rí siquī  
jníñu ya.

<sup>25</sup> Te ñúhun ni rī jeē Jítóho yō Je-  
sucristo na sáha ga yā jeē váha róhó  
jíjnáhan ró. Súcuan na cóo. Amén.



## CARTA JEE CUAHAN NUU ÑAYUU HEBREO

*Jeē ní taji Yaā Dios Sēhe ya ni nacani ya jnūhun*

<sup>1</sup> Tijni jínu te tijni modo ni cahān Yaā Dios jíin táca jíi yō nde jenahán, chi ni taji yá tēe ni canacani jnūhun ya.

<sup>2</sup> Te vijna te tiempo cuándihi yāha ní taji yá maá Sēhe ya ni nacani ya jnūhun nuū yō. Te jíin Sēhe ya ni sáha ya ñayivi jíin táca gá, te ndivii jeē iyó ní chihi ya ndaha Sēhe ya.

<sup>3</sup> Te Sēhe ya yōhyo luu cújéhnū ya, nájnūhun luu cújéhnū maá yá. Te ndihi ndese cúu maá yá, suni súcuan cúu Sēhe ya. Te jíin poder jnūhun ni cahān Sēhe ya te iyó cutú ndihi-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā cújéhnū nde andiví.

*Jeē cújéhnū ga Sēhe Yaā Dios vēsú táca ndajéhé yā*

<sup>4</sup> Te ni ndujéhnū ndasí gá Sēhe ya vēsú táca ndajéhé andiví, chi ni nihīn yā tahū jeē ndiso ya jniñu jéhnū ndasí gá vēsú jniñu cándiso ndajéhé.

<sup>5</sup> Chi súcuan ni cahān Yaā Dios jíin Sēhe ya, te nasūu jíin ndajéhé yā: Máa ró cúu Sēhe ri, te vijna te ni sajehnū ri rohó jéē cúu ri Tatá rō.

Te suni ni cahān yā jnūhun Sēhe ya, te nasūu jnúhun ndajéhé yā:

Máa rí cúu Tatá nuū Sēhe ri,  
te maá i cúu Sēhe nuū rī.

<sup>6</sup> Te suni ná ni taji yá Sēhe ya cújéhnū, ni quiiji ini ñayivi yáha, te ni cahān yā: Ndihi ndajéhé rī na chíñuhún i Sēhe ri.

<sup>7</sup> Te ni cahān tucu ya jnūhun ndajéhé yā:

Nájnūhun quée tachī, súcuan cájica ndajéhé rī sáha ri,

te táca un jéē cájejniñu nuū rī,  
nájnūhun yáñuhún cácuu.

<sup>8</sup> Te jnūhun Sēhe ya chi sa suhva cáhán yā:

Máa ró cúu Yaā Dios, te ndacu ró jniñu ní cáni,

te jniñu ndácu ró, máni jniñu ndaā cúu.

<sup>9</sup> Cúsī ni rō jíin jniñu váha, te jíto uhū rō jniñu néé.

Jeē yúcuan ruhū, Yaā Dios maá ró, ni sáha ri

jeē yóhyo ga cúsi ni rō vēsú táca gá jeē iyó andiví.

<sup>10</sup> Te suni cáhán yā:

Máa ró cúu Jítoho, te nde xīhna ñuhún ni sáha ró jéē ni jécōo ñayivi.

Te andiví chi suni jeē ni sáha ró cúu.

<sup>11</sup> Te táca un chi naa, te maá ró chi ní cáni iyó ró.

Te táca un chi cutúhú nájnūhun cutúhú ñin sahna,

<sup>12</sup> te nacaquin jnahnū rō te nasama ró jíjnáhan.

Te maá ró chi ma sáma cuiti rō,  
te quiví cótecu rō ma ndíhi cuiti.

<sup>13</sup> Te súcuan ni cahān tucu yā jíin Sēhe ya, te nasūu jíin ndajéhé yā:

Cucōo ró lado váha ri nuū cújéhnū ró, te na sáha ri jeē quende rō poder táca jéē cájito uhū rohó.

Achí yá.

<sup>14</sup> Te táca ndajéhé yā chi mozo-ni cácuu, te taji yá cuango jeē chindéé ñáhán ñayuu jeē nihín tahū jeē jnama ya.

*Jeē ma cúhuun ni yō jíin jnúhun jnama ya yohó*

## 2

<sup>1</sup> Núu súcuan te cánuú jéē váha ga chuhun ni yō táca jnúhun ya jeē ní cajini yó, chi núu tuú te sanaa te scuíta yó.

<sup>2</sup> Chi nde jenahán ní jejniñu ya ndajéhé yā ni cacastūhun jnúhun ya, te ni cajini ñayuu jeē iyó ndáa. Te ñayuu níhni ni jíin ñayuu tu ní cájendetū jnūhun ún, vetū-ni ni canihín i castigo.

<sup>3</sup> Te núu súcuan ni cuu, te yohó, ¿ndese cácu yó núu ma chúhun ni yō jnúhun cánuú gá jeē jnama ya yohó? Chi xīhna gá maá Jítoho yō ni nacani ya jnūhun yáha, te sáa te tēe jeē ní cajini nahín ni canacani ndaā tucu maá de nuū yō.

<sup>4</sup> Te Yaā Dios suni ni chindéé ñáhán yá de jeē ní canacani de jnūhun ya. Chi ni sáha ya jíin de jeē ní casáha de sáin sáin jniñu jéhu jeē nahán náā ni yō jíto yó poder yā. Te suni ni jéhe ya Espiritu Santo yā nuū ñin ñin yó, ndese ni nujnahan ni maá yá sáha yó.

*Jeē ní nduu Jesús jnáhan ñayuu*

<sup>5</sup> Te Yaā Dios nasūu nuū ndajéhé yā ni jéhe ya jnūhun jeē condiso jniñu siquī ñayiví jéé quiji, chi sa suhva nuū Séhe ya Cristo ni jéhe ya. Te siquī ñayiví un cúu jeē cahán rī yāhá.

<sup>6</sup> Chi suhva yósó nuū tútu jeē ni cáhān David jíin yá:  
¿Na vé cúu ñayuu jeē ñūhun ni ní i?  
Te ndíhvi ni ni siquī i, te maá ñáyuu cúu i.

<sup>7</sup> Chi jecu-ni tiempo ni sáha ní jeē núu i nuū tācá ndajéhé ni.

Yūcuán na te sajuhnu ní i te squéndōo yíñúhún ní i,  
te caní ní i jeē ndacu i jniñu nuū tāca jéé ni sáha ní.

<sup>8</sup> Te ndíhi jeē iyó chi sáha ní jéé cujéhu i siquī.

Achí tutu. Te jeē ni sáha Yaā Dios jeē cujéhu i siquī ndíhi, núu súcuan te ma quéndōo ni ñin jeē ma cújéhu i siquī. Te vésú súcuan te vijna te ná tu coto yó jéé cujéhu i siquī ndíhi jeē iyó.

<sup>9</sup> Te jeē jíin yó vijna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jíhi yā jehé yō, te jeē yúcuán ní ndujéhu luu tucu ya, te ndíhi cáhiyo yíñúhún nuū yā. Chi jeē váha ni Yaā Dios jíin yó, jeē yúcuán ní jíhi Jesús jehé yō.

<sup>10</sup> Te ndíhi jeē iyó chi cuenta Yaā Dios cúu, chí maá yá ni sáha. Te suni ndéca ya cuehé ndasí séhe ya jeē quihín i andiví nuū luu cujéhu i jíin yá. Te váha níhín jniñu jeē ni jéhe ya jnūndóho nuū Jesús, chí jeē ní ndoho ya súcuan te cuu condeca váha ya ñayuu ní jnama ya.

<sup>11</sup> Chi Jesús jeē ni sándoo ya i te maá i jeē ní candundoo i, chí ñin-ni Tátá i jíin yá. Te jeē yúcuán tu cúcanu Jesús jeē cahán yā hermano yā jíin i, vésú ndasí núu i.

<sup>12</sup> Chi yósó nuū tútu jeē ni cáhān yā jíin Tátá yā:

Cachi na jnūhun ní nuū tācá hermano na,  
te mēhñu nuū cándutútú i cata ná ndese cújéhu ní.

<sup>13</sup> Te suni cáhān yā nájnūhun cácahān hermano yā:

Ruhū chí cándíje ri yā.

Te cáhān tucu yā:

Yāha íne ri jíin táca gá séhe Yaā Dios jeē ni jéhe ya nuū rī.

Achí Jesús.

<sup>14</sup> Te nájnūhun cácacu ñayuu jeē cúu i yiquí cúñu, suni súcuan ní cacu Jesús, návāha cuu yā jehé yō. Te súcuan ní snáā yā poder jexeén jeē squíví ñayuu nuū cuéchi te jíhi i.

<sup>15</sup> Te ni cacu ya súcuan návāha cuu quenehen ya tāca ñáyuu chíji jnūhun jeé yuhú i cuu i. Chí ní vida i ndóho i sáha ún.

<sup>16</sup> Te jendaá tu ní quiji ya jeē chindéé ñáhán yá tācá ndajéhé yā, chí sa suhva jeē chindéé ñáhán yá ñayuu cácaandíje jeē ní nduu yucūn Abraham.

<sup>17</sup> Jeé yúcuán ní jíin níñúhún nduu inuú yá jíin táca hermano yā, návāha cuu ya sutū cujéhu jeé squícu váha ya tācá jniñu jehé i nuū Yaā Dios. Chí ni cundáhú ni yā i, te ni ndahva yā cuéchi i jeē ni sócō yā maá yá jehé i.

<sup>18</sup> Chí suni maá yá ni ndoho ya jeē ní jíto ndee jnūndóho ya, te jeé yúcuán cuu chindéé ñáhán yá ñayuu jeé jíto ndee jnūndóho i.

*Cújéhu ga Jesús vésú Moisés*

**3**

<sup>1</sup> Hermano, ni cana Yaā Dios rohó, te cácuu ró ñáyuu ndoo maá yá. Núu súcuan te na nácani váha ni rō siquī Cristo Jesús, Yaā cúu apóstol jeé ní tejniñu Yaā Dios, te suni cúu ya sutū cujéhu siquī jnūhun cácaandíje yó.

<sup>2</sup> Chí ni squícu váha ya nuū Yaā Dios, Yaā ní tee jniñu un siquī yā, nájnūhun ni squícu váha Moisés nuū ñáyuu jeé ni cáhān Yaā Dios jeé cácuu i ñayuu vehe ya.

<sup>3</sup> Chi cújéhnú ndasí gá Jesús vésú Moisés, nájnūhun cújéhnú ndasí gá tēe sáha vehe nasūu máá vehe.

<sup>4</sup> Chi tācá vehe íyó tēe ni sáha. Te máá Yaā Dios cúu jeē ni sáha tāca jéē iyó.

<sup>5</sup> Te Moisés ni squícu vāha de jíin jniñu jeē ní cuu de mozo ni condito de ñayuu vehe Yaā Dios. Te ni castūhún de siquī tāca jnūhun jeē steén yā tiempo quiji.

<sup>6</sup> Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te vāha squícu ya jeē ni jéjnūhun ya nuū i. Te suni máá yó cácuu ñayuu vehe ya, te núu na cuíñi nihin yó jíin jnūhun cándije yó ndé quivī sándihí, te núu cúsi ni yō jeē ñūhun ni yō tāca jéē vāha jeē coo.

*Jnūhun jeē ndetātu ñáyuu Yaā Dios*

<sup>7</sup> Núu súcuan te na chúhun ni yō jeē cahán Espíritu Santo nuū tútu i:

Vijna te núu cuni sōho ró jéē cahán Yaā Dios,

<sup>8</sup> te ma cunihni ni rō nájnūhun ni cacunihni ni ñayuu jenahán.

Chi tu ní cájendetū i nuū yā ná ni cajica i nuū ñūhun téhé.

<sup>9</sup> Chi yūcuan ní casáha jíi rō jniñu jeē ni quitī ni rī, achí yá, vésú ni cajito i tācá jniñu ni sáha ri uū xico cuiyā.

<sup>10</sup> Jeē yūcuan ní quitī ni rī jíin ñáyuu tiempo un.

Te ni cahán rī jeē máni jeē castóo i ichi ndaā,

chi tu cácuu i condiquin i jnūhun ri.

<sup>11</sup> Te jeē yūcuan ní quitī ni rī, te ni cahán teyí rí

jeē ma quívicoo cuiti i nuū ndetátú i sáha ri.

Achí yá.

<sup>12</sup> Núu súcuan hermano, coto má conéé ánuá ni ñin ró jéē cáca yátá ró jeē tuá candije ró Yaā Dios, Yaā técu.

<sup>13</sup> Chi sa suhva tāca quivī na stihví jnáhan ni rō, níni gá iyó tiempo, návāha ma cunihni ni ñin ró te stáhú rōhó sáha ró cuéchi.

<sup>14</sup> Te núu na cuíñi nihin yó ndé quivī sándihí jíin jnūhun jeē ní quejéé yó jíin, yūcuán na te cuu yó jnáhan Cristo.

<sup>15</sup> Chi cáhán tutu:

Vijna te núu cuni sōhó ró jéē cahán Yaā Dios,

te ma cunihni ni rō nájnūhun ni cunihni ni ñayuu jenahán.

Achí.

<sup>16</sup> ¿Te ndé-ni cúu ñayuu jeē ní jini jnūhun ya te ni cunihni ni? Suu ndihí ñayuu jeē ni scácu Moisés jeē ní quendacoo Egipto.

<sup>17</sup> ¿Te ndé-ni cúu ñayuu jeē ni quitī ni yā nuū uū xico cuiyā? Suu ñayuu jeē ní casáha cuéchi, te ni cajihí i nuū ñūhun téhé.

<sup>18</sup> ¿Te ndé-ni i cúu jeē ni cáhán teyí yá jeē ma quívicoo cuiti i nuū ndetátú i sáha ya? Suu máá ñáyuu jeē tu ní cájendetū nuū yā.

<sup>19</sup> Núu súcuan te jíni yō jeē tu ní cúu quívicoo i nuū ndetátú i, siquī jeē tu ní cácandije i ya.

## 4

<sup>1</sup> Te níni íyó gá jnūhun jeē ni jéjnūhun ya jeē quívicoo ñayuu nuū ndetátú i sáha ya, te na cónso íyo yó jéē ma stíví yó, návāha tú coo jíin sava ró jéē ma nihín rō quiví ró.

<sup>2</sup> Chi suni máá yó ni cajini sōho yó jnūhun jeē jnáma ya yohó, nájnūhun ñayuu jenahán un. Te nuū maá i tu ní jéjníñu jnūhun ni cajini i ún, siquī jeē tu ní cácandije i.

<sup>3</sup> Te yóhó jéē cácandije, máá yó cúu jeē quívicoo yó núu ndetātu yó. Te siquī ñáyuu tu cácandije ni cahán yā suhva:

Jeē yūcuan ní quitī ni rī, te ni cahán teyí rí

jeē ma quívicoo cuiti i nuū ndetátú i sáha ri.

Te súcuan ni cahán yā vésú je íyó túhva nuū ndetátú i nde ná ni jecōo ñayiví.

<sup>4</sup> Chi súcuan yósó jnūhun nuū tútu i siquī quiví uxá:

Ní sínu Yaā Dios tāca jéē ni sáha ya, te ni ndetātu yá quiví uxá.

<sup>5</sup> Te suni nuū tútu un yósó tucu:

Ma quívicoo cuiti i nuū ndetátú i sáha ri.

Achí yá.

<sup>6</sup> Núu súcuan te sava ñayuu chi quívicoo nahín i nuū ndetátú i. Te

ñayuu jenahán jéē ní cajini jnūhun jeē jnáma ya i, tu ní quívicoo i siquī jeē tu ní cájendetū i nuū yā.

<sup>7</sup> Jeē yúcuān ní jeni tucu ya inga quivī jeē quívicoo ñayuu, te quivī un cúu vijna. Chi ná ni yāha cuehē tiempo jeē ni cáhān yā jíin ñáyuu jenahán, te yósó núu tútu jeē ni sáha ya jeē suni ni cahān David suhva:

Vijna te núu cuni sōho ró jéē cahán yā, te ma cúnihni ni rō núu súcuān.

Achí tutu.

<sup>8</sup> Te nde jenahán ní squívī Josué ñayuu Israel un ñuu nuū ndetātú i. Te tu ní cúu squívī de i nuū ndetātu ánuá i sáha ya. Chi núu súcuān te ma cahán gā Yaā Dios jíin táca ñáyuu jeē vijna cúu quivī jeē quívicoo i nuū ndetātú i.

<sup>9</sup> Núu súcuān te íyó túhva nahín ñn nuū ndetātu ñáyuu Yaā Dios, nájñūhun ni ndetātu máá yá.

<sup>10</sup> Chi ñayuu jeē quívicoo nuū ndetātú i jíin yá, chi ndetātú i jeē ní casájñiñu i, nájñūhun ni ndetātú Yaā Dios nuū jñiñu ni sáha máá yá.

<sup>11</sup> Núu súcuān te na ndúcú ndéyí yó quivī yó núu ndetātu yó un, te ma sáha ni ñn yó cuéchi jeē ma cándíje yó, nájñūhun ni casáha i nde saá.

<sup>12</sup> Chi jnūhun Yaā Dios ndíto técu te íyó poder. Chi cúu nájñūhun ñn espada jeē xeén ndíndúú lado, chi nástúu cájí ndese íyó jéē níjnūní yó jíin ánuá yō, nájñūhun sáha espada jeē jéhnde te nástúu nuū ñujnáhan yiqui jíin meque. Te jnūhun ya nástúu ndíhi ndese jéni ni yō jíin ndese cúní yō sáha yó.

<sup>13</sup> Te tu íyó ni ñn jeē yísāhí jeē tu jíiní maá Yaā jeē náquihin cuenta, chi ndíhi-ni jíiní vāha ya, te ndíhi-ni túu ndíjin nuū yā.

### *Jesús cúu sutū kujéhnu ga*

<sup>14</sup> Te cánevāha yó ñn sutū kujéhnu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuān na cuñi ñihin yó jíin jnúhun jeē ní cándíje yó.

<sup>15</sup> Chi névāha yó ñn sutū kujéhnu jeē jíto ndáhú yóhó jeē tu fuerza yō squícu vāha yó. Chi nájñūhun ndóho yó jéē jíto ndee jexeén yohó, suni

súcuān ni ndoho ya jeē ní jito ndee un yá, vēsú tú cuítí cuēchi ya.

<sup>16</sup> Núu súcuān te ma yūhu yó, chi na quívī yó yuhu mesa yā, cúu jeē cacān tahú yō. Chi manī yā jíin yó, te cúndáhú ni yā yohó, te siquī jeē váha ni yā te chíndéé ñáhán yá yohó táca jínu jeē jíni ñúhún yó.

## 5

<sup>1</sup> Chi táca sūtū jeē ní kujéhnu jenahán, ni nacāji Yaā Dios de mēhñu ñáyuu, te ni jeni ya de jeē cuñi de nuū yā jehē ñayuu, te socō de ndajñiñu jíin quítí nuū yā jeē siquí cuēchi i.

<sup>2</sup> Te cuu cahān vītá de jíin ñáyuu tu jécūhun ni jíin ñáyuu castívī, chi máá de suni tú na fuerza ini de squícu vāha de.

<sup>3</sup> Jeē yúcuān cúu jeē suni cánuú socō de quítí nuū yā jeē siquí cuēchi máá de, nasūu máá-ni jeē siquí cuēchi ñayuu.

<sup>4</sup> Te ni ñn tēe tu cúu sájéhnu de máá de jeē cuu de sutū kujéhnu, chi sa máá Yaā Dios cúu jeē nacāji ya de, nájñūhun ni nacāji ya Aarón nde jenahán.

<sup>5</sup> Te suni súcuān Cristo, tu ní sájéhnu ya maá yá jeē cuu ya sutū kujéhnu, chi sa Yaā Dios ni sáha, chi ni cahān yā jnūhun yáha:

Máá ró cúu Sēhe ri,

te vijna te ni saájéhnu ri rohó jéē cúu ri Tatá rō.

<sup>6</sup> Te suni cáhān tucu ya nuū tútu ñ:

Ní cáni cúu ró sūtū,  
nájñūhun sutū Melquisedec jenahán.

<sup>7</sup> Te Cristo, ná ni condee ya ñayiví, te ni jicān tahú yā, te nde ni ndahyū yā te ni ndahyū cohó yá. Te ni cahān ndahú yá jíin Yaā Dios, Yaā jeē cúu jnama ya jeē ma cúu yā nuú. Te siquī jeē yíñúhún ní chíñúhún yá Yaā Dios, te ni chíndéé ñájnáhan Yaā Dios jíin yá nuū jnūndóho ún.

<sup>8</sup> Chi vēsú Sēhe Yaā Dios cúu ya, te ni jendetū yā ni ndoho ya ini ñayiví, te súcuān ni jini yā ndese cúu jnūhun jendetū.

<sup>9</sup> Te ná ni cuu ni squícu ndíhi ya jeē ní jendetū yā, te ni cucutú jnúhun jeē

jnáma ya tāca ñáyuu jéndetū nuū yā, te cotecu i ñí cáni.

<sup>10</sup> Chi ni jeni Yaā Dios yā jeē cúu ya sutū kujénu nájñuhun sutū Melquisedec.

### *Siqui jeē ma cáca yátá i*

<sup>11</sup> Te íyó cuéhē jñuhun jeē castūhun rí siquī tāca jéē yáha. Te yí cúu jeē jécūhun ni rō sáha ri, siquī jeē tu cáconi rō chuhun ni rō.

<sup>12</sup> Te je ni cunahán cácandíje ró, te jíni ñúhún jéē cúu ró téē stéén nuú. Te tuú chi sa cájini ñúhún tucu máá ró téē stéén nuú rō tāca jñuhun Yaā Dios jeē tú yí cuiṭi. Chi sa ni canduu ró nájñuhun sūchi yíquín jéē jíni ñúhún caxin i, chi ná tu ije i caji i jeē ndáva. Súcuán cácuu ró chi ná tu ije ró jíni jñuhun yí gá.

<sup>13</sup> Chi núu máni máá nájñuhun sūchi yíquín jéxin cácuu ró, núu súcuán te tu cúu jecūhun vāha ni rō jñuhun ndaā.

<sup>14</sup> Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nácāji i jeē vāha jíni jéē neé.

## 6

<sup>1</sup> Núu súcuán te na yáha yó núu tāca jñuhun Cristo jeē tú-ni yí, te na quíhín yō nuū jñuhun yí gá, návāha na íje vāha ni yō jíni jñuhun ya. Te ma nde-jéé tucu yó jíni jñuhun jeē ni scuáha yó xíhna gā, suu jñuhun jeē nácani ni yō stóo yo cuéchi yó jéē cúu yō sáha, jíni jéē candíje yó Yaā Dios,

<sup>2</sup> jíni síquī jeē jéndute, jíni síquī jeē soó ndaha xinī ñáyuu, jíni síquī jeē nátecu ndíyí, jíni síquī jeē jnahnú ndetū ñayuu ñí cáni.

<sup>3</sup> Núu súcuán te na yáha yó núu tāca jéē yáha te quívi yó núu jñuhun yí gá, te núu cuāha Yaā Dios jñuhun.

<sup>4</sup> Chi íyó ñáyuu jeē jé ni jecūhun ni i, te je ni jini i tāca jéē jéhe Yaā Dios, te je ni quívi i nuū jñuhun stéén Espíritu Santo,

<sup>5</sup> te suni je ni jini i jñuhun vāha Yaā Dios jíni ndese coo poder yā tiempo quiji.

<sup>6</sup> Te ñayuu un núu caca yátá i, te ma cúu ga ndejéé jeé i jeē nácani ni i. Chi jeē cáca yátá i cúu nájñuhun jeē

nácagni tucu i Sēhe Yaā Dios jicā cruz, te cájēhe i jñuhun canu yā cájito ñayuu.

<sup>7</sup> Te ñayuu chi cácuu i nájñuhun ñuhun jeē cúun vāha saū nuū te ndóyo vāha. Te núu cánecoo jeē vāha caji téē cásjniñu, yūcuán na te cúsi ni Yaā Dios jíni.

<sup>8</sup> Te núu máni iñu yóquin jíni yucū sajnéñu cánecoo nuū, núu súcuán te tu jéjñiñu cuiṭi, te squéndōo íi yā, te ñn quívi te cayū. Súcuán jnahnú ndetū ñayuu cájica yátá.

### *Jeē ñuhun ni yō tāca jéē vāha jeē coo*

<sup>9</sup> Te máá ró jíni nájñuhun ró hermano, vésú cácahán rí súcuán jíni ró, te cácuáhnu ni rí jeē cácuu ró ñayuu cuiñi ñihin, chi ñayuu ni jnama ya cácuu ró.

<sup>10</sup> Te Yaā ndaā cúu Yaā Dios, te tu náa ni yā jniñu cása ha ró. Chi siquī jeē cáhíyo manī rō jíni yá te ni cundáhú ni rō hermano rō cácandíje, te ni cachindéé ñáhán ró i, te súcuán cása ha ró ndé vijna.

<sup>11</sup> Te cáconi rí jeē níni súcuán sáha ga ná ñn ná ñn ró ndé quívi sándihí, chi jeē sáha ró súcuán te ñihin rō ndihí jeē cáñuhun ni rō.

<sup>12</sup> Te cáconi rí jeē ma cúhuun ni rō, chi sa ndacu ró ñáyuu cácandíje jeē jíni paciencia cándetu i, te jeē yúcuán níhin tahu i tāca jéē ni jéjñuhun ya.

<sup>13</sup> Chi quívi jeē ni jéjñuhun Yaā Dios nuū Abraham, te ni ndacunehen ya maá yá jeē ni jéjñuhun téyí yá, chi tuá na inga ndacunehen ya jeē kujénu ga vésú maá yá jeē cuu testigo yā.

<sup>14</sup> Te ni cahán yā: Jendaá ndije jeē vāha ndasí sáha ri jíni ró, te sáha ri jeē nducuehē ndasí yúcun rō, achí yá jíni Abraham.

<sup>15</sup> Te jíni paciencia ni condetu de, te súcuán te ni ñihin de jeē ní jéjñuhun ya.

<sup>16</sup> Te núu cáhán teyí ñáyuu, te ndacunehen i síhví ñn jeē kujénu ga vésú maá i. Te núu íyó ñn jñuhun jeē tu cácandíje jñahan, te núu ñn téē cáhán teyí de jíni síhví Yaā Dios, yūcuán na te jécuiñi jeē cátejñahan.

<sup>17</sup> Te suni súcuán Yaā Dios, chi ni jéjñuhun téyí yá nuū ñáyuu jeē cuāha

ya tahū i. Chi ni cuni yā jeē cucáhnū vāha ni i jeē ma nácani yátá ni yā siquī jeē ni jéjnūhun ya nuū i.

18 Chi ma nácani yátá cuítī ni yā siquī jnúhun jeē ni cáhān yā uū jínu, iin jeē ni jéjnūhun ya, te inga jeē ni cáhān teyí tucu ya siquī suni jnúhun ún. Chi tu stáhú cuítī yā. Te jeē yúcuan máá yó jeē ní tūhva yó yá, chi yōhyo íyó ndeyí ni yō, te cáñuhun teyí ni yō jeē squícu ya jeē ni cáhān yā.

19 Te siquī jeē súcuan ñúhun ni yō, te suu sáha jeē quéndōo nīhin ánuá yō jíin jnúhun ya, te quéndōo ndaā ni yō, nájnūhun quéndōo nīhin barco jeē jnī gancho yuū. Te sáha jeē cúu quīvī yó andiví núū íí gā, nájnūhun cuarto íí gā jeē ni íyo ichi yátá sahma ni ndita caa ini vehe íí jenahán.

20 Te ini yūcuán chi xīhna gā Jesús ni quīvī, návāha nune ya ichi quīvīcoo yó. Te jeē yúcuan ní cáni cúu ya sutū cujéhnū nájnūhun sutū Melquisedec.

*Jeē cúu Jesús sutū nájnūhun Melquisedec*

## 7

1 Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéhnū téyí. Te ni jejnahan de Abraham ná ni nandicó Abraham jeē ní cundeyí de ni cajejnáhan de jíin táca rey. Te ni jicān tahu de jehē Abraham.

2 Te táca úxī ndajníñu jeē ní quende Abraham nuū táca rey un, ni jēhe de iin iin siquī un núū Melquisedec. Te síhvī Melquisedec cuní cahān: rey jeē sáha jniñu ndaā. Te suni nání de rey Salem, te jnúhun Salem cuní cahān: jeē iyó ndeyí síh ni. Te jeē yúcuan suni nání de: rey jeē sáha jeē iyó ndeyí síh ni ñayuu.

3 Te tu cáhān tutu jnúhun tátá de ni náná de ni táca jíí de. Ni tu cáhān núu ni cacu de, ni núu ni jihī de. Chi cúu de nájnūhun Jesús, Sēhe Yaā Dios, chi ní cáni cúu de sutū.

4 Te condēhe jíjnáhan ró náa jéhnū ni cuu Melquisedec, chi jíí jéhnū yó Abraham ní jēhe de iin iin siquī táca

jeē uxí nuū de siquī táca jēé ní quende de nuū rey un.

5 Te jíin yō jeē táca úxī ndajníñu ni canihīn ñayuu, ni cajēhe i iin iin siquī un ní caquihīn tēe cácuu sutū yucūn Leví, nájnūhun cáhān ley Moisés. Te ni caquihīn de nuū ñayuu cácuu jnāhan de, chi iin-ni yucūn Abraham cácuu de jíin i.

6 Te Melquisedec nasūu yúcūn Leví cúu de, te vēsú súcuan te ni quihīn de iin iin siquī táca jēé uxí nuū Abraham. Te suni ni jicān tahu de jehē Abraham, vēsú cúu Abraham tēe jeē ni jéjnūhun ya nuū.

7 Te jíin vāha yó jēé tēe cújéhnū ga cúu jeē jicān tahu jehē tēe núu ga.

8 Te ñayvī yáha chi táca sutū caquihīn de iin iin siquī táca jēé uxí nuū ñayuu, vēsú cácuu te tēe cájihī. Te Melquisedec suni ni quihīn de, te máá de chi cáhān tutu íí jeē técu de.

9 Te suni cuu cahān yō jeē Leví, tēe jeē ní quihīn iin iin siquī táca jēé uxí nuū ñayuu, suni nájnūhun nuū maá de ni quihīn Melquisedec iin iin siquī táca jēé uxí. Chi jeē ni jēhe Abraham nuū Melquisedec, suu cúu nájnūhun jeē suni ni jēhe de jeē siquī Leví jíin ndihī ga yucūn de jeē quíji.

10 Chi yucūn Abraham cúu Leví, te vēsú ná tu cacu de quīvī jeē ni jéjnahan Melquisedec Abraham, te nájnūhun jeē ni jēhe máá de cúu jeē ni jēhe Abraham.

11 Te yucūn Leví ni cane sutū Aarón jíin táca gá sutū ní quijicoo. Te ni castéén de ley yā nuū ñayuu Israel jenahán. Te núu ní cúu sáha de jeē quendōo ndaā ñayuu jíin ley un núu, te tuá cánuú jeē núcuñī inga clase sutū lugar Aarón jíin yúcūn de. Te inga clase sutū cúu Cristo jeē cúu ya nájnūhun sutū Melquisedec.

12 Te núu nucuñī inga clase sutū, te suni cánuú sáma ley siquī yucūn de.

13 Núu súcuan te ni sáma ley un, chi cáhān tutu íí jeē Jítoho yō Jesús cúu inga clase sutū ún, te ni cacu ya chíji inga yucūn. Te yucūn ní quíji ya ún, tú ni iin ní cúu sutū.

14 Chi jíni vāha yó jēē chíji yucūn Judá ni cacu Jitoho yō. Te yucūn ún chi tu ní cáhán cuiṭi Moisés jeē cánecoo sutū.

15 Te cáji cúu jeē ní nucuĩñi Cristo jeē cúu ya inga clase sutū nájnūhun sutū Melquisedec.

16 Te tu cúu ya sutū jeē ní cacu chíji yucūn Leví nájnūhun cáhán ley jenahán. Chi cúu ya sutū siquī jeē ndíso ya poder cotecu yā ní cáni te ma cúu cuiṭi yā.

17 Chi súcuan ni cahān Yaā Dios jnūhun ya:

Ní cáni cúu ró sūtū,  
nájnūhun sutū Melquisedec.

18 Núu súcuan te jniñu jeē ní ndacu ley jenahán siquī sutū, chi ni naa vijna, chi tu ní níhín jniñu quendōo ní cáni.

19 Chi ley Moisés tu ní sáha jeē quendōo ndaā ñayuu. Te ni nihīn yō ñi jnūhun vāha ga jeē ñúhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

20 Te jíni jēē ni cáhán teyí Yaā Dios te cúu Jesús sutū.

21 Chi tāca gá tēe ún, nasūu jíni jnūhun jeē ni cáhán teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhán tutu:

Ni cahān teyí máá Jitoho yō Yaā Dios,  
te ma nácani yátá ni yā:

Ní cáni cúu ró sūtū,  
nájnūhun sutū Melquisedec.  
Achí yá.

22 Núu súcuan te jíni Jesús ni cucutú ñi contrato vāha ga vēsú ley jenahán.

23 Te tāca gá sutū ún, chi ni íyo cuehē de, chi siquī jeē cájihī de te tu ní cúu cuiñi de ní cáni.

24 Te Jesús chí cúu ya sutū jeē cuiñi ní cáni, chí técu yā ní cáni.

25 Jeē yúcuan ndíso jniñu ya jnama ya ñayuu quíjicoo núu Yaā Dios, cotecu i ní cáni. Chi ní cáni técu yā te cáhán yā jehē i jíni Yaā Dios.

26 Núu súcuan te vāha ndasí sutū kujénu cúu Jesús, jeē nájnūhun jíni ñúhún yó. Chi sutū ñi cúu ya, te tú na cuēchi ya, te íyo ndoo ya, te tu cúu ya

jnáhan ñayuu casáha cuēchi, te cújénu teyí yá nde nuū sucún gá andiví.

27 Te máá yá tu jíni ñúhún sáha ya nájnūhun ni casáha sutū cácujeñu jenahán, jeē ndiquiví ni casocō de quiṭi siquī cuēchi máá de xihna gā, te sáa te siquī cuēchi ñayuu. Chi ñi jíni-ni ni socō yā máá yá jehē yō, te ni cuu-ni.

28 Chi ni jeni ley Moisés tāca sūtū kujénu jeē tú na fuerza squícu vāha. Yūcuán na te cuéé gá te ni cahān teyí Yaā Dios. Te jíni jēē ni cáhán teyí yá, te ni jeni ya Sēhe ya jeē cúu ya sutū kujénu, te sutū ndaā sutū vāha cúu ya ní cáni.

*Jeē ndíso jniñu Cristo siquī ñi contrato jeé*

## 8

1 Núu súcuan te jnūhun cánuú gá jeē jé ni cahān rī cúu yāhá: Névāha yó ñi sutū kujénu nájnūhun ni cahān rī, te ndéé yá lado vāha mesa nuū ndácu jniñu máá Yaā kujénu nde andiví.

2 Te vijna te cúu ya sutū nde andiví, jeē cúu ndije lugar ñi jeē ni sáha máá Jitoho yō Yaā Dios, nasūu ñayuu. Chi tu cáa nájnūhun vehe ñi jenahán jeē ní casáha ñayuu.

3 Te tāca sūtū kujénu ni jeconaā de jeē socó de ndajniñu jíni quiṭi nuū Yaā Dios. Núu súcuan te Jesucristo suni ni jíni ñúhún jeē socó yā jeē cúu ya sutū.

4 Te núu ní íyo ga yā ñi ñayiví, te ni ma quijnáhan jeē cúu ya sutū jíni táca gá sutū, chí níni cásocō gā de quiṭi nájnūhun cáhán ley Moisés.

5 Te jniñu casáha de, tu quijnáhan jíni jēē iyó andiví. Chi cúu ñi muestra-ni jeē steén siquī andiví. Te cúu nájnūhun jeē ni cáhán Yaā Dios jíni Moisés quiṭi ní quejéé de sáha de vehe ñi jenahán: Coto vāha ró jēē sáha ró táca ndajniñu nájnūhun jíto jeē ni steén rī nuū rō nde xiní yúcu, áhí Yaā Dios jíni de.

6 Te vijna te sáha Cristo jniñu jénu ndasí gá vēsú jeē casáha tāca sūtū ún, chí ndíso jniñu ya siquī contrato jeé jēé yóhyo vāha ga, chí ndíso jnūhun jénu ga jeē ni jéjnūhun Yaā Dios.

<sup>7</sup> Chi contrato ley xīhna ñúhún, núu jeē ni sáha jeē quée vāha jniñu núu, te tuá cánuú jéē cóo contrato uū.

<sup>8</sup> Chi ñayuu jenahán un jéē tu ní cáquendōo ndaā, suhva ni cahān Yaā Dios jíin i, áchí tutu:

Quiji quivī jeē nasáha ri ñn contrato jeé jíin ñayuu Israel jíin ñayuu Judá, áchí Jítóho yō Yaā Dios.

<sup>9</sup> Te ma cóo nájñuhun contrato jeē ni sáha ri jíin jíi i jenahán, quivī jeē ní jñi ri ndaha de jíjnáhan de, te ni quenehen ri de ini nación Egipto. Chi tu ní cásquicu vāha de jíin contrato ley rī.

Jeē yúcuan tuá ni táñúhún rí de, áchí Yaā Dios.

<sup>10</sup> Núu súcuan te suhva coo contrato jeē nasáha ri jíin ñayuu Israel, nde na quiji quivī yúcuan, áchí Jítóho yō Yaā Dios:

Sáha ri jeē jécūhun ley rī nuū jeē níjnūni i, te suni ini anuá i tee ri jñuhun ley rī. Te cuu ri Yaā Dios maá i, te maá i cuu ñayuu maá rí.

<sup>11</sup> Te tuá jíni ñúhún stéén i nuū jnáhan i nuū ñáni i, návāha cuni i ndese Yaā cúu Jítóho i. Chi ndihí i cuni ndese Yaā cúu rí, nde ñayuu núu ga jíin ndé ñayuu kujéhnū ga.

<sup>12</sup> Chi cone cáhnu ni rī nuū i jeē ní casáha i jniñu néé, te ni ma núcūhun ga ni rī cuéchi ni casáha i. Achí Yaā Dios.

<sup>13</sup> Te jeē ni cáhān yā jeē cuáha ya ñn contrato jeé cúu jeē ní cachi yā jeē tuá cuajniñu contrato xīhna ñúhún. Te ñn jeē ní cutúhú jéē tuá jejniñu, chi jíni yō jeē je yajni naa.

*Vehe iñ ñayiví yáha ní steén ndese cáa andiví*

## 9

<sup>1</sup> Te ndaā chi contrato xīhna ñúhún ní ndacu jniñu ndese chiñúhún i ya, jíin ndese coo ñn vehe iñ ini ñayiví yáha.

<sup>2</sup> Te ni cuvāha vehe iñ ún, te ni iyo uū cuarto. Te cuarto xīhna ñúhún jéē naní cuarto iñ, ni iñ candelero oro jíin mesa oro jíin pan iñ.

<sup>3</sup> Te ni iyo sahma jeē ndíta caa jeē ndihyú inga cuarto jeē naní cuarto iñ ndasí gá.

<sup>4</sup> Te ini un ní iyo ñn altar oro nuū cayú sūje cútú, jíin yéjnū jeē ñúhun contrato ley, te máni oro cúu ní síquī yejnú. Te ini yejnú un íne ñn tí-jehēn oro jeē ñúhun maná jeē ní cuun andiví. Te suni íne vara Aarón jeē ní nane numa, jíin tabla yuū jeē yosó jñuhun contrato ley.

<sup>5</sup> Te síquī yejnú un ní cahīn ndindúú figura ndajéhé querubín jeē steén jeē íne Yaā Dios. Te ni sáha cuandahū síquī tapa yejnú nuū ní cóso yuyú níñi jeē ndáhva cuéchi. Te tu núne yó cáhān gā yō síquī tāca yúcuan vijna.

<sup>6</sup> Te ná ni jīnu tācá un, te núu-ni núu-ni quívicoo sutū ini cuarto xīhna ñúhún jéē casáha de jniñu jeē cúu de sutū.

<sup>7</sup> Te ini cuarto uū, chi tu cúu quívicoo na-ni sutū jíin inga ñayuu, chi máñúhún-ni sutū kujéhnū ga cúu jeē quíví, te suni ñn-ni vuelta jeē cuiyá. Te suni ma cúu quíví de núu tú níñi quití jeē socó de nuū Yaā Dios jeē síquī cuéchi máá de jíin síquī cuéchi ñayuu.

<sup>8</sup> Te jíin yúcuan stéén Espíritu Santo nuū yō jeē ná ni iyo ga cuarto iñ xīhna ñúhún ini ñayiví, te tu ní núne ichi jeē quíví ñayuu ini lugar iñ ndasí jeē cúu andiví.

<sup>9</sup> Chi tāca yúcuan cúu jeē ní stéén ndese cúu tiempo vijna. Chi jeē ní casocō i ndajniñu jíin quití nuū Yaā Dios, chi tu ní cúu cuití sáha jeē quéndōo ndoo ánuá ñayuu ní casocō ún.

<sup>10</sup> Chi tācá un ní steén máni síquī yiqui cúñu yō, ndese caji yō, ndese coho yó, ndese ndundoo yó. Te ni jejniñu máá-ni nde ni quiji Cristo jíin ñn modo vāha ga.

<sup>11</sup> Chi vijna je ni quiji Cristo, te cúu ya sutū kujéhnū ga jeē ndíso jniñu ya



siquē tāca jēē váha jeē ní quiiji vijna. Te cúu ya sutū ini lugar iī nde andiví jēē cujéhnū ga te vāha ga vēsú cuarto iī jenahán. Te nasūu jēē ní casáha ñayuu cúu, chi nasūu cuenta ñayiví yáha cúu.

12 Te jeē ni quiví ya ini lugar iī ndasí gá nde andiví, te nasūu jíin níñi ndixúhú ni níñi becerro, chi jíin níñi maá yá ni quiví ya, ni socō yā in jínu-ni jeē ní cáni. Te súcuan ni jnama ya yohó jēē cótecu yō ní cáni.

13 Chi nde jenahán te níñi síquē jíin níñi ndixúhú jíin yāā becerro jeē ni cáyū nuū altar, ni cacosō yuyú de síquē ñayuu jeē tu iyó ndoo ánuá i, te súcuan ni ndundoo i nuū yā.

14 Te núu ni nihīn jníñu níñi tācá quití ún, te nagā ni cuu níñi maá Cristo. Chi Yaā ndoo cúu ya, te ni socō yā maá yá nuū Yaā Dios, ni sáha Espíritu jeē iyó ní cáni. Te níñi yā nácate ánuá yō nuū jníñu néé jēē cúu yō sáha. Te súcuan te cuu cuajníñu yó nuū Yaā Dios, Yaā técu.

15 Jeē yúcuan cúu jeē ndíso jníñu ya síquē in contrato jeé. Chi ni jihí yā, te súcuan ni quende yā cuēchi ni casáha ñayuu ná ni iyo i chíji contrato xīhna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeē cóo ní cáni, nájnūhun ni jejnūhun ya.

16 Chi cúu nájnūhun núu sáha in tēe acta jeē cahán síquē tahū, te nde na cúu de te níhín jníñu.

17 Chi núu técu gā tēe ni sáha, te tu níhín jníñu. Te nde núu ni jihí de, te sáa te jéjníñu.

18 Te suni súcuan contrato xīhna ñúhún, suni ni jini ñúhún cucutú jíin níñi quití ní jíhí. Te contrato jeé chi ni cucutú jíin níñi Cristo jeē ní jíhí yā.

19 Chi ná ni cuu ni cachi Moisés tācá jníñu ndácu contrato ley un núu ndivii ñayuu, te ni quihin de níñi becerro jíin níñi ndixúhú jíin ndute, te jíin ixí cácuéhé jíin yúcū hisopo ni cosō yuyú de síquē libro ley jíin síquē ndivii ñayuu.

20 Te ni cahán de: Yáha cúu níñi jeē cucutú contrato ley jeē ní sáha Yaā Dios jíin yó, achí de.

21 Te suni níñi un ní cosō yuyú de nde maá vehe iī jíin tāca ndajníñu ni cajejníñu de jeē cáchiñúhún de ya.

22 Te je yajni ndihí ndajníñu, chi cáhán ley un jeē jíini ñúhún ndundoo jíin níñi. Te núu ma cáti níñi te ma cóne cáhnu ni yā nuū cuēchi núu.

*Jeē ni sócō Cristo maáyá jeē quénde yā cuēchi*

23 Núu súcuan te tācá ndajníñu un jēē cácuu muestra tāca jēē iyó andiví, ni jini ñúhún ndundoo jíin níñi quití. Te tāca maá jēē iyó andiví, chi ni jini ñúhún ndundoo jíin níñi Cristo jeē yóhyo vāha ga.

24 Te Cristo chi tu ní quiví ya ini lugar iī jeē ní casáha ñayuu, chi in muestra-ni ni cuu un jēē steén ndese iyó lugar iī ndije nde andiví. Chi maá andiví ní quiví ya, te vijna íne ya nuū Yaā Dios jeē cahán yā jehē yō.

25 Te maá sūtū cujéhnū ga quiví de tāca cuiyá ini cuarto iī gā jeē socó de níñi quití. Te Cristo tu ní sócō yā maá yá cuehē jínu, chi in jínu-ni.

26 Chi núu jeē súcuan te cánuú jēē cuehē jínu ndoho ya nde ná ni jecōo ñayiví te nde vijna núu. Te tuú chi sa tiempo cuándihí yáhá ni quenda ndijin yā in jínu-ni jeē ní cáni, ni socō yā maá yá jeē ní quende yā cuēchi.

27 Te nájnūhun ni cundaā jeē cúu tāca ñayuu in jínu-ni, yūcuán na te sándaā Yaā Dios jníñu i,

28 suni súcuan Cristo ni jihí yā in jínu-ni jeē ní sócō yā maá yá jeē ní quende yā cuēchi cuehē ñayuu. Yūcuán na te ndiji ya inga jínu, te nasūu jēē socó tucu ya maá yá jeē quénde yā cuēchi, chi sa suhva jeē jnáma ya ñayuu jeē cándetu i jeē ndíji ya.

## 10

1 Chi ley Moisés ni cuu in muestra-ni tāca jēē váha jeē ní quiiji jíin Cristo, in jeē steén-ni ndese coo maá jēē váha. Jeē yúcuan tu cúu cuií sáha ley un jēē quéndōo ndaā ñayuu jeē quíjicoo i nuū Yaā Dios jeē cásocō i quití nuū cuiyá nuū cuiyá.

2 Chi núu ní cúu sáha ley un jéé quéndōo ndaā i, te jecuiñī jeē cásocō i quiti núú. Chi núu ní cúu, te ñ jínu-ni te je ni quendōo ndoo ánuá ñayuu cásocō ún, te ma yūhu gá anuá i jeē ni sáha i cuēchi núú.

3 Te tuú chi jeē cásocō i quiti ún táca cuiyā, sa sáha jeē núcūhun ni i cuēchi i.

4 Chi niñī stiquī jín niñī ndixúhú, ma cúu cuiiti quende cuēchi.

5 Jeē yúcuan ná ni quiji Cristo ini ñayiví, te ni cahān yā jín Yaā Dios:

Jeē jéhni i quiti jín jéé jéhe i ofrenda nuū ní, chi tu ní nújnahan ni ní. Te ni sátūhva ní yiqui cúñu maá ná jeē socó na.

6 Te tu ní cúsi ni ni jéé jéhu i quiti te sócō i ti jeē ndúndoo cuēchi i núú.

7 Yūcuán na te ni cahān ná: Yāha véji ná jéé squícu ná jniñu jeē nújnahan ni ní, Tátā Yaā Dios.

Chi súcuan je yósó jnúhun na núu tútu. Achí Jesús.

8 Xihna gā ni cahān yā jeē tu ní nújnahan ni Yaā Dios te tu ní cúsi ni yā jeē jéhni i quiti te jéhe i ofrenda, jín jéé jéhu i ti te sócō i ti jeē ndúndoo cuēchi i núú, nájnūhun ndácu ley jenahán jniñu.

9 Te ni cahān gā yā: Yāha véji ná jéé squícu ná jniñu jeē nújnahan ni ní, Tátā Yaā Dios. Te jeē ni cahān yā súcuan, te ni sáha ya jeē jecuiñī jeē cásocō i quiti, chi ni socō yā maá yá.

10 Te ni sáha Yaā Dios jeē iyó ndoo íyó íi yō nuū yā siquī jeē ni sáha Jesucristo jeē nújnahan ni Yaā Dios, suu jeē ni sócō yā yiqui cúñu yā ñ jínu-ni jeē ní cáni.

11 Te táca sūtū ún ndiquiví ni cahān de ni cajejniñu de nuū yā, te cuehē jínu cájehni de suu quiti jeē socó socó de. Te táca un chi ma cúu cuiiti quende cuēchi.

12 Te Cristo chi ñ jínu-ni jeē ní cáni ni socō yā maá yá jeē siquí cuéchi yó. Te sáa te ni cucōo ya lado váha Yaā Dios nuū kujéhu ya.

13 Te yūcuán ndétu ya vijna nde quiji quiví jeē quénde yā poder táca jéé jító uhū nuū yā.

14 Chi jeē ni sócō yā maá yá ñ jínu-ni, te ni sáha ya jeē ní cáni quendōo ndaā ñayuu ni sándoo ya.

15 Te máá Espíritu Santo suni cáji cáhán yā siquī jnúhun yáha, chi xihna gā cahán yā:

16 Suhva coo contrato jeē nasáha ri jín i,

nde na quíji quiví yúcuan, áchí Jítóho yō Yaā Dios:

Sáha ri jeē jécūhun ley rī ini anuá i, te suni nuū jeē níjnūni i tee ri jnúhun ley rī.

17 Yūcuán na te cáhán gā yā:

Ma núcūhun cuiiti gā ni rī táca cuéchi jín jniñu néé ní casáha i.

Achí yá.

18 Núu súcuan te núu je ni ine cáhnu ni yā nuū cuéchi yó, te tuá cánuú jéé socó gā yō jeē siquí cuéchi yó.

*Jeē ní nune ichi quiví yó núu Yaā Dios*

19 Jeē yúcuan hermano, ma ñ jeē cáni ni yō, chi cuu quiví yó lugar ñ ndasí ndé nuū iyó Yaā Dios, siquī jeē ní jeti niñī Jesucristo.

20 Chi ní nune ya ñ ichi jéé jéé cótecu yō ní cáni sáha ya. Chi ná ni jihí yā te ni tahndē sahma ndíta caa jeē ndihyú lugar ñ ndasí gá ini vehe ñ. Te súcuan ni steén Yaā Dios jeē núne quiví yó lugar ñ ndasí gá nuū iyó yá.

21 Te Jesús cúu sūtū kujéhu ndasí jeē ndíto yóhó ñayuu cácuu sēhe Yaā Dios.

22 Núu súcuan te na quivícoo yó núu Yaā Dios, te na cóo ndije ndaā anuá yō, te na cándije ñhin yó jéé iyó ndaā ndíhi jnúhun ya. Chi jín niñī Cristo ni ndundoo ánuá yō nuū táca cuéchi ni casáha yó, nájnūhun ni ndundoo yó núu yā jeē ní jendute yó jín ndute.

23 Te na cuíñi ñhin yó jín jnúhun jeē cácahán yō jeē ñúhun ni yō jeé sáha ya jeé váha jín yó. Te ma cáca yátá yó, chi váha squícu máá Yaā Dios jeē ni jéjnūhun ya nuū yō.

24 Te na nácani ni yō ndese stíhvi jnáhan ni yō jeé cundáhú gá ni yō jnáhan yó, jín jéé sáha yó jniñu váha.

25 Te níní na ndútútú yó chiñúhún yó yā, te ma cúhuun ni yō nájñuhun cásáha sava i, chi sa víhyá gā na stíhví jnáhan ni yō, chi je cájini yō jeē cuácuyajni quiví ndíji ya.

26 Te núu je ni jecūhun ni yō te ni jetáhú yó jñuhun ndaā, te núu máni sáha sáha-ni yó cuéchi, núu súcuan te tuá na inga iyó jéē cúu síquī cuéchi yó.

27 Chi sa quéndōo máni ga jñuhun xeēn síquī yō jeē quiji quiví juicio te quiji yáñuhūn xeēn jeē cayū ñayuu jeē cájito uhū i ya.

28 Ñayuu squéhichí ley Moisés, te núu uū chí únī ñayuu cahán cuéchi síquī i, te cuu nahín i, te tuá na jñuhun cúndáhú ni iyó.

29 Te nagā ni cuu jeē ma ndóho xeēn gā ñayuu jeē squéhichí i máá Séhe Yaā Dios, chi nájñuhun jeē jeñú níhnu i síquī yā. Te sáha i jeē tu ndé jéjníñu níñí yā jeē ní jeti síquī contrato jeē ndúndoo i nuū yā nuú. Te súcuan sáha ndevāha i nuū maá Espíritu Yaā Dios jeē sáha jeē váha yóhó.

30 Chi je jíní yō jeē ni cáhān maá yá: Máá rí sáha jeē ndutahū i síquī cuéchi i, máá rí cuāha castigo i, áchí Jítóho yō. Te suni cáhān: Máá Jítóho yō sándaā yā síquī cuéchi ñayuu yā.

31 Núu súcuan te xeēn ndasí cúu jeē quiví ñayuu ini ndaha Yaā Dios, Yaā técu, jeē ndútahū i síquī cuéchi i.

32 Te na núcūhun ni rō ndese ni cuu ichi yátá, nde náa sá ní quejéé ró caca ró jín luz yā, te ni cajendeyí ni rō ni candoho ró tijni jñúndóho xeēn.

33 Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jñuhun cuiñí ró jín ñayuu ni candoho súcuan.

34 Chi ni cacundáhú ni rō ñayuu ní cahīn vecāa jeē síquī yā, te ni cacusī ni rō vésú ni caquende ñayuu nda-jníñu ró. Chi ni casáha ró cuenta jeē ndé andiví cánevāha ró ñn tahū jeē váha ndasí gá jeē coo ní cáni.

35 Núu súcuan te ma siaá rō jñuhun jeē ní candíje ndije ró jéé váha ni yā, chi cuehē ndasí táhū nihīn rō síquī ún.

36 Chi cánuú jéē cuándeyí ni rō

návāha sáha ró jéē nújnahan ni Yaā Dios, te nihīn rō jeē ni jéjñuhun ya.

37 Chi cáhān tutu i:

ñn núnúu-ni te ndee Yaā ndiji, te ma cucuéé yá.

38 Te ñayuu jeē ní ndahva rī cuéchi i, cotecu i jeē candíje i jeē sáha rī jehē i.

Te núu na cáca yátá i, te ma cúsi ni rī jín i.

Achí Yaā Dios.

39 Te yóhó tu cácuu yó jnáhan ñayuu cájica yátá jeē jnahnú ndetū i. Chi sa cácandíje yó jéē nihín tahū yō cotecu anuá yō.

### *Siquī jñuhun cándíje*

## 11

1 Te jeē candíje yó, suu cúu jeē cúndaā ndije ni yō jeē nihín yō tāca jéé ñuhun ni yō, jín jéé jíní váha yó jéé iyó ndije tāca jéé tu cájito yó núu vijna.

2 Te ñayuu jenahán chi ni jejnúhún yá i síquī jeē súcuan ni cacandíje nihín i.

3 Síquī jeē candíje yó cúu jeē jécūhun ni yō jeē ni sáha Yaā Dios ñayiví jín jñuhun ni cahān-ni ya. Te jín poder Yaā Dios jeē tu jító yó núu, ni jecōo tāca jéé jító yó núu.

4 Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vésú Caín. Te jeē yúcuan ní jejnúhún yá jeē iyó ndaā de, chi ni jetáhú yá jeē ni sócō de quiñi nuū yā. Te vésú ni jihí de, te cáhān gā ejemplo de jín yó nde vijna, chi ni candíje ndaā de.

5 Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jíhí de. Te tu ní cánanihīn ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusī ni yā jín táca jéé ni sáha de.

6 Te núu tu cándíje yó jéé sáha ya jehē yō, te tú na modo cusī ni Yaā Dios jín yó. Chi ñayuu jeē cuní quivícoo ndaha ya, cánuú jéé candíje ndaā i jeē iyó yá jín jéé cuáha ya tahū nuū ñayuu jeē nducú i candíje i ya.

<sup>7</sup> Te Noé ni candíje de jeē sāha Yaā Dios jehē de, ná ni castūhun yá nuū de jeē coo jnūndóho jeē ná tu coto de jeē coo. Te jeē yúcuan ní jendetū de ni sāha de barco cáhnu jeē naní arca, návāha cācu de jíin ní vehe de. Te jeē súcuan ni candíje de, te ni cane cuēchi siquī ñayuu jeē tu ní cándíje i ya. Te ni ndahva yā cuēchi de siquī jeē ní candíje de jeē sāha ya jehē de.

<sup>8</sup> Te Abraham ni candíje de jeē sāha ya jehē de, te jeē yúcuan ní jetáhú de ná ni cahān yā jíin de jeē quihín de ñn lugar nuū cuáha ya cuu tahū de. Te ni quenda de cuahān de, vēsú tu jíin de ndé nuū quihín de.

<sup>9</sup> Ni candíje de jeē sāha ya jehē de, te jeē yúcuan ní condee tatú de nuū ñūhun jeē ni jéjnūhun ya jeē cuáha ya nuū de. Te ni condee de vehe ññ, te suni súcuan Isaac jíin Jacob, chi sēhe de ún suni ñnuú níhñ tahū i jíin de jeē ni jéjnūhun ya.

<sup>10</sup> Chi ni ñūhun ni de condee de máá ñuu andiví jēe iyó cutú cimientó, te máá Yaā Dios ni jequin yā ni sama ya ñuu ún.

<sup>11</sup> Te suni ni candíje máá Sara jeē sāha ya jehē ña, te jeē yúcuan ní nihñ ña fuerza jeē ní jecūhun sēhe ña. Chi nde ná ni yāha ndasí cuíyā ña, te ni cacu ñn sēhe yí ña, chi ni candíje ña jeē squícu Yaā Dios jeē ni jéjnūhun ya.

<sup>12</sup> Te súcuan ni cuu jeē ni táhū cuehē ñayuu ni sāha ñn-ni Abraham, vēsú je jéhnu ndasí de. Te yucūn de ni nducuehē ndasí, nájnūhun quimí andiví, jíin ññti yumar, jeē ma cúu cuíti cahu yó.

<sup>13</sup> Te tāca tée cándíje un, ní cajihí de. Te vēsú tu ní cájito de jeē ni jéjnūhun ya, te ni cajini vāha de jeē cóo, te ni cacusiñ ni de jeē cóto de ñnga tiempo. Te súcuan ni cacahān de jeē ñayuu ñuu jicá ñayuu tatú cácuu de ini ñayiví yáha.

<sup>14</sup> Te tāca tée jeē cahán súcuan, chi stéén cají de jeē nducú de ñn ñuu jeē cúu andiví núu cúu ñuu maá de.

<sup>15</sup> Chi núu jeē cánaani ni de siquī ñūu nuū ní quendacoo de, te íyó

modo jeē nándicó cóo de te núu jeē cácuu de núu.

<sup>16</sup> Te tuú chi ni cacuu ndasí ni de coyúcú de ñnga ñuu vāha ga jeē cúu ñuu andiví. Jeē yúcuan tu cúcanu Yaā Dios jeē naní yá Yaā Dios de jíjnāhan de, chi je ni sátūhva ya ñn ñuu nuū cóyúcú de.

<sup>17</sup> Ni candíje Abraham jeē sāha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni íyo tūhva de jeē socó de sēhe de un jēe mañúhún ni i nuū de, vēsú ni nihñ de jnūhun jeē ni jéjnūhun ya suhva siquī i:

<sup>18</sup> Isaac cúu tēe jeē squejéé rí yucūn rō quihñ, achí jnūhun ni jéjnūhun ya.

<sup>19</sup> Te ni sāha de cuenta jeē cúu nastécu Yaā Dios i. Te nájnūhun súcuan ni cuu, chi cuu cahān yō jeē nájnūhun ni jihí i te ni natecu i nuū de, chi ni jesi-ni ya jeē ma cáhni de i.

<sup>20</sup> Ni candíje Isaac jeē sāha ya jehē de, te jeē yúcuan ní cahān de jeē vāha tahū nihñ sēhe de Jacob jíin Esaú tiempo quiji.

<sup>21</sup> Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihñ ndindúú sēhe yí José. Te yítuu de vara de, ni chiñúhún de Yaā Dios.

<sup>22</sup> Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yucūn Israel, ñn quiví quendacoo i nación Egipto. Te ni ndacu de jniñu jeē chíndūji i yiqui de ñuu nuū quívicoo i.

<sup>23</sup> Te ná ni cacu Moisés, te tátá i náná i ni cacandíje de jeē sāha ya jehē de, te jeē yúcuan ní cacondito sáhi de i uní yoō. Chi ni cajito de jeē lúu cáa i, te tu ní cáyūhú de siquī acta jeē ni sāha rey jeē na cúu tāca súchi yí.

<sup>24</sup> Te suni súcuan ni candíje Moisés, te jeē yúcuan ná ni jehnu de te tuá ni jéhe de jnūhun cuu de sēhe ñahan cúu sēhe síhí rey Egipto.

<sup>25</sup> Chi sa ni cuu ni de ndoho de jíin tāca jnāhan de ñayuu Yaā Dios, nasūu jēe cusñ ni de jecu-ni tiempo jíin cuéchi.

26 Chi ni sáha de cuenta jeē núu cahān neé ñayuu siquī de jeē siquī Cristo, te yūcuan sáha jeē cucá ndasí gá de ndihí jeē ndíso jnūhun Yaā Dios, vēsú jeē nihín de ndihí ndajniñu cucá íyó nación Egipto. Chi ni ñuhun ni de jeē cuáha ya tahū de.

27 Te jeē súcuan ni candíje de, jeē yúcuán ní quenda de nación Egipto cuahān de. Te tu ní yúhú de jeē quití ni rey nuū de. Chi ni ñin ñihin de siquī jniñu sáha de, chi ni sáha de cuenta jeē je jíto de nuū Yaā jeē tu cúu coto yó núu vijna.

28 Te jeē súcuan ni candíje de, te jeē yúcuán ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñi tī yehyí i, návaha núu na quíji ndajéhé jeē cáhni yā táca séhe nuū ñayuu Egipto, te ma cáhni yā séhe nuū ñayuu Israel.

29 Te siquī jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núú, te ni nandihyū-ni ndute siquī de ni cajihí de.

30 Ni cacandíje soldado jeē sáha ya jehē de, te jeē yúcuán ní cotúú jeē ní condúu ndihyú ñuu Jericó, ná ni cajicó ndúu de uxā quiví.

31 Te Rahab, vēsú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñáhán ña tēe Israel jeē ní quijicoo ni condéhé yuhu ndese íyó ñuu ña. Te jeē yúcuán tu ní jíhí ña jíin ñayuu ñihni ni ñuu ña ún.

32 ¿Te ndé jnúhun ga cahān rī núu súcuan? Chi tuá na tiempo jeē nácani ga rī jnūhun Gedeón jíin Barac jíin Sansón jíin Jefte jíin David jíin Samuel jíin táca tēe ni canacani jnūhun ya nde jenahán.

33 Ni cacandíje de jeē sáha ya jehē de jíinahan de, te jeē yúcuán ní cacundeyí de ni canajniñi de táca ñuu náhnu, te vāha ni candacu de jniñu nuū, te ni chindéé ñáhán yá de nájnūhun ni je-jnūhun ya. Te nuū sava de ni jesi Yaā Dios yuhu ndícaha jeē tu ní cáyeji tī de.

34 Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhí de jíin espada. Te sava de ni nanihín ni de náa tuá fuerza de núú, te ndacuī teyí ní íyo de nuū guerra, te ni cacundeyí de siquī soldado táca ñuu jicá jéé jíto uhū ún de.

35 Te sava ñahan ni natecu séhe ña jeē ní jíhí i.

Te sava ga ñayuu chi sa suhva ni candoho xeēn i nde ni cajihí i. Te tu ní cájēhe i jnūhun jeē siaá i jnūhun ya te cācu i, chi ni catee ni i jeē natecu i coyūcu váha ga i andiví.

36 Te sava ga i ni casácatā ñayuu nuū i, te ni cacani ñayuu i, te nde ni caconuhnī cadena i ní cahīin i vecāa.

37 Te ni cajēhe yuū xinī i, te ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuán, te máa ñi lánchi máa ñi ndíxuhú ní cañuhun i. Ni candoho ndáhú i, ni cajito i jnúndóho, ni castóho ñayuu i.

38 Vāha ndasí ñayuu ni cacuu i jeē tú cuítí ñayuu ñayiví súcuan, te vēsú súcuan te ni casáha ñayuu jeē ní cajica cuu i nuū ñuhun téhé jíin chíji yucu, ni cahīin i yaū cava jíin yaū ñuhun.

39 Te táca ñayuu yāha, vēsú ni je-jnúhún yá i jeē ní cacandíje ñihin i jeē sáha ya jehē i, te tu ní cajito i nuū jeē ni jéjnūhun ya.

40 Chi ni sátūhva Yaā Dios ñin jniñu váha ga, te suu cúu jeē sáha Cristo jíin yó, návaha ñin cáhnu-ni nihín yō tahū yō jíin i, te jeē yúcuán cúu jeē ná tu nihín i ndihí tahū i.

*Jeē na cócunuū yō nuū maá ñin-ni Jesús*

## 12

1 Te íyó cuéhé ndasí ñayuu un jéé ní cacandíje ñihin i jeē sáha ya jehē i, te nájnūhun ni jicó ndúu i yóhó, cástéén gā i nuū yō nde vijna jeē suni súcuan na cándíje yó. Núu súcuan te suni máa yó, na téjiyo yó táca jéé sajnéñu jíin cuéchi jeē ni cáan yó jíin. Te na cuándeyí ni yō cunu yó jíin carrera jeē ni jéhe ya jeē cunu yó.

<sup>2</sup> Te na cócunuū vāha yó Jesús, Yaā jeē ni scándíje yóhó te sáha ya jeē íje vāha yó jíin jnúhun ya nde jīnu íje yó. Chi máá yá ni jendeyí ni yā ni ndoho ya jicā cruz. Te vēsú jnúhun canu cúu jeē súcuan cuu yā, te tu ní sáha ya cuenta. Chi ni ñuhun ni yā jeē sa cusí ndasí ni yā ná ni cuu ni ndoho ya. Yūcuán na te ni cucōo ya lado vāha mesa nuū ndácu Yaā Dios jniñu.

<sup>3</sup> Te na nácani ni rō ndese ni jendeyí ni yā ni ndoho ya jeē ni sáha ndevāha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnúndóho.

<sup>4</sup> Chi ni ná tu ndoho ró jéē ndé cuu rō jeē cánducú ndéyí ró snāā rō cuéchi.

<sup>5</sup> Te sanaa te je ni canaa ni rō jnúhun cáhán tutu íi, jeē stíhví ni Yaā Dios rohó jéē cácuu ró séhe ya:

Séhē, ma quití ni rō jeē snahnú Jitoho yō rohó,

te ni ma ndínuu ni rō núu cáhán yā nuū rō.

<sup>6</sup> Chi Jitoho yō snahnú yā ñayuu jeē maní yā jíin,

te jéhe ya castigo tāca jéē náquihin ya cuu séhe ya.

Achí tutu.

<sup>7</sup> Núu súcuan te na cuándeyí ni rō jeē snahnú Yaā Dios rohó, chi sáha ya jíin ró nájñuhun sáha tátá jíin séhe. Chi tú na séhe íyó jéē tu snahnú tátá i.

<sup>8</sup> Te núu ma snahnú yā rohó, nájñuhun ndóho tāca séhe, núu súcuan te nájñuhun séhe ndáhú cácuu ró, nasūu séhe ndije ya.

<sup>9</sup> Te tátá yō ñayívi yáha, suni ni snahnú de yóhó, te ni íyo yíñuhún yó jíin de. Te nagā ni cuu jeē ma cuándetū yō nuū maá Tátá yō andívi jeē snahnú yā yohó, te cotecu yō ní cáni.

<sup>10</sup> Te ndaā chi máá de ni casnahnú de yóhó jecu-ni quívi, ndese ni cuu ni maá de. Te máá yá chi snahnú yā yohó ñin modo jeē quéndōo vāha ga yō, návāha coo ndoo yó nájñuhun íyó ndoo máá yá.

<sup>11</sup> Te ndaā chi tu cácusí ni yō maá hora jeē ndóho yó castigo, chi sa cúcuíhyá ni yō. Te cúcuéé ga te cuni yō

jeē ní quéndōo ndaā yō te coo ndeyí sí ni yō jeē ni snahnú yā yohó.

*Siquí ñáyuu jeē casquéhichí i jnúhun cáhán Yaā Dios*

<sup>12</sup> Núu súcuan te ma cóo ró nájñuhun tēe ni cuíta íi ndaha te quísi i xiní yítí, chí sa ndacuí na sáha ró máá ró nuū jnúndóho.

<sup>13</sup> Te sáha ró ichi ndóo caca ndaā rō, návāha nduvāha róhó jéē tu fuerza ini, jeē cácuu ró nájñuhun tēe chácua jeē tu cúu caca vāha.

<sup>14</sup> Te na cóndíhví ni rō jeē condee maní rō jíin táca ñáyuu, jíin jéē cóo ndoo coo íi rō nuū yā. Chi ma cúu coto ni ñin ñayuu nuū maá Jitoho yō te núu tu íyó ndoo i.

<sup>15</sup> Te coto má cáca yátá ni ñin ró te scuíta ró jnúhun jeē sáha Yaā Dios jeē vāha róhó, návāha tú cuu ró nájñuhun ñin yucū uvuá jeē stívi te sáha daño jíin cuéhē ñayuu.

<sup>16</sup> Te ni ñin ró ma cáca jnéni. Te ni ma cóo jéē ni rō nuū Yaā Dios, nájñuhun ni íyo Esaú. Chi máá ñin cohō ndeyu ni jicān de nuū ñáni de, ni sama de jíin derecho de jeē cúu de sūchi núu, te súcuan ni xícó de derecho de.

<sup>17</sup> Te cájini rō jeē cucuéé ga te ni cuni de jeē na cáhán tátá de jeē vāha tahū nihīn de, te tu ní cúu, chí tuá ni táñuhún Yaā Dios de. Chi tu ní nihīn jniñu jeē ní nacani ni de, vēsú ni nducú ndéyí de te nde ndahyú de.

<sup>18</sup> Te róhó jíinahan ró tu ní quíjicoo ró núu íyo cúu, nájñuhun íyo ni cuu máá yucu nuū ni jéhe ya ley yā nuū ñáyuu Israel. Chi ni cane yáñuhún yucu Sinaí, te nee lúchi jnúú jíto, te quée tachí xeén.

<sup>19</sup> Te ni jecu trompeta, te ni cahān Yaā Dios. Te ñayuu jeē ní cajini sōho jeē cahān yā, ní cacahān ndahú i jeē ma cahān gā yā jíin i.

<sup>20</sup> Chi tu ní cúndeyí i jíin jnúhun jeē ní ndacu ya jniñu nuū i, chí ni cahān yā: Vēsú ñin quití-ni núu quívi tí yucu yáha, jíni ñíuhún cuu tí jíin yúu chí jíin lanza, achí yá.

<sup>21</sup> Te siquí jeē íyo ndasí cúu jeē cájito i ún, te ni cahān Moisés: Quísi i ruhū jeē yuhú rí, achí de.

22 Te vijna rǒhó jéē cá candíje, tu ní quíjicoo ró núū yúcu yúcu. Chi sa suhva nuū maá yucu Sion jíin núū maá ñuu Yaā Dios, Yaā técu, ni quívicoo ró. Te ñuu un cúu Jerusalén jeē iyó andiví, nuū cáhíyo tǔtú cuéhē ndasí mil ndajéhé cáchiñúhún Yaā Dios.

23 Te ni quívicoo ró núū cáyūcu tǔtú ñayuu cá candíje jeē cácuu sēhe Yaā Dios, jeē iyó lista i andiví. Te ni quívicoo ró núū Yaā Dios, Yaā sándaā jniñu ndihí ñayuu, jíin núū cáhíyo ánuá ñayuu váha jeē jé ní squéndōo ndaā yā i.

24 Te suni nuū maá Jesús, Yaā ndiso jniñu síquí contrato jeē ní quívicoo ró. Te yahu ndasí gá jniñu sáha ñiñí yā jeē ní jéti jeē ndáhva cuēchi yó, nasūu níñí Abel jeē ní jícān cuēchi.

25 Núu súcuan te coto má squéhichí rǒ jnūhun jeē cahán yā jíin ró jíinánhan ró. Chi ñayuu jeē tu ní cájetáhú ná ni cahán yā jíin i ñayiví yáha, tu ní cácau i. Te xeēn gā ndoho yóhó te núu ma cuatáhú yó nuū yā jeē cahán yā nde ichi ándiví núu súcuan.

26 Te nde saá ní quisí i ñayiví jéē ní cahán yā. Te vijna chi cáhán yā: ñin na jínu quisí ri ñayiví, te nasūu máa-ni ñayiví, chi suni táca jéē ín andiví, áchí yá.

27 Te jnūhun yáha jéē cahán, ñin na jínu, chi cúní cahán jeē téjiyo ya táca jéē tu íyó cutú, suu jeē ní cuvāha, návāha na quéndōo jeē cóo cutú ní cáni.

28 Núu súcuan te cuāha Yaā Dios ñin ñuu nuū yō jeē cóo cutú ní cáni. Te jeē yúcu, na nácuatáhú yó nuū yā, te na chíñúhún yó yā, te na cóo yíñúhún yó, návāha cusí ni yā jíin yó.

29 Chi Yaā Dios maá yó cúu nájnūhun ñin ñuhūn jeē snáā ndihí jeē neé.

*Ndese sáha yó te cusí ni Yaā Dios*

### 13

1 Ma jécuiñí rǒ jíinánhan ró jéē cundáhú ní rǒ hermano rǒ cá candíje.

2 Conahán ró jeē cánuú cuáha núu ró vehe nuū ñayuu cájica. Chi íyó jínu jeē súcuan ní cajēhe núu ñayuu vehe, te tu

ní cájini i jeē nuū maá ndajéhé andiví ní cajēhe núu i vehe.

3 Te conahán ró chindéé ñáhán ró ñayuu cáhīn vecā, chí sáha ró cuenta jeē nájnūhun cáhīn cáhnu ró jíin i vecā. Te suni nacani ní rǒ jehē jnánhan ró jéē cándoho i sáha ñayuu, chí núu súcuan coo jíin máá ró te suni ndoho ró.

4 Coo yíñúhún ró síquí jnūhun quíjnánhan ñayuu, te ma cosíquí ndéé jnánhan ró. Chí máá Yaā Dios sándaā yā cuēchi ñayuu tijni ní jíin ñayuu casíquí ndéé jnánhan.

5 Te ma ndíyo ní rǒ xūhún, chí na cóo sí ni rǒ jíin jéē cánevāha ró. Chí máá yá ní cahán: Ma siaá cuiti rǒ rohó, ní ma stóo cuiti rǒ rohó, áchí yá.

6 Núu súcuan te ma ñin jeē cáni ní yō, chí cuu cahán yō:

Máá Jítóho rǒ chindéé ñáhán yá ruhū, te ma yūhu rǒ núu na vé cuní ñayuu sáha i jíin rǒ.

Achi yō.

7 Te na núcūhun ní rǒ táca pastor rǒ, jeē ní castéén de jnūhun Yaā Dios nuū rǒ. Te sáha váha ro cuenta ndese ní nihín jniñu jeē ní casáha de, te na ndácu ró de jeē ní cacandíje de jeē sáha ya jehē de.

8 Te Jesucristo chí ñin-ni cáa ya ichi yátá jíin vijna jíin ní cáni.

9 Núu súcuan te ma cuáha ró jnūhun candíje ró táca jnūhun jeē sín cáhán jeē tu quíjnánhan jíin jnūhun máá yá. Chí íyó váha jeē na íje ánuá yō sáha jnūhun jeē váha ní yā jíin yó. Te tu jíni ñúhún yó jnūhun jeē tajnúni síquí jeē yéji yō, chí tu níhín jniñu cuiti jíin ñayuu cáhīn jíin.

10 Te máá yó chí cánevāha yó ñin jeē ní sócō máá jéhē yō, cúu Cristo. Te táca sǔtū jeē cásocō gā de modo jeē cahán ley jenahán, tú na vé nihín de nuū yā jeē ní sócō yā máá yá.

11 Te sǔtū cujéhnu ga, ná ní socō de níñí táca quití ini cuarto íi gā jeē síquí cuēchi, te yíquí cúñu tí ní cajehmu de ichi yátá ñuu.

12 Te suni súcuan ní ndoho máá Jesús ichi yátá ñuu, návāha jíin níñí máá yá te sándoo ya ñayuu.

<sup>13</sup> Núu súcuan te ma cóo inuú gá ni yō jíin ñáyuu tu cá candíje, chi nájnūhun quihīn yō jíin yá ichi yátá ñuu, te na ndóho yó jíin yá jeē sácata i.

<sup>14</sup> Chi ñayivī yáha tu íyó ñuu nuū coo yó ní cáni, chi sa cánducú yó máá ñuu nuū cóyūcu yó quivī quíji.

<sup>15</sup> Núu súcuan te jeē jíin Jesucristo te níni na cáhán yō jeē yóhyo cújéhnū Yaā Dios, chi suu cúu nájnūhun ñn jeē socó yō nuū yā, suu jeē nácuatáhú yó nuū yā.

<sup>16</sup> Te ma náā ni rō sáha vāha ró núū jnāhan ró, te cuāha ró jēé cúmanī nuū i. Chi nájnūhun ñn jeē cásocō rō nuū Yaā Dios cúu tāca jēé yáha, te cúsiñ ni yā jíin.

<sup>17</sup> Te cuandije ró núū tēe cácuu pastor rō, te cuandetū rō nuū de. Chi cándito de rōhó jēé quéndōo vāha ánuá rō, chi cájini de jeē cánuú nacūaha de cuenta nuū yā. Te condihvī ni rō sáha vāha ró, návāha cusī ni de siquī rō te ma cucuíhyá ni de siquī rō. Chi núu tu súcuan te ma cóo jeē vāha jíin ró.

<sup>18</sup> Te cacān tahu rō jehē rī jijnáhan ri. Chi vāha íyó ni anuá rī jeē tú na cuēchi ri. Chi cácuñi rī caca yíñúhún rí jíin táca jniñu.

<sup>19</sup> Te suni cáhán ndahú rí jíin ró jeē cacán tahu ndasí ró jehē maá rí, návāha cuāha ya jnūhun jeē yachī gā cuajeē tucu ri nuū rō.

### *Bendición jíin saludo jeē sándihí*

<sup>20</sup> Te máá Yaā jeē jéhe jnūhun ndeyí sī ni nuū yō, ni nastécu yā Jitoho yō Jesucristo mēhñu ndíyī. Te Jesús cúu pastor cújéhnū jeē ndíto ñayuu cácuu nájnūhun lanchi ya. Chi jíin níñī yā ni sácutú yá contrato jeé yá jeē coo ní cáni.

<sup>21</sup> Te ñúhun ni rī jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu vāha ndese nújnahan ni yā. Te ñúhun ni rī jeē jíin fuerza Jesucristo jeē ndeé yá ini yō, na sáha Yaā Dios jeē cuu yó ñáyuu cúsiñ ni yā jíin. Te na cáhán yō jeē yóhyo luu cújéhnū ya ní cáni. Amén.

<sup>22</sup> Hermano jijnáhan ró, cáhán ndahú rí jíin ró jeē cone cáhnu ni rō

jeē stihvī ni rī rōhó jíin jecu-ni jnūhun ni tee ri nuū carta yáha.

<sup>23</sup> Te cástūhun rí jeē hermano yō Timoteo, je ni quenda de vecāa. Te núu yachī quiji de yāhá, te cuajecoo ndíndúú rí nuū rō coto jnāhan yó.

<sup>24</sup> Te cahān rō jíin táca tēe cácuu pastor rō jíin táca hermano cá candíje jeē sándeýí ni de, áchí rí. Te ñayuu Italia suni cácahān i jeē sándeýí ni rō.

<sup>25</sup> Te ñúhun ni rī jeē na sáha ga Yaā Dios jeē vāha rōhó jíjnáhan ró. Súcuan na cóo. Amén.



## CARTA JEE NI TEE SANTIAGO NUU ÑAYUU CACANDIJE

<sup>1</sup> Máá rí cúu Santiago, mozo Yaā Dios jíin Jítoho yō Jesucristo. Te téé rí carta yáha cuájeē nuū rohó ñáyuu cacandije jeē cácuu ró ndihúxí uū yucūn Israel, te ni cajitē núu ró ní ñáyíví. Sándeyí ni rō jijnáhan ró.

### *Yaā Dios sáha jeē jécūhun ni yō*

<sup>2</sup> Ñánī mánī, na cúsiñ ndasí ni rō jijnáhan ró núu quiiji tijni tāca jnūndóho síquī rō.

<sup>3</sup> Chi cájini rō jeē núu jíto ndee jnūndóho róhó núu cacandije vāha ró, te yūcuan sáha jeē cútūhva ró cuándeyí ni rō.

<sup>4</sup> Te na cuándeyí ni rō nde ije vāha ró jíin, návāha cuu sáha ró ndihí jniñu vāha, te ma cúmanī jeē squícu vāha ró núu yā.

<sup>5</sup> Te núu ndé ñin ró cúmanī jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndihí jeē cájicān ñayuu, te tu cúxeēn yā nuū i jeē jicán i.

<sup>6</sup> Te jeē jicán rō, te cánuú candije ró jéē sáha ya jeē jicán rō, te ma cáni síquí ni rō. Chi ñayuu jéni síquí ni, cúu i nájñūhun ndute mar jeē ndóna jísó cóyo cuahān cháha chúcuan sáha tachī.

<sup>7</sup> Ñayuu ún ma cáni ni i jeē sáha Jítoho yō jeē jicán i.

<sup>8</sup> Chi ñayuu jeē jéni ñin jéni uū ni, chi máni násāma ni i jíin tāca jniñu cásáha i.

<sup>9</sup> Tācá hermano ndahú, na cúsiñ ni de jeē sáha Yaā Dios jeē cujéhnū de.

<sup>10</sup> Te hermano cucá, na cúsiñ ni de núu ni ndundáhú de. Chi tāca téé cucá, yachī naa jeē cucá de, nájñūhun náa ita yucū.

<sup>11</sup> Chi núu ni cane niāndii te cújihní, te íchí-ni yucū, te cóyo-ni ita, te náā-ni jeē lúu cáa. Te suni súcuan ndoho tāca téé cucá níni sá jícu de jíin jniñu de.

### *Siquí jeē jíto ndee jnūndóho yóhó*

<sup>12</sup> Yóhō ndetū téé jeē jéndeyí ni de núu jíto ndee jnūndóho de. Chi núu je ni cundeyí de jíin, te nihín de premio jeē cujéhnū de cotecu de ní cáni. Chi súcuan ni jejnūhun Yaā Dios jeē cuáha ya nuū ñáyuu jeē maní jíin yá.

<sup>13</sup> Núu ñin ñayuu jicán ini i jeē sáha i cuéchi, te ma cáni ni i jeē nuū Yaā Dios vēji jeē jicán sáha i cuéchi. Chi ni ñin ma cúu cuiti sáha jeē quívi Yaā Dios cuéchi, te ni máá yá tu squívi ya ni ñin ñayuu nuū cuéchi.

<sup>14</sup> Chi sa suhva jeē ndíyo néé ni maá i, suu sáha jeē jicán ini i sáha i cuéchi, te scānda ini i chi stáhú un i.

<sup>15</sup> Te jeē ndíyo néé ni i, yūcuan quéjéé cuéchi. Te cuéchi ún, núu je ni cunihin, te sáha jeē jnahnú ndetū ñayuu.

<sup>16</sup> Núu súcuan te ma stívi ró cani ni rō jijnáhan ró, ñánī mánī.

<sup>17</sup> Tāca jéē cútahū yō jeē vāha jeē lúu íyó, chi vēji nde andívi núu maá Yaā Dios, Yaā ni sáha tāca jéē ndíndē ín andívi. Te máá yá tu násāma cuiti ini yā nájñūhun násāma nduva jíin cuándahū.

<sup>18</sup> Te ni sáha ya jeē cótecu yō ní cáni, chi ni candije yó jnúhun ndaā yā. Te ni nduu yó nájñūhun sēhe nuú yá nuū tāca gá sēhe ya jeē quíji, chi súcuan ni nujnahan ni yā sáha ya.

### *Siquí ndese chiñúhún ndaā yō yā*

<sup>19</sup> Núu súcuan te tāca róhó ñánī mánī, ñama na chúsohó ró jnūhun ya, te sa suhva ma cahán yachī rō, ni ma quití yachī ni rō.

<sup>20</sup> Chi ñayuu cáquití ni, tu sáha i jniñu ndaā jeē cuní Yaā Dios.

<sup>21</sup> Núu súcuan te na siáá rō tācá jniñu jnéhén jíin jniñu néé jéē ni cáyā jíin ró. Te na cóo vitá ni rō te cuatáhú ró jnūhun ya jeē ni quívi ini anuá rō. Chi jnūhun un ndíso poder jeē cācu ánuá rō.

<sup>22</sup> Te na squícu ró jéē steén jnūhun ún, te nasūu máá jéē cúni sōho ró súcuan-ni, chi núu súcuan te cástáhú ró maá ró, chi tu níhín jniñu núu tu squícu ró.

23 Chi tēe jeē jíni sōho de jñuhun ya súcuan-ni, te tu squícu de, cúu de nájñuhun ñn tēe jeē jíto de nuū espejo ndese cáa nuū de.

24 Te jíto vāha de nuū de, te cuahān-ni de, te náa ni de ndese cáa nuū de.

25 Te núu ñn tēe tu náa ni de jñuhun jíni sōho de, chi sa suhva chúhun vāha ni de jeē cahán maá ley ndaā Jesús jeē ni sáha libre yohó, te núu cuiñi nihin de jíin, te squícu de jeē ndácu, yūcuán na te quéndōo ndetū de jíin jñiñu vāha jeē sáha de.

26 Te núu ndé ñn ró jéni ni rō jeē chiñúhún vāha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjñiñu jeē chiñúhún ró yā.

27 Ñayuu jeē chiñúhún ndoo chíñúhún ndaā i maá Tátá yō Yaā Dios, chí jñiñu yáha sáha i: Chíndéé ñáhán i sūchi ní caquendōo ndáhú jíin ñahan ní caquendōo ndáhú, núu na-ni jñúndóho íyó. Te tu sájnehén i ánuá i jíin jñiñu néé íyó ñáyiví.

*Ma cúhichí ni yō coto yó ñayuu ndahú*

## 2

1 Ñání mání, cácadíje ró Jítoho yō Jesucristo jeē cujéhnu luu ya. Núu súcuan te ma sáha ró cuenta ndese cúu ñn ñayuu, chí inuú sáha ró jíin ndíhi i.

2 Chi íyó jínu quíví ñn tēe ini vehe nuū cándutútú ró, te yíhi xehyu oro ndaha de, te ñúhun de sahma vāha. Te suni íyó jínu quíví ñn tēe ndáhú, te ñúhun de sahma tahndé.

3 Te tú vāha núu sáha yíñúhún ró jíin tēe ñúhun sahma vāha, te cahān rō jíin de: Cucōo ní lugar vāha yāhá. Te cahān rō jíin tēe ndáhú: Yūcuán cuiñi ní, chí yáha cucōo ní nuū ñúhun, achi rō.

4 Chi núu cásáha ró súcuan, te tu jéni vāha ni rō siquí jñáhan ró, chí sñn sáha ró jíin tēe cúcá jíin tēe ndáhú.

5 Ñání mání, chusóhó ró jñuhun cahán rī: Yaā Dios ni nacāji ya ñayuu ndahú ini ñayiví yáha jéé cóo cúcá i jíin jñuhun cácadíje i ya, te nihín i

tahū i ñuu nuū ndácu ya jñiñu. Chi ni jejnūhun ya cuāha ya un núu ñáyuu jeē maní jíin yá.

6 Te máá ró chi sa suhva cájēhe ró jñuhun canu ñayuu ndahú. ¿Te á násūu tēe cúcá cúu jeē castáhú rōhó síquí jeē nihín de xūhun ró, te yachí jéquin de cuēchi siquí rō nuū tohó?

7 Te suni cácahān neé de siquí Cristo, te suu sñhví máá yá cúu jeē cánaní ró cristiano.

8 Vāha cásáha ró te núu cásquícu ndije ró máá jñuhun jéhnu ga jeē cahán ley, nájñuhun yósó núu tútu ñ: Cundáhú ni rō jñáhan ró nájñuhun cundáhú ni rō maá ró, achí.

9 Te núu sñn sáha ró jíin ñáyuu cucá jíin ñáyuu ndahú, núu súcuan te cuēchi cásáha ró, te jécondee cuēchi siquí rō jeē stíví ró ley Yaā Dios.

10 Chi núu ñn ñayuu stíví i ñn-ni jñiñu ndácu ley, te vésú na squícu i ndíhi ga, te nájñuhun ni stíví i ndíhi ley, te ndíhi un jécondee cuēchi siquí i.

11 Chi Yaā jeē ni cáhān jeē ma cósíquí ndéé jñáhan ró, suni ni cahān yā jeē ma cáhni rō ndíyí. Te vésú tu ní cásíquí ndéé jñáhan ró, te núu ni jehni rō ndíyí, núu súcuan te je ni stíví ndíhi ró ley.

12 Te tāca jéé cahán rō jíin jéé sáha ró, chí sáha ró cuenta jeē sándaā yā ndíhi un jíin máá ley Jesús jeē ni sáha libre rohó.

13 Chi quíví sándaā yā jñiñu, te ñayuu jeē tu ní cundáhú ni jñáhan, suni ma nihín i jñuhun cundáhú ni. Te ñayuu ni cundáhú ni jñáhan, cusñ ni i jeē ní ndahva yā cuēchi i máá quíví sándaā yā jñiñu.

*Tu jéjñiñu jeē candíje yó núu tu squícu yó*

14 Ñání mání, núu cáhān ñn tēe jeē candíje de jeē sáha ya jehē de, te núu tu sáha de jñiñu vāha, ¿te ndé jéjñiñu jeē candíje de ún? ¿A cuu cācu ánuá de jíin jéé cahán-ni de jeē candíje de, te núu tu sáha de jñiñu vāha?

15 Te núu ñn hermano yō chí hermana yō, cúmaní sahma i jíin jéé cáji i tāca quíví,

<sup>16</sup> te núu ñin ró cáhán jíin i: Cuandeyí ni rō, te cusúcun váha ró te caji váha ró, achi rō jíin i, te núu tu ní jéhe ro jéé jíni ñúhún i cotecu i, ¿te ndé jéjníñu jeé cahán rō súcuan?

<sup>17</sup> Te suni súcuan cúu jeé núu áchí ró jeé candíje ró jeé sáha ya jehē rō, te núu tu sáha ró jniñu váha, núu súcuan te tu ndé jéjníñu cuiñi jeé cahán-ni ró jéé candíje ró.

<sup>18</sup> Te sanaa te cahán ñin ñayuu: Róhó chi cándíje ró jéé sáha ya jehē rō, te ruhū chi sáha ri jniñu váha. ¿Na jíin stéén rō jeé candíje ró jeé sáha ya jehē rō, te núu tú na jniñu váha sáha ró? Te ruhū chi sáha ri jniñu váha te súcuan stéén rī jeé candíje ri jeé sáha ya jehē rī.

<sup>19</sup> Ndaā chi cándíje ró jeé iyó ñin-ni Yaā Dios. Te va íyó váha núu súcuan. Te tachī chi suni súcuan cáncandíje, te cáquísí i jeé cáyūhú, chi tu cásáha jniñu váha.

<sup>20</sup> ¿Te naun tu jécūhun ni rō? ¿A tu jíni rō jeé núu tu sáha ró jniñu váha, te tu ndé jéjníñu cuiñi jeé cahán rō jeé candíje ró?

<sup>21</sup> Te jíi yō Abraham, ni ndahva yā cuēchi de siquī jeé ni sáha de jniñu váha. Chi ni jetáhú de jeé ni cáhán yā jeé cahni de sēhe de Isaac socō de i nuū altar.

<sup>22</sup> Te jécūhun ni rō jeé siquī jeé ní candíje de jeé sáha ya jeé ni jéjnūhun ya nuū de, jeé yúcuan ní jetáhú de jeé ni cáhán yā jeé socó de sēhe de. Te jeé ní jetáhú de, suu ni steén jeé candíje ndije de jeé sáha ya jeé ni jéjnūhun ya nuū de.

<sup>23</sup> Te súcuan ni cundaā jnūhun cáhán tutu i: Abraham ni candíje de jeé ni jéjnūhun ya nuū de, te jeé yúcuan ní ndahva yā cuēchi de, áchí tutu. Te ni conaní de amigo Yaā Dios.

<sup>24</sup> Núu súcuan te je ni cajini rō jeé ndáhva Yaā Dios cuēchi ñayuu jeé casáha i jniñu váha siquī jeé cáncandíje i jeé sáha ya jehē i, te nasūu máá jéé cahán-ni i jeé candíje i.

<sup>25</sup> Te suni súcuan Rahab, vēsú ñahan tíjni ni ni cuu ña xīhna gā, te ni ndahva yā cuēchi ña siquī jeé ni sáha ña jniñu

váha. Chi ni jéhe núu ña vehe nuū tāca mozo ni taji Josué, te ni chuhichí ña de inga ichi, návāha cācu de nuū téé cánducú cahni de. Te jeé yúcuan ní ndahva Yaā Dios cuēchi ña.

<sup>26</sup> Te ñin ñayuu núu tuā anuá i nuū yiqui cúñu i, te ndīyi cúu i. Te suni súcuan núu cándíje yó jeé sáha ya jehē yō, te núu tu sáha yó jniñu váha, te nájnūhun ndīyi cúu yó.

### *Jnūhun siquī yaá yó*

## 3

<sup>1</sup> Ñánī mánī, ma cáni ni cuehē rō cuu ró maestro steén jnūhun ya. Chi cájini rō jeé yóhó jéé steén jnūhun, cuehē gā cuēchi ndenehen ya siquī yō.

<sup>2</sup> Chi ndīhi yó stívi cuēhē jniñu. Te núu ñin téé cuu condito de yáá de jeé ma stívi de jíin ni ñin jeé cahán de, núu súcuan te yōhyo váha téé cúu de, te suni cuu condito de ní gá de jeé ma stívi de.

<sup>3</sup> Chi cúu nájnūhun jeé chíhi yó freno yuhu caballo, te súcuan snáhnú yō ní tí jeé quihín tí jíin yó ndé nuū cuní yō.

<sup>4</sup> Te suni súcuan tāca barco, vēsú náhnu ndasí, te vēsú ñihin chūndahá táchī, te jíin ñin timón lulí-ni te cuu scuícó téé scáca, te quihín de jíin ndé nuū cuní de.

<sup>5</sup> Te suni súcuan cúu yáá yó, chi vēsú lulí-ni, te cuehē teyí sáha yó jíin. Te suni jíni yō jeé ñin ñuhūn lulí cuu jñi jeé cayú ñin yucu cáhnu ndasí.

<sup>6</sup> Te suni súcuan yáá yó, chi sáha nájnūhun ñin ñuhūn, chi scuíquín cuehē teyí jniñu néé. Te yáá yó cúu ñin parte lulí yiqui cúñu yō, te sáha jeé quívi ní yó cuēchi. Te infierno cúu jeé scuíquín jnūhun néé jíin yáá yó, te yáá yó scuíquín cuehē jniñu néé ní tiempo jeé iyó yó ini ñayívi.

<sup>7</sup> Te ñayuu chi cuu snáhnú i tācá quiñi jíin saa jíin cóo jíin quiñi ñuhūn nuū mar, te je ni snáhnú i cuehē tí.

<sup>8</sup> Te ni ñin ñayuu ma cúu condito i yáá i. Chi ñin jeé néé jéé ma cúu condito i cúu. Te nájnūhun yuhu cóo jeé ñuhūn chitú veneno jeé jéhni, súcuan cúu yáá yó.

9 Jíin yáá yó chiñúhún yó Tatá yō Yaā Dios, te suni jíin yáá yó cahán ndevāha yo síquī ñáyuu jeē ni sāha ya ánuá i nájñuhun íyó máá yá.

10 ĩn-ni yuhu cáne jñuhun chíñúhún yó yá jíin jñuhun cáhán ndevāha yó. Nánī mánī, tu íyó váha cuiñi jeē súcuan.

11 ¿A ĩn-ni tesōcó cáne ndute váha jíin ndute úvuá, chí naún?

12 Nánī mánī, ¿á cuu cuun ndehē oliva xinī yújnu higo, te á cuu cuun ndehē higo xinī yoyúcú uva, chí naún? Te suni súcuan ĩn tesōcó ma cúu cane ndute úhvuá jíin ndute váha.

### *Jñuhun ndíchí jē véji nuū Yaā Dios*

13 Te núu ndé ĩn ró ndíchí te jécūhun váha ni, núu súcuan te jíin jēé jíca ndaā rō steén rō jeē súcuan cúu ró. Te na cóo suchí ni rō modo jeē jéhe jñuhun ndíchí yá.

14 Te núu cácuésún teyí ni rō te ndúcú ró jēé cujéhnu máá ró, núu súcuan te ma cutéyí ró cani ni rō jeē ndíchí ró. Chi suu cúu jeē stahú ró, te cúu ró contra síquī jñuhun ndaā.

15 Chi ñayuu cándāa súcuan, nasūu núu Yaā Dios véji jeē ndíchí i. Chi cuenta ñayiví, jíin cuenta anuá neé ñáyuu, jíin cuenta máá jéxeén cúu.

16 Chi nuū iyó ñáyuu cucuésún ni jíin ñáyuu nducú jēé cujéhnu máá, suni yūcuan íyó jñuhun sáca núu jíin táca jniñu neé.

17 Te jñuhun ndíchí jeē véji nuū Yaā Dios, núu ni sāha jeē ní ndundíchí ñáyuu, yūcuán na te íyó ndoo ánuá i. Te suni yúcu manī i jíin jñáhan i, te vītá ni i, te tú nīhni ni i. Te cúndáhú ni i jñáhan i, te sāha i jniñu váha. Te suni íyó ndáā i, te tu stáhú i.

18 Te ñayuu cáyūcu mánī jíin jñáhan, jíin jñuhun manī casáha i táca jniñu ndaā, te nanihīn i jeē quéndōo ndaā i.

*Jeē ma cutóo ni yō jeē iyó ini ñayiví*

## 4

1 ¿Te ndese quéjéé jēé cájejnáhan ró jíin jēé cátejnáhan ró? Quéjéé síquī jeē cándiyo neé ni rō, te yōhyo scánda ini anuá rō.

2 Chi cándiyo ni rō, te tu cánevāha ró, te suu sāha jeē cájehni rō ndīyí. Cándiyo ni rō jeē névāha jñáhan ró, te tu níhín rō, te suu sāha jeē cátejnáhan ró te cájejnáhan ró. Te tu cánihīn rō jeē cuní rō, chí tu cájicān rō nuū Yaā Dios.

3 Te núu cájicān rō, te tu cánihīn rō, chí tu cájicān vāha ró, chí mánī jeē cusī ni maá ró cúu jeē cájicān rō nuū yā.

4 Ñayuu castóo Yaā Dios cácuu ró. ¿A tu cájini rō jeē núu cutóo ni rō jeē iyó ini ñayiví, yūcuan cúu jeē cájito uhū rō Yaā Dios? Chi ñayuu jeē cutóo ni jeē iyó ñayiví, ndúu i ñayuu jító uhū nuū Yaā Dios.

5 Te tu cáhán saá-ni jñuhun yáha jēé yosó núu tútu ĩ: Máá Espíritu jeē ni jéhe Yaā Dios jeē ndeé ini yō, cúcuñí ni yā jeē súcuan casáha yó, chí manī yā jíin yó, achí.

6 Te jeē váha ni Yaā Dios, te jéhe ya fuerza ini yō jeē ma sāha yó súcuan. Chi cáhán tutu ĩ: Yaā Dios jési yā nuū ñáyuu casáha téyí máá, te váha ni yā chindéé ñáhán yá ñayuu casáha suchí máá, áchí.

7 Núu súcuan te cuandetū rō nuū Yaā Dios. Te cuiñi nīhin ró jēé ma cuatáhú ró jexeén, te cunu coto róhó jíin náhan ró.

8 Manī gā coo ró jíin Yaā Dios, te víhyá gā steén yā jeē maní yā jíin ró. Róhó jēé casáha cuēchi, na sándoo ró máá ró, stóo ró cuēchi. Te róhó jēé cácu ni rō coo manī rō jíin Yaā Dios níní jēé cácu ni rō cutóo ni rō jeē iyó ini ñayiví, na sándoo ró ánuá rō jeē tuá coo ró súcuan.

9 Na jñáhuhū ni rō, te cucuíhyá ni rō, te na ndáhyú rō síquī jeē iyó cuéchi ró. Te vēsú ni cajecū rō, te vijna na ndáhyú cohó ró. Te vēsú ni cacusī ni rō, te vijna na ndúcuíhyá ni rō.

10 Na sásuchí ró maá ró nuū Yaā Dios, te sájéhnu ya rohó.

*Ma cóndihvī ni yō síquī cuēchi jñáhan yó*

11 Hermano jíin náhan ró, ma cahán neé ró síquī jñáhan ró. Chi tēe jeē cahán neé síquī jñáhan, chí jēé ndihví ni síquī cuéchi jñáhan, nájñuhun jeē

siquí ley yā cahán neé de, chi tu squícu de ley jeē cundáhú ni yō jnáhan yó, te nájñuhun cáhán de jeē tu íyó ndāā ley yā. Te núu cáhán rō jeē tu íyó ndāā ley yā, núu súcuan te nasūu jēē squícu rō, chi sa jeē cahán rō siquī.

<sup>12</sup> Iyó ñn-ni Yaā jeē ni jéhe ley, te máá-ni ya cúu jeē sándaā siquī cuéchi. Te jnama ya ñayuu cá candíje te snáhnú ndetū yā ñayuu tu cá candíje. Núu súcuan ¿te na jniñu ndíso rō jēē sándaā rō siquī jnáhan rō?

### *Tú vāha jeē satéyí yó maá yó*

<sup>13</sup> Vijna te cáhán rī jín rōhó jēē cácahān: Vijna chí sájnē te quihīn yō ñuu yúcuan, te coyūcu yó ñn cuiyā, te cuaan yó xíco yó, te nihīn yō siquī, achí rō.

<sup>14</sup> Te tu jíní cuiñi rō ndese coo sajnē. ¿Chí na vé va víhí cúu vida rō? Cúu nájñuhun ñn vicō nūhún jēē ñn núnúu-ni núcūhun, te yūcuán na te ndéchi-ni cuahān.

<sup>15</sup> Chí sa vāha ga na cáhán rō: Núu cúní maá Jítóho yō te cotecu yō te sáha yó jēē yáha chí jēē yúcuan, achi rō.

<sup>16</sup> Te sa suhva máni cácutéyí ni rō cácahān rō. Te tú vāha jeē súcuan cácutéyí ni rō.

<sup>17</sup> Te núu ñn ñayuu jíní i sáha i jniñu vāha, te núu tu sáha i, te cuēchi cúu núu súcuan.

### *Jñuhun cáhán nuū tēe cúcá*

## 5

<sup>1</sup> Te cáhán rī jín táca rōhó tēe cúcá, jēē na ndáhyú rō te ndahyū cohó rō siquī jñúndóho jeē quiñi nuū rō.

<sup>2</sup> Chí ndajniñu cúcá cánevāha rō, je téhyú. Te sahma vāha rō, je tēe tiquíxin.

<sup>3</sup> Te oro jín plata cánevāha rō, chí je cáne xehyu. Te xehyu un stéén jeē ní casáha rō jniñu stáhú jín xúhun rō. Te yūcuan cúu jeē ndúnihin cuēchi siquī rō, nájñuhun ñn ñuhūn jeē snāā yiquí cúñu rō. Chí ni cacaya cuehē rō ndajniñu vāha quiñi cuándihí yáha.

<sup>4</sup> Te táca tēe ni cajehnde trigo rō, tu ní cáchunaa vāha rō yáhu de. Te vijna cácana jee de nuū Yaā Dios, Yaā

cúu Jítóho nuū táca ndajéhé andiví, jeē súcuan ni casáha rō. Te jíní sōho ya jeē cácana jee tēe ni cajehnde ún.

<sup>5</sup> Cátecu vāha ndasí rō ini ñayiví yáha, te casáha rō táca jēē cácusī ni maá rō. Te cájito yúcun rō maá rō, te cúu rō nájñuhun quiñi néñu jeē ndétu quiñi cúu.

<sup>6</sup> Te ni catee rō cuéchi siquī ñayuu ndaā, te nde ni cajehni rō i. Te tu ní cúu casi i jeē casáha rō.

### *Jeē na cóo paciencia ni yō te cacān tahú yō*

<sup>7</sup> Hermano, núu súcuan te coo paciencia ni rō condetu rō ndé quiñi ndíji máá Jítóho yō. Tēe sájniñu ñuhun, cánuú coo paciencia ni de condetu de nde quiñi saū néhen jín saū néñu isa, te sáá te nihīn de nuní vāha jeē jéhe itu.

<sup>8</sup> Te suni súcuan coo paciencia ni rō, te ndeyí coo ni rō condetu rō, chí cuacuyajni ndee maá Jítóho yō.

<sup>9</sup> Te ma cahán sōo rō siquī jeē sáha jnáhan rō, hermano, návāha ma jéconde cuēchi siquī rō. Chí máá Yaā jeē sándaā cuēchi, je yajni ndiji ya.

<sup>10</sup> Ñání máni, conahan rō jijnáhan rō ndese ni casáha tēe ni canacani jñuhun máá Jítóho yō nde jenahán, chí ni cacuu de ñn ejemplo nuū yō. Chí vēsú ni candoho de, te ni iyo paciencia ni de.

<sup>11</sup> Te cáhán yō jeē ñayuu cájendeyí ni jín jñúndóho, ndetū cúu i sáha Yaā Dios. Chí ni cajini rō jñuhun ndese ni jendeyí ni Job jín jñúndóho, te suni cájini rō jeē yóhyo vāha ga ni quendōo de ni sáha máá Jítóho yō ná ni yāha jñúndóho. Chí yóhyo cundáhú ni yā yohó, te vāha ndasí ni yā jín yó.

<sup>12</sup> Ñání máni, jeē cánuú gá cúu jeē ma cahán cāha rō sihví Yaā Dios jín jñuhun cácahān teyí rō. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chí ñayiví, te ni ñn ga jñuhun súcuan ma cahán teyí rō. Chí núu cahán rō jeē cuu, te súcuan-ni cahán rō. Te núu cahán rō jeē tuú, te súcuan-ni cahán

rō, ma scáa gā rō cahān rō, návāha ma ndénehen Yaā Dios cuēchi siquī rō.

<sup>13</sup> Te núu íyó ñn ró jéē ndóho jnūndóho, te na cácan tahu rō. Te núu íyó ñn ró jéē cúsiñ ni, te na cáta ró yaa jeē chiñúhún ró yá.

<sup>14</sup> Te núu íyó ñn ró jéē cuhú, te na cána ró téē jéhnú cándito ñayuu cácandije. Te na cácan tahu de jehē ñayuu cuhú. Te jíin síhví máá Jítoho yō na chíhi de aceite i.

<sup>15</sup> Te núu cácandije de jeē sáha Jítoho yō jeē cájicān tahu de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i.

<sup>16</sup> Núu súcuan te nacani ndaā rō cuēchi ró núū jnáhan ró, te cacān tahu rō jehē jnáhan ró návāha nduvāha ró jíjnéhan ró. Chi núu ñn téē ndaā ndíhví ni de jícan tahu de, te yōhyo vāha níhín jníñu, chi sáha ya jeē jícan de.

<sup>17</sup> Chi Elías, téē ni nacani jnūhun Yaā Dios jenahán, suni ñn téē jeē nájnūhun íyó máá yó ni cuu de. Te ni jícan tahu ndasí de jeē ma cúun saū, te tu ní cúun saū unī cuiyā iñū yoō.

<sup>18</sup> Yūcuán na te ni jícan tahu tucu de, te ni cuun saū, te ni canecoo tucu tāca jeē jéhe ñuhun.

<sup>19</sup> Ñánī mánī, núu ñn ró ni stóo ichi ndaā, te núu inga rō nachuhichí ró jnáhan ró,

<sup>20</sup> núu súcuan te cuni rō jeē núu ni nachuhichí ró téē ni quívi cuēchi, te je ni jnama ró de jeē jnahnú ndetū de núú, te súcuan íyó jnúhun cáhnu ni nuū cuehē cuēchi de.

## CARTA HN JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Pedro, apóstol jeē ní tají Jesucristo, te tée rí carta yáha cuájeē nuū rohó ñayuu ní cajitē núu, te cáyūcu jícá ró nń Ponto, Galacia, Capadocia, Asia, jíin Bitinia.

<sup>2</sup> Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayíví. Te jíin Espíritu Santo ni sáha ya jeē iyó ndoo iyó íí rō cájetáhú ró núu yā, te ni nacate ya anuá rō jíin nńñ Jesucristo. Te ñúhun ni rī jeē na cáyá gā tāca jéē váha jeē sáha ya rohó, jíin jéē coo ndeyí coo sñ ni rō jíinahan ró.

*Jeē ñúhun ni yō tāca jéē váha jeē cóo andíví*

<sup>3</sup> Na cáhán yō jeē yóhyo cújéhu Yaā Dios, Yaā cúu Tátá maá Jítóho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeé yó, síquī jeē ní natecu Jesucristo mēhñu ndíyí. Te jeē yúcuan níni cáñuhun ni yō tāca jéē váha jeē coo.

<sup>4</sup> Chi nihīn rō tahū jeē ñúhun váha ini andíví jeē cúu ró jíinahan ró. Te tahū un má náā cuítí, ni ma tíví cuítí, ni ma ndñhi cuítí.

<sup>5</sup> Chi cácandíje ró jéē sáha Yaā Dios jehē rō, te jeē yúcuan ndíto ya rohó jíin poder yā, návāha jnama ya rohó quívī sándñhí, chi ni sándaā yā jeē súcuan coo.

<sup>6</sup> Jeē yúcuan cácusñ ndasí ni rō, vésú cájito ró cuéhē ndinuū jñúndóho jecu-ni quívī.

<sup>7</sup> Chi nájnūhun jeē stuhvá ñayuu oro jíin ñúhūn, jító ndee i núu jeē váha cúu, suni súcuan cánuú coto ndee jñúndóho róhó núu cácandíje nñhin ró chí tuú. Chi jeē cácandíje nñhin ró, chi yahu ndasí gá cúu vésú oro, ndajníñu jeē náā. Te yúcuan cúu jeē cuajnúhún yá rohó, te sájéhu ya rohó, te squéndōo

yíñúhún yá rohó quívī quenda ndijin Jesucristo.

<sup>8</sup> Te vésú tu ní cájito ró núu yā, te cáhīyo manī ndasí ró jíin yá. Te cácandíje nñhin ró yá vésú tu cájito ró núu yā vijna. Te yóhyo luu cácusñ ndasí ni rō, chi nde tuá níhín cuítí yō jñūhun castūhun yó ndese cúsn ni yō.

<sup>9</sup> Te nihīn tahú rō jeē cácu ánuá rō, chi jeē yúcuan cúu jeē cácandíje ró.

<sup>10</sup> Te tée ni canacani jñūhun Yaā Dios nde jenahán, ni cananducú yúcún de ni cacajnūhun váha de síquī jñūhun ndese jnama ya yohó. Te ni cacachi de ndese sáha Yaā Dios jeē váha róhó jíinahan ró.

<sup>11</sup> Chi nde ná tu coo, te ni steén Espíritu Cristo nuū de jíinahan de ndese quiiji jñúndóho síquī Cristo jíin ndese luu ndujéhu tucu ya jeē yáha jñúndóho ún. Te ni cananducú yúcún de jeē na jécūhun ni de ndé quívī quiiji Cristo te ndese coo tāca jéē ni cáhān maá Espíritu jeē ndeé ini de.

<sup>12</sup> Te ni steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē cóto. Te vijna je ni cajini sōho máá ró jñūhun ún, chi tāca tée nácani jñūhun jnama ya yohó, ni canacani de nuū rō, ni sáha poder Espíritu Santo jeē ní quiiji ichi andíví. Te jñūhun ún chi nde maá ndajéhé Yaā Dios cánanducú návāha na jécūhun ní.

*Cúni yā jeē coo ndoo ánuá yō*

<sup>13</sup> Jeē yúcuan ndito na cóo xinī rō jíinahan ró, te cájí coo ni rō. Te cocuhun ndasí ni rō jeē nihīn rō tāca jéē váha jeē sáha Yaā Dios rohó quívī quenda ndijin Jesucristo.

<sup>14</sup> Te na cúu ró séhe jeē cájetáhú váha. Te ma sáha ga rō táca jniñu jeē ní cacusñ ni rō sáha ró nde ná tu jecūhun ni rō jñūhun Yaā Dios.

<sup>15</sup> Chi sa suhva na cóo ndoo ánuá rō jíin táca jniñu cásáha ró, chi Yaā ní cana róhó, Yaā iyó ndoo cúu ya.

<sup>16</sup> Chi súcuan cáhán tutu íi: Na cóo ndoo ró jíinahan ró, chi ruhū iyó ndoo ri, achí yá.

17 Te núu cácahān rō Tatá rō jíin Yaā Dios, núu súcuan te na cáca yíñúhún ró nuū yā tāca quívī jéē cájica ró ñayīví yáha. Chi máá yá sándaā síquī ndese ni casáha ñn ñn yó, te tu sáha ya cuenta ndese cúu ñn ñn yó, chi inuú sáha ya jíin ndíhi yó.

18 Chi ni jnama ya rohó núu tāca costumbre jeē ní cajequin jíí rō, jeē ní cajejníñu cāha ró núu. Te cájini vāha ró jéē yahu cúu jeē ní jnama ya rohó. Chi tu ní chúnaa yā jíin ndajníñu jeē náā, nájnūhun oro jíin plata,

19 chi sa suhva jíin níñī Cristo jeē yáhu ndasí gá cúu. Chi ni socō yā maá yá nájnūhun ñn londe, quítī íyó vāha íyó ndoo.

20 Chi jeē yúcuan ní jeni Yaā Dios maá Cristo nde ná tu jecōo ñayīví, te ni cane ndijin Cristo maá tiempo cuándihi yáha, návāha quendōo vāha ánuá rō jíin náhan ró.

21 Te jeē jíin Cristo te cáca ndíje ró Yaā Dios. Chi ni sáha Yaā Dios jeē ní natecu yā mēhñu ndíyi jíin jéē ní ndujéhnu ya. Te jeē yúcuan cáca ndíje ró Yaā Dios, te cáñuhun ni rō coto ró yá.

22 Te vijna chi je ni candundoo ánuá rō, chi ni cajetáhú ró jnūhun ndaā ni sáha Espíritu jíin ró, návāha cundáhú ndije ni rō hermano cáca ndíje. Núu súcuan te na cúndáhú ndasí ni rō jnáhan ró nde jíin ini jíin ánuá rō.

23 Chi je ni canacacu jeé ró, te nasūu chíji yucūn ñayuu jeē cúu. Chi sa jnūhun Yaā Dios jeē ndíto técu ní cáni ni sáha jeē ní nacacu ró.

24 Chi súcuan cáhán tutu íi:

Nájnūhun yucū cúu ndíhi tāca ñayuu, chi jecu-ni quívī técu í.

Te nájnūhun ita yucū cúu jeē cujéhnu í.

Chi íchí-ni yucū, te ndáhvá-ni ita.

25 Te jnūhun Jitoho yō Yaā Dios, sa quéndōo ní cáni.

Achí tutu. Te jnūhun un cúu máá jnūhun jnáma ya yohó jéē ní canacani ri nuū rō.

## 2

1 Núu súcuan te na siáá rō tācá jniñu néé, tāca jéē stahú, jéē tú ndije, jeē cucuésún ni, jíin jéē sajnúhún síquī jnáhan.

2 Te nájnūhun sūchi yíquín sá ní cacu jeē jéxin te jéhnu, súcuan na cóndihví ni rō scuáha ró jnūhun ndaā yā, návāha cuehnu ró jíin te cácu ánuá rō.

3 Chi je cájini rō jeē yóhyo vāha ni maá Jítoho yō.

*Cristo cúu nájnūhun yuū yítuu vehe*

4 Núu súcuan te maní gā coo ró jíin náhan ró jíin Jítoho yō Cristo. Chi cácu ró nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun ñn yuū cánuú gá jeē yítuu yíquī templo, te sáha ya jeē cótecu rō ní cáni. Te ñayuu vésú ni casquéhichí i ya, te Yaā Dios chi je ni nacāji ya Cristo chi cánuú ndasí yá, nájnūhun nacāji yó ñn yuū vāha jeē quítuu yíquī vehe.

5 Te máá ró chi cácu ró nájnūhun ñn ñn yuū jeē cúvāha templo Yaā Dios, te cotecu rō ní cáni. Te na cuáha ró jnūhun jeē sama ya rohó jíin náhan ró jéē cúvāha templo yā, cúu jeē ndeé Espíritu yā ini anuá rō nájnūhun ini ñn templo. Te suni cúni Yaā Dios jeē cuu ró sūtū cáhīyo ndoo cájejníñu nuū yā. Chi síquī jeē ni sáha Jesucristo jehé rō, te na sócō rō maá ró jeē cuajníñu ró núu yā sáha ró táca jniñu vāha jeē núnahan ni Yaā Dios.

6 Chi súcuan cáhán tutu íi:

Vijna te nde ñuu rī Sion jéquin rī ñn yuū jeē cánuú gá jeē quítuu yíquī vehe,

chi ni nacāji ri yā nájnūhun ñn yuū vāha jeē cánuú téyí.

Te ñayuu jeē candíje i ya, jnama nahín yá í.

Achí Yaā Dios, achí tutu.

7 Te máá ró jeē cáca ndíje ró, chi yuū vāha jeē cánuú téyí cúu ya nuū rō. Te nuū ñayuu tu cáca ndíje chí tuú, chí sa cúndaā jeē cáhán tutu íi:

Máá yúu jeē ní casquéhichí tēe cásama vehe,



suu cúu yuū cánuú gá yítuu yiquí vehe.

<sup>8</sup> Te suni cúndaā jnūhun jeē cahán tutu siquī ñayuu tu cá candíje:

Cúu ya nájnūhun ñin yuū jeē cá cachihí i jehē i,

náj nūhun toto jeē cotúú i sáha.

Achí. Chi jeē cá cachihí i jehē i cúu jeē casánihni ní i nuū jnūhun ya. Te je ní cundaā jeē jnahnú ndetū i siquī jeē cá cunihni ní i.

### *Jnūhun ñayuu maá Yaā Dios*

<sup>9</sup> Te maá ró cá cuu ñayuu jeē ní nacāji Yaā Dios. Te suni cá cuu ró sūtú cá jeníñu nuū maá Yaā cúu Rey, te ñayuu cá hīyo ndoo, jíin ñayuu maá yá cá cuu ró. Súcuā ní sáha Yaā Dios rohó návāha nacani ró jnūhun ndese yōhyo jēhnu jniñu sáha ya, chí maá yá ní cana rohó ná ní coyūcu ró nájnūhun nuū néé. Te ní squívicoo ya rohó núu luz yā jeē yōhyo vāha stéén yā ini anuá rō.

<sup>10</sup> Chi nde saá te nasūu ñayuu Yaā Dios cá cuu ró, te vijna je ní nduu ró ñayuu maá yá. Te nde saá chí ná tu cundáhú ní yā rohó, te vijna je cúndáhú ní yā rohó jíjnáhan ró.

### *Jeē cuajníñu vāha yó núu Yaā Dios*

<sup>11</sup> Nání mání, ini ñayívi yáha cá cuu ró nájnūhun ñayuu ñuu jíca jéē cá jica cuu tátú. Núu súcuā te cáhán ndahú rí jíin ró jéē ma sáha ró táca jniñu jeē ndíyo néé ní rō jíin modo maá ró. Chí táca un cá jeníñan jíin ró, ndúcú jéē jnahnū ndetū anuá rō.

<sup>12</sup> Te ndaā na cáca ró méhñu ñayuu tu jíin jnūhun Yaā Dios. Chí vēsú cá cahān i siquī rō, nájnūhun cá cahān i siquī ñayuu casáha jniñu néé, te núu na cóto i jniñu vāha casáha ró, te quiví sándaā Yaā Dios jniñu te cahān i jeē yōhyo cújēhnu ya.

<sup>13</sup> Jeē siquí maá Jítóho yō te cuatáhú ró nuū táca tóhō cándiso jniñu nuū ñayuu. Cuatáhú ró nuū maá rey, chí tēe cújēhnu ga cúu de.

<sup>14</sup> Te cuatáhú ró nuū táca gobernador jeē ní jeni rey návāha stóho de ñayuu casáha jniñu néé te cuajnúhún de ñayuu casáha jniñu vāha.

<sup>15</sup> Chí cúni Yaā Dios jeē sáha ró jniñu vāha, te jeē súcuā sáha ró te táca ñayuu canéé jéē tu cá jecūhun ní, casi i yuhu i.

<sup>16</sup> Te na cáca ndaā rō jeē cá cuu ró ñayuu ní nduu libre anuá, te nasūu jéē ní nduu libre rō jeē sáha ró jniñu néé. Chí sa cá cuu ró mozo Yaā Dios, te cuajníñu vāha ró núu yā.

<sup>17</sup> Coo respeto rō nuū táca ñayuu. Cundáhú ní rō hermano cá candíje. Conso iyo ró núu Yaā Dios. Coo yíñuhún ró nuū maá rey.

### *Jeē na ndóho yó jehē jnáhan yó nájnūhun ní ndoho Cristo*

<sup>18</sup> Rohó jéē cá cuu mozo, cuatáhú ró nuū patrón rō, te coo respeto rō nuū de. Te nasūu maá-ni nuū tēe vāha ní jíin tēe vītá ní, chí suni nuū tēe xēen ní.

<sup>19</sup> Chí ñin jeē vāha cúu núu jéndeyí ní ñin tēe jeē stóho cáha ñayuu de siquí jeē squícu de nuū Yaā Dios.

<sup>20</sup> Chí núu cástóho i rohó jéē casáha ró cuēchi, te ní ñin ma cuajnúhún rohó núu jéndeyí ní rō jíin jeē ndóho ró. Te núu cástóho i rohó jéē casáha ró jniñu vāha, te núu jéndeyí ní rō jíin, yāha cúu jeē vāha jeē nújnahan ní Yaā Dios.

<sup>21</sup> Chí jeē yúcuā cúu jeē ní cana ya rohó jíjnáhan ró. Chí suni maá Cristo ní ndoho ya jeē siquí rō, te súcuā ní cuu ya ñin ejemplo nuū rō jeē na ndóho ró jehē jnáhan ró, te súcuā condiquín rō ichi ya.

<sup>22</sup> Te maá yá tú cuítí na cuēchi ní sáha ya, ní tú cuítí na jnūhun stáhú ní cáhán yā.

<sup>23</sup> Ná ní cacahān néé i nuū yā, te tu ní nácahān néé yá. Te ná ní castóho i ya, te tu ní téjnáhan ya jíin i, chí sa ní chíhi ya maá yá ndaha Yaā Dios, Yaā sándaā vāha siquí ndíhi ún.

<sup>24</sup> Te ní condiso maá Cristo cuēchi yó jíin yiquí cúñu yā ná ní jíhí yā jíca cruz, návāha quenda yó chíji cuēchi te caca ndaā yō. Chí ní tují yā, te jeē yúcuā ní canduvāha ánuá rō.

<sup>25</sup> Chí ní casana ró nájnūhun lanchi, te vijna je ní candicó ró ní ndívicoo ró

nú Cristo, Yaā cúu pastor rō te ndíto vāha ya anuá rō.

*Ndese cánuú coyūcu váha yī jín ñasihí*

### 3

1 Suni súcuan róhó ñasihí jínáhan ró, cuatáhú ró nuū yī ró, návāha núu cúu de tēe tu cándíje jnūhun ya, te cuu scándíje ró de, jeē tuá níní jín jéē cahán rō, chi máá jín jéē casáha vāha ró.

2 Chi cuni de jeē cájica ndaā rō te cáhīyo respeto rō.

3 Te jeē casáha luu ró máá ró, chi nasūu máni máá ichi síquī rō sáha ró, jeē sáha luu ndasí ró xinī rō, chí jéē cūhun ró síquī oro chí sahma váha ga.

4 Chi sa nducú ró jeē quéndōo luu ánuá rō, te coo luu ró ñn modo jeē ma náā cuíti, suu jeē cóo vītá ni rō te coo nahín ni rō. Chi yāha cúu jeē yahu ndasí gá nuū Yaā Dios.

5 Chi ñahan ní cáhīyo ndoo ánuá nde jenahán, suni súcuan ni casáha luu ña ánuá ña. Chi ni cañuhun ni ña Yaā Dios, te ni cajetáhú ña nuū yī ña.

6 Te súcuan ni sáha Sara, chi ni jetáhú ña nuū yī ña Abraham, te ni cahán yīñúhún ña jín de. Te róhó jínáhan ró, núu sáha vāha ró te núu ma yūhu ró ni ñn, yūcuán na te coo ró nájnūhun ni iyo Sara.

7 Te suni súcuan róhó yī, na cóo vītá ni rō jín ñasihí ró. Te yīñúhún coo ró jín ña, síquī jeē núu ga fuerza ña vēsú rohó, te suni síquī jeē inuú ní canihín tahú rō cotecu rō ñí cáni síquī jeē váha ni Yaā Dios. Te súcuan sáha ró návāha tú casi nuū jnūhun jícán tahú rō.

*Jnūhun ñayuu cándoho síquī jeē cájica ndaā*

8 Núu súcuan te inuú na cáni ni rō jínáhan ró, te cucuíhyá ni rō jeē ndóho jínáhan ró, te cundáhú ni rō i nájnūhun ñani rō. Te na cóo manī rō te caní suchí ni rō.

9 Núu casáha néé ñayuu jín ró, te ma nasáha néé ró jín i. Te núu cácahān neé i nuū rō, te ma nácahān neé ró núu i. Chi sa suhva cacān tahú rō jeē na

quéndōo vāha i. Chi Yaā Dios ni cana ya rohó jéē suni súcuan quéndōo vāha ró.

10 Chi súcuan cáhán tutu i:

Ñayuu cácuni cotecu vāha te cusī ni tāca quívī,

na cóto i yuhu i jeē ma cáhán neé i, te na cóto i jeē ma cáhán i jnūhun stáhú.

11 Na cújiyo i nuū jniñu néé, te na sáha i jniñu váha.

Na ndúcú i coyūcu máni i, te na cóndihvī ni i jín.

12 Chi máá Jítoho yō ndíto ya ñayuu ndaā,

te jíní nahín yá jeē cájicān tahú i.

Te ñayuu casáha jniñu néé, chi tu jétáhú yá i.

Achí tutu.

13 Te ni ñn ma sáha néé jín ró te núu máni jniñu váha cándihvī ni rō sáha ró.

14 Te vēsú núu ndóho ró síquī jeē cájica ndaā rō, te yōhyo ndetū cácuu ró. Núu súcuan te ma yūhu ró coto ró i, ni ma cunéé ni rō.

15 Chi sa jín ini jín ánuá rō chiñúhún ró máá Jítoho yō Cristo. Te níní coo tūhva ró nastió cuñí vīta ró te cahán yīñúhún ró jín ñayuu jeē castíchí rohó síquī tāca jéē cañuhun ni rō.

16 Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ni stáú yáhu i róhó jéē cájica ndaā rō chí cácaandíje ró Cristo.

17 Chi núu cúní Yaā Dios te vāha ga jeē ndóho ró síquī jeē casáha ró jniñu váha vēsú síquī núu sáha ró jniñu néé.

18 Chi máá Cristo suni ni ndoho ya, te ñn jínu-ni ni jihī yā jeē síquī cuéchi ndihī yó. Yaā vāha cúu ya, te ni ndoho ya jehē yohó ñayuu ní casáha jniñu néé, návāha quívicoo yó núu Yaā Dios sáha ya. Chi ni jihī yiqui cúñu yā, te ánuá yā chí técu-ni ní cáni.

19 Te ná ni jihī yā te ni jehēn anuá yā ni nacani ya jnūhun nuū anuá ñayuu cáyindihyū.

20 Chi nde jenahán tu ní cajetáhú i, ná ni iyo paciencia ni Yaā Dios te ni condetu ya níní sáha Noé barco jeē

naní arca. Te jíin arca un ní cācu jecu-ni ñayuu, chi unā-ni i ni cācu nuū ndúte.

<sup>21</sup> Te nájnūhun ni cacācu i nuū ndúte, súcuan cúu jeē jéndute yó vijna te cácu ánuá yō. Te jeē jéndute yó, nasūu jéē ndúndoo yiqui cúñu yō, chi sa jeē jicán yō nuū Yaā Dios jeē ndúndoo ánuá yō. Te súcuan te cācu yó, chi ni cundúu yó jíin Jesucristo nuū jnúhun ni natecu yā.

<sup>22</sup> Te ni ndaa ya cuanuhun yā andiví, te ndéé yá ichi ndávaha Yaā Dios nuū kujéhu ya. Te taca ndajéhe andiví, jíin jéē cándacu jniñu, jíin jéē cájni poder, cájendetū nuū yā.

*Jeē na cuajniñu yó jíin táhū jeē ni jéhe ya nuū yō*

#### 4

<sup>1</sup> Núu súcuan te nájnūhun ni ndoho Cristo jehē yō jíin yiqui cúñu yā, suni súcuan na táva ni maá ró ndoho ró. Chi ñayuu jeē ní ndoho jíin yiqui cúñu, tuá sáha i cuēchi.

<sup>2</sup> Núu súcuan te ní tiempo jeē cuahán gā rō, na sáha ró jniñu jeē cuní Yaā Dios, te ma sáha ga rō jniñu jeē ndíyo neé ni rō jíin modo maá ró.

<sup>3</sup> Chi nde ní véji ró, te ni casáha ró cuéhē cuēchi jeē cánujnahan ni rō siquī jeē tu ní cájini rō jnúhun Yaā Dios. Te tiempo un máni maá jéē neé ni casáha ró, te ni candiyo ni rō taca jéē neé, ni canajini ró, ni casáha ró vico neé, ni cajihí ndasí ró nuū víco ró, te ni cachiñúhún ró ídolo jeē ni cáhān Yaā Dios jeē ma chíñúhún yó.

<sup>4</sup> Te cácnéé ni i jeē tuá cájica ró jíin i jeē sáha ró taca cuéchi xeēn jíin i. Te jeē yúcuan cúu jeē cácahān neé i siquī rō.

<sup>5</sup> Te máa i chi ñn quiví te nacuaña i cuenta nuū maá Yaā jeē iyó túhva ya sándaā yā jniñu ñayuu técu jíin ñayuu ní cajihí.

<sup>6</sup> Chi jeē yúcuan suni ni quiji jnúhun vāha ya nuū taca ndíyi ná ni cotecu i. Te ni cundaā siquī cuéchi ni casáha i ñayiví yáha, nájnūhun cundaā siquī ndihí ñayuu, návaha nacani ni i te

cotecu anuá i ní cáni nájnūhun técu Yaā Dios.

<sup>7</sup> Te je cuacuyajni quiví jeē náā taca jéē iyó. Núu súcuan te ndito na cóo xiní rō jijnáhan ró, te condihví ni rō cacān tahú rō.

<sup>8</sup> Te jeē cánuú gá cúu jeē cundáhú ndasí ni rō jnáhan ró. Chi núu cundáhú ni yō jnáhan yó, te iyó jnúhun cáhnu ni nuū cuéhē cuēchi.

<sup>9</sup> Sáha vāha ró jíin ñayuu jeē jinú i vehe ró, te ma cúxli ni rō.

<sup>10</sup> Taca ró cuajniñu ró núu jnáhan ró, núu ndese iyó máa táhū rō jeē ni jéhe Yaā Dios jeē cuajniñu ró núu yā. Te squícu vāha ró jíin táhū jeē sín sín ni jéhe ya nuū ñn ñn ró.

<sup>11</sup> Núu tahū jeē nácani ró jnúhun cúu, te na cáhān rō nájnūhun jeē maá Yaā Dios cáhān. Te núu tahū jeē chindéé ñáhān ró jnáhan ró cúu, te na sáha ró jíin fuerza jeē ni jéhe ya nuū rō, návaha jíin ndihí jeē casáha ró te cáhān ñayuu jeē yóhyo cújéhu Yaā Dios siquī jeē ni sáha ya jíin Jesucristo. Te na cáhān yō jeē luu cújéhu Cristo te jniñ ya poder ní cáni. Amén.

*Jeē ndóho yó siquī jeē candíje yó Cristo*

<sup>12</sup> Nání mání, núu véji jnúndóho xeēn jeē coto ndee rohó, te ma cunéé ni rō cani ni rō jeē maá ró ni nihín jnúndóho xeēn gā.

<sup>13</sup> Chi sa cusí ni rō jeē cándoho ró jecu jnúndóho jeē ní ndoho Cristo, návaha suni cusí ndasí ni rō quiví quenda ndijin yā jeē kujéhu luu ya.

<sup>14</sup> Te yóhyo ndetū rō te núu cácahān neé i nuū rō siquī jeē cácaandíje ró Cristo. Chi máa Espíritu Yaā Dios jeē kujéhu ndasí, ndéé yá ini rō. Máa i chí cácahān neé i siquī yā, te máa ró chí cachiñúhún ró yā.

<sup>15</sup> Te núu ndoho ró, te na ndóho ró siquī jeē cácaandíje ró Cristo. Te ma ndóho ró siquī taca cuéchi nájnūhun cándoho ñayuu jéhu ndíyi, ñayuu sacuíhná, ñayuu sáha jniñu neé, jíin ñayuu quiví nduu nuū jniñu jnáhan jeē tu cánuú quiví nduu.

<sup>16</sup> Te sa núu ñn ró ndóho siquī jeē candíje ró Cristo, te ma cúcanu rō, chí

sa nacuatáhú ró nuū Yaā Dios siquī jeē cúu ró cristiano.

17 Chi je ni jinū quiṽi jeē quejéé sándaā Yaā Dios cuēchi, te xīhna gā ñayuu cácuu sēhe ya sándaā yā cuēchi. Te núu xīhna gā cuēchi máá yó quejéé yá sándaā yā, núu súcuan te xeēn gā coo jeē ndénehen ya cuēchi siquī ñáyuu jeē tu ní jétáhú jnúhun vāha ya.

18 Te núu yōhyo yí cácu ñayuu vāha, núu súcuan ¿te ndese cácu ñayuu casáha jniñu néé jíin táca cuéchi?

19 Núu súcuan te róhó jéē cándoho siquī jeē súcuan cúní Yaā Dios, ma jécuiñi ró sáha ró jniñu vāha, te na chíhi ró máá ró ndaha máá Yaā jeē ní sáha róhó, chí squícu ya jeē ní jéjnūhun ya.

*Jeē jéhe de consejo ñayuu cá candíje*

## 5

1 Vijna te na cáhán rī jíin táca róhó téé jéhnu cándito ñayuu cá candíje, chí suni téé jéhnu ndíto ñayuu cá candíje cúu máá rí. Te cúu rí testigo jeē ní jito rí ndese ni ndoho Cristo. Te suni ndujéhnu rí jíin ró sáha Cristo quiṽi quénda ndijin yā.

2 Na cóto yúcún ró ñayuu jeē ndeé jniñu ró condito ró, jeē cácuu i nájnūhun lanchi Yaā Dios. Te na cúsi ni ró condito ró i, chí súcuan cúní Yaā Dios. Te nasūu síquī jeē sáfuerza yā rohó, ni nasūu síquī jeē nihín ró xūhún, chí sa siquī jeē cúní ró cuajniñu ró.

3 Te nasūu jéē ndacu nihin ró jniñu nuū ñáyuu cándito ró, chí sa nducú ró cuu ró ñn ejemplo nuū i jeē cácuu i lanchi ya.

4 Yūcuán na te quiṽi quénda ndijin maá Yaā cúu Pastor cujéhnu nuū rohó téé cácuu pastor lanchi ya, te cuāha ya premio nuū ró jijnáhan ró jéé yóhyo luu te ma náā cuíti.

5 Te suni róhó táca téé suchí, na cuándetū ró nuū táca téé jéhnu jíin. Te ndihi róhó ñáyuu cá candíje, cuándetū ró nuū jnáhan ró, te caní suchí ni ró. Chí suhva cáhán tutu:

Yaā Dios jési yā nuū ñáyuu casáha téyí máá,

te vāha ni yā chindéé ñáhán yá ñayuu casáha suchí máá.

Achí.

6 Núu súcuan te na cáni suchí ni ró, chí cáyihí ró ndaha Yaā Dios jeē jniñi poder. Te sájéhnu ya rohó, na jíin maá quiṽi.

7 Táca jéé cánacani ndasí ni ró siquī, chíhi ró ndaha máá yá te máá yá coto, chí ndíto ya rohó.

8 Te cájí na cóo xiní ró te ndito coo ni ró. Chí jexeén jeē jíto uhū rohó, jíca cuu ndúcú squívi róhó jíináhan ró núu cuéchi. Te xeēn gā sáha vésú ndicaha jeē iyo ndáhyú.

9 Te cuiñi nihin ró jéé ma cúndeyí jexeén jíin ró, te nihin candíje ró jnúhun cúndáhú ni yā rohó. Chí cájini ró jeē suni súcuan cándoho hermano ró jeē cáyūcu ní cáhnu ñayívi.

10 Te núu ni jínu jeē ndoho ró jecu-ni tiempo, te Yaā Dios chí sáha ya jeē ije vāha ni ró jíin jnúhun ya, jíin jéé cuiñi nihin ró, te cuāha ya fuerza ini ró, te quendōo cutú ró ní cáni. Chí máá yá cúu jeē sáha táca jéé vāha yóhó, te ni cana ya yohó jéé cujéhnu luu yó jíin yá ní cáni, siquī jeē nduú yó jíin Jesucristo.

11 Te na cáhán yō jeē yóhyo luu cújéhnu ya te jniñi ya poder ní cáni. Amén.

*Saludo jeē sándhí*

12 Jíiní rí jeē Silvano cúu ñn hermano jeē squícu vāha. Te máá de cuajeé nuū ró jíin carta yáha jéé ní tee rí jecu jnúhun. Te jíin yáha stíhví ni rí rohó, te cáhán rí jíin ró jeē ndaá cúu jeē táca jéé vāha ni sáha Yaā Dios rohó, suu stéén nuū ró jeē cundáhú ndije ni yā rohó. Te na cuiñi nihin ró jíin jnúhun yáha.

13 Ñayuu cá candíje jeē cáyūcú ñnu Babilonia, jeē ní nacāji ya i nájnūhun ni nacāji ya rohó, cácahān i jeē sándeyí ni ró. Te Marcos, téé cúu nájnūhun sēhe rí, suni súcuan cáhán de.

14 Te núu na cáhán ró jíin jnáhan ró, te techūhu mání ró ndaha i.

Te na cóo ndeyí coo síni ndihi ró jéé cáyihí ró ndaha Jesucristo. Súcuan na cóo. Amén.

## CARTA UU JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Simón Pedro, te cúu ri mozo Jesucristo, te cúu ri apóstol jeē ní tají yá. Te tée ri carta yáha cuájeē nuū rō jijnáhan rō, jeē ni sáha Yaā Dios jeē inuú-ni jíin rí jijnáhan ri ni canihīn rō jnūhun luu váha jeē cácanđije yó yá. Chi Yaā ndaā cúu Yaā Dios, suu máá Jesucristo jeē jnáma yóhó.

<sup>2</sup> Te ñūhun ni rī jeē na sáha ga yā jeē váha ndasí rōhó jíin jéē yóhyo coo ndeyí coo sīi ni rō siquī jeē cájecūhun váha ni rō ndese Yaā cúu Yaā Dios jíin Jítóho yō Jesús.

*Siquī ndese cánuú coo ñayuu cácanđije*

<sup>3</sup> Te Yaā Dios, jíin poder yā ni jēhe ya nuū yō tāca jéē sáha jeē cúu caca ndaā yō nuū yā jíin jéē chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhyo cújéhnū ya jíin tāca jniñu jéhnū sáha ya.

<sup>4</sup> Jeē yúcuan ní jejnūhun ya tāca jéē yóhyo jéhnū yóhyo váha sáha ya yohó, návāha jíin tāca ún te nduu rō nájñūhun íyó máá yá, te cācu rō núū jniñu jeē cándiyo néé ni ñayuu casáha i ini ñayīvi yáha.

<sup>5</sup> Núu súcuan te na ndúcú ndéyí rō jíin jnúhun yáha. Te jeē cácanđije rō, te siquī ún na chísoó rō jeē caca ndaā rō. Te jeē cájica ndaā rō, te siquī ún chísoó rō jeē cóndihvī ni rō jecūhun váha ni rō.

<sup>6</sup> Te siquī ún chísoó rō jeē casi rō modo jeē cuní maá rō. Te siquī ún chísoó rō jnūhun cuandeyí ni rō, te siquī ún chísoó rō jeē chiñúhún váha rō Yaā Dios.

<sup>7</sup> Te siquī ún chísoó rō jeē cóo manī rō jíin jnáhan rō, te siquī ún chísoó rō jeē cundáhú ni rō jnáhan rō.

<sup>8</sup> Chi núu cayā tāca jniñu yáha jíin rō, te suu sáha jeē ma cótecu saá-ni

rō, chi sa quee váha jniñu sáha rō, síquī jeē cájecūhun ni rō ndese Yaā cúu Jítóho yō Jesucristo.

<sup>9</sup> Te ñayuu jeē tu casáha jniñu yáha, nájñūhun jeē cáhīyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá.

<sup>10</sup> Jeē yúcuan na ndúcú ndéyí rō hermano, návāha coo seguro jeē ní cana ya rohó jíin jéē ní nacāji ya rohó. Chi núu sáha rō tāca jniñu yáha, te ma cáca yátá cuiti rō.

<sup>11</sup> Yūcuán na te nune váha ichi quīvi rō ini ñuu maá Jítóho yō Jesucristo, Yaā jnáma yóhó, nuū ndácu ya jniñu ní cáni.

<sup>12</sup> Jeē yúcuan ma jécuiñī rī sáha ri jeē núcūhun ni rō tāca jnúhun yáha, vēsú je cájini rō te cáhīin nīhin rō jíin jnúhun ndaā jeē cácanđije rō.

<sup>13</sup> Chi jéni ni rī jeē iyó váha stīhvī ni rī rohó vijna técu gā rī, návāha nucūhun ni rō.

<sup>14</sup> Chi máá Jítóho yō Jesucristo ni castūhun yá nuū rī jeē tuá cotecu nahán rī ñayīvi yáha.

<sup>15</sup> Jeē yúcuan na ndúcú ndéyí gá rī stīhvī ni rī rohó, návāha núu je ni jihī rī, te níni nucūhun ni rō tāca jnúhun yáha.

### *Jeē ní cajito de jeē cújéhnū Cristo*

<sup>16</sup> Ná ni castéén rī jnūhun máá Jítóho yō Jesucristo nuū rō, ndese ndiji ya jíin poder yā, te tu ní cácahān rī ñn cuento-ni jeē ní catava ndichí ñayuu. Chi ná ni cahīyo ri jíin yá xinī yúcu, te ni cajito jíin núū rī jeē tucu ni nduu ya jeē ní nduluu jéhnū ya.

<sup>17</sup> Chi ni cajini rī jeē Tatá yō Yaā Dios ni cahān yñúhún yá jíin Jesús, te ni sajéhnū ya Jesús. Chi ichi ándiví ní quiji jnūhun luu, ni cahān Yaā Dios: Yáha cúu Sēhe ri jeē maní ndasí rí jíin, te cúsi ni rī jíin, áchí yá.

<sup>18</sup> Te ni cajini sōho ri jnūhun un jéē ni cáhān ichi ándiví, chi ni cahīn ri jíin máá Jítóho yō xinī yúcu ií ún.

<sup>19</sup> Te súcuan cájini yō jeē iyó ndáā ndije tāca jnúhun ni catee tēe ni canacani jnūhun ya nde jenahán. Te

vāha jeē na chūhun ni rō jnūhun un jínáhan ró, chi suu cúu nájnūhun in luz jeē cayú nuū néē, nde na cūndijin quivī ndíji ya, te stéén yā ini anuá rō nájnūhun jeē ndíndēé lucero.

<sup>20</sup> Te xīhna gā na jécūhun ni rō jeē ni in jnūhun cáhán tutu iī, nasūu jéē súcuan-ni ni cajeni ni tēe cúu.

<sup>21</sup> Chi tāca tēe ndoo jeē ní canacani jnūhun ya nde jenahán, tu ní cácahān cuiti de jnūhun jeē cúu ni maá de. Chi sa suhva ni canacani de jnūhun Yaā Dios jeē ni stéén Espíritu Santo nuū de.

*Siquī tēe cástéén jnūhun stáhú  
(Judas 4-13)*

## 2

<sup>1</sup> Te mēhñu ñáyuu Israel ún suni ni cahīyo tēe ni canacani jnūhun stáhú. Te suni súcuan coo tēe stéén jnūhun stáhú méhñu ró. Te squivi de jnūhun stáhú jéē tívī ñáyuu sáha. Te ni ma cuajnúhún de Jítoho yō jeē jnáma ya de, te súcuan sáha de jeē jnahnú ndetū yachī de.

<sup>2</sup> Te cuehē ñáyuu condiquin i modo neé jéē castéén de. Te sáha de jeē cahán neé ñáyuu siquī jnúhun vāha ya jeē cúu ichi ndaā.

<sup>3</sup> Te siquī jeē cándiyo ni de xūhún, te quende de xūhun ró siquī jnúhun stáhú stéén de nuū rō. Te tu quixín jnūndóho jnahnū ndetū de, chi nde jenahán je ndétu jnūhun ndonda ya siquī cuéchi de.

<sup>4</sup> Chi tu ní íne cáhnu ni Yaā Dios nuū tācá ndajéhé yā jeē ní casáha cuéchi, chi sa ni jnaa yā infierno cáyindihyū nuū néē, cánuhnī jín cadena. Te ni chindihyū yā nde quivī sándaā yā siquī.

<sup>5</sup> Te suni tu ní íne cáhnu ni yā nuū ñáyuu jenahán, chi sa ni scúun ya saū xeén siquī ñáyuu ni casáha néé un. Te maá-ni Noé, tēe ni nacani jnūhun ndaā, ni scácu ya de jín úxā gā ñáyuu.

<sup>6</sup> Te suni ni ndonda ya siquī cuéchi ñáyuu ñuu Sodoma jín ñuu Gomorra, te ni cayū ñuu i ni nduu maá yā na. Te súcuan cúu i in ejemplo nuū tāca gā ñáyuu sáha néé jéē quíji ga.

<sup>7</sup> Te ni scácu ya Lot, chi tēe ndaā ni cuu de, te ni cucuíhyá ndasí ni de ni jito de jniñu néé ní casáha ñáyuu neé un.

<sup>8</sup> Chi tēe vāha un ní condee de mēhñu ñáyuu ún, te ndiquivī ni nacani cuíhyá ni de jeē ní jini sōho de ni jito de tācá jniñu néé ní casáha i.

<sup>9</sup> Núu súcuan te maá Jítoho yō chi jnáma ya ñáyuu cáchiñúhún núu yā, te núu vēji jnūndóho siquī i. Te chíndihyū yā ñáyuu casáha néé, návāha ndoho i castigo quivī sándaā yā cuéchi i.

<sup>10</sup> Te víhyá gā stóho ya tēe casáha jniñu jnéhén jéē ndíyo néé ni de, te cácuu jéē ni de siquī jniñu ndácu maá Jítoho yō. Nihni ndasí ni de, te cáchundeyí ni de sáha de jeē cácuu maá de, te tu cáyūhú de cahān ndevāha de siquī tāca jéē cácujuhnu nuū sucún.

<sup>11</sup> Te ni maá ndajéhé jeē cáhīn nuū Jítoho yō, vēsú cácujuhnu ga yā jín fuerza jín jniñu ndiso ya, te tu cácahān ndevāha ya siquī tāca jéē cácujuhnu ún.

<sup>12</sup> Te tēe ún chi cácuu de nájnūhun quiti yúcu jéē ni jéconā tī jín modo sáha ti, te cátahū tī návāha nihīn ñáyuu tī cahni i ti. Chi cácahān neé de siquī tāca jéē tu cájecūhun ni de. Te cuu de nájnūhun jhí tācá quiti ún.

<sup>13</sup> Te jeē ní castóho de ñáyuu, suni súcuan nanihīn de ndoho de. Te cácusī ni de jín tāca jéē cácajni ni de, te casáha de tācá jniñu jeē cándiyo néé ni de. Te cácuu de tēe quini jeē casáha jniñu cúcanu ñáyuu. Te jeē cándutútú de jín ró vico ró, te níni cácusī ni de jín jniñu néé jniñu stáhú.

<sup>14</sup> Te cándiyo ni de cájito de ñahan, te tu cájecuñī de sáha de cuéchi. Te cástáhú de ñáyuu tahya ni. Chi ni cacāan de jín jnúhun ndíyo ni de tācá ndajniñu. Te tēe jnahnū ndetū cácuu de.

<sup>15</sup> Te ni casana de, chi ni castóo de jnūhun jeē cúu ichi ndaā. Te ni candiquin de modo Balaam, tēe ni nacani jnūhun nde jenahán, séhe Beor. Chi tēe un ní cusī ni de nihīn de xūhun siquī jnūhun néé jéē cahán de.

16 Te ñn burro ni cahān tī nájñūhun ñn ñayuu, vēsú quiñi ññhín cúu tī. Te ni cahān tī nuū téé ún, te súcuan ni jesi tī jeē ma quiñi de cahān de tāca jñūhun néé stívi.

17 Te tāca téé súcuan chi cácuu de nájñūhun tesōco íchi, nájñūhun vicō jeē stehí táchī. Te jñahnū ndetū de quiñicoo de nuū néé nuū lúchi jñúu coyūcú de ní cáni.

18 Chi yōhyo cásándúxí de máá de jíin jñūhun cácahān saá-ni de. Te cánducú de squívi tucu de sava ñayuu nuū jñiñu néé jñiñu ndíyo ni. Te súcuan cástáhú de ñayuu jeē sa ní quenda i ni cācu i nuū ñáyuu casáha jñiñu néé.

19 Te cácahān de jeē cáhīyo libre i sáha i ndese-ni cúní máá i, te ni máá de tu cáhīyo libre de, chi cácuu de mozo nuū cuéchi, chi máni jñiñu jñéhén casáha de. Chi tācá jñiñu jeē cúndeyí jíin ñn tēe jeē sáha de, suu yūcuan ndúu de mozo nuū.

20 Chi núu je ni cajini de ndese Yaā cúu máá Jítóho yō Jesucristo, Yaā jnáma yóhó, te núu súcuan ni quenda de ni cācu de nuū jñiñu jñéhén íyó ini ñayívi, te yūcuán na te núu ndívicoo tucu de nuū jñiñu un jéé cúndeyí tucu jíin de, núu súcuan te néé gá quendōo de jeē sándíhi vēsú jeē xíhna ññhún.

21 Chi vāha ga núu jeē tu ní cájini de jñūhun ichi ndaā nuú, vēsú jeē ní cajini de, te stóo tucu de jñiñu ndoo jeē ní ndacu ya nuū de.

22 Chi cúndaā jíin de nájñūhun cáhán ñn jñūhun jenahán: Ina ni nacaji tī jeē ní ndujen tī. Te quiñi ní ndundoo, ni nacuchi tucu tī ndehyū, achí.

### *Siqui jeē ndíji Jítóho yō*

## 3

1 Ñání mání, yāha cúu carta uū jeē téé ri nuū rō. Te jíin ndíndúu carta yáha cúní rī jeē nacani ni rō siquí ndíhi jeē váha ndaā jeē jéni íchí rí rohó.

2 Te na núcūhun ni rō tāca jñūhun jeē ní canacani tēe ndoo Yaā Dios nde jenahán, jíin jñiñu ní ndacu máá Jítóho

yō, Yaā jnáma yóhó. Te suu cúu jeē ní castéén tēe cácuu apóstol nuū rō.

3 Te xíhna gā jñūhun yáha na jécūhun ni rō: Jeē nuū cuándíhi quiñi te quiñicoo tēe sácatā siquí jñūhun ndaā yā, chi sáha de tācá jñiñu néé jéé ndíyo ni maá de.

4 Te cahān de jíjnáhan de: ¿Najehē cúu jeē tu ndíji Cristo nájñūhun ni jññūhun ya? Chi nde quiñi ní cajihí jíi yō te nde vijna, tu ndé sáma cuiñi ndíhi jeē iyó ndé ná ni jecōo ñayívi, achi de.

5 Chi tu cácuu de jecūhun ni de jeē ndé jenahán ní cuvāha andívi jíin jñūhun ni cahān Yaā Dios. Te ni ndacu ya jñiñu jeē na cuvāha ñayívi jíin ndute, te mēhñú ndute ni nane ññhún íchí.

6 Te suni jíin ndute ni naa ñayívi jenahán, chi ni ndaa ndute jeē ní cuun saū xeén.

7 Te suni súcuan jíin jñūhun ni cahān Yaā Dios ni sátūhva ya jeē cayú andívi jíin ñayívi íyó vijna. Chi máá quiñi juicio te cayū ndíhi, te jñahnū ndetū ñayuu ni casáha néé.

8 Te suni ma náa ni rō jñūhun yáha, ñání mání: Jeē nuū maá Jítóho yō chi ñn quiñi cúu nájñūhun mil cuiyā, te mil cuiyā cúu nájñūhun ñn quiñi-ni.

9 Chi nasūu jéé cucuéé máá Jítóho yō siquí jñūhun ni jññūhun ya, nájñūhun cájeni ni sava ñayuu. Chi sa suhva íyó paciencia ni yā nuū yō, chi tu cúní yā jeē jñahnú ndetū ni ñn yó, chi sa cúní yā jeē ndíhi yó nacani ni yō stóo yó cuéchi yó.

10 Te quiñi ndíji máá Jítóho yō, ñn sanaa-ni te quee, nájñūhun ñn sanaa-ni te quee ñacuñhá jecuáa. Te quiñi ún chí ññhín ndasí andívi, te naa-ni. Te ndíhi jeē iyó andívi chí naa sáha ññhún. Te ñayívi jíin tāca jéé iyó ini, ndíhi cayū.

11 Te núu súcuan naa tācá un, te cánuú ndasí jéé coo ndoo ánuá rō te chíññhún váha ro yá jíjnáhan rō.

12 Te condetu ró te condíhvī ni rō jeē na quee yachí quiñi ndíji Yaā Dios. Te quiñi ún cayū andívi te naa-ni, te tāca jéé iyó chí ndute sáha yáññhún.

<sup>13</sup> Te máá yó chi cándetu yó andiví jée jíin ñáyiví jée, chi súcuan ni je-jnūhun Yaā Dios. Te yūcuán chi máni jniñu ndaā jíin jniñu váha coo.

<sup>14</sup> Núu súcuan, ñánī mánī, níní jée cándetu ró jée squícu tācá jniñu yáha, te na ndúcú ndéyí ró návāha quiví ndíji ya te nihīn yā rohó jée cáyūcu mánī rō, te coo ndoo ró jée tú na cuēchi ró.

<sup>15</sup> Te na jécūhun ni rō jeē siquī jeē iyó paciencia ni maá Jítóho yō, jeē yúcuan cácu yó. Chi hermano yō Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de.

<sup>16</sup> Te cáhán de siquī jnúhun yáha núu tāca carta jeē ní tee de. Te nuū carta de un íyó jecu jnūhun jeē yí jécūhun ni yō. Te ñayuu tu jécūhun ni jíin ñayuu tu íje jíin jnúhun cándíje, cánasama i modo steén jnūhun yí un, nájnūhun násama i jeē cahán sava ga tutu īī. Te súcuan sáha i jeē jnahnú ndetū maá i.

<sup>17</sup> Te róhó ñánī mánī, vijna te je ni cajini rō ndese coo tācá jniñu yáha. Núu súcuan te coto má condiquīn rō jnūhun stáhú cástéén ñayuu casáha néé. Chi núu tuú te snáā rō jnūhun cáhīn nīhin ró jíin.

<sup>18</sup> Chi sa na cóndihvī gā ni rō cuni rō ndese Yaā cúu máá Jítóho yō Jesucristo, Yaā jnáma yóhó. Te na íje ga ni rō jíin jnúhun cúndáhú ni yā rohó. Te na cáhán yō jeē yóhyo luu cújéhu ya nde vijna jíin ní cáni. Súcuan na cóo. Amén.



## CARTA HN JEE NI TEE SAN JUAN APOSTOL NUU ÑAYUU CACANDIJE

### *Jnūhun cotecu yō nñ cáni*

<sup>1</sup> Jnūhun cátee ri cuajeē nuū rō jijnáhan ró cúu jnūhun máa Yaā jeē je íyó ndé ná tu jecōo tāca jéē iyó. Te ni cajini sōho ri jeē ni cáhān yā, te ni cajito jínúu rī yā, chi ni cajito vāha ri nuū yā, te ni cajni ri yā. Te máa yá cúu Jnūhun cotecu yō nñ cáni.

<sup>2</sup> Chi Yaā yáha jéē sáha ya jeē cótecu yō, ni quenda ndijin yā. Te cácahān rī jnūhun ya, chi ni cajito ri yā. Te cácastūhun rí nuū rō jijnáhan ró síquī Yaā cúu Jnūhun cotecu yō nñ cáni, Yaā ni condee jín Tátá yō Yaā Dios, te ni quenda ndijin yā nuū rī jijnáhan ri.

<sup>3</sup> Jeē ní cajito ri jín jéē ní cajini sōho ri, yūcuan cúu jeē cácastūhun rí nuū rō, návāha coo inuú ni rō jín yó jijnáhan yó. Te jendaá chi cáhiyo inuú ni yō jín máa Tátá yō Yaā Dios jín Séhe ya Jesucristo.

<sup>4</sup> Te jnūhun yáha cátee ri cuajeē nuū rō, návāha cusī teyí ni rō jijnáhan ró.

### *Yaā Dios cúu luz*

<sup>5</sup> Te yāha cúu jnūhun ni steén Jesucristo nuū rī, te vijna cácastūhun rí nuū rō: Yaā Dios cúu luz, chi yōhyo ndaā yā, te tú cuīti na jniñu néé íyó jín yá.

<sup>6</sup> Núu cácahān yō jeē cáhiyo inuú ni yō jín yá, te núu cájica yó nájñūhun nuū néé jeē sáha yó jniñu néé, núu súcuan te cástáhú yó, te nasūú jniñu ndaā casáha yó.

<sup>7</sup> Te núu cájica yó jín luz yā jeē casáha yó jniñu ndaā, nájñūhun íyó máa yá jín luz yā jeē sáha ya jniñu ndaā, yūcuán na te cáhiyo inuú ni yō jín táca jnáhan yó. Te niñi máa Séhe ya Jesucristo sándoo yóhó núu ndihi cuēchi yó.

<sup>8</sup> Núu cácahān yō jeē tú na cuēchi yó, te cástáhú yó máa yó jeē jéni ni yō

súcuan, te tu ñūhun jnūhun ndaā ini yō.

<sup>9</sup> Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yóhó ndihi jeē neé casáha yó. Chi jíní yō jeē Yaā vāha Yaā ndaā cúu ya.

<sup>10</sup> Te núu cácahān yō jeē tú na cuēchi yó, te nájñūhun sáha yó jéē Yaā stahú cúu ya, te tu cándije ndije yó jnūhun ya.

### *Cristo cúu Yaā cahán jehē yō*

## 2

<sup>1</sup> Tāca jnūhun yáha téé ri cuajeē nuū rohó jéē cácuu ró nájñūhun sēhe ri, návāha ma sáha ró cuēchi jijnáhan ró. Te núu ndé in ró ní sáha cuēchi, te íyó máa Yaā cahán jehē yō nuū máa Tátá yō Yaā Dios. Jesucristo Yaā ndaā cúu ya.

<sup>2</sup> Te ni socō yā máa yá jeē ndahva yā cuēchi yó, te nasūu cuēchi máa-ni yó, chi suni cuēchi ñayuu nñ ñáyiví.

<sup>3</sup> Núu squícu yó jniñu ndácu Yaā Dios nuū yō, jín yūcuan cúcáhnu ni yō jeē jíní ndije yó ndese Yaā cúu ya.

<sup>4</sup> Te núu cáhān in ñayuu: Ruhū chi jíní rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhān i jnūhun ndaā.

<sup>5</sup> Te sa ñayuu squícu jnūhun ya, je ni ije vāha ni i jeē maní i jín yá. Súcuan te cuni yō núu ndúú yó jín yá chí tuú.

<sup>6</sup> Núu cáhān in ñayuu jeē nduú i jín yá, cánuú jéē caca ndaā i nájñūhun ni jica Jesucristo.

### *Jniñu jéé ndácu ya nuū yō*

<sup>7</sup> Hermano, nasūú in jniñu jéé ndácu ri nuū rō jeē cahán rī jeē na cúndáhú ni rō jnáhan ró. Chi jniñu jeē je cájini rō nde ná ni quejéé ró candíje ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quiví ní quejéé ró candíje ró.

<sup>8</sup> Te vésú súcuan, te níní jniñu jéé cúu, te jniñu ndaā cúu nuū Cristo jín núu máa ró jijnáhan ró. Chi je cuayāha jniñu néé jéé iyó núu néé, te je steén máa luz ndaā ini anuá yō vijna.

<sup>9</sup> Núu ñn ñayuu cahán i jeē jíca i jíin luz yā, te núu jíto uhū i jnáhan i, ñayuu ún chi jíca ga i nájnūhun nuū néē jíin cuéchi.

<sup>10</sup> Te ñayuu jeē cundáhú ni jnáhan, chi jíca i jíin luz yā, cúu jeē sáha i jniñu váha. Te ni ñn ma cúu sáha jeē quívi i cuéchi.

<sup>11</sup> Te ñayuu jíto uhū jnáhan, chi íyó i nuū néē, te jíca i nuū néē. Te tu jíni i ndé chi quíhín i, chi nuū néē un ní jesi jeē tu jécūhun ni i.

<sup>12</sup> Róhó jéē cácuu sēhe, téé ri jnūhun yáha cuájeē nuū rō, chi jeē síquī Jesucristo te ni ine cáhnu ni Yaā Dios nuū cuéchi rō.

<sup>13</sup> Róhó tátá jijnáhan rō, suni téé ri nuū rō, chi cájini rō ndese Yaā cúu Yaā iyó ndé xihna ñúhún. Róhó téé suchí jijnáhan rō, suni téé ri nuū rō, chi ni cacundeyí rō jeē tu ní cúu squívi jexeén rohó cuéchi.

Róhó jéē cácuu sēhe, téé ri jnūhun yáha cuájeē nuū rō, chi cájini rō ndese Yaā cúu máá Tátá yō Yaā Dios.

<sup>14</sup> Róhó tátá jijnáhan rō, suni téé ri nuū rō, chi cájini rō Yaā iyó ndé xihna ñúhún. Róhó téé suchí jijnáhan rō, suni téé ri nuū rō, chi cáhíin níhin rō, te cácandíje rō jnúhun Yaā Dios, te ni cacundeyí rō síquī jexeén.

<sup>15</sup> Ma cutóó ni rō síquī ñayívi, ni táca jéé iyó ini ñayívi. Chi núu ndé ñayuu cutóó ni i síquī ñayívi, ñayuu ún tu íyó mání i jíin Tátá yō Yaā Dios.

<sup>16</sup> Chi táca jéé cúu cuenta ñayívi, nasūu ndé nuū Tátá yō Yaā Dios vēji, chi cuenta ñayívi cúu. Te yūcuan cúu táca jéé cájni ni yō jeē cuní modo neé máá yó, jíin jéé ndíyo ni yō jeē jíto yó núu, jíin jéé sandúxí yó máá yó síquī ndajníñu névāha yó.

<sup>17</sup> Te cuandíhi ñayívi jíin táca jéé ndíyo néé ni yō. Te ñayuu casáha jeē cuní maá Yaā Dios, chi cotecu i ní cáni.

#### *Jnūhun ndaā jíin jnúhun stáhú*

<sup>18</sup> Róhó jéé cácuu nájnūhun sēhe ri, cahán rī jíin rō jeē cuandíhi quívi. Te je ni cájini jnūhun rō jéé quíji máá téé cuu contra síquī Cristo. Te nde vijna je ni canecoo cuehē téé jeē cácuu

contra síquī Cristo. Te jeē yúcuu jíni yō jeē cuandíhi quívi.

<sup>19</sup> Mēhñu máá yó ni quendacoo de, te nasūu jnáhan yó cácandíje cácuu de. Chi núu jeē jnáhan yó cácuu de, te quendōo de jíin yó nuú. Te ni quenda de cuangoo de, návāha cuni cají yó jéé násūu jnáhan yó cácuu ndíhi de.

<sup>20</sup> Te máá rō jijnáhan rō, chi Cristo ni jēhe ya Espíritu Santo, ndeé yá ini anuá rō, te jeē yúcuu cájini rō jnūhun ndaā.

<sup>21</sup> Núu súcuu te téé ri yāha cuájeē nuū rō, síquī jeē cájini rō jnūhun ndaā, nasūu síquī jeē tu cájini rō. Te cájini rō jeē tú na jnūhun stáhú íyó nuū jnúhun ndaā.

<sup>22</sup> ¿Ndé ñn cúu jeē cahán mání jnūhun stáhú? Suu téé jeē cahán jeē Jesús, tu cúu ndíje ya Cristo, Yaā ní tají Yaā Dios. Yūcuan cúu téé jeē cúu contra síquī Cristo, chi tu jéjnúhún de máá Tátá yō Yaā Dios jíin Séhe ya.

<sup>23</sup> Táca ñayuu jeē tu jéjnúhún i Séhe ya, suni tu íyó máá Tátá jíin i. Te ñayuu jeē jejnúhún i Séhe ya, suni íyó máá Tátá jíin i.

<sup>24</sup> Núu súcuu te chuhun vāha ni rō maá jnúhun ni cájini sōho rō ndé jeē xihna ñúhún. Te núu ñúhún vāha ni rō jnūhun ní cájini sōho rō ndé jeē xihna ñúhún, yūcuán na te suni ndúú rō jíin máá Tátá yō jíin Séhe ya.

<sup>25</sup> Te yāha cúu jnūhun jeē ni jéjnúhun Jesucristo nuū yō: jeē cótecu yō ní cáni sáha ya.

<sup>26</sup> Jnūhun yáha ní tee ri nuū rō jeē cástūhun rí síquī ñayuu cánducú stáhú róhó.

<sup>27</sup> Te máá rō jijnáhan rō, chi ni jēhe Jesucristo Espíritu Santo, ndeé yá ini anuá rō. Te jeē yúcuu tu jíni ñúhún jéé steén ni ñn ñayuu nuū rō ndé vé cúu jendaá, chi máá Espíritu cúu jeē steén ndíhi nuū rō, te steén yā jnūhun ndaā, chi tu stáhú cuiti yā. Núu súcuu te caca ndúú rō jíin Cristo, nájnūhun steén Espíritu nuū rō.

<sup>28</sup> Séhē jijnáhan rō, vijna te na cáca ndúú rō jíin Cristo, návāha núu na quénda ndíjin yā, te ma yūhu yó, ni ma cúcanu yō nuū yā quívi ndíji ya.

29 Chi je cájini rō jeē Yaā ndaā cúu Jesucristo, te suni na jécūhun ni rō jeē tāca ñáyuu casáha jniñu ndaā, sēhe Yaā Dios cácuu i.

*Jnūhun ñayuu cácuu sēhe Yaā Dios*

### 3

1 Nacā jeē yóhyo ni cundáhú ni Tata yō Yaā Dios yohó, chi ni nihīn yō jnūhun cuu yó sēhe ya, te suu cúu ndije yó. Jeē yúcuan, ñáyuu ñayīví tu cájini i jeē cúu yó sēhe ya, chi tu jíni i ndese Yaā cúu máá yá.

2 Ñánī mánī, vijna te cúu yó sēhe Yaā Dios, te ná tu cuni yō ndese coo yó ní cáni. Te je jíni yō jeē quivī quenda ndijin Jesucristo, te nduu yó nájnūhun íyó máá yá, chi coto yó núu yā ndese íyó yá.

3 Te tāca ñáyuu jeē súcuan ñūhun ni i, chi sándoo i ánuá i, nájnūhun íyó ndoo Jesucristo.

4 Te ñayuu casáha cuēchi, chi stívi i ley Yaā Dios. Chi núu sáha yó cuēchi, te stívi yó ley yā.

5 Te je cájini rō jeē ní quiji Jesucristo ini ñayīví návāha quende yā cuēchi yó. Te máá yá tú na cuēchi ya.

6 Te tāca ñáyuu jeē nduú i jíin yá, tu cájica i jíin cuēchi. Te tāca ñáyuu cájica jíin cuēchi, tu jíni i ya, ni tu jécūhun ni i ndese Yaā cúu ya.

7 Séhē jijnáhan rō, coto rō jéē ma stáhú ni ñn i róhó. Chi na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájnūhun íyó ndáá máá yá.

8 Te ñayuu casáha cuēchi, máá i cácuu sēhe jexeén. Chi jexeén cúu jeē sáha cuēchi vēji nde jeē xihna ñúhún. Jeē yúcuan ní quiji Sēhe Yaā Dios, jeē snáa yā tācá jniñu néé sáha jexeén.

9 Ni ñn ñayuu jeē cúu sēhe Yaā Dios, tu jíca i jíin cuēchi, chi ni sáha Yaā Dios jeē ní nduu i nájnūhun íyó máá yá. Te ma cúu ga caca i jíin cuēchi, chi sēhe Yaā Dios cácuu i.

10 Súcuan cuni yō ndé ñn cúu sēhe Yaā Dios jíin sēhe jexeén: Tāca ñáyuu jeē tu sáha jniñu ndaā, jíin jéē tu

cúndáhú ni jnáhan, nasūu sēhe Yaā Dios cúu i.

*Jeē na cúndáhú ni yō jnáhan yó*

11 Yāha cúu jnūhun jeē ní cajini sōho rō ndé jeē xihna ñúhún: jeē na cúndáhú ni yō jnáhan yó.

12 Te ma sáha yó nájnūhun ni sáha Caín, jeē ní cuu de sēhe jexeén, te ni jehni de ñani de. ¿Te najehē ni jehni de ñani de? Siquī jeē ñani de ni sáha jniñu ndaā te máni jniñu néé ní sáha máá de.

13 Hermano jijnáhan rō, ma cunéé ni rō te núu ñayuu ñayīví cáquitī ni i nuū rō.

14 Te máá yó chi siquī jeē cundáhú ni yō jnáhan yó, súcuan jíni yō jeē jé ni cácu yó jéé cótecu yō ní cáni. Te ñayuu jeē tu cúndáhú ni jnáhan, íyó i jíin jnūhun jnahnū ndetū i.

15 Chi tāca ñáyuu quitī ni nuū jnáhan, nájnūhun ñayuu jéhni ndīyī cúu i. Te cájini rō jeē ñáyuu jéhni ndīyī, ma nihín tahu i cotecu i ní cáni.

16 Jeē ni jíhī Cristo jehē yō, yūcuan cúu jeē steén cají ndese cúu jnūhun cúndáhú ni. Te máá yó, chi suni súcuan jíni ñúhún cundáhú ni yō jnáhan yó vēsú na cúu yō jehē i.

17 Te núu névāha yó jéé cótecu yō ñayīví, te núu jíni yō jeē cúmanī nuū jnáhan yó, te núu tú cundáhú ni yō i cuāha yó jéé jíni ñúhún i, núu súcuan ¿te á íyó mánī yō jíin Yaā Dios, chi naún?

18 Séhē jijnáhan rō, ma cundáhú ni yō jíin máá jnūhun cáhan-ni yó, chi sa suhva na cúndáhú ndije ni yō nde jíin jniñu sáha yó.

*Ndese cucáhnu ni yō jeē váha sáhayó núu Yaā Dios*

19 Te súcuan cundaā ni yō jeē squícu yó jnūhun ndaā, te cucáhnu ni yō jeē váha sáha yó núu yā.

20 Chi núu ánuá yō tú vāha sáha siquī jeē iyó cuēchi yó, te Yaā Dios chi cújéhnu ga yā vēsú anuá yō, te jíni ndīhi ya tācá un.

21 Núu súcuan ñánī mánī, núu vāha sáha ánuá yō siquī jeē tú na cuēchi yó, yūcuán na te cucáhnu ni yō jeē váha sáha yó núu Yaā Dios.

22 Te tāca jéē cacán yō nuū yā, te sāha ya jeē cahán yō, chi squícu yó jniñu ndácu ya te sāha yó jniñu jeē cúsiñ ni yā.

23 Te yāha cúu jniñu ndácu ya: jeē na cándije yó jéē ni sāha Sēhe ya Jesucristo jehē yō, jíin jéē na cúndáhú ni yō jnáhan yó, nájñuhun ni ndacu ya jniñu nuū yō.

24 Te tāca ñáyuu squícu jniñu ndácu Yaā Dios, ndúú i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuan te jíin yō jeē ndeé Yaā Dios ini yō.

*Jñuhun jeē véji nuū Espíritu jíin jñuhun cáhán contra Cristo*

#### 4

1 Ñánī mánī, ma candíje ró táca téē jéē cácahán de jeē jíin Espíritu Yaā Dios cánacani de jñuhun. Chi sa suhva coto ndee rō de, núu nde nuū Yaā Dios vēji jñuhun cácahán de, chí tuú. Chi ini ñayīví je ni canecoo cuehē tēe cánacani jñuhun stáhú, te cácahán de jeē ndé nuū Yaā Dios vēji.

2 Te súcuan nacuni rō ndé-ni i cúu jeē jíin Espíritu Yaā Dios cahán: tāca ñáyuu jeē cácahán ndaā jeē ní quiiji Jesucristo, ni nduu ya tēe, máá i cúu jeē jíin Espíritu Yaā Dios cácahán.

3 Te tāca ñáyuu jeē tu cájejnúhún jeē súcuan ni nduu ya tēe, máá i chi nasūu jíin Espíritu Yaā Dios cácahán i. Chi sa suhva cácuu i contra siquī Cristo. Te je ni cajini jñuhun ró jéē quíjicoo ñayuu súcuan, te vijna je cáhīyo i ini ñayīví.

4 Séhē jijnáhan ró, máá ró cácuu sēhe Yaā Dios, te je ni cacundeyí ró siquī téē cástáhú un. Chi jéhnu ga cúu poder máá Yaā jeē ndeé ini rō, vēsú poder máá jéē ndeé jíin ñáyuu ñayīví jéē castáhú.

5 Máá i cácuu cuenta ñayīví, te jeē yúcuan cácahán i jñuhun cuenta ñayīví. Te ñayuu cácuu cuenta ñayīví, cájini nahín i jñuhun ún.

6 Te máá yó chi sēhe Yaā Dios cácuu yó. Te ñayuu jeē cájini i ndese Yaā cúu Yaā Dios, máá i cájini nahín i jñuhun cácahán yō. Te ñayuu jeē násūu sēhe

Yaā Dios cácuu, máá i tu cájini nahín i jñuhun cácahán yō. Te súcuan nacuni yō ndé-ni cúu jeē cahán jñuhun ndaā jíin ndé-ni cúu jeē cahán jñuhun stáhú.

*Máni jñuhun cúndáhú ni iyó jíin Yaā Dios*

7 Ñánī mánī, na cúndáhú ni yō jnáhan yó, chi jñuhun cúndáhú ni, nde nuū Yaā Dios vēji. Te tāca ñáyuu cundáhú ni jnáhan, chi sēhe Yaā Dios cúu i, te jíin i ndese Yaā cúu Yaā Dios.

8 Te ñayuu jeē tu cúndáhú ni jnáhan, tu jíin i ndese Yaā cúu Yaā Dios, chí máni jñuhun cúndáhú ni iyó jíin Yaā Dios.

9 Súcuan ni steén Yaā Dios ndese cúndáhú ni yā yohó, chí ni tají yá Sēhe ya ni quiiji ini ñayīví yáha, vēsú mañúhún-ni ya iyó, návāha cotecu yō ní cáni sāha ya.

10 Te yāha cúu jñuhun cúndáhú ni: nasūu jéē xíhna máá yó ni íyo manī yō jíin Yaā Dios, chí sa suhva máá yá cúu jeē ní cundáhú ni yā yohó. Te ni tají yá Sēhe ya ni quiiji, návāha socō yā máá yá jeē quende yā cuēchi yó.

11 Ñánī mánī, núu súcuan ni cundáhú ni Yaā Dios yohó, te suni súcuan cánuú jeē cundáhú ni yō jnáhan yó.

12 Ni ñn ñayuu tu ní jíto cuíti nuū Yaā Dios. Te núu cúndáhú ni yō jnáhan yó, te ndeé Yaā Dios ini anuá yō, te je ni ije vāha ni yō jíin jñuhun cúndáhú ni.

13 Te máá Espíritu Santo jeē ni jéhe ya jeē ndeé ini yō, máá yá steén jeē ndúú yó jíin Yaā Dios, te ndeé Yaā Dios ini yō.

14 Te ni cajito ri te cácastūhun rí jeē máá Tátá yō ni tají yá Sēhe ya ni quiiji návāha jnama ya ñayuu ñayīví.

15 Te núu ndé ñáyuu jejnúhún i jeē Sēhe Yaā Dios cúu Jesús, te ndúú i jíin Yaā Dios, te Yaā Dios ndeé yá ini i.

16 Te máá yó, je ni jini yō te ni candíje yó jéē cundáhú ni Yaā Dios yohó. Chí máni jñuhun cúndáhú ni iyó jíin Yaā Dios. Te ñayuu cundáhú ni jnáhan, ndúú i jíin Yaā Dios, te ndeé yá ini anuá i.

17 Te súcuan cúu jeē íje vāha ni yō jíin jnúhun cúndáhú ni, návāha ma yūhu yó quiṽī sándaā yā jniñu yó. Chi nájnūhun cúndáhú ni Cristo, suni súcuan cándaā máá yó ini ñayīví yáha.

18 Te núu manī yō jíin yá, te tu yúhú yó nuū yā. Chi núu ni ije yó jíin jnúhun manī yō jíin yá, te tú na siquī yuhú yó nuū yā. Chi jnúhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chi ná tu ije vāha i jíin jnúhun manī i jíin yá.

19 Te yóhó chi manī ndasí yó jíin Yaā Dios, chi xīhna gā máá yá ni cundáhú ni yā yohó.

20 Te núu ñn ñayuu cahán i jeē manī i jíin Yaā Dios, te núu quítí ni i nuū jnáhan i, núu súcuan te ñayuu stahú-ni cúu i. Chi núu ñn ñayuu tu íyó mánī i jíin jnáhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yā.

21 Chi je ni ndacu ya jniñu yáha nuū yō: Ñayuu jeē manī i jíin Yaā Dios, suni na cóo manī i jíin jnáhan i.

*Jeē cúndeyí yó siquī jeneé íyó ini ñayīví*

## 5

1 Tāca ñáyuu jeē cácañdije i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu manī jíin Yaā cúu Tátá, suni cácañdáhú ni i ñayuu cácuu sēhe ya.

2 Súcuan jíin yō jeē cundáhú ni yō ñayuu cácuu sēhe ya, núu manī yō jíin yá te squícu yó jniñu ndácu ya.

3 Chi jeē squícu yó jniñu ndácu Yaā Dios cúu jeē manī yō jíin yá. Te jniñu ndácu ya chi tú vēyi.

4 Chi tāca ñáyuu cúu sēhe Yaā Dios, cúndeyí i siquī jeneé íyó ini ñayīví. Te jeē candije yó jēe cundáhú ni yā yohó, yúcuan cúu fuerza jeē sáha jeē cúndeyí yó.

5 Máá-ni ñayuu jeē candije jeē Jesús cúu Sēhe Yaā Dios, máá i cúu jeē cúndeyí siquī jeneé íyó ini ñayīví.

*Jnúhun cáhán ndaā siquī Séhe Yaā Dios*

6 Te jeē ní quiji Jesucristo ini ñayīví, chi ni jendute ya jíin ndute, te ni jeti ññī yā jeē ni jíhī yā jehē yō. Te nasūu máá ñn-ni jeē ní jendute ya jíin ndute, chi suni ni jeti ññī yā. Te máá Espíritu Yaā Dios cahán ndaā siquī yā, chi nuū máá Espíritu vēji jnúhun ndaā.

7 Chi ini andiví íyó únī jeē cácañhān ndaā siquī jnúhun yáha: máá Yaā cúu Tátá, jíin Yaā cúu Jnúhun, jíin Espíritu Santo. Te ndinúní yá, chi ñn-ni cúu ya.

8 Te ini ñayīví suni íyó únī jeē steén ndaā: máá Espíritu, jíin jēe ní jendute Jesús, jíin jēe ní jeti ññī yā. Te ndinúní yáha, chi inuú-ni steén siquī yā.

9 Te cájetáhú yó jnúhun cácañhān ndaā tēe, te jéhu ga cúu jnúhun cáhán máá Yaā Dios. Te jnúhun ni cahán yā cúu jnúhun siquī Séhe ya.

10 Ñayuu cácañdije jeē Séhe Yaā Dios cúu Jesús, je ni cacundaā ni i jnúhun yáha jeē ní cáhān Yaā Dios. Te ñayuu jeē tu cácañdije jeē ni cáhān Yaā Dios, nájnūhun cásáha i jeē Yaā stahú cúu ya, chi tu cácañdije i jnúhun ni cahán ndaā yā siquī Séhe ya.

11 Te jnúhun ndaā un cúu jeē ni sáha ya jeē cótecu yō níí cáni, te Séhe ya ndíso jnúhun cotecu yō.

12 Ñayuu jeē iyó Séhe ya jíin i, je ni nihín tahú i cotecu i. Te ñayuu jeē tu íyó Séhe ya jíin i, ma nihín tahú i cotecu i.

*Jnúhun consejo jeē sándihí*

13 Jnúhun yáha tēe ri nuū rohó ñáyuu cácañdije Séhe Yaā Dios, návāha cucáhnu ni rō jeē ni níhín tahú rō cotecu rō níí cáni.

14 Te cúcáhnu ni yō Yaā Dios, chi jíin yō jeē núu na vé jíicán yō nuū yā jeē suni cúní máá yá, te jíin nahín yá jeē jíicán yō.

15 Te núu jíin yō jeē jíin nahín yá jeē jíicán yō, núu súcuan te suni jíin yō jeē sáha ya jeē jíicán yō.

16 Núu ñn ñayuu jíin i jeē sáha jnáhan i cuēchi jeē násūu cuéchi jeē jnahnú ndetū i cúu, te na cácañ tahú i nuū Yaā Dios, te cuāha ya jnúhun cotecu jnáhan i, te núu nasūu cuéchi jeē sáha jeē jnahnú ndetū i cúu. Iyó cuéchi jeē

jnahnú ndetū i sáha, te tu cáhán rī jeē cacán tahu rō jehē ñayuu sáha cuēchi súcuan.

<sup>17</sup> Tāca jniñu néé cúu cuēchi, te íyó cuēchi jeē násūu jéē jnahnú ndetū i cúu.

<sup>18</sup> Te jíní yō jeē tāca ñáyuu cácuu sēhe Yaā Dios, tu jíca i jíin cuēchi. Chi Yaā cúu Sēhe Yaā Dios, ndíto vāha ya i. Te tú na vé cúu sáha jexeén jíin i.

<sup>19</sup> Te jíní yō jeē séhe Yaā Dios cácuu yó. Te ñayuu ní ñáyiví yíhi i ndaha jexeén.

<sup>20</sup> Te suni jíní yō jeē ní quiji Sēhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō ní cáni.

<sup>21</sup> Séhē jijnáhan ró, na cújiyo ró núū tāca jéē násūu Yaā ndaā cúu. Súcuan na cóo. Amén.

## CARTA UU JEE NI TEE SAN JUAN APOSTOL

### *Jnūhun ndaā jín jnúhun cúndáhú ni*

<sup>1</sup> Máá ná cúu tēe jéhu ndíso jníñu, te tēe ná carta yáha cuájeē nuū ni jéē cúu ní hermana ni nacāji Yaā Dios, jín nuū séhe ní jijnáhan i. Te manī na jín ní jijnáhan ní sáha jnūhun ndaā yā, te nasūu máá-ni ná, chi suni tāca ñáyuu jini jnūhun ndaā.

<sup>2</sup> Te manī na jín ní jijnáhan ní síquī jeē cácanđije yó jnúhun ndaā yā jeē iyó ini anuá yō, te coo jín yó ní cáni.

<sup>3</sup> Te ñúhun ni na jéē Tatá yō Yaā Dios jín Séhe ya Jitoho yō Jesucristo, na sáha ga yā jeē váha níhín, te cundáhú ni yā nihín, te sáha ya jeē coo ndeyí coo sī ni ní, jín jnúhun ndaā jín jnúhun cúndáhú ni.

<sup>4</sup> Yōhyo ni cusī ni ná, chi ni jini na jéē sava sēhe ní cájica i jín jnúhun ndaā, nájñūhun ni ndacu máá Tatá yō Yaā Dios jniñu nuū yō.

<sup>5</sup> Hermana, cáhán ndahú ná jín ní jeē na cúndáhú ni yō jnáhan yó. Te jnūhun tēe ná yáha cuájeē nuū ní, nasūu ñin jniñu jéē sá ndácu ya cúu, chi jniñu ní ndacu ya nuū yō nde ná ni quejéé yó candíje yó cúu.

<sup>6</sup> Te jeē cundáhú ni yō jnáhan yó cúu jeē caca yó nájñūhun ni ndacu ya jniñu nuū yō. Te jniñu ní ndacu ya cúu jeē caca ní jín jnúhun cúndáhú ni, nájñūhun ni cajini sōho ní ndé ná ni quejéé ní candíje ní.

### *Siquī tēe cástáhú*

<sup>7</sup> Chi cuehē tēe cástáhú ni canecoo de ní ñáyiví, te tu cájejnúhún de jeē ní quiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra síquī Cristo.

<sup>8</sup> Coto ní jéē ma snáa ni táhū síquī jniñu váha ni casáha ní, chi sa suhva jeē na níhín ni ndíhi tahū ní.

<sup>9</sup> Núu ndé ñáyuu jní inga jnūhun, te tu quéndōo i jín jnúhun ni steén Cristo, núu súcuan te tu iyó Yaā Dios

jín i. Te ñáyuu quéndōo jín jnúhun ni steén Cristo, chi iyó Tatá yō jín i, te suni iyó Séhe ya jín i.

<sup>10</sup> Te núu jinū ñin ñáyuu vehe ní, te núu tu quiñáhan jnūhun steén i jín jnúhun yáha, te ma cuáha ní jnúhun condee i vehe ní, ni ma cahán ni jnúhun ndeyí ni jín i.

<sup>11</sup> Chi ñáyuu cahán jnūhun ndeyí ni jín i, chíndéé ñájnáhan jín i síquī jniñu neé casáha i.

### *Jnūhun sandíhi*

<sup>12</sup> Iyó cuehē gā jnūhun cahán na jín ní jijnáhan ní, te tu cúní na tee ná núu tútu jín tinta. Chi ñúhun ni na cuájeē ná coto jnáhan yó, te ndajnūhun yó, náváha cusī ndasí ni yō.

<sup>13</sup> Tāca séhe cuhū ní, ñahan jeē suni ni nacāji ya, cácahán i jeē sándeeyí ni ní. Súcuan na cóo. Amén.

## CARTA UNI JEE NI TEE SAN JUAN APOSTOL

### *Jeē jejnúhún de tēe nání Gayo*

<sup>1</sup> Máá rí cúu tēe jéhnú ndíso jníñu, te tēe rí carta yáha cuájeē nuū rō, amigo Gayo, chi manī rī jíin ró sáha jnūhun ndaā.

<sup>2</sup> Nánī mánī, jícan tahu rī jeē vāha na quihín tācá jniñu sáha ró, jíin jéē na cóo vāha ró, nájnūhun íyó vāha ánuá rō jíin jnúhun ya.

<sup>3</sup> Yōhyo ni cusī ni rī ná ni quecoo sava hermano te ni cacastūhún de nuū rī ndese vāha squícu ró táca jniñu ndaā, chi jíca ndaā rō.

<sup>4</sup> Tuá na inga sáha jeē cúsi gā ni rī, chi mánī jeē nihín rī jnūhun jeē cájica ndaā ñayuu cácuu nájnūhun sēhe rí siquī jeē ni scándíje rí i.

<sup>5</sup> Nánī mánī, yōhyo vāha sáha ró jéē chindéé ñáhán ró tācá hermano, te víhyá gā núu tēe ñuu jíca cácuu de.

<sup>6</sup> Chi tēe un ní canacani de jnūhun nuū ñayuu cácandíje yāhá, ndese cúndáhú ni rō de. Te jícan rī jeē chindéé ñáhán gá rō de, núu na vé jíni ñúhún de jeē caca ga de ichi nuū quihín de, nájnūhun nújnahan ni Yaā Dios.

<sup>7</sup> Chi tēe un ní quendacoo de cájica de siquī jniñu Jesucristo. Te tú na vé cáquihin de nuū ñayuu jeē tu jíni jnūhun Yaā Dios.

<sup>8</sup> Jeē yúcuan cánuú coto yó de, chindéé ñáhán yó de jeē canacani de jnūhun ndaā.

### *Siquī jeē tú vāha sáha Diótrefes*

<sup>9</sup> Je ni tee rí ñn carta nuū ñayuu cácandíje jíñā. Te Diótrefes, tu jétáhú de jnūhun cáhán rī, siquī jeē cuní de cujéhnú máá de nuū i.

<sup>10</sup> Jeē yúcuan, núu na jéé rī te cahán rī nuū de siquī jniñu sáha de, chi yōhyo sájnúhún de te cáhán de jnūhun stáhú síquī rī jíjnahan rí. Te nasūu máá yúcuan-ni sáha de, chi suni tu jétáhú de tācá hermano jéngoo nuū de, te jési de jeē ma cuátáhú ñayuu nuū

tācá hermano un. Te ñayuu cájetáhú nuū hermano un, quénehen de i nuū cándutútú ñayuu cácandíje.

<sup>11</sup> Nánī mánī, ma ndácu ró ñayuu casáha jniñu néé, chi sa suhva ñayuu casáha jniñu vāha. Chi sēhe Yaā Dios cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Dios.

### *Jeē cácahán i jeē vāha sáha Demetrio*

<sup>12</sup> Tāca ñayuu chi cácahán i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuan cácahán maá rí, te cájini rō jeē íyó ndáá jnūhun cáhán rī.

### *Jnūhun sandíhi*

<sup>13</sup> Íyó cuéhē gā jnūhun cahán rī jíin ró, te tu cuní rī tee rí jíin tinta jíin pluma.

<sup>14</sup> Chi ñúhún ni rī cuajeē yachī rī coto jnáhan yó, te ndajnūhun yó.

<sup>15</sup> Te ñúhún ni rī jeē na cóo ndeyí coo sī ni rō. Tācá amigo yō yāha cácahán i jeē sándeyí ni rō. Te suni cahán rō jíin ñn ñn amigo jíñā jeē sándeyí ni i, áchí rí, te cocahán yō.



## CARTA JEE NI TEE SAN JUDAS APOSTOL NUU ÑAYUU CACANDIJE

<sup>1</sup> Máá rí cúu Judas ñani Jacobo, te mozo Jesucristo cúu rí. Te tée rí carta yáha cuájeē nuū rohó ñáyuu jeē ní cana máá Tátá yō Yaā Dios, te ni sáha ya jeē iyó ndoo íyó íi rō nuū yā jeē cácuu ró ñáyuu manī yā jíin. Te Jesucristo ndíto vāha ya rohó jéē cáyihī ró ndaha ya.

<sup>2</sup> Te ñūhun ni rī jeē na cúndáhú gá ni yā rohó, te sáha ya jeē coo ndeyí coo sīi ni rō, te coo manī ndasí yá jíin ró, te na ndúcuehē gā tāca jéē yáha núū rō.

*Siquī tēe cástéén jnūhun stáhú  
(2 Pedro 2.1-17)*

<sup>3</sup> Ñánī manī, yōhyo ní cuu ni rī tee rí nuū rō siquī jnūhun ni jnama ya rohó jíin rúhū jijnáhan yó. Te ni jini rī jeē cánuú gá tee rí carta jeē stihví ni rī rohó návāha nducú ndéyí ró jeē ma cási ñayuu nuū jnūhun cácandíje yó. Te jnūhun ún chi je ni jēhe ya ñin jíinu-ni nuū tāca ñáyuu maá yá.

<sup>4</sup> Chi sava tēe ni castáhú de róhó ní quivicoo de mēhñu ró. Te tēe ún chi nde jenahán je cáhán tutu íi jeē jnahnú ndetū de siquī jniñu cása ha de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni sáha de jniñu néé, cácahān de. Te tu cájejnūhún ndije de Jitoho yō Jesucristo jíin Yaā Dios, jeē mañúhún-ni ya kujéhnu nuū yō.

<sup>5</sup> Te vijna chi vēsú je cájini vāha ró, te cúni rī jeē na núcūhun ni rō ndese ni sáha máá Jitoho yō. Chi ni jnama ya ñayuu Israel jenahán, ni chindéé ñájna han ya i jeē ní jinu i ini ñuu tatú Egipto cuahān i. Te vēsú súcuan te cuéé gá te ni snāā yā sava i jeē tu ní cácandíje i.

<sup>6</sup> Te suni nucūhun ni rō siquī ndajéhé yā jeē ní castóo jniñu ndíso, te ni castóo nuū ní ndeē andiví. Te Yaā Dios ni chindihyū yā jijnáhan,

te cándetu nde quiji quiví cáhnu jeē sándaā yā jniñu. Te cánuhnī jíin cadena, cáyūcu ñí cáni nuū cunú núū néé.

<sup>7</sup> Te suni ni stóho ya ñayuu ñuu Sodoma jíin ñuu Gomorra jíin sava ga ñuu jeē ní iyo yajni, chi suni ni casáha néé i nájnūhun ni casáha tāca ndajéhé un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihīn i castigo ñuhūn jeē cayú ñí cáni, te súcuan cúu i ñin ejemplo nuū ndihī ñayuu.

<sup>8</sup> Te tēe cástáhú jeē ní quivicoo mēhñu ró, vēsú cájini de jeē súcuan ni sáha ya, te cájeni cáhá ni de, te cása ha jnéhén de yiqui cúñu de, te cásquéhichī ni de tēe cándacu jniñu Jitoho yō, te cácahān ndevāha de siquī tāca jéē cácujuhnu nuū sucún.

<sup>9</sup> Te nasūu súcuan ní sáha ndajéhé Miguel, vēsú ndajéhé kujéhnu ga cúu ya. Chi tu ní cáhán ndevāha ya ni tu ní ndácunehen ya cuéchi siquī jexeén ná ni casásáhan jnáhan ya jíin jéxeén un jeē siquí yiqui cúñu Moisés ná ni jihī de. Chi suhva-ni ni cahān yā: Máá Yaā Dios, Yaā cúu Jitoho, cuxeēn yā nuū rō, ni achi Miguel.

<sup>10</sup> Te tēe cástáhú yáha chi cácahān neé de siquī tāca jéē tu cájecūhun ni de. Te tāca modo cánevāha de siquī jeē sá cáa de, nájnūhun quiti yúcú jéē sá cáa ti, suu yúcuan sáha jeē jnahnú ndetū de.

<sup>11</sup> Nacā xeēn ndoho de núu súcuan, chi tu cájetáhú de Yaā Dios, nájnūhun jeē tu ní jétáhú Caín. Te siquī jeē cácuni de nihīn de xūhún te cástéén de jnūhun stáhú, nájnūhun ni sáha Bal-aam. Te jnahnú ndetū de nájnūhun Coré, tēe ni jihī siquī jeē ní cunihni ni de.

<sup>12</sup> Tēe yáha núu cándutútú de jíin ró jeē cáyeji manī rō, te cása ha de jniñu cúcanu rō. Chi cáyeji cájhi sīi ni de, te tu cása ha de cuenta ndese caji inga ñayuu, chi máni máá de ndihví ni de caji vāha de. Te cácuu de nájnūhun vicó íchi jéē stechí táchī. Te suni cácuu de nájnūhun yujnu jeē tu jēhe ndehē maá tiempo. Te cácuu de nájnūhun

yujnu jeē ní quenda nde jíin yoho, te tú cuiti gā na modo nane numa.

<sup>13</sup> Te nájnūhun jeē jisó cóyo ndute mar te cáne tiñū, súcuan jícu de jíin jniñu néé jéē cúu jnūhun canu. Te cácuu de nájnūhun quimi jeē ní sana ichi. Te je íyó túhva nuū néē nuū lúchi jnúú coyūcú de ní cáni.

<sup>14</sup> Te jeē ní yāha iñū yucūn Adán, te ni cacu Enoc, te ni nacani de jnūhun jeē ni stéén Yaā Dios nuū de siquī tāca téé yāha, áchí de: Máá Jítoho yō ni steén yā nuū rī jeē in quivī te quiji ya jíin cuéhē mil ñayuu maá yá.

<sup>15</sup> Te sándaā yā jniñu tāca ñayuu, te snáhnú ndetū yā tāca ñayuu casáha néé. Chi máni jniñu néé casáha i siquī jeē canéé máá i, te cácahān i cuehē jnūhun ndevāha siquī yā. Ni achi Enoc.

<sup>16</sup> Tāca téé yāha máni cácahān sōo de, te cácahān de siquī ñayuu. Te máni jeē cúsiñi maá de cánducú de. Te cácahān de jeē téé téyí cácuu de, te cácahān yíñúhún de jíin ñayuu návāha nihin de jecu nuū i.

#### *Jeē stihví ni Judas ñayuu cácañdije*

<sup>17</sup> Te máá ró jijnáhan ró ñánī mánī, na núcūhun ni rō jnūhun jeē jé ni canacani tēe cácuu apóstol maá Jítoho yō Jesucristo.

<sup>18</sup> Chi ni cacahān de: Nde nuū cuándihí quivī te quijicoo tēe sácata siquī jnúhun ndaā yā, te sáha de tāca jniñu néé jéē ndíyo ni maá de. Súcuan ni cacastūhún apóstol.

<sup>19</sup> Tēe un cúu jeē casásin ñayuu. Te máni cándihví ni de tāca jéē cutíndí ni maá de, chi tu ndéé Espíritu yā jíin de.

<sup>20</sup> Te máá ró ñánī mánī, na íje vāha ni rō jíin jnúhun ndoo ndasí jéē cácañdije ró. Te cacān tahu rō jíin fuerza Espíritu Santo.

<sup>21</sup> Te quendōo nihin ró jíin jnúhun jeē cundáhú ni Yaā Dios rohó. Te condetu ró quivī jeē cótecu rō ní cáni sáha máá Jítoho yō Jesucristo siquī jeē cundáhú ni yā rohó.

<sup>22</sup> Te sava ñayuu jeē cájeni siquí ni, nducú ró modo scandije ró i.

<sup>23</sup> Te sava ga i chi nducú ndéyí ró jeē cácu i nuū cuéchi i, jeē nájnūhun stáa ró i nuū ñuhún. Te cundáhú ni rō i jnama ró i, te coto ró máá ró, te cuquini ni rō coto ró nde sahma i jeē ní cujnéhén jíin jniñu néé casáha i.

#### *Jnūhun cújéhnú Yaā Dios ní cáni*

<sup>24</sup> Te Yaā Dios chi máñúhún-ni máá yá cúu Yaā ndichí, Yaā jnama yóhó. Te íyó poder yā jeē coto ya rohó jéē ma quivī ró cuéchi, jíin jéē sáha ya jeē cuíñi ró núū ndíndēe yá, te quivī ún coo ndoo ró núū yā, te cusíñi ndasí ni rō sáha ya.

<sup>25</sup> Te na cáhán yō jeē yóhoyo luu cújéhnú ya siquī jeē ni sáha ya jíin Jítoho yō Jesucristo. Te na cáhán yō jeē cujéhnú téyí yá, te ndácu ya jniñu jíin poder jeē ndíso ya nde jenahán ndasí jíin ndé vijna jíin ndé ní cáni. Súcuan na cóo. Amén.

## JNIÑU QUIJI JEE NI JITO NDIJIN SAN JUAN

*Jeē ni stéen Jesucristo tācá jniñu quiji*

<sup>1</sup> Jnūhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñayuu cácanđije jeē cácuu i mozo yā. Te stéen yā nuū i tācá jniñu jeē yachī coo. Te ni tají yá ndajéhé yā ni quiji ya ni stéen ndijin yā jniñu un núu ruhū Juan jeē cúu ri mozo yā.

<sup>2</sup> Te máá rí cástūhun ndāā rī siquī tāca jéē ní jito ri ún, te nácani ndāā rī jnūhun Yaā Dios jíin jnúhun jeē ní cahān ndāā Jesucristo.

<sup>3</sup> Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tāca jnúhun yáha jeē ní cachi Yaā Dios, te chuhun ni i. Chi je cuacuyajni quiṽi coo tācá jniñu yósó núu tútu yáha.

*Jeē té Juan carta nuū ndihúxá grupo ñayuu cácanđije*

<sup>4</sup> Máá rí cúu Juan, te té ri jnūhun yáha cuájeē nuū rohó, ndihúxá grupo ñayuu cácanđije jeē cáyūcu Asia. Te ñúhun ni rī jeē maá Yaā Dios na sáha ga yā jeē váha rohó jíjnáhan ró, te sáha ya jeē coo ndeyí coo sī ni rō. Chi máá yá cúu Yaā iyó vijna, te ni iyo ya ní cáni, te coo ya ní cáni. Te ñúhun ni rī jeē suni súcuan sáha ndihúxá Espíritu jeē cáhīn ya yuhu mesa nuū ndácu Yaā Dios jniñu.

<sup>5</sup> Te ñúhun ni rī jeē suni súcuan sáha Jesucristo, Yaā cahán ndāā tāca jnúhun. Te xīhna gā maá yá ni natecu mēhñu ndíyī. Te cújéhnu ya nuū tāca rey jeē iyó ñayíṽi. Te máá yá cundáhú ni yā yohó, te ni nacate ya yohó núu cuéchi yó jíin níñi yā.

<sup>6</sup> Te ni sáha ya jeē ní nduu yó rey jíin sūtū cájejniñu nuū Tatá yā Yaā Dios. Te na cahán yō jeē yóhyo luu cújéhnu ya te jniñi ya poder ní cáni. Amén.

<sup>7</sup> Cuni sōho jíjnáhan ró, chi ndiji Cristo jíin vícō. Te ndivii ñayuu coto i nuū yā, te nde jíin ñayuu jeē ní castújí i ya. Te tāca raza ñayuu ní cáhnu ñayíṽi ndahyū i jeē tu ní cácanđije i ya. Súcuan nahín coo.

<sup>8</sup> Suhva cáhán maá Jítoho yō, Yaā jniñi ndihi poder: Máá rí cúu nájñūhun letra A xīhna ñúhún jíin letra Z jeē sándihí na, chi máá rí ni squejéé ndihi te máá rí sínu, áchí máá Yaā iyó vijna, te ni iyo ya ní cáni, te coo ya ní cáni.

*Jeē ní jito Juan jeē cújéhnu luu Cristo*

<sup>9</sup> Máá rí cúu hermano rō Juan jíjnáhan ró. Te inuú-ni ndóho ri jnúndóho jíin ró siquī jeē cácanđije yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ni yō sáha Jesucristo. Te siquī jeē ní nacani ri jnūhun Yaā Dios jíin jéē ní cachi ndāā rī jnūhun Jesucristo, jeē yúcuan ní cajni i ruhū cuenta preso, te ni cachune i ruhū isla jeē naní Patmos.

<sup>10</sup> Te in domingo ni jito ndijin rī jeē ni stéen maá Espíritu Santo nuū rī. Te ni jini sōho ri in jeē cána jee níhin ichi yátá rī nájñūhun jeē tíṽi trompeta.

<sup>11</sup> Te ni cahán jíin rí:

Máá rí cúu nájñūhun letra A xīhna ñúhún jíin letra Z jeē sándihí na, chi máá rí cúu Yaā iyó ndé xīhna ñúhún te coo ri ní cáni. Te na téé ró núu in tutu tāca jéē cóto ró, te tají ró quihīn nuū ndihúxá grupo ñayuu cácanđije jeē cáyūcú i ní cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

<sup>12</sup> Yūcuán na te ni ndicó cóto ri jeē cóto ri ndé in cúu jeē cahán jíin rí. Te ná ni ndicó cóto ri te ni jito ri uxā candelero oro.

<sup>13</sup> Te mēhñú ndihúxá candelero un índichi maá Yaā ní nduu téé. Te ñúhun ya in sahna cáni jeē jinú nde nuū jehé yā. Te núhni in cinturón oro jicá yā.

<sup>14</sup> Te ixi xíní yā chi yaa nájñūhun ixi lánchi, nájñūhun yuhvā volcán. Te tinūu ya ndíndēe nájñūhun yáñuhūn.

<sup>15</sup> Te jehé yā xínú jíto nájñūhun cāa cuaán jéē ni ndúhvā nuū horno. Te

n̄hin ndasí cáhán yā, nájñūhun n̄hin cuehē yūte nāhnu.

<sup>16</sup> Te ndaváha ya jñí ya uxā qūimi. Te yuhu ya quénda jeē cáa nájñūhun espada jeē xeén ndíndúú lado, te suu cúu jñūhun ya jeē niní sándaā yā síquī cuéchi. Te nuū yā cáa nájñūhun niāndii jeē nándii ndaxín.

<sup>17</sup> Te ná ni jito ri yā te ni cotúú rí nuū jéhē yā nájñūhun jeē ni jíhī rī. Te ni soó yā ndaváha ya síquī rī, te ni cahān yā:

Ma yūhu ró. Máá rí cúu Yaā iyó ndé x̄ihna ñúhún te coo rí ñí cáni.

<sup>18</sup> Te Yaā técu cúu rí. Chí ni jihī rī te ni natecu rī, te vijna chí técu rī ñí cáni. Te máá rí jñí poder síquī cuéhyī jéhni ñayuu jíin síquī lugar nuū cáyūcu ánuá ndīyí.

<sup>19</sup> Núu súcuan te tee ró núu tútu tāca jéē ní jito ró, jeē cúu vijna jíin jéē cóo ichi núu.

<sup>20</sup> Te yāha cúu jñūhun sāhi síquī ndihúxá qūimi ni jito ró jñí ndaváha rí, jíin síquī ndihúxá candelero oro. Ndhúxá qūimi ún cúu nájñūhun ndihúxá jeē cácujuhnu nuū ndihúxá grupo ñayuu cácandíje. Te ndihúxá candelero cúu nájñūhun ndihúxá grupo ñayuu cácandíje.

*Jñūhun cuahān nuū ndihúxá grupo ñayuu cacandíje:*

*Jñūhun cuahān ñuu Efeso*

## 2

<sup>1</sup> Tee ró jñūhun yāha na quíhín nuū jeē cujéhnu nuū ñayuu cácandíje ñuu Efeso: Súcuan cáhán ruhū, Yaā jeē jñí ndihúxá qūimi jíin ndaváha rí, te jíca cuu rí mēhñú ndihúxá candelero oro.

<sup>2</sup> Je jíin rī tācá jñiñu váha cásaáha ró, jeē cándihvī ni rō síquī jñūhun rí, jíin jéē cájendeyí ni rō. Te jíin rī jeē tu cájēhe ró jñūhun qūivicoo ñayuu casáha néé méhñu ró. Te jíin rī jeē ní cajito ndee rō tēe cástáhú jeē cácahān de jeē cúu de apóstol, te ni cajini rō jeē tēe stáhú cácuu de.

<sup>3</sup> Te ni cajendeyí ni rō ni candoho ró jñúndóho, te tu ní ndínuu ni rō jeē cácuu ndasí ró jíin jñiñu rí.

<sup>4</sup> Te vēsú súcuan te iyó jecu jeē cahán rī nuū rō, chí tuá cáhīyo manī vāha ró jíin rí nájñūhun ni iyo manī rō jíin rí quivī jehé.

<sup>5</sup> Núu súcuan te nucūhun ni rō ndese ni castóo ró jñūhun jeē ni iyo manī rō jíin rí, te nacani ni rō, te na sáha ró nájñūhun ni casáha ró ndé quivī ún. Te núu ma nacani ni rō, te yachī jeē rī te stáa rí candelero rō nuū ín, cúu jeē ma cuíñi ga rō jíin ñayuu cácandíje.

<sup>6</sup> Te vēsú súcuan te iyó ñin jeē váha cásaáha ró, chí tu cánujnahan cuíti ni rō cájito ró jñiñu néé cásaáha ñayuu cándiquín jñūhun jeē steén Nicolás. Te suni máá rí tu nújnahan cuíti ni rī jito rí.

<sup>7</sup> Ñayuu iyó sóho na chúsóhó i jeē cahán maá Espiritu Santo jíin táca grupo ñayuu cácandíje. Tāca ñayuu jeē cúndeyí síquī jeneé, cuāha rí jñūhun caji i ndehē jeē cúun xinī yújnu jeē sáha jeē cótecu i ñí cáni. Te yujnu un ín nuū jardín Yaā Dios nde andiví, áchí yá.

*Jñūhun cuahān ñuu Esmirna*

<sup>8</sup> Tee ró jñūhun yāha na quíhín nuū jeē cujéhnu nuū ñayuu cácandíje ñuu Esmirna: Súcuan cáhán ruhū, Yaā jeē iyó ndé x̄ihna ñúhún te coo rí ñí cáni, te ni jihī rī te ni natecu rī.

<sup>9</sup> Je jíin rī tācá jñiñu váha cásaáha ró, jíin jñúndóho cándoho ró, jíin jéē cándoho ndáhú ró. Te vēsú súcuan te cúcá ró ndihí jeē ndíso jñūhun rí. Te jíin rī jeē cácahān néé ñayuu síquī rō jíin náhan ró. Ñayuu un cácahān i jeē ñayuu hebreo, ñayuu maá Yaā Dios cácuu i, te tuú chí cástáhú-ni i, chí sa ñayuu yíhi ndaha Satanás cácuu i.

<sup>10</sup> Te ma yūhú cuíti rō tāca jéē ndoho ró. Chí jexeén je yajni sáha jeē quivicoo sava ró vecāa jeē cóto ndee rohó jíin náhan ró, te ndoho ró jñúndóho uxí quiví. Te na cuíñi n̄hin ró ndé cuu rō, te cuāha rí premio jeē cótecu rō ñí cáni.

<sup>11</sup> Ñayuu iyó sóho na chúsóhó i jeē cahán maá Espiritu Santo jíin táca grupo ñayuu cácandíje. Tāca ñayuu jeē cúndeyí síquī jeneé, ma nihín i

jnūndóho jeē jnahnú ndetū i cuu i vuelta uū, achí yá.

### *Jnūhun cuahān ñuu Pérgamo*

12 "Te tee ró jnúhun yáha na quíhín nuū jeē cujéhnū nuū ñáyuu cá candíje ñuu Pérgamo: Súcuan cáhán ruhū, Yaā jeē névāha espada jeē xeén ndindúú lado, te suu cúu jnūhun ri jeē sándaā rī síquī cuéchi.

13 Je jíni rī tācá jniñu váha cásáha ró, te jíni rī jeē cáyūcu ró mēhñu ñáyuu jeē ndácu Satanás jniñu nuū. Te vēsú súcuan te cáhīn nīhin ró jíni jnúhun ri, te tu ní cánayūhu ró jeē cá candíje ró rúhū, ni quivī ni jíhī Antipas, tēe ni squícu vāha ni nacani ndaā jnūhun ri. Chi ñuu rō cáyūcu ñáyuu cájējnīñu nuū Satanás, te ni cajehni i Antipas.

14 Te vēsú súcuan te íyó jecu jeē cahán rī nuū rō jijnáhan ró. Chi mēhñu rōhó ñáyuu ñuu Pérgamo iyó sava ñayuu cándiquīn jnūhun ni steén Balaam. Chi tēe un ní steén de nuū Balac ndese squívī de ñayuu Israel cuéchi jeē cáji i jeē ni sócō nuū ídolo jíni jéē cosíquí ndéē jnáhan i.

15 Te suni íyó sava ñayuu mēhñu ró jeē cá candíje ga i jnūhun ni steén Nicolás, te jnūhun ún chi tu nújnahan cuítī ni rī.

16 Núu súcuan te nacani ni rō síquī cuéchi ró. Chi núu tuú te yachī jeē rī jíni espada jeē quénda yuhu ri, te suu cúu jnūhun ri jeē sándaā rī síquī cuéchi. Te jíni yúcuan te stóho ri ñayuu jeē candíje ga jnūhun néé un.

17 Ñayuu iyó sóho na chúsóhó i jnūhun jeē cahán maá Espíritu Santo jíni táca grupo ñayuu cá candíje. Táca ñáyuu jeē cūndeyí síquī jeneé, scáji rī i maná jeē yísahí ichi ándiví. Te suni cuāha ri ñin yuū cuijín núu i, te nuū ún condee ñin síhví jéé, te ni ñin ñayuu ma cūni síhví un, chi máá-ni i jeē nihín. Achí yá.

### *Jnūhun cuahān ñuu Tiatira*

18 "Te tee ró jnúhun yáha na quíhín nuū jeē cujéhnū nuū ñáyuu cá candíje ñuu Tiatira: Súcuan cáhán ruhū, maá Séhe Yaā Dios jeē ndíndee tñūu rī

nájñūhun yáñuhūn. Te jehē rī xíñú jíto nájñūhun cāa cuaán jéé ni ndúhvā.

19 Je jíni rī tācá jniñu váha cásáha ró, chi cá candíje nīhin ró rúhū, te cájējnīñu ró núu rī, te cájendeyí ni rō. Te jíni rī jeē vihyá gā cásáha ró vijna vēsú nde quivī jehé.

20 Te vēsú súcuan te íyó jecu jeē cahán rī nuū rō. Chi íyó ñin ñahan mēhñu ró jéé naní Jezabel, te cájēhe ró jnúhun stéén ña nuū rō. Te achí ña jeē nácani ña jnūhun Yaā Dios. Te tuú chi jíni jnúhun stéén ña te stáhú ña ñayuu cá candíje jeē cácuu i mozo rī. Te sáha ña jeē casíquí ndéē jnáhan i, jíni jéé cáyeji i jeē ni sócō nuū ídolo.

21 Te ni jēhe ri tiempo jeē na nácani ni ña, te tu cúní ña nacani ni ña stóo ña jeē casíquí ndéē ña.

22 Núu súcuan te na sáha ri jeē jécāva ña jíni cuéhyī. Te táca ñáyuu casíquí ndéē jíni ña, suni cuāha ri jnūndóho xeén nuū i, te núu ma nácani ni i stóo i jniñu néé nájñūhun sáha ña.

23 Te sáha ri jeē cúu ñayuu jeē ni scándíje ña. Te súcuan cuni táca grupo ñayuu cá candíje jeē maá rī cúu Yaā jíni ndíhi ndese cāa jeē níjnūní jíni ánuá ñayuu. Te cuāha ri yāhu ñin ñin ró núu ndese ni casáha ró.

24 Te sava ga rō jeē cáyūcú ñuu Tiatira, jeē tu ní cájetáhú jnūhun stéén ñahan ún, ni tu ní cájni ró jnúhun jeē cácahān i jeē jnūhun sáhi gá Satanás cúu, jíni máá ró cahán rī jeē ma téé ga rī inga jniñu síquī rō.

25 Chi máá-ni jeē na quéndōo nīhin ró jíni jnúhun ndaā cá candíje ró, te quéndōo nīhin ró jíni ndé quivī ndíji ri.

26 Táca ñáyuu jeē cūndeyí síquī jeneé, jíni jéé squícu vāha jniñu cúní rī nde vijna te nde quivī sándíhí, sáha ri jeē cujéhnū i ndacu i jniñu nuū tācá nación,

27 nájñūhun ni sáha Tátá rī jeē cujéhnū ri ndácu ri jniñu. Te ndacu nīhin i jniñu nuū tācá nación. Te nájñūhun cūun yúú i quísi tahú, súcuan squéhichī i ñayuu tu cájendetū nuū rī.

28 Te sáha ri jeē coto i ruhū jeē luu

cujéhnū ri quenda ndijin rī, nájnūhun jíto i lucero jeē cáne cúndijin.

<sup>29</sup> Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácanđije. Achí yá.

### *Jnūhun cuahān ñuu Sardis*

## 3

<sup>1</sup> 'Te tee ró jnúhun yáha na quíhín nuū jeē cujéhnū nuū ñáyuu cácanđije ñuu Sardis: Súcuān cáhán ruhū, maá Yaā jeē névāha ndihúxá Espíritu Yaā Dios jíin ndihúxá quimi. Je jíin rī tācá jniñu cásáha ró, te cácahān ñayuu jeē cátecu rō, te nuū rī chi nájnūhun ndīyi cácuu ró.

<sup>2</sup> Na nátahū ni rō, te ndejéé níhin ró jíin jniñu jeē jecu na iyó te ndúcú naa. Chi je jíin rī jeē tu squícu vāha vāha ró nuū Yaā Dios.

<sup>3</sup> Te na núcūhun ni rō tāca jnúhun jeē ní castéén nuū rō. Te cuatáhú ró jnúhun ún te nacani ni rō siquī cuéchi ró. Chi núu tú natahū ni rō, te cuajeē rī nuū rō ñin sanaa-ni nájnūhun jeē ñin sanaa-ni te quíji ñacuīhná, te ma cúni rō na hora jinū rī nuū rō.

<sup>4</sup> Te vésú súcuān te íyó nahín jecu rō ñuu Sardis jeē tu ní cásáha ró cuéchi, jeē cúu nájnūhun jeē tu ní sájnéhén ró sahma ró. Jeē yúcuān cuíjín yaa coo sahma ró caca ró jíin rī, chí ñayuu vāha cácuu ró.

<sup>5</sup> Chí tāca ñáyuu jeē cúndeyí síquī jeneé, cuāha rī sahma cuíjín yaa cuhun i. Te ma ndáhva rī síhví i nuū libro jeē yosó síhví ñáyuu cotecu ní cáni. Te cuajnúhún rī i nuū Tatá rī jíin nuū tācá ndajéhé yā.

<sup>6</sup> Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácanđije. Achí yá.

### *Jnūhun cuahān ñuu Filadelfia*

<sup>7</sup> 'Te tee ró jnúhun yáha na quíhín nuū jeē cujéhnū nuū ñáyuu cácanđije ñuu Filadelfia: Súcuān cáhán ruhū, Yaā ndoo Yaā ndaā, te névāha rī ndacáa rey David. Te máá rī núne jeē quívi ñayuu nuū ndácu rī jniñu, te ni

ñin ma cúu casi, te máá rī jési, te ni ñin ma cúu nune.

<sup>8</sup> Je jíin rī tācá jniñu vāha cásáha ró. Te ni nune ri nájnūhun ñin yéhyí quívicoo ró, te ni ñin ma cúu casi. Chi vésú jecu-ni fuerza rō iyó, te ni cacandije ró jnúhun ri, te tu cájesi rō yuhu ró jeē cácanđije ró rúhū.

<sup>9</sup> Te íyó sava ñayuu yíhi ndaha Satanás, te cácahān i jeē ñáyuu hebreo, jíin ñáyuu maá Yaā Dios cácuu i, te tuú chí cástáhú-ni i. Núu súcuān te sáha rī jeē jécoco i nuū rō te jecuñi yití i nuū rō, te cuni i jeē maní rī jíin ró.

<sup>10</sup> Te vāha ni casquícu ró jnúhun ní cahān rī jeē cuándeýí ni rō. Te jeē yúcuān jnama ri rohó quívi jeē quíji ñin jnúndóho xeēn siquī ñáyuu ní cáhnu ñayívi, jéé cóto ndee ún i jíināhan i.

<sup>11</sup> Te yachí ndiji ri. Núu súcuān te quendōo níhin ró jíin jnúhun cácanđije ró, návāha ni ñin ma quénde premio rō.

<sup>12</sup> Tāca ñáyuu jeē cúndeyí síquī jeneé, sáha rī jeē cuu i nájnūhun síhín yuū luu ini templo Yaā Dios maá rī. Te ma cújiyo i nuū ndeé yá un. Te tee ri síhví Yaā Dios maá rī jneē i, jíin síhví jéé máá rī, jíin síhví ñuu Yaā Dios maá rī. Te ñuu un cúu Jerusalén jeé, te cuun quíji ichi ándiví ndé nuū Yaā Dios maá rī.

<sup>13</sup> Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácanđije. Achí yá.

### *Jnūhun cuahān ñuu Laodicea*

<sup>14</sup> 'Te tee ró jnúhun yáha na quíhín nuū jeē cujéhnū nuū ñáyuu cácanđije ñuu Laodicea: Súcuān cáhán ruhū, maá Yaā cúu jnūhun ndaā, Yaā cúu testigo vāha jeē cahán ndaā. Te máá rī ni sáha ndihí jeē ni cáhān Yaā Dios jeē na jécōo.

<sup>15</sup> Je jíin rī tācá jniñu cásáha ró. Te cácuu ró nájnūhun jeē tú mījin ni tú jihní, cúu jeē jecu-ni cácanđije ró jnúhun ri, te ni tu cájito uhū rō ni tu cándihví ni rō siquī. Te nacā jeē vāha núu jeē mījin ró chí jéé jihní ró nuū.

<sup>16</sup> Te tuú chí máá yíxixi-ni ró, chí ni tu cájito uhū rō ni tu cándihví ni rō

siqui. Te jeē yūcuan squéhichī rī rohó nájñuhun ñn jeē tésihī rí jeē séyūhu rí jeē tu nújnahan ni rī.

17 Te cácahān rō jeē cucá ró, te quéndōo vāha ró, te tu cúmanī ni ñn nuū rō. Te tu cásaha ró cuenta jeē cuécá lí cándoho ró, te ndáhú ndasí ró, te cácuáá ró, te máá ññi lí rō. Te tāca jēē yáha cúní cahān jeē tu cácañdije vāha ró.

18 Núu sūcuan te cáhān rī jíin ró jeē nuū rī cuaan ró oro jeē ni ndúhvā nuū ññuhún te ni nduu máá nene, te suu cúu jeē sáha rí jeē coo cucá ndije ró ndihī jeē ndíso jñuhun rí. Te nuū rī cuaan ró sahma cuijín cuhun ró, návāha tú cucanu rō jeē maá ññi lí rō, cúu jeē quéndōo ndaā rō sáha rí. Te cuaan ró tájnā nuū rī, quivi tinūu ró, návāha ndundijin tinūu ró, cúu jeē jecūhun ni rō jñuhun rí.

19 Tāca ñáyuu jeē cundáhú ni rī, chi cáhān rī nuū i te stóho rí i, návāha na chūhun ni i. Núu sūcuan te na cóndihvī ni rō jíjnahan ró, te nacani ni rō jeē stóo ró cuéchi ró.

20 Cuni sōho, chi íin rí yehyí ánuá rō te cáhān rī. Te núu ndé-ni róhó cuni sōho te nune ró yehyí ánuá rō, te quivi rí caji rī staā jíin ró, te suni caji maá ró jíin rí. Te suu cúu jeē cóndee rī anuá rō.

21 Tāca ñáyuu jeē cūndeyí síquī jeneé, cuāha rí jñuhun conene i jíin rí nuū mesa nuū ndácu rí jñiñu. Chi máá rí suni ni snáa rí poder jeneé, te ni cucōo rí jíin Tátá rí nuū mesa nuū ndácu ya jñiñu.

22 Ñayuu iyó sóho na chúsóhó i jñuhun jeē cahān maá Espíritu Santo jíin táca grupo ñayuu cácañdije. Achí yá.

*Tāca jēē cáyūcú andiví cáchiñúhún núu yā*

#### 4

1 Yūcuán na te ni ndacoto rí, te ni jito rí jeē núne ñn yehyí andiví, te máá Yaā jeē ni cáhān jíin rí jeē xihna ññuhún, ni cahān tucu jíin rí nájñuhun jeē tívi trompeta. Te ni cahān:

Caa quiji ró yáha, te na stéén rī nuū rō tācá jñiñu jeē cóo ichi núu gā, achí yá.

2 Te máá Espíritu Santo ni scóto-ni ya ruhū. Te ni jito rí jeē andiví íin ñn mesa nuū ndácu jñiñu, te néne máá yá nuū mesa un.

3 Te máá yá jeē néne yūcuan cáa ya nájñuhun ndíndéé ñn yuū quiyi ndíí chí ñn yuū cuehé ndíí. Te ñn ticō vēhnde ní jicó ndúu yuhu mesa yā, te ndíndéé nájñuhun ñn yuū cuíí ndíí.

4 Te xiin mesa yā ni jito rí jeē ní jicó ndúu ocō cuūn gā mesa nuū ndácu jñiñu. Te nuū mesa un néne ocō cuūn tēe jéhnu cándiso jñiñu. Te cáñuhun de sahma cuijín yaa, te xinī de cáñuhun corona oro.

5 Te nde nuū mesa nuū ndácu ya jñiñu ndíndéé taja te ññin te cáhān taja. Te ichi núu mesa yā íin ndihúxá Espíritu Yaā Dios, jeē cáa nájñuhun uxā yiti náhnu jeē cayú ññuhún.

6 Te ichi núu mesa yā ún suni iyó nájñuhun ñn mar jeē jito quiyi nájñuhun vidrio.

Te xiin mesa yā un ní jicó ndúu cuūn jeē técu. Te iyó cuéhē tinūu ññi cáhnu ichi núu jíin ichi yátá un.

7 Te ñn jeē técu un cáa nájñuhun ndicaha. Te inga cáa nájñuhun stiqui. Te jeē uní chi néne nuū tēe. Te jeē cuūn chí cáa nájñuhun yaha chócó jēē jicó núu tachí.

8 Te ndicúún jeē técu un iyó íñu ndijēn jeē ñn ñn. Te máni máá tinūu cúu ññi cáhnu nde jíin ññi chíji ndijēn. Te nduú ññuú tu jécuiñi cuiti jeē cahān: Yaā íi Yaā ndoo ndasí cúu máá Jítoho yō Yaā Dios, Yaā jññi ndihī poder,

Yaā iyó vijna, te ni íyo yá ññi cáni, te coo ya ññi cáni.

Achí.

9 Chi máni jeē cácahān ndicúún un jēē cujéhnu ndasí máá Yaā jeē néne nuū mesa, Yaā jeē técu ññi cáni cuiti. Te yíñuhún cácahān un jíin yá, te nácuatáhú núu yā.

10 Te tāca jínu jeē casáha sūcuan, te ndihócó cuūn tēe jéhnu cándiso jñiñu, cájecuiñi yiti de nuū Yaā jeē técu ññi

cáni cuiti, cáchiñúhún de ya. Te cástaa de corona de, cájequin de ichi núu jehé mesa yā. Te cácahān de:

<sup>11</sup> Jitoho ná te Yaā Dios na cúu ní.

Te vāha ndasí Yaā cúu ní jēē cácahān i jeē luu cújéhu ní,  
te cáhīyo yíñúhún i nuū ní, te jñí ní ndihí poder.

Chi máá ní ni sáha ndihí jeē iyó,  
te siquī jeē súcuan ni cuu ni maá ní te ní jecōo ndihí.

Achí de jíjnāhan de.

### *Jeē ní nune Londe Yaā Dios tutu*

## 5

<sup>1</sup> Yūcuán na te ni jito ri jeē Yaā néne mesa jeē ndácu jniñu, ndaváha ya jñí ya ñn tutu cáni jeē ní tuu. Te yósó jnúhun ndíndúú lado tutu ún, te ndíhyú jíin úxā sello.

<sup>2</sup> Te ni jito ri ñn ndajéhé yā jeē ndíso poder, te ni cahān jee:

¿Ndé ñn cúu tēe vāha ndasí jeē cóndiso jniñu cahnde sello te nune tutu yáha? áchí ndajéhé yā.

<sup>3</sup> Te ni andiví ni ñayiví ni jeē iyó chíji ñayiví, tu ní íyo ni ñn jeē cóndiso jniñu nune tutu ún, ni jeē cóto nuū.

<sup>4</sup> Te ni ndahyū ndasí rí, chí tu ní íyo ni ñn jeē cóndiso jniñu nune te cahu tutu ún, ni jeē cóto nuū.

<sup>5</sup> Yūcuán na te ni cahān ñn tēe jéhu un jíin rí:

Ma ndahyú rō, chí íyo ñn Yaā ndíso jniñu jeē cahnde yā ndihúxá sello ndihyú tutu, te nune ya. Te máá yá chí íyo cuéhē poder yā, nájñuhun jeē iyó cuéhē fuerza ñn ndícaha. Te ni cacu ya chíji yucūn Judá, jeē cúu yucūn rey David. Te ni snāā yā poder táca jéneé.

<sup>6</sup> Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un ín ya nuū ín mesa Yaā Dios, mēhñú ndicúún jeē técu, jíin tēe jéhu cándiso jniñu. Te íyo úxā ndíqui jíin úxā tinūú Londe ún. Te tinūú un cúu ndihúxá Espíritu Yaā Dios jeē ní tají yá ni jengoo nñ cáhnu ñayiví.

<sup>7</sup> Te Londe un ní jequihin ya tutu jeē jñí ndaváha Yaā jeē néne nuū mesa.

<sup>8</sup> Te ná ni quihin ya tutu ún, te ndicúún jeē técu jíin ndihóco cuūn tēe jéhu cándiso jniñu, ni cajecuiñí yití núu yā. Te ná ñn ná ñn tēe jéhu un cándaha yaa jeē naní arpa, jíin cóhō cúu oro jeē ñuhun chitú súje cutú. Te súje cutú un cúu máá táca jnúhun jeē cájicān tahu ñayuu yñi ndaha Yaā Dios.

<sup>9</sup> Te ni cajita de ñn yaa jeé, te suhva cáhān:

Vāha ndasí Yaā cúu ní jēē quihin ní tutu te cahnde ni sello jeē ndihyú.

Chi ni cajehni i níhín, te jíin nñí ni ní nacuaan ní ñayuu

mēhñu táca raza, táca yuhu, táca ñuu, táca nación, návāha cuu i ñayuu Yaā Dios.

<sup>10</sup> Te ni sáha ní jēē cuu i rey jíin sūtú nuū Yaā Dios,

te ndacu i jniñu ini ñayiví.

Achí de cájita de.

<sup>11</sup> Te ni jito ga rí, te ni jini sōho ri jeē cácahān cuehē ndajéhé yā jeē ní cajicó ndúu xiin mesa yā, jíin xiin ndicúún jeē técu, jíin xiin tēe jéhu cándiso jniñu. Te íyo cuéhē ndasí millón ndajéhé un.

<sup>12</sup> Te suhva ni cacahān jee ya:

Vāha ndasí Yaā cúu Londe jeē ní cajehni i.

Te jeē yúcuan jñí ya poder, te yōhyo cúca yá,

te yōhyo ndíchí yá, te ndíso ya cuehē fuerza,

te cáhīyo yíñúhún ndihí nuū yā, te luu cújéhu ya,

te cácahān i jeē vāha ndasí Yaā cúu ya. Achí.

<sup>13</sup> Te suni ni jini sōho ri jeē cácahān ndihí jeē ni sáha Yaā Dios jeē iyó ini andiví jíin ini ñayiví jíin chíji ñayiví jíin ini mar. Te ndivii un ní cacahān:

Cúsñ ni yō cahán yō jeē yōhyo vāha Yaā cúu máá Yaā néne mesa nuū ndácu ya jniñu,

jíin Yaā cúu Londe Yaā Dios.

Te na cóo yíñúhún yó núu yā, chí cújéhu luu ya,

te jñí ya poder ní cáni cuiti.

Achí.

<sup>14</sup> Te ni cacahān ndicúún jeē técu:



Súcuan na cóo, áchí.

Te ndihóco cuñ tē jéhu cándiso jníñu ni cajecuiñí yití de, te ni cachiñúhún de nuū Yaā jeē técu ní cáni cuiñí.

### *Siquí ndihúxá sello*

## 6

<sup>1</sup> Yūcuán na te ni jito ri jeē Yaā cúu Londe Yaā Dios, ni jehnde yā ñin jeē uxá sello un. Te ni jini sōho ri jeē cahán ñin jnáhan ndicúún jeē técu ún, nájñuhun cáhán taja:

Nehen te cuni rō.

<sup>2</sup> Te ni ndacoto ri, te ni jito ri ñin caballo cuijín. Te jeē yosó síquí tī un ndáhá ñin arco jeē stáva nduva. Te ni jecūhun ñin corona xiní. Te ni quenda ni jéjñáhan, te ni cundeyí síquí ndihí.

<sup>3</sup> Yūcuán na te Londe un ní jehnde yā sello uū. Te ni jini sōho ri jeē cahán ñin jnáhan ndicúún jeē técu:

Nehen te cuni rō.

<sup>4</sup> Te ni quenda ñin caballo cuehé, te jeē yosó síquí tī ndíso jníñu jeē snáa jñuhun cáyūcu mání ñayuu ñayiví, te quejéé i cahni jnáhan i. Te ni nihín ún ñin espada cáhnu.

<sup>5</sup> Yūcuán na te Londe un ní jehnde yā sello uní. Te ni jini sōho ri jeē cahán ñin jnáhan ndicúún jeē técu:

Nehen te cuni rō.

Te ni ndacoto ri, te ni jito ri ñin caballo jnuú. Te jeē yosó síquí tī ndáhá ñin balanza jeē chícuāha, chí coo jnamā xeēn.

<sup>6</sup> Te mēhñú ndicúún jeē técu un ní jini sōho ri ñin jeē cahán:

Máa ñin kilo-ni trigo nihín i jíin yáhu i jeē sájñiñu i ñin quiví. Te núu cebada, te uní-ni kilo nihín i jíin yáhu i jeē sájñiñu i ñin quiví. Te aceite jíin vino chí ma sáha ró jéé cúmaní. Achí.

<sup>7</sup> Yūcuán na te Londe un ní jehnde yā sello cuñ. Te ni jini sōho ri jeē cahán tucu ñin jnáhan ndicúún jeē técu:

Nehen te cuni rō.

<sup>8</sup> Te ni ndacoto ri, te ni jito ri ñin caballo cuaán yaa, te jeē yosó síquí tī cúu máa cuéhyí jéñi ñayuu. Te ichi yátá un ndíquín máa jñuhun jeē quiví

ñayuu lugar nuū cáyūcu ánuá ndíyí. Te ndíndúú un cándiso jníñu jeē ndóna síquí ñin jeē ndicúún parte ñayiví, te cuu sáha jeē cúu ñayuu jíin guerra, jíin jnamā, jíin cuéhyí xeēn, jíin táca quiñí xeēn jeē iyó ñayiví.

<sup>9</sup> Yūcuán na te Londe un ní jehnde yā sello uhūn. Te chíji altar cáhnu ni jito ri anuá ñayuu jeē ní cacandíje jñuhun Yaā Dios te ní canacani ndaā i jñuhun ya, te síquí yūcuan ní cajehni ñayuu i.

<sup>10</sup> Te ni cacana jee ánuá un:

Jitoho ná Yaā Dios, maá ní cúu Yaā ndoo te vāha squícu ní jéé ni jéjñuhun ní. ¿Te nasaa ga tiempo coo te sándaā ni jéhé ná, te nacuaāha ní jéé ndútahū ñayuu ñayiví jéé ní cajehni sáñá? áchí.

<sup>11</sup> Yūcuán na te ni jéhe ya sahna cuijín cuhun i jíjñáhan i, te ni cahán yā jíin i jeē na ndétátú i jecu gā tiempo. Chí iyó gá hermano i jeē cájehniñu nuū yā, jeē suni jíni ñúhún cuu i návāha jínu número i, áchí yá.

<sup>12</sup> Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni cujnúú níandii nájñuhun ñin sahna jnúú. Te ní yóo ni nduu nájñuhun niñí.

<sup>13</sup> Te quími andiví ní ñingoyo nuū ñuhun nájñuhun ñingoyo ndehé yíhí yujnu higo sáha tachí níhin.

<sup>14</sup> Te andiví ní cujiyo cuahán nájñuhun jeē nátuu ñin tutu cáhnu. Te táca yucu jíin táca isla ni cujiyo cuangoo ñin lado.

<sup>15</sup> Te táca rey ñayiví, jíin jéé cácujeñu, jíin jéé cucá, jíin táca capitán, jíin jéé cándiso poder, jíin mozo jeē ní cajeen ñayuu, jíin téé cájñiñu cuenta maá, ní cachisáhi máa ini yaū cava jíin méhñu cava chíji yucu.

<sup>16</sup> Te ni cacahán i jíin yucu jíin cava:

Ndicó cáva síquí rí, na quísáhi rí návāha tú coto máa Yaā néne mesa ndácu jniñu, jíin Yaā cúu Londe jeē cuáha ya castigo xeēn ruhū.

<sup>17</sup> Chí ni quee maá quiví cáhnu jeē cuáha ya castigo, ¿te ndé ñin canda condichi nuū yá? achí i jíjñáhan i.

*Ñayuu tāca yúcūn Israel jeē ni jécondee sello jneē*

## 7

<sup>1</sup> Te ná ni cuu jniñu yáha, te ni jito ri cuūn ndajéhé yā jeē cáhīn ndicúún lado ñayīví. Te cájesi yā nuū ndicúún tachī, návāha ma quée nuū ñúhun ni nuū mar ni nuū ní ñn yujnu.

<sup>2</sup> Te suni ni jito ri inga ndajéhé yā, vēji ichi núū cáne niāndii. Te ndáhá yá sello Yaā Dios, Yaā técu. Te ni cahān jee ya jíin ndicúún ndajéhé un jéē ndíso jniñu jeē sáha daño nuū ñúhun íchi jíin núū mar:

<sup>3</sup> Ma sáha ró daño nuū ñúhun ni nuū tācá yujnu ni nuū mar, chí nde na téē yó sello jneē tāca ñáyuu cájejniñu nuū Yaā Dios yō.

<sup>4</sup> Te ni jini sōho ri jeē achí jéē iyó ciento uū xico cuūn mil ñayuu jeē ni jécondee sello jneē. Te ñayuu un cácuu tāca yúcūn ñayuu Israel.

<sup>5</sup> Te íyó úxī uū mil ñayuu cácuu yucūn Judá jeē ni jécondee sello, jíin úxī uū mil yucūn Rubén, jíin úxī uū mil yucūn Gad,

<sup>6</sup> jíin úxī uū mil yucūn Aser, jíin úxī uū mil yucūn Neftalí, jíin úxī uū mil yucūn Manasés,

<sup>7</sup> jíin úxī uū mil yucūn Simeón, jíin úxī uū mil yucūn Leví, jíin úxī uū mil yucūn Isacar,

<sup>8</sup> jíin úxī uū mil yucūn Zabulón, jíin úxī uū mil yucūn José, jíin úxī uū mil yucūn Benjamín. Ndihi yucūn yáha cúu jeē ni jécondee sello.

*Ñayuu cuehē jeē cáñuhun sahma cuijín*

<sup>9</sup> Te ná ni cuu jniñu yáha te ni ndacoto ri, te ni jito ri cuehē ndasí ñáyuu. Te cúu i ñayuu tācá nación jíin táca raza jíin táca yuhu jíin táca ñuu. Te cáhīn i nuū mesa nuū ndácu Yaā Dios jniñu jíin núū maá Yaā cúu Londe. Te síquī jeē cuehé ndasí i, te ni ñn ma cúu cañu nasaa i cúu. Te cáñuhun i sahma cuijín, te cándāhá i ñuū.

<sup>10</sup> Te ni cacana jee i:  
Yaā Dios maá yó cúu jeē ní jnama yóhó,

Yaā jeē néne nuū mesa jeē ndácu jniñu,

jíin Yaā cúu Londe Yaā Dios.

Achí i jíināhan i.

<sup>11</sup> Te ndihi ndajéhé ni cajicó ndúū yā cáhīn ya xiin mesa Yaā Dios, jíin xiin tēē jéhnu cándiso jniñu, jíin xiin ndicúún jeē técu. Te ni cajecuiñī yití yá ni cachiñúhún yá Yaā Dios ichi núū mesa yā.

<sup>12</sup> Te ni cacahān yā:

Amén. Cúsī ni yō cahán yō jeē yóhyo vāha Yaā cúu Yaā Dios maá yó.

Te luu cújéhnu ya te ndichí yá.

Te na nácuatáhú yó nuū yā, te na cóo yíñúhún yó núū yā.

Chi jniñi ya poder, te ndíso ya cuehē fuerza jeē ní cáni cuiñi. Amén.

Achí táca ndajéhé yā.

<sup>13</sup> Yūcuán na te ni cahān ñn tēē jéhnu un jíin rí:

¿Ndé ñáyuu cúu yāha jéē cáñuhun sahma cuijín, te ndé chí véjicoo i?

<sup>14</sup> Te ni cahān rí jíin de:

Máá ní cúu jeē jiní, Tátā.

Te ni cahān de jíin rí:

Yāha cácuu ñayuu jeē ní cayāha i jeē ní cajito i jnūndóho xeēn. Te ni canacate i sahma i jíin níñī maá Londe, te ni nduyaa vāha, cúu jeē ní ndundoo ánuá i ni sáha ya.

<sup>15</sup> Jeē yúcuan cúu jeē cáhīn i nuū mesa nuū ndácu Yaā Dios jniñu, te cájejniñu i ini templo yā nduú ñuū. Te Yaā jeē néne nuū mesa, coto ya i jeē quéndōo vāha i nuū yā.

<sup>16</sup> Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihní.

<sup>17</sup> Chi máá Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihīn yā jíin i nuū cáne ndute jeē cótecu i sáha. Te Yaā Dios nacuaa yā ndute núú i jíināhan i, te ma ndahyú gā i. Achí téē jéhnu ún.

*Siquī sello uxā jíin cóhō cūu oro*

## 8

<sup>1</sup> Te Londe un ní jehnde yā sello uxā jeē ndihyú tutu ún, te nayúú-ni ni iyo ini andiví nájñuhun sava hora.

<sup>2</sup> Te ni jito ri ndihúxá ndajéhé jeē cáhñin nuū Yaā Dios. Te ni cajēhe uxā trompeta nuū ndajéhé un.

<sup>3</sup> Yūcuán na te ni quee inga ndajéhé, ndáhá yá ñin cohō cūu oro, te ni jecuiñi yā nuū altar. Te ni jēhe cuehē sūje cutú núu yā, návāha socō yā jíin jñuhun cájicān tahu ndihñi ñayuu cácadíje Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jñiñu.

<sup>4</sup> Te nuū cohō cūu jñi ndajéhé un ní cane ñuhmā sūje cutú, ni caa nuū Yaā Dios nde jíin jñuhun cájicān tahu ñayuu cácadíje Yaā Dios.

<sup>5</sup> Yūcuán na te ni quihin ndajéhé un cohō cūu un. Te ni scutú yá tīcua ñuhñun jeē cayú nuū altar. Te ni jete yā nde ini ñayiví. Te ni sáha jeē ní cáhñan taja, te ni ñihñin, te ni ndindéé taja, te ni jñāa.

*Jñuhun siquī trompeta*

<sup>6</sup> Yūcuán na te ndihúxá ndajéhé jeē cándahá ndihúxá trompeta, ni casátuhva ya jeē tiví yā.

<sup>7</sup> Te ndajéhé ñin ni tiví yā trompeta. Te ni cuun ñiñi ini ñayiví jíin ñuhñun jeē ní sácā núu jíin ñiñi. Te ni cayū ñin jeē uní parte ñayiví, jíin ñin jeē uní parte yujnu, jíin ñin jeē uní parte ite cuí.

<sup>8</sup> Te ndajéhé uū ni tiví yā trompeta. Te ñin nájñuhun ñin yucu cáhñu jeē cayú ñuhñun ni ñingava cuahñan nuū mar. Te ñin jeē uní parte mar ni nduu ñiñi.

<sup>9</sup> Te ni jihñi ñin jeē uní parte quití ñuhñun nuū mar. Te ni naa cuehē barco, chí ñin ñin jeē tāca únñi ni naa.

<sup>10</sup> Te ndajéhé unñi ni tiví yā trompeta. Te ni ñingava ñin quimi cáhñu ichi ándiví, te cáyú nájñuhun cáyú ñin yiti cáhñu. Te ni ñingava siquī ñin ñin jeē tāca únñi yūte jíin núu cáne ndute.

<sup>11</sup> Te quimi un nání quimi uvuā. Te ñin jeē uní parte ndute ni cuu uvuā.

Te ni cajihñi cuehē ñayuu ni sáha jeē ní cuu uvuā ndute ún.

<sup>12</sup> Te ndajéhé cuñun ni tiví yā trompeta. Te ñin jeē uní parte niándii jíin yóo jíin quimi ni tiví. Te ni ndunee ñin jeē uní parte i, te tuá ni cundijin ñin jeē uní parte nduú jíin ñuú.

<sup>13</sup> Te ni ndacoto ri, te ni jini sōho ri jeē cána jee ñin ndajéhé yā jeē ndáva cuahñan sava andiví:

Nacā xeñ gā ndoho ñayuu cáyucú ini ñayiví, chí je yajni cuecu unñi gā trompeta jeē tiví unñi gā ndajéhé, achí yá.

## 9

<sup>1</sup> Te ndajéhé uhñun ni tiví yā trompeta. Te ni jito ri jeē ichi ándiví ní ñingava ñin quimi nde ini ñayiví. Te nuū quimi un ní jēhe ndacáa jeē núne tñhñchi cúnú ndasí.

<sup>2</sup> Yūcuán na te ni nune un tñhñchi, te ni cane ñuhmā ni caa nájñuhun ñuhmā ñin iññu cáhñu. Te ñuhmā un ní sáha jeē ní cunee niándii jíin ñi núu tachí.

<sup>3</sup> Te nuū ñuhmā un ní canecoo tíca ndicuéhyí, ni jite núu ti ñi cáhñu ñayiví. Te ni jēhe ya jñuhun jeē sáha ti nájñuhun cásaña tñsuhma xeñ jeē iyó ini ñayiví.

<sup>4</sup> Te ni ndacu ya jñiñu nuū tñ jeē ma sáha ti daño ite jíin yúcū cuí jíin yujnu, chí máni ñayuu jeē tu ndéé sello Yaā Dios jneē i cúu jeē tuu ti.

<sup>5</sup> Te tu ní jēhe ya jñuhun jeē cáhñi tñ ñayuu, chí máni jeē stóho ti i uhñun yoō. Te sáha ti jeē jetú i nájñuhun jeē jetú ñayuu jeē túu tñsuhma i.

<sup>6</sup> Te quiví ún nducú ndasí ñayuu modo cuu i, te ma nihñi i modo. Te vésú cuní i cuu i, te tú na modo cuu i.

<sup>7</sup> Te tíca ndicuéhyí un cáa ti nájñuhun caballo jeē cáhñyo tñhva quingoo nuū cuájñahan. Te xinñi tñ ñuhñun nájñuhun corona oro. Te née ti nuū tée.

<sup>8</sup> Te iyó ixi ti jeē cáa nájñuhun ixi xini ñahan. Te jñuhun ti cáa nájñuhun jñuhun ndicaha.

<sup>9</sup> Te ñi tñ ndihyú nájñuhun sahma cáa. Te ñihñin ndijñen tñ nájñuhun ñihñin

jeē cuángoo cuehē caballo nuū guerra cáñuhun tī carreta.

<sup>10</sup> Te suhmā tī ndíso iñu nájñuhun tī suhma. Te jíin súhmā tī cuu stóho tī ñayuu uhūn yoō.

<sup>11</sup> Te íyó ñin jeē cujéñnu nuū tī, te suu cúu ndajéhé jexeén jeē ndíto tūhnchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jéē snāā.

<sup>12</sup> Je ni yāha ñin jñūndóho, te íyó úu gā jñūndóho jeē quíji.

<sup>13</sup> Te ndajéhé iñū ni tiví yā trompeta. Te ni jini sōho ri ñin jñūhun jeē ni cáhān nde mēhñú ndicúún yiquí altar oro jeē ín nuū Yaā Dios.

<sup>14</sup> Te ni cahān un jíin ndajéhé iñū jeē ndahá trompeta:

Nandají ró ndicúún ndajéhé jeē nuhní yuhu yúte cáhnu jeē naní Eufraates, achí.

<sup>15</sup> Te ni nandají ndicúún ndajéhé un, návāha cahni ñin jeē uní parte ñayuu ñayiví. Chi je cáhīyo tūhva ndajéhé un jeē siquí maá hora jíin quíví jíin yóo jíin cuíyā jeē cóo súcuan.

<sup>16</sup> Te ni jini sōho ri jeē achí jéē iyó úu ciento millón soldado jeē cáyoso caballo.

<sup>17</sup> Te ni steén gā yā nuū rī, te ni jito ndijin rī tācā caballo. Te tēe cáyoso siquí tī cáñuhun de camisa cāa jeē cuehé, jeē ndeé, jíin jéē cuaán. Te xiní caballo un cándāa nájñuhun xiní ndicaha. Te yuhu tī quénda ñuhūn jíin ñúhmā jíin azufre.

<sup>18</sup> Te jíin únī jeē quénda yuhu caballo un, te ni jihí ñin jeē uní parte ñayuu, suu jíin ñuhūn jíin ñúhmā jíin azufre.

<sup>19</sup> Chi yuhu tī jíin súhmā tī iyó fuerza jeē cáhni tī ñayuu. Chi suhmā tī cándāa nájñuhun coō, te íyó xínī, te jíin yúcuan stóho tī ñayuu.

<sup>20</sup> Te sava ga ñayuu jeē tu ní jíhí jíin táca jñūndóho yāha, tu ní nācani ni i stóo i ídolo jeē ní casáha i. Te tu ní stóo i jeē cáchiñúhún i táca táchī jíin ídolo jeē ní cuvāha jíin oro jíin plata jíin cāa cuaán jíin yúu jíin yujnu. Te tācā un

chi tu cúu coto, ni tu cúu cuni sōho, ni tu cúu caca.

<sup>21</sup> Te ni tu ní cānacani ni i stóo i jeē jéñni i ndīyi, jíin jéē satásí i, jíin jéē jíca jnéni i, jíin jéē sacuíhná i.

### *Ndajéhé jeē ndahá libro lulí*

## 10

<sup>1</sup> Te ni jito ri inga ndajéhé yā jeē ndíso poder, ni cuun ya ichi ándiví. Te ñúsúcún yá vicō, te xiní yā ñuhun ticō vēhndé. Te nuū yā ndíndēe nájñuhun niāndii, te sīñin ya cāa nájñuhun uū sīñin jeē cāa ná cāa ñuhūn.

<sup>2</sup> Te ndahá yā ñin libro lulí jéē núne. Te ni jeni ya jehē váha ya nuū mar, te jehē jecó yá nuū ñuhun íchi.

<sup>3</sup> Te ni cana jee téyí yá, nájñuhun jeē ndahyú ndicaha. Te ná ni cana jee ya, te ni cacahān uxā taja.

<sup>4</sup> Te ná ni cacahān uxā taja, te je íyó tūhva ri jeē tēe ri jñūhun un núú. Te ni jini sōho ri ñin jñūhun ichi ándiví jeē ni cáhān jíin rí:

Chuvāha ró táca jñuhun jeē ní cacahān uxā taja ún, te ma steén rō, ni ma tēe ró, achí.

<sup>5</sup> Yūcuán na te ndajéhé jeē ní jito ri jeē ín nuū mar jíin núú ñuhun, ni ndonehen ya ndaha váha ya ichi ándiví.

<sup>6</sup> Te ni ndacunehen ya sīhví máa Yaā jeē técu ní cáni, Yaā ni sáha andiví jíin ñáyiví jíin mar jíin táca ndihí jeē iyó ini. Te jíin sīhví yá un ní cahān teyí ndajéhé:

Ma cucuéé gā jeē jínu ñayiví.

<sup>7</sup> Chi núu na quéjéé ndajéhé uxā tiví yā trompeta, yūcuán na te squícu-ni Yaā Dios jñūhun sāhi yá, nájñuhun ni castūhun yá nuū tāca mozo yā, tēe ni canacani jñūhun ya nde jenahán, achí ndajéhé.

<sup>8</sup> Yūcuán na te máa jéē ní jini sōho ri jeē ni cáhān ichi ándiví, ni cahān tucu jíin rí:

Cuáhán te quihin ró libro lulí jéē núne jeē ndahá ndajéhé jeē ín nuū mar jíin núú ñuhun, achí.

<sup>9</sup> Te ni jehēn rī nuū ndajéhé un, te ni jicān rī jeē na cuáha ya libro lulí un núú rī. Te ni cahān yā:

Quihin te caji rō. Chi vixī sāha ini yuhu ró nájñuhun ndūxi, te chīji ró chi cuhiyá sāha, áchí yá.

<sup>10</sup> Yūcuán na te ni quihin ri libro lulí jeē ndahá ndajéhé yā, te ni yeji rī. Te vixī ni sāha ini yuhu ri nájñuhun ndūxi. Te ná ni cuu ni yeji rī, te ni jite iyá ni rī.

<sup>11</sup> Te ni cacahān jíin rí:

Cánuú jēē nacani tucu ró jñuhun Yaā Dios, ndese coo siquī ñayuu cuehē ñuu jíin cuéhē nación jeē sán sán yuhu, jíin siquī cuehē rey cándacu jniñu, áchí jíin rí.

### *Siquī uū testigo yā*

## 11

<sup>1</sup> Yūcuán na te ni cajēhe ñn yujnu nuū rī, jeē cúu ñn cūhva jeē chícuāha. Te ni cacahān jíin rí:

Ndocuññi te chicuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núu yā yūcuán.

<sup>2</sup> Te ma chícuāha ró patio yatā templo. Chi je ni jēhe ya nuū ñáyuu tācá ñuu jicá. Te coyūcú i ini ñuu ñi yāhá, te uū xico uū yoō cueñū i siquī ñuu.

<sup>3</sup> Te tají rí uū testigo rī jeē nácani jñuhun ri mil uū ciento unī xico quivī. Te cuhun de sahma ndáyí jēē cácuuíhyá ni de siquī cuéchi ñayuu, achí yá.

<sup>4</sup> Te ndíndúú testigo un cúu nájñuhun ndíndúú yujnu olivo jíin ndíndúú candelero jeē íin nuū Yaā Dios, Yaā chíí ñayiví.

<sup>5</sup> Te na-ni ñayuu núu nducú sāha ndevāha jíin ndíndúú testigo un, te quenda ñuhūn yuhu ndíndúú de, te cayū ndíhi ñayuu cájito uhū i de. Te súcuan cuu tāca ñáyuu jeē nducú sāha ndevāha jíin de.

<sup>6</sup> Te íyó poder ndíndúú testigo un jēē cásí de jeē ma cúun saū ní tiempo jeē nácani de jñuhun ya. Te suni íyó poder de sāha de jeē nduu niññi tācá ndute. Te cuu stíví de ñayiví jíin ndínuū jñúndóho, núu nasaa jínu cácuni de.

<sup>7</sup> Te ná ni jínu ni canacani de jñuhun ya, yūcuán na te quenda quiti xéén jeē néne tūhnchi ún. Te cuajnáhan jíin ndíndúú de, te cundeyí jíin de, te cahni de.

<sup>8</sup> Te ndíyi ún cava nuū yáhu ñuu cáhnu nuū ní cajehni i máá Jítoho yō jicá cruz. Te ñuu un cácahān yatá i jeē ñuu Sodoma jíin Egipto cúu, siquī jeē xeēn cuéchi íyó ñuu ún.

<sup>9</sup> Te ñayuu tācá ñuu, tāca yúcūn, tācá yuhu, tācá nación, chi coto i jeē cáva ndíndúú ndíyi un únī quiví yosáva, te ma cuáha i jñuhun jeē quíndūji.

<sup>10</sup> Te ñayuu ní cáhnu ñayiví cusñi ndasí ni i jeē ní cajihí de, te sāha i vico, te cuáha i regalo nuū jnáhan i. Chi ndíndúú téé ni canacani jñuhun ya ún, ní casáha de jeē ní candoho ndasí ñáyuu ñayiví.

<sup>11</sup> Te jeē yáha unī quiví yosáva ún, te Yaā Dios sāha ya jeē nastáa tachí de, te ndonda-ni de. Te yūhú ndasí ñáyuu coto i jeē ní canatecu de.

<sup>12</sup> Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vícō quingoo de andiví, cuni ñayuu cájito uhū i de.

<sup>13</sup> Te máá hora un jnáa ndasí, te ndicó cáva naa ñn jeē uxí parte ñuu ún. Te jíin ñujnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē cujéhnu Yaā Dios jeē ndeé andiví.

<sup>14</sup> Súcuan yāha jñúndóho uū, te yachí coo jñúndóho unī.

### *Siquī trompeta uxā*

<sup>15</sup> Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayiví je ni nuquihí ndaha máá Jítoho yō Yaā Dios jíin Cristo jeē ní tají yá.

Te ndacu ya jniñu ní cáni cuiti.

Achí.

<sup>16</sup> Yūcuán na te ndihóco cuñn tēe jéhnu cándiso jniñu jeē cánene de mesa de ichi núu Yaā Dios, ni cajecuiññi yití de, ni cachiñúhún de ya.

<sup>17</sup> Te ni cacahān de: Na cútahū na núu ní, Tātā Yaā Dios,

chi máá ní jn̄i nd̄ih̄i poder,  
te cúu ní Yaā iyó vijna, te ni īyo ní n̄í  
cáni, te coo ní n̄í cáni.  
Te ni najn̄i ní nd̄iv̄ii jeē iyó,  
te jín poder ni ní quejéé ní ndácu ní  
jniñu nuū.

18 Ñayuu tācá nación ni caquit̄ ni i  
siqū ní.

Te vijna chi ni quee quiv̄i jeē cuáha ní  
castigo i,

jín jéé sándaā ní jniñu tāca nd̄iyi.

Te cuáha ni táhū nuū tāca mozo ni jéé  
ní canacani jn̄uhun ní,

jín núu tāca ñayuu cájejniñu nuū ní,  
jín ñayuu cáchiñúhún núu ní,

cúu ñayuu cácujeñu jín jéé tuú.

Te vijna te snáhnú ndetū ni ñayuu  
castiv̄i ñayiv̄i.

Achí de jínáhan de.

19 Yūcuán na te ni nune templo Yaā  
Dios jeē iyó andiv̄i. Te ni cajito ñayuu  
jeē yúcuán íne yejnū jeē ñúhun con-  
trato yā. Te ni ndindéé taja, te n̄hin,  
te cáhan taja, te ni jnāa, te ni cuun  
xeēn ñiñí.

*Jn̄uhun ñahan jín cóo cáhnu*

## 12

1 Yūcuán na te ini andiv̄i ní cane ñn̄  
jeē nahán náa ni yō jito yó: ñn̄ ñahan  
jeē ñúhun ña niāndii nájñuhun sah̄ma,  
te ín̄ jehē ña siqū yoó, te ñúhun ñn̄  
corona xin̄i ña jeē ndeé ux̄i uū qūmi.

2 Te ñúhun sēhe ña. Te ni ndahyū  
cohó ña jeē ndóho ña jéhnde ch̄iji ña jeē  
scácu ña i.

3 Yūcuán na te ini andiv̄i ní cane  
tucu inga jeē náa ni yō jito yó: ñn̄ coō  
cuhé cáhnu ndasí. Te iyó úxā xin̄i t̄i  
jín úx̄i ndiqui t̄i. Te ndihúxā xin̄i t̄i  
ñúhun corona.

4 Te jín súhmā t̄i ni stáa t̄i ñn̄ jeē un̄i  
parte qūmi jeē iyó andiv̄i, te ni síngoo  
t̄i ini ñayiv̄i. Te ni ine t̄i nuū ñahan jeē  
scácu sēhe ún, ndétu t̄i cocó t̄i sēhe ña  
jeē jé yajni cacu i.

5 Te ni scácu ña ñn̄ sēhe yí, te sūchi  
un̄ ní jeconaā jeē ndácu n̄hin i jniñu  
nuū nd̄iyii nación. Yūcuán na te ni  
ndoñúhún sēhe yí ña ún, ni ndaa i  
cuahān i nde nuū ín̄ mesa Yaā Dios  
nuū ndácu ya jniñu.

6 Te ñahan un̄ ní jinu ña cuahān ña  
nde nuū ñúhun téhé núu iyó ñn̄ lugar  
jeē ni sátúhva Yaā Dios. Te yūcuán  
condee ña nih̄n ña jeē cáji ña mil uū  
ciento un̄i xico quiv̄i.

7 Yūcuán na te ni cajejnáhan ini  
andiv̄i. Chi ndajéhé jéñu ga jeē  
naní Miguel jín táca ndajéhé jeē cácu  
mozo nuū yā, ni cajejnáhan jín cóo  
cáhnu. Te coō un̄ jín táca ndajéhé  
maá, ni cajejnáhan jín yá.

8 Te tu ní cácuñdeyí t̄i, te tuá ní cúu  
coyūcu t̄i andiv̄i.

9 Súcuán ni cuu jeē ní quenehen  
ya coō cáhnu un̄ jéé iyó ndé jenahán  
ndasí. Te nání t̄i jexeén jín Satanás,  
te máá t̄i cúu jeē stahú nd̄ih̄i ñayuu  
ñayiv̄i. Te ni scáne ya t̄i nde ini ñayiv̄i  
jín táca ndajéhé t̄i.

10 Yūcuán na te ni jini sōho ri ñn̄  
jn̄uhun jeē cahán jee ichi ándiv̄i:

Je ni quee quiv̄i jeē jinu jnama ya  
yohó, jín jéé steén ndijin yā jeē jn̄i  
ya poder, jín jéé ndácu ya jniñu, jín  
jéé ndíso jniñu máá Cristo jeē ní tají  
yá. Chi je ni quenehen ya maá jéé  
cahán cuēchi siqū tācá hermano yō.  
Chi nduú ñuú ni cahán cuēchi siqū i  
nuū Yaā Dios maá yó.

11 Te ni cacundeyí i siqū Satanás  
un̄, ní sáha jn̄uhun jeē ni jíh̄i Yaā  
cúu Londe, jín jéé ní cacahān ndaā i  
jn̄uhun Yaā Dios, jín jéé tu ní cundáhú  
ni i máa i, chi ni jēhe i jn̄uhun candíje  
i vēsú núu cuu i jeē siqū yā.

12 Núu súcuán te na cúsi ndasí ni  
tāca róhó jéé cáyūcú andiv̄i. Te nacā  
xeēn ndoho tāca róhó jéé cáyūcú ini  
ñayiv̄i jín núu mar. Chi ni cuun  
jexeén ni jinū nuū rō jijnáhan ró. Te  
qūt̄i xeēn ni, chi jín jeē tuá coo cuhē  
gā tiempo jeē stahú ñayuu. Achí.

13 Te ni jini coō cáhnu ún jéé ni scáne  
ya maá cuahān ini ñayiv̄i, te ni jinu  
t̄i jín ñahan ní scácu sēhe yí, jeē xeēn  
sáha t̄i jín ña núu.

14 Te ni cajēhe uū ndijēn yaha chócó  
cáhnu nuū ñahan ún, návāha ndava ña  
quih̄n ña lugar ña nuū ñúhun téhé, te  
cācu ña nuū coō ún. Te yūcuán condee  
ñā un̄i cuiyā yosáva, te nih̄n ña jeē cáji  
ñā.

15 Te yuhu cóo un ní cane ndute nájnūhun ñn yūte cáhnu, cuahān yatā ña návāha jneni ña.

16 Te máá ñuhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu cóo ún.

17 Yūcuán na te xeēn ni quitī ni coō cáhnu ni jito tī ña. Te cuahān tī cuajnáhan tī jíin táca gá sēhe ña, suu ñayuu casquīcu jniñu ndácu Yaā Dios te cácanđije vāha i jnūhun Jesucristo.

*Jnūhun siquī uū quitī xéén*

### 13

1 Te ni indichi rī yumár. Te ni jito ri jeē ní cane ñn quitī xéén ini mar. Te íyó úxā xinī tī jíin úxī ndiqui tī. Te ndihúxí ndiqui tī ñūhun corona. Te ndihúxá xinī tī ndeé ñn síhví néé jéé quitī ni Yaā Dios sáha.

2 Te quitī xéén jeē ní jito ri ún, cáa tī nájnūhun cuiñī, te ndaha tī cáa nájnūhun ndaha oso, te yuhu tī cáa nájnūhun yuhu ndícaha. Te nuū quitī un ní jēhe coō cáhnu poder maá jíin mesa nuū ndácu máá jniñu. Te ni sáha jeē cujéhnu ndasí quitī ún.

3 Te ni jito ri jeē ní tújī ñn xinī tī, jeé jé yajni cuu tī nuú. Te ni nduvāha tī jeē ní tújī tī. Te nahán ní naa ni ñayuu ñí cáhnu ñayīví ní jito i, te ni cajetáhú i nuū tī.

4 Te ni cachiñúhún i coō cáhnu siquī jeē ní sáha tī jeé cujéhnu ndasí quitī xéén un, te suni ni cachiñúhún i quitī xéén un. Te ni cacahān i:

Tú ni ñn jeé cujéhnu nájnūhun quitī yáha, te tú ni ñn cundeyí cuajnáhan jíin tī, áchí i jíin náhan i.

5 Te tu ní jési ya jeé cahān tī jeé quitī téyí cúu tī, jíin jéé cahán ndevāha tī siquī yā. Te ni nihīn jniñu tī jeé ndácu tī jniñu uū xico uū yoō.

6 Te ni quejéé tī ni cahān ndevāha tī siquī Yaā Dios, jíin siquī síhví yá, jíin siquī nuū ndeé yá, jíin siquī táca jéé iyó andiví.

7 Te tu ní jési ya jeé cuajnáhan tī jíin ñayuu maá Yaā Dios, te cundeyí tī jíin i. Te suni ni nihīn jniñu tī jeé ndácu tī jniñu nuū ñayuu táca yúcūn, táca ñuu, táca yuhu, táca nación.

8 Te ñayuu ñí cáhnu ñayīví jéé tu yósó síhví i nuū tútu, ni cachiñúhún i quitī xéén un. Te Yaā cúu Londe jeé ní cajehni i, máá yá névāha tutu un jéé yosó síhví ñayuu cotecu ñí cáni, te je yósó síhví i nde quiví ni jécōo ñayīví.

9 Ñayuu iyó sóho na chúsóhó vāha i jnūhun cahān rī yāhá.

10 Táca ñayuu jeé sáha jeé quiví jnáhan vecāa, suni vecāa cone máá i. Te táca ñayuu jeé jéhni jnáhan jíin espada, suni jíin espada cuu maá i. Núu súcuan te ñayuu maá Yaā Dios chi jíini ñúhún cuandeyí ni i jíin jnúndóho te ma jécuiñī i candíje i jnūhun cúndáhú ni yā i.

11 Yūcuán na te ni jito ri inga quitī xéén jeé ní cane chíji ñuhun. Te íyó úu ndiqui tī jeé cáa nájnūhun ndiqui lánchi. Te nájnūhun tachī coō cáhnu, súcuan tachī cahán tī.

12 Te nájnūhun ndácu quitī xéén xīhna ñúhún jniñu, suni súcuan ndácu quitī uū ún jniñu, íin tī nuū quitī xīhna ñúhún. Te quitī uū sáha tī jeé chiñúhún táca ñayuu ñí cáhnu ñayīví nuū quitī xīhna ñúhún, quitī ní tújī jeé jé yajni cuu tī te ni nduvāha tī.

13 Te quitī uū suni sáha táca jniñu jéhnu jeé nahán náa ni yō jíto yó. Chi ni scúun tī ñuhún ichi ándiví ní quiji ini ñayīví, ní cajito ñayuu.

14 Te ni stahú tī ñayuu ñayīví jíin táca jniñu jéhnu jeé ní nihīn tī poder jeé sáha tī, jíto jínúu quitī xīhna ñúhún. Te ni ndacu tī jniñu jeé na sáha ñayuu imagen quitī xīhna ñúhún, quitī ní tújī jíin espada, jeé jé yajni cuu tī te ni nduvāha tī.

15 Te quitī uū ni nihīn tī poder jeé chutáchí tī xijnī imagen quitī xīhna ñúhún, návāha cuu cahān, te cahni táca ñayuu jeé tu cájetáhú i chiñúhún i máá.

16 Te táca ñayuu cujéhnu jíin ñayuu tu cújéhnu, táca ñayuu cucá jíin ñayuu ndahú, táca ñayuu sájniñu cuenta maá jíin mozo jeé ní cajeen ñayuu, ni sáha tī jeé ni jécondee ñn jnunī ndaváha i chí jnéé i.

17 Te ni ñn ñayuu ma cúu cuaan i xīcó i te núu tu ndíso i jnunī jeé cúu síhví tī

chí jnūnī número jeē cúu síhví tí.

<sup>18</sup> Jnūhun ndíchí cúu jeē cahán rī yāhá: Tāca ñáyuu jécūhun vāha ni cuu tava i cuenta número quití xéén un, chí número un cúu síhví ñn tēe. Te número un cúu ññū ciento unī xico ññū.

*Yaa jeē cájita 144,000 ñayuu*

## 14

<sup>1</sup> Yūcuán na te ni ndacoto ri, te ni jito ri jeē ñn máá Yaā cúu Londe xinī yucu Sión. Te cáhñn ciento uū xico cuñn mil ñayuu jíin yá. Te jneē i ndéé síhví máá yá jíin síhví Tátá yā Yaā Dios.

<sup>2</sup> Te ni jini sōho ri jeē ñññn ndasí ichi ándiví, nájñññn jeē jíca cuehē yūte chí jēē cahán ñññn taja. Te jeē ñññn un sáha nájñññn jeē cátee cuehē ñayuu yaa jeē naní arpa.

<sup>3</sup> Te cáhñn i ichi núú mesa nuū ndácu Yaā Dios jññññ, jíin núú ndicúún jeē técu, jíin núú ndihócó cuñn tēe jéñnu cándiso jññññ. Te ni cajita i ññ yaa jeé. Te ni ññ ñayuu tu cúu cutūhva i yaa ún, chí máni máá ciento uū xico cuñn mil ñayuu jeē ní jnama ya i ini ñññññ.

<sup>4</sup> Te tāca tēe yáha cácuu jeē tu ní casáha cuēchi jíin ññññ casáha néé, chí tēe ndoo ánuá cácuu de. Te cándiquñ de Londe ndé-ni cúu-ni nuū cuahán yā. Chí ni jnama ya de ini ñññññ, te máá de cácuu tēe jeē xíhna gā ni cacandíje nuū Yaā Dios jíin núú Yaā cúu Londe.

<sup>5</sup> Te tú cuítí na jññññ stáhú cácahñ de, chí tēe ndoo ánuá cácuu de, cáhñ de nuū mesa Yaā Dios.

*Jññññ jeē ní cacahñ ndññññ ndajéhé yā*

<sup>6</sup> Yūcuán na te ni jito ri ññññ ndajéhé yā jeē ndáva cuahñ sava ándiví. Te ndíso ya jññññ jeē jñññ Yaā Dios ñayuu cotecu i ññ cáni. Te ni nacani ya jññññ un núú tāca ñáyuu ññ cáhñ ñññññ, nuū ñáyuu tācá nación, tāca yúcuñ, tācá yuhu, tācá ñññ.

<sup>7</sup> Te ni cahñ jee ya:

Conso ñyo ró núú Yaā Dios, te na cáhñ rō jeē yóhyo cújéñnu ya, chí je ni quee quiví jeē sándaā yā síquí rō

ndese ni casáha ró. Te na chíñññññ ró yā, chí máá yá ni sáha ándiví jíin ñññññ jíin mar jíin tāca núú cáne ndute, áchí ndajéhé yā.

<sup>8</sup> Yūcuán na te ndíquín ññññ ndajéhé yā vēji, te ni cahñ yā:

Je ni naa ññ ññññ teyí Babilonia. Chí ni sáha jeē ñáyuu tācá nación casíquí ndéē i Yaā Dios jeē ní castóo i ya te cándiquñ i ídolo jíin tāca jññññ néé, áchí ndajéhé uū.

<sup>9</sup> Yūcuán na te ndíquín ññññ ndajéhé unī vēji, te ni cahñ jee ya:

Xeēn coo síquí ñayuu cáchiñññññ quití xéén jíin imagen tñ, te jéhe i jññññ condee jññññ tñ jneē i chí ndaha i.

<sup>10</sup> Chí ññññ i castigo xeēn síquí cuēchi ni casáha i, chí quití ni Yaā Dios nuū i, te tuá cone cáhñu ni yā. Te ndoho i nuū cayú ñññññ jíin azufre, coto tācá ndajéhé Yaā Dios jíin Yaā cúu Londe.

<sup>11</sup> Te ñññññ nuū cándoho i cánda ññ cáni cuítí. Te nduú ñññññ tu ndetátú ñayuu cándoho ún jeē ní cáchiñññññ quití xéén jíin imagen tñ, jíin jéē ni jécondee jññññ síhví tí.

<sup>12</sup> Jeē yúcuán ñáyuu maá Yaā Dios jeē casquícu i jññññ ndácu ya te cácañdíje vāha i Jesús, cánuú jéē cuáñdeyí ni i. Achí ndajéhé unī.

<sup>13</sup> Yūcuán na te ni jini sōho ri ññ jñññññ ichi ándiví jéē ni cáhñ jíin rí:

Tee ró jñññññ jeē cahán rī jíin ró yāhá: Nacā jeē ndetū tāca ñáyuu cácañdíje jññññ yō jeē cájihñ vijna jíin ndé ññ cuahñ yō. Jendaá chí ndetátú i jeē ní casáha i jñññññ vāha, te jñññññ i un má náā chí sáha jeē quendō vāha i ññ cáni, áchí Espíritu.

*Jeē ní nastútú yá ñayuu ñññññ*

<sup>14</sup> Yūcuán na te ni ndacoto ri, te ni jito ri ññ vicó cuíjín. Te nuū vicó un néne Yaā ní nduu tēe. Te xinī yā ñññññ corona oro, te ndáhá yá ññ hoz xeēn.

<sup>15</sup> Te ni quenda ññññ ndajéhé yā ini templo, te ni cana jee, te cáhñ jíin Yaā néne nuū vicó un:

Cahñde ni jíin hoz ní, te nastútú ní ñayuu ñññññ. Chí je ni quee quiví jeē



nastútú ní i nájnūhun táhndé trigo jeé jeé ni cuaan, áchí.

<sup>16</sup> Yūcuán na te Yaā néne nuū vicó ni nastútú yá ñayuu váha ini ñayīví, nájnūhun táhndé trigo jíin hoz.

<sup>17</sup> Yūcuán na te ni quenda inga ndajéhé yā ini templo jeé iyó andiví, te suni ndáhá yá ñin hoz xeēn.

<sup>18</sup> Te nde nuū altar ni quenda tucu inga ndajéhé, te ndíso jníñu ya síquī ñuhūn altar. Te ni cana jee ya, te cáhán yā jíin ndajéhé jeé ndahá hoz xeēn:

Cahnde rō jíin hoz xeēn rō, te nastútú ró ñayuu casáha néé ini ñayīví, nájnūhun jeé cájehnde i chutū ndehē uva jeé jeé ni jíchi, áchí.

<sup>19</sup> Te ndajéhé un ní jehnde yā jíin hoz yā, te ni nastútú yá ñayuu casáha néé ini ñayīví, nájnūhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájnūhun jnáa i ndehē uva nuū taxín.

<sup>20</sup> Te ni jēhe ya castigo i yatā ñúú, te ni jica ñíñi i nájnūhun ndūxi uva. Te ni ndaa ni jinū cūhva jeé sucún yuhu caballo, te ni jica cuahān nde unī ciento kilómetro.

*Ndihúxá ndajéhé jíin ndihúxá jnūndóho jeé sándihí*

## 15

<sup>1</sup> Te ni jito ri inga jniñu jéhu ichi ándiví jéé náā ni yō jíto yó. Chi cáhīn uxā ndajéhé yā jeé cuāha ndihúxá jnūndóho sandihí na. Te jeé jínu ndihúxá jnūndóho yáha, te jínu jeé cuāha Yaā Dios castigo xeēn síquī cuéchi.

<sup>2</sup> Te suni ni jito ri ñin jeé cáa nájnūhun mar, te cáa nájnūhun vidrio jeé ndíndēe nájnūhun ñuhūn. Te yumar un cáhīn ñayuu ni cacundeyí síquī quití xéén jíin imagen tī, jíin jéé tu ní cáquihin i jnunī número jeé cúu síhví tí. Te cándahá i yaa jeé naní arpa jeé ni jéhe Yaā Dios nuū i.

<sup>3</sup> Te cájita i yaa jeé ní tava Moisés, tēe cúu mozo Yaā Dios, jíin yaa maá Yaā cúu Londe. Te súcuan cáhán yaa ún:

Yóhoyo náā ni na cájito ná ndihí jniñu jéhu teyí jéé sáha ní,

Tátā Yaā Dios, chí jnái ní ndihí poder. Te máni jniñu ndaā jniñu váha sáha ní, jeé cúu ní Rey nuū tēcá nación.

<sup>4</sup> Tú ni ñin i iyó jéé ma cónso íyo i nuū ní, Tátā Yaā Dios.

Te ndihí i cahān nahín i jeé yóhoyo cújéhu ní.

Chi máñúhún ni máá ní cúu Yaā ndoo Yaā íi.

Te quijicoo ñayuu tēcá nación, chíñúhún i nihín,

chi jeé ni cajini i jeé ndaā váha sáha ní táca jniñu.

Achí i cájita i.

<sup>5</sup> Yūcuán na te ni ndacoto ri, te ni jito ri jeé ini andiví núne cuarto íi ini templo nuū íne tabla yuū jeé yosó ley yā.

<sup>6</sup> Te ini templo un ní quendacoo ndihúxá ndajéhé jeé cándiso jniñu síquī ndihúxá jnūndóho. Te cáñuhun ya sahma fino iyó ndoo te xíñú. Te núhni cinturón oro jicā yā.

<sup>7</sup> Te ñin jnáhan ndicúún jeé técu ni jēhe ñin ñin cohō oro nuū ndihúxá ndajéhé un. Te ini cohō un ñuhun chitú castigo xeēn jeé ni jéhe Yaā Dios, Yaā técu ní cáni.

<sup>8</sup> Te ni chitú ndí ñuhmā ini templo, te suu ni steén jeé yóhoyo cújéhu Yaā Dios jíin poder jnái ya. Te ni ñin tu ní cúu quívi ini templo, chí nde na ndíhi ndihúxá jnūndóho jeé cuāha ndihúxá ndajéhé yā.

*Síquī ndihúxá cohō jeé ñuhun castigo*

## 16

<sup>1</sup> Yūcuán na te ini templo ni jini sōho ri ñin jnūhun cáhán jee jíin ndihúxá ndajéhé yā:

Cuangoo te catí ró síquī ñayīví ndihúxá cohō jeé ñuhun castigo xeēn jeé ni jéhe Yaā Dios, achí.

<sup>2</sup> Te cuahān ndajéhé ñin, te ni jeti ya cohō yā síquī ñayīví. Te táca ñayuu jeé ndeé jnunī quití xéén un jíin jéé cáchiñúhún imagen tī, ni canecoo ndíhyi xeēn jeé jetú ndasí.

3 Te ndajéhé uū ni jeti ya cohō yā nuū mar, te ndute mar ni nduu nájñuhun niñi ndíyi. Te ni cajihī tācá quiñi jeē ñuhun ini mar.

4 Te ndajéhé unī ni jeti ya cohō yā ini tāca yúte jíñ tāca núū cáne ndute, te ni nduu niñi.

5 Te ni jini ri jeē cahán ndajéhé jeē ndíso jniñu siquī ndúte:

Tátā Yaā Dios, maá ní cúu Yaā ndoo Yaā iī, Yaā iyó vijna, te ni iyo ní ní cáni. Te ndaā sáha ní jeē súcuan ni ndonda ní siquī cuéchi i.

6 Chi ni casáha i jeē ní jeti niñi ñayuu ndoo ní jíñ ñáyuu ní canacani jñuhun ní. Te vijna chi ni sáha ní jéé cájhi i niñi, chi ñayuu casáha jniñu néé cácuu i, jeē cánuú ndoho i súcuan.

7 Te ni jini sōho ri jeē cahán inga nde nuū altar:

Tátā Yaā Dios, maá ní cúu jeē jñi ndihī poder. Te jniñu váha jniñu ndaā ni sáha ní jéé ní ndonda ní siquī cuéchi i. Achí.

8 Te ndajéhé cuūn ni jeti ya cohō yā siquī níandii, te ni jéhe Yaā Dios jñuhun jeē ndujíñi ndasí níandii návāha cayū ñayuu.

9 Te xeēn ndasí ní cayū tāca ñáyuu. Te vēsú súcuan te tu ní cánacani ni i stóo i cuéchi i, ni tu ní cacahān i jeē cujéñu Yaā Dios. Chi sa suhva ni cacahān ndevāha i siquī yā jeē ni jéhe ya tācá castigo yáha nuū i.

10 Te ndajéhé uhūn ni jeti ya cohō yā nuū mesa nuū ndácu quiñi xéén jniñu. Te ni cunee ní cáhnu nuū ndácu ti jniñu. Te cánacayihī ñáyuu yuhu i jeē cájetū ndasí i.

11 Te vēsú súcuan te tu ní cánacani ni i stóo i jniñu néé casáha i. Chi sa ni cacahān ndevāha i siquī Yaā Dios andiví siquī jeē cájetū ndasí i jíñ ndíhyi xeēn cándoho i.

12 Te ndajéhé iñū ni jeti ya cohō yā siquī yúte cáhnu jeē naní Eufrates. Te ni ichi ndihī ndute yúte ún, návāha nune ñn ichi jeē quiñicoo tāca rey ichi núū cáne niāndii.

13 Te ni jito ri jeē ini yuhu coō cáhnu jíñ ini yuhu quiñi xéén jíñ ini yuhu maá téé nácani jñuhun stáhú ní

canecoo unī tachī jeē cáa nájñuhun sáhvá.

14 Te tachī ún chi ndajéhé jexeén cácuu, te casáha jniñu jéñu jeē náa ni ñayuu cájito i. Te ni quendacoo tachī un jéé nastútú tāca rey ní cáhnu ñayiví, jéé cuajnáhan de siquī Yaā Dios quiñi jeē ndíji ya. Te maá yá cúu jeē jñi ndihī poder.

15 Cuni sōho jíñáhan ró, chi sanaa ni rō te ndiji ri, nájñuhun jeē ñn sanaa-ni te quiñi ñacuñhá. Te nacā jeē ndetū ñayuu jeē ndito ni i, te ndito yúcún i sahma i, návāha ma cáca vichí lí i, cúu jeē tú na cuéchi coo siquī i jeē cucanu i nuū tāca ñáyuu, achí yá.

16 Te ni canastútú táchī un tāca rey, ni candutútú ñn lugar jeē yuhu hebreo naní Armagedón.

17 Te ndajéhé uxā ni jeti ya cohō yā nuū tachí. Te ini templo andiví jíñ núū mesa nuū ndácu ya jniñu, ni cane ñn jñuhun jeē ni cáhān jee:

Je ni jñu, achí.

18 Yūcuán na te ni ndindēé taja, te níñn, te cáhān taja, te ni jñāa ndasí. Chi nde ní cáni jeē iyó ñáyuu ñayiví, tu ní jñāa níñn ndasí nájñuhun jeē ni jñāa ni jito ri.

19 Te maá ñuu cujéñu Jerusalén, ni cusñn ni nduu unī parte, te ní cáhnu ñayiví ni naa tācá ñuu. Te ñuu teyí Babilonia, chi ni sáha nahín yá jeē ní ndutahū i castigo xeēn, chi ni quiñi ndasí ni yā siquī cuéchi i.

20 Te ni naa tāca isla, te suni yucu tuá gā.

21 Te ichi ándiví ní cuun ñíñi náhnu siquī ñayuu, jeē véyi nde uū xico kilo. Te ni cacahān ndevāha ñayuu siquī Yaā Dios jeē ní cuun ndasí níñi, chi ñn jñūndóho xeēn ni cuu.

*Jeē ndonda ya siquī ñuu neé Babilonia*

## 17

1 Yūcuán na te ni quiñi ñn jñáhan ndihúxá ndajéhé jeē ní candāhá ndihúxá cohō ún, te ni cahān yā jíñ rí:

Nehen, te na stéén rī nuū rō ndese coo castigo siquī maá ñahan jnéni jee

cúu ñuu cujéhnú íne nuū iyó cuéhē ndute.

<sup>2</sup> Chi tāca rey ñayīvi nájñūhun ni casíquí ndéē de jíin ñahan ún, cúu jeē ní castóo de Yaā Dios te cándiquin de jñūhun néé ní steén ña. Te ni sáha ña jeē ñayuu ní cáhnu ñayīvi, nájñūhun nájini i te casíquí ndéē i Yaā Dios cúu jeē ní castóo i ya te casáha ndasí i cuēchi. Achí ndajéhé yā.

<sup>3</sup> Te ni sáha ga Espíritu Santo jeē ní jito ndijin rī, te ndajéhé yā un cuáhān yā jíin rí nde nuū ñūhun téhé. Te ni jito ri ññ ñahan, yósó ña ññ quiiti xéén cacuéhé. Te ní cáhnu ti ndeé jñūhun néé jéē quiiti ni Yaā Dios sáha. Te íyó úxā xinī tī jíin úxī ndiqui ti.

<sup>4</sup> Te ñahan un ñūhun ña sahma ndihí jíin sahma cuehé, te suni ñūhun ña síquī oro jíin yúū luu jíin perla jeē ndeé yahu. Te ndáhá ña ññ cohō oro jeē ñūhun chitú jíin jniñu néé ndasí jíin jniñu jnehén jéē jíca jnéni ña.

<sup>5</sup> Te jneē ña ndeé ññ síhvī jéē cúu ññ jñūhun sáhi, te suhva cáhān: Yāha cúu ñuu teyí Babilonia, jeē cúu nájñūhun náná tāca jéē cájica jnéni jíin jéē casáha néé ndasí ini ñayīvi, áchí.

<sup>6</sup> Yūcuán na te ni jini rī jeē ñahan un nájini ña jeē nájñūhun ní jihí ña níñī ñayuu maá Yaā Dios jíin níñī ñayuu ní cajihí síquī jeē ní canacani ndaā i jñūhun Jesús. Te nahán ní naa ni rī ní jito ri ña.

<sup>7</sup> Yūcuán na te ni cahān ndajéhé un jíin rí:

¿Naun náā ni rō jito ró? Na cástūhun rí nuū rō ndese cúní cahān jñūhun sáhi síquī ñahan un jíin quiiti xéén yosó ña, jeē iyó úxā xinī tī jíin úxī ndiqui ti.

<sup>8</sup> Quiiti xéén jeē ní jito ró, chi ni cotecu tī, te vijna chi tuá tī. Te ndenda tucu ti ini tūhnchi cúnú, te yūcuán na te quihīn tī nuū jnahnú ndetū tī. Te ñayuu cáyūcu ní cáhnu ñayīvi, naa ni i coto i nuū quiiti un jéē ní cotecu tī te ni jihí tī, te natecu tucu ti. Te cácuu i ñayuu jeē tu yósó síhvī i nuū tútu jeē yosó síhvī ñayuu cotecu ní cáni jeē ní jécósō síhvī i nde quiivī ni jécōo ñayīvi.

<sup>9</sup> 'Tāca ñayuu jécūhun vāha ni, cuu tava i cuenta ndese cúu: Ndihúxá xinī

tī cácuu nájñūhun uxā yucu nuū néne ñahan ún.

<sup>10</sup> Te ndihúxá xinī tī suni cácuu nájñūhun uxā rey. Te uhūn rey un je ni naa jeē ndácu de jniñu, te ññ de ndácu jniñu vijna, te ñnga de chi ná tu quiiti de. Te núu na quiiti de te jecu-ni tiempo coo de.

<sup>11</sup> Te quiiti xéén jeē ní cotecu te tuá iyó tī vijna, máá tī cuu rey unā. Te ññ jñáhan ndihúxá rey un cúu tī. Te suni quihīn tī nuū jnahnú ndetū tī.

<sup>12</sup> 'Te ndihúxí ndiqui jeē ní jito ró cúu nájñūhun uxī rey, te ná tu ndacu de jniñu jíjñáhan de. Te máá de jíin quiiti xéén un, chi nihīn jniñu de cuu de rey jecu-ni tiempo.

<sup>13</sup> Te ndihúxí rey un chi squíjñáhan de jñūhun, te nacuāha de poder de jíin jniñu ndíso de nuū quiiti xéén un návāha ndacu ti jniñu.

<sup>14</sup> Te cuajnáhan de jíin Yaā cúu Londe. Te Yaā cúu Londe quende yā poder de jíjñáhan de. Chi máá yá cúu Jitoho nuū tāca jito, te máá yá cúu Rey nuū tāca rey. Te ñayuu cáhīn jíin yá, chi ni nacāji Yaā Dios i te ni cana ya i, te casquícu vāha i. Achí ndajéhé un.

<sup>15</sup> Te ni cahān gā yā:

Cuehé ndute jeē ní jito ró núu néne ñahan jíca jnéni, suu cúu ñayuu cuehé tācā ñuu, tācā yuhu, tācā nación.

<sup>16</sup> Te ndihúxí ndiqui jeē ní jito ró jéē névāha quiiti xéén un, suu cácuu rey jeē coto uhū de ñahan jíca jnéni un. Te sáha de jeē quendōo ndáhú ña te quendōo vichí lí ña. Te caji de cūñu ña te cahmu de ña nuū ñuhún.

<sup>17</sup> Chi Yaā Dios scánda ya ini de jeē na sáha de jniñu cúní yā. Te squíjñáhan de jñūhun jeē nacuāha de jniñu ndíso de nuū quiiti xéén un, ndacu ti jniñu nde na squícu tāca jñūhun ni cahān Yaā Dios.

<sup>18</sup> Te ñahan jeē ní jito ró cúu máá ñuu teyí jéē cujéhnú nuū tāca rey ñayīvi. Achí ndajéhé un.

*Siquí jeē naa ñuu Babilonia*

## 18

<sup>1</sup> Yūcuán na te ni jito ri jeē ní cuun inga ndajéhé yā ni quiji ichi ándiví. Te cújéhnū ndasí yá. Te jeē ndíndēe yá te ni ndíndēe núū ñayīví.

<sup>2</sup> Te ni cana jee ya:

Je ni naa iī ñuu teyí Babilonia. Te ni nduu vehe tāca táchī, nuū ñúhun ndinuū tachī neé, jíin táca téji, quiiti quíni jeē tu nújnahan ni yō.

<sup>3</sup> Chi ñuu un cúu nájnūhun ñn ñahan ndevāha, te ni sáha ña jeē ñáyuu tācá nación, nájnūhun nájni i te cásiquí ndéē i Yaā Dios, cúu jeē ní castóo i ya te cásáha ndasí i cuéchi. Te tāca rey ñayīví, nájnūhun ni casíquí ndéē de jíin ñahan ún jeē ní cajetáhú de jnūhun néé ní steén ña. Te ñayuu ní ñayīví jéē cájeen cáxícó, ní cacucúca i jíin cuéhē jeneé jeē ní nevāha ña.

<sup>4</sup> Yūcuán na te ni jini sōho ri inga jnūhun jeē ni cáhān ichi ándiví:

Maá ró jeē cácuu ró ñáyuu maá rí, quendacoo ró ini ñuu jiñā, návāha ma quívi nduu rō jíin táca cuéchi jeē sáha ña, te návāha ma ndóho ró jnúndóho xeēn jeē ndoho ña.

<sup>5</sup> Chi ni cayā cuehē ndasí cuéchi ña, nájnūhun ñn montón cáhnu ndasí jéē ní cusúcún ndé ándiví. Te vijna te nduxeēn Yaā Dios siquí cuéchi ña.

<sup>6</sup> Stóho ró ña nájnūhun ni sáha ña jeē ní ndoho sava ga ñayuu. Te nachunaa rō nuū ña doble jnúndóho jeē ni jéhe ña nuū inga ñayuu. Te sáha ró jeē nandicó cóo doble siquí ña vēsú jeē ni sáha ña siquí inga ñayuu.

<sup>7</sup> Te yōhyo ni satéyí ña máá ña, te cúca ndasí ní cotecu ña. Te suni jíin cúhva yúcuan nacuāha ró jéē ndóho xeēn ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quiji cuiiti jnúndóho ndoho ri, achí ña.

<sup>8</sup> Jeē yúcuan cúu jeē ñn quiiví-ni te quiji cuehē jnúndóho siquí ña. Chi cuu ndiyí, te cucuíhyá ndasí ni ña, te coo jnamā, te cayū ña nuū ñuhún. Chi yōhyo íyó poder maá Jítóho yō Yaā Dios, Yaā ní ndonda siquí cuéchi ña, achí.

<sup>9</sup> Te tāca rey ñayīví jéē ní casíquí ndéē de jíin ña te ni cotecu cúca ndasí de jíin ña, ndahyū de te ndahyū cohó de coto de jeē cánda ñuhmā cayú ña.

<sup>10</sup> Te cuiñi jícá de chi yūhú de coto de jeē súcuan ndoho ña castigo. Te cahān de jíjnahan de:

Nacā jeē xeēn ndóho ró, ñuu cujéhnū Babilonia, chi yá-ni ñuu teyí ní cuu ró núú. Te vijna chi ñn núnúu-ni te ni quee castigo jeē náā rō, achi de jíjnahan de.

<sup>11</sup> Te tāca téē ñayīví jéē cájeen cáxícó ñuu ún, ndahyū de te ndahyū cohó de jehē. Chi tuá ndé ñn cuaan ndajniñu cáxícó de.

<sup>12</sup> Te ndajniñu cáxícó de un cúu oro, plata, yuū luu jíin perla jeē ndeé yahu, jíin sahma fino jíin sahma seda jeē ndihí jíin jéē cuehé. Te suni tācá yujnu jeē asñ jéē xicō, jíin táca ndajniñu luu jeē ni sáha jíin marfil jíin yujnu lúu jeē ndeé yahu jíin cáa cuaán jíin cáa hierro jíin yúu cuijín luu.

<sup>13</sup> Te suni cáxícó de canela jíin táca jíhyo asñ jíin súje cutú jíin súje uvuā jíin táca perfume jíin vino jíin aceite jíin harina fina jíin trigo. Te suni cáxícó de quiiti ndíso jíin lanchi jíin caballo jíin carreta, te nde ñayuu cáxícó de jeē sájniñu sáa-ni i.

<sup>14</sup> Te cahān de jíin ñuu ún:

Ni cujiyo ndihí ndajniñu cúca jeē ní nujnahan ndasí ni rō. Te tāca jéē lúu jeē váha jeē ní cotecu cúca ró, chi ni naa ndihí, te ma nánihñn cuiiti gā rō, achi de jíjnahan de.

<sup>15</sup> Te tāca téē ni cajeen ni caxíco ní cacucúca jéē siquí ndajniñu ñuu ún, chi cuiñi jícá de jeē yūhú de coto de castigo coo ñuu ún. Te ndahyū de te ndahyū cohó de.

<sup>16</sup> Te cahān de jíjnahan de:

Nacā jeē xeēn ndóho ñuu teyí yáha. Chi ni cuu nájnūhun ñn ñahan jeē ni ñúhun sahma fino, sahma ndihí jíin jéē cuehé. Te ni ñuhun ña siquí oro jíin yúu luu jíin perla jeē ndeé yahu.

<sup>17</sup> Te vijna te ñn núnúu-ni te ni naa ndihí táca ndajniñu váha ún, achi de jíjnahan de.

Te cuiñi jícá táca tée cáscáca barco, jín ñáyuu cuángoo nuū barco, jín tée cásájniñu ini barco, jín táca gá tée cásájniñu nuū mar.

<sup>18</sup> Chi coto de ñuhmā jeē cayú ñuu ún, te cana jee de jíjnáhan de:

¿Ndé íne ga ñuu teyí jeē cujéhu nájnūhun ni iyo ñuu yáha? achi de.

<sup>19</sup> Te cosō de ticachā ñuhun xiní de jeē cácuquíhá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jín ndajniñu cúca jeē ni iyo ñuu un ní cacucúca táca ñáyuu cánevāha barco cájica nuū mar. Te vijna te ñn núnúu-ni te ni naa ndihí-ni, achi de.

<sup>20</sup> Te na cúsiñi ni táca róhó jeē cáyūcú andiví, síquī jeē ní naa ñuu ún. Te na cúsiñi ni rohó, táca tée apóstol, jín tée cánacani jnūhun Yaā Dios, jín ñáyuu maá Yaā Dios. Chi ni sáha néé ñuu un síquī rō jíjnáhan ró, te jeē yúcuan ní ndonda Yaā Dios síquī, achi de.

<sup>21</sup> Yūcuán na te ñn ndajéhé ndíso poder, ni quihin ya ñn yuū cáhnu nájnūhun ñn yōso cáhnu, te ni scáne ya ini mar. Te ni cahān yā:

Nájnūhun ni naa yōso yáha, suni súcuan naa Babilonia, ñuu cujéhu téyí. Te ma núcoo cuiñi gā jeē cóto yó núu.

<sup>22</sup> Te ni cahān yā jín ñuu ún: Ini calle rō ma cúni sōho cuiñi gā ñayuu jeē scáta i yaa arpa jín flauta jín trompeta. Te suni ma cóo cuiñi gā ñayuu casáha táca ndajniñu. Te suni ma cúni sōho ga i jeē ññin táca molino rō.

<sup>23</sup> Te ni ñn lámpara ma sáha ga jeē cundijin nuū rō. Te ni ma cúni sōho ga i vico jeē cácusñi ni ñahan tée nándāha mēhñu ró. Te ñayuu ní cajeen ni caxícó nuū rō, ni cacujéhu ndasí i ini ñayiví. Te ni stahú ró ñayuu táca nación jín jniñu tasí jín jniñu mágica. Achí ndajéhé un.

<sup>24</sup> Te ñuu un ní nihñin castigo xeēn, chi síquī ñuu un ndéé cuēchi jeē ní jeti ñññ táca tée ní canacani jnūhun Yaā Dios, jín táca ñáyuu maá yá, jín táca gá ñayuu ní cajehni i ññ cáhnu ñayiví.

## 19

<sup>1</sup> Te ná ni cuu táca jéé yáha, te ni jini sōho ri jeē cahán jee cuehē ndasí ñáyuu ini andiví:

Yōhyo cújéhu Yaā Dios. Chi Yaā Dios maá yó cúu jeē ní jnama yóhó.

Te máá yá cujéhu ndasí, te máá yá jññ ndihí poder.

<sup>2</sup> Te ndaā te vāha sándaā yā táca jniñu, chi ni ndonda ya síquī cuéchi ñuu neé cújéhu ún.

Chi ni stívi un ñáyuu ññ cáhnu ñayiví jín jnūhun cásiquí ndéé Yaā Dios.

Te ni sáha ya jeē ní ndutahū ñuu un síquī jeē ní jehni táca mozo yā.

Achí i jíjnáhan i.

<sup>3</sup> Te ni cacahān tucu i:

Yōhyo cújéhu ya. Chi ññ cáni canda ñuhmā ñuu un jéé cayú, achí.

<sup>4</sup> Te ndihóco cuūn tée jéhu cándiso jniñu, jín ndicúun jeē técu, ni cajúcuñi yití de, te ni cachiñuhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuan na cóo. Yōhyo cújéhu ya.

<sup>5</sup> Te nde nuū mesa nuū ndácu ya jniñu ni cahān ñn jnūhun:

Róhó jéé cájejniñu nuū Yaā Dios, jín róhó jéé cándiso iyo nuū yā, jeē cácujeñu jín jéé tu cácujeñu, na cáhán rō jeé yóhyo vāha Yaā cúu ya. Achí.

### *Vico jeē nándāha Yaā cúu Londe*

<sup>6</sup> Te ni jini sōho ri jeē cacahān ñayuu cuehē ndasí, te ñññ nájnūhun ñññ cuehē yūte, te nájnūhun jeē cahán ñññ taja. Te ni cacahān:

Yōhyo cújéhu ya. Chi Jitoho yō Yaā Dios, Yaā jññ ndihí poder,

vijna te ndácu ñññ ya jniñu.

<sup>7</sup> Te na cúsiñi ni yō, te siñ ndasí na cóo ni yō,

te na cáhán yō jeé yóhyo cújéhu ya. Chi ni quee quiví jeé nándāha máá Yaā cúu Londe.

Te je iyó túhva ñahan nándāha jín yá, te suu cúu ñayuu maá Yaā Dios.

<sup>8</sup> Te ni nihñin ña jnūhun cuhun ña sahma fino jeé ndóo ndasí te xíñu.

Achí i jijnáhan i. Te sahma fino un cúu tãcã jniñu ndaã jeë casáha ñayuu maá Yaã Dios.

<sup>9</sup> Te ni cahãn ndajéhé yã jíin rí:

Tee ró jnúhun yáha: Nacã jeë ndetũ tãca ñáyuu jeë ní cana ya quingoo vico nãndãha Yaã cúu Londe.

Te ni cahãn gã ndajéhé un jíin rí:

Tãca jnúhun yáha cúu jnúhun ndaã ni cahãn Yaã Dios, achí yá.

<sup>10</sup> Te ni jecuiñĩ yitĩ rí nuũ jehé ndajéhé un jéë chiñúhún rí yã nuũ. Te ni cahãn yã jíin rí:

Ma sáha ró súcuan. Chi ruhũ suni mozo Yaã Dios cúu ri, nájnũhun máá ró jíin táca hermano rō jeë cácanđje vãha jnúhun Jesús. Sa suhva nuũ maá Yaã Dios chiñúhún ró. Achí yá.

Chi jnúhun siquĩ Jesús cúu jeë cácahãn ndaã ñayuu cáncani jnúhun Yaã Dios.

#### *Yaã yosó siquĩ caballo cuijín*

<sup>11</sup> Yũcuán na te ni jito ri jeë núne andiví. Te ni cane ñn caballo cuijín, te Yaã yosó siquĩ tĩnaní yá Yaã ndaã, Yaã squĩcu, chi squĩcu ya jeë ní jéjnũhun ya. Te ndaã sãndaã yã jniñu te ndaã ndónđa ya siquĩ tãca jéneé.

<sup>12</sup> Te tĩnũu yá ndĩndēe nájnũhun yãñuhũn. Te xinĩ yã ñuhun cuehē corona. Te yosó ñn síhvĩ yá jeë maá-ni ya cúu jeë jiní.

<sup>13</sup> Te ñuhun ya ñn sahma jeë ní ñũndaji nuũ niñĩ, te nání yá Jnúhun Yaã Dios.

<sup>14</sup> Te tãcã ndajéhé yã jeë iyó andiví, cáyosō caballo cuijín, cándiquĩn yatã yã. Te cáñuhun sahma fino cuijín iyó ndoo.

<sup>15</sup> Te ini yuhu máá Yaã jeë yosó siquĩ caballo, quẽnda jeë cáa nájnũhun ñn espada xeẽn. Te espada un cúu jnúhun ya jeë stóho yã ñayuu tãcã nación. Te ñihin ndacu ya jniñu nuũ i. Te sãndaã yã siquĩ cuéchi i nájnũhun jeë jeñũ siquĩ ndehē uva cájexĩn. Te cuãha ya castigo xeẽn ndoho i jeë quitĩ ni yã siquĩ cuéchi i. Chi máá yá jnĩ ndihĩ poder.

<sup>16</sup> Te sahma ya jíin síhin ya yosó jnúhun yáha: Rey nuũ tãca rey jíin Jítóho nuũ tãca jítóho, áchĩ.

<sup>17</sup> Yũcuán na te ni jito ri ñn ndajéhé yã jeë ñn nuũ níandii. Te ni cana jee ya xinĩ tãcã quitĩ ndáva nuũ tachí:

Ndutútú ró quiijicoo ró cuxĩni ró ñn vico cáhnu sáha Yaã Dios.

<sup>18</sup> Te caji rō cũñu tãca rey jíin capitán jíin tée téyĩ, jíin cũñu tãcã caballo jíin tée ni cayosō siquĩ tĩ. Te suni caji rō cũñu tãca gá ñayuu, cúu ñayuu casájniñu cuenta maá jíin mozo jeë ní cajeen ñayuu, cúu ñayuu cácujeñhu jíin ñáyuu tu cácujeñhu. Achí ndajéhé yã.

<sup>19</sup> Yũcuán na te ni jito ri maá quitĩ xeẽn jíin táca rey ñayĩvi jíin cuéhē soldado de. Te ni candutútú de jeë cuajnáhan de jíin máá Yaã yosó caballo jíin táca ndajéhé yã.

<sup>20</sup> Te ni jniñi ya quitĩ xeẽn cuahãn tĩ preso jíin tée ni nacani jnúhun stáhú jeë ní sáha tãcã jniñu jéñhu jeë ní jito jínũu quitĩ xeẽn. Chi jíin jniñu jéñhu un cúu jeë ní stáhú de tãca ñáyuu jeë ní cajehē jnúhun condiso jnunĩ quitĩ xeẽn, jíin jéë ní cachiñúhún imagen tĩ. Te quitĩ xeẽn un jíin tée ni nacani jnúhun stáhú un, cátecu ndĩndúú te ni scãne ya nuũ laguna ñuhũn jeë cayú jíin azufre.

<sup>21</sup> Te jíin espada jeë cáne yuhu Yaã yosó caballo ni cajihĩ tãcã soldado quitĩ xeẽn un. Te tãcã quitĩ ndáva nuũ tachí ni candutú chíji tĩ ni cayejĩ tĩ cũñu de jijnáhan de.

#### *Siquĩ mil cuiyã*

## 20

<sup>1</sup> Te ni jito ri jeë ní cuun ñn ndajéhé yã ichi ándiví. Te ndáhã yã ndacãa jeë núne tũhnchi cúnú ndasí. Te suni ndáhã yã ñn cadena cáhnu.

<sup>2</sup> Te ni jniñi ya maá cóo cáhnu jeë iyó ndé jenahán ndasí, te nání tĩ jexeẽn jíin Satanás. Te ni jihni yã jeë conuhnĩ mil cuiyã.

<sup>3</sup> Te ni scãne ya ini tũhnchi cúnú ndasí. Te ni jesĩ vãha ya, te ni sãcutú yã yuyáú, návãha ma stáhú gá un ñáyuu tãcã nación, chi nde na jĩnu mil cuiyã. Te jeë yáha mil cuiyã ún, yũcuán na te cánuú jéë ndajĩ caca cuu jecu na tiempo.

4 Te ni jito ri tāca mesa nuū ndácu jniñu, te yūcuan cáyūcu táca ñáyuu jeē ní canihñ jniñu i sándaā i jniñu. Te suni ni jito ri anuá tāca ñáyuu jeē ní cajehnde xinī i siquī jeē ní canacani i jñuhun Jesús jíin jñuhun Yaā Dios. Te tu ní cáchiñúhún i quitī xéén jíin imagen tī, ni tu ní cájēhe i jñuhun jeē cóndee jñunī tī jneē i chí ndaha i. Te ni jito ri jeē ní natecu i te ni candacu i jniñu jíin Cristo mil cuiyā.

5 Yāha cúu ndīyī jeē nátecu xīhna gā. Te tāca gá ndīyī, tu ní cánatecu i, chí nde jeē jínu mil cuiyā.

6 Te nacā jeē ndetū tāca ñáyuu ndoo ánuá jeē nátecu xīhna gā. Chí ma cúu cuiñi i vuelta uū. Te cuu i sutū nuū Yaā Dios jíin núu Cristo, te ndacu i jniñu jíin yá mil cuiyā.

7 Te jeē jínu mil cuiyā ún, te ndajī Satanás te quenda nuū yíndihyū.

8 Te stáhú tucu ñayuu tācá nación ní cáhnu ñayīví. Te stáhú ñayuu ñuu Gog jíin Magog. Te sáha jeē ndutútú táca soldado ñuu un jéé cuajnáhan de. Te coo cuehē ndasí de nájnūhun ññí yumar.

9 Te cuitē núu de quingoo de ní cáhnu ñayīví. Te cuicó ndúu de ñuu nuū cáyūcu ñáyuu maá Yaā Dios, ñuu jeē maní yá jíin. Te Yaā Dios chí scúun ya ñuhūn ichi ándiví, te cayū ndihí de.

10 Te jexeén jeē ni stáhú táca ñáyuu ún, chí scáne ya quihñ nuū laguna ñuhūn jeē cayú jíin azufre. Te yūcuán chí xīhna gā ni scáne ya quitī xéén jíin téé ni nacani jñuhun stáhú. Te yūcuán ndoho nduú ñuú ní cáni cuiñi.

### *Jeē sándaā yá jniñu nuū mesa cuijín*

11 Yūcuán na te ni jito ri ññ mesa cuijín cáhnu, te néne máá Yaā ndácu jniñu. Te ñayīví jíin andiví ni ndoñúhún cuáhñ jeē ní jito ya nuū, chí tuá ni cúu quendōo nuū yá.

12 Te ni jito ri tāca ndīyī, jeē ní cujéhnu jíin jéé tu ní cujéhnu, cáhñ nuū Yaā Dios. Te ni sáha ya jeē núne tāca libro, te suni ni nune inga libro jeē yosó síhví ñáyuu cotecu ní cáni. Te ni sándaā yá siquī tāca ndīyī ún, núu

ndese jniñu ni casáha i jíin ndese yósó núu tāca libro un.

13 Te tāca ndīyī jeē ní cajihñ nuū mar, ni nanecoo. Te suni ni nanecoo tāca ndīyī jeē ní cajihñ i, jeē íne i máá lugar nuū cáyūcu ánuá ndīyī. Te ni sándaā yá siquī, núu ndese ni casáha ññ i.

14 Yūcuán na te cuehyī jéhni ñayuu jíin lugar nuū cáyūcu ánuá ndīyī, ni snáā yá ni scáne ya cuango nuū laguna ñuhūn. Te jeē ndóho ñayuu nuū laguna ñuhūn, yūcuan cúu jeē cúu i vuelta uū.

15 Te yūcuan ní scáne ya tāca ñáyuu ni casáha jniñu néé jéé tu yósó síhví i nuū libro jeē yosó síhví ñayuu cotecu ní cáni.

### *Andiví jéé jíin ñayīví jéé*

## 21

1 Yūcuán na te ni jito ri andiví jéé jíin ñayīví jéé. Chí andiví jíin ñayīví xīhna ñuhūn ni naa. Te suni tuá mar.

2 Te ruhū Juan, ni jito ri ñuu ññ jeē cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájnūhun ññ ñahan jeē ni sátūhva ña ni cucutú ña jeē nándāha ña jíin yñ ña.

3 Te ni jini sōho ri ññ jñuhun jeē ní cáhñ jee ichi ándiví:

Condēhé, chí vijna te ndéé Yaā Dios mēhñu ñáyuu. Te condee yá jíin i jíinánhan i, te cuu i ñayuu maá yá. Te máá yá condee yá jíin i jeē cúu ya Yaā Dios i.

4 Te nacuaa yá ndute tñnúú i jíinánhan i. Te ma cúu gā ñayuu, ni ma ndahyú gā i, ni ma cucuíhyá gā ni i, ni ma jetú gā i. Chí je ni yāha tāca jñúndóho jeē ni íyo, áchí.

5 Yūcuán na te ni cahñ maá Yaā néne nuū mesa:

Condēhé, chí nasáha jeé rí tāca jéé iyó, áchí yá.

Te suni ni cahñ yá:

Tee ró jñuhun yáha. Chí tāca jñuhun yáha cúu jñuhun jeē jiní ndije ró jéé ndaā cúu.

6 Te ni cahñ gā yá:

Je ni jínu. Máá rí cúu nájnūhun letra A xīhna ñuhūn jíin letra Z jeē sándñí

na, chi máá rí ni squejéé ndíhi te máá rí sínu. Te tāca ñáyuu cájichī, súcuan-ni cuāha ri coho i ndute cáne jeē cótecu i ní cáni.

<sup>7</sup> Tāca ñáyuu jeē cúndeyí síquī jéneé, nihīn i ndíhi jeē yáha cuu tahū i. Te cuu ri Yaā Dios i, te cuu i sēhe ri.

<sup>8</sup> Te tāca ñáyuu jeē cáyūhú ndoho síquī jnúhun rī, jíin ñáyuu tu cácanđije, jíin ñáyuu casáha jniñu néé, jíin ñáyuu cájehni ndīyí, jíin ñáyuu cájica jnéni, jíin ñáyuu casáha tásí, jíin ñáyuu cáchiñúhún ídolo, jíin tāca ñáyuu castáhú, ñáyuu ún chi quīvicoo i laguna ñuhūn jeē cayú jíin azufre. Te yūcuan cúu jeē cúu i vuelta uū.

### *Jerusalén jeé*

<sup>9</sup> Yūcuán na te ni quiji ñn jnáhan ndihúxá ndajéhé jeé ní candāhá ndihúxá cohō jeé ni ñúhun chitú ndihúxá jnūndóho sandíhí. Te ni cahān yā jíin rí:

Nehen, te na stéén rī nuū rō ñahan jeé nándāha ña cuu ña ñasihí Yaā cúu Londe, áchí yá.

<sup>10</sup> Te ni sáha ga Espíritu Santo jeé ní jito ndijin rī, te ndajéhé un ní jeca ya ruhū cuahān yā jíin rí xinī ñn yucu cáhnu súcún. Te ni steén yā nuū rī máá ñuu ií cujéhnu jeé cúu Jerusalén, te ni cuun vēji nde andiví núu néne Yaā Dios.

<sup>11</sup> Te ndíndéé ndasí ñuu un nájnūhun ndíndéé Yaā Dios. Te xíñú nájnūhun xíñú ñn yuū luu jeé ndeé yahu ndasí, nájnūhun yuū cuijín jeé quiyí nájnūhun vidrio.

<sup>12</sup> Te yuhu ñúu un ní jicó ndúu ñn jeé cáhnu súcún ndíhyú ñuu ún. Te íyó úxī uū yehyí. Te tāca yéhyí un íin ñn ndajéhé yā. Te tāca yéhyí un yósó síhví ndihúxí uū yucūn Israel.

<sup>13</sup> Te lado nuū cáne niāndii iyó únī yehyí. Te lado norte suni íyó únī yehyí. Te lado sur suni íyó únī yehyí. Te lado nuū quée niāndii suni íyó únī yehyí.

<sup>14</sup> Te íyó úxī uū yuū náhnu jeé cúu cimientu maá jéé ndihyú ñuu ún. Te tāca yúu un yósó síhví ndihúxí uū apóstol maá Yaā cúu Londe.

<sup>15</sup> Te ndajéhé jeé ni cáhān jíin rí, ndáhá yá ñn yujnu oro jeé chícuāha yá ñuu un jíin tāca yéhyí jíin máá jéé ndihyú ñuu ún.

<sup>16</sup> Te ñuu ún chi ñn cūhva-ni cúu ndicúun lado. Chi jeé cáni jíin jéé jité, ñnuú-ni cúu. Te ndajéhé un ní chícuāha yá ñuu un jíin yujnu ún. Te néé uū mil uū ciento kilómetro jeé ñn ñn lado. Te ñnuú-ni cūhva jeé cáni, jeé súcún, jíin jéé jité.

<sup>17</sup> Te suni ni chícuāha yá maá jéé ndihyú ñuu ún, te néé unī xico cuūn metro jeé súcún. Te yūcuan cúu cūhva jejníñu ñayuu, jeé suni jéjníñu ndajéhé un.

<sup>18</sup> Te máá jéé ndihyú ñuu un ní cuvāha jíin yúu cuijín quiyí. Te ñuu ún chi máá nene oro cúu, te cáa nájnūhun vidrio quiyí.

<sup>19</sup> Te tāca yúu jeé cúu cimientu maá jéé ndihyú ñuu ún, ní cucutú jíin ndínuū yuū luu jeé ndeé yahu. Yuū ñn cúu yuū cuijín quiyí. Te jeé uú cúu yuū ndeé ndí. Te jeé uní cúu yuū pinto. Te jeé cuún cúu yuū cuí ndí.

<sup>20</sup> Te jeé uhún cúu yuū pinto jeé ñúhun raya. Te jeé íñú cúu yuū cuehé pinto. Te jeé uxá cúu yuū cuaán quiyí. Te jeé uná cúu yuū cuí ndeé. Te jeé ñn cúu yuū cuaán ndí. Te jeé uxí cúu yuū cuí cuijín. Te jeé uxí ñn cúu yuū cuehé cuaán. Te jeé uxí uū cúu yuū ndíhí ndí.

<sup>21</sup> Te ndihúxí uū yehyí un cácuu uxí uū perla jeé ndeé yahu. Te ñn ñn yéhyí cúu ñn ñn perla. Te máá nene oro cúu calle cáhnu ñuu ún, te quiyí nájnūhun vidrio.

<sup>22</sup> Te tú na templo ni jito ri ini ñuu ún, chi ní cáhnu ñuu un ndeé máá Jítoho yō, Yaā jnāí ndíhi poder, jíin Yaā cúu Londe.

<sup>23</sup> Te ñuu ún tu jíni ñúhún cundijin jíin luz niāndii jíin yóō. Chi jeé ndíndéé máá Yaā Dios cúu jeé cundijin ñuu ún. Te luz ñuu un cúu máá Yaā cúu Londe.

<sup>24</sup> Te ñayuu tācá nación ñayiví jéé ní jnama ya, caca i jeé cundijin luz ñuu un núu i. Te tāca rey ñayiví quijicoo de ñuu ún, quindecá de tācá ndajníñu jeé ndeé yahu jíin jéé cujéhnu de sáha.



25 Te tāca yéhyí ñuu ún ma cóndihyū cuiti nduú, chi tú na jecuáa coo.

26 Te ini ñuu ún quijicoo ñayuu tāca nación, quindeca i tāca ndajniñu jeē ndeé yahu jíin jeē cujéhu i sāha.

27 Te ma quívicoo cuiti ni ñin jeē jnehén. Ni ma quívicoo ñayuu casáha jniñu néé jíin jeē castáhú. Chi quívicoo máni máa ñayuu jeē yosó síhví i nuū libro jeē yosó síhví ñayuu cotecu ní cáni, jeē névaha Yaā cúu Londe.

## 22

1 Yūcuán na te ndajéhe yā ni steén yā nuū rī ñin yūte íyó ndoo. Te ndute un sāha jeē cótecu yō ní cáni. Te xíñú nájñuhun vidrio, te cáne nuū mesa nuū ndácu Yaā Dios jniñu jíin Yaā cúu Londe.

2 Te jíca yūte ún sava mēhñu calle cáhnu ñuu ún. Te ndíndúú lado yuyúte un yíhi yujnu jeē cótecu yō ní cáni sāha. Te yujnu un jéhe ndehē uxí uū jínu jeē ñin cuiyā, chi tāca yōo cúun ndehē. Te ndaha yúcú i cúu tajná jeē ndúvaha ñayuu tāca nación.

3 Te tāca-ni jeē ni cáhān yā jeē násūu jéé váha cúu, ma cóo ini ñuu ún. Te ini ñuu ún cuiñi máa mesa nuū ndácu Yaā Dios jniñu jíin Yaā cúu Londe. Te ñayuu cácandíje jeē cácuu i mozo yā, chiñúhún i ya.

4 Te coto i nuū yā, te condee síhví yā jneē i.

5 Te ma cóo ga jecuáa ñuu ún. Te ñayuu cáyūcu yúcuan tuá jíni ñúhún i jeē cúndijin lámpara nuū i, ni jeē cúndijin niāndii. Chi jeē ndíndēe máa Jítoho yō Yaā Dios cúu jeē cúndijin nuū i. Te ndacu i jniñu ní cáni cuiti.

### *Jeē cuácuyajni ndiji Cristo*

6 Yūcuán na te ni cahān ndajéhe un jíin rí:

Tāca jnúhun yáha cúu jñuhun jeē jiní ndije ró jéé ndaā cúu. Te Jítoho yō Yaā Dios, máa yá sāha jíin téé cánacani jñuhun ya jeē jíin Espíritu yā cánacani de. Te suu máa yá ni tají yá ndajéhe yā návaha steén nuū ñayuu cácuu mozo yā tāca jniñu jeē yachí coo.

7 Ndihi yachí rī, achí yá.

Te nacā jeē ndetū ñayuu chusóho jnúhun Yaā Dios jeē yosó nuū tútu yáha.

8 Te ruhū Juan, ni jini sōho ri tāca jnúhun yáha, te ni jito ri tāca jniñu yáha. Te ná ni jini sōho ri ni jito ri, yūcuán na te ni jecuiñi yití rí nuū jehé máa ndajéhe jeē ni steén tāca jniñu yáha nuū rī, jeē chiñúhún rí yā nuū.

9 Te ni cahān ndajéhe un jíin rí:

Ma sāha ró súcuan. Chi ruhū suni mozo Yaā Dios cúu ri, nájñuhun máa ró jíin tāca hermano rō jeē cánacani jñuhun ya, jíin ndihi ñayuu cájetáhú jñuhun yósó nuū tútu yáha. Sa suhva nuū maá Yaā Dios chiñúhún ró. Achí yá.

10 Te ni cahān gā ndajéhe un jíin rí:

Ma chísāhi ró tāca jnúhun Yaā Dios jeē yosó nuū tútu yáha, chi je cuacuya-jni tiempo jeē cúndaā ndihi.

11 Te ñayuu casáha jniñu néé, na sāha ga máa i jniñu néé. Te ñayuu jnehén ánuá, na quéndōo máa i súcuan. Te sa ñayuu casáha jniñu ndaā, na sāha ga i jniñu ndaā. Te ñayuu cáhiyo ndoo ánuá, na cáca ndoo ga i súcuan. Achí ndajéhe un.

12 Jendaá jeē ndiji yachí rī, achí Jesús. Te quihi ri jíin táhū cuāha ri nuū ñin ñin ñayuu, núu ndese jniñu ni casáha i.

13 Máa rí cúu nájñuhun letra A xíhna ñúhún jíin letra Z jeē sándihí na, chi íyó rí nde xíhna ñúhún te coo ri ní cáni.

14 Nacā jeē ndetū ñayuu jeē jéhe i jñuhun ndundoo ánuá i nájñuhun ndúndoo sahma. Chi cuu caji i ndehē yujnu jeē sāha jeē cótecu i ní cáni, te cuu quívicoo i yéhyí ñuu íi ún.

15 Te ichi fuera ñuu ún cuiñi ñayuu tu cácandíje, jíin ñayuu casáha tásí, jíin ñayuu cájica jnéni, jíin ñayuu cájehni ndíyi, jíin ñayuu cáchiñúhún ídolo, jíin ñayuu cácusñi ni stahú jnáhan.

16 Máa rúhū Jesús, ni tají rí ndajéhe rī návaha castúhun yá tāca jnúhun yáha nuū tāca grupo ñayuu cácandíje. Te máa rí ni sāha jeē ni íyo rey David, te ni quihi ri nuū yucún David. Te

cúu ri nájnūhun lucero ndíndēe cáne cúndijin. Achí yá.

<sup>17</sup> Te máá Espíritu Santo jíin máá ñahan jeē nándāha jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñáyuu jeē jíni sōho, suni na cáhān i:

Nehen, quívicoo ró ndaha ya.

Te tāca ñáyuu cájichī jeē cácuni i coho i, na quívicoo i ndaha ya, te súcuan-ni na cóho i ndute jeē cótecu i ní cáni sáha.

<sup>18</sup> Te tāca ñáyuu jíni sōho jnūhun Yaā Dios jeē yosó núū tútu yáha, cáhān níhin ri jíin i: Núu ndé ñáyuu chisóó i nuū jnúhun cáhān tutu yáha, te Yaā

Dios chisóó yá jnūndóho cáhān tutu yáha, ndoho i.

<sup>19</sup> Te núu ndé ñáyuu quende i jecu jnūhun cáhān tutu yáha, te Yaā Dios quende yā tahū i jeē yosó núū libro jeē yosó síhví ñáyuu cotecu ní cáni, te ma níhín i tahū i ini ñuu íi ún. Te tutu yáha cúu jeē cáhān síquī tācá un.

<sup>20</sup> Te Yaā jeē ni cáhān tāca jnúhun yáha, suhva cáhān yā:

Jendaá jeē ndiji yachī rī, achí yá.

Amén. Súcuan na cóo. Jítoho ná Jesús, jícán tahú na jéē ndíji yachī ní.

<sup>21</sup> Te ñúhun ni rī jeē Jítoho yō Jesucristo na sáha ga yā jeē váha róhó jíjñahan ró. Amén.